


Ireclota Mene



The New Testament in the Bine Language of Papua New Guinea

Ireclota Mene
The New Testament in the Bine Language of Papua New Guinea
Nupela Testamen long tokples Bine long Niugini

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 11 Nov 2022 from source files dated 9 Oct 2020
0b7e6c06-9d83-54ea-bc99-bd2fbdf2dfe4

Contents

FRT	1
Matayo	2
Mareko	48
Luuka	75
Yoane	125
Apostolo	157
Rooma	201
1 Korinito	223
2 Korinito	241
Galatiya	254
Epeso	262
Pilipi	269
Kolose	274
1 Tesalonika	279
2 Tesalonika	283
1 Timoti	286
2 Timoti	292
Taitus	296
Pilimon	299
Heberu	301
Yakobu	317
1 Peteru	323
2 Peteru	330
1 Yoane	334
2 Yoane	339
3 Yoane	340
Yuuda	341
Apokalupo	343

Ireclota Mene
The New Testament in the Bine Language of Papua New Guinea
Nupela Testamen long tokples Bine long Niugini

Ireclota Mene

The New Testament in the Bine Language of Papua New Guinea
 [bon]

Translation by Wycliffe Bible Translators

© 1993, The Bible Society of Papua New Guinea

Print publication 1993 by The Bible Society of Papua New Guinea

Web version

© 2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

Ireclota Mene

MATAYO ME MIIJI MENE

Yeesu Keriso me Kaakesaare Gemi

(Luuka 3:23-38)

- ¹ Ai lui Yeesu Keriso me kaakesaare bime ngii gemi. Yeesu lui Daawida me kaakesaare ge, Daawida lui Abrahamo me kaakesaare ge.
- ² Abrahamo lui Isacako me Babe ge,
Isacako lui Yakobu me Babe ge,
Yakobu lui Yuuda piyepu teeme naniganewaleyame bime babe ge,
- ³ Yuuda lui Perese naabi Sera bime babe ge, teeme mage lui Tamara tage.
Perese lui Hesoroma me babe ge,
Hesoroma lui Arama me babe ge,
- ⁴ Arama lui Aminadaba me babe ge,
Aminadaba lui Naasona me babe ge,
Naasona lui Salamona me babe ge,
- ⁵ Salamona lui Boasa me babe ge, teeme mage lui Rahaba tage.
Boasa lui Obeda me babe ge, teeme mage lui Ruuta tage.
Obeda lui Yese me babe ge,
- ⁶ Yese lui Daawida me babe ge, lui te mope biname me äbituji.
Daawida lui Solomona me babe ge, teeme mage lui Uriya me coga tage.
- ⁷ Solomona lui Rehoboamo me babe ge,
Rehoboamo lui Abiya me babe ge,
Abiya lui Asa me babe ge,
- ⁸ Asa lui Yosepata me babe ge,
Yosepata lui Yorama me babe ge,
Yorama lui Osiya me babe ge,
- ⁹ Osiya lui Yotama me babe ge,
Yotama lui Ahasa me babe ge,
Ahasa lui Hesekiya me babe ge,
- ¹⁰ Hesekiya lui Manasa me babe ge,
Manasa lui Amona me babe ge,
Amona lui Yosiya me babe ge,
- ¹¹ Yosiya lui Yekoniya naabibime babe ge. Pui padare cabu Yosiya liba teeme bägrä bine jepänimuji, Babloniya biname cina Israela biname bine joomläjimujisi teeme cewe me waadename.
- ¹² Israela biname cina liba Babloniya je icrajimuji,
piba Yekoniya Salatiyelu ne jepänuji.
Salatiyelu lui Serubabelu me babe ge,
- ¹³ Serubabelu lui Abyuda me babe ge,
Abyuda lui Eliyakima me babe ge,
Eliyakima lui Asora me babe ge,
- ¹⁴ Asora lui Sadoka me babe ge,
Sadoka lui Akima me babe ge,
Akima lui Elyuda me babe ge,
- ¹⁵ Elyuda lui Eliyasara me babe ge,
Eliyasara lui Matana me babe ge,
Matana lui Yakobu me babe ge,
- ¹⁶ Yakobu lui Yoosepa me babe ge, lui Mariya me rooriye ge. Mariya te Yeesu ne jirnguji, lui ne Keriso ca einenisi.
- ¹⁷ Yoo siige, footin kaakesaare gemi Abrahamo ca ngälu Daawida ne oomlaname, cuta nuuja footin gemi Daawida cabu ca ngälu Israela biname bine liba ewadimujisi Babloniya cewe me, cuta puma cita ca nuuja footin gemi ngälu Keriso ne oomlana, biname bine nüiya cabu ca lui te cire yäasecräremepi.

Yeesu Keriso me Aplimla

(Luuka 2:1-7)

- ¹⁸ Yeesu Keriso me aplimla apu gyene: teeme mage Mariya lui Yoosepa me ciweloooloyame ge. Teepe camuge atejäclmuta, Mariya liba umle äbitige, egä tabe Aceji Seemo name mäpumäpu gwene. ¹⁹ Teeme ciweloooloyame Yoosepa epu biname ge, lui te iyeta mule bine Moose me Cotre ibi jaawenimuge, yepä tabe singi lica ge Mariya ne biname bime sobe

cabu teeme mäpumäpu poto cidi me aitnejame, pui Cotre te lipu jiićenige wawename, yepä tabe singi ge teebine ogä ägyime. ²⁰ Tabe liba ngene jotwananige teebine ägyime, Yageyame me mename seemo te wama cabu piba taboclomtige teeme bau me, jejige egä, “Yoosepa, Daawida me kaakesaare, wälu gone läbitute Mariya ne coga me acatame, ingle tabe Aceji Seemo name mäpumäpu gwene. ²¹ Tabe bägrä ne pa jäärngepi, maane ngii einepi Yeesu, ingle tabe te teeme binamewale bine teeme niya cabu ca cirege äsecrera.”

²² Siige, ai mule cina äbitininisi naace tääpume toraca me äbitame Yageyame me yepä mename biname te lipu teeme mene jeitnäjuji egä, ²³ “Camu tääpe cama ngulebägrä te mäpumäpu cirege, siige bägrä ne cire jääpänepi. Teebine Emanuwela ca cire yaainepesi.” Emanuwela lui egä ‘Acejiyame pisi nyene mine cama.’

²⁴ Siige Yoosepa liba arpinantige, tabe Mariya ne coga me jowenige, Yageyame me mename seemo te teebine lipu jejige. ²⁵ Yepä teepi magebi rooriye bime mule lica jaawenäsi, ngälu Mariya bägrä ne jirngige, siige Yoosepa ngii ecäriige Yeesu.

2

Biname cina Secluji Bimu Acita Gome ca Yeesu ne Päpäname

¹ Heroda lui padare cabu mope biname me enajuji, Yeesu piba aplimluji Betelehema cewe je Yuudea probins cabu. Pui ingwe gaabe ca lui cina labiberäjininusi wale poto cidi me, seclige bimu acita gome ca Yerusalema me, ² biname bine puma itemläjemisi egä, “Kirece bägrä ärngeji luci yene, lui te cirege Israela biname bime mope biname me äbita? Cine teeme wale ne jääpänepesi, bimu acita gome ca liba tacitepi, siige cine naclige teeme gome kokorare ca äpednerame.” ³ Mope biname Heroda liba itecijige ai mene, tabe mage ngenecu mäpu me äbitige cuta iyeta Yerusalema biname piiyepu. ⁴ Tabe ala tesoglicmige iyeta modamoda iiwäreja biname piiyepu cotre abiberäja biname bine, siige itemlimige egä, “Keriso lui te biname bine niya cabu ca cirege äsecrera, tabe luma cire laplimlepi?” ⁵ Teepi Heroda ne jejisi egä, “Tabe cire laplimlepi Betelehema cewe je Yuudea probins cabu. Cine umle apu gemi, ingle Acejiyame me mename biname te ituge oogära ai poto cidi me apu egä,

⁶ ‘Betelehema cewe Yuudea gawe cabu,
maane papa cewe lica gäte nuuja Yuudea cewe cabu ca,
ingle mäame cabu ca cirege mope biname otni,

lui te cäme Israela biname bine cire yaawademepi.’”

⁷ Heroda liba ai mene itecijige, tabe piba ogä ala tesoglecmige bimu acita gome ca lui cina seclumi Yerusalema me, siige itemlimige egä, “Weene liba jääpänepewe wale ne acita?”

⁸ Heroda liba umle äbitige, wale te liba tacitepi, peei ingwe gaabe ca tabe piba pui biname bine jityepimige Betelehema me apu mene cama egä, “Äte naaclege cängena bägrä ne ärngime. Liba jepänepewe, piba täcnäripeye cebine umle wawename. Cane cuta piba pa lädepene kokorare ca äpednutame teeme gome.” ⁹⁻¹⁰ Siige teepi eclige, gaabegabe jepänisi pui yepä wale ne, teepi lui ne jääpänanepesi bimu acita gome ca. Teepi liba jepänisi, siige mage gege ecisi. Wale te teeme niinäce me äbitige, ngälu emä bojä jegige, bägrä te luma enajige. ¹¹ Teepi mete bora me eäbcnisi, siige bägrä ne liba jepänisi teeme mage Mariya cama, teepi kokorare ca ipednemalimisi teeme gome teebine opo gaabe me acitame. Puma cita ca teepi baiko bine jepatnimisi, isemisi gol, müjirage lengo pauda uubudera tääpume piiyepu müjirage lengo uli ngedo ngii müira, siige ecärisi bägrä matikäli ne.

¹² Pui ingwe gaabe ca teepi teeme cewe me nuuja gaabe cabu äcnäriige, ingle Acejiyame te teebibine wama ca umle jebenimige egä, “Weene gone läcnärininuye Heroda ne umle wawename.”

Mariya Yoosepa naabi Uucräsi Aikupito me

¹³ Bimu me acita gome ca lui biname cina saaclepi, liba äcnäriige teeme cewe me, piba Yageyame me mename seemo te taboclomtige Yoosepa bau me, wama secäriige egä, “Arpinanti, bägrä ne ecati teeme mage cama, uucratnäneye Aikupito me. Puma inajäpi, ngälu cane te pa jijipene weene äcnärame. Weene ai ne naace name pi wawename, ingle Heroda bägrä ne pa jäärngepi budre me aglime.” ¹⁴ Puma cita ca Yoosepa arpinantige, bägrä ne ecatige mage cama, siige ciye Betelehema ne sebmälänisi Aikupito me otnime. ¹⁵ Teepi puga aanajänige, ngälu Heroda budre äbitige. Ai mule te naace tääpume äbitige ibibi äbitame mename biname te lipu Yageyame me mene jeitnäjuji egä, “Aikupito ca cane cäme bägrä ne ituge ala asogleca.”

Bägrä bine Eglecmisi Betelehema je

¹⁶ Heroda liba umle äbitige, egä bimu acita gome ca lui biname cina saaclepi teebine senlepnäjumesi, siige tabe caapocapo claabe te joomlige. Tabe jejemige neeneni kämäge cama

imäbägrä bine coo piyepu teeme iganewale bine iyeta budre me aglecame Betelehemame cewe ngalebora je piyepu teeme wajwa je lui cewe cabu ta. Tabe neeneni kämäge cama imäbägrä bine piyepu teeme ingwe ca lui imäbägrä bine aglecame naace popi jejemige, ingle bimucita gome ca lui cina saaclepi, tabe teeme bau ca umle läbitepi, egä neeneni kämäge ngalebora teepi pui wale ne jääpänanepesi. ¹⁷ Apu toraca me äbitige mename biname Yeremiya lipu niinäce gaabe me itu jiiucuji egä, ¹⁸ “Teepi Raama cewe ca ala itecijenemige piyepu ngenecu bora babo ele. Raakela ele ongenige teeme bägrä bime täapume, tabe singi lica teebine owe äswime, ingle teepi opo puma lica gemi.”

Yoosepa naabi Aikupito ca Täcnäränisi

¹⁹ Heroda liba budre äbitige, piba Yageyame me mename seemo te taboclomtige Yoosepa bau me Aikupito je, wama secäriige egä, ²⁰ “Arpinanti, bägrä ne ecati teeme mage cama, äcnäräneye Israela gawe cabu me, ingle lui cina bägrä ne aglime jaawenanepesi, budre gemi.” ²¹ Puma cita ca Yoosepa arpinantige, mage bägrä bine aacatige, äcnäränisi Israela me.

²² Yoosepa liba itecijige, egä Arkela teeme babe Heroda me puupu itu jaacatepi, mope biname me itu läbitepi Yuudea probins ngalebora, siige tabe wälu äbitige Yuudea me acenutame. Puma cita ca Acejiyame te cuta nuuja wama secäriige tabe otnime Galilaya probins cabu me, siige tabe piyeme ädige. ²³ Teepi puga aanajänige cewe ngii Nasareta je. Apu ibibi äbitige Acejiyame me mename biname bime mene egä, “Teebine Nasareta biname ca cire yaainepesi.”

3

*Yoane Niiye ca Äciseja Biname te Mene Jejananemige
(Mareko 1:1-8; Luuka 3:1-18; Yoane 1:19-28)*

¹ Pui padare cabu Yoane niiye ca äciseja biname te tädige, gije abacitige mene jajanename daapo taatu cewe cabu je Yuudea gawe ngalebora. ² Tabe apu jiiicemige egä, “Weene niiya mule cabu ca atatröngärineye, ingle Acejiyame te mameta gyene biname bine waadena.” ³ Yoane peese nyene pui biname, Acejiyame me mename biname Isaya lui potocidi me itu jiiucuji egä,

“Daapo taatu cewe cabu biname te babo tagepogogo ca cire jiiicepi egä,
‘Gaabe ne emacetnäjeje Yageyame täapume,

weeme mule bine conocäco jewenemeye teeme otni täapume!’ ”

⁴ Yoane me cäbletääpe lui kamela me ngäli ca wawenäneji ge, piyepu tabe kamela tääpe baagi ca asigräneji ge ibi cabu. Tabe sesi pana gwidape bine yäärngäjimuge piyepu uri niiye yäänäjuge. ⁵ Biname cina saacluge teeme bau me Yerusalema ca, iyeta poto ta Yuudea gawe cabu ca piyepu Yoridana baduge neeneni poto ca. ⁶ Tabe piba teebibine niiye ca jicisäjemige Yoridana baduge cabu, teepi liba teeme niiya mule bine jewabudnäjimisi.

⁷ Yoane liba jepänimige bucurage Parisea sigu biname piyepu Sadukea sigu biname cina otni teeme bau me niiye ca äciseja täapume, tabe jejemige egä, “Weene cobyame pana angletne-jayame biname gemi! Weene apu jingenininige, egä weebibine liba niiye ca birige äciseja, weene siige piba cire uucratnipeye mäpu daremu cabu ca, Acejiyame te lui ne cire täätpepi. ⁸ Weene eei mule bine jebenemepewe, lui cina jiwabininusi, egä weene siige bii tatatröngärininiiye niiye cabu ca. ⁹ Piyepu cuta weene apu gone jingenininige egä, ‘Ingle Abrahamo lui cime kaakesaare gyene, peei name pi cine mäpu daremu ne lica cirege päpäna Acejiyame bau ca.’ Cane weebibine jijenininine, egä Acejiyame liba singi gyene, tabe ibibi gyene ai kula bine atepengäjame Abrahamo me kaakesaare täapume. ¹⁰ Yäpä acitäneji gyene uli maape. Lui uli cina müjirage kuu lica yäyemuge, yaargawimusi, uliobo cabu me yisabimusi. ¹¹ Cane weebibine niiye ca jicisäjeninininine awabame, egä weene siige bii tatatröngärininiiye weeme niiya mule cabu ca. Yepä laati te pa tädepi cäme ingwe ca, tabe weebibine Aceji Seemo ca piyepu uliobo ca page jicisäjipi. Uliobo te lipu domäji bine yaabemuge, tabe pepu pagege weeme cabu ca jugijugi mule bine äciseja. Tabe baborage gyene, cane matikäli gäne. Cane ibibi lica gäne teeme ernge gwidape seea iibirame. ¹² Teeme pisi nyene wiiti kuu ämleceja gwidape wiiti kuu mälwä cama maramara me wawename. Tabe kuu bine teeme mete cabu me cire yaawademepi, mälwä bine ätuma cäco uliobo cabu me cire yisabemepi ayi täapume.”

*Yoane te Yeesu ne Niiye ca Jicisäjige
(Mareko 1:9-11; Luuka 3:21-22)*

¹³ Piba Yeesu tädige Galilaya gawe cabu ca Yoridana baduge me Yoane te teebine niye ca puma äcisejame. ¹⁴ Yepä Yoane singi ge Yeesu me ngenecu atatröngtame, siige tabe jejige egä, “Maane te cebine müji niye ca äciseja, peei name pi maane ngeno me tädite cäme bau me niye ca äciseja täapume?” ¹⁵ Yeesu jejige egä, “Ai taje maane jeweni, cane ngena täapume naajenine. Apu mule ca mine jewenenago, Acejiyame ngena täapume singi.” Yoane Yeesu me mene jecatige, siige teebine niye ca jicisäjige. ¹⁶ Yeesu ne liba niye ca jicisäjige, tabe piba tarpatige niye cabu ca. Piba taatu cabucewe te iitnige teeme täapume, siige tabe jepänige Acejiyame me Seemo te äina je gimäe ele pana teeme papa cabu me. ¹⁷ Puma cita ca tagepogogo te tädige cabucewe ca egä, “Ai lui cäme ngenecurage bägrä gyene. Cane baborage ngenecu müiji gäne teeme täapume.”

4

Satani te Yeesu ne Epicetnäräjige (Mareko 1:12-13; Luuka 4:1-13)

¹ Puma cita ca Aceji Seemo te Yeesu ne ecanige daapo taatu cewe cabu me Satani te teebine puma apicetnäräjame. ² Tabe liba footi bimü footi ciye cama deedei cäco enajige puma, piba loolomecewe te joomlige. ³ Puma cita ca Satani te teeme bau me tädige, jejige egä, “Maane liba Acejiyame me Bägrä gäte, ai kula bine jejemi buluduu me atepplengame.” ⁴ Yeesu jejige egä, “Oogäräneji mene te apu jüicenige egä, ‘Deedei taatu te ireclota lica yäacärümuge biname bine, yepä iyeta mene Acejiyame lui jüicemuge.’”

⁵ Puma cita ca Satani te Yeesu ne ecanige babo cewe Yerusalema me, Acejiyame täapume mara me lui cewe wawenäneji ge, siige teebine puga etecwantige iiwäreja mete toro cabu caburage je, ⁶ jejige egä, “Maane liba Acejiyame me Bägrä gäte, maane ama cita ca uuplacamti gawe me, ingle Oogäräneji mene te jüicenige egä, ‘Acejiyame te teeme mename seemo bine cire jaajemepi mäame poto cidi me; siige teepi meebine teeme ime cabu cire naacanepesi,

piba maane mäame ernge ne kula cabu lica pa jimudnärepi.’”

⁷ Yeesu Satani ne jejige egä, “Oogäräneji mene te cuta jüicenige egä, ‘Maane dupe päpäname mäamämu gone läbitute Yageyame mäame Acejiyame ne apicetnäräme, egä tabe kälyä nawenuge.’”

⁸ Puma cita ca Satani te Yeesu ne ecanige babo podo caburage me, puma teebine jwabäjige maramara mope biname bime gawe piyepu teeme iyeta ljalija gwidape, ⁹ siige jejige egä, “Iyeta ai cane meebine näacärenine, maane liba kokorare ca ääpednutenite cebine awejename.” ¹⁰ Yeesu teebine jejige egä, “Satani, äyebingti cäme bau ca, ingle Oogäräneji mene te apu jüicenige egä, ‘Yageyame, mäame Acejiyame ne yaawejanuye, cuta teeme taatu singi ne jewenepi.’” ¹¹ Siige Satani te Yeesu ne ebmalige; Acejiyame me mename seemo cina piba seclige teebine ätityerame.

Yeesu Teeme Kaakesea ne Jegednige Galilaya Probins cabu (Mareko 1:14-15; Luuka 4:14-15)

¹² Yeesu liba itecijige, egä Yoane ne krokeciye mete me bisinglantisi, tabe acnenutige Galilaya probins cabu me. ¹³ Tabe Nasareta cewe je lica enajige, yepä tabe ädige Kapre-nauma cewe je lenajame, lui tage Galilaya sawa gome Seblona Napatali naabime gawe cabu. ¹⁴ Apu toraca me äbitige mename biname Isaya me mene egä,

¹⁵ “Seblona piyepu Napatali naabime gawe piyepu lui gawe Meditareniya malu gome, piyepu Yoridana baduge me bimü acita gome ca lui gawe piyepu Galilaya gawe, Acejiyame umle cäco biname cina luma icrajinige;

¹⁶ ai maramara gawe cabu, lui biname cina krokeciye cabu icrajinige, teepi babo apacyera ne cirege päpäna.

Cuta lui biname cina wäluwälu icrajinige budre mule name pi, apacyera te teeme cabu me cire luungepmalepi.”

¹⁷ Yeesu lui padare acnenutige Galilaya me, tabe gije abacitige mene jajanename egä, “Tatatröngärineye weeme niya mule cabu ca, ingle Acejiyame te mameta gyene biname bine waadena.”

Yeesu Poto Cibubade Biname bine Ala Tesoglicmige (Mareko 1:16-20; Luuka 5:1-11)

¹⁸ Yeesu liba ädige Galilaya sawa ligi ta, tabe jääpäniige nanigane wäsi bine, Simona (lui ne einenisi Peteru ca) piyepu teeme igane Andrea. Teepi net bine yisabäjemäsi sawa bora me, ingle teepi cibubade biname ge. ¹⁹ Yeesu teebibine jaajige egä, “Siclege cane cama otnime cäme abiberäja bägrä lenajame. Weene niinäce lipu cibu bine toomläjenanemumeye, page

cane weebibine ibiberäjiniine biname bine căme bau me pepu waadename.”²⁰ Piba taatu teepi teeme net bine ebmalemäsi Yeesu cama yepä otnime.

²¹ Puma cita ca cerămu tabe ädige, cuta nuuja nanigane wăsi bine jääpănige, Yakobu naabi Yoane Jebedayo me băgră. Teepi teeme poo cabu jage teeme babe Jebedayo cama, net bine emacetnăjemăsi. Yeesu Yakobu Yoane naabibine ala taasoglicige teta cama otnime. ²² Teepi piba taatu teeme babe ne ebmalăsi poo cabu, Yeesu cama aaclige.

Yeesu Biname bine Ebiberăjimige, Mene Jejananemige, Pita cabu ca Miiji Jewenanemige (Luuka 6:17-19)

²³ Yeesu Galilaya probins cabu iyeta poto ta waatnetnăjuge. Tabe biname bine yaabiberăjimuge teeme abasecretna mete cabu ta, Miiji Mene jaajanenemuge, egă Acejiyame te biname bine pagege waadena, piyepu cuta tabe biname bine maramara pita cabu ca miiji me jaawenanemuge.

²⁴ Yeesu ne idre jecenanisi iyeta poto ta Suriya gawe cabu. Pipu pi teeme bau me biname bine sewadăjemisi, lui cina cewe loocananinusi maramara pita coo măpu name pi, naace niiyarage cable teeme trupa cabu, oonina pita piyepu tăape nuuja poto budre. Yeesu iyeta teebibine miiji me jewenanemige. ²⁵ Bucurage biname cina Yeesu ne ingwe sicwisi Galilaya gawe cabu ca, Ten Modamoda Cewe gawe cabu ca, Yeruselema ca, Yuudea gawe cabu ca piyepu Yoridana baduge me bimu acita gome ca.

5

Ngenecu Miiji Laati Bemi? (Luuka 6:20-23)

¹ Yeesu biname tomi bine liba jepănimige, tabe piba jegelige podo cabu me, puga adnatege. Teeme abiberăja băgră cina jewaclomtisi teebine, ² siige tabe gije jecitige teebibine abiberăjame egă,

³ “Ngenecu miiji eei gemi,

laati bemi owecumete seemo ireclota ngalebora;

Acejiyame te teebibine yaawadimuge.

⁴ Ngenecu miiji eei gemi,

laatibi ele yaangenetnemuge;

Acejiyame te teebibine owe yăaswemuge.

⁵ Ngenecu miiji eei gemi,

laati bemi Acejiyame taatu cabu me ire;

teepi jääpănimusi Acejiyame ngena tăăpume ituge licana.

⁶ Ngenecu miiji eei gemi,

laati bemi baborage singi waweneme Acejiyame me singi;

teeme peei singi te toraca me lâbituge.

⁷ Ngenecu miiji eei gemi,

laatibi poto biname bine owecu jaawenimusi;

teepi cuta owecu ne jääpănusi teeme tăăpume.

⁸ Ngenecu miiji eei gemi,

laati bemi yepă taatu ngeneme atwana cama;

teepi Acejiyame ne jääpănusi.

⁹ Ngenecu miiji eei gemi,

laati bemi poode wawenetnăja biname;

teebibine Acejiyame me băgrăwale ca birige aina.

¹⁰ Ngenecu miiji eei gemi,

biname cina lui bine sabe jaawenanemusi,

ingle naace popi teepi Acejiyame me singi ne jaawenusi;

Acejiyame te teebibine yaawadimuge.

¹¹ Weene ngenecu miiji gemi, biname cina liba niya mene jicemususi weeme poto cidi me, sabe jiwenininusi piyepu walya jicamininusi cămiji pi. ¹² Weene miiji baborage ngenecu miiji piyepu gege, inge weene cabucewe je baborage daremu ne cire jepănepeye. Acejiyame me meneme biname lui cina weeme niinăce gaabe itu secluji, teebibine cuta pepu ituge sabe wawena.”

Yeesu me Binamewale Epu Pana Gemi Caapereniye coo Apacljyera Liyepu (Mareko 9:50; Luuka 14:34-35)

¹³ “Weene caapereniye pana gemi gawecewe biname bime tăăpume. Caapereniye me kaakesea pisi nyene, yepă teeme mite te liba lapiruge, weene ingwe ca äblicăco caapereniye ne cuta mite me wawena. Mite căco caapereniye nuuja miiji lica gyene, peei name pi gaabe cabu yaajarusi, biname cina siige ernge ca jääbrecăjusi.

¹⁴ Weene apaclyera pana gemi gawecewe biname bime täápume. Babo cewe te podu papa cabu äblicäco ämlitäneji lenajame. ¹⁵ Biname te liba lampa ne jaabotuge, tabe diiba ca lica yaacwabuge, yepä cabu me yaatecwantuge, siige puma cita ca biname bine saapaclyäremuge mete ngalebora. ¹⁶ Weene pepu cuta biname bine yaapaclyäremuye, egä teepi liba weeme miijimiji mule bine jääpänanemus, siige piba eso yääcärusi weeme Babe ne, cabucewe je lui te enajenige.”

Yeesu me Abiberäja Mene Cotre potu cidi me

¹⁷ “Weene gone apu ang, egä cane itu tädujine Moose me Cotre mene bine piijepu Acejiyame me mename biname bime abiberäja mene bine sabe wawename. Eewe, cane tädujine peei mene bine toraca me wawename. ¹⁸ Cane toraca jijenininine, egä cabucewe piijepu gawecewe liba taatu aanajenige, licarage nuuja leta ne coo matikolä maaku ne cirege äyebingta Cotre mene cabu ca, ngälu lui mule potu cidi me jicenenemige, cirege äbita. ¹⁹ Pipu pi laati te liba jaatropangtuge yepä cotre ne, ngänu gyene matikolä cotre, piijepu biname bine yaabiberäjimuge teepi peei yepä mule wawename, tabe matikali gyene Acejiyame te lui biname bine yaawadimuge. Yepä laati te cotre bine yääcwetnimuge piijepu biname bine yaabiberäjimuge teepi peei yepä mule wawename, tabe baborage gyene Acejiyame te lui biname bine yaawadimuge. ²⁰ Cane toraca mene jijenininine: weeme conocäco mule cina liba lica itucärenenemisi Parisea sigu biname piijepu cotre abiberäja biname bime conocäco mule bine, siige Acejiyame te piba weebibine lica iwadininuge.”

Yeesu me Abiberäja Mene Claabe Äbita potu cidi me

²¹ “Weene ituge ätecija, egä mime saarewale bine sasa jajeji gemi egä, ‘Gone nuuja biname ne budre me yaagluye. Laati te liba yaagluge biname ne budre me, teebine cirege ablawa.’

²² Yepä cane te jijenininine weebibine, egä laati te liba claabe läbituge nuuja ätrunga biname täápume, teebine miiji birige ablawa. Coo laati te liba teebine jaajuge egä, ‘Maane papa biname gäte,’ siige pui biname ne miiji yaacanusi mutre biname cina ablawame. Coo piijepu laati te liba nuuja ätrunga biname ne jaajuge egä, ‘Maane Acejiyame umle cäco biname gäte,’ tabe epu niyarage gyene, egä tabe miiji uliobo puupu cabu me otni.

²³ Peei name pi maane liba yaacanute owecu gwidape ne Acejiyame me mete cabu iiwäreja dade cabu acitame, siige maane puma ngene jwaatwute egä, ‘Nuuja ätrunga biname te claabe gyene cäme täápume,’ ²⁴ maane owecu gwidape ne ebmalepi iiwäreja dade opo gaabe, ädepi poode wawename mäame biname cama, piba tacnenutepi owecu gwidape Acejiyame ne ceerame.

²⁵ Laati te liba naaitnäjuge, siige singi birige ablaweja puupu cabu me acaname, maane gaabegabe teebine watawata poode me jaawenute, weene liba cäro camu ge ablaweja puupu cabu me atyaramta. Maane liba poode wawena cäco, cije tabe ablaweja biname me ime cabu naacituge, siige tabe te teeme ätityera biname bine jaajemuge meebine acaname krokeciye mete cabu acitame. ²⁶ Cane toraca mene naajenine: maane lica tasatute, ngälu iyeta daremu yaapirute.”

Yeesu me Abiberäja Mene Magebi piijepu Ngulebägrä Ero potu cidi me

²⁷ “Weebibine ituge abiberäja egä, ‘Sargi ero mule gone.’ ²⁸ Yepä cane toraca jijenininine, egä laati te magebi ne coo ngulebägrä ne singisingi jwääpänuge ten cama ero mule wawename, tabe teeme ngenecu bora uja ero jwaawenuge.

²⁹ Mäame camu potu irecu te liba naawenuge singi ädrime maane niija mule wawename, maane miiji watatarage mäame peei ngene atwana ne äyebingta, epu pana irecu ne lipu juungyatute, siige yaajarute. Niija gyene maane yepä piicwa ne apesera, yepä cerämu niija gyene maane iyeta piicwa cama uliobo puupu cabu me otni. ³⁰ Mäame camu potu ime te liba naawenuge maane singi ädrime niija mule wawename, maane miiji pui ngene atwana ne watatarage äyebingta, epu pana ime ne lipu joopotute, yaajarute mäame bau ca. Niija gyene maane yepä piicwa ne apesera, yepä cerämu niija gyene maane iyeta piicwa cama uliobo puupu cabu me otni.”

*Yeesu me Abiberäja Mene Coga Ägyi potu cidi me
(Matayo 19:9; Mareko 10:11-12; Luuka 16:18)*

³¹ “Biname bine cuta ituge abiberäja egä, ‘Rooriye te liba singi teeme coga ne ägyime, tabe miiji peba ne oogära ägyi potu cidi me, siige pui peba cama jwääyepuge teeme coga ne.’

³² Yepä cane te jijenininine: lui rooriye te liba teeme coga ne jwäägyuge potu ingle name pi yepä lica sargi ero mule name pi, siige tabe teebine jwaawenuge ero wawename, tabe liba nuuja rooriye ne yaacatuge. Cuta nuuja rooriye lui te teebine waacatuge, tabe ero jwaawenuge.”

Yeesu Ngena Ebiberäjimige Mene Atropengta potu cidi me

³³ “Weene cuta ituge ätecija, egä mime saarewale bine sasa jajeji gemi egä, ‘Maane gone mäame mene atropengta, yepä jewenepi maane Acejiyame me ngii cabu ngena ituge jaji wawename.’ ³⁴ Yepä cane te jijenininine weebibine, egä weene liba mene iicema je, weene gone nuuja me ngii cama iicana pui mene ne atropengta cäco me wawename. Weene gone cabucewe me ngii cama iicana, ingle Acejiyame me lenaja puupu gyene. ³⁵ Cuta gone gawecewe me ngii cama iicana, ingle teeme ernge acita gawe gyene; cuta piiyepu Yerusalema me ngii cama gone iicana, ingle babo mope biname me cewe gyene. ³⁶ Määme mope me ngii cama cuta gone jicute, ingle maane äblicäco gäte yepä matikäli edingäli ne bulubulu me coo cäsäcäsä me wawena. ³⁷ Weene gone nuuja mene jicuye, yepä ‘yoo’ taatu jicuye, weene liba singi ngena wawename, cuta ‘lica’ taatu jicuye, weene liba singi lica. Nuuja mene cerämu weene liba jicuye, peei lui Satani me bau ca gyene.”

Yeesu me Abiberäja Mene Daremu Wawena poto cidi me
(Luuka 6:29-30)

³⁸ “Weebibine ituge abiberäja egä, ‘Biname te liba nuuja biname me irecu ne sabe jaawenuge, pui biname ne cuta miiji daremu awecnista teeme irecu ne sabe wawename. Piiyepu biname te liba nuuja biname me giricu jääglecnutuge, pui biname ne cuta miiji daremu awecnista teeme giricu ne äglecnutame.’ ³⁹ Yepä cane te jijenininine weebibine, egä nuuja biname me niija mule gone daremu wawena. Biname te liba camu poto lakace cabu noororuge, maane latatrongtute tabe meebine säwäci poto lakace cabu cuta oororame. ⁴⁰ Piiyepu biname te liba naacanuge ablaweja puupu cabu me, ingle tabe singi läbituge mäame soto täापume, maane miiji cuta mäame acwaba gwidape yäacärute. ⁴¹ Piiyepu biname te liba näädretnicuge maane teeme gwidape bine waadename yepä kilomiita pana padare me, maane neeneni kilomiita pana padare me ewademepi. ⁴² Biname te liba ngena täापume näätinäruge, maane miiji ecärepi. Coo tabe liba singi mäame gwidape watawata acatame, gone läbwäricute.”

Yeesu me Abiberäja Mene Cubuyame poto cidi me
(Luuka 6:27-28, 32-36)

⁴³ “Weebibine ituge abiberäja egä, ‘Weene weeme biname bime täापume singi inajininuge, yepä lui cina weebibine jimugitninsi, weene cuta teebibine jäämugetnemuye.’ ⁴⁴ Yepä cane te jijenininine weebibine, egä lui cina weebibine jimugitninsi, weene teeme täापume singi inajipi, piiyepu lui cina sabe jiwenininsi, weene teeme täापume irecu ätumutipeye, ⁴⁵ weene piba päbitipeye weeme Babe me bägräwale me, cabucewe je lui te enajenige. Tabe yepärage bimu ne jaawenuge acitame niija biname bime täापume coo miiji biname bime täापume. Tabe cuta ngupe säacärimuge, lui cina conocäco mule jaawenimusi cuta lui cina conocono mule jaawenimusi. ⁴⁶ Weene gone Acejiyame bau ca miiji daremu ne awagrija, weene liba eei biname bime taatu cabu me singi, lui cina weeme täापume singi. Niiyarage täks rarekaake utecrena biname cina cuta pepu jaawenusi. ⁴⁷ Piiyepu weene liba weeme binamewale bine taatu jaawablimuye, weene peei lui nuuja mara gwidape ne lica jaawenuye. Acejiyame umle cäco biname cina cuta pepu jaawenusi. ⁴⁸ Weene miiji epucäco lenaja, weeme Babe te lipu cabucewe je epucäco gyene.”

6

Yeesu me Abiberäja Mene Ceera poto cidi me

¹ “Weene miiji cängena ire, egä weene gone miijimiji mule bine wawenetnäja biname bime sobe cabu naace täापume teepi päpäname. Weene liba apu läbitininuye, weene nuuja daremu ne lica cirege päpäna weeme Babe bau ca, cabucewe je lui te enajenige. ² Pipu pi maane liba owecumete biname bine yäacäranemute gwidape, gone cabucabu yäacäranemute, walya biname cina lipu läbitaninusi abasecretna mete cabu ta piiyepu gaabe cabu ta. Teepi apu naace name pi läbitaninusi egä biname cina teebibine awepperäjame. Cane toraca mene jijenininine, egä teepi lui awepperäja ne jepänenisi biname bime bau ca, teeme daremu gyene. Teepi nuuja daremu ne Acejiyame bau ca lica cirege päpäna. ³ Yepä maane liba ngena owecumete biname bine yäacäranemute, ogä jewenemepi epu, camu poto ime te liba ngena jaawenuge, säwäci poto ime te umle cäco. ⁴ Piba biname cina umle lica birige mäame miijirage mule. Yepä mäame Babe lui te iyeta gwidape täापume umle, tabe meebine miiji daremu cire näacärepi.”

Yeesu me Abiberäja Mene Ireclu Ätumuta poto cidi me
(Luuka 11:2-4)

⁵ “Weene liba ireclu lätumutinuye, weene gone läbitininuye walya biname bime pana. Teepi liba ireclu lätumutinusi, teepi singi birige aclajutame abasecretna mete cabu coo piiyepu gaabe cube cabu, ingle teepi singi biname cina päpäname. Cane toraca mene jijenininine

weebibine, egä teepi lui awepyeräja ne jepänenisi biname bime bau ca, teeme daremu gyene. Teepi nuuja daremu ne Acejiyame bau ca lica cirege päpäna. ⁶ Yepä maane liba irecu läutumute, maane miiji mete bora me abacitepi, grana sermepi, siige piba irecu ätumutepi mäame Babe bau me, lui te päpäna cäco gyene. Maane ngena ne ogä jaawenute, mäame Babe te nääpänuge, siige daremu nääcärüge.

⁷ Weene liba irecu läutumutinye, weene gone bucurage papapapa mene iicema Acejiyame umle cäco biname liiyepu, lui cina apu jaangemuge egä, ‘Acejiyame te niticijinininige, ingle mime irecu ätumuta lui lecarage gyene.’ ⁸ Weene teeme pana gone läbitininuye, ingle weene liba yäätinärüge, tabe weeme Babe te uja umle bäbitige, weene singi ngena tääpu memi. ⁹ Weene apu irecu ätumutipeye:

Cime Babe cabucewe je,
mäame miijirage ngii ne opo gaabe me naacitesi.

¹⁰ Maane te biname bine ewademepi.

Mäame singi ne gawecewe cabu jaawenisi,
cabucewe je lipu jewenenisi.

¹¹ Page nicäranini cime bimu gaabegabe deedei.

¹² Maane gone cime niiya mule bine yaawadimute,
cine lipu lica yaawadimusi biname cina lui niiya mule niwenininusi cibibine.

¹³ Maane gone cibibine niwadininute mäpurage apicetnära cabu me,
yepä niwärintipi niiya te oomlana wälu pi.

¹⁴ Weene liba weemeweme niiya mule bine lica yaawadimuye, piba weeme Babe te cabucewe je weeme niiya mule bine lica yaawadimuge. ¹⁵ Yepä weene liba weemeweme niiya mule bine yaawadimuye, piba cuta weeme Babe cabucewe je weeme niiya mule bine yaawadimuge.”

Yeesu me Abiberäja Deedei cäco Lenäja poto cidi me

¹⁶ “Weene liba Acejiyame ne awejena name pi deedei cäco inajininuge, weene gone owecumete opo inajininuge walya biname cina liiyepu. Teepi naace name pi owecumete opo yaacrajuge, ingle teepi singi biname cina päpäname, egä teepi deedei cäco icrajinige Acejiyame ne awejename. Cane toraca mene jijenininine, egä teepi lui awepyeräja ne jääpänsi biname bime bau ca, peei lui teeme daremu birige. Teeme nuuja daremu lica cirege. ¹⁷ Yepä maane liba deedei cäco naanajuge ingle Acejiyame ne awejena name pi, miiji maane opo läcisäjute, mope oil ca laganute. ¹⁸ Pipu pi nuuja te umle lica birige, egä maane deedei cäco naanajuge, yepä mäame Babe, lui te päpäna cäco gyene, tabe taatu umle birige. Tabe te daremu cire näcärepi, ingle tabe umle gyene, maane ogä ngena ne jaawenute.”

Gone Gwidape bine Yaatomlicmuye Ai Gawecewe cabu

(Luuka 12:33-34)

¹⁹ “Weene gone miijimiji gwidape bine yaatomlicmuye weeme tääpume ai gawecewe cabu, potäte cina luma gwidape bine sabe jaawenimusi, liiya te luma joomlemuge, cuta piyepu eromaame cina liiyeme saacluge ero me. ²⁰ Yepä weene jewenemepeye miijimiji mule bine. Peei lui epu pana gyene, egä weene miijimiji gwidape bine yaatomlicmuye weeme tääpume cabucewe je, potäte cina luma sabe lica jaawenimusi, coo liiya te lica joomlemuge coo piyepu eromaame cina äblicäco äbäcna ero me. ²¹ Mäame miijimiji gwidape cina luma, mäame ngenecu te cuta puma.”

Irecu Lui Tääpe me Lampa Gegi

(Luuka 11:34-36)

²² “Irecu lui tääpe tääpume lampa gegi. Mäame irecu cina liba miiji birige, mäame tääpe te iyeta apaclyera taatu birige. ²³ Yepä mäame irecu cina liba niiya birige, mäame tääpe te cuta krokeciye cabu yaanajuge. Siige mäame cabu lui apaclyera liba krokeciye birige, piba mäame krokeciye lipu baborage gyene.”

Yeesu me Umle Mene Acejiyame piyepu Rarekaake poto cidi me

(Luuka 16:13, 12:22-31)

²⁴ “Biname te äblicäco neeneni modamoda biname bine acenena. Tabe nuuja ne jäägyuge, nuuja tääpume singi läbituge. Tabe nuuja ne opo gaabe me yaacituge, nuuja ne kaake ca sääcelyärüge. Peei name pi weene äblicäco gemi neeneni bine acenena, Acejiyame ne piyepu rarekaake ne.

²⁵ Cane peei name pi jijenininine, egä weene ngenecu gone, egä weene ngena jaarwuye, ngena yaanuye, coo piyepu weene ngena lasigrärinuye. Egäsu ireclota lui baborage gyene, deedei piyepu niye papa gemi; piyepu tääpe lui baborage gyene, cäbletääpe lui papa gemi. ²⁶ Jepänemeye, cabu je lui ele cina uujananisini, teepi gije lica yäätemusi, lica yäärucnimusi,

deedei cumä lica yaacranimusi, yepä weeme Babe cabucewe je tabe te teebibine cängena ire jetwenemige. Egäsu weene modamoda gemi, ele lui papa gemi. ²⁷ Weene nää miiji gemi weeme ireclota bine ngenecu mäpu ca lecaleca me wawename?

²⁸ Piiyepu weene ngena name pi ngenecu mäpu cäbletääpe poto cidi me? Weene jepänemeye baace popo cina lipu utenininisi. Teepe kaakesea lica jaawenimusi, cuta asigrera gwidape bine lica yaaterutäjimusi. ²⁹ Yepä cane weebibine jijenininine, egä ngänu gyene, mope biname Solomona puu miijirage cäbletääpe ca abasogäruji, yepä tabe epu miiji opo lica äbituji ai baace popo bime yepä te liiyepu. ³⁰ Acejiyame te liba apu yaabasogärümige baace bine, page lui cina ireclota gemi, ciyeciye siige uliobo cabu me yisabimusi, egäsu tabe cuta weebibine isigreräjininuge cäbletääpe ca. Weeme ätrunga lipu matimati gemi! ³¹ Weene miiji mäpu ngena atwanena bine abmaläcemame deedei, niye piiyepu cäbletääpe poto cidi me. ³² Acejiyame umle cäco biname teepe te jäärngemusi ai gwidape bine, yepä weeme Babe cabucewe je tabe uja umle gyene, egä ai weeme singi gwidape gemi. ³³ Päta weene miiji niinäce äbitipeye Acejiyame te weebibine waadename piiyepu weene wawename, tabe ngena täापume singi, siige Acejiyame te piba icärininuge iyeta weeme singi gwidape. ³⁴ Pipu pi weene ciyeciye täापume ngenecu mäpu gone; ciyeciye me mäpu lui teeme yene. Ai bimu me mäpu ibibi gyene ai bimu täापume.”

7

Yeesu me Abiberäja Mene Biname bine Atrana poto cidi me
(Luuka 6:37-38, 41-42)

¹ “Weene gone biname bine jaatranimuye, piba weebibine lica cirege atrana. ² Ingle naace popi weene lipu teebibine jaatranimuye, weebibine cuta pepu cirege atrana. Weene luma ngine yaatonäremuye biname bine, weebibine cuta puma ngine birige atonera. ³ Peei name pi gone mäame nuuja ätrunga biname me irecu cabu pläpu ne ire jaatwanute, maane liba uli pargi ne lica jääpänute mäame irecu cabu. ⁴ Baborage uli pargi liba pisi nyene mäame irecu cabu, maane miiji lica gäte mäame biname ne jaji egä, ‘Cane mäame irecu cabu ca pläpu ne jaacatene.’ ⁵ Maane walya biname gäte! Maane miiji niinäce uli pargi ne mäame irecu cabu ca acata, piba maane cängenarage jepänenite mäame biname me irecu cabu ca pläpu ne acatame.

⁶ Lui gwidape ne mara me ituge wawena Acejiyame täापume, weene drego bine gone yäacärümuye, teepe cije tatatrongärininusi weeme bau me, tuusasemalininusi. Piiyepu cuta weeme kusa bine gone yisabimuye blome bime bau me, teepe cije jääbrecäjemusi.”

Weene Itinäreye, Jirngeye, Eyäjeje
(Luuka 11:9-13)

⁷ “Itinäreye, piba pagege weebibine ceera: jirngeye, weene piba pagege päpäna; eyäjeje, piba pagege weeme täापume iitnana. ⁸ Iyeta lui cina yäätinärusi, teebibine yäacärümusi; lui cina jäärngusi, teepe jääpänusi; lui cina yäayäjusi, teeme täापume jiiitnusi. ⁹ Bägrä te liba yäätinäruge teeme babe ne deedei täापume, tabe kula lica yäacäruge. ¹⁰ Coo tabe bägrä te liba cibu täापume yäätinäruge, tabe niiyarage cobyame lica yäacäruge. ¹¹ Weene puu niija biname gemi, yepä weene umle gemi miijimiji gwidape weeme bägrä bine ceera. Egäsu nata weeme Babe lui cabucewe je enajenige, tabe cuta piba yäacaranemuge miijimiji gwidape, lui cina teebine yäätinärusi.

¹² Weene singi biname cina ngena wawename weeme täापume, weene miiji pepu wawena teeme täापume. Ai abiberäja lui Moose me Cotre cabu pisi nyene piiyepu Acejiyame me mename biname cina apu ebiberäjimujisi.”

Lui Gaabe te Ädenige Iyeteta Ireclota cabu me
(Luuka 13:24)

¹³ “Weene susurage grana cabu me ebäcneye, ingle lui grana gyene uliobo puupu cabu me, daamle gyene pui grana, piiyepu lui gaabe te ädenige pui grana cabu me plowa gyene, siige bucurage cina piiyeme otneninisi. ¹⁴ Yepä lui grana gyene iyeteta ireclota puupu cabu me, susu gyene pui grana, piiyepu lui gaabe te piiyeme ädenige mäpu gyene, siige nesae taatu cina pui gaabe ne jepänanenisi.”

Yeesu me Abiberäja Mene Uli piiyepu Teeme Kuu poto cidi me
(Luuka 6:43-44)

¹⁵ “Weene ireire inajipi walya mename biname bime täापume. Teepe weeme bau me saacluge maamoi bime opo pana, yepä teepe teeme ngenecu bora agliyame wulp pana birige. ¹⁶ Weene lipu uli ne opo yaawatnuye teeme kuu cabu ca, weene cuta teebibine pepu opo yaawatnimuye teeme mule cabu ca. Pägepäge seeasea cina waina kuu lica yäayemuge, cuta gargale cina lica piigi kuu yäayemuge. ¹⁷ Miijirage uli lui miijimiji kuu

yääyuge; niyarage uli lui niyaniya kuu yääyuge. ¹⁸ Miijirage uli te äblicäco niyarage kuu äyi; niyarage uli te äblicäco miijirage kuu äyi. ¹⁹ Iyeta uli lui cina niyaniya kuu yääyemuge, yaargawimusi, uliobo cabu yiisabimusi. ²⁰ Yoo, weene walya mename biname bine cuta teeme mule cabu ca opo yaawatnimuye.”

Mene Atrana Bimu poto cidi me

(Luuka 13:25-27)

²¹ “Iyeta lui cina najananusi egä, ‘Yageyame, Yageyame,’ teepi iyeteta ireclota ne lica cirege päpäna Acejiyame cama cabucewe je, yepä eei taatu cina cirege päpäna, lui cina jaawenimusi căme Babe cabucewe je ngena täapume singi. ²² Atrana bimu liba cirege, piba bucurage cina cire najanepesi egä, ‘Yageyame, Yageyame, cine nata mäame ngii cabu Acejiyame me tagepogogo mene jaajananemusi, cuta mäame ngii cabu niyaniya cable bine yäayecräjemusi piyepu bucurage ciitaca mule bine jaawenanemusi.’ ²³ Puma cita ca cane pui biname bine cire jaajemepene egä, ‘Cane umle căco gäne weene. Weene niya mule biname gemi, äyeblenğäjineye căme bau ca.’ ”

Yeesu me Abiberäja Mene Neeneni Mete Raranga Biname poto cidi me

(Luuka 6:47-49)

²⁴ “Iyeta biname lui cina yäatecijemuge căme ai mene, siige pui mene ibi jaawenimusi, teepi umle biname pana birige, lui te mete ne kula papa cabu erangige. ²⁵ Tabe lui mete ne erangige, siige ngupe te piba secirige, igi cama tädige, cuta babo buuwe te tipwäjige, yepä mete te lica itramige, inge kula papa cabu jage.

²⁶ Iyeta biname lui cina yäatecijemuge căme ai mene, yepä pui mene ibi lica jaawenimusi, teepi buduma biname pana birige, lui te mete ne koriyo papa cabu je erangige. ²⁷ Ngupe te secirige, igi cama tädige, babo buuwe te tipwäjige, siige pui mete te iyeta peega ecirige.”

²⁸ Yeesu liba teeme ai mene iicema epirige, biname cina mutäcäco ge teeme abiberäja mene name pi, ²⁹ inge teeme abiberäja mene epu lica ge cotre abiberäja biname bime liiyepu. Pätä tabe epu ebiberäjimige, lui biname me conocäco pisi nyene biname bine jajime teepi ngena wawename.

8

Yeesu Lepera Pita Biname ne Miiji me Jewenige

(Mareko 1:40-45; Luuka 5:12-16)

¹ Yeesu liba täinige podo cabu ca, bucurage biname cina teebine ingwe sicwisi. ² Piba yepä lepera pita biname te tädige teeme bau me, kokorare ca ääpednutige teeme opo gaabe je, jejige egä, “Babo biname, maane liba singi gäte, maane miiji gäte cebine pita căco me wawena.” ³ Yeesu ime uutige teeme bau me, joomlige, jejige egä, “Yoo, cane singi gäne. Maane pita căco äbiti!” Piba taatu tabe miiji me äbitige teeme lepera pita cabu ca. ⁴ Yeesu puma cita ca teebine jejige egä, “Maane näatecijege, gone nuuja biname bine umle jaawenimute, cane lipu meebine miiji naawenine. Yepä maane conocäco ädi iiwäreja biname bau me, tabe te mäame tääpe pa naawatnäjepi. Moose lui owecu gwidape jiiucuji Acejiyame ne iiwärejame, maane piba pui ecärepi teebine tabe iiwärejame. Biname cina piba umle pa läbitipesi, egä maane miiji gäte.”

Yeesu Cubu Mope Biname me Kaakesea Bägrä ne Miiji me Jewenige

(Luuka 7:1-10)

⁵ Yeesu liba abacitige Kaprenauma cewe me, cubu mope biname, lui te Israela biname lica ge, piba tädige teeme bau me, itemlige teebine ätityerame. ⁶ Tabe Yeesu ne apu jejige egä, “Babo biname, căme kaakesea bägrä te ätwtäneji enajenige mete cabu. Tabe pita name pi naabe cewe oocaninige, äblicäco ge arpinenta.” ⁷ Yeesu jejige egä “Cane tädenine teebine miiji wawename.” ⁸ Yepä tabe pui cubu mope biname te jejige egä, “Oo babo biname, cane nuuja miiji lica gäne! Căme mete me gone tädute. Maane yepä mene taatu jiiucepi căme kaakesea bägrä te miiji äbitame. ⁹ Căme cuta piti nemi niinäce gaabe biname piyepu ingwe gaabe biname. Cane liba căme ingwe gaabe biname ne jaajune egä, ‘Ädi,’ tabe läduge. Nuuja ne liba jaajune egä, ‘Tädi,’ tabe täduge. Cuta piyepu cane liba căme kaakesea bägrä ne jaajune ngena wawename, tabe jaawenuge.” ¹⁰ Yeesu liba teeme mene jitecijiige, tabe mutäcäco äbitige, siige teeme ingwe äcwiyame biname bine jejemige egä, “Toraca gyene, cane nuuja Israela biname ne apu ätrunga cama lica ituge päpäna. ¹¹ Cane weebibine jijenininine: bucurage cina cire saaclepi bimu acita gome ca piyepu bimu äpula gome ca, siige cire ladnatärepi Abrahamo, Isacako, Yakobu cama cabucewe je Acejiyame me soriyomu cabu. ¹² Yepä lui cina miiji cirege pui soriyomu cabu äbäcna, teebibine cire yiisabemepesi krokeciye cabu me. Teepi puma ele cire yaangenetnemepi, giricu cire yaatebecmepesi.” ¹³ Siige puma cita ca Yeesu pui cubu mope biname ne jejige egä, “Äte,

acnenuti mete me. Maane ngena ne jitrungenite, peei te läbitege.” Siige teeme kaakesea bägrä te puirage padare cabu miiji äbitige.

Yeesu Bucurage Biname bine Miiji me Jewenimige
(Mareko 1:29-34; Luuka 4:38-41)

¹⁴ Yeesu ädige, Peteru me mete me abacitige. Tabe teeme gite ne puma jopänige gebale cama ätwitäneji. ¹⁵ Yeesu teebine ime gome jwoomlige, siige gebale te obmalige. Tabe puma cita ca arpinantige, Yeesu ne mogobi jewenige.

¹⁶ Liba mämleteca ge, piba biname cina bucurage biname bine sewadanemisi Yeesu bau me, lui bime trupa cabu niyaniya cable puga ge. Yeesu iyeta cable bine mene ca iyecräjemige piyepu iyeta pita biname bine miiji me jewenanemige. ¹⁷ Tabe ai ne naace popi jewenige mename biname Isaya me mene te toraca me äbitame egä, “Taba cime pita bine teeme cabu icranige, tabe cime tääpe mäpu bine ewadimige.”

Mene Yeesu ne Ingwe Äcwi poto cidi me
(Luuka 9:57-62)

¹⁸ Yeesu liba bucurage biname bine jepänimige teebine awaclomta je, tabe teeme abiberäja bägrä bine jejemige teepi sawa nuuja poto doro me uuraname. ¹⁹ Teepi ingwe yuurisi, niinäce yepä cotre abiberäja biname te tädige Yeesu bau me, jejige egä, “Abiberäja biname, ngänu gyene, maane liiyeme ädenite, cane määme ingwe ädenine.” ²⁰ Yeesu jejige egä, “Poks bime bora piti nemi lenaja tääpume piyepu ele bime mete piti nemi, yepä cane lui te Acejiyame bau ca tädujine biname me äbitujine, cäme tääpume puupu lica gyene cäme mope acitame.”

²¹ Puma cita ca lui biname cina Yeesu ne jitrungisi, teeme yepä te jejige egä, “Babo biname, cane singi gäne meebine ingwe äcwime, yepä cane lipu gäne niinäce otni cäme babe ne gape acitame?” ²² Yeesu jejige egä, “Laati bemi seemo ireclota cabu budre, teepi te teeme budre biname bine gape cabu me yaacranimusi. Maane cebine ingwe näcwi.”

Yeesu Sawa cabu Buuwe ne Jübige
(Mareko 4:35-41; Luuka 8:22-25)

²³ Yeesu poo cabu me acenutige, teeme abiberäja bägrä cina teta cama acetnäridge. ²⁴ Teepi liba eclige, baborage buuwe te tipwäjige sawa cabu, siige uule kuu cina poo ne itrugärisi. Yepä Yeesu ute ge. ²⁵ Abiberäja bägrä cina eclige, teebine elotnantisi, jejisi egä, “Yageyame, nityärini! Mine labumitninago!” ²⁶ Yeesu jejemige egä, “Weene wälu ngeno memi? Weeme ätrunga matikolärage gyene.” Tabe abujängtige, kokre cama buuwe piyepu uule kuu bine mene jejemige, siige piba bulubulu mataru te enajige. ²⁷ Abiberäja bägrä cina mutäcäco äbitininisi, jiicisi egä, “Ai biname Laasi nyene? Buuwe piyepu uule cina teeme mene jitecijisi.”

Yeesu Miiji Jaawenige Neeneni Biname bine Niija Cable cama
(Mareko 5:1-20; Luuka 8:26-39)

²⁸ Yeesu sawa nuuja poto doro me yuurige, atyaramtige Gadara gawe cabu me, siige neeneni rooriye cina tewacletnäjäsi teebine puma. Kula waja cabu lui gape gemi, teepi pui cabu ca tasatäsi. Teeme trupa ngalebora puga ge niyarage cable. Teepi mage girigale ge, peei name pi nuuja biname te singi lica ge pui gaabe cabu otnime, teepi luma aanajenanige. ²⁹ Siige teepi liba Yeesu ne jepänäsi, ala abayäsi egä, “Acejiyame me Bägrä, maane singi ngena wawename cime tääpume? Maane watrangeca je tädite cibibine sabe wawename.”

³⁰ Seeji cudecewe padare puga ge baborage ngeerangera blome tomi, deedei tääpume yuunguretnäjimisi. ³¹ Puma cita ca cable cina Yeesu ne jejisi egä, “Maane liba singi gäte cibibine äyecrejame, nityepini blome bime trupa cabu me.” ³² Yeesu jejemige egä, “Yoo, naaclege!” Siige teepi aabmalisi pui neeneni biname bine, eclige, blome bime trupa cabu me ebäcnisi. Iyeta blome tomi te podo cabu ca uuwamitnige gawe me, sawa cabu me uupletnäridge, siige abumitnige. ³³ Blome ire atwi biname cina uucratnige, eclige babo cewe me. Puma teepi biname bine jebaitnemisi iyeta, ngena cina bäbitininisi niija cable cama lui neeneni biname bime tääpume. ³⁴ Puma cita ca iyeta biname pui babo cewe cabu ca eclige Yeesu ne päpäname, siige liba jepänisi, jejisi teeme gawe ne abmalame.

9

Yeesu Miiji me Jewenige Tääpe Nuuja poto Budre Biname ne
(Mareko 2:1-12; Luuka 5:17-26)

¹ Yeesu poo cabu acenutige, sawa ne yuurige, atyaramtige teeme cewe me. ² Biname cina waaku cabu secanisi tääpe nuuja poto budre biname ne. Yeesu liba jepänimige, egä teepi baborage ätrunga cama gemi, tabe pui pita biname ne jejige egä, “Cäme biname, wälu gone! Maane kälyä gäte määme niija mule cabu ca!”

³ Yeesu gome puga ge cotre abiberäja biname. Teepi teemämu jitranisi egä, "Ai biname te Acejiyame me ngii ne sabe jewenige, ingle tabe taatu gyene biname ne kälyä wawename teeme nüya mule cabu ca." ⁴ Yepä Yeesu umle äbitige teeme ngenen atwanena, siige tabe jejemige egä, "Weene ngenen memi nüya ngenen atwanena cama?" ⁵ Lui gyene plowa iicana ai pita biname ne jajime egä, 'Maane kälyä gäte mäame nüya mule cabu ca,' coo 'Arpinanti, abujängti, siige ädi.' ⁶ Yoo siige, cane lui Acejiyame bau ca tädujine biname me äbitujine, cane lui gwidape jewenenine, weene pui cabu ca opo nawatniniye, egä cäme conocäco pisi nyene biname ne kälyä wawename teeme nüya mule cabu ca." Siige puma cita ca tabe pui tääpe nuuja poto budre biname ne jejige egä, "Arpinanti, abujängti, mäame waaku ne ecati, mete me ädi!"

⁷ Puma cita ca pita biname te arpinantige, mete me ädige. ⁸ Lui biname cina jepänisi, teepi cälu te jitemige, Acejiyame ne eso ecärisi, tabe biname bine lipu kokre ituge ceera.

Yeesu Matayo ne Ala Tesoglicige

(Mareko 2:13-17; Luuka 5:27-32)

⁹ Yeesu pui cewe ne sebmälige. Tabe liba ädige, tabe täks rarekaake uutecrena biname ngii Matayo ne jepänige. Tabe adnatäneji enajige teeme kaakesea mete cabu, siige Yeesu teebine jejige egä, "Tädi cane cama otnime." Matayo abujängtige, teta cama ädige.

¹⁰ Ingwe ca Yeesu liba deedei äbitige Matayo me mete cabu, bucurage täks rarekaake uutecrena biname piyepu cotre atropengäja biname teepi seclige deedei äbitame Yeesu piyepu teeme abiberäja bägrä cama.

¹¹ Parisea sigu biname cina liba jepänisi Yeesu teta cama deedei äbita je, teepi teeme abiberäja bägrä bine jejemisi egä, "Weeme abiberäja biname te lipulipu deedei äbitenige täks rarekaake uutecrena biname piyepu cotre atropengäja biname cama?" ¹² Yeesu jitecjemige, jejemige egä, "Lui biname cina müji birige, teepi dokta täapume singi lica, yepä lui cina pita cama birige, teepi singi dokta täapume. ¹³ Weene müji umle äbitineye, ai mene ngena täapume myene egä, 'Cane singi lica gäne biname cina cebine iiwärejame, yepä cane singi gäne teepi nuuja biname bine owecu wawenecame.' Cane lica tädujine ala asoglecame lui cina apu jaangemuge, egä teepi conocäco biname gemi, yepä cane conocono biname bine ala asoglecame tädujine."

Ätemleja Deedei Ärwäja cäco Lenaja poto cidi me

(Mareko 2:18-20; Luuka 5:33-35)

¹⁴ Yoane nüye ca äciseja biname me abiberäja bägrä cina seclige Yeesu bau me, itemlisi egä, "Ai lipu gyene, egä cine piyepu Parisea sigu biname jäje deedei ärwäja cäco ninajinunige Acejiyame ne awejename, yepä mäame abiberäja bägrä cina umle cäco gemi pipu äbita?" ¹⁵ Yeesu jejemige egä, "Atejäclmuta soriyomu ne liba yaaclitusi, biname cina owecumete opo lica birige, mamye rooriye te liba teta cama pisi nyene. Yepä, padare te cire tädepi liba mamye rooriye ne cire yaacatepesi, teepi piba cire yaacrajemepi deedei ärwäja cäco."

Ngene ca Agli Mene Kirece piyepu Sasa Mule Aweceja poto cidi me

(Mareko 2:21-22; Luuka 5:36-39)

¹⁶ "Nuuja te kirece äciseja cäco cäbletääpe pläsu ne sasa cäbletääpe bora cabu lica yääswäruge. Tabe liba pepu jaawenuge, siige cäbletääpe ne liba jääcisäjuge, pui kirece cäbletääpe pläsu te licalomluge, siige sasa cäbletääpe ne jääsegläruge. Puma cita ca kirece pläsu te läwälutuge sasa cäbletääpe cabu ca, siige bora te babo läbituge.

¹⁷ Piyepu nuuja te kirece waina nüye ne lica yaapaduruge gouti tääpe ca wawenäneji sasa ängära gwidape cabu. Tabe liba yaapaduruge, kirece waina nüye te pui sasa ängära gwidape ne yäapluge, ingle tuutnecuge. Siige waina nüye te lapaduruge gawe me piyepu ängära gwidape te sabe läbituge. Kirece waina nüye ne müji kirece gwidape cabu ängära, piba teepi ibibi laanajuge."

Babo Biname me Ngulebägrä piyepu Pita cama Magebi

(Mareko 5:21-43; Luuka 8:40-56)

¹⁸ Yeesu liba camu mene iicema cabu jage, piba yepä Israela babo biname te teeme bau me tädige. Tabe kokorare ca ääpednutige teeme opo gaabe, jejige egä, "Cäme ngulebägrä budre häbitige page ai padare cabu. Maane tädi ime acitame teeme papa cabu, tabe piba budre cabu ca arpinantenige." ¹⁹ Yeesu abujängtige, teebine ingwe icwige teeme abiberäja bägrä cama.

²⁰ Teepi liba eclige, Yeesu me kaake poto ca yepä magebi te piba toclige, lui twelb kämäge ngalebora uudi apira pita cama tonäjenäjumi. Tabe Yeesu me cäbletääpe pepyämu ne joomlige ogä, ²¹ ingle tabe ngenen jotwananige egä, "Cane liba Yeesu me cäbletääpe pepyämu taatu joomlenine, cäme ai pita te piba nabma-lenige cebine." ²² Yoo siige, tabe liba joomlige,

Yeesu piba tatatrongtige, teebine jopänige, jøjige egä, “Bägrä, wälu gone! Määme ätrunga te meebine miiji bii naawenige.” Siige peeirage padare cabu magebi te miiji äbitige.

²³ Puma cita ca Yeesu liba pui babo biname me mete cabu me atyaramtige, lui me bägrä te budre äbitige, tabe jepänige, biname cina dobidobi bine jecnäjimisi piyepu papa me äbitinisi bägrä me budre name pi. ²⁴ Tabe jejemige egä, “Pääye, äyebhengäjimeye ama cita ca. Bägrä te budre lica gwene, tabe ute gwene.” Teepe teebine ngame ecwänisi. ²⁵ Puma cita ca biname bine liba iyecräjemisi mete cabu ca, Yeesu piba abacitige bägrä me ute puupu cabu me, ime jwoomlige, siige bägrä budre cabu ca arpinantige. ²⁶ Teepe idre ecenanisi iyeta pui gawe cabu, egä Yeesu ngena mule ne jewenige.

Yeesu Miiji Jaawenige Neeneni Irecu Määsumäsu Biname bine

²⁷ Yeesu pui cewe ne sebmalige. Tabe liba ädige, neeneni irecu määsumäsu biname cina teebine ingwe icwäsi. Teepe ala abayäsi egä, “Daawida me kaakesaare, maane owecu cime tääpumel!” ²⁸ Yeesu liba mete bora me abacitige, pui neeneni irecu määsumäsu biname cina piba taaclige teeme bau me. Yeesu äätemlige egä, “Weene nää toraca nätrungeniye, egä cane miiji gäne weebibine irecu miiji wawenime?” Teepe jejäsi egä, “Yoo, babo biname.” ²⁹ Puma cita ca Yeesu teeme irecu papa cabu ime bine aacitige, jaajige egä, “Weene ätrunga te ibibi läbitege.” ³⁰ Siige teeme irecu cina aasatäsi. Puma cita ca Yeesu kokre cama mene jaajige egä, “Gone biname bine ai poto cidi me umle jaawenimuye.” ³¹ Yepä teepe mete ne sebmäläsi, aaclige, Yeesu ne idre jecanenäsi iyeta pui gawe cabu ta.

Yeesu Miiji Jewenige Mene Licema cäco Biname ne

³² Pui neeneni biname cina liba baaclige, piba biname cina Yeesu bau me secanisi mene iicema cäco biname ne, lui me trupa cabu puga ge niyya cable. ³³ Yepä Yeesu liba niyya cable ne iyecräjige, pui biname te piba taatu gije abacitige mene iicemame. Biname cina mutäcäco äbitinisi, jüicisi egä, “Cine niinäce lica ituge Israela gawe cabu apu mule ne päpäna.” ³⁴ Yepä Parisea sigu biname cina jüicisi egä, “Niyya cable bime mopeyame te Yeesu ne kokre yäacärüge tabe niyya cable bine äyecrejame.”

Yeesu Owecu Ge Biname bime tääpumel

³⁵ Yeesu puma cita ca otnetnäjige iyeta modamoda piyepu matimati cewe cabu ta. Tabe biname bine ebiberäjimige teeme abasecetra metä cabu ta piyepu Miiji Mene jejananemige egä, “Acejiyame te pagege biname bine waadena.” Tabe cuta biname bine miiji jewananemige iyeta maramara pita cabu ca. ³⁶ Tabe liba bucurage biname tomi bine jepänimige, tabe owecu äbitige, ingle teepe mage ngenecu mäpu cama ge piyepu ätityera tääpumel singi ge epu pana maamoi, lui bime ire atwi biname lica ge. ³⁷ Yeesu puma cita ca teeme abiberäja bägrä bine jejemige egä, “Ärucna lui baborage gyene, yepä nesae taatu kaakesea bägrä gemi atomle-came, ³⁸ peei name pi weene miiji irecu ätumutame ärucna Yageyame bau me tabe poto kaakesea bägrä bine ätyepame teeme ärucna tääpumel.”

10

Yeesu me Twelb Ätyepäneji Biname bime Ngii

(Mareko 3:13-19; Luuka 6:12-16)

¹ Yeesu teeme twelb abiberäja bägrä bine ala tesoglicmige, ecärimige kokre niyyarage cable bine äyecrejame piyepu iyeta maramara pita bine äyebhengäjame. ² Age tema pui twelb ätyepäneji biname bime ngii: niinäceyame lui Simona, lui ne einenisi Peteru ca, piyepu teeme igane Andrea; cuta Yakobu teeme igane Yoane lui Jebedayo me bägrä gegi; ³ cuta Pilipo naabi Bartoloma; Tooma piyepu täks rarekaake uutecra biname ngii Matayo; cuta Yakobu Alaba me bägrä piyepu Tadeus; ⁴ cuta Simona lui Kanana sigu biname gyene piyepu Yuuda Isakariyota lui Yeesu ne budre tääpumel awaba biname gyene.

Yeesu Teeme Twelb Abiberäja Bägrä bine Jityepäjemige

(Mareko 6:7-13; Luuka 9:1-6)

⁵ Yeesu ai twelb biname bine apu umle mene cama jityepimige kaakesea wawenime egä, “Gone biname bime bau me naacluge lui Israela biname lica gemi. Cuta gone naacluge nuuja cewe cabu me Samariya gawe cabu je. ⁶ Yepä weene Israela biname bime bau me naacluge, lui cina epu pana gemi apeseräjäneji maamoi cina liiyepu. ⁷ Weene teebibine jejananemepewe egä, ‘Acejiyame te mameta gyene biname bine waadena.’ ⁸ Weene pita biname bine miiji jewanemepewe, budre biname bine erpineräjemepeye, lepera pita biname bine miiji jewanemepewe piyepu niyyaniya cable bine iyecräjemepewe. Weene kokre ne daremu cäco ituge acata ai mule bine wawenecame, peei name pi weene miiji daremu cäco cuta biname bine itityeräjemepeye. ⁹ Weene gone gol, silba piyepu rarekaake bine yaawadimuye weene cama. ¹⁰ Gone diiba yaawadimuye, coo tuwängele cäbletääpe

piiyepu ernge gwidape coo piiyepu otnetneja suru, ingle kaakesea bägrä ne miiji teeme singi gwidape ceera.

¹¹ Weene liba lui babo cewe cabu me coo piiyepu matikolä cewe cabu me latyarininuye, weene miiji ärngi, egä laati te singi weebibine teeme mete cabu me äbäcname, siige weene teta cama inajininuge, ngälu weene peei cewe ne saabmaluye. ¹² Weene liba mete cabu me yäähäcnuye, jicuye egä, 'Poode!' ¹³ Pui mete cabu biname cina liba weebibine jiwablininusi, weeme poode te miiji yaanajuge puma. Yepä teepi liba lica jiwablininusi, weeme poode te lacnenutuge weeme bau me. ¹⁴ Poto mete coo piiyepu cewe cabu ta liba weebibine lica jiwablininusi coo weeme mene lica jitecjinusi, weeme ernge cabu ca teeme tuuwe bine jääglubäjemuye, siige saabmaluye pui mete ne coo cewe ne. ¹⁵ Cane toraca jijenininine, Acejiyame me atrana bimu cabu Sodoma piiyepu Gomora cewe biname cina lui niyarage daremu ne cirege päpäna, matikäli cirege. Lui cewe biname cina lica pa jiwablipesi weebibine, teeme niya daremu lui baborage cirege."

Mäpu te Tädenige

(Mareko 13:9-13; Luuka 21:12-17)

¹⁶ "Cane weebibine jityepininine biname bime bau me, epu pana maamoi cina lipu yaacloge wulp bime sigu cabu me. Weene miiji cobyame bime pana umleumle inajipi piiyepu gimäe bime pana niya wawena cäco inajipi. ¹⁷ Weene ireire inajipi, ingle biname peeci nemi, lui cina weebibine joomlininusi ablaweja mete me waadename. Piiyepu teepi teeme abasecretna mete bora ta weebibine itemeläjininusi. ¹⁸ Teepi cämiji pi iwadininusi modamoda biname bime piiyepu gawe mope biname bime opo gaabe me weene teebibine piiyepu gawe maramara biname bine Miiji Mene jajanename. ¹⁹ Yoo, weebibine liba ablaweja täapume iwadininusi, ngenecu niya gone, egä weene ngena jicuye coo lipulipu jicuye. Liba padare te tatyaramtuge weene mene iicemame, weebibine piba mene birige ceera iicema täapume. ²⁰ Weene lui mene cire jicemepeye, peei lui weeme mene lica cirege, yepä weeme Babe me Seemo te ngene atwanena cire icäripi weene ngena iicaname.

²¹ Poto biname cina teeme naniganewale bine budre me cirege äyemela. Babe cina peeirage mule cire jaawenepesi teeme bägrä bime täapume. Cuta bägrä cina cire lata-trongäripesi teeme mage babe bine budre me äyemelame. ²² Iyeta biname cina weebibine jimugitninusi cäme singi pi, yepä laati te kokre cama cire jaclajutepi ngälu ngälugaabe me, tabe iyeteta ireclota ne cirege päpäna.

²³ Teepi liba yepä cewe cabu weeme täapume claabe läbitininusi, weene miiji nuuja cewe me uocratna. Cane toraca jijenininine, weene cäro camu Miiji Mene jajanena ne cire epirepeye Israela modamoda cewe cabu ta, cane Acejiyame bau ca lui te tädujine biname me äbitujine, niinäce cire tacnenutepene.

²⁴ Abiberäja bägrä te baborage lica birige teeme abiberäja biname bau ca, coo piiyepu aletnäneji biname te baborage lica birige teeme babo biname bau ca. ²⁵ Pipu pi abiberäja bägrä te bojä jaaguge, tabe liba teeme abiberäja biname cama ibibi läbituge. Cuta aletnäneji biname te bojä jaaguge, tabe liba teeme babo biname cama ibibi läbituge. Yoo, biname cina liba cebine, lui weeme mope biname gäne, nainusi Beelsebul ca, siige piba teepi weebibine, lui cina cäme ingle biname gemi, cuta mage niyaniya ngii ca iyinininusi."

Laati täapume Miiji Wälu

(Luuka 12:2-7)

²⁶ "Yoo, weene biname bime täapume wälu gone! Ngena gyene ämlitäneji, pagege pajecu me äbita. Ngena gemi ogä, pagege awabudnäja. ²⁷ Cane krokeciye cabu ngena täapume jijenininine, weene miiji bimu cabu cääri jajanena; weene siiyä mene ca ngena itecijenininige, weene miiji cabucabu pagege jajanena, epu pana mete toro cabu ca lipu mene tiicemusi. ²⁸ Wälu gone eei bime täapume, täape ne lui cina budre me yaaglusi, yepä teepi äblicäco seemo ne budre me agli. Pätä miiji weene Acejiyame täapume wälu, ingle tabe miiji gyene täape piiyepu seemo bine niya puupu cabu me acraname. ²⁹ Puu matimati ele cina papa gemi: yepä rarekaake ca neeneni bine jaaletnusi, yepä teeme yepä te lica gawe cabu me saatramuge weeme Babe me umle cäco. ³⁰ Cuta weene piiyepu, Acejiyame iyeta umle gyene weeme poto cidi me. Tabe umle gyene, egä weeme lija matimati edingäli gemi. ³¹ Peei name pi weene gone wälu! Weene modamoda gemi, ele cina matimati gemi."

Yeesu ne Jaaitnusi piiyepu Jaainusi

(Luuka 12:8-9)

³² "Laati te biname bime sobe cabu naitnuge, egä tabe umle gyene cane, cane cuta teebine cabucewe je cäme Babe me opo gaabe je cire jaaitnepene. ³³ Yepä laati te biname bime sobe cabu naitnuge, egä tabe umle lica gyene cane, cane cuta teebine cabucewe je cäme Babe me opo gaabe je cire jaainepene."

Gawe cabu je Poode Lica Gyene yepä Cubu

(Luuka 12:51-53, 14:26-27)

³⁴ “Weene gone apu angi, egä cane itu tädujine ai gawecewe cabu me poode ne acaname. Cane lica itu tädujine poode ne acaname yepä cubuturikä ne secanujine. ³⁵ Imäbägrä te teeme babe bau me claabe läbitube cämiji pi piyepu ngulebägrä te teeme mage bau me, cuta cnaatete cina teemeteme claabe läbitininusi cämiji pi. ³⁶ Biname me binamewale cina cirege teeme cubuyame me äbita cämiji pi.

³⁷ Lui te baborage singi birige teeme mage babe täapume, yepä matikäli singi cäme täapume, tabe ibibi lica gyene cäme abiberäja bägrä me lenajame. Coo lui te teeme bägrä bime täapume baborage singi birige, yepä cäme täapume matikäli singi, pipu biname te cuta ibibi lica gyene cäme abiberäja bägrä me lenajame. ³⁸ Laati te liba teeme baarge uli ne palace cabu lica yaacanuge cäme pana, siige cebine ingwe näcwuge, tabe ibibi lica gyene cäme abiberäja bägrä me lenajame. ³⁹ Laati te singi lica gyene teeme ireclota ne mäpu cabu acitame cämiji pi, tabe toraca ireclota ne cire yaapesarepi. Yepä lui te singi gyene cämiji pi teeme ireclota ne mäpu cabu acitame, tabe toraca ireclota ne cire jääpänepi.”

Yeesu me Mene Daremu poto cidi me

(Mareko 9:41)

⁴⁰ “Laati te liba weebibine jiwablininuge, tabe cebine nawabluge. Piyepu laati te liba cebine nawabluge, tabe cuta jaawabluge teebine, cebine lui te nätyepuji. ⁴¹ Laati te liba Acejiyame me mename biname ne jaawabluge teeme peei ngii name pi, tabe mename biname bime pana daremu ne cire jääpänepi. Laati te liba conocäco biname ne jaawabluge teeme peei ngii name pi, tabe teeme pana daremu ne cire jääpänepi. ⁴² Piyepu laati te liba ai ngii cäco biname yepä ne gwidape yääcärüge, ngänu gyene puu gäbu niye, ingle tabe cäme ingwe äcwi biname gyene, Acejiyame te teebine daremu cire yääcärepi.”

11

Mename Biname cina Seclige Yoane Niye ca Äciseja Biname bau ca

(Luuka 7:18-35)

¹ Yeesu liba teeme twelb abiberäja bägrä bine umle mene jajanena ne epirige, tabe pui cewe ne piba sebmilige, ädige poto mametamameta cewe me biname bine puma abiberäjame piyepu mene jajanename.

² Yoane niye ca äciseja biname lui krokeciye mete cabu jage, tabe puga itecijige, egä Keriso ngena jewenige. Puma cita ca Yoane teeme abiberäja bägrä bine jityepimige Yeesu bau me. ³ Teepi Yeesu ne itemlisi egä, “Nää, maane säte pui biname, iyeta biname cina lui ne jewagrijenisi otnime, coo cine miiji nuuja ne awagrija?” ⁴ Yeesu jejemige egä, “Weene Yoane bau me acnenuteye, teebine jejepeye, weene ngena jepänanemeniye piyepu ngena itecijaninige: ⁵ naace irecu määsumäsu biname cina cängena jääpänanemus, ernge niyaniya biname cina miiji waatninusi, lepera pita biname cina miiji läbitininusi, tablame budubuduma biname cina cängena yäätecijaninuge, budre biname cina larpineräjininusi, cuta owecumete biname bine Miiji Mene jaajanemus. ⁶ Ngenecu miiji eei gemi, laati bemi ätrunga ne lica yaapesarusi cäme bau.”

⁷ Puma cita ca Yoane me abiberäja bägrä cina liba äcnärige, Yeesu piba gije abacitige biname bine jajanename Yoane poto cidi me egä, “Weene liba Yoane bau me läsipeye daapo taatu cewe cabu me, weene teebine lipu jääpänepeye? Weene baace ingle pana biname ne lica jääpänepeye, buuwe te lui ne yaajodnäjepi. ⁸ Cuta piyepu weene cängena abasogäräneji biname ne lica jääpänepeye, teeme bau me liba läsipeye, ingle abasogäräneji biname cina gawe mope biname bime mete cabu yaacrajuge. ⁹ Najeye, weene Yoane ne lipu jääpänepeye, weene liba teeme bau me läsipeye? Weene nää Acejiyame me mename biname ne jääpänepeye? Toraca gyene, yepä Yoane lui baborage gyene iyeta poto Acejiyame me mename biname bime bau ca. ¹⁰ Yoane pui gyene, Oogäräneji mene te lui poto cidi me jiccenige egä, ‘Cane Acejiyame cäme mename biname ne mäame niinäce gaabe me cire jäätyepepene. Tabe te gaabe cire yaamacetnäjepi mäame otni täapume.’ ¹¹ Cane toraca jijenininine, egä Yoane lui baborage gyene iyeta biname bime cabu ca, lui cina ituge ai gawecewe cabu lenaja ngälu Yoane me padare oomlaname. Yepä page ai kirece padare cabu eei cabu ca lui te matikäli gyene, Acejiyame te lui bine ewadenemige, tabe baborage gyene Yoane cabu ca.

¹² Pui padare cabu ca, Yoane niye ca äciseja biname te liba bääirmi jaagednemepi, ngälu airage bimu cabu Acejiyame me waadena mule te kokre cama ituge otni. Piyepu biname piti nemi lui cina kokre läbitininusi Acejiyame me waadena mule cabu me äbäcname. ¹³ Moose teeme Cotre cabu piyepu iyeta Acejiyame me mename biname cina ngälu Yoane me padare oomlaname, teepi niinäce gaabe me jiccemujisi, egä Acejiyame te biname bine

cire yaawademepi. ¹⁴ Weene liba singi teeme mene ätrungame, weene miiji umle äbita, egä Yoane lui Eliya sine, lui me otni poto cidi me teepi niinäce gaabe me jüicemujisi. ¹⁵ Weene liba tablame piti nemi äteciijame, iteciijinege umle äbitame.

¹⁶ Cane ngena cabu yaatonäremene biname bine, page lui cina ireclota gemi? Teepi epu pana gemi matimati bägrä, lui cina adnatäreji yaacrajuge aletna puupu cabu, siige teemeteme ala labayaninusi egä,

¹⁷ 'Cine dobidobi jääcnäjimusi,

yepä weene giire lica jääwäjuye.

Cine owecumete uupera yaatangusi,

yepä weene singi lica ele me.' ¹⁸ Yoo, Yoane te tädepi. Tabedeedei cäco yaanajepi piiyepu waina niye lica yäänäjemepi. Yepä biname cina singi lica teeme mule tääpume, siige jüicusi egä, 'Yoane me niya cable pisi nyene.' ¹⁹ Cane lui Acejiyame bau ca tädujine biname me äbitujine, cane yäärwäjune, yäänäjune, yepä biname cina cuta singi lica ge cäme mule tääpume, siige teepi jüicusi egä, 'Jepäneye ai biname ne, mage looloyame gyene piiyepu waina niye änäjäyame gyene. Tabedeedei rarekaake uutecrena biname piiyepu cotre atropengäja biname bime biname gyene.' Mine liba jääpänusi, egä Acejiyame bau ca lui mule te ngena jaawenuge, mine peei cabu ca opo yaawatnusi, egä Acejiyame me umle toraca gyene."

Ätrunga cäco Cewe poto cidi me

(Luuka 10:13-15)

²⁰ Yeesu giije abacitige cewe biname bine ablawejame, lui cina lica ituge atatröngära teeme niya mule cabu ca, ngänuge tabe bucurage ciitaca mule bine itu jaawenanemepi puma. ²¹ Tabedeedei jejemige egä, "Oo Korasine piiyepu Betesaida cewe biname, lipu babo niyyarage cirege weeme tääpume! Cane lui ciitaca mule bine ituge weeme cabu wawena, liga cire jaawenemepi Turo piiyepu Sidona cewe cabu, biname cina puma ragre cire lasigrärinejisi piiyepu mriibe ca cire lapyacinejisi awabame, egä teepi teeme niyaniya mule bine ituge abmaläcema Acejiyame bau me atatröngärame. ²² Korasine piiyepu Betesaida cewe biname, cane weebibine jijenininine, egä Acejiyame me atrana bimu cabu Turo piiyepu Sidona cewe biname cina teepi plowa cire jääpänepesi weeme cabu ca. ²³ Cuta weene Kaprenauma cewe biname! Weene nää apu jingenininige, egä weebibine awepenta cabu me Acejiyame bau me? Eewe, weebibine niyyarage puupu cabu me cire iyäripesi. Sodoma cewe biname cina liga cire jääpänemepi ciitaca mule bine, weene lui bine ituge päpäna, pui cewe te page cerämu cire yaanajepi. ²⁴ Kaprenauma cewe biname, cane jijenininine weebibine, egä Acejiyame me atrana bimu cabu Sodoma cewe biname plowa cire jääpänepesi weeme cabu ca."

"Ayo Naaclege Cäme bau me Diibe Oocaname."

(Luuka 10:21-22)

²⁵ Peei padare cabu Yeesu jüicige egä, "Babe, maane lui Yageyame gäte gawecewe piiyepu cabucewe tääpume, cane meebine eso nääcärenine, egä maane ai gwidape bine ituge ämletna umle biname piiyepu miijimiji mopemuli biname bime bau ca, siige abiberäja cäco biname bime bau me ituge aboclomäja. ²⁶ Babe, ai lui määme miijirage singi gyene.

²⁷ Cäme Babe te iyeta gwidape bine itu saabmalemepi cäme ime cabu. Nuuja te umle lica gyene Bägrä, yepä Babe taatu umle gyene; cuta nuuja te umle lica gyene Babe, yepä Bägrä taatu umle gyene piiyepu eei biname cina umle gemi Babe, Bägrä te lui bime tääpume singi aboclomta teebine.

²⁸ Naaclepi cäme bau me, lui cina gloose gemi mäpu biijabija bine waadename. Cane weebibine diibe oocana pa icäripene. ²⁹ Gone jäägyemuye lui mäpu bine jääpänimuye cämiji pi piiyepu cäme bau ca labiberäjininuye, inge cane owelaamelame biname gäne piiyepu cane awepyeräja umle cäco gäne, siige weene piba poode ne pa jepänepye. ³⁰ Cämiji pi lui mäpu bine jääpänimuye, plowa birige, piiyepu cane ngena bine liba yaacranimune weeme cabu, mäpu lica birige."

12

Ätemleja Sabade Cotre poto cidi me

(Mareko 2:23-28; Luuka 6:1-5)

¹ Pui padare yepä Sabade bimu cabu Yeesu teeme abiberäja bägrä cama wiiti calwacupi ngalebora lui gaabe cabu ädige. Abiberäja bägrä loolomecewe te joomlemige. Teepi puma cita ca wiiti mope bine ecrecimisi, kuu bine erwäjimisi. ² Parisea sigu biname cina jepänimisi, teepi ngena jenenisi, siige Yeesu ne jejisi egä, "Jepänimi! Määme abiberäja bägrä cina mime Sabade cotre ne bii jetropangtisi, teepi lui mule becnisi."

³ Yeesu jejemige egä, “Egäsu weene ituge acnema, mope biname Daawida lui mule ne jewenuji, tabe piyepu teta cama lui biname teepi liba loolo me icrajuji, yepä teeme deedei lica. ⁴ Tabe iiwäreja mete cabu me abacituji, buluduu ne sisatuji, buluduu lui Acejiyame täapume acitäneji ge, siige ecäranemuji teta cama lui biname bine, siige teepi erwäjujisi. Teepi pui lui cotre ne jetropangtujisi, ingle iiwäreja biname taatu cina miiji gemi pui buluduu ne loolo. ⁵ Egäsu weene cuta Moose me Cotre mene cabu ituge acnema, egä iiwäreja biname cina Sabade bimu cabu miiji yaacluge iiwäreja mete me kaakesea wawename. Teepi cuta pui lui Sabade* cotre ne jaatropangtusi, yepä teepi kälyä birige. ⁶ Cane jijenininine weebibine: cane säne baborage, iiwäreja mete matikäli gyene. ⁷ Oogäräneji mene te jüiceniige egä, ‘Cane singi lica gäne biname cina cebine iiwärejame, yepä cane singi gäne teepi biname bine owecu wawename.’ Weene liga toraca umle cirege, egä ai mene ngeni myene, weene piba lica cire jaatranemejiye, lui biname cina niya mule bine lica jaawenimusi. ⁸ Acejiyame bau ca lui te täduji biname me äbituji, teeme conocäco pisi nyene jajime Sabade bimu cabu ngena wawename.”

*Duudemu Ime cama Biname
(Mareko 3:1-6; Luuka 6:6-11)*

⁹ Yeesu pui cewe ne sebmaliige, ädige, yepä abasecretna mete cabu me abacitige. ¹⁰ Biname puga ge, lui me ime duudemu ge. Poto biname puga ge, lui cina singi ge ingle ne päpäname Yeesu ne aitnejame, siige teepi teebine itemlisi egä, “Nää Cotre ibi mule gyene Sabade bimu cabu pita biname ne miiji wawename?” ¹¹ Yeesu jejemige egä, “Weeme yepä me liba maamoi pisi nyene, siige Sabade bimu cabu cupicu bora me yaatramuge, egäsu weene saarpatuye? ¹² Maamoi matikäli gyene, biname baborage gyene, peei name pi nuuja cotre lica gyene biname täapume miiji mule wawena Sabade bimu cabu.” ¹³ Piba Yeesu pui pita biname ne jejiige egä, “Määme ime tuuti!” Tabe ime uutige Yeesu bau me, piba siige teeme ime te miiji äbitige epu pana nuuja ime liiyepu. ¹⁴ Yepä Parisea sigu biname cina puma cita ca eclige, siige mene jitransi Yeesu ne budre me acitame.

Acejiyame me Kaakesea Bägrä Lipu Gemi?

¹⁵ Yeesu itecijige, egä Parisea sigu biname cina mene jitransi teebine aglime, siige tabe pui cewe ne sebmaliige, nuuja gome me äyebliingtige. Bucurage biname cina teebine ingwe icwisi. Laati bemi pita cama, tabe iyeta teebibine miiji jewenanemige. ¹⁶ Puma cita ca tabe teebibine giri jicranimige, egä teebine gone awabudni-ta. ¹⁷ Yeesu lui mule jewenige, ibibi äbitige mename biname Isaya me mene cama egä,

¹⁸ “Age sena, cane lui kaakesea bägrä ne ituge jaji.

Tabe cäme singi biname gyene, cane teeme täapume ngenecu miiji gäne.

Cane cäme Seemo ne teeme cabu me cire yaacitepene.

Tabe te biname bine umle cire jaawenemepi cäme atrana poto cidi me.

¹⁹ Tabe lica cirege mene abaja coo claabe cama ala abayena.

Teeme tagepogogo ne lica cirege gaabe cabu ta ätecijana.

²⁰ Tabe ajodnäneji sogo ne lica cirege ägäbuta,

cuta ätuma mameta lampa ne lica cirege ätuma.

Tabe apu cire läbitanepi, ngälu biname cina Acejiyame me cotre bine cire jaawenemepesi.

²¹ Iyeta maramara gawe biname cina teeme ngeni atwanena bine cire yaacranemepesi teeme bau me.”

*Yeesu piyepu Beelsebul, Satani ca Lui ne Cuta Einenisi
(Mareko 3:20-30; Luuka 11:14-23)*

²² Biname cina yepä biname ne secanisi Yeesu bau me, lui te irecu mäasumasu piyepu mene iicema cäco ge, ingle teeme niya cable puga ge. Yeesu teebine miiji jewenige, siige tabe mene jüiceniige piyepu tabe irecu aasatige. ²³ Biname tomi cina mutäcäco äbitininisi. Teepi ätemläjinisi egä, “Nää, tabe pama mope biname Daawida me kaakesaare gyene?”

²⁴ Parisea sigu biname cina liba ai mene itecijemige, teepi jüicisi egä, “Tabe naace popi niya cable bine yääyecräjemuge, ingle Beelsebul lui niya cable bime mopeyame gyene, tabe te teebine kokre ecäranenige niya cable bine äyecrejame.”

²⁵ Yeesu umle äbitige teeme ngeni atwana poto cidi me, siige jejemige egä, “Nuuja gawe biname cina liba labelaninusi teemeteme cubu me, teepi watata lapirininusi. Cuta piyepu babo cewe biname coo ingle biname cina liba labelaninusi teemeteme cubu me, teepi lica birige lenaja. ²⁶ Siige Satani lui bine yaawadimuge, teeme yepä tomi te liba nuuja tomi cama cubu jüicäsi, teepi siige uja maramara me läbitininusi, cije Satani me waadena mule te piba lipulipu kokre lenaja? ²⁷ Yoo, weene jüiceniye egä Beelsebul, lui ne Satani ca

* 12:5: Sabade cotre: Sabade cotre te jüiceniige, egä biname te gone lecaleca padare otni Sabade bimu cabu.

cuta einenisi, tabe te cebine kokre năcăruge cane teeme niia cable bine äyecrejame. Peei toraca lica gyene, ingle Beelsebul singi lica gyene teeme niia cable bine biname cabu ca äyecrejame. Yoo, poto weeme abiberäja băgră cina niia cable bine cuta yääyecräjemusi. Luma cita ca teeme kokre pei mule ne wawename? Lica Beelsebul bau ca. Peei name pi weemerage abiberäja băgră cina jaawabudnitusi weeme conocono mene, egä căme kokre cable bine äyecrejame lui Beelse-bul bau ca gyene. ²⁸ Eewe, căme kokre lui teeme bau ca lica gyene, yepä Acejiyame me Seemo te kokre năcăruge cane niia cable bine äyecrejame, siige weene pei name pi umle gemi, egä Acejiyame me waadena mule te weeme cabu me ituge atyaramta.

²⁹ Nuuja te äblicăco abacita kokre biname me mete cabu me teeme gwidape bine waadename, tabe liba teebine niinäce lica jăätâyuge. Yepä tabe liba teebine niinäce jăätâyuge, tabe piba labacituge teeme mete me gwidape waadename.

³⁰ Laati te căme biname lica gyene, tabe cebine năcisărmutuge. Laati te căme bau me lica taabasecretnimuge, tabe yaaplidnăremuge. ³¹ Peei name pi cane jijenininine, egä laati te liba ngena niianyia mene jücemuge coo ngena nuuja niia mule bine jaawenimuge, tabe miiji gyene kălyä äbitame pui niia cabu ca. Yepä laati te liba niiyarage mene jücemuge Aceji Seemo poto cidi me, teeme pei niia te iyeteta yaanajuge. ³² Laati te liba năcisărmutuge cebine, Acejiyame bau ca lui te tădujine biname me äbitujine, tabe miiji gyene kălyä äbitame teeme pei niia mule cabu ca. Yepä laati te Aceji Seemo ne yăcisărmutuge, teeme pei niia te iyeteta yaanajuge.”

*Uli piyepu Teeme Kuu
(Luuka 6:43-45)*

³³ “Uli liba miiji birige, teeme kuu cuta piyepu miiji birige. Yepä, uli liba niia birige, teeme kuu cuta niia birige. Weene uli ne opo yaawatnuye teeme kuu cabu ca. ³⁴ Weene coboyame pana gemi! Biname me ngenecu liyepu, weene mene cuta piyepu. Weene lipulipu miijirage mene iicema, ingle weene niiyarage gemi? ³⁵ Miiji biname te teeme miiji ngenecu cabu ca miiji mule bine saaboclomăjimuge, niia biname te teeme niia ngenecu cabu ca niia mule bine saaboclomăjimuge. ³⁶ Cane jijenininine weebibine, egä Acejiyame me atrana bimu cabu biname cina miiji cire yaaboclomăjemepesi, egä ngena ingle cabu teepi papa kuu căco mene ituge iicema. ³⁷ Weeme mene cabu ca weebibine atrana cirege, egä weene miiji biname gemi coo niia biname gemi.”

*Biname cina Singi Ge Yeosu Ciitaca Mule Wawename
(Mareko 8:11-12; Luuka 11:29-32)*

³⁸ Poto cotre abiberäja biname piyepu Parisea sigu biname cina Yeosu ne jejisi egä, “Abiberäja biname, cine singi gemi maane ciitaca mule ne wawename cime păpăname.”

³⁹ Yeosu jejemige egä, “Weene lipu niiyarage ätrunga căco biname gemi, page ai padare cabu lui cina ireclota gemi! Weene singi gemi căme bau ca ciitaca mule ne păpăname, yepä weene nuuja ciitaca mule ne lica pa jepănepeye, yepä Acejiyame me mename biname Yoona me ciitaca mule ne taatu pa jepănepeye. ⁴⁰ Yoona lipu babo cibü me camuge bora enajuji nesae bimu nesae ciye cama, cane lui Acejiyame bau ca tădujine biname me äbitujine, cane cuta piyepu gawe bora pagege lenaja nesae bimu nesae ciye cama. ⁴¹ Atrana bimu cabu Ninewa cewe biname cina cire talotnăripesi budre cabu ca weene cama gigri atrana tăăpume. Teepi weebibine cirege aitneja, ingle teepi teeme niia mule bine itu ebmalimujisi Yoona me bäärmi mene name pi. Siige cane age sâne baborage Yoona bau ca, yepä weene cebine lica ituge ätrunga.

⁴² Cuta Siiba gawe mope magebi te atrana bimu cabu weene cama gigri cire tarpinantepi siige tabe weebibine cirege aitneja, ingle tabe cudecewe cewe ca tocluji Solomona me umle mene ätecijame. Siige cane age sâne baborage Solomona bau ca, yepä weene singi lica gemi cebine ätecijame.”

*Yeesu me Mene Niia Cable Acnenuta poto cidi me
(Luuka 11:24-26)*

⁴³ “Niia cable te liba biname me trupa ne yaabmaluge, tabe waatnetnăjuge niie căco cewe cabu ta, puupu ne jăărnguge ngenecooaname. ⁴⁴ Liba lica jăăpănuge, tabe jüicuge egä, ‘Cane acnenine piyeme, cane lui mete ne sebmalumene.’ Tabe siige lacnuge, jăăpănuge mete ne apretnăjeji piyepu miijirage acranăjeji. ⁴⁵ Tabe piba lăduge poto seben mage niiyarage cable bine arwojame, siige teepi iyeta saacluge pui biname me trupa cabu lenajame. Niinäce pui biname miiji lica birige, yepä page tabe siige iyeta mage niiyarage me lăbituge. Pui yepä mule te cirege äbita ai niiyarage biname bime tăăpume, lui cina ireclota gemi page.”

*Yeesu me Ingle Biname Laati Bem?**(Mareko 3:31-35; Luuka 8:19-21)*

⁴⁶ Yeesu liba camu biname bine mene jajanena cabu jage, teeme mage piyepu iganewale cina piba tatarige. Teepi puutucu je imyemutäjimige, biname bine itemlimisi Yeesu cama mene me. ⁴⁷ Puma cita ca yepä biname te Yeesu ne jejige egä, “Määme mage piyepu iganewale puutucu je ete nemä. Teepi singi gemi maane cama mene iiceme.”

⁴⁸ Yeesu pui biname ne itemlige egä, “Maane lipu ngene jotwa-nenite, laatu nwene cäme mage cuta laati bem? cäme naane igane?” ⁴⁹ Puma cita ca tabe teeme abiberäja bägrä bine teeme ime ca jewabimige, jüicige egä, “Ire, cäme mage piyepu cäme naane igane age tema. ⁵⁰ Laati te liba jaawenuge cäme Babe cabucewe je teeme singi ne, tabe lui cäme naane, cäme igane, cäme ngule, cäme mage.”

13*Ngene ca Agli Mene Kuu Gije Iisabeja poto cidi me**(Mareko 4:1-9; Luuka 8:4-8)*

¹ Peerage bimü cabu Yeesu mete ne sebmälige, ädige, sawa ligi cabu adnatige. ² Bucurage biname cina tabasecretnige teeme bau me, teebine jewaclomtisi, siige tabe poo cabu acenutige, adnatige. Biname cina sawa ligi cabu imyemutäjimige. ³ Yeesu ngene ca agli mene ca jejemige bucurage mule poto cidi me. Tabe jüicige egä,

“Yepä biname te ädige calwacupi me kuu gije bine iisabejame. ⁴ Egäcäro tabe kuu gije bine yisabäjemige, poto cina gaabe cabu itrametnemige, siige ele cina seclige, erwäjimisi pui kuu gije bine. ⁵ Poto kuu gije cina itrametnemige kula gawe cabu. Gawe puma pable ge. Gije cina watata äpletäränisi, inge gawe poone lica gyene. ⁶ Bimu te liba tacitige, nuunu te iplatnimige mamye gije bine, siige teepi piba iglumetnemige, inge teeme braju cina sungabe me lica ebäcnisi. ⁷ Poto kuu gije cina itrametnemige pägepäge mete cabu, siige pägepäge cina uutinisi, gije bine jetäyimisi. ⁸ Yepä poto kuu gije cina itrametnemige müjirage gawe cabu, siige müjirage uutinisi. Teepi jeciretnemige, kuu jepänimisi: poto lui yepä hanred, poto lui siksti, poto lui teeti. ⁹ Weeme liba tablame piti nemi ätecijame, itecijinege umle äbitame.”

*Agesa Ingle Yeesu Biname bine Yaabiberäjemuge Ngene ca Agli Mene ca**(Mareko 4:10-12; Luuka 8:9-10)*

¹⁰ Abiberäja bägrä cina seclige Yeesu bau me, itemlisi egä, “Ngena name pi maane biname bine jejananemite ngene ca agli mene ca?” ¹¹ Yeesu jejemige egä, “Weebibine umle ituge wawena, egä Acejiyame lipulipu biname bine waadena, yepä teebibine lica ituge umle wawena pui poto cidi me, pui name pi cane ngene ca agli mene ca jejananemine teebibine. ¹² Lui biname me umle pisi nyene, teebine cerämu umle ceera, siige teeme umle te babo pa läbitepi. Yepä lui biname te singi lica gyene umle täapume, Acejiyame teeme bau ca pa yaacatepi teeme lui matikäli umle pisi nyene. ¹³ Cane naace name pi biname bine ngene ca agli mene jaajanemune, inge teepi ngene jwaatwananinusi, yepä ngene ca lica yaaglusi; teepi yäätcejemuge, yepä teepi äblicäco ätecija piyepu opo awatna. ¹⁴ Teeme cabu ibibi äbitenige Acejiyame me mename biname Isaya lui nüinäce gaabe mene jüicemüji egä,

“Weene itecijinuge cuta itecijinuge, yepä weene lica umle läbitininuye.

Weene ire lacitaninuye, ire lacitaninuye, yepä weene lica jääpänuye.

¹⁵ Ai biname bime ngene atwanena krokeciye gemi,

teepi tablame budubuduma gemi,

teepi irecu ätümuteji gemi.

Teepi apu liga lica cire läbitininejisi,

teepi piba teeme irecu ca jääpänimusi,

tablame ca yäätcejemuge,

ngene atwana ca opo yaawatnusi,

siige tatatrongärininusi cäme bau me cane Acejiyame te teebibine müji wawename.”

¹⁶ Weene gege gemi, inge weene weeme irecu ca jääpänuye, tablame ca itecijinuge, siige opo egäcäro yaawatnuye cäme mene inge ne. ¹⁷ Cane jijenininine weebibine, egä bucurage Acejiyame me mename biname piyepu conocäco biname, teepi baborage singi ituge ire me, weene lui gwidape bine jääpänanemepeye, yepä teepi lica ituge päpäna. Teepi singi ituge ätecijame, weene lui itecijanipi, yepä teepi lica ituge ätecija.”

*Yeesu Ngene ca Agli Mene ne Eboclomtige Kuu Gije Iisabeja poto cidi me**(Mareko 4:13-20; Luuka 8:11-15)*

¹⁸ Yeesu abiberäja bägrä bine jejemige egä, “Weene itecijinege, ngena tääpu myene ngena ca agli mene kuu gije iisabeja poto cidi me. ¹⁹ Lui kuu gije cina yaatrametnemuge gaabe cabu, pui lui eei biname bime pana gemi, lui cina mene yäatecijemuge Acejiyame te biname bine waadena poto cidi me, yepä teepi opo lica yaawa-tnusi pui mene ne. Puma cita ca Satani te täduge, pui mene bine yäasecräremuge epu pana, ele cina lipu kuu gije bine yäärwäjimusi. ²⁰ Lui kuu gije cina yaatrametnemuge kula gawe cabu, pui lui eei biname bime pana gemi, lui cina Miiji Mene liba yäatecijemuge, gege cama watawata joomlusi. ²¹ Yepä teepi matikolä padare taatu jäätrungusi, ingle teepi epu pana braju cäco gije liiyepu. Teepi liba mäpu ne jääpänusi coo teeme poto cidi me liba jicetnäjemusi, ingle teepi pui Miiji Mene ne jäätrungusi, teepi piba taatu teeme ätrunga bine yaabmalimusi. ²² Lui kuu gije cina yaatrametnemuge pägepäge mete cabu, pui lui eei biname bime pana gemi, lui cina Miiji Mene yäatecijemuge, yepä mäpu ngena atwanena cina ai gawe ireclota poto cidi me, cuta singi rarekaake piyepu poto gwidape tääpume, teepi peei Mene ne jäätäyusi pägepäge mete pana, siige kuu cäco läbituge. ²³ Lui kuu gije cina yaatrametnemuge miiji gawe cabu me, pui lui eei biname bime pana gemi, lui cina Miiji Mene yäatecijemuge, opo yaawatnusi, siige teeme cabu kuu jaawenimuge, poto bime cabu yepä hanred kuu, poto bime cabu siksti kuu, poto bime cabu teeti kuu.”

Ngene ca Agli Mene Gäli poto cidi me

²⁴ Yeesu nuuja ngena ca agli mene jejemige egä, “Apu gyene, Acejiyame te liba biname bine yaawadimuge. Calwacupi yageyame te puga ge. Tabé läduge, miiji gije bine yäatemuge teeme calwacupi cabu. ²⁵ Biname cina ute liba waagraruge, calwacupi yageyame me cubu biname te täduge, baace popo bine yiisabäjemuge calwacupi cabu me, siige luucruge. ²⁶ Gije cina luutinusi, teeme mope cabu ca läsinusi kuu. Teepi gäli cina cuta luutinusi. ²⁷ Puma cita ca calwacupi yageyame me kaakesea bägrä cina saacluge teeme bau me, jaajusi egä, ‘Babo biname, nää peei miiji gije lica gemi, maane lui sitemumete mäame calwacupi cabu? Luma cita ca gäli cina saacluge?’ ²⁸ Tabé jaajemuge egä, ‘Peei lui cubu biname gyene, lui te baace popo bine sewadimumi, siige seyäräjemumi cäme calwa-cupi cabu.’ Teepi yäatemlusi egä, ‘Näa, maane singi gäte cine otnime gäli amingewe?’ ²⁹ Tabé calwacupi yageyame te jaajemuge egä, ‘Gone naacluge, ingle weene liba gäli jaa-mingäjemuye, poto gije bine cuta yuutemuye. ³⁰ Ebmalemepeye, luutipesi gigri ngälu ire acita padare, piba cane ärucna biname bine cire täätpepemepepe gäli bine niinäce uutemame, sigu wawename, siige iisabame uliobo cabu me. Piba teepi kuu bine cire yaatomlecmepepe cäme mete cabu me waadename acrana tääpume.’”

Ngene ca Agli Mene Mastad Kuu Gije poto cidi me

(Mareko 4:30-32; Luuka 13:18-19)

³¹ Yeesu nuuja ngena ca agli mene jejemige egä, “Apu gyene, Acejiyame te liba biname bine yaawadimuge. Yepä biname te mastad kuu gije ne ecatige, siige jecnige teeme calwacupi cabu. ³² Pui kuu gije lui matikäli birige iyeta kuu gije cabu ca, yepä liba luutuge, babo läbituge iyeta calwacupi gije cabu ca. Tabé uli pana jaaguge, piba ele cina saacluge teeme mete bine arangejame teeme ciipe cabu.”

Ngene ca Agli Mene Uutneca Gwidape poto cidi me

(Mareko 4:32-34; Luuka 13:20-21)

³³ Yeesu nuuja ngena ca agli mene jejemige egä, “Apu gyene, Acejiyame te liba biname bine yaawadimuge. Yepä magebi te nesae diiba bine saawaduge bulu cama, jaaglemeläjimuge yepä kuke bora, uutneca gwidape ne saacatuge, yaacranimuge, siige jaama-nguge. Puma cita ca iyeta pui buluduu te tuutnecuge.”

³⁴ Iyeta ai maramara mene Yeesu ngena ca agli mene ca biname bine jejananemige. Tabé nuuja mene ca teebibine lica yaabiberäjimuge yepä ngena ca agli mene ca. ³⁵ Apu ibibi äbitige Acejiyame me mename biname me mene egä, “Cane cirege ngena ca agli mene iicema. Cane cirege jajanena mule poto cidi me, lui cina ämletnäreji gemi agedna cabu ca.”

Yeesu Eboclomtige Ngene ca Agli Mene ne Gäli poto cidi me

³⁶ Yeesu biname bine sebmalmimige, mete bora me abacitige. Teeme abiberäja bägrä cina seclige teeme bau me, jejisi egä, “Maane seboclomti cime tääpume ngena ca agli mene lui jicite gäli poto cidi me calwacupi je.”

³⁷ Yeesu puma cita ca gije abacitige pui mene ne aboclomtame. Tabé jejemige egä, “Biname lui te miijirage gije bine itemige, peei lui tabe sine, Acejiyame bau ca lui te täduji biname me äbituji. ³⁸ Calwacupi lui ai gawecewe gyene. Miijirage gije eei biname gemi, Acejiyame te lui bine ewadenemige; gäli eei biname gemi, Satani te lui bine

ewadenemige. ³⁹ Cubu biname lui te gäli uutana täápume baace popo bine calwacupi cabu me yisabäjemige, tabe lui Satani sine. Ire acita lui gawecewe me ngälugaabe padare gyene. Árucna biname lui Acejiyame me mename seemo gemi. ⁴⁰ Gáli bine lipu tomi jewenimisi ayime, pepu pana cirege ai padare me ngälugaabe je ábita. ⁴¹ Piba Acejiyame bau ca lui te táduji biname me ábituji, tabe teeme mename seemo bine cire täáteyepemepi teeme binamewale bime cabu ca eei bine waadename, lui cina biname bine opo jaawenimusi niyaniya mule bine wawenecame, piyepu nuuja niyaniya mule waweneca biname bine. ⁴² Teepi teebibine cire yisabäjemepesi baborage uliobo wádräji cabu me. Puma teepi ele cire yaangenetnemepi, giricu cire yaatebecmepesi. ⁴³ Piba conocáco biname cina bimu apacyera pana cirege, teeme Babe te liba cire yaawademepi teebibine. Weeme liba tablamé piti nemi átecijame, itecijinege umle ábitame.”

Nesae Ngene ca Agli Mene Acejiyame te Biname bine Waadena potó cidi me

⁴⁴ “Apu gyene, Acejiyame te biname bine liba yaawadimuge. Yepá biname te babo daremuyame miijirage gwidape ne jáápánuge, lui te gawe ca áclidnáneji ge. Tabe siige cáári cuta jááclidnuge, gege cama láduge, iyeta teeme gwidape bine yaawadimuge aletname. Rarekaake bine liba jáápánimuge, ingwe ca piba láduge, peei gawe ne jaaletnuge.

⁴⁵ Cuta apu gyene Acejiyame te liba biname bine yaawadimuge. Yepá biname te kusa bine jáárngemuge. ⁴⁶ Tabe liba yepá jamyacurage ne jáápánuge, tabe láduge, iyeta teeme gwidape bine yaawadimuge aletname. Pui rarekaake ca siige pui jamyacu kusa ne jaaletnuge.

⁴⁷ Cuta apu birige, Acejiyame te liba biname bine yaawadimuge. Cibubade biname cina net sigu ne jaadadnájusi malu cabu, siige tabe maramara cibú bine joomlájicmuge. ⁴⁸ Liba tapanuge, cibubade biname cina yáäládnusi doro me, ladnatáruge, cibú bine jaatranimusi maramara acraname. Miijiyame bine diiba bora me yáábácnimusi, niyaniya bine yisabimusi. ⁴⁹ Apu mule te ai padare me ngälugaabe je cirege ábita. Acejiyame me mename seemo cina cire saaclepi niya mule biname bine waadename miiji mule biname bime cabu ca, ⁵⁰ siige cire yisabemepesi baborage uliobo wádräji cabu me. Teepi puma ele cire yaangenetnemepi, giricu cire yaatebecmepesi.”

⁵¹ Siige Yeesu teeme abiberäja bágrä bine itemlimige egä, “Nää, weene opo bewatnimiyé iyeta ai ngene ca agli mene bine?” Teepi ‘yoo’ mene jejisi. ⁵² Yeesu puma cita ca jejemige egä, “Cotre abiberäja biname, laati te umle gyene mime cotre bine, tabe liba Acejiyame ne conocáco yáácáruge teebine acaname, tabe mete yageyame pana birige, lui te kirece piyepu sasa gwidape bine säásemuge teeme cumá cabu ca.”

Yeesu ne Nasareta Cewe je Jigyisi
(Mareko 6:1-6; Luuka 4:16-30)

⁵³ Yeesu liba iyeta ai ngene ca agli mene jajanena bine epirimige, tabe pui cewe ne sebmalige, ⁵⁴ acnenutige teemerge cewe me. Tabe puma biname bine ebiberäjimige abasecretna mete cabu. Lui cina jiteciji, teepi mage mutácáco ábitininisi, siige átemlájimisi egä, “Tabe luma cita ca ituge ai umle ne acatá? Cuta luma cita ca kokre ne itu jáápánanepi ciitaca mule bine wawenecame. ⁵⁵ Tabe pui mete raranga biname me bágrä gyene. Mariya teeme mage gwene piyepu Yakobu, Yoosepa, Simona, Yuuda naabi teeme iganewale gemi. ⁵⁶ Teeme ngulewale cuta ama piti nemi. Cije tabe luma cita ca umle ábitanenige iyeta ai mule bine wawenecame?” ⁵⁷ Siige teepi Yeesu ne jigiyisi.

Yeesu puma cita ca jejemige egä, “Acejiyame me mename biname ne yaacatusi iyeta potó ta, yepá lica teemerge cewe cabu piyepu teemerge binamewale cina.” ⁵⁸ Tabe puma bucurage ciitaca mule bine lica jewenimige, ingle teepi átrunga lica ge teeme täápume.

14

Yoane Niiye ca Áciseja Biname me Budre
(Mareko 6:14-29; Luuka 9:7-9)

¹ Pui padare cabu Galilaya probins mope biname ngii Heroda te Yeesu potó cidi me itecijige. ² Tabe puma cita ca teeme ingwe gaabe biname bine jejemige egä, “Tabe lui Yoane niiye ca áciseja biname gyene. Tabe budre cabu ca itu tarpinantumi, peei name pi teeme kokre pisi nyene ciitaca mule bine wawenecame.”

³ Heroda ai mene jüicige, ingle tabe sine biname, laati te tejemimumi Yoane ne oomlaname, seea ca átäyame, krokeciye mete bora me ásinglentame. Tabe ai mule ne tewenumi ingle Herodiyas name pi, lui teeme igane Pilipo me coga ge, yepá Heroda te juutecrepi, siige teeme coga me jwaawenepi. ⁴ Puma cita ca Yoane te Heroda ne jaajananeji egä, “Peei lui miiji mule lica gyene maane mááme igane me coga ne acatame.” ⁵ Heroda tabe peei name pi singi ge Yoane ne budre me aglime, yepá tabe wálu ge biname name pi, ingle teepi

ngene totwananimesi, egä Yoane lui Acejiyame me mename biname gyene. Peei name pi tabe wata lica seglumi, yepä krokeciye mete bora me secitumi.

⁶ Yoo, Yoane niye ca äciseja biname me budre gaabe apu gyene: liba Heroda me ärngi bimu te tatyaramtigi, tabe soriyomu ne jewenige. Pui padare cabu puga ge Herodiyas me beecma bägrä. Tabe giire jewäjige soriyomu biname bime opo gaabe. Heroda mage gege äbitige teeme giire name pi, ⁷ siige jojige egä, “Cane Acejiyame me opo gaabe je naajenine, egä maane ngena täapume liba nätinärenite, cane nääcärenine.” ⁸ Ngulebägrä me mage te jojige tabe Heroda ne apu jajime egä, “Cane singi gäne Yoane niye ca äciseja biname ne aglime, piba teeme mope ne pleito cabu acaname căme bau me päpäna täapume, egä tabe budre gyene.” Siige tabe ngulebägrä te ai mene jejige Heroda ne. ⁹ Heroda ngenecu mäpu me äbitige, yepä tabe lui Acejiyame me ngii cabu mene jojige teeme soriyomu biname bime opo gaabe je, peei name pi tabe teeme kaakesea bägrä ne jejige ngulebägrä me singi wawenime. ¹⁰ Kaakesea bägrä te ädige, Yoane me mope ne teläcnutige krokeciye mete cabu, ¹¹ mope ne secanige pleito cabu, siige ngulebägrä ne ocärige. Tabe teeme mage ne ocärige. ¹² Yoane me abiberäja bägrä cina seclige, teeme budrekaake ne isatisi mete cabu ca, gape cabu ecitisi. Puma cita ca teepi äcnärige, Yeesu ne jejisi, egä ngena mule cina bäbitinisi Yoane poto cidi me.

Yeesu Faib Tausen Biname bine Engärimige

(Mareko 6:30-44; Luuka 9:10-17; Yoane 6:1-14)

¹³ Yeesu liba Yoane me budre poto cidi me itecijige, tabe pui cewe ne sebmaliige, poo gaabe ädige biname căco cewe me ten taatu. Biname cina liba itecijemige, egä Yeesu bädige, teepi siige teeme cewe bine sebmäläcemisi, ernge ta eclige pui puupu cabu me Yeesu liiyeme ädige. ¹⁴ Teepi niinäce atyarige, Yeesu me poo te ingwe sipyige. Yeesu liba poo cabu ca arpatige, tabe bucurage biname bine jepänimige. Tabe owecu äbitige teeme täapume, siige pita biname bine müji jewenanemige.

¹⁵ Pui mämletca cabu je abiberäja bägrä cina seclige Yeesu bau me, jejisi egä, “Bimu te mage bädige. Biname căco cewe gyene ai, peei name pi biname bine jityepimi mameta lui cewe gemi, teepi puma cita ca deedei aletname teeme täapume.” ¹⁶ Yepä Yeesu teeme abiberäja bägrä bine jejemige egä, “Teepi nuuja singi lica gemi otnime, ingle weene te teebibine deedei ecäreme.” ¹⁷ Teepi jejisi egä, “Cime nata nuujarage deedei ama lica gemi, yepä faib buluduu gemi piyepu neeneneni cibü bumate gegi.” ¹⁸ Yeesu jejemige egä, “Sewademeye aima căme bau me.”

¹⁹ Puma cita ca Yeesu biname bine jejemige baace papa cabu adnaterame. Tabe piba faib buluduu neeneneni cibü cama sewadimige, cabu me ire acitige, Acejiyame ne eso ecärige. Piba tabe buluduu bine itrecimige cibü cama, abiberäja bägrä bine ecärimige, teepi siige biname bine ecäranemisi. ²⁰ Iyeta biname cina ibibi erwäjimisi. Abiberäja bägrä cina buluduu pacupacu bine etomlicmisi, jengärimisi, twelb diiba cina tapanininisi. ²¹ Lui rooriye cina erwäjisi pui deedei, teepi faib tausen ge. Coga bägrä bine lica ecnemisi.

Yeesu Niye papa cabu Otnige

(Mareko 6:45-52; Yoane 6:15-21)

²² Yeesu teeme abiberäja bägrä bine jejemige poo cabu acetne-rame, niinäce gaabe me äwäcame sawa nuuja poto doru me, tabe liba biname bine jityepäjemige. ²³ Siige tabe biname bine liba niinäce jityepäjemige, tabe piba jegelige podo cabu me irecu ätumutame. Mämletca me liba, Yeesu ten taatu puga ge podo cabu. ²⁴ Poo te sawa kuukälu cabu jage. Uule kuu cina poo ne eboclomäjisi, ingle buuwe te magerage opopo tipwäjige. ²⁵ Paulo ala me Yeesu piba täinige podo cabu ca, niye papa cabu ta ädige teeme bau me. ²⁶ Abiberäja bägrä cina teebine liba tepänisi niye papa cabu otni je, teepi siige mage wälu ge. Teepi apu jicisi egä, “Tabe lui dadränge gyene,” siige wälu ala abayininisi. ²⁷ Yepä Yeesu jejemige egä, “Wälu gone, cane säne!” ²⁸ Puma cita ca Peteru Yeesu ne jejige egä, “Yageyame, liba toracarage maane säte, maane naji cane uuplaname niye papa cabu mäme bau me otnime.” ²⁹ Yeesu jejige egä, “Tädi!” Peteru puma cita ca tuuplige poo cabu ca, gije abacitige niye papa cabu Yeesu bau me otnime. ³⁰ Yepä tabe liba jepänige, buuwe te kokre cama titwige, tabe wälu äbitige, siige abumame äbitige. Tabe ala abayige egä, “Yageyame, nätiyäril!” ³¹ Piba taatu Yeesu ime uutige, joomlige teebine, jejige egä, “Määme ätrunga matikäli gyene. Maane ngeno me neeneneni ngene atwana cama gäte?” ³² Teepi liba acenütäsi poo cabu me, buuwe te piba ärputige, siige mataru te enajige. ³³ Abiberäja bägrä cina poo cabu kokorare ca ipednäremisi Yeesu täapume, jejisi egä, “Toraca, maane Acejiyame me Bägrä gäte.”

Yeesu Pita Biname bine Müji Jewenemige Genesareta Gawe cabu

(Mareko 6:53-56)

³⁴ Yeesu teeme abiberäja bāgrā cama liba sawa ne yuurisi, teepi atyarige Genesareta gawe cabu me, siige poo te puma ipyige. ³⁵ Puma cita ca pui gawe biname cina liba Yeesu ne opo ewatnisi, teepi idre jecananisi cewe gaabegabe ta, siige biname cina iyeta pita biname bine sewadanemisi Yeesu bau me. ³⁶ Teepi teebine itemlisi egā, “Pita biname cina lipu gemi määme cäbletääpe pepyämu taatu oomlaname?” Siige iyeta lui cina joomlājisi, teepi miiji äbitaninisi.

15

Saarewale bime Abiberäja

(Mareko 7:1-13)

¹ Poto Parisea sigu biname piyepu cotre abiberäja biname cina seclige Yeesu bau me Yerusalema ca. ² Teepi itemlisi egā, “Lipu pi määme abiberäja bāgrā cina mime saarewale bime mule bine lica jaawenimusi? Teepi deedei loolo niinäce gaabe me ime lica läcisājini cude gwidape cabu ca kälyä äbitame.”

³ Yeesu teebibine jejemige egā, “Weene weemämu ngeno me Acejiyame me mene ne kaake me jaawenuye saarewale bime mule wawena ca? ⁴ Acejiyame te itu tiicuji egā, ‘Weene miiji mage babe bine opo gaabe me acita’ cuta piyepu egā, ‘Laati te liba teeme mage babe bime poto cidi me niiyarage mene jicemuge, teebine miiji budre me acita.’ ⁵ Yepä weene jicucye, egā biname me liba gwidape pisi nyene mage babe bine ätityerame, yepä tabe liba jicucye egā, ‘Ai gwidape lui Acejiyame täapume myene,’ ⁶ siige tabe teeme peei mene name pi kälyä bäbitige teeme mage babe bine ätityerame pui gwidape ca. Apu pi weene Acejiyame me mene ne kaake me jaawenuye naace täapume weene saarewale bime abiberäja ne äcwetname. ⁷ Weene walya biname gemi! Toraca gyene Acejiyame me mename biname Isaya lui niinäce gaabe mene jicucji weeme poto cidi me egā,

⁸ ‘Ai biname cina cebine nawepyeräjusi teeme tage miipe ca,

yepä teeme ngene atwanena cudecewera ge gyene căme bau ca.

⁹ Teepi nuuja miiji lica gemi cebine awepyeräjame,

ingle teepi biname bine yaabiberäjimusi cotre bine äcwetname, lui căme cotre lica gemi.’”

Lui Gwidape cina Biname ne Niija me Jaawenusi

(Mareko 7:14-23)

¹⁰ Yeesu biname bine ala tesoglicmige, jejemige egā, “Cāngena itecijinege, umle äbitinineye ai mene! ¹¹ Biname te ngena ne yaacituge teeme tage cabu, pui te niija me lica jaawenuge, yepä teeme tage cabu ca ngena te tasatuge, pui te teebine niija me jaawenuge.”

¹² Abiberäja bāgrā cina seclige Yeesu bau me, jejisi egā, “Nää, maane umle gāte, egā Parisea sigu biname cina niiyarage basicnantinisi määme mene name pi?” ¹³ Yeesu jejemige egā, “Iyeta gije, căme Babe cabu je lui bine lica sitemimumi, miiji uutema braju cama. ¹⁴ Weene ngenecu mäpu gone Parisea biname bime name pi. Teepi epu pana gemi irecu määsumäsu biname, lui cina otnime opo jaawenimusi poto irecu määsumäsu biname bine. Liba irecu määsumäsu biname te otnime opo jaawenuge nuuja teeme pana ne, teepi iyeta cupicu bora me laatramuge.”

¹⁵ Puma cita ca Peteru Yeesu ne itemlige teeme mene ne aboclomtame. ¹⁶ Yeesu abiberäja bāgrā bine jejemige egā, “Nää, weene cuta buduma camu gemi? ¹⁷ Weene nää umle lica bäbitiniye, egā biname te ngena ne yaacituge teeme tage cabu, camuge bora me labacituge, siige puma cita ca tasatuge. ¹⁸ Yepä ngena cina täsuge tage cabu ca, peei lui ngenecu bora ca saacluge. Peei cina biname ne niija me jaawenusi. ¹⁹ Teeme ngenecu bora ca täsuge niiyarage ngene atwanena cina, lui cina teebine jaawenusi tabe nuuja biname ne budre me aglime, sargi mule wawename, gwidape ero me, walya mene otromame, niyaniya mene iicetnejame. ²⁰ Ai cina biname ne niija me jaawenusi, yepä tabe liba ime äciseja căco deedei yār wäjimuge, pui te teebine niija me lica jaawenuge.”

Yepä Magebi me Ätrunga

(Mareko 7:24-30)

²¹ Yeesu pui cewe ne sebmalige, ädige Turo piyepu Sidona gawe cabu me. ²² Yepä Kanana cewe magebi, lui te pui gawe cabu tonajenājumi, tabe Yeesu bau me toclige, ala abayige egā, “Babo biname Daawida me kaakesaare, maane cebine owecu naweni! Căme bāgrā niiyarage gwene. Teeme trupa cabu pisi nyene niiyarage cable.” ²³ Yepä Yeesu nuuja mene lica ge.

Puma cita ca abiberäja bāgrā cina seclige Yeesu bau me, jejisi egā, “Peei magebi ne uycräji, ingle tabe ala tabayanenige mime kaake poto ca!” ²⁴ Yeesu jejemige egā, “Cebine ituge ätyepa Israela biname bime bau me taatu, lui cina epu pana gemi apeseräjaneji maamoi liiyepu.” ²⁵ Yepä pui magebi liba utecijige, tabe toclige, Yeesu me ernge gome

utramige, jejige egä, “Babo biname, nätinyäri!” ²⁶ Yeesu ngene ca agli mene ca teebine jojige egä, “Peei lui miiji lica gyene cane bägrä bime deedei iisabejame drego plongo bime bau me.” ²⁷ Magebi te Yeesu me ngene ca agli mene jewe-cnistige, jejige egä, “Toraca babo biname, yepä drego plongo cina nata yäärwäjimusi lui pläpupläpu cina saatrametnemuge bägrä bime dade cabu ca gawe me.” ²⁸ Yeesu jojige egä, “Magebi, mäame ätrunga lui baborage gyene! Mäame singi te ibibi läbitege.” Peeirage padare cabu teeme bägrä te miiji äbitige.

Yeesu Bucurage Biname bine Miiji Jewenimige

²⁹ Yeesu pui cewe ne sebmilige, Galilaya sawa ligi me ädige. Tabe puga podo ne jegelige, siige adnatige. ³⁰ Bucurage biname cina seclige teeme bau me, sewadimisi otnetneja cäco biname bine, irecu mäasumäsu biname bine, ernge ime niyaniya biname bine, mene cäco biname bine cuta bucurage poto maramara pita biname bine. Teebibine icranimisi Yeesu me opo gaabe, tabe siige miiji jewenanemige. ³¹ Biname cina mutäcäco äbitinini, teepi liba jepänimisi mene cäco biname cina lui mene jücemisi, ernge ime niyaniya biname cina lui iyeta miiji äbitaninisi, otnetneja cäco biname cina lui cängena otninisi, irecu mäasumäsu biname cina lui irecu aasataninisi. Teepi puma cita ca eso ecärisi Israela biname bime Acejiyame ne.

*Yeesu Foa Tausen Biname bine Engärimige
(Mareko 8:1-10)*

³² Yeesu teeme abiberäja bägrä bine ala tesoglicmige, jejemige egä, “Cane owecu gäne ai biname bine täapume, ingle teepi nesae bimu cama cane cama sicrajimumi, siige page teeme nuuja deedei lica gemi ärwäjame. Cane singi lica gäne teebibine deedei cäco ätyepame, ingle teepi gaabe je cable jaalocnimuge.” ³³ Abiberäja bägrä cina itemlisi egä, “Mine luma jepänemisi ibibi deedei ai daapo taatu cewe cabu teebibine ngeerame?” ³⁴ Yeesu itemlimige egä, “Weeme lija buluduu gemi?” Teepi jejisi egä, “Cime seben buluduu gemi piyepu nesae matimati cibi.”

³⁵ Puma cita ca Yeesu biname bine jejemige gawe cabu adna-terame. ³⁶ Tabe seben buluduu piyepu cibi bine sewadimige, Acejiyame ne eso ecärige, itrecimige, abiberäja bägrä bine ecärimige, siige teepi biname bine ecäranemisi. ³⁷ Teepi iyeta erwäjisi, ngälu ibibi äbitinini. Puma cita ca abiberäja bägrä cina deedei pacupacu bine etomlicnisi, seben diiba bine jengärimisi. ³⁸ Lui rooriye cina erwäjimisi, teepi foom tausen ge. Coga bägrä bine lica ecnemisi. ³⁹ Puma cita ca Yeesu biname bine jityepimige, poo cabu acenutige, Magadan gawe cabu me ädige.

16

*Parisea piyepu Sadukea Biname cina Singi Ciitaca Mule Pöpäname
(Mareko 8:11-13; Luuka 12:54-56)*

¹ Parisea sigu biname piyepu Sadukea sigu biname cina seclige Yeesu bau me teebine apicetnärume. Teepi jejisi egä, “Maane ciitaca mule jeweni cine pöpäname, egä Acejiyame me kokre mäame cabu pisi nyene.” ² Yepä Yeesu jejemige egä, “Bimu te liba läpulyärüge, weene liba jääpänimuye carbe uudi, weene piba apu jücuuye egä, ‘Ciicyeiyee mage bimu te ebenige, ingle carbe lui uudi gemi.’ ³ Krokerage weene liba jääpänimuye, egä carbe uudi gemi piyepu cäsä gemi, piba weene jücuuye egä, ‘Page ngupe te secirenige, ingle carbe uudi piyepu cäsä gemi.’ Weene carbe cabu ca bimu ne opo yaawatnuye, yepä weene äblicäco gemi opo awatna page ai padare cabu lui mule cina äbitinini, teepi ngena tääpu memi. ⁴ Weene ätrunga cäco niyarage biname gemi page. Weene cebine nätemliye ciitaca mule wawename. Weene nuuja ciitaca mule ne lica pa jepänepewe, yepä lui ciitaca mule te Yoona täapume äbituji.” Puma cita ca Yeesu teebibine sebmalmimige, nuuja gome me äyeblingtige.

*Parisea piyepu Sadukea Biname bime Uutneca Gwidape
(Mareko 8:14-21)*

⁵ Yeesu piyepu abiberäja bägrä cina liba yuurisi sawa nuuja poto doro me, abiberäja bägrä cina ngene jitrimalemige buluduu bine waadename. ⁶ Puma cita ca Yeesu teebibine ngene ca agli mene ca jejemige egä, “Weene ireire inajipi Parisea sigu biname piyepu Sadukea sigu biname bime uutneca gwidape täapume.” ⁷ Abiberäja bägrä cina teemeteme jitrani egä, “Tabe naace popi ai mene nijinige, ingle mine buluduu bine lica sewadimisi.”

⁸ Yeesu umle äbitige, egä teepi ngena täapume jitrani, siige tabe itemlimige egä, “Weene ngena name pi jitraniye, egä weeme buluduu lica gyene? Weeme ätrunga lipu matikolä gwene. ⁹ Weene nää camu gemi umle äbita? Weene nää uja ngene ituge ätrimela, cane lipu faib buluduu bine sitrecimumene faib tausen rooriye bime täapume. Weene nää lija diiba bine tengärimumeye pacupacu deedei ca? ¹⁰ Coo piyepu weene nää uja ngene ituge ätrimela

seben buluduu lipu ibibi ge fooa tausen rooriye bime täápume. Lija modamoda diiba bine weene tengärimumeye deedei pacupacu ca? ¹¹ Äi, lipu pi weene umle lica bäbitininiye, egä cane buluduu täápume lica bii jijinine. Yoo, cane cääri jijenininine, egä weene ireire inajipi Parisea piyepu Sadukea biname bime uutneca gwidape täápume.” ¹² Abiberäja bägrä cina teepi siige opo ewatni-si, egä tabe teebibine lica jejemige ireire lenajame uutneca gwidape täápume, yepä Parisea piyepu Sadukea biname bime abiberäja mene täápume.

*Peteru Yeesu ne Jewabudnitige egä Tabe Keriso Sine
(Mareko 8:27-30; Luuka 9:18-21)*

¹³ Yeesu ädige Kesarea Pilipo baano cewe mameta lui gawe cabu me. Tabe puma abiberäja bägrä bine itemlimige egä, “Biname cina lipu jüicusi, egä cane laasi näne, Acejiyame bau ca lui te biname me äbitujine?” ¹⁴ Teepi jejisi egä, “Poto cina jüicenis, egä maane Yoane niye ca äciseja biname gäte. Poto cina jüicenis, egä maane Eliya säte; poto cina egä maane Yeremiya säte coo nuuja Acejiyame me mename biname gäte.” ¹⁵ Yeesu itemlimige egä, “Cije weene, weene lipu jüiceniye egä cane laasi näne?”

¹⁶ Simona Peteru te Yeesu ne jejige egä, “Maane lui Keriso säte, biname bine lui te niija cabu ca pagege äsecrera. Maane ireclota Acejiyame me Bägrä gäte!” ¹⁷ Yeesu Peteru ne jejige egä, “Simona, Yoona me bägrä, maane gege gäte. Nuuja biname te peei ngene atwana lica nääcäriige meebine, yepä peei lui cäme Babe bau ca gyene, cabucewe je lui te enajenige. ¹⁸ Cane naajenine meebine Peteru, egä mäáme ngii lui ‘Kula’ gyene. Piyepu maane lui mene bii jüicite cäme poto cidi me cuta kula pana gyene, siige ai kula cabu cane cäme ätrunga inge ne pa yaacitene. Tabe epu kokre pa yaanajepi, egä budre te äblicäco apremela teebine. ¹⁹ Cane meebine kii pa nääcärepena Acejiyame bau lui gaabe ne iitnaname piyepu armime. Maane ngena mule täápume gaabe ne jüitnute, Acejiyame te yaacatuge, cuta maane ngena mule täápume gaabe ne yaarmute, Acejiyame te yaacatuge.” ²⁰ Puma cita ca Yeesu abiberäja bägrä bine jejemige egä, “Gone biname bine umle jaawenimuye, egä cane Keriso säne, lui te biname bine niija cabu ca pa yääsecräremepene.”

*Yeesu jüicemige Teeme Cewe Oocanena piyepu Budre poto cidi me
(Mareko 8:31–9:1; Luuka 9:22-27)*

²¹ Pui padare cabu Yeesu gije abacitige abiberäja bägrä bime täápume pajecu me wawename, egä tabe miiji Yerusalema me pa lädepi. Tabe puma pagege mäpurage gwidape bine päpäna modamoda iiwäreja biname, cotre abiberäja biname piyepu nuuja Israela modamoda biname bime bau ca. Teebine pagege budre cabu acita, yepä nesae me lui bimu tabe piba pagege arpinenta.

²² Puma cita ca Peteru Yeesu ne ecanige taatu cewe me, kokre cama mene jejige egä, “Eewe, babo biname! Acejiyame te owecu naawenepi! Peei mule te gone läbitume mäáme täápume!” ²³ Yeesu tatatrongtige, Peteru ne jejige egä, “Satan, äyebingti cäme opo gaabe ca! Maane cebine liga iirbutame nawenite. Maane biname bime pana ngene jotwananenite, lica Acejiyame pana.”

²⁴ Siige Yeesu abiberäja bägrä bine jejemige egä, “Biname te liba singi gyene cane cama yepä otnime, tabe miiji teemerage singi bine gawe me acrana, teeme baarge uli ne palace cabu acana siige cebine ingwe äcwi. ²⁵ Laati te liba singi lica teemerage singi bine abmaläcemame, tabe teeme ireclota ne cirege apesera, yepä laati te singi teemerage singi bine abmaläcemame cämiji pi, tabe iyeteta ireclota ne cire jüüpänepi. ²⁶ Biname te nuuja miiji ne lica cire jüüpänepi, ngänu gyene tabe puu iyeteta ai gawecewe ne yaacatuge, yepä teeme ireclota ne yaapesaruge. Nuuja gwidape lica gyene biname te teeme ireclota daremu me ceerame. ²⁷ Acejiyame bau ca lui te täduji biname me äbituji, tabe teeme Babe me jamyacu apacyera cabu teeme mename seemo cama cire tädepi. Siige tabe biname bine piba daremu cire yääcäranemepi teeme mule ibi. ²⁸ Cane toraca mene jijenininine, egä ama poto lui cina jeclajutäjenemige, teepi lica cirege budre äbita, ngälu teepi teebine cire jüüpänepesi mope biname täápume otni.”

17

*Yeesu Mara Opo me Äbitige
(Mareko 9:2-13; Luuka 9:28-36)*

¹ Siks bimü ingwe gaabe ca Yeesu aacanänige Peteru piyepu nanigane wäsi Yakobu naabi Yoane, siige opo jaawenänige podo caburage me ten taatu. ² Podo cabu je Yeesu mara opo me äbitige abiberäja bägrä bime irewale je. Teeme opo te epu oplacmeläjige bimü iredäri pana, piyepu teeme cäbletääpe cina äbitininisi bulu taatu me, apacyera pana. ³ Piba Moose naabi Eliya taboclomtäsi teeme cabu me, siige Yeesu cama mene jüicemäsi. ⁴ Puma cita ca

Peteru Yeosu ne jejige egä, “Yageyame, cine miijirage gämi ama. Maane liba singi gäte, cane aarangenänine nesae matimati mete bine, yepä mäame, yepä Moose me, yepä Eliya me.”

⁵ Peteru liba camu mene iicema cabu je, piba carbe te apaclyera cama tädige, iyeta teebibine aacwabänige. Puma cita ca tagepogogo te tasatige carbe bora ca egä, “Ai lui căme ngenecurage Bägrä gyene. Cane teeme täapume babo ngenecu miiji gäne. Weene teebine jitecijeyel!” ⁶ Abiberäja bägrä cina liba itecijemige tagepogogo, teepi mage wälu äbitinisi, oweowe itrametnemige gawe cabu me. ⁷ Yeosu teeme bau me tädige, joomlänige, jääjänige egä, “Abujengäneye, wälu gone!” ⁸ Teepi puma cita ca mope ewejengänisi, yepä Yeosu taatu ne jepänisi.

⁹ Siige teepi liba täinetnänige podo cabu ca, Yeosu abiberäja bägrä bine jääjänige egä, “Gone biname bine umle jaawenanemuye, weene lui mule ne bii jepäniye, ngälu cane, Acejiyame bau ca lui te tädujine biname me äbitujine, pagege budre cabu ca arpinenta.” ¹⁰ Puma cita ca abiberäja bägrä cina Yeosu ne itemlänisi egä, “Ngeno me cotre abiberäja biname cina jüicenis, egä Eliya te miiji niinäce gaabe me otni, piba ingwe ca Keriso, biname bine niyya cabu ca äsecrera biname te cire tädepi?” ¹¹ Yeosu teebibine jääjänige egä, “Toraca gyene, egä Eliya te miiji niinäce otni iyeta gwidape bine teeme puupu cabu acraname. ¹² Cane toraca mene jijenänine, egä Eliya uja ituge otni, yepä biname cina opo lica yaawatnepesi, pui name pi teepi teebine jaawenepesi, teepi lipu ituge singi. Cuta piyepu cane lui te Acejiyame bau ca tädujine biname me äbitujine, cane pagege biname bime bau ca mäpu ne päpäna.” ¹³ Siige abiberäja bägrä cina umle äbitänisi, egä Yeosu lui Yoane niyye ca äciseja biname poto cidi me bii jääjänige.

*Yeosu Miiji Jewenige Niyya Cable cama Bägrä ne
(Mareko 9:14-29; Luuka 9:37-43)*

¹⁴ Yeosu teeme nesae abiberäja bägrä cama liba podo cabu ca täinetnänige biname bime cabu me, piba yepä biname te Yeosu bau me tädige, kokorare ääpednutige, ¹⁵ jejige egä, “Babo biname, maane căme bägrä ne owecu jeweni. Tabe naabe äbitanenige oonina pita cabu ca, siige yaatramanuge uliobo cabu piyepu niyye cabu. ¹⁶ Cane mäame abiberäja bägrä bime bau me secanine, yepä teepi äblicäco ge teebine miiji me wawena.” ¹⁷ Yeosu jüicige egä, “Weene lipu ätrunga căco gemi, niyyarage biname gemi! Luma ngine padare cama cane miiji weene cama lenaja? Luma ngine padare cama cane miiji weeme ätrunga căco mule päpäna? Secaneye bägrä ne căme bau me.” ¹⁸ Puma cita ca Yeosu niyya cable ne jejige asatame, siige tabe asatige. Puirage padare cabu bägrä te miiji äbitige.

¹⁹ Abiberäja bägrä cina Yeosu bau me seclige, ogä jejisi egä, “Cine lipu pi niyya cable äyecreja căco äbitininago?” ²⁰ Tabe jejemige egä, “Weeme ätrunga matikäli gyene. Cane toraca mene jijenininine, weeme ätrunga liba pisi nyene, ngänu gyene epu pana duuwe baace kuu matikolärage, weene miiji gemi ai podo ne jaji egä, “Awetänti ama cita ca piyyeme!” siige tabe lawetäntuge. Weeme liba ätrunga pisi nyene, iyeta gwidape ibibi gemi weeme täapume. ²¹ Yepä apuyame ne weene äblicäco nuuja mule ca äyecreja yepä irecu ätumuta ca piyepu pui irecu ätumuta padare cabu weene miiji deedei căco lenaja.”

*Yeosu Cääri Mene Jüicemige Teeme Budre poto cidi me
(Mareko 9:30-32; Luuka 9:43-45)*

²² Abiberäja bägrä cina liba iyeta abasecretnege Galilaya me, Yeosu teebibine jejemige egä, “Cane lui Acejiyame bau ca tädujine biname me äbitujine, cebine mameta gyene biname bime ime cabu acita. ²³ Teepi cebine pa naglepesi budre me, yepä nesae me lui bimu cabu cane piba page larpinantepene budre cabu ca.” Abiberäja bägrä cina mage ngenecu mäpu me äbitinisi.

Täks Rarekaake Atomleca Acejiyame me Iiwäreja Mete täapume

²⁴ Yeosu liba atyaramtige Kaprenauma me teeme abiberäja bägrä cama, biname lui cina yaatomlicmusi Acejiyame me iiwäreja mete täapume täks rarekaake, teepi piba seclige Peteru ne ätemla-me egä, “Nää, mäame abiberäja biname te täks rarekaake yaacranuge iiwäreja mete täapume?” ²⁵ Peteru jejemige teebibine egä, “Ngenä pi, yaacranuge.” Tabe liba mete bora me abacitige, Yeosu niinäce me puma mene jüicige, Peteru ne itemlige egä, “Simona, maane lipu ngene jotwanenite, ai gawe cabu lui mope biname teepi nää luma cita ca täks rarekaake bine yaatomlicmusi teeme täapume, teeme bägrä bime bau ca coo nuuja biname bime bau ca?” ²⁶ Peteru jejige egä, “Nuuja biname bime bau ca, lica teeme bägrä bime bau ca.” Yeosu jejige egä, “Yoo siige, cane cuta kälyä gäne Acejiyame me mete täapume täks rarekaake acrana cabu ca, ingle cane teeme Bägrä gäne. ²⁷ Yepä mine gone teebibine ngenecu mäpu me jaawenemago. Äte ädi, edigiricu jepetäji sawa cabu. Maane niinäce lui cibu ne irpatenite, tage jipälutepi, siige maane yepä rarekaake ne jepänenite puma. Maane pui ne ecatepi, ecärempi mime täks täapume.”

18

*Laasi Nyene Baborage?**(Mareko 9:33-37; Luuka 9:46-48)*

¹ Pui padare cabu abiberäja bägrä cina seclige Yeesu ne ätemla-me egä, “Acejiyame te lui biname bine yaawadimuge, laasi nyene baborage?” ² Yeesu yepä matikolä bägrä ne tesoglicige, jejige teeme cole je aclajutame, ³ piba abiberäja bägrä bine jejemige egä, “Cane toraca mene jijenininine weebibine, egä weene liba lica weeme ngene atwanena bine yaatrongärimuye bägrä pana ätrungame, piba weene miiji lica gemi Acejiyame me waadena mule cabu me äbäcname. ⁴ Acejiyame te lui biname bine yaawadimuge, teeme cabu ca eei te baborage yaanajuge, lui te teemämu matikolä läbituge ai bägrä pana. ⁵ Laati te cäme ngii cabu jaawabluge yepä apu pana bägrä ne, tabe cuta nawabluge cebine.”

*Owe Äswana Niyya Mule täápume**(Mareko 9:42-48; Luuka 17:1-2)*

⁶ “Ai matimati bägrä lui cina cebine nätrungusi, laati te liba teeme yepä ne jaawenuge niyya mule wawenname, pui biname te mäpu ne cire jääpänepi Acejiyame bau ca. Teeme singicace gome liba jaaglotusi baborage kula ne, siige malu cabu yaajarusi budre me, peei mäpu lui plowa birige pui mäpu cabu ca tabe lui ne cire jääpänepi. ⁷ Mage niyyarage gyene, egä ai gawecewe cabu piti nemi gwidape, lui cina biname bine jaawenimusi niyya mule wawenecame. Iyeta padare pipu gwidape cina saacluge, yepä babo niyyarage gyene biname täápume, lui te biname bime cabu me pui gwidape bine saawadimuge.”

⁸ Siige Yeesu puma cita ca teeme abiberäja bägrä bine jejemige egä, “Määme ime te coo ernge te liba naawenuge maane singi ädrime niyya mule wawenname, maane miiji pui ngene atwana ne watatarage iyeblingtepi, epu pana ime ne coo ernge ne lipu jääläcnutute, yaajarute. Miiji gyene maane yepä ernge coo ime cama iyeteta ireclota cabu me otni, yepä niyya gyene maane iyeta piicwa cama otni iyeteta uliobo cabu me. ⁹ Cuta määme irecu te liba naawenuge maane singi ädrime niyya mule wawenname, maane miiji watatarage peei ngene atwana ne iyeblingtepi, irecu ne lipu juungyatute. Miiji gyene maane yepä irecu cama iyeteta ireclota cabu me otni, yepä niyya gyene maane neeneni irecu cama uliobo puupu cabu me otni.”

*Ngene ca Agli Mene Gyene Apesera Maamoi poto cidi me**(Luuka 15:3-7)*

¹⁰ “Jepäneye, egä weene ai matimati bägrä bime yepä ne gone äseblecäja. Cane jijenininine weebibine, egä teeme mename seemo cina cabucewe je iyeta padare cabu cäme Babe me opo ne jepänanenis. ¹¹ Cane lui Acejiyame bau ca tädujine biname me äbitujine, cane naace täápume tädujine, egä lui cina apesareji gemi teebibine niyya cabu ca äsecerame.

¹² Weene lipu ngene jotwanininiye, biname te ngena jaawenuge teeme liba yepä hanred maamoi piti nemi, siige yepä te liba lapesaruge? Tabe yaabmalimuge naintinain bine podo cabu, siige läduge ärngime, lui te lapesaruge. ¹³ Tabe gege birige naintinain maamoi täápume, lui cina apesareji lica gemi. Yepä cane toraca jijenininine, egä tabe mage gege birige apesareji maamoi ne liba jääpänuge. ¹⁴ Cuta pepu gyene, weeme Babe cabucewe je tabe singi lica gyene apu matimati bägrä yepä te cäme bau ca apeserame.”

Mene Ätrunga Biname poto cidi me Lui te Niyya Mule Jaawenuge

¹⁵ “Määme nuuja ätrunga biname te liba niyya mule yaacnuge määme täápume, maane ädepi, ogä eblawäjeppi. Tabe liba näätəcijuge, maane teebine bii sewecnistite. ¹⁶ Yepä tabe liba lica näätəcijuge, maane piba yepä coo neeneni biname cama ädepi teeme bau me. Maane miiji ai ne naace popi wawena, inge Oogäräneji mene te jiićenige, egä maane biname ne liba jaaitnäjutute, neeneni coo nesae biname cina miiji peema aitneja täápume. ¹⁷ Tabe liba teebibine cuta lica jäätecijemuge, siige piba ätrunga inge biname bine umle jewenemepi. Yepä tabe liba cuta teebibine ätecija cäco, siige maane teebine epu jewenepi Acejiyame umle cäco biname ne liiyepu coo täks rarekaake uutecrena biname ne liiyepu.

¹⁸ Cane toraca mene jijenininine weebibine, egä weene ngena mule täápume gaabe ne yaarmuye, Acejiyame te yaacatuge, cuta weene ngena mule täápume gaabe ne jiitnuye, Acejiyame te yaacatuge. ¹⁹ Cane cerämu poto jijenininine, egä weene neeneni cina liba gawecewe cabu yepä ngene atwana ne yaacituye weene ngena täápume irecu ätumutame, cäme Babe cabucewe je tabe pa icärepi. ²⁰ Inge naace popi neeneni coo nesae cina liba cäme ngii cabu labasecrtänusi, cane pisi näne teta cama.”

Ngene ca Agli Mene Owecu cäco Kaakesea Bägrä poto cidi me

²¹ Peteru tädige, Yeesu ne itemlige egä, “Yageyame, cäme biname te niyya mule liba nawenanuge, lija gääbu cane miiji teeme niyya mule ngene ätrimelame? Nää, seben gääbu?”

22 Yeesu jejige egä, “Lica seben gääbu, yepä sebenti gääbu seben! 23 Acejiyame te liba biname bine yaawadimuge, tabe epu läbituge gawe mope biname pana, laati te singi ire me teeme kaakesea bägrä cina lipu ire jaatwemusi teeme rarekaake bine. 24 Tabe liba gije abacitige ai kaakesea wawename, piba yepä kaakesea bägrä ne teeme bau me secanisi, lui te yepä milyon rarekaake itu yaawademepi teeme bau ca. 25 Ingle pui kaakesea bägrä me rarekaake lica ge daremu aglime, peei name pi babo biname te jejemige teeme coga bägrä, iyeta teeme gwidape piiyepu tabe, teebibine waadename aletname piba pui rarekaake ca daremu aglime. 26 Siige pui kaakesea bägrä te teeme babo biname me opo gaabe kokorare ääpednutige, ewejanige egä, ‘Maane owecu nawenepi. Padare näcärepä, cane iyeta rarekaake piba daremu pa naawecnemepene.’ 27 Babo biname te teebine owecu jewenige, jejige egä, ‘Daremu gone saawecnimute,’ siige tabe teebine jityepige.

28 Yepä pui kaakesea bägrä te liba asatige, tabe teeme keege kaakesea bägrä ne jepänige, lui te yepä hanred rarekaake bine itu sewadimumi teeme bau ca, siige singicace gome teebine jejecletnäjige claabe cama, jejige egä, ‘Maane rarekaake daremu nawecnisti.’ 29 Teeme keege te kokorare ääpednutige, ewejanige egä, ‘Maane owecu nawenepi! Padare näcärepä, cane iyeta rarekaake piba daremu pa naawecnemepene.’ 30 Yepä tabe owecu lica ge, siige teebine ijarige krokeciye mete bora me, ngälu tabe cirege daremu awecnema.

31 Babo biname me poto kaakesea bägrä lui cina jepänisi, teepi calu te jitemige piiyepu teepi mage ngenecu mäpu ge. Teepi babo biname bau me eclige, iyeta jejananisi ai poto cidä me. 32 Puma cita ca babo biname te ala tesoglicige teeme niinäce kaakesea bägrä ne, jejige egä, ‘Maane niiyarage kaakesea bägrä gäte. Ingle maane nawejanite, cane ngene nätrimalige mäame daremu bine awecnä-me. 33 Maane cuta miiji owecu jaawenejite mäame keege ne, cane lipu meebine owecu naawenine.’ 34 Tabe babo biname te mage claabe me äbitige, siige jityepige teebine krokeciye mete me, ngälu tabe cirege iyeta pui daremu bine awecnä. 35 Apu cirege cäme Babe cabu je iyeta weebibine wawena, weene liba weeme ngenecu ca lica ngene jitrimalinuge, weeme nuuja ätrunga biname te ngena niija mule jaawenuge.”

19

Mene Coga Ägyi poto cidä me (Mareko 10:1-12)

1 Yeesu liba mene iicema siigesige äbitige, tabe Galilaya gawe ne sebmaliige, Yoridana baduge ne yuurige nuuja poto doro me Yuudea gawe cabu me. 2 Bucurage biname cina teebine ingwe icwisi, siige tabe pita biname bine miiji jewenanemige puma.

3 Poto Parisea sigu biname cina seclige Yeesu ne apicetnärame. Teepi itemlisi egä, “Nää Cotre ibi mule gyene rooriye te teeme coga ne liba ägyi papa ingle cabu ca?” 4 Yeesu jejemige egä, “Egäsu weene ituge acnema Oogäräneji mene te lipu jicenige, egä agedna cabu ca Acejiyame te biname bine jaawenuji rooriye me piiyepu magebi me, 5 siige jiicuji egä, ‘Peei name pi rooriye te miiji teeme mage babe bine gomala coga cama atejäclmutame, siige teepi yepä me läbitäsi.’ 6 Teepi siige piba neenenä lica gegi, yepä teepi yepä taatu gegi. Peei name pi biname te gone maramara me wawena, Acejiyame te laati bine laatejäclmutuge.”

7 Puma cita ca Parisea sigu biname cina itemlisi egä, “Cije ngena name pi piba Moose me Cotre cabu apu oogäräneji gyene, egä rooriye te liba singi birige coga ne ägyime, tabe miiji peba ne oogära ägyi ingle poto cidä me, siige pui peba cama jwäätyepuge teebine?” 8 Yeesu jejemige egä, “Moose naace name pi weebibine conocäco icärininuji weene coga ne ägyime, ingle weene ätecija cäco biname gemi. Yepä agedna cabu ca pepu lica ituge. 9 Cane toraca mene jijenininine weebibine, egä rooriye lui te teeme coga ne jwäägyuge, yepä tabe teeme coga te nuuja ero lica ituge wawena, siige tabe liba nuuja coga ne waacatuge, tabe ero mule ne jaawenuge.”

10 Abiberäja bägrä cina puma cita ca Yeesu ne jejisi egä, “Ai liba gaabe gyene coga rooriye bime tääpume, atejäclmuta cabu ca miiji gyene coga rooriye cäco lenajame.” 11 Yeesu jejemige egä, “Ai abiberäja lui iyeta biname bime tääpume lica gyene, yepä eei bime tääpume taatu Acejiyame lui bime tääpume singi teepi pepu lenajame. 12 Maramara ingle piti nemä biname cina atejäclmuta cäco lenajame. Poto cina teeme ärngi cabu ca epu gemi egä teepi äblicäco atejäclmuta; poto bine biname cina pepu me ituge wawena; poto cina teemämu pepu me ituge äbita, ingle teepi singi gemi Acejiyame taatu te teebibine waadename. Laati te miiji gyene ai abiberäja ne acatame, tabe jaawenepi.”

Yeesu Ime Aacitige Bägrä bime papa cabu me Teeme Miiji tääpume (Mareko 10:13-16; Luuka 18:15-17)

¹³ Biname cina bāgrā bine sewadimisi Yeesu bau me naace me tabe ime acitame teeme papa cabu me piiyepu irecu ātumulame teeme tāapume. Yepā abiberāja bāgrā cina jicnecimisi teebibine. ¹⁴ Yeesu abiberāja bāgrā bine jejemige egā, “Bāgrā cina saaclege cāme bau me. Gone jiihemuye, ingle ai bāgrā pana ātrunga cama lui biname teebibine Acejiyame te yaawadimuge.” ¹⁵ Puma cita ca Yeesu teeme ime aacitanige bāgrā bine papa cabu me teeme miiji tāapume, siige ai ingwe gaabe ca tabe piba ādige.

*Mamy Dogwe Biname te Yeesu ne Edārige
(Mareko 10:17-31; Luuka 18:18-30)*

¹⁶ Yepā biname te tādige Yeesu bau me, itemlige egā, “Abiberāja biname, cane ngena miiji mule ne miiji wawena iyeteta ireclota ne pāpāname?” ¹⁷ Yeesu jejige egā, “Maane ngeno me nātemlite, egā ngena gyene miiji? Nuuja gwidape te miiji lica gyene, yepā Acejiyame taatu gyene miiji. Maane liba singi gāte iyeteta ireclota ne pāpāname, maane miiji cotre bine ācwetna.” ¹⁸ Pui biname te Yeesu ne itemlige egā, “Lui cotre bine?” Yeesu jejige egā, “Biname ne gone budre me agli; sargi mule gone; gwidape ero gone; walya aitneja gone; ¹⁹ mage babe bine miiji opo gaabe me acitena; maane miiji nuuja biname tāapume epu singi ābitena, maane lipu māmāe tāapume singi lābitanute.” ²⁰ Puma cita ca mamy biname te jejige egā, “Cane ituge iyeta ai cotre bine wawenetnāja. Cerāmu cane miiji ngena ne wawena?” ²¹ Yeesu jejige egā, “Maane liba singi gāte epucāco lenajame, maane ādi, iyeta māmāe gwidape bine aletname ewademepi, rarekaake owecumete biname bine ecāranemepi, siige tādepi cane cama yepā otnime, piba maane miijimiji gwidape bine cabucewe je cire jepānemepi.” ²² Mamy biname te liba itecijige, tabe ngenecu māpu cama āyebtingtice, ingle tabe babo dogwe biname ge.

²³ Puma cita ca Yeesu teeme abiberāja bāgrā bine jejemige egā, “Toraca gyene, dogwe biname tāapume māpurage birige Acejiyame me cabucewe waadena cabu ābācname!” ²⁴ Cane cerāmu jijenininine, egā peei lui māpu birige kamela te nilo bora cabu me abacitame siige asatame, yepā baborage māpu birige dogwe biname te Acejiyame me waadena cabu abacitame.” ²⁵ Abiberāja bāgrā cina liba itecijemige, teepi siige iyeta mutācāco ābitininisi, itemlisi egā, “Laati te piba miiji gyene iyeteta ireclota ne pāpāname?” ²⁶ Yeesu ire acitige teeme bau me, jejemige egā, “Biname te ībibi lica gyene pui ne wawename, yepā Acejiyame te miiji gyene iyeta gwidape bine wawenecame.”

²⁷ Puma cita ca Peteru Yeesu ne jejige egā, “Cije cine lipu gemi? Cine iyeta gwidape bine itu saabmalemepesi maane cama yepā otnime, cine siige ngena miiji ne cirege pāpāna?” ²⁸ Yeesu jejemige egā, “Cane toraca mene jijenininine: ai padare te liba cirege apira, kirece padare te liba cirege atyaramta, cane lui Acejiyame bau ca tādujine biname me ābitujine, cane piba jamyacu apaclyera cama cāme babo adnata puupu cabu ca biname bine cire yaawademepene. Weene, cāme ingwe ācwiyame biname, cuta piba cire adnatāripeye twelb babo adnata puupu cabu twelb Israela ingle bine atraname. ²⁹ Iyeta lui cina ituge abmala teeme mete bine, teeme naane igane bine, teeme ngule bine, teeme mage babe coo bāgrā bine coo piiyepu teeme gawe bine cāme name pi, teepi cirege pāpāna tuwāngle yepā hanred gāabu cuta piiyepu teebibine iyeteta ireclota cirege ceera. ³⁰ Yepā bucurage biname page lui cina niināce gaabe biname gemi, teepi ciige ireclota cabu ingwe gaabe me cire tācnāripesi. Cuta piiyepu laati bemi page ingwe gaabe biname gemi, teepi ciige ireclota cabu niināce gaabe me cire lābitipesi.”

20

Waina Calwacupi cabu Kaakesea Bāgrā Gemi

¹ “Acejiyame te liba biname bine yaawadimuge, peei lui epu pana ge, calwacupi yageyame te lipu ādige krokerage biname bine jajanename daremu cama kaakesea wawename teeme waina calwacupi cabu. ² Teepi mene conocāco jebenisi tabe kaakesea bāgrā bine yepā bimu me camlecamlē daremu ceerame, siige tabe jityepājemige teeme waina calwacupi cabu kaakesea wawename. ³ Yageyame te cāāri asatige krokebimu me, ādige, jepānimige poto biname cina papa āmyemuteji icrajige aletna puupu gome. ⁴ Tabe jejemige egā, ‘Weene cuta naaclege cāme waina calwacupi cabu kaakesea wawename, cane piba weebibine icārinininine, ngena daremu gyene miiji.’ ⁵ Siige teepi eclige. Puma cita ca bimu duusa cabu yageyame te cāāri kaakesea bāgrā bine jityepimige teeme calwacupi me, cuta cāāri māmlebimu me. ⁶ Māmleteca me yageyame te liba cuta ādige aletna puupu me, tabe puma jepānimige poto biname papa āmyemuteji icrajige. Puma cita ca tabe itemlimige egā, ‘Weene ama bimu lecaleca ngeno me inaji-ninige, padare te papa ādenige?’ ⁷ Teepi jejisi egā, ‘Ingle nuuja biname te cibibine lica biiri nininige kaakesea tāapume.’ Yageyame te jejemige egā, ‘Weene cuta naaclege cāme waina calwacupi cabu kaakesea wawename.’

⁸ Mämalerage me kaakesea te liba apirige, yageyame te teeme kaakesea ire atwi biname ne jejige egä, 'Kaakesea bägrä bine ala tesoglicmi, teebibine daremu ecäranemi. Niinäce eei bine ecäranemi, lui cina ceräcerägääburage kaakesea me eclige, piyepu lui cina niinäcerage eclige kaakesea täápume, pui bine ingwerage ecäranemepi.' ⁹ Biname lui cina kaakesea jecednimisi mämleteca me, teepi camlecamle bimü me daremu ne ecatisi. ¹⁰ Puma cita ca biname lui cina niinäcerage me eclige kaakesea me, teepi apu jengenemige, egä teepi baborage daremu ne ecatenisi, yepä teebibine yepä ibi daremu ecäranemisi. ¹¹ Teepi teeme daremu bine ewademisi, siige calwacupi yageyame ne jiyingäjisi. ¹² Teepi teebine jejisi egä, 'Lui biname bine ingwerage ca jejemite, teepi matikäli padare cabu taatu kaakesea jebenisi; cine te magerage kaakesea jebenisi bimü nuunu cabu, yepä maane teebibine cine cama yepä ibi daremu becäranemite!' ¹³ Yageyame te teeme yepä ne jejige egä, 'Cäme biname, maane näätəcijegel! Cane lica naangletnäjine meebine, ingle cane nääcärine, mine lipu täápume mene conocäco bii jebenisi. ¹⁴ Määme daremu ne ecati, acnenuti cewe me. Lui biname ne ingwerage jejine kaakesea me otnime, cane singi gäne teebine maane cama yepä ibi daremu ceerame. ¹⁵ Egäsu cäme conocäco pisi nyene cäme rarekaake ca wawename cane ngena täápume singi. Maane nää ire patre eglenenemite, lui cina matikäli padare cabu kaakesea jebenisi, yepä cane camle-camle daremu bii becäranemine.' ¹⁶ Apu pi ingwe gaabe je lui cina, teepi niinäce gaabe me cire läbitipesi; niinäce gaabe je lui cina, teepi ingwe gaabe me cire täcnäripesi."

*Yeesu Cääri Mene Jiicemige Teeme Budre poto cidi me
(Mareko 10:32-34; Luuka 18:31-34)*

¹⁷ Yeesu liba Yerusalema me ädige, tabe biname sobe cabu ca mara me äbitige teeme twelb abiberäja bägrä cama teebibine gaabe cabu mene jajaneneme. ¹⁸ Tabe jejemige egä, "Itecijenge, mine äga naclenige Yerusalema me. Puma pagege cebine ceera, Acejiyame bau ca lui te tädujine biname me äbitujine, modamoda iiwäreja biname piyepu cotre abiberäja biname bime ime cabu me. Teepi mene pa jaatranepesi cebine budre me aglime, ¹⁹ siige pa näcärepesi nuuja gawe cabu ca biname bime cabu me. Teepi cebine ätutena pana pa nawenepesi, pa nadnanepesi, baarge uli cabu pa näbyecrepesi. Yepä nesae me lui bimü liba pa joomlepi, cane piba cuta budre cabu ca pa larpinantepene ireclota me."

*Yakobu Yoane naabime Ätemla
(Mareko 10:35-45)*

²⁰ Jebedayo me coga te teeme neeneni bägrä cama toclige Yeesu bau me, kokorare ca ipednemalige teeme opo gaabe, itinärige teeme singi ne waweneme. ²¹ Yeesu utemlige egä, "Maane ngena tääpu mäte singi?" Magebi te jejige egä, "Maane toraca tiicepi, egä cäme ai neeneni bägrä cina cirege adnata mäame camu poto ca piyepu säwäci poto ca, maane liba biname bine cire ewademepi." ²² Yeesu Yakobu naabine Yoane jaajige egä, "Weene umle lica gegi, weene ngena täápume najiye. Weene nää ibibi gegi epu mäpu cabu lenajame, cane lui mäpu ne mameta gäne päpäna?" Teepi jejäsi egä, "Cine ibibi gegi." ²³ Yeesu jaajige, "Weene cire inajepi mäpu cabu cäme pana, yepä cäme conocäco lica gyene jajime, egä laati te cire ladnatepi cäme camu poto ca piyepu säwäci poto ca. Cäme Babe te pui puupu bine ituge amacetnäja, tabe lui bime täápume singi teepi puma adnaterame."

²⁴ Nuuja ten abiberäja bägrä cina liba itecijemige, teepi claabe me äbitininisi pui nanigane wäsi bime täápume. ²⁵ Puma cita ca Yeesu iyeta teebibine ala tesoglicmige, jejemige egä, "Weene umle gemi, egä laati Acejiyame umle cäco biname bine yaawadimusi, teeme conocäco pisi nyene jajime teepi ngena waweneme. Teeme ingwe gaabe lui modamoda biname teeme cuta kokre pisi nyene biname bine mene jajaneneme. ²⁶ Yepä weene apu gone läbitininuye. Weeme yepä te liba singi baborage me äbitame, tabe miiji nuuja bime täápume kaakesea wawena; ²⁷ cuta weeme yepä te liba singi niinäce me äbitame, tabe miiji weeme täápume epu matikäli me äbita aletnäneji biname te lipu läbituge teeme yageyame täápume. ²⁸ Cane lui Acejiyame bau ca tädujine biname me äbitujine, cane cuta lica tädujine biname cina cäme täápume kaakesea waweneme, yepä cane te teeme täápume kaakesea waweneme piyepu cäme ireclota ne ceerame daremu täápume teebibine kälyä waweneme."

*Yeesu Miiji Jaawenige Neeneni Ireçu Määsumäsu Biname bine
(Mareko 10:46-52; Luuka 18:35-43)*

²⁹ Teepi liba Yeriko ne sebmalisi, baborage biname sange te tädige Yeesu me ingwe poto ca. ³⁰ Gaabe wajwa je puga ge adnatäneji neeneni ireçu määsumäsu biname. Teepi äätəcijige egä, "Yeesu cibibine nisuplingtenige." Teepi puma cita ca gije abacitäsä ala abayeneme egä, "Babo biname, mope biname Daawida me kaakesaare, maane owecu cibibine niwenepi!" ³¹ Biname cina liga jilbananisi teebibine, teepi babo tage ca cuta ala abayenäsi egä, "Mope

biname Daawida me kaakesaare, maane cibibine owecu niwenepi!”³² Yeesu imyemutige, siige teebibine ala taasoglicige, äätémlicige egä, “Weene singi cane ngena wawename weeme tääpume?”³³ Teepi jejäsi egä, “Babo biname, cine singi gegi maane cime irecu asatame.”³⁴ Yeesu owecu jaaglige, teeme ime bine arpenutige teeme irecu cabu me. Piba taatu teepi irecu aasatäsi, siige Yeesu ne ingwe icwäsi.

21

*Yeesu Dongki papa cabu Yerusalema me Abacitige
(Mareko 11:1-11; Luuka 19:28-40; Yoane 12:12-19)*

¹ Yeesu teeme abiberäja bägrä cama ädige Yerusalema ne oomlaname. Teepi liba Yerusalema ne mameta me jewenisi oomla-name, teepi atyarecanige cewe ngii Betepage me lui Olibi Uli podo cabu jage. Puma cita ca Yeesu teeme neeneneni abiberäja bägrä bine niinäce gaabe me jäätyepige² apu mene cama egä, “Weene iclege weeme niinäce gaabe me lui cewe peese nyene. Weene puma jepäneniye yepä dongki ne seea ca ägräräneji gyene, teeme cuta bägrä pisi nyene teeme gome. Jiitnepeye, taacanepeye căme bau me. ³ Biname te liba nuuja mene jaji je, weene apu jejepeye egä, ‘Yageyame te singi gyene ai dongki tääpume teeme bägrä cama, cuta tabe watawata pa taawecnistepi.’”⁴ Ai mule te äbitige Acejiyame me mename biname me mene te ibibi äbitame egä,

⁵ “Weene jejemepeye Siiyona podo cabu lui babo cewe cabu biname cina icrajenige egä, ‘Ire, weeme mope biname te peega tädenige weeme bau me!

Tabe awamla căco tädenige mamye

dongki papa cabu, dongki me bägrä papa cabu.’”

⁶ Puma cita ca abiberäja bägrä cina aaclice, jewenäsi, Yeesu ngena tääpume jaajige. ⁷ Teepi dongki ne teeme bägrä cama taacanisi Yeesu bau me, căbletääpe bine teeme papa cabu seretng-mäsi, siige Yeesu acenutige. ⁸ Bucurage biname cina teeme căbletääpe bine gaabe cabu eretnimisi. Poto cina uli ciipe bine icnapimisi gaabe cabu aretname. ⁹ Yeesu me niinäce gaabe, ingwe gaabe lui biname cina teepi ala abayaninisi egä, “Daawida me kaakesaare ne yaawepyeräjesi!

Acejiyame te müiji meebine naawenege lui te Yageyame me ngii cabu tädenitel!

Mine yaawepyeräjesi Acejiyame ne, cabucewe je lui te enajenige!”

¹⁰ Yeesu liba Yerusalema me atyaramtige, biname cina călu te jitemige. Teepi teemeteme ätemläjinisi egä, “Baa, laasi nyene ai biname?”¹¹ Yeesu cama lui biname cina seclige, teepi jejemisi egä, “Tabe Acejiyame me mename biname Yeesu sine, Nasareta ceweyame gyene Galilaya probins cabu ca.”

Yeesu Ädige Iiwäreja Mete me

(Mareko 11:15-19; Luuka 19:45-48; Yoane 2:13-22)

¹² Yeesu iiwäreja mete caale bora me abacitige, siige teebibine iyecräjemige, lui cina saawadanemusi gwidape bine aletname piyepu lui cina jaaletnimusi. Tabe rarekaake äbäsuwäja biname bime dade bine eboclomäjimige cuta eei bime adnatera dade bine, gimäe ele bine lui cina saawadanemusi aletname. ¹³ Tabe jejemige egä, “Acejiyame te jiicenige Oogäräneji mene cabu egä, ‘Căme mete ne irecu ätumuta mete ca yaainusi,’ yepä weene te itu setatrongärumeye epu puupu me, eromaame cina luma lämletne-räjininusi.”

¹⁴ Ireccu määsumäsu biname, ernge niyaniya biname cina seclige Yeesu bau me iiwäreja mete caale bora je, siige tabe teebibine müiji jewenanemige. ¹⁵ Modamoda iiwäreja biname piyepu cotre abiberäja biname cina claabe me äbitinisi, liba jepänisi, Yeesu lipu müijirage mule bine jewenemige piyepu teepi liba itecijemige, bägrä cina iiwäreja mete cabu lipu ala abayaninisi egä, “Mope biname Daawida me kaakesaare ne ewepyeräjeyel!”¹⁶ Siige teepi Yeesu ne jejisi egä, “Maane nää lica näätəcijenige teepi ngena jiicenenemisi? Maane ngena name pi lica jübenenemite teebibine?” Yeesu jejemige egä, “Yoo, cane nätecijenige. Egäsu weene ituge acnema Oogäräneji mene egä, ‘Maane bägrä piyepu ngame meeramera bägrä bine ituge wawena meebine epucăco awepyeräjame.’”¹⁷ Puma cita ca Yeesu teebibine sebmalmimige, siige Yerusalema ca asatige, Betaniya cewe me ädige. Tabe ciye puga enajige.

Yeesu Piigi Uli ne Mene ca Eglige

(Mareko 11:12-14, 20-24)

¹⁸ Krokerage Yeesu liba acnenutige babo cewe Yerusalema me, gaabe cabu cubrowe te joomlige. ¹⁹ Tabe piigi uli ne jepänige gaabe wajwa je, ädige, teeme gome jeclajutige, yepä laame taatu jepänimige, kuu lica. Tabe puma cita ca uli ne jejige egä, “Maane ingwe ca lica page nääyepi kuu päpäname.” Yeesu ai mene liba jejige, uli te piba taatu laame jedacromtige, siige budre äbitige. ²⁰ Abiberäja bägrä cina liba jepänisi, teepi călu te jitemige, jejisi egä, “Lipu pi ai piigi uli te jedacromtige watatarage?”²¹ Yeesu jejemige egä, “Cane

toraca jijenininine weebibine, egä weene liba yepä ngene atwana cama ätrunga birige, weene ibibi gemi apu wawena, cane ai piigi uli ne lipu jewenine. Cuta ai taatu lica, yepä weene cuta ibibi gemi ai podo ne jajime egä, 'Awetänti, malu cabu me ajari,' siige pui mule te pa läbitepi. ²² Weene liba Acejiyame ne ngena täápume yäätinäruye tabe icärininuge, weene liba jäätrunguye egä, "Tabe nicärininige."

Ätemla Yeesu me Conocäco poto cidi me Tabe Mule bine Wawenecame

(Mareko 11:27-33; Luuka 20:1-8)

²³ Yeesu liba acnenutige iiwäreja mete caale bora me biname bine abiberäjame, piba modamoda iiwäreja biname piyepu nuuja modamoda biname cina seclige teeme bau me, itemlisi egä, "Määme ngena conocäco pisi nyene ai mule bine wawenecame? Määme conocäco laati bau ca gyene?" ²⁴ Yeesu jejemige egä, "Cane weebibine yepä taatu mene itemlininine, siige weene liba căme mene nawecnisteniye, cane piba weebibine jijenininine, căme ngena conocäco gyene ai mule bine wawenecame. ²⁵ Yoo, weene najeye, laati te Yoane ne conocäco yääcärepi tabe biname bine niye ca äcisejame, Acejiyame te coo nää biname cina?"

Teepi siige teemeteme mene jitransi apu egä, "Mine ngena daremu mene jewecnisteni? Mine liba jjenis egä, 'Acejiyame te Yoane ne conocäco yääcärepi tabe biname bine niye ca äcisejame,' tabe piba jijenininige egä, 'Cije weene ngena name pi piba teebine lica jäätrungepeye?' ²⁶ Yepä mine liba apu jjenis egä, 'Biname cina Yoane ne conocäco yääcärepi tabe niye ca biname bine äcisejame,' mine piba miiji wälu biname bime täápume, inge teepi iyeta jitrungenisi, egä Yoane lui Acejiyame me mename biname ge." ²⁷ Siige teepi Yeesu ne mene jewecnisteni egä, "Cine umle lica gemi, laati te Yoane ne conocäco yääcärepi tabe biname bine niye ca äcisejame." Yeesu jejemige egä, "Cane cuta weebibine lica jijenininine, egä cebine laati te conocäco näcärepi cane ai mule bine wawenecame."

Ngene ca Agli Mene Nanigane wäsi poto cidi me

²⁸ Yeesu ngene ca agli mene jejemige egä, "Weene lipu ngene jotwanininie ai poto cidi me? Yepä biname puga ge teeme neeneni imäbägrä cama. Tabe niinäceyame ne jejige egä, 'Căme bägrä, page ädi waina calwacupi cabu me kaakesea wawename.' ²⁹ Bägrä te jejige egä, 'Cane singi lica gäne,' yepä ingwe ca tabe ngenecu etatrongtige, siige ädige kaakesea wawename. ³⁰ Puma cita ca babe te ädige teeme nuuja bägrä bau me, cuta peei yepä mene jejige. Pui bägrä te jejige egä, 'Yoo, cane ädenine,' yepä tabe lica ädige. ³¹ Siige lui bägrä te teeme babe me singi jecatige, jewenige?" Biname cina Yeesu ne jejisi egä, "Niinäceyame te teeme babe me singi jewenige!" Yeesu jejemige egä, "Cane toraca mene jijenininine: peei bägrä lipu niinäce beswa äbitige teeme babe me singi wawename, yepä ingwe ca ngenecu etatrongtige, cuta pepu pana gyene täks rarekaake utecrena biname piyepu magebi lui bine daremu jaawenimusi sargi mule wawename, teepi weebibine itucärenininisi Acejiyame ne acatame teeme mope biname me. ³² Yoane niye ca äciseja biname te tädepi, weebibine toraca gaabe jiwabtipi, yepä weene lica jäätrungepeye teebine, yepä täks rarekaake utecrena biname piyepu magebi lui bine daremu jaawenimusi sargi mule wawename, teepi te jäätrungepesi Yoane ne. Ngänuge puu weene ai mule ne jääpänepeye, yepä weene ingwe lica ngenecu yaatatrongärepeye Yoane ne ätrungame."

Ngene ca Agli Mene Calwacupi Ire Atwi Biname bime poto cidi me

(Mareko 12:1-12; Luuka 20:9-19)

³³ Yeesu jiicige egä, "Iteciijinege nuuja ngene ca agli mene. Puga ge gawe yageyame biname. Tabe cotäri ne erangige, waina gije itemige, cupicu ne juurige waina kuu ämulecame waina niye wawena täápume, siige cabucabu mete ne erangige calwacupi ne awamutame. Piba tabe biname bine calwacupi ecärimige daremu wawename, siige ädige cudecewe cewe me. ³⁴ Padare te liba tatyaramtige waina kuu ärucname, tabe teeme kaakesea bägrä bine jityepimige teemanu kupae ne acatame. ³⁵ Daremu wawenena biname cina yageyame me kaakesea bägrä bine joomläjcmisi, siige yepä ne etemeläjisi, nuuja ne budre tama eglisi, cuta nuuja ne kula ca jibyecrisi. ³⁶ Cuta cääri yageyame te poto kaakesea bägrä bine jityepimige teeme bau me, bucurage bine niinäce cabu ca. Cuta teepi yepä mule ne jepänisi daremu wawenena biname bime bau ca. ³⁷ Ceräcerägääburage me tabe teemerage bägrä ne jityepige. Tabe jiicige egä, 'Toraca, teepi pama căme bägrä ne opo gaabe me ecitenisi.' ³⁸ Yepä lui biname cina daremu jewenanisi, teepi liba teeme bägrä ne jepänisi, teepi jiicisi egä, 'Ai lui yageyamerage me bägrä gyene. Biiri naclege, yaaglesi, mine piba ai calwacupi ne ecatenisi!' ³⁹ Siige puma cita ca teepi teebine joomlisi, isatisi calwacupi kaake poto cidi me, puma budre me eglisi."

⁴⁰ Yeesu itemlimige egä, “Waina calwacupi yageyame te liba cire tacnenutepi, tabe ngena cire jaawenepi pui calwacupi daremu wawenena biname bime täápume?” ⁴¹ Lui biname cina itecijemige, jejisi egä, “Tabe pui niyarage biname bine budre me cire yaaglecemepi, siige epu biname bine calwacupi cire yääcäremepi, lui cina yageyame ne teemanu kupae cire yääcärepesi ärucna padare cabu.” ⁴² Yeesu teebibine jejemige egä, “Egäsü weene ituge acnema Oogäräneji mene te ngena jiićenige căme poto cidi me egä,

‘Lui kula ne raranga biname cina jigiyisi,
baborage häbitige iyeta nuuja cabu ca.

Ai lui Acejiyame miji wawenäneji gyene;
cuta lipu miihirage gyene mime täápume.’

⁴³ Cane weebibine jiićenininine, egä Acejiyame te cire lätecitepi weebibine waadename, siige eei bine pa yaawademepi, lui cina miihirage mule bine cire jaawenemepesi. ⁴⁴ Laati te liba ai kula cabu yaatramuge, tabe laglemaluge. Yepä ai kula te liba biname cabu saatramuge, iyeta yäämulicuge.” ⁴⁵ Modamoda iiwäreja biname piiyepu Parisea sigu biname cina lui itecijemige ai ngena ca agli mene, teepi opo ewatnisi, egä Yeesu teeme poto cidi me biiri jiićenige. ⁴⁶ Teepi singi ge teebine oomlaname, yepä teepi wälu ge biname bime name pi, ingle teepi apu ngena jotwanininisi, egä Yeesu Acejiyame me mename biname gyene.

22

Ngene ca Agli Mene Atejäclmuta Soriyomu poto cidi me

(Luuka 14:15-24)

¹ Yeesu biname bine cerämu ebiberäjimige ngena ca agli mene ca. ² Tabe apu jiićenige egä, “Acejiyame te liba biname bine yaawadimuge, pui lui epu pana ge mope biname, lui te teeme bägrä täápume atejäclmuta soriyomu ne jewenige. ³ Tabe teeme kaakesea bägrä bine jityepimige ala asogläcneji biname bine jajaneneme soriyomu täápume otnime, yepä teepi äbwäricinisi otnime. ⁴ Puma cita ca tabe nuuja kaakesea bägrä bine cuta jityepimige teeme bau me apu mene cama egä, ‘Cane soriyomu ne biiri jewenine. Kau piiyepu teeme plongo bine betweclimisi, iyeta gwidape siige amacetnäjäneji gemi. Naaclege atejäclmuta soriyomu täápume!’ ⁵ Yepä ala asogläcneji biname cina singi lica ge, siige teeme gaabe cabu otninisi. Yepä te teeme calwacupi me ädige, nuuja te teeme aletna mete me ädige. ⁶ Poto cina kaakesea bägrä bine joomläjiejcmisi, etemeläjimisi, budre me eglecimisi. ⁷ Mope biname te claabe me äbitige. Tabe teeme cubu biname bine jityepimige budre me aglecame pui biname bine, lui cina teeme kaakesea bägrä bine budre tama eglecimisi, piiyepu teeme babo cewe ne uubuderame. ⁸ Puma cita ca tabe teeme kaakesea bägrä bine ala tesoglicmige, jejemige egä, ‘Căme bägrä me atejäclmuta soriyomu amacetnäjäneji gyene, yepä ala asogläcneji biname miji lica gemi ai soriyomu täápume. ⁹ Peei name pi weene naaclege gaabe cube gome me, laati bine opopa jewenenemiye, ala tesoglecmeye soriyomu täápume.’ ¹⁰ Siige kaakesea bägrä cina eclige gaabe cube gome me, jebasecnetnimisi, lui bine opopa jewenanemisi, niianiya biname coo miijimiji biname, iyeta. Teepi eclige, siige soriyomu puupu te iyeta tapanige.

¹¹ Mope biname te tabacitige, biname bine ire jetwananemige, siige yepä biname ne jepänige, lui te soriyomu căbletääpe căco tädige. ¹² Tabe teebine jejige egä, ‘Căme biname, maane lipulipu soriyomu căbletääpe căco tabacitite?’ Yepä tabe pui biname te nuuja mene lica. ¹³ Siige tabe mope biname te teeme kaakesea bägrä bine jejemige egä, ‘Teeme ernge ime jetäyemeyeye, puutucu me ijareye krokeciye cabu me. Tabe puma ele pa yaangenanege, giricu pa yaatebecmege.’ ¹⁴ Puma cita ca Yeesu jejemige egä, “Bucurage biname bine ala asogläcneji gemi, nesae bine äjäcräneji gemi.”

Ätemla Täks Rarekaake Ceera poto cidi me

(Mareko 12:13-17; Luuka 20:20-26)

¹⁵ Parisea sigu biname cina eclige teemämu mene atraname egä, “Mine Yeesu ne lipu itemläjenisi teebine teeme mene cabu ca oomlaname?” ¹⁶ Puma cita ca teepi poto teeme abiberäja bägrä bine jityepimisi Heroda me sigu biname cama Yeesu bau me. Teepi Yeesu ne jejisi egä, “Abiberäja biname, cine umle gemi, egä maane toraca biname gäte piiyepu cängena ebiberäjenemite Acejiyame me gaabe poto cidi me. Maane nuuja ngenecu lica gäte, biname cina lipu ngena jwaatwanininisi mäame poto cidi me, ingle maane teebibine opo gaabe je lica yaacranimute teeme ngüi name pi. ¹⁷ Yoo siige, maane nijini, maane lipu ngena jotwanenite, nää mime Cotre te lica niibenininige mine täks rarekaake ceerame Rooma gawe mope biname Siisa ne?”

¹⁸ Yepä Yeesu uja umle äbitige, egä teepi singi gemi teebine teeme mene cabu ca oomlaname, siige tabe jejemige egä, “Weene walya biname gemi! Weene ngena name

pi cebine căme mene cabu ca oomlaname naweniniye? ¹⁹ Baa rarekaake nawabeye taks t  pume.” Teepe rarekaake ne secanisi. ²⁰ Tabe puma cita ca itemlimige eg , “Laati me opo piiyepu ngii gemi ai rarekaake cabu?” ²¹ Teepe jejisi eg , “Siisa me opo gyene piiyepu teeme ngii gyene.” Yeesu jejemige eg , “Lui gwidape gemi Siisa me, teebine ec reye pui; piiyepu lui gwidape gemi Acejiyame me, teebine ec reye pui. ²² Teepe liba itecijemige, mut c co  bitinisi teeme mene name pi, siige teepe Yeesu ne ebmalisi, eclige.

 temla Mene Budre cabu ca Arpinera poto cidi me
(Mareko 12:18-27; Luuka 20:27-40)

²³ Puirage bimu cabu poto Sadukea sigu biname cina seclige Yeesu bau me. Teepe eei biname gemi, lui cina  trunga lica, eg  budre cabu ca arpintera pisi nyene. ²⁴ Teepe Yeesu ne itemlisi eg , “Abiber ja biname, Moose itu ebiber jemuji, eg  biname te liba b gr  c co budre l bituge, teeme igane te miiji cuubla ne acata siige b gr  wawena teeme naane me ngii t  pume. ²⁵ Siige nuuja taje puga ge seben naniganewaleyame. Teepe aga yaacrajanemepi. Uge te coga ne waacatepi, b gr  c co budre l bitepi, siige teeme cuubla ne twaabmalepi teeme gomecayame igane t  pume. ²⁶ Cuta peeirage mule te l bitepi teeme t  pume, cuta teeme gome ca lui igane t  pume, cuta iyeta pui seben naniganewaleyame bime t  pume. ²⁷ Cer cer g  bu cuubla te budre l bitepi. ²⁸ Tabe laati me coga cire waanajepi, budre biname cina liba cire larpin ripesi, inge tabe iyeta pui seben naniganewaleyame bime coga gwene?”

²⁹ Yeesu jejemige eg , “Inge weene umle lica gemi Oog r neji mene piiyepu Acejiyame me kokre, weene peei name pi bet jiye. ³⁰ Biname cina liba budre cabu ca cire larpin ripesi, teepe epu pana cire yaacrajanemepi Acejiyame me mename seemo cina cabucewe je liiyepu. Teepe atej clmuta lica cirege. ³¹ Eg su weene ituge acnema Acejiyame te ngena itu jjiinuji budre biname bime arpinera poto cidi me. Tabe apu jiicuji eg , ³² ‘Cane lui Abrahamo, Isacako, Yakobu naabibime Acejiyame g ne.’ Siige tabe nata budre biname bime Acejiyame lica gyene yep  eei bime, lui cina ireclota gemi.”

³³ Lui biname cina itecijemige, teepe mut c co  bitinisi Yeesu me abiber ja mene name pi.

Lui Cotre Gyene Baborage
(Mareko 12:28-34; Luuka 10:25-28)

³⁴ Parisea sigu biname cina liba itecijemige, eg  Yeesu Sadukea sigu biname bine mene c co me jebenimige, teepe tomi yootisi. ³⁵ Puma cita ca teeme yep  te, lui cotre abiber ja biname ge, tabe singi Yeesu ne mene cabu ca oomlaname. Tabe itemlige eg , ³⁶ “Abiber ja biname, Moose lui Cotre nic rininuji, lui gyene baborage?”

³⁷ Yeesu jejige eg , “‘Weene miiji singi  bitena Yageyame, weeme Acejiyame t  pume, siige ai ne aboclomta iyeta weeme owecu mule ca, iyeta weeme ireclota ca, iyeta weeme ngena atwanena ca.’ ³⁸ Ai cotre lui niin cegaabe cotre gyene, piiyepu baborage gyene. ³⁹ Pui gomecayame baborage cotre lui age sena: ‘Weene miiji biname bime t  pume singi lenaja, weene lipu weeme t  pume singi birige.’ ⁴⁰ Ai neeneni cotre cabu peete nemi iyeta Moose me Cotre mene piiyepu Acejiyame me mename biname bime abiber ja mene.”

Keriso Laasi Nyene?

(Mareko 12:35-37; Luuka 20:41-44)

⁴¹ Poto Parisea sigu biname cina liba yep  cewe me tabasecre-tnige, Yeesu teebibine itemlimige eg , ⁴² “Weene lipu ngena jotwanininiye, eg  Keriso biname bine lui te niya cabu ca cire y  secr remepi, tabe laati me kaakesaare gyene?” ⁴³ Teepe jejisi eg , “Tabe mope biname Daawida me kaakesaare gyene.” Yeesu puma cita ca itemlimige eg , “Cije piba ngena name pi Aceji Seemo te Daawida ne ngena atwana ec ruji tabe Keriso ne Yageyame ca ainame? Tabe Daawida apu jiicuji eg ,

⁴⁴ ‘Yageyame te c me Yageyame ne jejuji:

Ama adnati c me camu poto cidi ca

ng lu cane m  me cubuyame bine

m  me ernge gawe me cire yaacranemepene.’ ⁴⁵ Cije piba Keriso lipu gyene Daawida me kaakesaare, Daawida liba teebine Yageyame ca einuji?” ⁴⁶ Nuuja biname te  blic co Yeesu ne daremu mene awecnistame, siige pui padare cabu ca niin ce gaabe me teepe w lu icrajimige Yeesu ne  temlejame.

23

Yeesu Umle Mene Jejananemige Cotre Abiber ja piiyepu Parisea Sigu Biname bime Mule poto cidi me

(Mareko 12:38-39; Luuka 11:43, 46, 20:45-46)

¹ Puma cita ca Yeesu biname bine piyepu abiberäja bägrä bine jejemige egä, ² “Cotre abi-beräja biname piyepu Parisea sigu biname bime conocäco pisi nyene Moose me Cotre mene bine aboclomäjame. ³ Peei name pi weene miiji ätrunga piyepu äcwetna, teepi ngena täápume jijinysi wawename, yepä weene gone teebibine jäätutanemuye, ingle teepi teeme abiberäja mene ibi lica läbitinusi. ⁴ Piti nemi bucurage mäpurage cotre. Teepi singi gemi biname cina pui bine äcwetname, yepä teepi nuuja gwidape ne lica jaawenusi biname bine ätityerame pui cotre bine äcwetname. ⁵ Teepi iyeta gwidape bine jaawenimusi biname cina päpäna taatu name pi. Teeme puga ge matimati boks Moose me Cotre mene äbäcname, siige mangace piyepu ime cabu seea ca jäätäyimus. Teepi peei boks bine daamledamle jaawenimusi biname cina päpäname. Teepi cuta teeme cäbletääpe foaa nutre cabu lecaleca wul seea sigu bine yaaterutäjimusi. ⁶ Soriyomu ne liba yaacitusi, teepi miijimiji puupu cabu ladnatärüge, cuta abasecretna mete cabu piyepu teepi niinäce gaabe me ladna-tärüge. ⁷ Teepi baborage singi birige aletna puupu cabu biname cina teebibine cängenarage awablame piyepu abiberäja biname ca ainame. ⁸ Yepä weebibine gone abiberäja biname ca aina, ingle weeme yepä taatu abiberäja biname gyene, piyepu weene iyeta naniganewaleyame gemi. ⁹ Weene gone ai gawecewe cabu weemeweme babe ca lainininuye, ingle weeme yepä taatu Babe pisi nyene cabucewe je. ¹⁰ Cuta weene gone weeme nuuja ne babo biname ca yaawadimuye, ingle cane Keriso lui weeme yepä taatu babo biname gäne. ¹¹ Laasi nyene weeme baborage, tabe miiji birige weeme kaakesea bägrä lenaja. ¹² Laati te teemämu babo me läbituge, teebine matikolä me birige wawena; laati te teemämu matikälä me läbituge, teebine babo me birige wawena.”

*Yeesu Umle Mene Jejananemige Walya Biname bime poto cidi me
(Mareko 12:40; Luuka 11:39-42, 44, 52, 20:47)*

¹³ “Lipu mäpu cirege weeme täápume weene cotre abiberäja biname piyepu Parisea sigu biname! Weene lui walya biname gemi! Weene gaabe ne yaarmuye biname cina Acejiyame bau me otnime. Weene lica yäbäcnuye piyepu cuta jüibemuye lui cina singi gemi äbäcname. ¹⁴ Lipu mäpu cirege weeme täápume weene cotre abiberäja biname piyepu Parisea biname! Weene lui walya biname gemi! Weene niinäce cuublacubla bime gwidape bine angletneja mule ca yaawadimuye, piba sinäme lecaleca irecu lätumutinuye, ingle weene singi gemi weeme peei angletneja mule ne acwabame. Peei name pi weeme daremu niiyarage gyene poto biname bime daremu cabu ca. ¹⁵ Lipu mäpu cirege weeme täápume weene cotre abiberäja biname piyepu Parisea biname! Weene walya biname gemi! Weene iyeta poto ta waatnetnäjinuye, malu cabu ta piyepu doro cabu ta, naace täápume biname ngänu gyene tabe puu yepä, teebine atatrongtame weeme mule cabu me. Tabe liba weeme mule cabu me labacituge, weene teebine weeme cabu ca neenenä gäabu niiyarage me jaawenuye, siige tabe uliobo puupu cabu me cirege otni weene liiyepu.

¹⁶ Lipu mäpu cirege weeme täápume weene irecu mäasumasu gaabe awabeja biname! Weene yaabiberäjimuye, egä laati te liba iiwäreja mete me ngii cama mene jüicemuge, papa gyene tabe peei mene ne atropengta. Yepä laati te liba iiwäreja mete cabu lui gol, pui me ngii cama mene jüicemuge, pui mene ne tabe äblicäco atropengta. ¹⁷ Weene irecu mäasumasu buduma biname gemi! Egäsu gol matikälä birige, yepä iiwäreja mete lui te pui gol ne Acejiyame täápume mara me jaawenuge, tabe baborage birige. ¹⁸ Cuta weene yaabiberäjimuye, egä laati te liba mene jüicemuge iiwäreja mete cabu lui iiwäreja dade, teeme ngii cama, papa gyene tabe pui mene ne atropengta. Yepä laati te liba mene jüicemuge owecu gwidape me ngii cama, lui pui iiwäreja dade papa cabu, pui mene ne tabe äblicäco atropengta. ¹⁹ Weene irecu mäasumasu biname gemi! Egäsu owecu gwidape matikälä gyene, yepä dade lui te pui owecu gwidape ne Acejiyame me täápume mara me jaawenuge, tabe baborage gyene. ²⁰ Yoo, laati te liba mene jüicemuge iiwäreja dade me ngii cama, tabe cuta iyeta owecu gwidape bime ngii cama jüicemuge, lui pui dade papa cabu. ²¹ Cuta laati te liba mene jüicemuge iiwäreja mete me ngii cama, tabe cuta Acejiyame me ngii cama jüicemuge, puma lui te enajenige. ²² Coo laati te liba mene jüicemuge cabucewe me ngii cama, tabe cuta Acejiyame me adnata puupu me ngii cama jüicemuge cuta piyepu teeme ngii cama, lui te enajenige puma.

²³ Lipu mäpu cirege weeme täápume weene cotre abiberäja biname piyepu Parisea sigu biname! Weene lui walya biname gemi! Weene Acejiyame ne yepä yäacäruye weeme iyeta tren deedei mite wawena gwidape ngii minti, dili, kumina cabu ca, ngänu gyene Cotre cabu pui mule lui baborage lica gyene. Yepä weene lica jaawenimuye conocäco mule, owecu mule piyepu toraca mule, Cotre cabu lui cina modamoda mule gemi. Weene miiji ai modamoda mule bine wawenetnäja, cuta gone ngena ätrimela poto matimati mule bine wawenetnäjame. ²⁴ Weene irecu mäasumasu gaabe awabeja biname gemi! Weene matimati cotre bine cängena yäacwetnimuye, yepä modamoda cotre bine jaatropengäjimuye.

Weeme peei mule lui epu pana gyene, egä iidreba lui matikäli jugi gwidape gyene, weene weeme nani niye ne sobläbi cabu yaapaduruye pui te ätyepurame, yepä weene kamela ne yäärmituye, lui baborage jugi gwidape gyene.

²⁵ Lipu mäpu cirege weeme täápume weene cotre abiberäja biname piyepu Parisea sigu biname! Weene lui walya biname gemi! Weene kaapo piyepu pleito bine kaakepoto ca taatu jääcisäjemuye, yepä ngalebora ca weene jäängärimuye angletneja mule ca piyepu ceera cäco mule ca. ²⁶ Ireçu mäsumäsu Parisea biname, weene niinäce miiji jicisäjemuye kaapo bora ngena jugi piti nemi, piba cuta kaakepoto ca jugi cäco yaanajuge.

²⁷ Lipu mäpu cirege weeme täápume weene cotre abiberäja biname piyepu Parisea sigu biname! Weene lui walya biname gemi! Weene epu pana gemi, kula bora gape lui owe poto bulu ca yaaganusi, siige kaake poto ca opo lacityge, yepä ngalebora apanäneji gyene budre biname bime kaake ca piyepu poto jugijugi gwidape ca. ²⁸ Cuta pepu gyene, biname cina weebibine jipäninusi, egä weene miiji biname gemi, yepä weeme ngalebora pisi nyene walya piyepu niya mule.”

Yeesu Niinäce Gaabe Mene Jücemige Pui Biname bime Niya Daremu poto cidi me (Luuka 11:47-51)

²⁹ “Lipu mäpu cirege weeme täápume weene cotre abiberäja biname piyepu Parisea sigu biname! Weene lui walya biname gemi! Weene kula gape bine yaarangimuye Acejiyame me mename biname bime täápume piyepu conocäco biname bime ngene ape-cna kula bine yaabasogärimuye. ³⁰ Weene jücemuye egä, ‘Sasa cine liba cire ninajineji cime saarewale cama, cine lica cire yaaglecemejisi budre me Acejiyame me mename biname bine teepi liyepu.’ ³¹ Yepä apu pi weene awabudnäjininiye, egä weene teeme kaakesaare gemi, lui cina Acejiyame me mename biname bine budre me eglecimujisi. ³² Yoo, weene jimlitäjepeye weeme saarewale cina lui gije itu jebacitujiisi mename bine aglecame!

³³ Weene cobyame gemi, cobyame bime bägrä gemi! Weene äblicäco uocratna atrana cabu ca, yepä weebibine cirege atrana uliobo puupu cabu me otnime! ³⁴ Cane mename biname bine, umleumle biname bine piyepu cotre abiberäja biname bine cire jäätyepemepene weeme bau me. Weene poto bine budre me cire eglecemepeye, poto bine baarge uli cabu cire jibyecremepeye, poto bine cire etemeläjemepeye weeme abasecretna mete cabu ta piyepu cire iyecräjemepeye yepä cewe ca nuuja cewe me. ³⁵ Pipu pi iyeta niya daremu cina conocäco biname bime agleca name pi weeme bau me cire saaclepi, conocäco biname Abela me agli cabu ca ngälu Baraki me bägrä Sakariya teeme agli cabu me, weeme kaakesaare cina lui ne budre me eglujiisi iiwäreja mete puutucu cabu iiwäreja dade gome. ³⁶ Cane toraca mene jijenininine, page lui biname cina icrajinige, teepi te iyeta agleca daremu ne cire jääpänepesi.”

Yeesu Yerusalema ne Owecu Jewenige (Luuka 13:34-35)

³⁷ “Yerusalema biname, Yerusalema biname, weene te Acejiyame me mename biname bine budre me yaaglecimuye piyepu cuta Acejiyame me ätyepäneji biname bine kula ca jääbyecrimuye. Bucurage gäabu cane singi ituge weebibine cäme bau me abasecretna, epu pana paulo te teeme plongo bine lipu taabasecretnimuge teeme taame ca ätrugerame, yepä weene singi lica ituge. ³⁸ Ingle weene cebine nägyuye, peei name pi weeme cewe piyepu Acejiyame me mete cirege kaake lenaja. ³⁹ Cane jijenininine weebibine, egä weene ingwe ca cebine cääri lica cire näpänepeye, ngälu weene liba cire najepeye egä, ‘Maane lui te tädenite Yageyame me ngii cabu, Acejiyame te meebine miiji mule naawenege!’”

24

Yeesu me Mene Iiwäreja Mete Iigareca poto cidi me (Mareko 13:1-2; Luuka 21:5-6)

¹ Yeesu liba iiwäreja mete ne ebmaliige, siige ädige, abiberäja bägrä cina piba seclige tee-bine awabetnärame poto kula ca rarangäneji mete, lui iiwäreja mete caale bora jage. ² Yeesu teebibine jejemige egä, “Weene ire iyeta ai nema! Cane weebibine toraca jijenininine, egä lica yepä kula ne cirege abmala teeme puupu cabu ai mete cabu. Iyeta bine cirege äyära gawe me.”

Mäpu cina Lipu Cirege Otni (Mareko 13:3-13; Luuka 21:7-19)

³ Yeesu liba adnatäneji enajige Olibi Uli podo cabu je ten taatu, abiberäja bägrä cina seclige, itemlisi egä, “Nijini cibibine, egä maane lui gwidape täápume nijinite, liba cire läbitipesi. Ngena cina cirege äbitena awabame, egä maane tacnenite piyepu ai padare me ngälugaabe te joomlenige?”

⁴ Yeesu jejemige egä, “Weene ireire inajipi! Gone ire taatu acrana weebibine angletne-jame. ⁵ Bucurage biname cina cire saaclepi căme ngii cabu, siige cire jii cemepesi egä, ‘Cane age sâne Keriso, biname bine lui te niija cabu ca pa yäasecrăremepene,’ siige bucurage biname bine cire yaangletnăjemepesi. ⁶ Weene mameta cubu ala cirege ätecijana piyepu weene idre cire itecijanipi cubu poto cidi me cudecewe je, yepä wălu gone lâbitininuye. Pepu gwidape cina miiji cire lâpletnicisi, yepä căro padare me ngălugaabe kamu gyene. ⁷ Yepä gawe biname cina cubu cire jii cepesi nuuja gawe biname cama. Yepä babo mope biname te nuuja cama cubu cire jii cepi. Iyeta poto ta gane piyepu ocneja cirege. ⁸ Yepä ai iyeta lui măpu padare me agedna taatu gyene, epu măpumăpu magebi te lipu cupace laplongamtuge băgră ärngi tăăpume.

⁹ Pui măpu padare cabu weebibine cire joomlăjipesi, siige cire icăripesi măpu cabu lenajame piyepu budre me aglecame. Iyeta biname cina cămiji pi cire jimugetnipesi weebibine. ¹⁰ Bucurage biname cina piba teeme ätrunga bine cire yaabmalcemepesi. Teepi teemeteme cire laitnăjipesi, cire lâmugetnăjipesi. ¹¹ Bucurage walya mename biname cina cire saaclepi, teepi siige bucurage biname bine cire yaangletnăjemepesi. ¹² Ingle naace popi conocono mule te daamledamle cire lâbitepi, peei name pi biname cina singi căco cire lâbitipesi căme tăăpume. ¹³ Yepä laati te ngenecu kokre cire yaanajepi ngălu ngălugaabe, tabe iyeteta ireclota ne cirege păpăna. ¹⁴ Iyeta poto ta ai gawecewe cabu biname bine cirege jajanena Miiji Mene Acejiyame te biname bine waadena poto cidi me. Pipu pi iyeta maramara gawe biname cirege ätecija, piba ai padare me ngălugaabe cire tädepi.”

Baborage Măpu

(Mareko 13:14-23; Luuka 21:20-24)

¹⁵ “Acejiyame me mename biname Daniyela lui niijarage wălumeteyame poto cidi me jii cuji, weene liba cire jepănepeye aclajuteji puupu cabu, Acejiyame tăăpume lui puupu ne mara me ituge wawena,” (acnema biname tabe miiji umle ai ngena tăăpume myene), ¹⁶ “piba lui biname cina cire yaacrajepi Yuudea probins cabu, teepi miiji podo cabu me uocratna. ¹⁷ Lui biname te mete toro cabu lui puupu cabu cire yaanajepi, tabe miiji lica cirege mete bora me abacita gwidape waadename. ¹⁸ Lui biname te calwacupi je, tabe miiji lica cirege acnenuta teeme căbletăăpe acatame. ¹⁹ Ogi nemi pui padare cabu lui măpumăpu magebi piyepu băgră ngame meeramera magebi. ²⁰ Ire cu ätumutipeye, egä weene găbu padare cabu coo Sabade bimu cabu lica cirege uocratna, ²¹ ingle pui padare cabu lui măpu cirege, epu baborage cirege, egä niinäce pepu măpu ne lica ituge păpăna ai gawecewe me agedna cabu ca ngălu page ai taje piyepu ingwe ca căări lica cirege păpăna. ²² Yoo, Acejiyame te teeme ngene atwanena cabu pui măpu padare ne uja tuube me itu jewenuji. Tabe liga pepu lica cire jaaweneji, biname cina ireclota lica cire yaacrajemepi. Yepä tabe pui padare ne tuube me cire jaaweneji teeme äjăcrăneji biname bime name pi.

²³ Siige pui padare cabu laati te liba cire jiji pi egä, ‘Keriso age sena,’ coo egä ‘Tabe peese nyene,’ weene gone ätrunga. ²⁴ Walya Keriso piyepu walya mename biname cina cire saaclepi. Teepi ciitaca mule bine piyepu călu te äti mule bine cire jaawenanemepesi Acejiyame me äjăcrăneji biname bine angletne-jame, teepi liba ibibi cirege peei ne wawename. ²⁵ Weene ngene gone jitrimalinuge, egä cane ai mule poto cidi me niinäce gaabe me ituge jajanena. ²⁶ Biname cina liba weebibine cirege jaji egä, ‘Keriso lui daapo taatu cewe cabu sine,’ gone naacluge piyeme. Coo teepi liba cirege jaji egä, ‘Tabe mete cabu ämlităneji enajenige,’ gone jăătrunguye. ²⁷ Cane, Acejiyame bau ca lui te tädujine biname me äbitujine, paamlepamle pana cire tacnepene, lui te twaaplacmelăjuge carbe cabu bimu acita gome ca bimu äpula gome me. ²⁸ Budrekaake luma, sändăyame cina piyeme labasecretneuge.”

Yeesu me Acnenuta poto cidi me

(Mareko 13:24-27; Luuka 21:25-28)

²⁹ “Pui măpu padare ingwe gaabe ca piba taatu bimu te krokeciye me cire lâbitepi, mabye te lica cire saapaclyărepi, wale cina cabu ca cire saatrametnemepi piyepu dume cabu lijal-ija nuuja gwidape gemi, teepi teeme otnetneja gaabe cabu ca cire lâyebhengăjipesi. ³⁰ Piba cane lui te Acejiyame bau ca tädujine biname me äbitujine, căme cewecu te cire taboclotepi carbe cabu, siige iyeta maramara gawe biname cina ele cire yaangenetnemepi, teepi liba cebine, Acejiyame bau ca lui te tädujine biname me äbitujine, cire năpănepesi carbe cabu äina baborage kokre piyepu jamyacu apaclyera cama. ³¹ Baborage moole te liba cire saangeneji, cane căme mename seemo bine cire jăătyepemepene Acejiyame me äjăcrăneji biname bine abasecretname iyeta poto ca ai gawecewe cabu.”

Ngene ca Agli Mene Piigi Uli poto cidi me

(Mareko 13:28-31; Luuka 21:29-33)

³² “Weene abiberäjäneye piigi uli cabu ca. Teeme ciipe cina liba migi ca tapanininusi, ngänglä laame liba taawenimuge, weene piba umle gemi, egä kāmäge mameta gyene. ³³ Pepu gyene, weene liba ai gwidape bine cire jepānanemepeye, weene umle gemi, egä cāme otni lui mameta gyene. Cane grana gome sāne. ³⁴ Cane toraca mene jijenininine, egä biname lui cina ireclota page ai taje, teepi iyeta budre lica cirege ābita, ngālu iyeta ai mule cina liba cire läbitipesi. ³⁵ Dume piiyepu gawe cirege apira, yepä cāme mene te lica cirege apira.”

*Nuuja te Umle Lica Bimu coo Padare Yeesu me Āina tääpume
(Mareko 13:32-37; Luuka 17:26-30, 34-36)*

³⁶ “Nuuja biname te umle lica gyene lui bimu coo padare cabu cane cire täinepene. Acejiyame me mename seemo cina cabucewe je umle lica gemi, cane Bāgrä te umle lica gāne, yepä tabe Babe taatu umle gyene. ³⁷ Cane lui Acejiyame bau ca tädujine biname me ābitujine, cane liba cire täinepene, pui padare lui epu pana cirege Nooa me padare liiyepu. ³⁸ Igi me niinäce gaabe biname cina piba yāärwājimusi, yāänājimusi, lawadricninusi ngālu puirage bimu, Nooa liba acenutuji baborage buto cabu me. ³⁹ Teepi nuuja umle lica ge, egä ngena te ābitinige, ngālu igi te liba tädige, iyeta teebibine yiisibrecmige. Pepu cirege ābita, cane lui te Acejiyame bau ca tädujine biname me ābitujine, liba cire tacne-nutepene. ⁴⁰ Pui padare cabu neeneni rooriye cina kaakesea cire jaawenepāsi calwacupi cabu; nuuja ne cire yaacatepesi, nuuja ne cire yaabmalepesi. ⁴¹ Neeneni magebi cina wiiti kuu bine kula ca cire jāāmulecemepāsi; nuuja ne cire waacatepesi, nuuja ne cire waabmalepesi. ⁴² Weene amacetnājāneji inajipi, ingle weene umle lica gemi, lui bimu cabu weeme Yageyame te cire tädepi. ⁴³ Mete yageyame te liba umle je, egä eromaame te liba tädenige, tabe piba ireclota yaanajuge. Tabe ire taatu lica jaacituge eromaame te teeme mete me abacita. ⁴⁴ Mete yageyame te lipu ireclota yaanajuge ingle eromaame te abacita wālu, weene miiji cuta pepu amacetnājāneji lenaja, ingle cane lui te Acejiyame bau ca tädujine biname me ābitujine, cane weeme umle cāco padare cabu cire tädepene.”

*Miiji Kaakesea Bāgrä piiyepu Niya Kaakesea Bāgrä
(Luuka 12:41-48)*

⁴⁵ “Laasi nyene toraca ngenecu piiyepu umle cama kaakesea bāgrä? Tabe peese nyene, teeme babo biname te lui ne ituge acita teeme nuuja kaakesea bāgrä bine ire atwime, egä teepi toraca padare cabu deedei yaawadanemusi. ⁴⁶ Pui kaakesea bāgrä te lipu gege birige, teeme babo biname te liba tacnenutuge, siige jāāpānuge, egä tabe cāngena kaakesea jaawenuge. ⁴⁷ Cane toraca jijenininine, egä teeme babo biname te jaajuge tabe iyeta gwidape bine ire atwemame.

⁴⁸ Yepä tabe liba niiyarage kaakesea bāgrä birige, tabe lajuge egä, ‘Cāme babo biname te wata lica tacnenutenige,’ ⁴⁹ siige puma cita ca gije jaacranimuge poto kaakesea bāgrä bine agleceme piiyepu ār wājame, ānājame poto nānāja biname cama. ⁵⁰ Puma cita ca teeme babo biname te tacnenutuge tabe lui padare cabu lica jaawagrijuge, ⁵¹ siige teebine mage yaagluge. Tabe nuuja walya biname bime cama yepä ibi daremu ne yaacatuge: tabe teta cama lāduge uliobo puupu cabu me, ele puma yaangenanenuge piiyepu giricu yaatebicumuge.”

25

Ngene ca Agli Mene Ten Ngulebāgrä poto cidi me

¹ “Pui padare cabu cane liba cire tacnenutepene, Acejiyame te lui biname bine yaawadimuge, teepi lui ten ngulebāgrä pana cirege, lui cina lampa cama eclige teeme ciwelooloyame ne awacletnājame. ² Poto faib lui buduma ge, poto faib lui umleumle ge. ³ Buduma ngulebāgrä cina teeme lampa bine ewadimisi, yepä teepi tuwāngle niye bine lica ewadimisi. ⁴ Umleumle ngulebāgrä cina, teepi teeme lampa bine ewadimisi cuta tuwāngle niye. ⁵ Ciwelooloyame te dāāgurage täbitige, peei name pi ngulebāgrä cina ute me jiciranemige, siige ogarige.

⁶ Ciye duusa liba joomlige, teepi ala itecijemige egä, ‘Ciwelooloyame te tädenige! Naaclege teebine awacletnājame!’ ⁷ Puma cita ca iyeta ngulebāgrä cina arpinerājininisi, lampa bine emacetnājimisi, jebotanemisi. ⁸ Buduma ngulebāgrä cina jejemisi umleumleyame bine egä, ‘Cime niye nicārineye, ingle cime lampa cina siige ātumentnenige.’ ⁹ Umleumle ngulebāgrä cina jejemisi egä, ‘Cine āblicāco gemi weebibine ceera, ingle ibibi lica gemi weene piiyepu cine. Āte aletna mete me naaclege weeme tääpume aletna-me.’ ¹⁰ Siige buduma ngulebāgrä cina eclige aletname. Teepi liba puga ge, piba ciwelooloyame te tatyaramtuge. Siige lui cina amacetnājāneji ge, teepi teta cama eclige, ebācnisi atejāclmuta soriyomu tääpume, siige grana te tarmige.

¹¹ Ingwe ca buduma ngulebägrä cina tatarige, jicisi egä, 'Babo biname, babo biname, cine yäähäcnesi!' ¹² Ciwelooloyame te puma cita ca teebibine tejemige egä, 'Cane toraca jijenininine, egä cane umle lica gäne weene.' "

¹³ Puma cita ca Yeesu jejemige egä, "Peei name pi weene ireire inajipi, ingle weene umle lica gemi padare coo bimu căme acnenuta täápume."

Ngene ca Agli Mene Nesae Kaakesea Bägrä pota cidi me
(Luuka 19:11-27)

¹⁴ "Pui padare cabu cane liba cire tacnenutepene, Acejiyame te lui biname bine yaawadimuge, teepi yepä babo biname me nesae kaakesea bägrä pana gemi. Yoo, pui babo biname te otnime äbitige cudecewe cewe me. Tabe teeme kaakesea bägrä bine ala tesoglicmi-ge, jejemige teeme gawe piyepu gwidape bine ire atwemame. ¹⁵ Tabe rarekaake yepäyepä ecäranemige teeme ngene atwanena ibi teepi pui ca kaakesea wawename ingwe ca awecna täápume. Tabe yepä ne faib tausen rarekaake ecäriige, cuta nuuja ne neeneni tausen rarekaake ecäriige, cuta nuuja ne yepä tausen rarekaake ecäriige, siige tabe abymäriige otnime. ¹⁶ Lui kaakesea bägrä te faib tausen rarekaake ewadimige, tabe piba taatu kaakesea jewenimige pui rarekaake ca, siige nuuja faib tausen jepänimige. ¹⁷ Pipu pana mule te äbitige neeneni tausen rarekaake bine lui kaakesea bägrä te ewadimige, tabe cuta jepänimige nuuja neeneni tausen. ¹⁸ Yepä lui kaakesea bägrä te yepä tausen rarekaake bine ewadimige, tabe ädige, gawe ne juurige, imletnige teeme babo biname me rarekaake bine.

¹⁹ Lecaleca padare ingwe ca babo biname te piba tacnenutige, ala taasogläcnige teeme kaakesea bägrä bine teebine awabame, egä teepi luma ngälu kaakesea ituge wawena teeme rarekaake ca. ²⁰ Lui kaakesea bägrä te yaawademepi faib tausen rarekaake, tädige, nuuja faib tausen sewadimige, jejige egä, 'Babo biname, maane faib tausen rarekaake näcärepete. Age sena nuuja faib tausen, cane lui bine ituge päpäna.' ²¹ Babo biname te jejige egä, 'Babo miijirage! Maane miijirage kaakesea bägrä gäte, cängena lipu ire tetwumete matikäli rarekaake ne, siige cane naacitenine bucurage bine ire atwemame. Tädi căme soriyomu cabu me cane cama gege me!' ²² Puma cita ca lui kaakesea bägrä te neeneni tausen rarekaake bine yaawademepi, tädige, babo biname ne jejige egä, 'Babo biname, maane cebine neeneni tausen rarekaake näcärepete. Age sena nuuja neeneni tausen, cane lui bine ituge päpäna.' ²³ Teeme babo biname te jejige egä, 'Babo miijirage! Maane miijirage kaakesea bägrä gäte, cängena lipu ire tetwumete matikäli rarekaake ne, siige cane meebine naacitenine bucurage bine ire atwemame. Tädi căme soriyomu cabu me cane cama gege me!' ²⁴ Cuta lui kaakesea bägrä te yaawademepi yepä tausen rarekaake bine, tädige babo biname bau me, jejige egä, 'Babo biname, cane umle gäne, egä maane owelale biname lica gäte. Maane emä yäärucnimute, maane luma lica yäätēmimute; maane emä taabasecnetnimute, kuu gije bine luma lica yiisabäjemute. ²⁵ Cane wälu ge, peei name pi lädepene, määme rarekaake gawe bora yäämletnepene. Siige age sena, maane lui näcärepete.' ²⁶ Tabe babo biname te jejige egä, 'Maane niyarage durau kaakesea bägrä gäte. Maane umle ge, egä cane emä yäärucnimute, luma lica yäätēmimune piyepu emä taabasecnetnimune, luma kuu gije bine lica yiisabäjemune. ²⁷ Maane căme rarekaake cire yaacranejite rarekaake ire atwi mete cabu, siige căme acnenuta padare cabu cane cerämu cire jääpänemejine niinäce rarekaake me kaakesea cabu ca. ²⁸ Ewademeye peei rarekaake bine teeme bau ca, ecäreye laati me ten tausen rarekaake piti nemi. ²⁹ Lui biname me umle pisi nyene, teebine cerämu ceera, siige teeme umle te babo läbituge. Yepä lui biname me umle lica gyene, piyepu tabe singi lica abiberäjame, teeme täápume nuuja gaabe lica gyene tabe umle ne päpäname. ³⁰ Ai niyarage kaakesea bägrä ne puutucu me ijareye krokeciiye cabu me. Tabe puma ele cire yaanganepi, giricu cire yaatebecmepl.' "

Ceräcerägäbu Atrana Bimu

³¹ "Cane lui Acejiyame bau ca tädujine biname me äbitujine, cane liba cabucewe cabu ca cire täinepene căme jamyacu apaclyera cama piyepu căme mename seemo cama, cane piba căme babo adnata puupu cabu cire ladnatepene biname bine atraname. ³² Iyeta gawe maramara biname bine cirege abasecnetna căme opo gaabe me. Cane teebibine cire jaabelanemepene neeneni sigu wawename, maamoi ire atwi biname te lipu maamoi piyepu gouti bine jaabelanemuge maramara sigu me. ³³ Cane piba maamoi bine căme camu pota cidi me cire yaacranemepene piyepu gouti bine căme säwäci pota cidi me. ³⁴ Piba cane mope biname te cire jaajemepene căme camu pota cidi ca biname bine egä, 'Căme Babe te weebibine miiji itu jiwenaninuju, siige naaclege iyeteta ireclota cabu me. Tabe peei ne weeme täápume ituge amacetnäja, tabe lui padare cabu gawecewe ne yootonutuji. ³⁵ Cane loolomecewe ge, weene deedei näcärujiye; niyemecewe ge, weene niye näcärujiye. Cane ciitaca biname ge, weeme cewe me tatyaramtujine, weene nawabluijiye, weeme mete me

nacanujiye. ³⁶ Cane cuutacuta ge, weene cäbletääpe nasigrujiye; cane pita cama ge, weene nängrärujiye. Cane krokeciye mete cabu liba, weene nädürujiye.’

³⁷ Cäme camu poto cidi ca conocäco biname cina teepi piba cebine cire najepesi egä, ‘Yageyame, cine liba meebine nääpänujisi loolomecewe, siige deedei nääcärujisi; coo piyepu niyemecewe, siige niye nääcärujisi?’ ³⁸ Cine liba nääpänujisi ciitaca biname, siige naawärlujisi, cime mete me naacanjusi, coo cuutacuta je cäbletääpe naasigrujisi? ³⁹ Cine liba nääpänujisi pita jajwi je, siige näängrärujisi, coo piyepu krokeciye mete cabu liba, siige cine meebine näädürujisi?’ ⁴⁰ Puma cita ca cane babo mope biname te teebibine cire jaajemepene egä, ‘Cane toraca mene jijenininine weebibine, egä weene ngena jewenujiye cäme ai papa biname yepä tääpume, peei lui weene cäme tääpume jewenujiye.’

⁴¹ Puma cita ca cane cire jaajemepene cäme säwäci poto cidi biname bine egä, ‘Acejiyame te weebibine niya daremu cire icäripi. Äyblengäjinineye cäme bau ca ngälu cäco uliobo cabu me, lui amacetnäjäneji gyene Diyabolo piyepu teeme mename seemo bime tääpume. ⁴² Cane loolomecewe ge, yepä weene deedei lica näcärujiye. Cane niyemecewe ge, weene niye lica näcärujiye. ⁴³ Cane ciitaca biname ge, weene lica nawablujije, weeme mete me lica nacanujiye. Cane cuutacuta ge, weene cäbletääpe lica nasigrujiye. Cane pita cama ge piyepu krokeciye mete cabu jage, yepä weene lica nängrärujiye.’ ⁴⁴ Piba teepi cebine cire najepesi egä, ‘Yageyame, liba cine meebine loolomecewe nääpänujisi coo piyepu niyemecewe coo ciitaca biname, cuutacuta biname, piyepu pita cama biname, krokeciye mete cabu biname, siige cine piba meebine lica näätityärujisi?’ ⁴⁵ Cane teebibine cire jaajemepene egä, ‘Weene liba cäme ai papa biname yepä ne ätityera cäco ituge, peei lui weene cebine ätityera cäco ituge.’ ⁴⁶ Teepi siige niiyarage daremu ne cire jääpänepesi, lui iyeteta gyene; yepä conocäco biname, teepi cire jääpänepesi iyeteta ireclota ne.”

26

Gläamu Jecijemige Yeesu ne Aglime

(Mareko 14:1-2; Luuka 22:1-2; Yoane 11:45-53)

¹ Yeesu liba teeme abiberäja mene bine epirimige, tabe teeme abiberäja bägrä bine jejemige egä, ² “Weene umle gemi, egä neeneni bimu niinäce gaabe äsuplengta trii te liba pa yaanajepi, cane lui te Acejiyame bau ca tädujine biname me äbitujine, cebine piba pa nacitepesi biname bime ime cabu teepi cebine baarge uli cabu äbyecrame.”

³ Puma cita ca modamoda iiwäreja biname piyepu poto modamoda biname cina abasecretnige iiwäreja mope biname ngii Kayapa me mete cabu me. ⁴ Teepi mene jewenisi Yeesu ne ogä oomlaname siige budre me acitame. ⁵ Teepi jüicisi egä, “Mine trii padare cabu gone jaawenusi, cije biname cina mibibine cubu me niwenininusi.”

Magebi te Yeesu ne Oil ca Eganige Betaniya Cewe je

(Mareko 14:3-9; Yoane 12:1-8)

⁶ Yeesu Betaniya cewe jage yepä biname ngii Simona me mete cabu, lui te niinäce lepera pita cama ge. ⁷ Yeesu liba deedei cabu jage, yepä magebi te piba toclige mararage lengo oil cama, lui ne baborage daremu ca jaaletnusi. Tabe pui oil ne secanige karpu cabu, lui alabasta kula ca wawenäneji ge, siige epadurige Yeesu me mope cabu. ⁸ Abiberäja bägrä cina liba ai mule ne jepänisi, teepi claabe me äbitininisi, jüicisi egä, “Ngeno me ai oil ne papa bepadurige? ⁹ Miiji cire yaacanejisi babo daremu ca aletname, siige pui rarekaake owecumete biname bine cire yääcäranemejis!”

¹⁰ Yeesu umle äbitige, teepi ngena tääpume jüicemisi, siige tabe jejemige egä, “Weene ngeno me ai magebi ne jwiicetniniye, ngenecu mäpu me joweniniye? Tabe ai lui babo miijirage mule ne biiri jewenige cäme tääpume. ¹¹ Owecumete biname cina iyeteta pa yaacrajepi weene cama, yepä cane weene cama iyeteta lica pagege lenaja. ¹² Tabe liba ai oil ca naganige cebine, tabe cäme tääpe ne beganige gape cabu me acitame. ¹³ Cane toraca mene jijenininine, egä Miiji Mene luma cirege iicema ai gawecewe cabu, teeme ngena apename cirege iicema, tabe lui mule ne bii jewenige cäme tääpume.”

Yuuda Mene Jewenige Yeesu ne Awabame Budre tääpume

(Mareko 14:10-11; Luuka 22:3-6)

¹⁴ Puma cita ca twelb abiberäja bägrä bime yepä te ngii Yuuda Isakariyota ädige modamoda iiwäreja biname bime bau me, ¹⁵ jejemige egä, “Weene cebine ngena näcäreniye, cane liba Yeesu jiwabinininine weebibine?” Teepi teeti silba rarekaake ecnemisi, teebine ecärisi. ¹⁶ Puma cita ca Yuuda miijirage padare ne jirngige Yeesu ne teeme ime cabu acitame.

Yeesu Teeme Abiberäja Bägrä cama Äsuplengta Deedei Erwige

(Mareko 14:12-21; Luuka 22:7-14, 21-23; Yoane 13:21-30)

¹⁷ Trii padare puga ge Israela biname cina liba uutneca căco buluduu bine yăărwăjimusi. Pui padare me niinăce bimū cabu abiberăja băgră cina seclige Yeesu ne âtemlame egă, “Maane singi luma măte cine âsuplengta deedei ne amacetrănjame määme tääpume?” ¹⁸ Yeesu jejemige egă, “Ăte naaclege pui yepă biname bau me babo cewe je, teebine jejepeye egă, ‘Abiberăja biname te jüicenige egă căme budre padare mameta gyene atyaramta. Cane căme abiberăja băgră cama tădenine määme mete me âsuplengta deedei äbitame.’” ¹⁹ Abiberăja băgră cina jewenisi, Yeesu lipu jejemige. Teepe âsuplengta deedei ne emacetrănjasi.

²⁰ Liba mämleteca ge, Yeesu teeme twelb abiberăja băgră cama adnatige deedei loolo me. ²¹ Teepe liba deedei äbitininisi, Yeesu jejemige egă, “Cane toraca mene jijenininine, weeme yepă te cebine pa nawabepi budre me aglime.” ²² Abiberăja băgră cina ngenecu măpu me äbitininisi, siige teepe yepăyepă teebine jejananisi egă, “Yageyame, cane lica.” ²³ Yeesu jejemige egă, “Laati te buluduu ne yiiglenutenige disi cabu cane cama, tabe sine pui biname. ²⁴ Cane lui te Acejiyame bau ca tădujine biname me äbitujine, Oogărăneji mene te lipu jüicenige, cane pepu budre äbitenine. Yepă lipu niyarage gyene, lui te cebine nawabenige budre me, Acejiyame bau ca lui te tădujine biname me äbitujine. Pui biname tääpume miiji cirege, tabe liba lica cire laplimleji.” ²⁵ Puma cita ca Yuuda Yeesu ne budre me awaba biname te jejige egă, “Abiberăja biname, cane lica.” Yeesu jejige egă, “Maane peese näte lui te jüicite egă, ‘Cane lica.’”

Yeesu Teeme Abiberăja Băgră cama Aareto ne Erwige

(Mareko 14:22-26; Luuka 22:15-20; 1 Korinito 11:23-25)

²⁶ Teepe liba erwăjisi, Yeesu buluduu ne ecatige, Acejiyame ne eso ecărige, itrecige, abiberăja băgră bine ecărimege, siige jejemige egă, “Ecateye, erweye. Ai lui căme tääpe gyene.” ²⁷ Puma cita ca tabe kwăye ne ecatige waina niye cama, Acejiyame ne eso ecărige, siige teebibine ecărimege, jejemige egă, “Weene iyeta eneye. ²⁸ Ai lui căme uudi gyene; klaje jecnenige Acejiyame lui kirece mene ituge jaji biname bine niya cabu ca äsecrerame; bucurage biname bime tääpume tapirenige teeme niya mule bine iisibrecame. ²⁹ Cane toraca jijenininine weebibine, egă cane ingwe ca lica cirege waina niye ne nani, ngălu pui bimū cabu liba kirece waina niye ne weene cama cire yaanepene, mine liba cirege abasecretna căme Babe me puupu cabu cabucewe je.”

³⁰ Puma cita ca teepe uupera ne etangisi, siige äsige, eclige Olibi Uli podo cabu me.

Yeesu piyepu Peteru

(Mareko 14:27-31; Luuka 22:31-34; Yoane 13:36-38)

³¹ Yeesu abiberăja băgră bine jejemige egă, “Page ai ciye cabu weene uucratnininiye, cebine nabmaliniye, ingle Oogărăneji mene te jüicenige egă, ‘Acejiyame te maamoi ire atwi biname ne eglenige budre me, siige maamoi tomi te maramara äbitenige.’” ³² Yepă cane liba budre cabu ca pa larpinantepene, cane piba weeme niinăce gaabe me Galilaya me pa lădepene.” ³³ Puma cita ca Peteru Yeesu ne jejige egă, “Ngănu gyene liba iyeta poto cina meebine abmala, yepă cane licarage naabmalenine meebine.” ³⁴ Yeesu jejige egă, “Cane toraca naajenine, egă ai ciye cabu paulo te ingwe ca ala sengenenige, maane niinăce nesae găăbu cebine nainenite.” ³⁵ Peteru jejige egă, “Ngănu gyene teepe cebine maane cama budre me agli, yepă cane meebine licarage naajenine.” Iyeta abiberăja băgră cina cuta yepă mene jejanisi.

Yeesu Ireçu Ätumutige Getesemane je

(Mareko 14:32-42; Luuka 22:39-46)

³⁶ Yeesu teeme abiberăja băgră cama ädige cewe ngii Getesemane me. Puma tabe teebibine jejemige egă, “Ama adnatărineye, cane liba ädenine eeyeme ireçu ätumutame.” ³⁷ Tabe teta cama aacanănege Peteru piyepu Jebedayo me neeneni băgră bine. Yeesu babo ngenecu măpu me äbitige. ³⁸ Tabe teebibine jăjănige egă, “Cane budre pana ngenecu măpu găne. Weene cane cama ireclota sinajānege.” ³⁹ Puma cita ca tabe matikăli padare abotăntige, oweowe ajarige gawe cabu me, ireçu ätumutige egă, “Căme Babe, liba miiji gyene, maane ai măpu ne căme bau ca iyebingti. Yepă maane căme singi ne gone jaawenute, määme singi ne jewenepi.”

⁴⁰ Puma cita ca tabe tacnenutige, abiberăja băgră bine ute cabu äädărănige. Tabe Peteru ne jejige egă, “Năă, weene kokre lica gămi matikăli padare ireclota lenajame cane cama?” ⁴¹ Ireclota sinajānege ireçu ätumutame, weene piba lica pagege atrametna apicetrănjara padare cabu. Weeme seemo cina singi gămi căme singi ne wawename, yepă weeme tääpe cina kokre căco gămi.”

⁴² Yeesu cuta cääri acnige ireçu ätumutame. Tabe jüicige egă, “Căme Babe, maane liba toraca singi gâte cane ai măpu cabu lenajame, yoo siige määme singi te lăbitege.” ⁴³ Tabe liba tacne-nutige, tabe cääri teebibine ute cabu äädărănige. Teepe äblicăco ge ireçu aasatăneji

lenaja. ⁴⁴ Puma cita ca Yeesu teebibine cääri taabmalänige, nesae me ädige irecu ätutumame yepä mene iicemame. ⁴⁵ Tabe liba tacnenutige abiberäja bägrä bime bau me, tabe jääjänige egä, “Weene ute camu gämi. Diibe oocenäniye. Padare te biiri tatyaramtige, cane lui te Acejiyame bau ca tädujine biname me äbitujine, cebine ceerame conocono biname bime ime cabu me. ⁴⁶ Abujengäneye, biiri wäjene! Ire, lui biname te cebine nawabenige budre me aglime, tabe mameta gyene!”

Yeesu ne Joomlisi

(Mareko 14:43-50; Luuka 22:47-53; Yoane 18:3-12)

⁴⁷ Yeesu liba camu mene iicema cabu jage, Yuuda twelb abiberäja bägrä bime yepä te piba tatyaramtige. Modamoda iiwäreja biname piyepu poto Israela modamoda biname cina teta cama tityepimisi bucurage biname bine cubu turikä piyepu gabagaba cama. ⁴⁸ Yeesu ne budre me awabayame biname te cewecu ne bii becitige pui biname bime tääpume egä, “Cane lui biname ne jetecnenine, peese nyene weene lui tääpume singi. Joomlepeye!”

⁴⁹ Yoo siige, Yuuda liba tatyaramtige, tabe conocäco ädige Yeesu bau me, jejige egä, “Abiberäja biname, poode!” siige jetecni-ge teebine. ⁵⁰ Yeesu jejige egä, “Cäme biname, maane wata jeweni, maane ngena tääpume täditel!” Puma cita ca lui biname cina Yuuda cama seclige, teepi Yeesu ne jewaclomtisi, kokrerage joomli-si. ⁵¹ Yeesu cama lui biname cina, teeme yepä te teeme cubu turikä ne suusuratige, iiwäreja mope biname me kaakesea bägrä me tablame ne iyeta jeläcnutige. ⁵² Yeesu jejige egä, “Isinglanti mäame turikä ne siiti bora, ingle laatibi cubu turikä ca larginusi, teebibine cubu turikä te budre me yaaglecimuge. ⁵³ Nää, maane apu naangeninige, egä cane äblicäco gäne cäme Babe ne ätinera cebine ätityerame? Cane liba ätinera je, tabe piba taatu mage twelb mename seemo sange bine ätyepa cäme ätityera tääpume. ⁵⁴ Yepä pepu liba äbita je, piba lipu toraca me page läbitepi, lui mene oogäräneji gyene, egä ai mule te miiji äbita.”

⁵⁵ Puma cita ca Yeesu biname bine jejemige egä, “Weene cubu turikä piyepu gabagaba cama naaclige cebine oomlaname epu pana, egä cane cubucubu biname gäne. Bimu gaabegabe cane iiwäreja mete cabu ladnatune, puga yaabiberäjimune, weene ngena name pi piba cebine lica noomlepeye. ⁵⁶ Yepä iyeta ai cina häpletnäriige Acejiyame me mename biname bime oogäräneji mene cina toraca me äbitame.”

Piba taatu iyeta abiberäja bägrä cina teebine ebmalisi, siige uucratnige.

Yeesu Israela Mutre Biname bime Opo Gaabe je

(Mareko 14:53-65; Luuka 22:54-55, 63-71; Yoane 18:13-14, 19-24)

⁵⁷ Lui cina Yeesu ne joomlisi, teepi teebine ecanisi iiwäreja mope biname ngii Kayapa me mete me. Cotre abiberäja biname piyepu nuuja Israela modamoda biname cina uja piyeyeme biiri tabasecetrnige. ⁵⁸ Peteru Yeesu ne cudecewe ca ingwe icwige iiwäreja mope biname me mete puutucu cabu me. Tabe puga kaakesea bägrä cama adnatige ireme, egä baa lipu äbitininisi iyeta ai mule cina Yeesu tääpume.

⁵⁹ Modamoda iiwäreja biname piyepu iyeta mutre biname cina, teepi liga walya aitneja ne jirngisi Yeesu ne atraname budre tääpume, ⁶⁰ yepä teepi äblicäco nuuja ne päpäna, ngänuge puu bucurage biname cina seclige teebine walya aitnejamme. Ceräcerägäaburage neeneni biname cina taaclige, ⁶¹ siige jiiicäsi egä, “Ai biname te itu jiiicepi egä, ‘Cane miiji gäne Acejiyame me iiwäreja mete ne iigarecame cuta nesae bimu cama cääri raranga-me.’”

⁶² Iiwäreja mope biname te abujängtige, Yeesu ne jejige egä, “Teepi meebine bii naitnisi. Mäame nuuja daremu mene lica gyene?” ⁶³ Yepä Yeesu bojäcu enajige. Puma cita ca iiwäreja mope biname te cääri teebine jejige egä, “Ireclota Acejiyame me ngii cabu maane nijini, maane liba Keriso säte, Acejiyame me Bägrä.” ⁶⁴ Yeesu jejige egä, “Yoo, maane peega bii jiiicite. Yepä cane jijenininine weebibine, egä cane lui Acejiyame bau ca tädujine biname me äbitujine, ai padare cabu ca niinäce gaabe me weene cebine pa näpänepeye babo kokrerage Acejiyame me camu poto cidi ca adnatäneji piyepu cuta cire näpänepeye, cane carbe cabu liba cire täinepene.” ⁶⁵ Puma cita ca iiwäreja mope biname te teemanu cäbletääpe ne idericige awabame, egä tabe Yeesu ne panyamete jepänige, siige jiiicige egä, “Tabe Acejiyame me ngii ne sabe bii jewenige. Mine nuuja singi lica gemi nuuja aitneja tääpume. Weene siige peega bitecijinige, tabe lipu Acejiyame me ngii ne sabe jewenige. ⁶⁶ Weene lipu ngenne jotwaninininige teeme poto cidi me?” Teepi jejisi egä, “Tabe conocono biname gyene. Tabe miiji budre.” ⁶⁷ Puma cita ca teepi giije jecitisi teebine mote ca ätywame opo cabu piyepu ooroename. Poto cina teebine lakace cabu jidnanisi, ⁶⁸ jiiicisi egä, “See Keriso, baa maane nijini, egä laati te noororige meebine.”

Peteru Yeesu ne Jeinige

(Mareko 14:66-72; Luuka 22:56-62; Yoane 18:15-18, 25-27)

⁶⁹ Peteru Kayapa me mete puutucu je adnatäneji enajige. Puma cita ca yepä kaakesea ngulebägrä te toclige, teebine jejige egä, “Maane cuta peese näte nuuja, Yeesu Galilaya biname cama lui te waatnute.” ⁷⁰ Yepä Peteru biname bime sobe cabu jeinige, jojige pui ngulebägrä ne egä, “Cane umle lica gäne maane ngena täapume jiićenite.” ⁷¹ Puma cita ca tabe asatige caale grana gome me. Piba nuuja kaakesea ngulebägrä te Peteru ne jepänige, biname bine puma jejemige egä, “Ai biname te Yeesu Nasareta biname cama waatnuge.” ⁷² Peteru cääri jeinige, jiićige egä, “Cane Acejiyame me ngii cabu jiićenine, egä cane umle lica gäne peei biname.” ⁷³ Matikäli padare ingwe gaabe ca lui biname cina puga aclajuteji icrajige, seclige Peteru bau me, jejisi egä, “Toraca, maane peese näte teeme yepä. Määme tagepogogo te niwabininige, egä maane ten cama yepä ceweyame gäte.” ⁷⁴ Puma cita ca Peteru mene kokre cama jiićige egä, “Acejiyame me ngii cabu cane jijenininine, egä cane umle lica gäne peei biname. Acejiyame niia daremu näcärüge, cäme mene liba toraca lica.” Piba taatu paulo te ala sengenige.

⁷⁵ Peteru ngene jotwige, Yeesu lipu jejige egä, “Paulo te ingwe ca ala sengenenige, maane niinäce nesae gääbu cebine nainenite.” Peteru asatige, agli pana ele engenige.

27

Yeesu ne Pilato bau me Ecanisi

(Mareko 15:1; Luuka 23:1-2; Yoane 18:28-32)

¹ Krokerage iyeta modamoda iiwäreja biname piyepu nuuja Israela modamoda biname cina mene jitransisi Yeesu ne budre me aglime. ² Teepi seea ca teebine jetäyisi, siige ecanisi Pilato bau me, lui Rooma gabmani babo biname ge pui gawe ne ire atwime.

Yuuda me Budre

(Apostolo 1:18-19)

³ Yuuda Yeesu ne budre me awabayame biname te liba iteciijige, egä Yeesu ne budre me bii jitransisi, tabe niyarage asicnantige, peei teeti silba rarekaake bine ewecnimige, modamoda iiwäreja biname piyepu nuuja modamoda biname bine ecärimige. ⁴ Tabe jejemige egä, “Cane niia mule ne bii bećnine, conocäco biname lipu bicärimininine budre me agli täapume.” Yepä teepi jejisi egä, “Cine ngeno me pa yaaratepesi. Määme mule gyene peei.” ⁵ Puma cita ca Yuuda rarekaake bine eyärimige iiwäreja mete cabu, ädige, ete aglotige.

⁶ Modamoda iiwäreja biname cina rarekaake bine etomlećmisi, jiićisi egä, “Ingle naace popi ai rarekaake uudi me daremu gyene, peei name pi cotre gyene acraname, iiwäreja mete täapume luma rarekaake yaacranimusi.” ⁷ Teepi mene jitransisi, egä lui biname te disi bine gawe ca jaawenimuge, pui rarekaake ca teeme bau ca gawe ne jeletnisi idne biname bime gapecewe täapume. ⁸ Ingle naace popi pui gawe ne lui uudi daremu rarekaake ca jeletnisi, peei name pi einenisi Uudi Gawe ca ngälu page ai taje.

⁹ Ai te ibibi äbitige Acejiyame me mename biname Yeremiya me mene cama egä, “Teepi teeti silba rarekaake bine ewadimisi, Israela biname cina luma ngälu me singi äbitininisi teebine daremu wawename, ¹⁰ siige pui rarekaake ca eei biname bau ca gawe ne jeletnisi, lui biname te disi bine jaawenimuge gawe ca, Yageyame te lipu cebine ituge jaji wawename.”

Pilato Yeesu ne Itemläjige

(Mareko 15:2-5; Luuka 23:3-5; Yoane 18:33-38)

¹¹ Yeesu Rooma gabmani babo biname Pilato me opo gaabe jeclajutige. Pilato Yeesu ne itemlige egä, “Nää, maane Israela biname bime mope biname gäte?” Yeesu jejige egä, “Maane peege bii jiićite.” ¹² Modamoda iiwäreja biname piyepu nuuja Israela modamoda biname cina liba teebine jeitnäjisi, tabe nuuja mene lica. ¹³ Puma cita ca Pilato jejige egä, “Nää, maane lica näätecićenige, meebine lui naaitnäjenisi?” ¹⁴ Yepä Yeesu daremu mene lica jewecnistige, peei name pi Pilato mage cälu te jitiige.

Pilato Yeesu ne Budre me Jitransige

(Mareko 15:6-15; Luuka 23:13-25; Yoane 18:39–19:16)

¹⁵ Israela biname cina liba kämäge gaabegabe äsuplengta trii ne jaawenusi, piba Rooma gabmani babo biname te krokeciye mete cabu ca yaasatuge yepä biname ne, teepi lui täapume birige singi. ¹⁶ Peeirage padare cabu krokeciye mete bora biname puga ge ngii Baraba, lui täapume biname cina baborage umle. ¹⁷ Biname cina liba tomi yootisi, Pilato itemlimige egä, “Weene singi cane lui ne asatame krokeciye mete cabu ca, Baraba ne coo nää Yeesu ne, Keriso ca lui ne einenisi.” ¹⁸ Pilato apu naace popi itemlimige, ingle tabe umle ge, egä modamoda iiwäreja biname cina naace popi Yeesu ne secanisi teeme bau me, ingle teepi teebine ire patre eglisi.

¹⁹ Pilato liba adnatāneji enajige atrana puupu cabu, teeme coga te piba mene jityepige egā, “Gone nuuja gwidape ne jaawenute peei conocāco biname tääpume, inge cane wama cabu mage cewe boocananine temiji pi.”

²⁰ Modamoda iiwāreja biname piyepu nuuja Israela modamoda biname cina biname bine tii jewenanemisi Pilato ne jajime tabe Baraba ne asatame Yeesu ne budre me aglime. ²¹ Siige Pilato itemlimige egā, “Ai neeneni cabu ca weene singi gemi cane laati ne isatinine?” Teepi jejisi egā, “Baraba ne!” ²² Pilato teebibine itemlimige egā, “Cane piba ngena jewenenine Yeesu tääpume, Keriso ca lui ne einenisi?” Teepi iyeta jiičisi egā, “Teebine baarge uli cabu jibyecreye!” ²³ Pilato jejemige egā, “Ngena name pi? Tabe ngena niija ne ituge wawena?” Yepā biname cina mage ala abayaninisi egā, “Baarge uli cabu jibyecreye!” ²⁴ Pilato jepānige, egā ai lui niiyarage me äbitenige, cije cubu te läpletnutuge, siige tabe niije siitige, ime äcisājige biname bime opo gaabe, jiičige egā, “Cane yageyame lica gāne ai biname me budre tääpume. Peei lui weerne bau sine.” ²⁵ Iyeta biname cina gigri ala tabayaninisi egā, “Cine piyepu cime bāgrāwale cama, cine temi yageyame teeme budre tääpume. Cine te cirege daremu acata teeme budre name pi!” ²⁶ Puma cita ca Pilato Baraba ne sisatige, cubu biname bine jejemige Yeesu ne adnane, siige jityepige baarge uli cabu äbyecrame.

*Rooma Cubu Biname cina Yeesu ne Ätutena pana Jewenanisi
(Mareko 15:16-20; Yoane 19:2-3)*

²⁷ Pilato me cubu biname cina Yeesu ne ecanisi Pilato me mete opo gome me. Teepi ala tesoglicmisi teta cama lui yepā sange cubu biname bine, siige teepi Yeesu ne jewaclomtisi. ²⁸ Teepi teeme cäbletääpe bine jiičimisi, ududi cäbletääpe ca esigrisi ätutename, egā tabe mope biname gyene. ²⁹ Teepi pägepäge seeasea ne jemle-maltisi krauni tääpume, siige teeme mope cabu ecitisi. Teeme camu poto ime cabu suru ecärisi, siige kokorare ca ipednanemisi teeme opo gaabe je. Teepi ai ne ätutena pana jewanisi, egā tabe babo mope biname gyene. Puma cita ca teepi jewablisi teebine, jejisi egā, “Sebore Israela biname bime moyeyame!” ³⁰ Teepi teebine mote ca ityewäjisi, lui suru ne ecitisi teeme ime cabu, pui ca eglisi mope gome. ³¹ Teepi liba ätecitinisi teebine apu ätutena pana wawename, ududi cäbletääpe jiičimisi, teemerage cäbletääpe ca esigrisi, siige ecanisi baarge uli cabu äbyecrame.

Yeesu ne Baarge Uli cabu Jibyecrisi

(Mareko 15:21-32; Luuka 23:26-43; Yoane 19:17-27)

³² Teepi liba äsige, gaabegabe je Simona Kurene cewe biname ne jepānisi, jejisi Yeesu me baarge uli ne acaname, siige tabe ecanige. ³³ Teepi atyarige cewe ngü Gologota me, lui me aboclomta egā ‘Mopekaake Cewe’. ³⁴ Puga teepi Yeesu ne caapocapo waina niije ecärisi nanime, lui traci gwidape cama alengläciteji teeme pita diibe ceerame, yepā mite agli ingwe gaabe ca tabe singi lica nanime.

³⁵ Teepi teebine baarge uli cabu jibyecrisi. Puma cita ca teepi matimati kula cabu teeme ngii bine yoogärimisi, piba yiisabäjemisi pui kula bine umle äbitame, egā teepi lipulipu Yeesu me cäbletääpe bine abelename. ³⁶ Peei ingwe ca teepi puga adnatäriige, Yeesu ne ire jetwisi. ³⁷ Teeme mope gome me mene ne ecitisi teeme budre inge poto cidi me egā, AI LUI YEEU SINE, ISRAELA BINAME BIME MOPE BINAME. ³⁸ Piba teepi neeneni cubucubu biname bine baarge uli cabu jääbyecrisi Yeesu me wajwa je, nuuja te camu poto ca, nuuja te säwäci poto ca.

³⁹ Laatibi teebibine äsüplengäjānisi, teepi mope akocnājiniisi, Yeesu ne jisädanisi. ⁴⁰ Teepi jiičisi egā, “Maane peese näte, iiwāreja mete ne lui te yigarecenite, cuta cääri nesae bimü cama erange-nite. Maane miiji äbiti, maane liba Acejiyame me Bāgrā gāte. Täini baarge uli cabu ca!”

⁴¹ Modamoda iiwāreja biname, cotre abiberāja biname piyepu nuuja modamoda biname cina teebine cuta pipu jisädanisi, ⁴² jiičisi egā, “Tabe nuuja biname bine miiji tewenane-mumi, yepā tabe äblicāco teemāmu miiji äbita. Cije tabe Israela mope biname lica gyene? Tabe liba baarge uli cabu ca täimenige, cine piba teebine jitrungenisi. ⁴³ Tabe teeme ngena atwanena bicranige Acejiyame bau me, piyepu teeme Bāgrā ca ainenige. Yoo siige mine jääpänesi, egā Acejiyame liba singi teebine miiji wawename.” ⁴⁴ Piyepu peei neeneni cubucubu biname, lui bine teeme gome jääbyecrisi, teepi cuta pepu jejananisi teebine.

Yeesu me Budre

(Mareko 15:33-41; Luuka 23:44-49; Yoane 19:28-30)

⁴⁵ Bimü duusa me krokeciye te cewe ne iyeta icwabige, siige nesae awa pepu enajige. ⁴⁶ Piba mämle bimü cabu Yeesu mage ala abayige egā, “Eeli, Eeli lama sabatani.” Peei lui egā, “Cāme Acejiyame, cāme Acejiyame, maane ngeno me cebine nägyite?” ⁴⁷ Poto biname

lui cina aclajuteji puga ge, jitecijisi, jiicisi egä, “Taba Eliya ne ala tesoglecenige.”⁴⁸ Teeme yeepä te piba taatu tuuwamige, waarpopale pana gwidape ne yiiglenutige caapocapo waina niye cabu, suru ca jigadige, siige cabu me ewepäntige tabe nanime.⁴⁹ Poto cina jiicisi egä, “Cäro, mine jääpänesi, egä Eliya liba tädenige teebine miiji wawenime.”⁵⁰ Yeesu cääri mage ala abayige, ceräcerägäabu buuwe mope bine yiisabimige, siige teeme ireclota ecäriige.

⁵¹ Iiwäreja mete cabu Acejiyame me puupu ne lui cäbletääpe te jilyengenige biname bime puupu cabu ca, pui cäbletääpe te äderäriige cabu ca ngälu gawe me. Ocejaja puga ge, modamoda kula cina äplegicinini, ⁵² gape cina iitnetnäjinisi, siige bucurage Acejiyame me biname laatibi budre, teepi tarpineräjinini ireclota me. ⁵³ Teepi teeme gape bine sebmalmisi. Yeesu liba budre cabu ca tarpinantige, teepi piba Yerusalema me eclige, puga aboclomäjinini bucurage biname bime bau me.

⁵⁴ Cubu mope biname piyepu teeme ingwe gaabe biname laatibi Yeesu ne ire jetwisi, liba jepänisi ocejaja ne piyepu iyeta ngena cina äbitinisi, teepi mage wälu äbitinisi, jiicisi egä, “Taba toracarage Acejiyame ne Bägrä gyene.”

⁵⁵ Puga ge bucurage magebi cudecewe ca ire. Teepi Yeesu cama Galilaya probins cabu ca seclumi teebine ätiyterame. ⁵⁶ Teeme sigu cabu Mariya Magadala cewe magebi piyepu Yakobu Yoosepa naabime mage ngii Mariya cuta Jebedayo me coga.

Yeesu ne Gape cabu Ecitisi

(Mareko 15:42-47; Luuka 23:50-56; Yoane 19:38-42)

⁵⁷ Liba mämeteca ge, yepä dogwe biname ngii Yoosepa te Arimatea cewe cabu ca piba tatyaramtige. Taba cuta nuuja Yeesu me abiberäja bägrä ge. ⁵⁸ Taba Pilato bau me ädige Yeesu me budrekaake tääpume ätinerame. Pilato jejemige budrekaake Yoosepa ne ceerame, ⁵⁹ siige tabe budrekaake ne baarge uli cabu ca sitrunamtige, kirece bulubulu cäbletääpe ca tope etnige, ⁶⁰ ecanige, teeme Yoosepa me tääpume lui gape ne cemacema tuurumesi baborage kula bora, pui ngalebora me ecitige. Taba baborage kula ne epetregäjiige gape grana armi tääpume, siige acnenutige. ⁶¹ Mariya Magadala cewe magebi piyepu nuuja Mariya, teepi puga adnatäneji aanajige, opire gape cabu mage.

Awamuta Biname cina Gape Gome

⁶² Nuuja bimu cabu lui Sabade bimu ge, modamoda iiwäreja biname piyepu Parisea sigu biname cina Pilato bau me eclige, ⁶³ jejisi egä, “Babo biname, cine ngene jotwinago, egä pui walya biname liba ireclota senajumi, tabe tiicumini egä, ‘Cane nesae bimu ingwe gaabe ca budre cabu ca pa larpinantepene.’” ⁶⁴ Jejemi gape ne cängena awamutame nesae bimu ngalebora, piba teeme abiberäja bägrä cina äblicäco otni teebine ero ca acatame, puma cita ca jajanenime egä, “Taba budre cabu ca tarpinantige.” Apu liba äbita je, teeme ai ingwe ca walya te niyarage cirege teeme niinäce walya cabu ca.” ⁶⁵ Pilato jejemige egä, “Awamuta biname bine ewademeye, naaclege, gape ne jewamuteye, weene lipu miiji gemi.” ⁶⁶ Siige, teepi Pilato ne ebmalisi, eclige gape gome me. Teepi gape grana cabu lui kula ne etengäcitsi, awamuta biname bine puga sebmalmisi.

28

Yeesu Budre cabu ca Arpinantige

(Mareko 16:1-10; Luuka 24:1-12; Yoane 20:1-10)

¹ Sabade bimu me ingwe ca Sande baani te liba seclitige, Mariya Magadala cewe magebi piyepu nuuja Mariya teepi aacliche gape ängrärame. ² Puma cita ca babo kokre ocejaja te tädige. Yageyame me mename seemo te cabucewe ca täinige, kula ne epetregäjiige Yeesu me gape grana cabu ca, siige pui kula papa cabu adnatige. ³ Teeme opo paamlepamle pana ge, cäbletääpe lui toraca bulurage ge. ⁴ Awamuta biname cina babo wälu äbitinisi, jelonecmige, siige gawe cabu itrametnemige budre biname pana.

⁵ Mename seemo te magebi bine jaajige egä, “Wälu gone läbituye. Cane umle gäne, egä weene Yeesu ne jirngeniye, baarge uli cabu lui ne tibyecrumesi. ⁶ Taba ama lica gyene. Taba barpi-nantige, tabe lipu itu tiicumini. Siclege, jepäneye tabe luma ätwtänäjeji senajumi. ⁷ Äte watata iclege, teeme abiberäja bägrä bine jejemepeye, egä tabe budre cabu ca barpinantige, siige Galilaya me pa lädepi teeme niinäce gaabe me; teepi teebine puma pa jääpänepesi. Ngene gone jitrimaluge, cane lipu bii jijine.” ⁸ Magebi cina watatarage gape ne sebmäläsi. Teepi nuuja poto wälu nuuja poto gege ge, siige uuwamäsi Yeesu me abiberäja bägrä bine jajime, ngena te bäbitige.

⁹ Puma cita ca Yeesu teebibine opopa jaawenige, jaajige egä, “Poode weeme bau me!” Teepi teeme bau me taacliche, ernge gome joomläsi, siige ngenecu miiji cama teebine jepänäsi. ¹⁰ Yeesu jaajige egä, “Wälu gone läbituye! Iclege, căme naane igane bine jejemeye teepi Galilaya me otnime. Teepi cebine puma pa näpänepesi.”

Awamuta Biname bime Aitneja Mene

¹¹ Magebi cina liba gaabe cabu jage, lui cubu biname cina gape ne jewamutisi, teeme poto cina äcnärige babo cewe me, modamoda iiwäreja biname bine jejemisi, ngena te bii bäbitige. ¹² Modamoda iiwäreja biname cina nuuja modamoda biname bime cama yepä cewe me abasecretninige mene atraname. Teepi baborage rarekaake cubu biname bine ecäremisi, ¹³ jejemisi egä, “Weene miiji biname bine jajanename egä, ‘Teeme abiberäja bägrä cina ciye seclige, teeme budrekaake ne ero ca becatisi, cine liba ute ge.’ ¹⁴ Siige Pilato liba ai poto cidi me ätecija je, cine te teebine miiji ngenecu me pa jaawenepesi. Weene nuuja singi lica gemi ngenecu mäpu äbitame.”

¹⁵ Awamuta biname cina rarekaake ewadimisi, jewenisi, teepi lipu jejemisi. Ai mene ne Israela biname cina ecenanenisi ngälu page pisi nyene.

Yeesu Aboclomtige Teeme Abiberäja Bägrä bime bau me

(Mareko 16:14-18; Luuka 24:36-49; Yoane 20:19-23; Apostolo 1:6-8)

¹⁶ Lebin abiberäja bägrä cina eclige podo cabu me Galilaya je, Yeesu liiyeme tejemumi teepi otnime. ¹⁷ Teepi liba teebine jepänisi, siige ngenecu miiji me äbitinisi, yepä poto cina toracarage lica jitrungisi, egä Yeesu sine. ¹⁸ Yeesu teeme gome tädige, jejemige egä, “Cebine iyeta kokre ituge ceera cabucewe je piiyepu gawecewe cabu. ¹⁹ Naaclege, iyeta maramara gawe biname bine jewenemepeye cäme abiberäja bägrä täápume. Niiye ca jicisäjemepeye Babe, Bägrä, Aceji Seemo teeme ngii cabu, ²⁰ piiyepu ebiberäjemepeye teepi ätecijame iyeta cane lui täápume itu jijananipene. Cane weene cama pagege iyeta padare ngälu ai padare me ngälugaabe me.” Mene ngälu peese.

MAREKO ME MIIJI MENE

Yoane Niiye ca Āciseja Biname

(Matayo 3:1-12; Luuka 3:1-18; Yoane 1:19-28)

¹ Ai lui Miiji Mene me agedna gyene Yeesu Keriso, Acejiyame me Bāgrā poto cidi me. ² Acejiyame me mename biname ngii Isaya yoogāruji, Acejiyame te teeme Bāgrā ne lipu jejuji egā,

“Cane căme mename biname ne cire tătēyepene määme niinäce gaabe me määme tääpume gaabe amacetnājame.

³ Tabe daapo taatu cewe cabu babo tagepogogo ca cire juicepi egā, ‘Gaabe ne emacetnājeye Yageyame tääpume, weeme mule bine conocāco jewenemeye teeme otni tääpume.’”

⁴ Isaya lui mene soogāruji, toraca me ābitige Yoane liba taboclomtige daapo taatu cewe cabu, biname bine niiye ca jicisājemige piyepu mene jejananemige egā, “Weene weeme niiya mule cabu ca atatrōngārīneye, cane piba weebibine niiye ca jicisājēninine, siige Acejiyame te weeme niiya mule bine piba pa yiisibrecmepi.” ⁵ Bucurage biname babo cewe Yerusalemā ca piyepu nuuja maramara cewe Yuudea probins ngalebora ca totnisi Yoane ne āteciyame. Teepi teeme niiya mule bine liba jewabudnājimisi, piba Yoane te teebibine niiye ca jicisājemige Yoridana baduge cabu.

⁶ Yoane me cāletāāpe lui kamela me ngāli ca wawenāneji ge piyepu tabe kamela tääpe ca wawenāneji baagi ca asigrāneji ge ibi cabu. Tabe sesi pana gwidape bine yāāngājimuge piyepu uri niiye bine yāānājimuge. ⁷ Tabe biname bine jejananemige egā, “Cāme ingwe ca lui biname te pa tādepi, tabe baborage gyene, cane matikāli gāne. Cane ibibi lica gāne teeme ernge gwidape sea iibirame. ⁸ Cane weebibine niiye ca jicisājēninine, yepā tabe te weebibine pagege Aceji Seemo ca āciseja.”

Yeesu me Niiye ca Āciseja piyepu Apicetnāra

(Matayo 3:13–4:11; Luuka 3:21-22; 4:1-13)

⁹ Yoane lui padare cabu biname bine mene jejananemige, Yeesu piba tādige babo cewe Nasareta cabu ca lui Galilaya probins ngalebora, siige Yoane te teebine niiye ca jicisājige Yoridana baduge cabu je. ¹⁰ Tabe liba niiye cabu ca tarpatige, tabe piba taatu jepānige, cabucewe te iitnige, cuta jepānige Aceji Seemo te lipu tainige gimāe ele pana teeme papa cabu me. ¹¹ Puma cita ca tagepogogo te cabucewe ca tādige egā, “Maane lui căme ngenecurage Bāgrā gāte. Cane baborage ngenecu miiji gāne määme tääpume.”

¹² Piba watata Acejiyame me Seemo te Yeesu ne jityepige daapo taatu cewe me. ¹³ Tabe puma enajige footi bimū cama, siige Satani te teebine puga epicetnerājige. Glunubora girigale gwidape cuta puga ge, yepā Acejiyame me mename seemo cina seclige teebine ātityerame.

Yeesu Poto Cibubade Biname bine Ala Tesoglecmige

(Matayo 4:12-22; Luuka 4:14-15; 5:1-11)

¹⁴ Yoane ne liba niinäce krokeciye mete bora me ecitisi, pui ingwe gaabe ca Yeesu piba ādige Galilaya probins cabu me, siige Acejiyame bau ca lui Miiji Mene, tabe puma jejananemige. ¹⁵ Tabe apu juicige egā, “Ingle Acejiyame te lui padare ne secituji, bii tatyaramtige, siige mameta gyene tabe biname bine waadena, peei name pi atatrōngārīneye weeme niiya mule cabu ca, Miiji Mene ne jitrungeye.”

¹⁶ Yeesu liba otnetnājige Galilaya sawa ligi ta, tabe jāāpānige nanigane wāsi bine ngii Simona piyepu Andrea. Teepi net bine yiisabājemāsi sawa cabu je, inge teepi cibubade biname ge. ¹⁷ Puma cita ca Yeesu jaajige egā, “Ayo, siclege cane cama otnime. Cane jiwēninine weebibine biname bine waadename căme bau me, epu pana weene lipu niinäce cibū bine tomlājēnanemumeye.” ¹⁸ Piba taatu teepi sebmalemāsi teeme net bine, siige Yeesu cama aaclige.

¹⁹ Teepi liba matikāli padare ujige, Yeesu cuta piba nuuja nanigane wāsi bine jāāpānige. Teepi lui Jebedayo me bāgrā ge, ngii Yakobu piyepu teeme igane Yoane. Teepi teeme poo cabu net bine iswārenemujāsi. ²⁰ Piba taatu Yeesu teebibine cuta ala taasoglicige. Teepi teeme babe Jebedayo piyepu teeme kaakesea bāgrā bine poo cabu sebmalemāsi, siige Yeesu cama aaclige.

Yeesu Niiya Cable ne Iyecrājige

(Luuka 4:31-37)

²¹ Yeesu teeme abiberāja bāgrā cama Kaprenauma cewe me atyaramtige. Nuuja Sabade cabu Yeesu abasecretna mete cabu me ādige, siige gije abacitige biname bine abiberājame.

²² Teepi mutäcäco äbitininisi teeme abiberäja mene name pi, ingle tabe epu ebiberäjimige, lui me conocäco pisi nyene abiberäjame lica cotre abiberäja biname bime pana, lui cina nuuja biname bime nyene atwanena bine yaawadäjemusü.

²³ Puma cita ca biname te tabacitige, lui me trupa ngalebora puga ge nüya cable. Tabe nüya ala abayige, jüicige egä, ²⁴ “Yeesu Nasareta ceweyame, maane nää singi ngena wawename cime täápume? Maane nää tädite cibibine sabe wawename? Cane umle gäne maane laasi näte, maane Acejiyame me conocäcorage Bägrä gäte.” ²⁵ Puma cita ca Yeesu nüya cable ne kokre cama jejige egä, “Maane bojä naagege. Tasati teeme trupa cabu ca!” ²⁶ Cable te teebine kokre cama itretnutige, nüya ala isatige, siige tasatige teeme trupa cabu ca. ²⁷ Iyeta biname cina mutäcäco äbitininisi, siige ätemläjimisü egä, “Ai lui baa ngena gyene? Nää kirece abiberäja gyene? Teeme conocäco pisi nyene nüyaniya cable bine mene jajanename, siige teepi jäatecijijsü teebine.” ²⁸ Teepi piba taatu Yeesu ne idre watata jecananisi Galilaya probins cabu iyeta poto ta.

*Yeesu Bucurage Biname bine Miiji me Jewenimige
(Matayo 8:14-17; Luuka 4:38-41)*

²⁹ Yeesu teeme abiberäja bägrä cama abasecretna mete ne ebmalisi. Cuta Yakobu naabi Yoane teta cama ge. Teepi eclige, ebäcnisi Simona Andrea naabime mete cabu me. ³⁰ Puga Simona me gite molyege gebale cama ätwitäneji ge, siige teepi piba taatu Yeesu ne umle jenenisi teeme poto cidi me. ³¹ Tabe teeme bau me ädige, ime gome jwoomlige, owejängtige. Gebale te teebine obma-lige, siige tabe teebibine mogobi jewenimige.

³² Pui mämliteca, bimu me äpula ingwe gaabe ca Yeesu bau me sewadimisi iyeta pita biname bine piyepu laati bage nüyaniya cable cama, ³³ pui name pi bucurage biname cina pui babo cewe cabu ca tabasecretnige pui mete gaabe gome me, Yeesu luma enajige. ³⁴ Yeesu miiji me jewenimige bucurage maramara pita cama biname bine piyepu bucurage nüyaniya cable bine iyecräjemige teeme trupa cabu ca. Tabe padare lica ecärimige nüyaniya cable cina mene iicemame teeme poto cidi me, ingle teepi umle ge, egä tabe laasi nyene.

*Yeesu Mene Jecananemige Galilaya Probins cabu je
(Luuka 4:42-44)*

³⁵ Nuuja bimu krokerage baani te liba camu ge äpli, Yeesu Simona naabibime mete ne ebmalige, taatu cewe me ädige, puma irecu ätumutige. ³⁶ Simona piyepu teta cama lui biname, teepi teebine jirngisi ngälu jepänisi, ³⁷ siige jejisi egä, “Iyeta biname cina meebine näärngenisü.” ³⁸ Yepä Yeesu jejemige egä, “Biiri naclege poto mametamameta cewe me cane cuta puma mene jajanename, ingle cane bucurage biname bime täápume tädujine ai gawecewe cabu me.” ³⁹ Puma cita ca tabe otnetnäjige iyeta Galilaya gawe cabu ta. Tabe lui cewe me läduge, tabe puma abasecretna mete cabu mene jaajemuge piyepu nüyaniya cable bine yääyecräjemuge.

*Yeesu Miiji me Jewenige Lepera Pita Biname ne
(Matayo 8:1-14; Luuka 5:12-16)*

⁴⁰ Yepä lepera pita biname te tädige Yeesu bau me, kokorare ca ääpednutige teeme opo gaabe je, ewejanige egä, “Maane liba singi gäte, maane miiji gäte cebine pita cäco me wawena.” ⁴¹ Yeesu babo owecu äbitige teeme täápume, siige ime uutige, joomlige, jejige egä, “Cane singi gäne. Maane pita cäco äbitil!” ⁴² Piba taatu lepera pita te teebine ebmalige, siige tabe miiji me äbitige. ⁴³ Yeesu teebine kokre cama umle mene jejige, piba ingwe ca jityepige teeme mete me. ⁴⁴ Tabe apu jejige egä, “Näatecijige, gone nuuja biname ne umle jaawenute ai poto cidi me, yepä maane conocäco ädepi iiwäreja biname bau me tabe määme tääpe ne awatnejame. Cuta Moose me Cotre ibi maane ecanepi teeme bau me cibu ne tabe pui ca Acejiyame ne iiwärejame biname cina piba umle äbitame, egä maane siige miiji gäte.” ⁴⁵ Yepä tabe liba ädige, tabe giye abacitige ai mule poto cidi me idre acenename iyeta poto ta, peei name pi Yeesu äblicäco ge otni nuuja cewe me biname bime irewale je. Miiji pätä tabe biname cäco cewe cabu yaanajuge, siige biname cina iyeta poto ca twaatninusi teeme bau me.

2

*Yeesu Miiji me Jewenige Tääpe Nuuja Poto Budre Biname ne
(Matayo 9:1-8; Luuka 5:17-26)*

¹ Nesae bimu ingwe gaabe ca Yeesu acenutige Kaprenauma cewe me, siige biname cina itecijemige, egä tabe mete cabu jage. ² Puma cita ca epu bucurage biname cina tabasecretnige teeme bau me, egä mete te tapanige, cuta nuuja puupu lica ge gaabe gome. Yeesu liba teebibine Acejiyame me mene jejemige, ³ piba fooa biname cina tatyarige,

waaku cabu pita biname ne secanisi, lui me nuuja poto tääpe budre ge. ⁴ Teepi äblicäco ge Yeesu mameta me otni bucurage biname name pi, peei name pi mete toro cabu me jegelisi, toro cabu bora ne jewenisi Yeesu me tuumeji, siige pui bora cabu ca waaku ne siyiniisi, pita biname te lui cabu ätwtäneji ge. ⁵ Yeesu liba jepänimige, egä teepi babo ätrunga cama gemi, tabe jejige pita biname ne egä, “Cäme biname, maane kälyä gäte mäame niyya mule cabu ca.”

⁶ Poto cotre abiberäja biname cina puga adnatäreji icrajige. Teepi ngene jotwaninisi egä, ⁷ “Ai biname te baa ngena name pi ai mene jiičenige? Tabe Acejiyame me ngii ne sabe jewenenige, inge nuuja te äblicäco gyene biname ne kälyä wawena teeme niyya mule cabu ca yepä Acejiyame taatu.” ⁸ Piba taatu Yeesu teeme ngenecu bora umle äbitige, teepi lipu ngene jotwaninisi, siige tabe jejemige egä, “Weene ngena name pi peei ngene jotwaniniyiye? ⁹ Lui gyene plowa iicana ai pita biname ne jajime egä, ‘Maane kälyä gäte mäame niyya mule cabu ca’ coo ‘Arpinanti, abujängti, mäame waaku ne ecati, siige äte ädi.’ ¹⁰ Yoo siige, cane lui Acejiyame bau ca tädujine biname me äbitujine, cane lui gwidape ne ama jewenenine, weene pui cabu ca opo nawatniniyiye, egä cäme conocäco pisi nyene biname ne kälyä wawenname teeme niyya mule cabu ca.” Puma cita ca tabe pui pita biname ne jejige egä, ¹¹ “Cane meebine naajenine, arpinanti, abujängti, waaku ne ecati, mäame mete me ädi.” ¹² Piba taatu tabe arpinantige, teeme waaku ne ecatige, asatige biname bime irewale je. Teepi mutäcäco äbitininiisi, Acejiyame ne eso ecärisi, jiiçisi egä, “Cine apu mule ne niinäce lica ituge päpäna.”

*Yeesu Leebi ne Ala Tesoglicige
(Matayo 9:9-13; Luuka 5:27-32)*

¹³ Yeesu cääri acnenutige Galilaya sawa ligi me. Bucurage biname cina teeme bau me seclige, siige tabe teebibine ebiberäjimige. ¹⁴ Puma cita ca tabe liba ädige, yepä täks rarekaake uutecrena biname ne jepänige ngii Leebi Alaba me bägrä. Tabe adnatäneji enajige täks rarekaake uutecrena mete cabu. Yeesu teebine jejige egä, “Maane tädi cane cama otnime.” Leebi abujängtige, teta cama ädige.

¹⁵ Ai mule ingwe gaabe ca Yeesu deedei äbitige Leebi me mete cabu. Puga ge cuta bucurage täks rarekaake uutecrena biname piyepu cotre atropengäja biname. Teepi Yeesu piyepu teeme abiberäja bägrä cama deedei erwäjisi. Ai lui cälu te äti lica gyene, inge bucurage biname cina iyeta padare cabu Yeesu cama waatni-nusi. ¹⁶ Puma cita ca cotre abiberäja biname, lui cina Parisea sigu biname gemi, teepi liba jepänisi, egä Yeesu deedei äbitige täks rarekaake uutecrena biname cama piyepu cotre atropengäja biname cama, teepi teeme abiberäja bägrä bine jejemisi egä, “Tabe baa ngena name pi pepu biname cama deedei erwäjimige?” ¹⁷ Yeesu liba ai mene iteciijige, tabe jejemige egä, “Lui biname cina miiji birige, teepi singi lica dokta täapume. Yepä lui cina pita cama birige, teepi singi dokta täapume. Cane lica tädujine ala asoglecame lui biname cina apu jaangemuge, egä teepi conocäco gemi; yepä cane conocono biname bine ala asoglecame tädujine.”

*Ätemleja Deedei Ärwäja cäco Lenaja poto cidi me
(Matayo 9:14-17; Luuka 5:33-39)*

¹⁸ Yepä padare cabu Yoane niyye ca äciseja biname me abiberäja bägrä piyepu Parisea sigu biname cina deedei ärwäja cäco icrajige Acejiyame ne awejename. Puma cita ca poto biname seclige Yeesu bau me, itemlisi egä, “Ngena name pi Yoane me abiberäja bägrä piyepu Parisea biname bime abiberäja bägrä cina deedei ärwäja cäco yaacrajuge, yepä mäame abiberäja bägrä cina deedei yäärwäjimusi?” ¹⁹ Yeesu jejemige egä, “Atejäclmuta soriyomu ne liba yaaclitusi, mamye rooriye me binamewale cina deedei ärwäja cäco lica yaacrajuge, tabe liba pisi nyene teta cama. ²⁰ Yepä padare te pa tädepi, liba mamye rooriye ne pa yaacatepesi, piba teepi deedei cäco pagege lenaja teeme owecu name pi.”

²¹ Yeesu cuta jejemige egä, “Nuuja te kirece äciseja cäco cäbletääpe pläsu ne sasa cäbletääpe bora cabu lica yäaswäruge. Tabe liba pepu jaawenuge, siige cäbletääpe ne liba jääcisäjuge, pui kirece pläsu te licalomluge, siige sasa cäbletääpe ne jääsegläruge. Puma cita ca kirece pläsu te läwälutuge sasa cäbletääpe cabu ca, siige bora te babo läbituge. ²² Piyepu nuuja te lica kirece waina niyye ne yaapaduruge gouti tääpe ca wawenäneji sasa ängära gwidape cabu. Tabe liba yaapaduruge, kirece waina niyye te pui sasa ängära gwidape ne yääpluge, inge tuutnecuge, siige waina niyye te gawe me lapaduruge piyepu ängära gwidape te sabe läbituge. Pätä kirece waina niyye miiji apadura kirece ängära gwidape cabu.” Ai neeneni ngene ca agli mene Yeesu naace popi jejemige, tabe singi biname cina umle äbitame, egä teepi liba singi Acejiyame me mule ne oomlaname, teepi piba äblicäco sasa saarewale bime mule bine äcwetna.

*Ätemleja Sabade Cotre poto cidi me
(Matayo 12:1-8; Luuka 6:1-5)*

²³ Sabade bimu cabu Yeesu teeme abiberäja bägrä cama wiiti calwacupi ngalebora lui gaabe, pui cabu ädige. Teepi liba eclige, abiberäja bägrä cina wiiti mope bine ecrecimisi, ime cabu mälwä bine jimlecäjemisi, kuu bine erwäjemisi. ²⁴ Puma cita ca Parisea sigu biname cina Yeesu ne jejisi egä, “Maane ire, määme abiberäja bägrä cina baa ngena name pi jewenenisi lui cotrerage gyene Sabade bimu cabu wawename?”

²⁵ Yeesu teebibine jejemige egä, “Egäsu weene ituge acnema, Daawida ngena jewenuji, tabe piyepu teta cama lui biname teepi liba cubrowe icrajuji deedei cäco. ²⁶ Tabe abacituji iiwäreja mete cabu. Puga ge Acejiyame täapume ceereji deedei. Puma cita ca iiwäreja mope biname ngii Abita pui deedei Daawida ne ecäruji. Tabe erwuji cuta ecärimuji teta cama lui biname bine. Ai lui Daawida te cotre ne jetropangtuji, ingle pui deedei loolo lui cotre ge iyeta biname bime täapume yepä lica iiwäreja biname bime täapume.” ²⁷ Puma cita ca Yeesu jejemige egä, “Acejiyame te biname bine niinäce jewenimuji, piba ecituji Sabade bimu ne teeme diibe oocaname. Tabe lica niinäce ecituji Sabade bimu ne, piba jewenimuji biname bine Sabade cotre bine äcwetname. ²⁸ Cane lui te Acejiyame bau ca tädujine biname me äbitujine, cane cuta Yageyame gäne Sabade bimu täapume. Cäme conocäco pisi nyene iicaname, ngena ne miiji wawena ai bimu cabu.”

3

*Biname Lui me Nuuja Poto Ime Duudemu Ge
(Matayo 12:9-14; Luuka 6:6-11)*

¹ Yeesu cääri abacitige abasecretna mete cabu me. Yepä biname puga ge, lui me nuuja poto ime duudemu ge. ² Poto biname cina puma iregalerage icrajige päpäname, egä Yeesu liba ai biname ne miiji jewenenige Sabade bimu cabu, ingle teepi singi ge ingle ne päpäname teebine aitname, egä tabe cotre ne bii jetropangtuge. ³ Yeesu pita biname ne jejige abujengtame niinäce gaabe me otnime, ⁴ piba biname bine itemlimige egä, “Mime cotre te lipu nijenininige Sabade bimu cabu ngena wawenname, miiji mule wawenname coo niya mule wawenname; biname ne ätityerame ireclota me coo teeme ireclota ne sabe wawenname?”

Yepä teepi nuuja mene lica ge. ⁵ Yeesu claabe cama teeme bau me ire acitige piyepu tabe ngenecu mäpu ge, ingle teepi owecu cäco ge pui biname täapume. Puma cita ca tabe teebine jejige egä, “Määme ime tuuti.” Tabe teeme ime uutige, siige cääri miiji me äbitige pui ime te. ⁶ Puma cita ca Parisea sigu biname cina äsecrärige, piba taatu abasecretnige Heroda me sigu biname cama, siige teepi mene jitranisi Yeesu ne budre me aglime.

Bucurage Biname Sawa Ligi je

⁷⁻⁸ Yeesu abiberäja bägrä cama ädige Galilaya sawa ligi me. Bucurage biname cina Galilaya probins cabu ca teebine ingwe icwisi. Bucurage biname cina cuta seclige babo cewe Yerusalema ca piyepu nuuja cewe cabu ca Yuudea probins ngalebora piyepu Idumea probins cabu ca cuta Yoridana baduge nuuja poto doru ca piyepu cewe maramara cabu ca, lui gemi Turo piyepu Sidona modamoda cewe mameta. Teepi naace name pi totninisi, ingle teepi ituge ätecija, Yeesu ngena mule bine tewenimumi. ⁹ Biname bucurage name pi Yeesu abiberäja bägrä bine jejemige poo te amacetnäjäneji lenajame teeme täapume tabe acenutame piba teepi teebine lica äjwejeräja. ¹⁰ Ingle tabe bucurage biname bine miiji me tewenanemumi, peei name pi iyeta pita biname cina lätyepecäjininusi Yeesu bau me teeme täape ne oomlaname. ¹¹ Lui biname bime trupa cabu niyaniya cable puga ge, teepi liba Yeesu ne jääpänusi, teepi teeme opo gaabe je yaatrametnemuge, ala labayaninusi egä, “Maane lui Acejiyame me Bägrä gäte.” ¹² Yepä Yeesu cable bine kokre cama jaajemuge egä, “Aitneja gone, egä cane laasi näne.”

*Yeesu Twelb Ätyepäneji Biname bine Jejäcrimige
(Matayo 10:1-4; Luuka 6:12-16)*

¹³ Yeesu puma cita ca podo cabu me jegelige, ala tesoglicmige, tabe lui biname täapume singi ge, teepi siige eclige teeme bau me. ¹⁴ Tabe twelb bine jejäcrimige teta cama otnetnejame piyepu tabe teebibine ingwe ca ätyepame Miiji Mene jajanenname ¹⁵ cuta niyaniya cable bine äyecrejame. ¹⁶ Age tema pui biname: Simona, Yeesu lui ne einige Peteru ca; ¹⁷ Yakobu piyepu teeme igane Yoane, Jebedayo me bägrä, Yeesu lui bine aainige Boargenes ca, peei lui egä, ‘Maadubi me bägrä’; ¹⁸ poto lui Andrea, Pilipo, Bartoloma, Matayo, Tooma, Yakobu Alapeus me bägrä, Tadeus, Simona Kanana sigu biname ¹⁹ piyepu Yuuda Isakariyota, lui te Yeesu ne budre me jewabuji.

*Yeesu piyepu Beelsebul, Satani ca Cuta Lui ne Einenisi**(Matayo 12:22-32; Luuka 11:14-23; 12:10)*

²⁰ Yeesu teeme mete me acnenutige. Cääri bucurage biname cina abasecretnige teeme bau me, peei name pi tabe teeme abiberäja bägrä cama padare lica ge deedei äbitame.

²¹ Yeesu me inglewale cina liba itecijemige ai poto cidi me, teepi eclige teebine oomlaname, ingle biname cina jiiicisi egä, "Tabe buduma te bii joomlige."

²² Poto cotre abiberäja biname lui cina Yerusalema ca itu seclumi, teepi apu jiiicisi egä, "Yeesu me trupa cabu pisi nyene niyya cable bime mopeyame ngii Beelsebul. Tabe teeme kokre ca niyya cable bine yääyecräjemuge." ²³ Puma cita ca Yeesu teebibine tesoglicmige, ngene ca agli mene ca jejemige egä, "Satani te baa lipu yääyecräjemuge niyya cable bine? ²⁴ Nuuja gawe biname cina liba labelaninusi teemeteme cubu me, teepi watawata lapirininusi. ²⁵ Cuta yepä ingle te liba labelanuge teemeteme cubu me, pui ingle te lica birige lenaja. ²⁶ Yepä pana gyene, Satani piyepu tabe lui bine yaawadimuge teepi liba labelaninusi teemeteme cubu me, teeme Satani me kokre te peega lapiruge, siige tabe yaatramuge. ²⁷ Pätä laati te liba singi birige kokre biname me mete me abacita teeme gwidape bine waadename, tabe miiji niinäce teebine ätäya. Piba tabe labacituge teeme mete me, yaawadimuge teeme ngena yaacrajuge puma.

²⁸ Cane toraca mene jijenininine: biname cina liba ljalija niyya mule bine jaawenimusi coo lipu bucurage niyyaniya mene jiiicemusi, teepi miiji gemi kälyä äbitame pui niyya cabu ca. ²⁹ Yepä laati te liba Aceji Seemo poto cidi me niyyaniya mene jiiicemuge, pui niyya cabu ca tabe kälyä lica läbituge, ingle pui lui iyeteta niyya gyene." ³⁰ Yeesu ai mene naace popi jiiicige, ingle poto biname cina lipu jiiicisi egä, "Teeme trupa ngalebora pisi nyene niyyarage cable. Pui te kokre yäcäruge tabe niyya cable bine äyecrejame." Teepi opo lica ewatnisi, egä Aceji Seemo name kokre gyene ai.

*Yeesu me Ingle Biname poto cidi me**(Matayo 12:46-50; Luuka 8:19-21)*

³¹ Yeesu me mage piyepu iganewale cina tatarige mete gome, Yeesu luma enajige. Teepi puutucu je jeclajutemige, mene jityepisi teeme bau me, egä teepi singi teebine päpäname.

³² Bucurage biname cina adnatäreji puga ge, Yeesu ne jewaclomtisi, siige teepi jejisi egä, "Eei, mäame mage piyepu iganewale ete nemä puutucu je. Teepi singi mäame tääpume."

³³ Yeesu jejemige egä, "Laatu nwene căme mage piyepu laati bemi căme naane igane?"

³⁴ Tabe piba ire acitanige biname bime cabu me, lui cina adnatäreji icrajige, teebine jewaclomtisi, siige jejemige egä, "Ire, age tema căme mage piyepu căme naane igane."

³⁵ Laati te liba Acejiyame me singi ne jaawenuge, tabe lui căme naane, căme igane, căme ngule, căme mage."

4*Ngene ca Agli Mene Kuu Gije Iisabeja poto cidi me**(Matayo 13:1-9; Luuka 8:4-8)*

¹ Yeesu cääri gije abacitige abiberäjame Galilaya sawa ligi je. Bucurage biname cina abasecretnige, teebine jewaclomtisi, tabe peei name pi poo cabu acenutige, adnatige, siige poo ne jityepäntisi. Biname cina sawa ligi je icrajimige. ² Yeesu teebibine ngene ca agli mene ca ebiberäjimige bucurage mule poto cidi me. Tabe apu jiiicige egä, ³ "Itecijinege! Yepä biname te ädige calwacupi me kuu gije bine iisabejame. ⁴ Egäcäro tabe kuu gije bine yiisabäjemige, poto cina gaabe cabu itrametnemige, siige ele cina seclige, erwäjimisi. ⁵ Poto kuu gije cina itrametnemige kula gawe cabu. Gawe puma pape gyene. Ingle gawe poone lica gyene, peei name pi gije cina watata tuupletnärige. ⁶ Yepä, bimü te liba nuunu täbitige, gije bine ebemimige, siige jedacromtemige, ingle teeme braju gawe ngalebora me lica ebäcnisi. ⁷ Cuta poto kuu gije cina itrametnemige pägepäge mete bora. Pägepäge cina uutinisi, gije bine jetäyemisi, siige kuu lica jepänimisi. ⁸ Yepä poto kuu gije cina itrametnemige miijirage gawe cabu, tuupletnärige, uutinisi, jeciretnemige, siige kuu jepänimisi. Poto cina lui jepänimisi teeti kuu, poto cina lui siksti kuu, poto cina lui yepä hanred kuu. ⁹ Weeme liba tablame piti nemi ätecijame, weene itecijinege umle äbitame."

*Agesa Ingle Yeesu Biname bine Yaabiberäjemuge Ngene ca Agli Mene ca**(Matayo 13:10-17; Luuka 8:9-10)*

¹⁰ Yeesu taatu liba enajige, poto lui cina teta cama waatne-tnäjinusi, teepi abiberäja bägrä cama seclige teeme bau me, siige itemlisi ngene ca agli mene ne aboclomtame. ¹¹ Yeesu jejemige egä, "Weeme bau me ituge aboclomta, Acejiyame te lipu biname bine waadana, yepä lui cina camu ge teeme mule oomlana, teeme bau me ngene ca agli mene taatu ituge iicema. ¹² Peei name pi toraca gyene, Acejiyame me mename biname lipu ituge iicana teeme poto cidi me egä,

‘Teepi puu jääpänusi cane ngena jaawenune,
yepä teepi umle lica ngena tääpu myene.
Cuta teepi puu yäätəcijemuge cane lui mene jicune,
yepä teepi opo lica yaawatnusi.

Peei name pi teepi lica tatatrongärininusi

Acejijame te teebibine kälyä wawename teeme niya mule cabu ca.’ ”

*Yeesu Ngene ca Agli Mene ne Eboclomtuge Kuu Gije Iisabeja poto cidi me
(Matayo 13:18-23; Luuka 8:11-15)*

¹³ Puma cita ca Yeesu teebibine jejemige egä, “Weene liba lica ngene ca begliye căme mene kuu gije iisabeja poto cidi me, weene cuta piba ngene ca lica peglemepeye poto ngene ca agli mene bine? Yoo siige, cane eboclomtenine. ¹⁴ Lui biname te kuu gije bine yiisabäjemuge, tabe Acejiyame me Mene jaajanemuge. ¹⁵ Lui kuu gije cina yaatrametnemuge gaabe cabu, pui lui eei biname bime pana gemi, lui cina mene liba yäätəcijemuge, piba Satani te täduge, yääsecräremuge pui mene bine. ¹⁶ Lui kuu gije cina yaatrametnemuge kula gawe cabu, pui lui eei biname bime pana gemi, lui cina liba Miiji Mene yäätəcijemuge, siige gege cama watata joomlusi. ¹⁷ Yepä teepi matikäli padare taatu jäätrungusi, ingle teepi epu pana braju căco gije liiyepu. Teepi liba mäpu ne jääpänusi coo teeme poto cidi me liba jicetnäjemusı, ingle teepi pui Miiji Mene ne jäätrungusi, teepi piba taatu teeme ätrunga bine yaabmalicmusı. ¹⁸ Lui kuu gije cina yaatrametnemuge pägepäge mete cabu, pui lui eei biname bime pana gemi, lui cina Miiji Mene yäätəcijemuge, ¹⁹ yepä mäpu ngene atwanena cina ai gawe ireclota poto cidi me cuta singi rarekaake piyepu poto gwıdape tääpume, teepi peeı Mene ne jäätäyusi pägepäge seeasea pana, siige kuu căco läbituge pui mene te. ²⁰ Lui kuu gije cina yaatrametnemuge miijirage gawe cabu, pui lui eei biname bime pana gemi, lui cina Miiji Mene yäätəcijemuge, opo yaawatnusi, siige teeme cabu kuu jaawenimuge, poto bime cabu teeti kuu, poto bime cabu siksti kuu, poto bime cabu yepä hanred kuu.”

*Ngene ca Agli Mene Lampa poto cidi me
(Luuka 8:16-18)*

²¹ Yeesu cuta nuuja ngene ca agli mene jejemige egä, “Biname te liba lampa ne jaabotuge, tabe diiba ca lica yäätrugäruge coo lica yaacıtuge dade lolebora me, yepä cabu je yaatecwantuge mete ne apaclyerame. ²² Cuta pepu gyene, page biname bime bau ca ngena ämlitäneji gyene, pajecu me pagege äbita teeme tääpume, piyepu page teepi lui mule umle lica gemi, teepi pagege umle äbita. ²³ Weeme liba tablame piti nemi ätecijame, weene itecijinege umle äbitame.”

²⁴ Yeesu cuta jejemige egä, “Weene ngena itecijinuge, weeme mope cabu eciteye. Weene luma ngälu yäacärımıye biname bine, weebibine cuta puma ngälu birige ceera, cuta poto cerämu weebibine birige ceera. ²⁵ Lui biname me umle pisi nyene, teebine cerämu ceera. Yepä lui biname umle căco gyene, ingle tabe singi lica gyene umle tääpume, Acejiyame te teeme bau ca pa yaacatepi, teeme lui matikäli umle pisi nyene.

Ngene ca Agli Mene Gije Uutana poto cidi me

²⁶ Yeesu jejemige egä, “Apu gyene, Acejiyame te liba biname bine yaawadımuge. Yepä biname te kuu gije bine yiisabäjemuge teeme calwacupi cabu. ²⁷ Tabe ciıye cabu ute waagruge, bimı cabu ireclota yaanajuge, cuta ciıye je waagruge. Peeı padare cabu gije cina täpletnäruge, siige luutinusi, yepä tabe umle lica birige, egä ai mule te lipu läbituge. ²⁸ Gawe te teemämu jaawenımuge gije bine uutaname, kuu wawename. Niınäce ingle cina luutinusi, puma cita ca mope, siige ingwe ca kuu cina täsuge mope cabu ca. ²⁹ Kuu cina liba ngade läbitininusi, tabe ingle bine jaacınımuge, ingle ärucna padare te bıı tatyaramtıge.”

*Ngene ca Agli Mene Mastad Kuu Gije poto cidi me
(Matayo 13:31-32, 34; Luuka 13:18-19)*

³⁰ Yeesu jejemige egä, “Mine ngena mule ca yaatonärusi Acejiyame te biname bine lipu waadena? Mine pui mule ne lipu ngene ca agli mene ca yaaboclomtusı? ³¹ Peeı lui epu pana gyene mastad kuu gije, lui te matikälırage iyeta poto kuu gije bau ca. Liba jaacnuge gawe ngalebora me, ³² täpletnutuge, luutuge, siige baborage läbituge iyeta calwacupi gije cabu ca. Tabe ulı pana jaaguge, modamoda ciıpe bine jaawenımuge, siige ele cina saacluge, mete bine pui uuwa cabu yaarangäjemusı.”

³³ Bucurage apu pana ngene ca agli mene ca Yeesu biname bine ebiberäjemige. Teepi luma ngälu ibi ge umle äbitame, tabe pui ibi jejananemige. ³⁴ Tabe biname bine ngene ca agli mene taatu ca jejananemige, yepä tabe liba teeme abiberäja bğrğ cama taatu enajige, tabe piba iyeta pui ngene ca agli mene bine eboclomäjımıge teeme bau me.

*Yeesu Sawa cabu Buuwe ne Jiıbigे
(Matayo 8:23-27; Luuka 8:22-25)*

³⁵ Pui bimū māmletēca Yeesu abiberāja bāgrā bine jejemige egā, “Biiri naclege, yuuresi sawa nuuja poto doro me.” ³⁶ Puma cita ca abiberāja bāgrā cina biname bine sebmālimisi, acetnārige poo cabu me, Yeesu luma enajige, siige teepi teta cama abyemārinisi. Nuuja poo cina teebibine ingwe icwemimisi. ³⁷ Puma cita ca kokre buuwe te titwige, uule kuu cina tacetnerājiminisi poo cabu me, siige poo te mameta ge niye ca apana. ³⁸ Yeesu lui waapo jage ute, mope pila papa cabu jage. Puma cita ca abiberāja bāgrā cina teebine elotnantisi, jejisi egā, “Abiberāja biname, maane nāā owecu lica gāte, egā mine mameta gemi abumetna?” ³⁹ Siige tabe abujāngtige, kokre cama buuwe ne jejige piyepu uule kuu bine jejemige egā, “Siige! Bojā jiginege!” Puma cita ca buuwe te ājutige, siige bulubulu mataru te enajige. ⁴⁰ Tabe jejemige egā, “Mijji lica gyene weene wālu ābita. Nāā, weene cāro camu gemi cebine ātrunga?” ⁴¹ Teepi mage wālu me ābitininisi, ātemlājiminisi egā, “Baa laasi nyene ai biname? Buuwe piyepu uule cina teeme mene jitecijiisi.”

5

Yeesu Mijji Jewenige Niija Cable cama Biname ne (Matayo 8:28-34; Luuka 8:26-39)

¹ Yeesu teeme abiberāja bāgrā cama yuurige Galilaya sawa nuuja poto doro me Gerasene gawe cabu me. ² Tabe liba poo cabu ca arpatige, tabe opopa eyige biname cama, lui tasatige kula waja cabu ca, budre biname bine luma gape yaacranimusi. Pui biname me trupa ngalebora puga ge niyarage cable, ³ siige tabe kula waja cabu lui gape gemi, pui cabu yaanajuge. Nuuja te āblicāco ge teebine seea ca ātāya. ⁴ Bucurage gāābu teeme ernge piyepu ime ituge ātāya ayana ca piyepu seea ca, yepā iyeta padare cabu tabe seea bine jiweclimuge, ayana bine yaagabimuge. Nuuja te kokre lica ge teebine iibaname. ⁵ Tabe iyeta padare, ciye bimū, kula waja gape cabu ta piyepu podo cabu ta diibe cāco waatnetnājuge. Tabe niija ala yaasatuge, kula ca dācu lācāranuge.

⁶ Tabe cudecewe pana ge, Yeesu ne liba jepānige, siige uuwamige teeme bau me, teeme opo gaabe je kokorare ca āāpednu-tige. ⁷⁻⁸ Yeesu jejige egā, “Niija cable, ai biname cabu ca tasati!” Tabe babo ala abayige egā, “Yeesu, caburage Acejiyame me Bāgrā, maane singi ngenō māte cāme tāāpume? Cane Acejiyame me ngii cabu naawejanenine, gone sabe nawenute cebine.” ⁹ Yeesu itemlige egā, “Maane ngii laasi nāte?” Tabe jejige egā, “Cane ngii lui Sange gāne, inge cine bucurage gemi.” ¹⁰ Tabe Yeesu ne ewejanige egā, tabe teebibine lica yāāyercājemuge peei gawe cabu ca.

¹¹ Baborage ngeerangera blome tomi puga ge teeme mameta, podo wajwa cabu deedei tāāpume yuunguretnājemisi. ¹² Siige niija cable cina Yeesu ne ewejanisi egā, “Cibibine nityepini blome bime trupa bora ābācname,” ¹³ siige Yeesu jejemige teepi otnime. Puma cita ca niija cable cina tāāsecrāige pui biname me trupa cabu ca, siige blome bime trupa cabu me ebācnisi. Pui blome tomi lui neeneni tausen pana ge, podo wajwa ta uuwamitnige, sawa cabu me uupletnārige, siige abumetnige.

¹⁴ Blome ire atwi biname cina uucratnige, idre ecenanisi babo cewe cabu me piyepu teeme gome lui poto cewe piti nemi. Biname cina eclige pāpāname, egā ngena te bāpletnutige. ¹⁵ Teepi liba atyarige Yeesu bau me, teepi jepānisi biname ne, lui te niināce niija cable bine sewadenanemumi. Tabe puga ge adnatāneji, cābletāāpe asigrāneji ge, mūjirage ngenē atwanena cama ge, siige teepi wālu me ābitininisi. ¹⁶ Lui cina jepānisi ai mule ne, teepi biname bine jejananemisi, ngena te bāpletnutige niija cable cama biname tāāpume piyepu blome bime tāāpume. ¹⁷ Siige teepi Yeesu ne jejisi teeme gawe ne abmalame.

¹⁸ Yeesu liba biiri poo cabu me acenutige, niija cable cina lui biname ne secenenanumesi, tabe Yeesu ne jejige teta cama otnime. ¹⁹ Yepā Yeesu ābwāricige, jejige egā, “Acnenuti māāme binamewale bime bau me, jejemepi, māāme Yageyame te ngena mijji bii naawenute piyepu tabe lipu owecu ge māāme tāāpume.” ²⁰ Pui biname te siige abyemārige, Ten Modamoda Cewe gawe cabu ta otnetnājige, jejananemige, Yeesu ngena ituge wawena teeme tāāpume. Iyeta biname cina mutācāco ābitininisi.

Yairus me Ngulebāgrā piyepu Pita cama Magebi (Matayo 9:18-26; Luuka 8:40-56)

²¹ Yeesu sawa ne yuurige, poo cabu ca arpatige, siige bucurage biname cina teeme bau me tabasecretnige, teebine jewaclomtisi sawa ligi je. ²² Yepā rooriye te cuta tādige ngii Yairus, lui yepā babo biname gyene pui cewe me abasecretna mete tāāpume. Tabe Yeesu ne liba jepānige, ajarige teeme opo gaabe ernge gome, ²³ ewejanige egā, “Cāme matikāli bāgrā budre mameta gwene. Tādi māāme ime acitame teeme papa cabu me teebine mijji wawename, siige tabe piba ireclota ne jepāninige.”

²⁴ Puma cita ca Yeesu teta cama ädige. Bucurage biname cina teebine ingwe icwisi, siige jidudnecäjisi iyeta poto ta. ²⁵ Puga ge cuta yepä magebi, lui te uudi apira pita cama ge twelb kämäge ngalebora. ²⁶ Tabe magerage mäpu cabu waanajenanepi, liba maramara dokta bime bau me waatnanepi. Tabe puu iyeta teeme rarekaake bine yaaswemepi dokta bime bau me, yepä teepi äblicäco ge teebine ätityera, yepä teeme pita te baborage me läbitepi. ²⁷⁻²⁸ Tabe Yeesu poto cidi me ituge ätecija, siige ngene jotwanige egä, “Cane liba teeme cäbletääpe taatu joomlenine, cane pama miiji äbitenine.” Puma cita ca tabe biname bime sobe cabu oclige Yeesu me kaake poto cidi ca, ²⁹ teeme cäbletääpe ne joomlige, siige pita te piba taatu apirige. Tabe asicnantige egä, “Cane miiji bäbitine!” ³⁰ Yepä Yeesu piba taatu umle äbitige, egä kokre te basatige teeme cabu ca. Tabe biname bime sobe cabu atatrongtige, jejemige egä, “Cäme cäbletääpe ne laati te bii noomli-ge?” ³¹ Teeme abiberäja bägrä cina jejisi egä, “Maane jepänenemite biname cina lipu näädudnecäjini, pei name pi maane ngeno me pepu nijinite, egä laati te cäme cäbletääpe noomlige.” ³² Yepä Yeesu ire acitanige biname bime bau me umle äbitame, egä laati te cebine bii noomlige. ³³ Siige pui magebi, lui te umle ge Yeesu ngena jebenige teeme täapume, tabe wälu piyepu aloneca cama toclige Yeesu bau me. Tabe teeme opo gaabe je ernge gawe me ajarige, jejige iyeta ngena cina bäbitinini teeme täapume. ³⁴ Yeesu jojige egä, “Bägrä, mäame ätrunga te meebine miiji bii naawenige. Äte, maane ocli ngenecu poode cama. Mäame pita te ingwe ca meebine lica pa noomlepi.”

³⁵ Yeesu liba magebi cama camu mene iicema cabu, Yairus me mete cabu ca mene secanisi teeme bau me egä, “Mäame bägrä siige budre gwene. Maane ngeno me cerämu jewagrijenite abiberäja biname ne maane cama otnime.” ³⁶ Yeesu liba itecijige, tabe Yairus ne jejige egä, “Wälu gone, miiji ätrunga taatu.” ³⁷ Siige puma cita ca tabe ädige teeme mete me. Tabe nuuja biname ne padare lica ecärige teta cama otnime yepä Peteru piyepu Yakobu teeme igane Yoane cama. ³⁸ Teepi liba atyarige, Yeesu jepänige, biname cina lipu papa me äbitinini, ele jolwisi. ³⁹ Tabe mete cabu abacitige, biname bine jejemige egä, “Weene ngena guugla gemi? Weene ngena ele gemi? Bägrä budre lica gwene, tabe ute gwene.” ⁴⁰ Yepä teepi Yeesu ne ngange ecwänisi, siige tabe teebibine puutucu me isemige. Piba tabe abacitige bägrä me mage, babe piyepu teeme nesae abiberäja bägrä cama puupu cabu me, bägrä luma ätwitäneji ge. ⁴¹ Tabe ime gome jwoomlige, jojige egä, “Talita kuum,” lui egä, “Matikäli ngulebägrä, arpinanti!” ⁴² Tabe piba taatu arpinantige, siige giye abacitige otnetnejame. Tabe lui twelb kämäge ge. Lui cina ai mule ne jepänisi, teepi mutäcäco äbitinini. ⁴³ Yeesu kokre cama mene jejemige egä, “Gone biname bine jaajanemuye ai poto cidi me,” yepä tabe jejemige bägrä ne deedei ceerame.

6

Yeesu ne Nasareta Cewe je Jigyisi (Matayo 13:53-58; Luuka 4:16-30)

¹ Yeesu teeme abiberäja bägrä cama pui cewe ne sebmalige, teemerge cewe me tac-nenutige. ² Sabade bimu cabu tabe giye abacitige abiberäjame abasecretna mete cabu. Bucurage biname puga ge teeme mene itecijemige. Teepi mutäcäco äbitinini, jüicisi egä, “Ai biname te luga tabiberäjumi iyeta ai? Tabe luma cita ca ai mule ne secatumi? Tabe lipulipu kokre cama mule bine jewenenemige?” ³ Egäsu tabe pui mete raranga biname gyene, Mariya me bägrä, Yakobu Yoose Yuuda Simona naabibime naane gyene. Teeme ngulewale aga icrajenanemige mine cama.” Puma cita ca teepi teebine jigysi. ⁴ Yeesu teebibine jejemige egä, “Acejiyame me mename biname ne yaacatusi iyeta poto ta, yepä lica teemerge cewe cabu je, teemerge inglewale cina piyepu teeme mete biname cina.” ⁵ Tabe puu teeme ime aacitige nesae biname bime papa cabu me, siige teebibine miiji me jewenimige, yepä tabe bucurage ciitaca mule äblicäco ge wawena puma, ingle biname cina ätrunga cäco ge. ⁶ Tabe mutäcäco ge teeme ätrunga cäco mule name pi.

Yeesu Teeme Twelb Abiberäja Bägrä bine Jityepäjemige (Matayo 10:5-15; Luuka 9:1-6)

Puma cita ca Yeesu otnetnäjige mameta cewe gaabegabe ta, biname bine ebiberäjimige. ⁷ Tabe pui twelb abiberäja bägrä bine tesoglicmige, neeneni neeneni jityepäjemige kaakesea wawename. Tabe kokre ecärimige niya cable bine äyecrejame, ⁸ piyepu jejemige egä, “Weeme otnetneja cabu je weene nuuja gwidape bine gone yaawadimuye yepä otnetneja suru taatu bine. Gone yaawadimuye deedei coo diiba coo rarekaake. ⁹ Weene ernge gwidape asigräripeye, yepä gone yaawadimuye tuwängle cäbletääpe.” ¹⁰ Tabe cuta jejemige egä, “Weene liba lui cewe me naacluge, inajininuge biname cama, lui cina iwadininusi teeme mete me, ngälu weene pui cewe ne liba saabmaluye. ¹¹ Yepä lui cewe cabu biname cina liba weebibine lica jiwablininusi coo lica jitecijinusi, teeme tuuwe bine jäägklubäjemuye

weeme ernge cabu ca, siige saabmaluye pui cewe ne. Teepi ai cabu ca umle läbitininusi, egä teepi pagege niya daremu ne päpäna.”

¹² Siige puma cita ca abiberäja bägrä cina otnetnäjiniisi, biname bine jejananemisi, egä teepi miiji teeme niya mule cabu ca atatröngärame. ¹³ Teepi bucurage niya cable bine iyecräjemisi biname bime trupa cabu ca piyepu pita biname bine oil ca eganimisi, siige teepi miiji äbitininisi.

*Yoane Niiye ca Äciseja Biname me Budre
(Matayo 14:1-12; Luuka 9:7-9)*

¹⁴ Galilaya probins mope biname Heroda te itecijige Yeesu poto cidi me, ingle teeme ngii babo äbitige. Poto biname cina jicisi egä, “Yeesu lui Yoane niiye ca äciseja biname sine. Acejiyame te teebine budre cabu ca yaarpinantepi, pui name pi teeme kokre pisi nyene ciitaca mule bine wawenecame.” ¹⁵ Poto cina jicisi egä, “Tabe lui Eliya sine,” poto cina egä, “Tabe lui Acejiyame me yepä mename biname gyene, epu pana teeme sasa mename biname cina liiyepu.” ¹⁶ Yepä Heroda liba itecijige Yeesu poto cidi me, tabe jicige egä, “Tabe Yoane sine, cane lui täápume jaajemepene mope äläcnutame. Tabe te tacnenutumii ireclota me.”

¹⁷⁻¹⁸ Heroda apu jicige, ingle tabe teeme igane Pilipo me coga Herodiyas ne itu waacatepi. Yoane Heroda ne itu jaaananepi egä, “Peei lui conocono gyene maane mäáme igane me coga uutecra.” Puma cita ca Herodiyas te Heroda ne jaajepi Yoane ne oomlaname, sea ca ätäyame, krokeciye mete cabu me acitame, siige Heroda te teeme singi ibi jaawenepi. ¹⁹ Herodiyas Yoane ne jäämugetnepi teeme mene name pi. Tabe singi ge teebine budre me acitame, yepä tabe äblicäco ge Heroda name pi. ²⁰ Heroda lui wälu ge Yoane täápume, ingle tabe opo yaawatnepi, egä Yoane lui miijirage conocäco biname gyene, tabe siige cängenarage ire jaatwepi. Tabe singi ge teeme mene ätecijame, ngänuge tabe puu ngenecu mäpu me läbitanuge, tabe liba jäätecijanuge.

²¹ Siige Herodiyas te miiji padare ne jääpänepi, Heroda liba soriyomu ne jaawenepi teeme ärngi bimu täápume. Tabe ala taasoglecmepi teeme ingwe gaabe ca lui modamoda biname bine, cubu mope biname bine piyepu nuuja Galilaya ngii biname bine. ²² Teepi liba deedei cabu jage, Herodiyas me beecma bägrä te piba tabacitige, giire jewäjige, siige Heroda piyepu soriyomu biname bime ngenecu gege jewenimige. Heroda ngulebägrä ne jojige egä, “Naji, maane singi ngeni mäte? Cane nääcärenine. ²³ Cane Acejiyame me ngii cabu naajenine, egä maane liba ngena täápume nätinärenite, cane nääcärenine, ngänu gyene puu cäme gawe cebocebo.”

²⁴ Puma cita ca ngulebägrä te oclige mage ne ätemlame egä, “Cane ngena täápume itinärenine?” Mage te jojige egä, “Jejepi Yoane niiye ca äciseja biname me mope täápume.” ²⁵ Ngulebägrä te piba taatu acenutige Heroda bau me, jejige egä, “Cane singi gäne maane cebine watata ceerame Yoane niiye ca äciseja biname me mope. Pleito cabu secanepi cäme bau me päpäna täápume egä tabe budre.” ²⁶ Ai mene te puu Heroda ne ngenecu mäpu me jewenige, yepä tabe äblicäco ge ngulebägrä me singi ne kaake me wawename, ingle tabe lui mene jojige soriyomu biname bime opo gaabe je. ²⁷ Siige tabe piba taatu yepä awamuta biname ne jityepige Yoane me mope ne äläcnutame, acaname. Awamuta biname te ädige krokeciye mete me, Yoane me mope ne jeläcnutige, ²⁸ pleito cabu secanige soriyomu puupu cabu me, siige ngulebägrä ne ocärige. Ngulebägrä te ocärige teeme mage ne. ²⁹ Yoane me abiberäja bägrä cina liba itecijemige ai poto cidi me, teepi seclige, teeme budrekaake ne ecatisi, siige gape cabu me ecitisi.

*Yeesu Faib Tausen Biname bine Engärimige
(Matayo 14:13-21; Luuka 9:10-17; Yoane 6:1-14)*

³⁰ Yeesu me ätyepäneji biname cina täcnärige teeme bau me, jejisi, iyeta teepi ngena ituge wawena piyepu abiberäja. ³¹ Puma cita ca Yeesu teebibine jejemige egä, “Mine min taatu naclege taatu cewe me. Weene puma matikolä padare ngeni pocineye.” Tabe apu naace popi jejemige, ingle bucurage biname cina iyeta padare cabu teeme bau me twaatininusi, peei name pi tabe teeme abiberäja bägrä cama padare lica ge deedei äbitame. ³² Siige teepi taatu eclige poo gaabe biname cäco cewe me.

³³ Yepä bucurage biname cina jepänimisi, teepi liba abyemärinisi, siige teepi opo ewatnimisi teebibine. Puma cita ca teepi iyeta maramara cewe cabu ca ernge ta uuwamitnige, niinäce puupu ne joomlisi, Yeesu lui puupu cabu me teeme abiberäja bägrä cama ädige. ³⁴ Teepi liba atyarige, Yeesu poo cabu ca arpatige, siige baborage biname tomi ne edärige. Tabe baborage owecu jeglemige teebibine, ingle teepi epu pana icrajige maamoi liiyepu, lui bime ire atwi biname lica gyene. Siige tabe gije abacitige teebibine abiberäjame bucurage mule poto cidi me.

³⁵ Liba mämle bimu me äbitige, abiberäja bägrä cina seclige Yeesu bau me, jejisi egä, “Siige mämle gyene, cuta ai lui biname cäco cewe gyene, ³⁶ peei name pi ai biname bine jityepimi mameta calwacupi cewe me piyepu maramara cewe me teepi deedei aletname.” ³⁷ Yepä Yeesu jejemige egä, “Weene te deedei ecäremeye teeme loolo me.” Teepi itemlisi egä, “Cije cine lipulipu teebibine engärenemisi? Mine liba singi gemi teebibine ngeerame, mine miiji neeneni hanred silba rarekaake ca deedei aletna.” ³⁸ Yeesu itemlimige egä, “Weeme lija buluduu gemi? Äte, naaclege päpäname!” Teepi jepänimisi, jejisi egä, “Cime faib buluduu gemi piyepu neeneni cibi bumate gegi.”

³⁹ Yeesu puma cita ca abiberäja bägrä bine jejemige biname bine abelename maramara tomi wawenome siige adnaterame baace cabu, ⁴⁰ siige teepi maramara tomi cabu adnatäriige. Poto tomi lui fifiti biname ge, poto cerämu ngälu yepä hanred oomlaname. ⁴¹ Puma cita ca Yeesu pui faib buluduu bine sewadimige neeneni cibi cama, cabu me ire acitige, Acejiyame ne eso ecäriige, itrecimige, siige abiberäja bägrä bine ecärimige biname bine ceeraname. Tabe cuta pui neeneni cibi bine jaabelanige biname bine ceeraname. ⁴² Teepi erwäjimisi, ngene jeglemige. ⁴³ Abiberäja bägrä cina etomlicimisi lui deedei cibi cina cebo abamutinisi, jengärimisi, siige twelb diiba cina tapanininisi. ⁴⁴ Lui rooriye cina erwäjimisi, teepi faib tausen ge.

Yeesu Niye papa cabu Otnige

(Matayo 14:22-33; Yoane 6:15-21)

⁴⁵ Piba taatu Yeesu abiberäja bägrä bine jejemige poo cabu acetnerame teeme niinäce gaabe otnime sawa nuuja poto doru me uuraname Betesaida cewe me, piba tabe pui padare cabu biname bine jityepäjemige. ⁴⁶ Yeesu liba biname bine yewo jewenanemige, pui ingwe gaabe ca tabe ädige podo cabu me irecu ätumutame. ⁴⁷ Liba ciye tumlige, poo lui sawa cunäcäpu jage, Yeesu teeme taatu doru cabu jage. ⁴⁸ Tabe liba jepänige, egä teeme abiberäja bägrä cina niyya ne bii jepänisi poo äwäca cabu, ingle buuwe te opoporage tipwäjige, tabe sewali mameta me teeme bau me ädige niyye papa cabu ta. Tabe singi ge teebibine äsuplengame, ⁴⁹ yepä abiberäja bägrä cina teebine jepänisi niyye papa cabu otni je. Teepi apu jengemige, egä dadrange ge, siige teepi niyya ala abayininisi. ⁵⁰ Teepi iyeta teebine jepänisi, siige babo wälu me äbitininisi.

Puma cita ca Yeesu teebibine jejemige egä, “Wälu gone läbitininuye. Cane säne.” ⁵¹ Puma cita ca tabe poo cabu acenutige, siige buuwe te äjutige. Abiberäja bägrä cina mutäcäco äbitininisi temiji pi. ⁵² Teepi puu jepänisi, Yeesu buluduu piyepu cibi bine bucurage me lipu jewenimige, yepä teepi opo lica ewatnisi teeme kokre ne, ingle teeme ngene atwanena tuuberage ge.

Yeesu Pita Biname bine Miiji Jewenimige Genesareta Gawe cabu

(Matayo 14:34-36)

⁵³ Yeesu teeme abiberäja bägrä cama sawa ne yuurige, atyaramtige Genesareta gawe cabu me, siige poo te puma ipyige. ⁵⁴ Teepi liba poo cabu ca ärpige, biname cina Yeesu ne piba taatu opo ewatnisi, ⁵⁵ siige uuwamitnige, cewe gaabegabe ta idre ecenanisi. Biname cina liba itecijemige, egä Yeesu luci yene, teepi siige pita biname bine piyyeme waaku cabu ewadanemisi. ⁵⁶ Iyeta poto ta Yeesu luma waatnetnäjuge: modamoda cewe, matimati cewe piyepu calwacupi cewe cabu ta, puupu luma pajecu ge, piyyeme pita biname bine yaawadanemusi. Teepi Yeesu ne yaawejanusu pita biname cina teeme cäbletäepe pepyämu taatu oomlaname. Iyeta lui cina joomläjusi, miiji läbitininisi.

7

Saarewale bime Abiberäja

(Matayo 15:1-9)

¹ Parisea sigu biname piyepu Yerusalema ca lui poto cotre abiberäja biname cina seclumi, teepi abasecretnige Yeesu bau me. ²⁻³ Teepi jepänisi, egä teeme abiberäja bägrä cina ime äciseja cäco deedei erwäjemisi. Teepi peei lui saarewale bime mule ne lica jaawenusu Parisea biname piyepu nuuja Israela biname bime pana, lui cina deedei lica loolo, teepi liba conocäcorage mule ca niinäce ime lica lääcisäjimusi cude gwidape cabu ca kälyä äbitame. ⁴ Cuta teepi liba täcnärüge aletna puupu cabu ca deedei cama, teepi pui deedei lica yäärwäjimusi, liba niinäce lica jääcisäjemusi. Piti nemi cuta bucurage poto saarewale bime mule, teepi lui bine jaawenimusi, naace teepi lipu conocäcorage mule ca jääcisäjemusi kaapo, pani, piyepu lijaliya ängära gwidape bine cuta piyepu ute gwidape bine.

⁵ Siige pui Parisea biname piyepu cotre abiberäja biname cina Yeesu ne itemlisi egä, “Ngena name pi mäame abiberäja bägrä cina saarewale bime mule bine lica yääcwetnimusi,

yepä teepi äciseja cäco ime ca deedei loolo?" ⁶ Yeesu jejemige egä, "Toraca gyene, mename biname Isaya lui niinäce gaabe mene jücuji weeme poto cidi me. Weene walya biname gemi, tabe lipu soogäruji egä,

'Ai biname cina cebine, lui Acejiyame gäne, teeme tage müipe ca nawepyeräjusi, yepä teeme ngene atwanena cudecewera ge gyene cäme bau ca.

⁷ Nuuja müiji lica gyene teepi cebine opo gaabe me acitame, ingle teepi biname bine yaabiberäjimusi cotre bine äcwetname, lui cäme cotre lica gemi.' "

⁸ Yeesu cuta jejemige egä, "Weene läbwäricinuye wawenecame, Acejiyame te ngena jjiinuge, yepä weene saarewale bime mule bine jaawenimuye. ⁹ Weene mage umle gemi Acejiyame me Mene ägyi saarewale bime mule bine cängenarage äcwetname. ¹⁰ Moose te jücuji egä, 'Weene müiji mage babe bine opo gaabe me acita,' piyepu egä, 'Laati te liba teeme mage babe poto cidi me niiyarage mene jücemuge, teebine müiji budre me acita.' ¹¹ Yepä weene te yaabiberäjimuye, egä laati te liba teeme mage babe bine jaajuge egä, 'Cane äblicäco gäne weebibine ätityera, ingle cane lui gwidape ca ätityerame weebibine, cane itu scitumene Acejiyame täápume,' ¹² siige tabe kälyä läbituge teeme mage babe bine ätityera cabu ca. ¹³ Weene Acejiyame me Mene ne kaake me jaawenuye saarewale bime mule ca, weene lui yaabiberäjimuye. Piti nemi bucurage apu pana mule, weene lui bine jaawenimuye."

Lui Gwidape cina Biname ne Niya me Jaawenusi
(Matayo 15:10-20)

¹⁴ Yeesu biname bine cääri tesoglicmige teeme bau me, jejemige egä, "Weene iyeta cebine nätecijeye, umle äbitinneye. ¹⁵ Lui gwidape te labacituge biname me trupa ngalebora me, pui te äblicäco gyene teebine niya me wawename. Yepä lui te tasatuge teeme ngenecu cabu ca, pui te teebine niya me jaawenuge. ¹⁶ Weeme liba tablame piti nemi ätecijame, weene itecijinege."

¹⁷ Puma cita ca Yeesu biname bine sebmalmige, mete me abacitige. Puma teeme abiberäja bägrä cina teebine itemlisi pui ngene ca agli mene ne aboclomtame. ¹⁸ Yeesu jejemige egä, "Baa weene cuta umle lica gemi! Weene nää lica jepäneniye, egä ngena te labacituge biname me trupa cabu me, peei te äblicäco teebine niya me wawename, ¹⁹ ingle lica labacituge teeme ngenecu bora me yepä teeme came cabu me, siige ingwe ca tasatuge teeme cabu ca." Ai iicema cabu Yeesu jüicige, egä nuuja deedei cibu cude lica gemi.

²⁰ Puma cita ca tabe jüicige egä, "Lui te tasatuge biname ne ngalebora ca, peei te teebine niya me jaawenuge. ²¹ Ngalebora ca, biname me ngenecu bora ca saacluge niiyarage ngene atwanena cina. Puma cita ca cuta saacluge singi sargi ero mule wawename, singi gwidape ero me, budre me aglime, ²² mule wawename biname cama lui te teeme coga coo rooriye lica birige. Ngenecu bora ca cuta saacluge gwidape singisingi cina, piyepu singi nuuja maramara niya mule bine wawenetnäjame, angletnejame, ajiri cama mule wawename, ire patre aglime, niyaniya mene iicetnejame, teemämu awepyeräjame, budubuduma mule wawenecame. ²³ Iyeta ai niya singisingi cina, lui ngalebora ca saacluge, biname ne niya me jaawenusi."

Yepä Magebi me Ätrunga
(Matayo 15:21-28)

²⁴ Puma cita ca Yeesu abyemärige, ädige babo cewe Turo gawe cabu me. Tabe yepä mete cabu me abacitige, siige tabe singi lica ge nuuja biname te umle äbitame, egä tabe pisi nyene mete cabu, yepä tabe äblicäco ge ämlitäneji lenaja. ²⁵ Yepä magebi, lui me ngulebägrä niya cable cama ge, liba utecijige Yeesu poto cidi me, tabe piba taatu teeme bau me toclige, siige ajarige teeme opo gaabe je ernge gome. ²⁶ Ai magebi lui Israela biname lica gwene, tabe Griik menyame magebi gwene. Tabe Poenikiya babo cewe je aplimlujü Suriya gawe cabu je. Siige tabe Yeesu ne ewejanige niya cable ne asatame teeme bägrä me trupa cabu ca. ²⁷ Yepä Yeesu ngene ca agli mene ca jojige egä, "Müiji niinäce bägrä bine deedei ceera. Niya gyene teeme deedei acata, drego plongo bime täápume iisaba."

²⁸ Magebi te Yeesu ne teeme ngene ca agli mene jewecnistige, jejige egä, "Toraca babo biname, yepä dade gawe me lui drego plongo cina läwtitaninusi, teepi yäärwäjimusi pläpupläpu bine, bägrä bime bau ca lui cina saatrametnemuge." ²⁹ Yeesu jojige egä, "Maane müijirage mene ca nawecnistite. Äte ocli mete me. Niya cable te bii tasatige mäame bägrä me trupa cabu ca." ³⁰ Magebi te acnenutige teeme mete me, puma bägrä ne jopänige ätwitäneji ge ute puupu cabu, siige umle äbitige, egä cable te bii basatige.

Yeesu Mene Iicema cäco Tablame Buduma Biname ne Müiji Jewenige

³¹ Yeesu ebmalige babo cewe Turo gawe ne, Sidona babo cewe ta ädige piyepu Ten Modamoda Cewe gawe cabu ta, ngälu Galilaya sawa ne joomlige. ³² Puma teeme bau me

ecanisi tablama buduma biname ne, lui te mene cängena lica jücemuge. Teepe Yeesu ne ewejanisi teeme tääpe ne oomlaname.³³ Yeesu teebine ecatige biname bime sobe cabu ca, taatu cewe me ecanige. Puma tabe teeme ime kukluta aacitige teeme tablama bora me, piba mote eclemutige teeme ime kukluta cabu me, siige joomlige teeme wätä ne.³⁴ Piba tabe ire acitige cabu me, ngenecu mäpu äbitige owecu name pi, siige jejige Aramea mene ca egä, “Epata” lui egä, “Iitneye”.

³⁵ Piba taatu teeme tablama cina iitnäsi, siige tabe cängenarage mene itecijige piyepu teeme wätä te apinicige, tabe siige piba mene cängena jücemuge.³⁶ Puma cita ca Yeesu biname bine jejemige, egä teepi gone ai poto cidi me mene jajanena. Ngänuge, tabe puu jüibanemige, yepä teepi jejananemisi.³⁷ Siige iyeta biname cina mutäcäco äbitinisi, jüicisi egä, “Iyeta mule tabe lui itu tewenetnäjimumi, babo miijirage gemi. Tabe cuta tablama buduma biname bine jaawenimuge mene ätecijame piyepu mene iicema cäco biname bine jaawenimuge mene iicemame.”

8

Yeesu Foa Tausen Biname bine Engärimige (Matayo 15:32-39)

¹ Pui padare cabu bucurage biname cina cääri tabasecretnige Yeesu bau me. Teeme liba nuuja deedei lica abmalige loolo me, Yeesu abiberäja bägrä bine tesoglicmige, jejemige egä,² “Cane baborage owecu gäne ai biname bime tääpume, ingle teepi cane cama ituge lenaja nesae bimu cama, siige teeme deedei bämlige.”³ Cane liba loolomecewe jityepenemine teeme cewe me, teepi gaabegabe cije irecu laboclomäjininusi, ingle poto cina cudecewe cewe ca seclumi.”⁴ Abiberäja bägrä cina Yeesu ne mene jewecnstisi egä, “Mine äblicäco gemi ama ai daapo taatu cewe cabu ai biname bine ängära.”⁵ Yeesu itemlimige egä, “Weeme lija buluduu gemi?” Teepi jejisi egä, “Cime seben gemi.”

⁶ Puma cita ca Yeesu biname bine jejemige gawe cabu adna-terame. Piba tabe pui seben buluduu bine sewadimige, Acejiyame ne eso ecärige, itrecimige, ecärimige abiberäja bägrä bine teepi biname bine ceeraname, siige teepi ecäranemisi.⁷ Teeme cuta puga ge nesae matimati cibumate. Yeesu eso ecärige cibumate tääpume, jejemige abiberäja bägrä cina biname bine ceeraname.⁸⁻⁹ Iyeta biname cina erwäjimisi, siige ngene jeglemige. Teepi lui foa tausen biname ge. Abiberäja bägrä cina deedei pacupacu bine etomlicmisi, seben modamoda diiba bine jengärimisi, siige teepi tapaninisi. Puma cita Yeesu biname bine jityepimige teeme cewe me.¹⁰ Pui ingwe gaabe ca tabe piba taatu acenutige poo cabu teeme abiberäja bägrä cama, siige teepi eclige Dalmanuta gawe cabu me.

Parisea Sigu Biname cina Itemlisi Ciitaca Mule tääpume (Matayo 16:1-4)

¹¹ Poto Parisea sigu biname cina seclige, gije abacitinisi Yeesu cama äcelame. Teepi singi teebine apicetnärame, siige jejisi ciitaca mule wawenime pui ca awabame, egä Acejiyame te teebine ituge ätyepa.¹² Yeesu ngenecu mäpu me äbitige, jejemige egä, “Weene puu tepänanemimuye cane lui ciitaca mule bine tewenanemumene, yepä weene nätemläjeniyee cane cerämu wawenime. Cane toraca jijenininine: cane licarage nuuja ciitaca mule ne wawena weene päpäname.”¹³ Puma cita ca tabe teebibine sebmalmige, acenutige poo cabu teeme abiberäja bägrä cama, siige teepi sawa ne yuurisi nuuja poto doro me.

Parisea Sigu Biname bime piyepu Heroda me Uutneca Gwidape (Matayo 16:5-12)

¹⁴ Abiberäja bägrä cina ngene jitrimalemige buluduu waadename, peei name pi teeme yepä taatu buluduu puga ge poo cabu.¹⁵ Yeesu teebibine umle mene jejemige Heroda piyepu Parisea sigu biname bime poto cidi me. Tabe ngene ca agli mene ca apu jüicige egä, “Weene cängena ire Parisea biname bime piyepu Heroda me uutneca gwidape tääpume.”¹⁶ Teepi mene opo lica ewatnisi, siige teemeteme jitransi egä, “Tabe pama apu nijeninige, ingle mime buluduu lica gemi.”

¹⁷ Yeesu umle äbitige, teepi ngena tääpume jüicemisi, siige tabe jejemige egä, “Weene ngena name pi jitraniye, egä weeme buluduu lica gemi? Weene nää camu gemi cäro opo awatna coo umle äbita? Weeme ngene atwanena nää tuuborage gemi?”¹⁸ Weeme puu tablama piti nemi, yepä weene lica itecijnuge, piyepu weeme puu irecu piti nemi, yepä weene lica jüüpänimuye. Weene nää ngene lica jotwiniye,¹⁹ cane liba faib buluduu bine yätrecemepene faib tausen biname bime tääpume, weene lija diiba apanäneji jüängäremepene deedei pacupacu ca?” Teepi jejisi egä, “Twelb diiba.”²⁰ Tabe cuta itemlimige egä, “Cane liba seben buluduu bine sitrecimumene foa tausen biname bime tääpume, lija modamoda diiba apanäneji weene tengärimumeye deedei pacupacu ca?” Teepi

jejisi egä, “Seben diiba.” ²¹ Puma cita ca Yeesu jejemige egä, “Weene cäro camu gemi umle äbita cäme poto cidi me.”

Yeesu Ireçu Määsumäsu Biname ne Miiji Jewenige Betesaida je

²² Teepe atyarige cewe ngii Betesaida me. Puma biname cina ireçu määsumäsu biname ne secanisi Yeesu bau me, siige ewejanisi teeme tääpe oomlaname. ²³ Yeesu teebine ime gome joomlige, ecanige taatu cewe me. Tabe teeme ireçu bine mote ca ätyewärige, ime aacitige teeme papa cabu me, itemlige egä, “Nää, maane gwidape bine jepänenemite?” ²⁴ Tabe ire acitanige, jüicige egä, “Yoo, cane biname bine jepänenemine, yepä teepi epu pana gemi uli, lui cina otneninisi.” ²⁵ Yeesu cääri ime aacitige teeme ireçu cabu me. Puma cita ca pui biname te kokre cama ire acitanige, siige teeme ireçu cina aasatäsi, piba tabe iyeta gwidape bine cängena jepänenemige. ²⁶ Yeesu teebine jityepige cewe me apu mene cama egä, “Gone loclomute cewe me biname bine jajaneneme ai poto cidi me, yepä gaabe ta ädepi määme mete me.”

*Peteru Yeesu ne Jewabudnitige, egä Tabe Keriso Sine
(Matayo 16:13-20; Luuka 9:18-21)*

²⁷ Yeesu teeme abiberäja bägrä cama ädige Kesarea Pilipo gawe cabu lui cewe gemi, pui cewe cabu ta otnetnejame. Gaabegabe Yeesu teebibine itemlimige egä, “Biname cina lipu jüicusi, egä cane laasi näne?” ²⁸ Teepe jejisi egä, “Poto cina lui jüicusi, egä maane Yoane niiye ca äciseja biname säte. Poto cina jüicusi, egä maane Acejiyame me mename biname Eliya säte; poto cina egä, maane teeme nuuja mename biname gäte.” ²⁹ Yeesu teebibine itemlimige egä, “Cije weene, weene lipu jüiceniye, egä cane laasi näne?” Peteru jejige egä, “Maane Keriso säte, biname bine lui te niiya cabu ca pa yääsecremepi.” ³⁰ Yeesu kokre cama jejemige, egä teepi nuuja biname bine gone jajanena teeme poto cidi me.

*Yeesu Jüicemige Teeme Mäpu Ngalebora Lenaja piyepu Budre poto cidi me
(Matayo 16:21-28; Luuka 9:22-27)*

³¹ Yeesu gije abacitige abiberäja bägrä bine abiberäjame. Tabe jejemige egä, “Cane lui Acejiyame bau ca tädujine biname me äbitujine, cane miiji mäpurage gwidape bine pagege päpäna piyepu Israela modamoda biname, modamoda iiwäreja biname piyepu cotre abiberäja biname cina pagege cebine ägyi. Cebine budre me pagege acita, yepä nesae me lui bimü cabu cane piba pa larpinantepene ireclota me.” ³² Tabe pajecurage jüicige ai poto cidi me. Puma cita ca Peteru Yeesu ne taatu cewe me ecanige, gije jebacitige teeme mene name pi ablawejame. ³³ Yepä Yeesu atatröngtige, teeme abiberäja bägrä bime cabu me ire acitige, siige Peteru ne kokre cama mene jejige egä, “Satani, cäme opo gaabe ca äyebingti. Määme ngene atwanena lui Acejiyame bau ca lica gyene, yepä biname bime cabu ca gyene.”

³⁴ Puma cita ca Yeesu biname bine piyepu teeme abiberäja bägrä bine tesoglicmige, jejemige egä, “Biname te liba singi cane cama otnime, tabe miiji teemerage singi bine gawe me acrana, teeme baarge uli ne palace cabu acana siige cebine ingwe äcwi. ³⁵ Laati te liba singi lica teemerage singi bine abmaläcemame, tabe teeme ireclota ne cirege apesera. Yepä, laati te singi ge teemerage singi bine abmaläcemame ingle cane piyepu Miiji Mene name pi, tabe toraca ireclota ne cirege päpäna. ³⁶ Biname te nuuja miiji ne lica cire jääpänepi, ngänu gyene tabe puu iyeta ai gawecewe ne yaacatuge, yepä teeme ireclota ne yaapesaruge. ³⁷ Nuuja gwidape lica gyene ceerame teeme ireclota awecnista daremu me. ³⁸ Laati te liba cebine nägyenige piyepu cama mene ibi lica äbitenige ai padare cabu, biname cina liba niiya mule bine jaawenimusi piyepu sargi mule yaacnemusi, cane lui te Acejiyame bau ca tädujine biname me äbitujine, cane cuta teebine cirege ägyi, cane liba Babe me jamyacu apaclyera cama piyepu teeme mename seemo cama cire tacnepene ai gawecewe cabu me.”

9

¹ Tabe cuta jejemige egä, “Cane toraca mene jijenininine: ama poto lui cina jeclajutäjenemige, budre lica cire läbitipesi, ngälu teepi niinäce cire jääpänepesi Acejiyame te biname bine waadena kokre cama.”

*Yeesu Mara Opo me Äbitige
(Matayo 17:1-13; Luuka 9:28-36)*

² Siks bimü ingwe gaabe ca Yeesu aacanänige Peteru, Yakobu piyepu Yoane teta cama, teebibine opo jaawenänige baborage podo cabu me, siige teepi puma taatu ge. Podo cabu abiberäja bägrä bime opo gaabe je Yeesu mara opo me äbitige, ³ piyepu teeme cäbletääpe äbitininisi aiyai me, epu bulu me, egä nuuja te äblicäco gyene äciseja pepu bulu me. ⁴ Puma cita ca Eliya naabi Moose taboclomtäsi iyeta teeme bau me, siige teepi mene jüicemäsi Yeesu cama. ⁵ Peteru Yeesu ne jejige, “Abiberäja biname, cine miijirage gämi ama. Cine

nesae matimati mete bine aarange-nānogo: yepā määme, yepā Moose me, yepā Eliya me.”⁶ Peteru umle lica ge, ngena nuuja mene iicana, ingle teepi iyeta pipu wālu ge. ⁷ Piba carbe te tādige, teebibine aacwabānige. Carbe cabu ca tagepogogo te tādige egā, “Ai lui căme ngenecurage Bāgrā gyene. Weene teebine jitecijeye.”⁸ Abiberāja bāgrā cina liba wata ire acranānisi, teepi yepā Yeesu ne jepānisi.

⁹ Teepi liba podo cabu ca tāinetnānisi, Yeesu jāājānige egā, “Weene lui mule ne bii jepāniye, gone biname bine jajanena, ngālu cane lui Acejiyame bau ca tādujine biname me ābitujine, budre cabu ca pagege arpinenta.”¹⁰ Teepi puu teeme mene jitecijānisi, yepā teemeteme jitrānānisi, egā teeme budre cabu ca arpinenta baa ngena gyene? ¹¹ Puma cita ca teepi Yeesu ne itemlānisi egā, “Ngena name pi cotre abiberāja biname cina jiićusi, egā Eliya cirege otni Keriso me niināce gaabe me?”¹²⁻¹³ Yeesu Yoane niye ca āciseja biname poto cidi me jāājānige egā, “Peei toraca gyene, egā Eliya miiji niināce otni iyeta gwidape amacetnājame. Cuta cane jijenininine, egā tabe uja itu tādepi, yepā biname cina teebine epu jaawenepesi, teepi lipu singi ituge, Oogārāneji mene te teeme poto cidi me lipu jiićenige. Yepā Oogārāneji mene te ngena name pi jiićenige căme poto cidi me, Acejiyame bau ca lui te tādujine biname me ābitujine, egā cane miiji māpu cabu lenaja piiyepu biname cina cebine pagege āgyi?”

*Yeesu Miiji Jewenige Niya Cable cama Bāgrā ne
(Matayo 17:14-21; Luuka 9:37-43a)*

¹⁴ Teepi liba nuuja abiberāja bāgrā bime bau me tācnārānisi, teepi jepānimisi bucurage biname cina teebibine jewaclomtemisi piiyepu poto cotre abiberāja biname cina jicelisi teta cama. ¹⁵ Egācāro biname cina Yeesu ne jepānisi, teepi cālu te jitemige, piba taatu uuwamitnige teebine awablame. ¹⁶ Yeesu abiberāja bāgrā bine itemlimige egā, “Weene teta cama ngeno me jiceliniye?”

¹⁷ Siige biname bime sobe cabu ca yepā te jejige egā, “Abiberāja biname, cane căme bāgrā ne secanine määme bau me, ingle niya cable te teebine mene iicema cāco me jaawenuge. ¹⁸ Liba teebine joomluge, gawe me yaajaruge, siige tage cabu ca bulubulu mote cina tāsuge, tabe giricu bine yaatebicumge cuta duudemu te yaagluge. Cane puu määme abiberāja bāgrā bine jejemine cable ne āyecrejame, yepā teepi āblicāco ge wawena.”¹⁹ Yeesu teebibine jejemige egā, “Oo weene ātrunga cāco biname gemi! Luma ngālu padare cane miiji weene cama lenaja? Luma ngālu padare cane miiji weeme ātrunga cāco mule pāpāna? Peei bāgrā ne secaneye.”

²⁰ Puma cita ca teepi teebine Yeesu bau me ecanisi. Cable te liba Yeesu ne jepānige, tabe bāgrā ne came jedenutājige, siige bāgrā te itramige gawe me, adimlicige, bulubulu mote cina tāsige teeme tage cabu ca. ²¹ Yeesu babe ne itemlige egā, “Tabe luma ngālu padare ituge apu lenaja?” Tabe jewecnistige egā, “Matikāli bāgrā cabu ca. ²² Cable te cuta teebine yaajarājuge uliobo cabu me piiyepu niye cabu me teebine budre me acitame. Maane cibibine owecu niweni, nitityāri, liba ibibi gāte.”²³ Yeesu jejige egā, “Maane ngeno me najite, egā cane liba ibibi gāne. Lui me ātrunga pisi nyene, tabe miiji gyene iyeta gwidape wawenetnāja.”²⁴ Piba babe te babo tage ca jiićige egā, “Cāme ātrunga pisi nyene, yepā nātityāri cane cerāmu ātrungame!”

²⁵ Yeesu liba jepānige, egā biname cina tuuwamitnige teeme bau me, tabe cable ne kokre cama mene jejige egā, “Niya cable, lui te ai bāgrā ne jewenenite tablame buduma me piiyepu mene iicema cāco me, cane naajenine, maane tasati teeme trupa cabu ca piiyepu ingwe ca gone labacitute.”²⁶ Cable te babo ala isatige, bāgrā me came kokre cama jedenutājige, siige ebmalige teebine. Bāgrā te apineca cāco enajige budre pana, siige bucurage biname cina jiićisi egā, “Tabe budre gyene.”²⁷ Yepā Yeesu teebine ime gome joomluge, erpinantige, siige tabe jeclajutige.

²⁸ Yeesu liba mete bora me abacitige, abiberāja bāgrā cina ogā itemlisi egā, “Cine ngena name pi āblicāco ge niya cable ne āyecreja?”²⁹ Tabe jejemige egā, “Apuyame ne weene āblicāco nuuja mule ca āyecreja yepā irecu ātumuta ca.”

*Yeesu Cāari Mene Jiićemige Teeme Budre poto cidi me
(Matayo 17:22-23; Luuka 9:43b-45)*

³⁰ Teepi pui gawe ne sebmalisi, otnetnājini Galilaya gawe cabu ta. Yeesu singi lica ge nuuja biname te umle ābitame, egā teepi puga ge, ³¹ ingle tabe abiberāja bāgrā bine ebiberājimige. Tabe jejemige egā, “Lui te Acejiyame bau ca tāduji biname me ābituji pagege acita biname bime ime cabu, siige teepi pa yaacitepesi budre me, yepā nesae me lui bimu cabu tabe piba pagege arpinenta budre cabu ca irecloa me.”³² Teepi ai mene ne opo lica ewatnisi, yepā teepi wālu ge Yeesu ne ātemlame.

*Laasi Nyene Baborage
(Matayo 18:1-5; Luuka 9:46-48)*

³³ Teepi atyarige Kaprenauma cewe me, siige mete me ebäcnisi. Puma Yeesu abiberäja bägrä bine itemlimige egä, “Weene gaabegabe ngena täapume titraniye?” ³⁴ Yepä teepi bojä ge, inge teepi gaabegabe je titranisi, egä teeme cabu ca laasi nyene baborage. ³⁵ Yeesu adnatige, twelb abiberäja bägrä bine tesoglicmi-ge, jejemige egä, “Laati te liba singi niinäce gaabe me äbitame, tabe miiji teemämu ceräcerägäabu me äbita piyepu iyeta biname bime ätiityera biname lenajame.” ³⁶ Puma cita ca tabe bägrä ne ecatige, abiberäja bägrä bime cole je ecitige, jejecletnäjige, jejemige egä, ³⁷ “Laati te apu bägrä yepä ne jaawabluge căme ngii cabu, tabe cebine nawabluge; piyepu laati te cebine nawabluge, tabe cebine taatu lica nawabluge, yepä pui ne jaawabluge, lui te cebine nätyepuji.”

*Laati te Mibibine Lica Nicisärmutininuge, Tabe Mime tääpu Myene
(Matayo 10:42; Luuka 9:49-50)*

³⁸ Yoane te Yeesu ne jejige egä, “Abiberäja biname, cine biname ne jepänisi, lui te niija cable bine yääyecräjemuge määme ngii cabu. Cine jejisi tabe pui mule ne abmalame, inge tabe mime yepä lica gyene.” ³⁹ Yeesu abiberäja bägrä bine jejemige egä, “Weene teebine gone iibana, inge lui biname te kokre mule ne jaawenuge căme ngii cabu, tabe äblicăo watata căme poto cidi me niija mene iicana.” ⁴⁰ Laati te liba lica nicisärmutininuge, tabe lui mime tääpu myene. ⁴¹ Cane toraca mene jijenininine, laati te liba icärininuge niije nanime căme ngii cabu, inge weene Keriso me abiberäja bägrä gemi, tabe cirege teeme miiji daremne ne päpäna.”

*Yeesu Mene Jiicige Angletneja poto cidi me
(Matayo 18:6-9; Luuka 17:1-2)*

⁴² “Ai matimati bägrä lui cina cebine nätrungusi, laati te liba teeme yepä ne jaawenuge niija mule wawename, pui biname te mäpu ne cirege päpäna Acejiyame bau ca. Teeme singicace cabu liba jaaglotusi mäpu kula ne siige malu cabu yaajarusi budre me, peei mäpu lui plowa birige pui mäpu cabu ca, tabe lui ne cirege päpäna. ⁴³ Peei name pi määme ime te liba naawenuge maane singi ädrime niija mule wawename, maane watatarage yääyeblyngtute pui ngene atwana ne, epu pana ime ne lipu jälläcnutute. Miiji gyene, maane yepä ime cama otni iyeteta ireclota cabu me, yepä niija gyene maane neeneni ime cama otni niija puupu cabu me, uliobo luma ätuma căco gyene. ⁴⁴ Puma lui cuple cina teebibine yäärngäjimusi, teepi budre lica cirege, piyepu lui uliobo te teebibine yaabemuge, ätuma căco cirege. ⁴⁵ Piyepu määme ernge te liba naawenuge maane singi ädrime niija mule wawename, maane watatarage pui ngene atwana ne yääyeblyngtute, epu pana ernge ne lipu jälläcnutute. Miiji gyene maane yepä ernge cama iyeteta ireclota cabu me otni, yepä niija gyene maane neeneni ernge cama uliobo puupu cabu me otni. ⁴⁶ Puma lui cuple cina teebibine yäärngäjimusi, teepi budre lica cirege, piyepu lui uliobo te teebibine yaabemuge, ätuma căco cirege. ⁴⁷ Cuta piyepu määme irecu te liba naawenuge maane singi ädrime niija mule wawename, maane watatarage pui ngene atwana ne yääyeblyngtute, epu pana irecu ne lipu juungyatute. Miiji gyene maane yepä irecu cama iyeteta ireclota cabu me otni, yepä niija gyene maane neeneni irecu cama uliobo puupu cabu me otni. ⁴⁸ Puma lui cuple cina teebibine yäärngäjimusi, teepi budre lica cirege, piyepu lui uliobo te teebibine yaabemuge, ätuma căco cirege.”

⁴⁹ Mäpu cabu lenaja lui weebibine jugi căco me jiwenininusi Acejiyame täapume, epu pana uliobo te lipu domäji bine yaabemuge piyepu iiwäreja cibü bine lipu caapere niije ca yaamacetnäjimusi Acejiyame me tääpume.

⁵⁰ Caapereniije me kaakesea pisi nyene, yepä liba teeme mite ne apesera, weene ingwe ca äblicăo wawena caapereniije mite me. Weene cuta miiji caapereniije pana mitemite lenaja. Cuta weene miiji weemeweme poode cama lenaja.” 9 0 9 0

10

*Yeesu Ebiberäjimige Coga Rooriye Ägyi poto cidi me
(Matayo 19:1-12; Luuka 16:18)*

¹ Yeesu pui cewe ne sebmalige, Yuudea probins cabu me ädige, siige Yoridana baduge ne yuurige. Bucurage biname cina cääri tabasecretnege teeme bau me, teebine jewaclomtisi, siige tabe teebibine ebiberäjimige teeme mule liiyepu.

² Puma cita ca poto Parisea sigu biname cina seclige teebine apicetnärame. Teepi itemlisi egä, “Nää, Cotre ibi gyene rooriye te teeme coga ne ägyi?” ³ Yeesu teebibine itemlimige egä, “Moose lipu itu jijinuji weene wawename?” ⁴ Teepi jejisi egä, “Moose te rooriye ne conocăo ecäruji peba ne oogärame ägyi inge poto cidi me, siige piba pui peba cama coga ne jwäätyepute.” ⁵ Yeesu jejemige egä, “Inge weene ätecija căco gemi, peei name pi Moose pui mene yoogäruji weeme täapume.” ⁶ Yepä agedna padare cabu Acejiyame te liba biname bine jebenimuji, tabe magebi me piyepu rooriye me jebenimuji. ⁷ Pui name pi rooriye te

miiji teeme mage babe bine gomala teeme coga cama atejäclmutame,⁸ siige teepi neeneni cina yepä me läbitäsi. Teepi page neeneni lica gegi, teepi yepä gegi.⁹ Peei name pi lui coga cama Acejiyame te rooriye ne yaatejäclmutuge, nuuja biname te gone teebibine mara me wawena.”

¹⁰ Ingwe ca Yeesu liba teeme abiberäja bägrä cama mete cabu jage, teepi cääri itemlisi ai potu cidi me.¹¹ Tabe jejemige egä, “Rooriye te liba teeme coga ne jwäägyuge, nuuja ne waacatuge, tabe ero mule ne jaawenuge.¹² Cuta coga te liba teeme rooriye ne jäägyuge, nuuja ne yaacatuge, tabe cuta ero mule ne jaawenuge.”

Yeesu piyepu Bägrä Matimati
(Matayo 19:13-15; Luuka 18:15-17)

¹³ Biname cina bägrä bine sewadimisi Yeesu bau me tabe ime acitame teeme papa cabu me, yepä abiberäja bägrä cina teebibine jicnecimisi.¹⁴ Yeesu liba jepänige, abiberäja bägrä cina ngena jewenisi, tabe claabe ge, siige jejemige egä, “Bägrä cina saaclege căme bau me. Gone jüibemuye, ingle bägrä pana ätrunga cama biname bine Acejiyame te yaawadimuge.¹⁵ Cane toraca jijenininine: laati te bägrä pana lica yaacatuge Acejiyame ne teeme mopeyame me lenajame, pui biname ne Acejiyame te äblicăo acana.”¹⁶ Puma cita ca tabe bägrä bine jejecletnäjimige, teeme ime aacitanige teeme papa cabu me teeme miiji täápume.

Dogwe Biname te Yeesu ne Edärige
(Matayo 19:16-30; Luuka 18:18-30)

¹⁷ Yeesu liba asatige gaabe cabu me, abyemärige, yepä biname te piba uuwamige teeme bau me, kokorare ca ääpednutige teeme opo gaabe je, itemlige egä, “Miijirage abiberäja biname, cane ngena ne miiji wawena iyeteta ireclota ne päpäname?”¹⁸ Yeesu jejige egä, “Maane ngena name pi miijirage ca bii nainite cebine? Acejiyame taatu gyene miijirage, nuuja cina miijirage lica gemi.¹⁹ Yoo siige, maane umle gäte Moose me ten cotre potu cidi me: ‘Gone biname ne budre me agli; sargi mule gone wawena; gone gwidape ero; walya aitneja gone; angletneja gone; mage babe bine miiji opo gaabe me acita.’”²⁰ Pui biname te Yeesu ne jejige egä, “Abiberäja biname, cane bägrä cabu ca iyeta peei cotre bine itu sicwetnanemumene.”²¹ Yeesu ire acitige teeme bau me ngenecu miiji cama, siige jejige egä, “Yepä gwidape pisi nyene, maane lui ne lica ituge wawena. Äte ädi, määme iyeta gwidape bine ewademepi aletname, rarekaake ecäranemepi owecumete biname bine, siige maane cabucewe je miijimiji gwidape bine cire jepänemepi. Piba tädepi cane cama otnime.”²² Tabe liba ai mene itecijige, teeme opo te mara opo me äbitige, siige tabe ngenecu mäpu cama ädige, ingle tabe babo dogwe biname ge.

²³ Puma cita ca Yeesu ingwe gaabe me ire jetwige, teeme abiberäja bägrä bine jejemige egä, “Dogwe biname bime täápume mäpu gyene Acejiyame me biname bine waadena cabu äbăcname.”²⁴ Abiberäja bägrä cina mutăcăo äbitininisi teeme mene name pi. Yepä Yeesu cerămu jejemige egä, “Căme binamewale, mäpu gyene biname bime täápume Acejiyame me biname bine waadena cabu äbăcname.²⁵ Kamela täápume mäpu birige nilo bora cabu me abacitame siige asatame, yepä baborage mäpu birige dogweyame biname te Acejiyame me waadena cabu abacita.”²⁶ Abiberäja bägrä cina mutăcăo ge, teepi ätemläjinisi egä, “Baa laati te piba miiji gyene iyeteta ireclota ne päpäname?”²⁷ Yeesu ire acitige teeme bau me, jejemige egä, “Biname cina äblicăo teemămu peei ne wawena, yepä Acejiyame te miiji gyene iyeta gwidape bine waweneca.”

²⁸ Puma cita ca Peteru Yeesu ne jejige egä, “Cije cine lipu gemi, ingle cine iyeta gwidape bine itu saabmalempesi maane cama otnetneja name pi.”²⁹ Yeesu jejemige egä, “Cane toraca mene jijenininine; laati te liba saabmaluge teeme mete ne, saabma-limuge teeme naane igane bine, ngule bine, mage babe bine, bägrä bine coo gawe bine căme name pi piyepu Miiji Mene name pi,³⁰ tabe yepä hanred gäabu tuwăngle jăăpănimuge mete bine, naane igane bine, ngule bine, mage bine, bägrä bine, cuta gawe bine, piyepu peei cama biname cina teebine jăăgyusi, yepä tabe ciige padare cabu cirege iyeteta ireclota ne päpăna.³¹ Yepä bucurage biname lui cina page niinäce gaabe biname gemi, teepi ciige padare cabu ingwe gaabe me cire täcnăripesi; piyepu bucurage biname lui cina page ingwe gaabe biname gemi, teepi ciige padare cabu niinäce gaabe me cire täbitipesi.”

Yeesu Cääri Mene Jüicemige Teeme Budre potu cidi me
(Matayo 20:17-19; Luuka 18:31-34)

³² Yeesu teeme abiberäja bägrä cama ädige Yerusalema me. Tabe teeme niinäce gaabe me ädige. Abiberäja bägrä cina mutăcăo ge piyepu lui cina ingwe icwemisi, teepi wălu ge. Yeesu abiberäja bägrä bine biname bime sobe cabu ca mara me ewadimige, cääri jejemige, ngena te pa läpletnutepi teeme täápume.³³ Tabe jejemige egä, “Siige mine biiri

naclenige Yerusalema me. Cane lui Acejiyame bau ca tädujine biname me äbitujine, cebine puma pagege ceera modamoda iiwäreja biname piyepu cotre abiberäja biname bime ime cabu me. Teepi budre me pa natranepesi, siige pa näcärepesi nuuja gawe cabu ca biname bime cabu me. ³⁴Teepi cebine ätutena pana pa nawenepesi, mote ca pa nätyewepesi, pa nadnanepesi, budre me pa naglepesi. Yepä nesae me lui bimü cabu cane piba pa larpinantepene ireclota me.”

*Yakobu Yoane naabime Ätemla
(Matayo 20:20-28)*

³⁵ Puma cita ca Yakobu naabi Yoane, Jebedayo me bägrä cina Yeesu bau me taaclige, jejäsi egä, “Abiberäja biname, cine singi gegi maane wawenname, cine ngena tääpu megi singi.” ³⁶ Yeesu äätemlige egä, “Weene singi cane ngena ne wawenname weeme tääpume?” ³⁷ Teepi jejäsi egä, “Maane liba biname bine cirege waadena, maane conocäco nicärepi cine bäto äbitame siige nuuja te adnatame mäame camu poto me, nuuja te mäame säwäci poto me.” ³⁸ Yepä Yeesu jaajige egä, “Weene umle lica gegi, weene ngena tääpume nätemleniye. Nää, weene miiji gegi cäme pana mäpu cabu lenajame piyepu cäme pana budre äbitame?” ³⁹ Teepi jejäsi egä, “Cine miiji gegi.” Yeesu jaajige egä, “Toraca gyene, weene cäme pana mäpu cabu pagege lenaja piyepu cäme pana budre cirege äbita. ⁴⁰ Yepä peei lui cäme bau lica gyene jajime, lui te cirege cäme camu poto ca piyepu säwäci poto ca adnata. Pui puupu lui teeme tääpu memi, Acejiyame lui bime tääpume ituge amacetnäja.”

⁴¹ Nuuja ten abiberäja bägrä cina liba itecijemige Yakobu Yoane naabime mene, teepi claabe me äbitininisi. ⁴² Puma cita ca Yeesu iyeta abiberäja bägrä bine tesoglicmige, jejemige egä, “Weene umle gemi, egä lui cina mope biname me yaacrajuge Acejiyame umle cäco biname bime tääpume, teepi teebibine jaawenimusi teeme singi gaabe cabu otnetnejame. Piyepu teeme modamoda biname bime conocäco pisi nyene biname bine jajime teepi ngena wawenname. ⁴³ Yepä weene apu gone läbitininuye. Weeme yepä te liba singi baborage me äbitame, tabe miiji nuuja biname bime ätiyera biname me lenajame; ⁴⁴ piyepu weeme yepä te liba singi niinäce gaabe me äbita, tabe miiji weeme tääpume epu matikäli me äbita, aletnäneji biname te lipu läbituge teeme yageyame tääpume. ⁴⁵ Cane lui te Acejiyame bau ca tädujine biname me äbitujine, cane cuta lica itu tädujine biname cina cäme tääpume kaakesea wawenname, ceewe, yepä cane te teeme tääpume kaakesea wawenname piyepu cäme ireclota ne ceerame daremu tääpume teebibine kälyä wawenname.

*Yeesu Miiji Jewenige Ireçu Määsumäsu Biname ne Ngii Bartima
(Matayo 20:29-34; Luuka 18:35-43)*

⁴⁶ Yeesu piyepu teeme abiberäja bägrä cina seclige Yeriko cewe me. Teepi liba puma cita ca abyemärinisi, bucurage biname cina teebibine ingwe icwemisi. Gaabe gwjwa je yepä ireçu määsumäsu biname ngii Bartima, Tiima me bägrä, te adnatäneji enajige, gwidape tääpume yäätineräjimuge. ⁴⁷ Tabe liba itecijige, egä Yeesu Nasaretayame te näsuplingtenige, tabe piba gije abacitige ala abayame egä, “Yeesu Daawida me kaakesaare, maane cebine owecu naweni!” ⁴⁸ Biname cina liga teebine jibisi tabe bojä agime, yepä tabe cerämu baborage ala abayige egä, “Daawida me kaakesaare, maane cebine owecu naweni!” ⁴⁹ Puma cita ca Yeesu gaabe cabu imyemutige, jejemige egä, “Tesogleceye teebine.” Siige teepi teebine tesoglicisi, jejisi egä, “Wälu gone! Abujängti, tabe meebine ala naasoglicige.” ⁵⁰ Tabe teeme acwaba cäbletäpe ne iarige, ädige Yeesu bau me. ⁵¹ Yeesu itemlige egä, “Maane singi cane ngena wawenname mäame tääpume?” Tabe jejige egä, “Babo biname, cane singi cääri ireçu asatame.” ⁵² Yeesu jejige egä, “Äte ädi! Mäame ätrunga te miiji bii naawenige meebine.” Piba taatu teeme ireçu cina aasatäsi, siige tabe Yeesu ne ingwe icwige gaabe cabu.

11

*Yeesu Yerusalema me Abacitige
(Matayo 21:1-11; Luuka 19:28-40; Yoane 12:12-19)*

¹ Yeesu teeme abiberäja bägrä cama liba Yerusalema ne mameta me jenenisi oomlaname, teepi piba atyarige Olibi Uli Podo cabu me. Pui podo cabu puga ge cewe ngii Betepage piyepu cewe ngii Betaniya. Yeesu teeme neeneni abiberäja bägrä bine jäätjepige ² apu mene cama egä, “Weene iclege weeme niinäce gaabe ca lui cewe peese nyene, siige liba atyaramteniye, weene jepäneniye mamye dongki ne seea ca ägräräneji gyene. Nuuja biname te camu ge teeme papa cabu adnata. Jiibirepeye teebine, secanepeye aima. ³ Laati te liba itemlenige weebibine egä, ‘Ngena tääpume peei ne jeneneniye,’ jejepeye egä, ‘Yageyame te singi gyene teeme tääpume, yepä tabe watata pa saawecnistepi.’”

⁴Puma cita ca teepi aalige, jepänäsi mamye dongki ne babo gaabe cabu seea ca ägräräneji ge yepä mete grana gome, siige jiiiräsi. ⁵Poto biname lui cina puga icrajige, teebibine äätelmisi egä, “Weene ngena name pi peei dongki ne jiihireniye?” ⁶Teepi jejemäsi, Yeesu lipu bii jaajige teepi jajime, siige pui biname cina ire taatu jaatwisi teepi dongki ne acaname. ⁷Abiberäja bägrä cina dongki ne ecanäsi Yeesu bau me, teeme cäbletääpe bine eretnemäsi teeme papa cabu, siige Yeesu acenutige, ädige. ⁸Bucurage biname cina cäbletääpe bine eretnimisi gaabe cabu. Poto cina uli ciipe bine icnapimisi, gaabe cabu eretnimisi. ⁹Lui biname cina teeme niinäce gaabe eclige piiyepu lui cina ingwe ca sicwisi, teepi ala abayaninisi egä,

“Acejiyame ne yaawepyeräjesi!

Maane lui tädenite Yageyame me ngii cabu, tabe müiji naawenege meebine!

¹⁰Lui te tädenite mime kaakesaare Daawida pana biname bine waadename, Acejiyame te müiji naawenege meebine!

Mine yaawepyeräjesi Acejiyame ne, cabucewe je lui te enajenige.”

¹¹Puma cita ca Yeesu atyaramtige babo cewe Yerusalema me, siige abacitige iiwäreja mete cabu me. Tabe ire ecananemige gwidape bine, yepä mämlle bimu name pi tabe acnenutige teeme twelb abiberäja bägrä cama Betaniya me.

Yeesu Kokre Mene Jejige Piigi Uli ne

(Matayo 21:18-19)

¹²Nuuja bimu cabu Yeesu liba abiberäja bägrä cama Betaniya ne sebmalige, tabe loolomecewe te joomlige. ¹³Tabe cudecewe ca piigi uli ne jepänige laame cama, ädige uli gome me kuu ireme. Yepä tabe liba atyaramtige, laame taatu jepänimige, ingle kuu padare cäro camu ge. ¹⁴Tabe uli ne jejige egä, “Nuuja biname te mäame cabu ca lica pagege kuu loolo.” Teeme abiberäja bägrä cina itecijemige, tabe ngena jiiicige.

Yeesu Ädige Iiwäreja Mete me

(Matayo 21:12-17; Luuka 19:45-48; Yoane 2:13-22)

¹⁵Teepi atyarige Yerusalema me, siige Yeesu ädige iiwäreja mete caale bora me. Puma tabe gije abacitige biname bine äyecrejame, lui cina piiyeme gwidape bine yaawadanemusi aletna-me piiyepu lui cina jaaletnimusi. Tabe rarekaake äbäsuwäja biname bime dade bine eboclomäjimige. Lui biname cina gimäe ele bine yaawadanemusi aletname, tabe cuta teeme adnatera dade bine eboclomäjimige. ¹⁶Piiyepu lui cina gwidape bine yaawadanemusi, tabe padare lica ecärimige teepi Acejiyame me mete caale cabu argemelame. ¹⁷Tabe piba biname bine ebiberäjimige, jiiicige egä, “Acejiyame te jiiicenige Oogäräneji mene cabu egä, ‘Cäme mete ne irecu ätumuta mete ca cirege aina, luma iyeta maramara gawe biname cina cirege irecu ätumuta,’ yepä weene itu setatrongärumeye epu puupu me, eromaame cina luma lämletneräjjininusi.”

¹⁸Modamoda iiwäreja biname piiyepu cotre abiberäja biname cina teeme mene liba jitecijiisi, teepi siige gaabe ne jirngisi Yeesu ne budre me acitame. Teepi wälu ge teeme täापume, ingle iyeta biname cina mutäcäco ge teeme abiberäja name pi. ¹⁹Liba tumlige mämlleteca me, Yeesu abiberäja bägrä cama Yerusalema ne sebma-lisi.

Piigi Uli me Abiberäja

(Matayo 21:20-22)

²⁰Nuuja bimu krokerage Yeesu liba abiberäja bägrä cama gaabe cabu ädige, egäcäro pui piigi uli ne jepänisi, tabe lui cabu ca nuuja kuu ne lica tepänumi. Teeme laame jedacromtige piiyepu braju cina iyeta acalominisi, siige budre ge. ²¹Peteru ngene jotwige, ngena te täpletnutumi, siige tabe Yeesu ne jejige egä, “Ire abiberäja biname, maane lui uli ne mene ca seglumete, siige budre gyene.” ²²Yeesu teebibine jejemige, “Weene müiji Acejiyame bau ca ätrunga ne joomleye. ²³Cane toraca mene jijenininine, laati te liba jaajuge ai podo ne egä, ‘Awetänti, malu cabu me ajari,’ piiyepu tabe liba lica neenenini ngene atwana cama, yepä jäätrunguge, egä tabe ngena täापume jaajuge, pa läbitepi, siige peei te pagege äbita teeme täापume. ²⁴Peei name pi cane jijenininine, egä weene irecu ätumuta cabu liba ngena täापume yäätinäruiye, siige jäätrunguye, egä weene uja ituge päpäna, siige weene piba jääpänuye. ²⁵Weene liba labujengäjjininuiye irecu ätumutame, weene müiji ngene ätrimela weeme täापume lui niia mule jiwenininusi, piba weeme Babe cabucewe je weeme niia mule ngene jäätrimaluge. ²⁶Yepä weene liba lica birige ngene ätrimela poto biname bime niia mule bine, piba weeme Babe cabucewe je cuta lica birige ngene ätrimela weeme niia mule bine.”

Ätemla Yeesu me Conocäco poto cidi me Tabe Mule bine Wawenecame

(Matayo 21:23-27; Luuka 20:1-8)

²⁷ Yeesu teeme abiberäja bāgrā cama cāari acnenutige babo cewe Yerusalemä me. Egäcāro Yeesu otnetnājige iiwāreja mete caale bora modamoda iiwāreja biname, cotre abiberäja biname piyepu nuuja modamoda biname cina seclige teeme bau me, ²⁸ itemlisi egä, “Määme ngena conocāco pisi nyene ai mule bine wawenecame? Laati bau ca gyene määme conocāco?” ²⁹ Yeesu jejemige egä, “Cane yepā gwidape poto cidi me itemlininine. Weene liba nawecnistiye, cane piba jijenininine, laati te conocāco nācārepi cane ai mule bine wawenecame. ³⁰ Weene najeye, laati te Yoane ne conocāco yāacārepi tabe biname bine niye ca ācisejame, Acejiyame te coo biname cina?”

³¹ Teepi teemeteme jitransisi egä, “Mīne liba jewecnistenisi egä, ‘Acejiyame te Yoane ne conocāco yāacārepi,’ tabe piba apu nijeninini egä, ‘Cije weene piba ngena name pi teebine lica jāärungepye?’” ³² Cuta mine āblicāco gemi iicana egä, ‘Biname cina Yoane ne conocāco yāacārepi.’” Teepi apu naace popi jicisi, ingle teepi biname bime tääpume wālu ge, ingle iyeta biname cina ngene jotwananinini, egä Yoane lui Acejiyame me mename biname ge. ³³ Siige teepi Yeesu ne jejisi egä, “Cine umle lica gemi, laati te Yoane ne conocāco yāacārepi biname bine niye ca ācisejame.” Yeesu jejemige egä, “Cane cuta piba lica jijenininine, laati te cebine conocāco nācārepi ai mule bine wawenecame.” ¹¹

12

Ngene ca Agli Mene Calwacupi Ire Atwi Biname bime poto cidi me

(Matayo 21:33-46; Luuka 20:9-19)

¹ Yeesu biname bine ngene ca agli mene ca jejemige, teepi ngena ituge wawena Acejiyame me mename biname bime tääpume. Tabe apu jicige egä, “Yepā biname te waina gije bine itemige. Tabe cotāri ne erangige, cupicu ne juurige waina kuu āmulecame, piyepu cabucabu mete ne erangige calwacupi ne awamutame. Piba tabe calwacupi ecārimige biname bine ire atwime siige kuu padare cabu teepi yageyame ne poto kuu ceerame daremu tääpume. Puma cita ca tabe cewe ne sebmālige, ādige cudecewe cewe me. ² Kuu padare cabu tabe teeme kaakesea bāgrā ne jityepige calwacupi ire atwi biname bime bau me poto kuu bine waadename. ³ Teepi teebine joomlisi, etemelājisi, jityepisi ime ta. ⁴ Yageyame te cuta nuuja kaakesea bāgrā ne jityepige. Teepi dupe ecārisi mope cabu, ajiri me jewenisi. ⁵ Ingwe ca tabe cuta cāari jityepige nuuja ne, yepā teepi budre me eglisi. Teepi bucurage bine pepu jewenanemisi, poto bine etemelājimisi, poto bine eglecimisi budre me. ⁶ Siige Yageyame me bāgrā taatu te abmalige, teeme ngenecurage bāgrā. Cerācerāgābu tabe teebine jityepige teeme bau me, ingle tabe apu jengige, egä teepi pama cāme bāgrā ne opo gaabe me ecitenisi. ⁷ Yepā calwacupi ire atwi biname cina liba yageyame me bāgrā ne jepānisi, teepi teemeteme jitransisi egä, ‘Ai yageyame me bāgrā gyene. Tabe te ai calwacupi ne cire yaacatepi. Biiri naclege, yaaglesi, siige calwacupi mime yene.’ ⁸ Teepi teebine ecatisi, eglisi, budrekaake ne ijarisi cotāri sici me. ⁹ Cane jijenininine weebibine, calwacupi yageyame te ngena cirege wawena. Tabe cirege otni budre me aglecame pui calwacupi ire atwi biname bine piyepu calwacupi cire yāacāremepi nuuja biname bine ire atwime. ¹⁰ Weene ituge acnema Oogārāneji mene egä,

‘Lui kula ne raranga biname cina jigysi,

baborage bābitige iyeta nuuja cabu ca.

¹¹ Yageyame te ai ne bii jewenige

piyepu babo miijirage gyene mine pāpāname.’”

¹² Siige Israela modamoda biname cina Yeesu ne oomlaname ābitinini, ingle teepi opo ewatnisi, egä tabe teeme poto cidi me bii jicige. Yepā teepi wālu ge bucurage biname name pi, siige teepi teebine ebmalisi, eclige.

Ātemla Tāks Rarekaake Ceera poto cidi me

(Matayo 22:15-22; Luuka 20:20-26)

¹³ Modamoda biname cina jityepimisi poto Parisea sigu biname piyepu Heroda me sigu biname bine Yeesu bau me teebine mene cabu ca oomlaname. ¹⁴ Teepi seclige, jejisi egä, “Abiberäja biname, cine umle gemi, egä maane toraca mene jicenenemite piyepu maane nuuja ngenecu lica gāte, biname cina lipu ngene jwaatwananinusi määme poto cidi me, ingle maane nuuja ne lica yaacatute teeme ngii name pi, yepā maane toracarage yaabiberājimute Acejiyame me gaabe poto cidi me. Siige maane toraca nijini, nāā mime cotre te lica niibeninini mine tāks rarekaake ceerame Rooma mope biname Siisa ne?”

¹⁵ Yepā Yeesu opo ewatnige, egä teepi singi teebine mene cabu ca oomlaname, siige tabe jejemige egä, “Weene ingle ne jirngeniye cebine oomlaname. Rarekaake ne secaneye, cane jāāpānene.” ¹⁶ Teepi secanisi, siige tabe itemlimige egä, “Laati me opo gyene piyepu ngii gyene ai rarekaake cabu?” Teepi jejisi egä, “Siisa me opo gyene piyepu teeme ngii gyene.”

17 Yeesu jejemige egä, “Lui gwidape gemi Siisa me, teebine ecäreye pui; piiyepu lui gwidape gemi Acejiyame me, teebine ecäreye pui.” Teepei mutäcäco äbitininisi teeme mene name pi.

Ätemla Mene Budre cabu ca Arpinera poto cidi me
(Matayo 22:23-33; Luuka 20:27-40)

18 Poto Sadukea sigu biname cina seclige Yeesu bau me. Teepei eei gemi, lui cina jiiкуси, egä biname cina budre cabu ca lica arpinera. Teepei Yeesu ne jejisi egä, ¹⁹ “Abiberäja biname, Moose te cotre ne soogäruji mime täapume, egä biname te liba budre läbituge, coga ne bägrä cäco twaabmaluge, teeme igane te miiji cuubla ne acata bägrä wawename teeme naane me ngii täapume. ²⁰ Yoo, nuuja taje puga ge seven naniganewaleyame. Uge te coga ne ocatige, siige bägrä cäco budre äbitige. ²¹ Teeme gomecayame igane te cuubla ne ocatige. Tabe cuta budre äbitige bägrä cäco. Cuta pepu äbitige puma cita ca gomeyame täapume ²² piiyepu iyeta teeme iganewale bime täapume. Iyeta seven naniganewaleyame peei yepä magebi ne ocananisi, siige budre äbitininisi bägrä cäco. Ingwe ca magebi te cuta budre äbitige. ²³ Siige liba pui seven naniganewaleyame budre cabu ca cirege arpinera, tabe piba laati me coga cirege?”

²⁴ Yeesu teebibine jejemige egä, “Weene betäjiye, ingle weene umle lica gemi Oogäräneji mene piiyepu weene umle lica gemi Acejiyame me kokre. ²⁵ Budre biname cina liba cirege arpinera, teepei coga rooriye lica awadreca, yepä teepei epu pana cire yaacrajemepi Acejiyame me mename seemo cina cabucewe je liiyepu. ²⁶ Egäsu weene Moose miiji Oogäräneji mene cabu ituge acnema, Acejiyame Moose ne ngena jejuji budre cabu ca arpinera poto cidi me. Moose liba aclajuteji enajuji ayeji uli gome, Acejiyame te jejuji egä, ‘Cane Abrahamo, Isacako, Yakobu naabibime Acejiyame gäne.’ ²⁷ Tabe nata budre biname bime Acejiyame lica gyene yepä eei bime, lui cina ireclota gemi. Weene mage betäjiye, egä budre biname cina lica cirege ireclota me arpinera.”

Lui Cotre Gyene Baborage
(Matayo 22:34-40; Luuka 10:25-28)

²⁸ Yepä cotre abiberäja biname te liba itecijige Yeesu piiyepu Sadukea sigu biname cina lipu jicelisi, piiyepu tabe liba jepänige, egä Yeesu teebibine lipu miiji mene ca jewecnimige, tabe piba ädige Yeesu bau me, itemlige egä, “Lui cotre gyene baborage?” ²⁹ Yeesu jejige egä, “Age sena lui baborage cotre: ‘Israela biname weene itecijinegi! Yageyame, lui sine mime Acejiyame, tabe yepä taatu Yageyame gyene. ³⁰ Weene miiji singi äbita Yageyame, weeme Acejiyame täapume, siige pui ne aboclomta iyeta weeme owecu mule ca, iyeta weeme ireclota ca, iyeta weeme ngena atwanena ca piiyepu iyeta weeme kokre ca.’ ³¹ Pui gomecayame babo cotre lui age sena: ‘Maane miiji biname bime täapume singi lenaja, maane lipu mäame täapume singi birige.’ Nuuja apu baborage cotre lica gyene ai neeneni cina liiyepu.”

³² Piba pui cotre abiberäja biname te Yeesu ne jejige egä, “Abiberäja biname, maane miiji jiiците. Maane toraca jiiците, egä Acejiyame lui yepä taatu gyene, nuuja Acejiyame lica gyene. ³³ Cuta biname te miiji singi Acejiyame täapume, siige pui ne yaaboclomtuge teeme iyeta owecu mule ca, teeme iyeta ngena atwanena ca piiyepu teeme iyeta kokre ca, cuta tabe miiji singi biname bime täapume, tabe lipu singi teeme täapume. Ai lui baborage gyene iyeta iiwäreja cibi cabu ca, lui bine juubudäremusi Acejiyame täapume, piiyepu nuuja iiwäreja gwidape cabu ca.” ³⁴ Yeesu lui opo ewatnige, egä tabe umle mene ca jewecnistige, siige tabe jejige egä, “Maane mameta gäte biname me äbita, Acejiyame lui ne yaacanuge.” Ai ingwe gaabe ca biname cina wälu ge Yeesu ne cerämu ätemlejame.

Keriso Laasi Nyene
(Matayo 22:41-46; Luuka 20:41-44)

³⁵ Yeesu liba iiwäreja mete caale bora je ebiberäjimige, tabe jiiциge egä, “Peei lipu gyene, egä cotre abiberäja biname cina jiiценisi, egä Keriso lui Daawida me kaakesaare gyene. ³⁶ Aceji Seemo te Daawida ne ngena atwana ecäruji Keriso poto cidi me iicaname egä, ‘Yageyame te cäme Yageyame ne jejuji: Maane adnati cäme camu poto cidi ca, ngälu cane mäame cubuyame bine mäame ernge gawe me cire yaacranemepene.’

³⁷ Siige tabe Daawida te liba Keriso ne einuji teeme Yageyame ca, cije tabe piba lipu gyene Daawida me kaakesaare?” Biname cina jitecijiisi gege cama Yeesu me mene.

Yeesu Umle Mene Jejananemige Cotre Abiberäja Biname bime Mule poto cidi me
(Matayo 23:1-36; Luuka 20:45-47)

³⁸ Yeesu teeme abiberäja mene cabu apu jiiциge egä, “Weene ire cängena cotre abiberäja biname bime täapume, lui cina singi gemi lecaleca cäbletääpe cama otnetnejame naace

me awabame, egä teepi umlerage biname gemi, piiyepu lui cina singi gemi biname cina teebibine aletna puupu cabu cängena awablame. ³⁹ Abasecretna mete cabu teepi singi ngii biname bime puupu cabu adnaterame, piiyepu soriyomu ne liba yaaclitusi, teepi ladna-tärüge miijirage puupu cabu. ⁴⁰ Teepi cuublacubla bime gwidape bine yaawadimusi piiyepu sinäme lecaleca padare irecu läutumataninini. Peei name pi teepi Acejyame bau ca mäpurage daremu ne cirege päpäna.”

Cuubla me Owecu Gwidape

(Luuka 21:1-4)

⁴¹ Yeesu liba adnatäneji enajige iiwäreja mete caale bora rarekaake acrana gwidape gome, tabe ire ca ewadanemige biname cina lipu rarekaake ebäcnisi. Bucurage dogwe biname cina ebäcnisi mage rarekaake bine. ⁴² Puma cita ca yepä owecumete cuubla te to-clige, neeneni matimati rarekaake aacitige. ⁴³ Yeesu abiberäja bägrä bine ala tesoglicmige, jejemige egä, “Cane toraca mene jijenininine, ai owecumete cuubla te magerage becitige, pototo cina matimati bicranimisi. ⁴⁴ Naace, teepi matimati rarekaake bine bicranimisi teeme bucurage cabu ca, yepä cuubla te iyeta becitige, teeme lui pisi nyene lenaja täapume.”

13

Yeesu me Mene Iiwäreja Mete Iigareca pototo cidi me

(Matayo 24:1-2; Luuka 21:5-6)

¹ Yeesu liba iiwäreja mete ne sebmalige, teeme yepä abiberäja bägrä te jejige egä, “Abiberäja biname, maane ire lipu modamoda kula gemi piiyepu lipu modamoda mete gemi!” ² Yeesu jejige egä, “Maane jepänenemite ai modamoda mete bine. Ai iyeta iigareca cirege, siige lica yepä kula ne abmala nuuja kula me tumeca.”

Mäpu cina Lipu Cirege Otni

(Matayo 24:3-14; Luuka 21:7-19)

³ Pui ingwe gaabe ca Yeesu liba adnatäneji enajige Olibi Uli Podo cabu, iiwäreja mete cabu opire enajige, piba Peteru Yakobu Yoane Andrea naabi tujige teeme bau me, siige ogä itemlännisi egä, ⁴ “Nijini ai mule cina liba cire läbitipesi. Ngena cewecu cina cirege awaba, egä padare te bii tatyaramtuge ai mule cina äpletnecame?” ⁵ Yeesu jäänänige egä, “Weene miiji cängena ire, cije nuuja te weebibine ingletnäjinuge. ⁶ Bucurage biname cina cire saaclepi căme ngii cabu, cire jücemepesi egä, ‘Cane Keriso säne’, siige teepi bucurage biname bine cire yaangletnäjemepesi. ⁷ Cuta weene liba cire itecijanipi cubu ala mameta piiyepu liba idre cire itecijanipi cubu pototo cidi me cudecewe je, weene călu te gone jütnuge, ingle ai te miiji cire läbitipe. Yepä ai padare me ngälugaabe căro camu gyene. ⁸ Yepä gawe biname cina cirege cubu icana nuuja gawe biname cama, cuta yepä gawe mope biname te nuuja gawe mope biname cama. Cuta ocneja cina cirege maramara cewe cabu ta, piiyepu gane cirege. Ai iyeta lui mäpu padare me aagedna taatu gyene, epu pana mäpumäpu magebi te lipu cupace laplongamtuge bägrä ärngime.

⁹ Pui padare cabu weene ire cängena biname bime täapume. Teepi weebibine cirege oomlana ablaweja puupu cabu waadename piiyepu weebibine abasecretna mete cabu ta cirege atemeläja. Weene cirege aclajuta gawe mope biname bime opo gaabe je cămiji pi naace täapume teebibine Miiji Mene jajaneneme. ¹⁰ Miiji Mene miiji niinäce acenena iyeta cewe gaabegabe ta, ingwe ca piba ai padare me ngälugaabe te cire tädepi. ¹¹ Weebibine liba cire iwadipesi ablaweja puupu me, weene niinäce gaabe me ngenecu gone, egä weene ngena cire jücemepese, yepä weene eei mene jücuje Acejyame te ngena mene icärininuge peei padare cabu. Peei lui weeme mene lica cirege, yepä Aceji Seemo te ngene atwana cire icäränipi. ¹² Cuta piiyepu biname cina cirege teeme naane igane bine budre me ceera piiyepu babe cina teeme bägrä bine. Bägrä cina teeme mage babe bine cirege ängeja piiyepu budre me ceera. ¹³ Iyeta biname cina weebibine cire jimugitnipesi cămiji pi. Yepä laati te ngenecu kokre cire yaanajepi ngälu ngälugaabe, tabe iyeteta ireclota ne cire jäänänepi.”

Baborage Mäpu

(Matayo 24:15-28; Luuka 21:20-24)

¹⁴ Yeesu abiberäja bägrä bine cerämu jejemige egä, “Weene liba niiyarage wälu meteyame ne cire jepänepese aclajuteji puupu cabu, lui teeme täapume cude gyene,” (acnema biname tabe miiji umle ai ngena tääpu myene) “piba Yuudea gawe cabu lui biname cina miiji uucratna podo cabu me. ¹⁵ Lui cina mete toro cabu lui puupu cabu diibe loocinusi, mete me gone äbäcna gwidape waadename, ¹⁶ piiyepu lui cina calwacupi cabu, teepi gone äcnära cewe me căbletäape waadename, yepä teepi iyeta miiji watata uucratna. ¹⁷ Ogi nemi eei magebi, lui cina mäpumäpu cirege pui padare cabu piiyepu lui cina ngame meeramera

bägrä cama. ¹⁸ Ireçu ätumutipeye, egä pui mule te gone läpletmutuge gäbu padare cabu, ¹⁹ ingle pui padare cabu lui mäpu baborage gyene iyeta poto mäpu cabu ca, lui cina ituge äpletmota ai gawecewe me agedna cabu ca ngälu ai taje, cuta ingwe ca lica cirege äpletmota. ²⁰ Yepä Acejiyame te teeme ngene atwanena cabu pui mäpu padare ne uja tuube me itu jewenuji. Tabe liga pepu lica cire jaaweneji, nuuja te ireclota lica cire yaanajepi, pui mule cina liba cire läpletneräjipesi. Yepä teeme äjäcräneji biname bime name pi tabe ngene itu jotwananuji pui padare ne tuube me wawename. ²¹ Pui padare cabu liba nuuja te cire jijiipi egä, 'Ire, age sena Keriso,' coo egä, 'Tabe isino,' gone jäätrunguye. ²² Walya Keriso piyepu walya mename biname cina cire saaclepi. Teepi ciitaca mule bine piyepu calu te äti mule bine cire jaawenanemepesi Acejiyame me äjäcräneji biname bine angletnejame, teepi liba ibibi cirege peei ne wawename. ²³ Weene ireire inajipi, ingle cane niinäce gaabe me weebibine ituge umle mene jajanena."

Yeesu me Acnenuta poto cidi me
(Matayo 24:29-31; Luuka 21:25-28)

²⁴ Yeesu cuta jejemige egä, "Pui mäpu padare me ingwe gaabe ca bimu te krokeciye me cire läbitepi, piyepu mabye te lica cire saapalyärepi. ²⁵ Wale cina cabu ca cire saatrametnemepi, piyepu lijälja nuuja gwidape gemi puma, teepi teeme otnetneja gaabe cabu ca cirege äyebengäja. ²⁶ Piba biname cina cire näpänepesi cebine, Acejiyame bau ca lui te tädujine biname me äbitujine, carbe cabu cirege äina baborage kokre piyepu jamyacu apaclyera cama. ²⁷ Puma cita ca cane mename seemo bine cire jäatyepemepene Acejiyame me äjäcräneji biname bine abasecretname iyeta poto ca ai gawecewe cabu."

Ngene ca Agli Mene Piigi Uli poto cidi me
(Matayo 24:32-35; Luuka 21:29-33)

²⁸ "Weene labiberäjininuye piigi uli cabu ca. Teeme ciipe liba migi ca tapanininusi, ngänglä laame tucu taaweninuge, siige weene umle gemi, egä kämäge mameta gyene. ²⁹ Cuta weene liba cirege päpäna, cane lui mule poto cidi me bii jjininine, weene piba umle cire äbitipeye, egä căme acnenuta padare mameta gyene. Cane grana gome säne. ³⁰ Cane toraca mene jjininine, biname lui cina ireclota page ai taje, teepi iyeta budre lica cirege äbita, ngälu iyeta ai mule cina liba cire läbitipesi. ³¹ Dume piyepu gawe cirege apira, yepä căme mene te lica cirege apira."

Nuuja Biname te Umle Lica Bimu coo Padare
(Matayo 24:36-44)

³² "Yepä nuuja biname te umle lica gyene bimu coo padare, cane lui te Acejiyame bau ca tädujine biname me äbitujine, căme acnenuta täapume. Cabucewe je lui Acejiyame me mename seemo teepi umle lica gemi, cuta cane Acejiyame me Bägrä cane cuta umle lica gäne, yepä Babe taatu umle gyene. ³³ Peei name pi weene miiji cängena ire, ireclota inajipi, ingle weene umle lica gemi ai mule cina liba cire läbitipesi.

³⁴ Ai lui epu pana gyene, lui biname te cewe ne saabmaluge, läduge cudecewe cewe me. Tabe teeme mete piyepu iyeta gwidape bine saabmalimuge teeme kaakesea bägrä bime ime cabu. Tabe teeme yepäyepä bine maramara kaakesea yääcāranemuge. Grana ire atwi biname ne tabe jaajuge ireire lenajame. ³⁵ Yepä pana weene cuta miiji ireire inajipi, ingle weene umle lica gemi mete yageyame te liba tacnenige. Ai lui pama mämletca me, coo ciye duusa me, coo sewali mameta me, coo bimu acitame. ³⁶ Weene ireire inajipi! Tabe liba bojäcu tädenige, niija gyene tabe weebibine ute cabu ädāra. ³⁷ Cane aga ngena bii jjininine weebibine, ai lui iyeta biname bime täapu myene. Weene ireire inajipi!"

14

Gläamu Jecjemige Yeesu ne Aglime
(Matayo 26:1-5; Luuka 22:1-2; Yoane 11:45-53)

¹ Neeneni bimu ingwe gaabe ca biname cina äsuplengta trii ne jenenisi piyepu uutneca cāco buluduu bine erwājanemisi seben bimu ngalebora ngene apecname, teeme saarewale bine liba sisemujisi Aikupito ca. Pui padare cabu modamoda iiwāreja biname piyepu cotre abiberäja biname cina gläamu jecjemige Yeesu ne lipulipu ogä oomlaname siige budre me aglime. ² Teepi jicisi egä, "Mine äblicāco teebine oomlana trii biname bime irewale, cije teepi cubu jaagednusi mine cama."

Magebi te Yeesu ne Oil ca Eganige Betaniya Cewe je
(Matayo 26:6-13; Yoane 12:1-8)

³ Pui padare cabu Yeesu Simona me mete cabu jage Betaniya je. Simona lui lepera pita cama ge niinäce. Yeesu deedei liba äbitige, yepä magebi te tabacitige alabasta kula karpu cama. Karpu ngalebora puga ge miijirage lengo nardus oil, lui ne baborage daremu ca

jaaletnusi. Tabe karpu ne etebicige, oil ne epadurige Yeesu me mope cabu. ⁴ Poto biname cina claabe me äbitininisi, ajanininisi egä, “Niiyarage gyene ai oil ne pepu papa apadura. ⁵ Miiji cire yaacanejisi aletname trii hanred rarekaake ca, siige pui rarekaake owecumete biname bine cire yääcäremejisi.” Siige teepi teebine ujächlisi.

⁶ Yepä Yeesu jejemige egä, “Obmaleye teebine. Weene ngeno me ngenecu mäpu me joweneniye? Tabe miijirage mule ne bii jewenige căme tääpume. ⁷ Iyeta padare cabu owecumete biname cina weene cama yaacrajimuge, siige weene miiji gemi teebibine ätityerame weene lui padare cabu singi, yepä cane weene cama lica pagege iyeta padare cabu lenaja. ⁸ Peei name pi miiji gyene, egä tabe jewenige, tabe lui mule ne ibibi ge wawena. Tabe căme tääpe ne niinäce gaabe me bii beganige gape me acitame. ⁹ Cane toraca mene jijenininine, biname cina luma Miiji Mene ne yaacenanusi ai gawecewe cabu ta, teepi cirege jajanena ai magebi me ngene apecna tääpume, tabe ngena ne bii jewenige căme tääpume.”

Yuuda Mene Jewenige Yeesu ne Awabame Budre tääpume
(Matayo 26:14-16; Luuka 22:3-6)

¹⁰ Yeesu me twelb abiberäja bägrä bime yepä te ngii Yuuda Isakariyota ädige modamoda iiwäreja biname bime bau me, jejemige tabe Yeesu ne awabame agli tääpume. ¹¹ Teepi liba itecijemige, teepi gege ecisi, siige jejisi Yuuda ne teebine daremu ceerame. Puma cita ca tabe miiji gaabe ne jirngige Yeesu ne awabame teeme budre tääpume.

Yeesu Teeme Abiberäja Bägrä cama Äsuplengta Deedei Erwige
(Matayo 26:17-25; Luuka 22:7-14, 21-23; Yoane 13:21-30)

¹² Trii padare puga ge Israela biname cina liba uutneca căco buluduu bine yäärwäjimusi. Pui padare me niinäce bimü cabu, teepi liba maamoi bine yaaglecimusi äsuplengta deedei tääpume, Yeesu me abiberäja bägrä cina teebine itemlisi egä, “Maane singi luma mäte cine äsuplengta deedei ne amacetnäjame mäame tääpume?” ¹³ Tabe teeme neeneni abiberäja bägrä bine apu mene cama jäatyepige egä, “Weene iclege babo cewe me. Weene puma opopa eyeniye rooriye cama, lui te niye karpu ne secanenige, ¹⁴ siige teebine ingwe icwepeye tabe lui mete cabu abacitenige. Jejepeye mete yageyame ne egä, ‘Abiberäja biname te singi umle äbitame, egä lese nyene puupu, tabe luma teeme abiberäja bägrä cama äsuplengta deedei äbitenige?’ ¹⁵ Tabe weebibine jiwabenige baborage cabu puupu ne. Pui puupu cabu piti nemi iyeta gwidape, siige puma emacetnäjepeye deedei mime tääpume.” ¹⁶ Abiberäja bägrä cina abyemeräsi, aaclige babo cewe me, jepänemäsi iyeta gwidape Yeesu me mene ibi. Teepi äsuplengta deedei puma emacetnäjäsi.

¹⁷ Liba mämleteca ge, Yeesu atyaramtige teeme twelb abiberäja bägrä cama pui mete cabu me. ¹⁸ Teepi liba deedei äbitininisi, Yeesu jejemige egä, “Cane toraca mene jijenininine, weeme yepä lui te deedei äbitenige cane cama, cebine budre me pa nawabepi.” ¹⁹ Teepi ngenecu mäpu me äbitininisi, siige yepäyepä jejananisi egä, “Yageyame, cane lica.” ²⁰ Yeesu jejemige egä, “Ai lui weene twelb bime yepä gyene, lui te buluduu ne yiglenutenige cane cama disi cabu. ²¹ Cane lui te Acejiyame bau ca tädujine biname me äbitujine, budre pa läbitemene, Oogäräneji mene te lipu jüicenige căme poto cidi me. Yepä oge yene pui biname, cebine lui te nawabenige budre tääpume. Teeme tääpume miiji cirege tabe liba lica cire laplimleji.”

Yeesu Teeme Abiberäja Bägrä cama Aareto ne Erwige
(Matayo 26:26-30; Luuka 22:15-20; 1 Korinito 1:23-25)

²² Teepi liba deedei erwäjisi, Yeesu piba buluduu ne ecatige, Acejiyame ne eso ecärige, itrecige, abiberäja bägrä bine ecärimige, jejemige egä, “Ecateye. Ai lui căme tääpe gyene.” ²³ Tabe cuta kwäye ne waina niye cama ecatige, Acejiyame ne eso ecärige, ecärimige teebibine, siige teepi iyeta pui kwäye cabu ca enisi. ²⁴ Yeesu jejemige egä, “Ai lui căme uudi gyene, lui te mameta gyene apira bucurage biname bime tääpume piyepu lui te klaje jecnenige Acejiyame lui kirece mene ituge jaji biname bine niya cabu ca äsecrerame. ²⁵ Cane toraca mene jijenininine, cane căari waina niye lica cirege nani ngälu pui padare cabu, cane liba kirece waina niye cire yaanepene Acejiyame me puupu cabu cabucewe je.” ²⁶ Puma cita ca teepi uupera ne etangisi, siige äsige, eclige Olibi Uli Podo cabu me.

Yeesu piyepu Peteru
(Matayo 26:31-35; Luuka 22:31-34; Yoane 13:36-38)

²⁷ Yeesu abiberäja bägrä bine jejemige egä, “Weene page iyeta cebine nabmaleniye, uu-cratnininiye, ingle mene oogäräneji gyene căme poto cidi me egä, ‘Acejiyame te maamoi ire atwi biname ne budre me cire yaaglepi, siige maamoi cina maramara cire yaaplidnärepsi.’ ²⁸ Yepä cane liba budre cabu ca pa larpinantepene, cane piba weeme niinäce gaabe me Galilaya me pa lädepene.” ²⁹ Peteru Yeesu ne jejige egä, “Ngänu gyene liba iyeta poto

cina meebine abmala, cane licarage naabmalenine meebine.”³⁰ Yeesu jejige egä, “Cane toraca naajenine, airage ciye cabu maane cebine niinäce nesae gääbu nainenite, piba paulo te neeneni manu ala sengenenige.”³¹ Peteru kokre cama jejige egä, “Ngänu gyene teepi cebine maane cama budre me agli, yepä cane licarage naainenine meebine.” Iyeta abiberäja bägrä cina cuta yepä mene jejanisi.

*Yeesu Ireçu Ätumutige Getesemane je
(Matayo 26:36-46; Luuka 22:39-46)*

³² Teepi eclige cewe ngii Getesemane me. Yeesu abiberäja bägrä bine jejemige egä, “Weene ama adnatärineye, cane lädene ireçu ätumutame.”³³ Tabe Peteru Yakobu Yoane naabibine aacanänige teta cama. Yeesu babo ngenecu mäpu me äbitige piiyepu wälu te joomlige,³⁴ siige tabe jääjänige egä, “Ai baborage ngenecu mäpu te cebine budre pana nawenenige. Weene ama ireclota sinäjänege, cebine nawagrijeje.”³⁵ Puma cita ca tabe matikäli padare abotäntige, oweowe ajarige gawe cabu me, ireçu ätumutige, egä liba miiji gyene ai mäpu padare te teebine äsuplengtame.³⁶ Tabe apu jiicige egä, “Cäme Babe, maane miiji gäte iyeta gwidape bine wawenecame. Maane ai mäpu ne cäme bau ca iyeblingti. Yepä gone cäme singi ne jaawenute, mäame singi ne jewenepi.”

³⁷ Puma cita ca tabe tacnenutige, abiberäja bägrä bine ute cabu täädäränige. Tabe Peteru ne jejige egä, “Simona, maane nää ute gäte? Maane nää äblicäco gäte ireclota lenaja matikäli padare?”³⁸ Weene ireclota inajänege piiyepu ireçu ätumutäneye, piba apicetnära padare cabu weene lica itramtenänige. Weeme seemo cina singi gemi cäme singi ne wawename, yepä weeme tääpe cina kokre cäco gemi.”

³⁹ Tabe cuta cääri acnenutige, pepu pana mene ca ireçu ätumutige niinäce liiyepu.⁴⁰ Tabe liba tacnenutige, cuta ute cabu cääri teebibine täädäränige, ingle teeme ireçu mäpurage ge. Teepi liba alotneränisi, teepi umle lica ge teebine ngena mene jajime.⁴¹ Yeesu nesae me abotäntige ireçu ätumutame, siige tabe liba tacnenutige, abiberäja bägrä bine jääjänige egä, “Weene ute camu gämi, ngene oocenäniye. Siige, padare te bii tatyaramtige. Cane lui te Acejiyame bau ca tädujine biname me äbitujine, cebine mameta gyene ceera conoco biname bime ime cabu me.”⁴² Arpineräneye, biiri wääjene. Lui biname te cebine nawabenige budre me aglime, tabe mameta gyene.”

Yeesu ne Joomlisi

(Matayo 26:47-56; Luuka 22:47-53; Yoane 18:3-12)

⁴³ Yeesu liba camu mene iicema cabu jage, Yuuda teeme twelb abiberäja bägrä bime yepä te piba tatyaramtige. Teta cama biname cina seclige cubu turikä piiyepu gabagaba cama. Modamoda iiwäreja biname, cotre abiberäja biname piiyepu poto Israela modamoda biname cina jityepimisi teebibine.⁴⁴ Yeesu ne budre me awabayame biname te cewecu ne bii becitige pui biname bime tääpume egä, “Cane lui biname ne jetcnenine, peese nyene weene lui tääpume singi gemi. Joomlepeye, weeme ire atwi ngalebora ecanepeye.”

⁴⁵ Yuuda liba tatyaramtige, tabe piba conocäco ädige Yeesu bau me, jejige egä, “Abiberäja biname,” siige jetcnige teebine.⁴⁶ Biname cina piba Yeesu ne kokre cama joomlisi.⁴⁷ Lui cina aclajuteji puga icrajige, teeme yepä te cubu turikä ne sisetige, yoororige, siige yepä biname me tablame ne iyeta jeläcnutige. Pui lui iiwäreja mope biname me kaakesea bägrä ge.⁴⁸ Yeesu biname bine jejemige egä, “Weene naaclige cubu turikä piiyepu gabagaba cama cebine oomlaname epu pana, egä cane cubucubu biname gäne.”⁴⁹ Iyeta bimu gaabegabe cane weene cama ge, iiwäreja mete cabu yaabiberäjimune, weene piba cebine lica noomluye. Apu gyene, ingle lui mene oogäräneji gyene cäme poto cidi me, miiji toraca me äbita.”⁵⁰ Puma cita ca iyeta abiberäja bägrä cina teebine ebmalisi, siige uucratnige.

⁵¹ Yepä mamye biname te Yeesu ne ingwe icwige. Tabe yepä taatu cäbletääpe ca asigräneji ge. Biname cina liga teebine joomli-si,⁵² tabe cäbletääpe ne sebmalige, siige cuutacuta uucrige.

Yeesu Israela Mutre Biname bime Opo Gaabe je

(Matayo 26:57-68; Luuka 22:54-55, 63-71; Yoane 18:13-14, 19-24)

⁵³ Yeesu ne ecanisi iiwäreja mope biname me mete me, liiyeme iyeta modamoda iiwäreja biname, cotre abiberäja biname piiyepu nuuja Israela modamoda biname cina abasecret-nuji.⁵⁴ Peteru seeji cude padare ca Yeesu ne ingwe icwige, siige abacitige iiwäreja mope biname me mete caale bora me. Tabe puga adnatige awamuta biname bime cama, gäbu jemajige uliobo gome.

⁵⁵ Modamoda iiwäreja biname piiyepu iyeta mutre biname teepi biname bine jirngemisi Yeesu ne aitnejame budre me agli tääpume, yepä teepi nuuja ne lica jepänisi.⁵⁶ Bucurage biname cina puu Yeesu ne walya jeitnäjisii, yepä teeme mene yepä lica ge.⁵⁷ Piba poto biname cina abujengäjige, walya jeitnäjisii egä,⁵⁸ “Cine jitecijiisi tabe iicana je egä, ‘Cane ai

iiwäreja mete ne yigarecenine, biname cina lui ne erangujisi, piba nesae bimu cama cääri cuta pa yaarangepene nuuja ne, lui biname biji arangäneji mete lica ge.’⁵⁹ Yepä ai biname bime mene cuta yepä ibi lica gemi.

⁶⁰ Iiwäreja mope biname te biname bime opo gaabe abujängtige, Yeesu ne itemlige egä, “Baa, mäame nuuja daremu mene lica gyene, teepi lipu meebine naitnäjenisi.”⁶¹ Yepä tabe bojäcu enajige. Iiwäreja mope biname te cääri itemlige egä, “Nää, maane Keriso säte, biname bine niija cabu ca lui te isecrärenemite, cine lui me ngii ne yaawepyeräjusi, teeme Bägrä?”⁶² Yeesu jejige egä, “Yoo, cane säne. Cuta weene cebine pagege päpäna, Acejiyame bau ca lui te tädujine biname me äbitujine, kokre Acejiyame me camu poto ca adnatäneji piiyepu carbe cabu äina gawe me.”⁶³ Iiwäreja mope biname te teeme cäbletääpe ne idericige awabame, egä tabe Yeesu ne panyamete jepänige, siige jüicige egä, “Mine nuuja singi lica gemi cerämu poto biname cina teebine aitnejame,⁶⁴ ingle weene bii bitecijinige, tabe lipu Acejiyame me ngii ne sabe bii jewenige, teeme bägrä ca lipu bainige. Weene lipu ngene jotwanininiye teeme poto cidi me?” Teepi iyeta jüicisi egä, “Teeme niija pisi nyene, pui name pi teebine miiji budre me agli.”⁶⁵ Piba teeme poto cina gije abacitinisi teebine mote ca ätyewame. Teepi cäbletääpe ca teeme opo icwabisi, yoororisi, jejisi egä, “Nijini, laati te noororige?” Awamuta biname cina cuta teebine yoororisi.

Peteru Yeesu ne Jeinige

(Matayo 26:69-75; Luuka 22:56-62; Yoane 18:15-18, 25-27)

⁶⁶ Peteru liba puga ge pui mete puutucu je, iiwäreja mope biname me kaakesea ngulebägrä te toclige,⁶⁷ teebine jepänige gäbu amaja je uliobo gome. Tabe cängena ire acitige teeme bau me, jejige egä, “Maane cuta totnetnäjumete Yeesu Nasareta biname cama.”⁶⁸ Yepä tabe ainige, jojige egä, “Cane umle lica gäne maane ngena poto cidi me jüicente.” Tabe puma cita ca awetängtige, ädige caale grana wajwa me, siige paulo te ala sengenige.⁶⁹ Pui kaakesea ngulebägrä te cuta cääri jepänige teebine, jejemige lui biname cina puga aclajuteji icrajige egä, “Ai biname lui teeme yepä gyene.”⁷⁰ Yepä Peteru cääri ainige. Matikäli padare ingwe ca lui cina aclajuteji puga ge Peteru ne jepisi egä, “Toraca gyene, maane teeme yepä gäte, ingle maane Galilaya biname gäte.”⁷¹ Peteru jejemige, “Cane Acejiyame me ngii cabu jijenininine, egä cane umle lica gäne pui biname, weene lui poto cidi me jüicenenemiye.”⁷² Piba taatu paulo te neeneni me ala sengenige. Peteru ngene jotwige, Yeesu lipu teebine jejige egä, “Maane cebine niinäce nesae gäbu nainenite, piba paulo te neeneni manu ala sengenenige.” Siige tabe ele jiplecmalige.

15

Yeesu Pilato me Opo Gaabe je

(Matayo 27:1-2, 11-14; Luuka 23:1-5; Yoane 18:28-38)

¹ Liba kroke sewalige, piba taatu modamoda iiwäreja biname, cotre abiberäja biname, piiyepu nuuja modamoda Israela biname, iyeta lui mutre biname, cina mene jitransi Yeesu tääpume ngena wawenime. Teepi teebine sea ca jetäyisi, Pilato bau me ecanisi.² Siige, tabe Yeesu ne itemlige egä, “Maane nää Israela biname bime mope biname gäte?” Tabe jejige egä, “Yoo, maane peega bii jüicite.”³ Modamoda iiwäreja biname cina Yeesu ne bucurage gwidape poto cidi me jeitnäjisi,⁴ siige Pilato Yeesu ne cääri itemlige egä, “Nää, mäame nuuja daremu mene lica gyene? Egäsu maane näätectijenige, teepi lipu meebine bucurage gwidape poto cidi me naaitnäjenisi.”⁵ Yepä Yeesu bojäcu enajige, daremu mene lica jewecnistige, siige Pilato cälu te jitige.

Pilato Yeesu ne Budre me Jitraniige

(Matayo 27:15-26, Luuka 23:13-25; Yoane 18:39-19:16)

⁶ Israela biname cina liba kämäge gaabegabe äsuplengta soriyomu ne jaawenusi, Pilato piba krokeciye mete cabu ca yaasatuge teepi lui biname tääpume birige singi.⁷ Pui padare cabu puga ge krokeciye mete cabu biname ngii Baraba. Tabe poto biname cama cubu itu jüicananepi Rooma modamoda biname bime tääpume. Teepi biname ne itu yaaglepesi budre me teeme cubu ngalebora, siige krokeciye mete bora yaacranemepesi.⁸ Siige, biname cina eclige, Pilato ne itemlisi yepä biname ne krokeciye mete cabu ca asatame, tabe lipu jaawenuge pui padare cabu iyeta kämäge gaabegabe.⁹ Pilato itemlige egä, “Nää, weene singi gemi cane Israela mope biname ne asatame weeme tääpume?”¹⁰ Pilato umle ge, egä modamoda iiwäreja biname cina teebine Yeesu bii becärisi, ingle teepi teebine ire patre jeglisi.

¹¹ Puma cita ca modamoda iiwäreja biname cina biname bine giri jicranimige teepi Pilato ne jajime tabe Baraba ne asatame lica Yeesu ne.¹² Siige Pilato biname bine cääri itemlimige egä, “Cije cane piba ngena jewenenine teeme tääpume weene lui ne yaainuye Israela biname bime mopeyame ca?”¹³ Teepi ala abayaninisi egä, “Baarge uli cabu jääbyecresi!”

14 Pilato itemlimige egä, “Ngena name pi? Tabe ngena niiya ne itu tewenumi?” Yepä teepi baborage ala abayaninisi egä, “Baarge uli cabu jääbyecresil” 15 Pilato singi ge biname bime ngenecu miiji me wawename, siige tabe Baraba ne sisetige krokeciye mete cabu ca teeme tääpume. Puma cita ca tabe jejemige Yeesu ne adnane, siige biname bine ecärimige teepi baarge uli cabu äbyecrame.

*Rooma Cubu Biname cina Yeesu ne Ätutena pana Jewenansi
(Matayo 27:27-31; Yoane 19:2-3)*

16 Puma cita ca Rooma cubu biname cina Yeesu ne ecanisi Pilato me mete opo gome me, siige ala tesoglicmisi lui cina yepä sange teta cama. 17 Teepi Yeesu ne ciriyäciriya cäbletääpe esigrisi, pägepäge seesea ne jemlemaltisi, teeme mope cabu ecitisi krauni tääpume. Teepi ai ne ätutena pana jwenisi, egä tabe babo mope biname gyene. 18 Puma cita ca teepi jewablisi teebine, jejisi egä, “Sebore Israela biname bime moyame!” 19 Teepi teebine suru ca yoororanisi mope gome, mote ca itywäjäsi, siige sinäme kokorare ca ipednanemisi teebine opo gaabe me acitame. 20 Teepi teebine apu ätutena pana jwenisi, piba ciriyäciriya cäbletääpe ne jiremutisi, teemerage cäbletääpe esigrärisi. Puma cita ca teepi teebine ecanisi baarge uli cabu äbyecrame.

*Yeesu ne Baarge Uli cabu Jibyecrisi
(Matayo 27:32-44; Luuka 23:26-43; Yoane 19:17-27)*

21 Puga ge yepä rooriye ngii Simona. Tabe lui Kurene cewe biname gyene, Aleksanda Rupus naabime babe. Tabe calwacupi cewe ca tacnige, siige cubu biname cina giri jecitisi Yeesu me baarge uli ne acaname. 22 Puma cita ca teepi Yeesu ne ecanisi cewe ngii Gologota me, lui me aboclomta egä, ‘Mopekaake Cewe’. 23 Teepi teebine liga ecärisi müira traci cama alengläciteji waina niye, yepä tabe lica enige. 24 Piba teepi teebine toto ca jibyecrisi baarge uli cabu. Siige puma cita ca teepi matimati kula cabu teeme ngii bine yoogärimisi, piba yiisabäjemisi pui kula bine umle äbitame, egä teepi lipulipu Yeesu me cäbletääpe bine abelename.

25 Peei lui krokebimu ge, teepi liba teebine baarge uli cabu jibyecrisi. 26 Yeesu me mope gome oogäräneji ge teeme budre ingle poto cidi me egä, ISRAELA BINAME BIME MOPE BINAME. 27 Teepi cuta neeneni cubucubu biname bine jääbyecrisi baarge uli cabu. Yepä lui Yeesu me camu poto ca, nuuja lui teeme säwäci poto ca. 28 Apu mule ca ai Oogäräneji mene te toraca me äbitige egä, “Teebine cubucubu biname pana jwenisi.”

29 Lui biname cina Yeesu ne isuplengäjäsi, teepi jisädanisi, mope akocnäjinisi, jejisi egä, “Baa, maane age säte, iiwäreja mete ne lui te yiigarecenite, siige nesae bimuna ngalebora cääri erangenite. 30 Maane määmämu miiji äbiti, baarge uli cabu ca täini.”

31 Cuta modamoda iiwäreja biname piyepu cotre abiberäja biname cina Yeesu ne pepu jisädanisi. Teepi ajanininisi egä, “Tabe poto bine miiji jaawenanemuge, yepä tabe äblicäco teemämu miiji äbita. 32 Tabe Keriso ca lainuge, biname bine lui te niiya cabu ca birige äsecrera, piyepu Israela biname bime mope biname ca, siige tabe täinege baarge uli cabu ca cine päpäname, cine piba jitrunge-nisi teebine.” Lui bine jääbyecrisi teeme gome, teepi cuta teebine jisädenäsi.

*Yeesu me Budre
(Matayo 27:45-56; Luuka 23:44-49; Yoane 19:28-30)*

33 Liba bimuna duusa ge, krokeciye te cewe ne iyeta icwabige nesae awa cama. 34 Mämle bimuna me Yeesu babo tagepogogo ca ala abayige egä, “Eeli, Eeli lama sabatani,” peei lui egä, “Cäme Acejiyame, cäme Acejiyame, maane ngenome me cebine nägyite?” 35 Poto lui cina aclajuteji icrajige teeme gome, jitecijsi, jüicisi egä, “Itecijinege, tabe Eliya ne ala tesoglecenige.” 36 Puma cita ca yepä te tuuwamige, waarpopale pana gwidape ne caapocapo waina niye cabu yiiglenutige, suru ca jigadige, isinglantige Yeesu me tage cabu me, jüicige egä, “Mine jääpänesi, Eliya liba tädenige teebine ätrungentame.” 37 Piba Yeesu baborage tagepogogo ca ala abayige, siige budre äbitige.

38 Iiwäreja mete cabu lui baborage cäbletääpe adadnäneji ge, äderäriige cabu ca ngälu gawe me. 39 Cubu biname bime mope biname, lui te aclajuteji enajige Yeesu me opo gaabe, liba jepänige tabe lipu budre äbitige, tabe jüicige egä, “Toraca, ai biname lui Acejiyame me Bägrä gyene.”

40 Magebi puga ge cudecewe ca ire. Teeme yepä lui Mariya Magadala cewe magebi tage, nuuja lui Mariya tage lui iganerage Yakubu piyepu Yoose naabime mage, yepä lui Salome tage. 41 Teepi Yeesu cama jage, tabe liba Galilaya je waatnetnäjuge, teebine yäätityeräjäsi. Cuta poto cerämu magebi puga ge, lui cina saaclepi Yeesu cama Yerusalema me.

*Yeesu ne Gape cabu Ecitisi
(Matayo 27:57-61; Luuka 23:50-56; Yoane 19:38-42)*

⁴²⁻⁴³ Mämleteca liba mameta ge, Yoosepa Arimatea cewe biname te tatyaramtige. Tabe yepä miijirage mutre biname ge, lui te padare ne jewagriijige Acejiyame te biname bine waadename. Ingle peei lui Fraide ge, Sabade bimu me amaceträjä bimu ge, tabe tii ecanige, Pilato bau me ädige Yeesu me budrekaake tääpume. ⁴⁴ Pilato cälu te jitige äteciijame, egä Yeesu uja budre häbitige. Tabe jejige ala asoglecame cubu mope biname ne, siige itemlige egä, “Yeesu nää uja budre häbitige.” ⁴⁵ Tabe liba umle äbitige cubu mope biname bau ca, egä Yeesu budre ge, tabe Yoosepa ne jejige teeme budrekaake ne acatame. ⁴⁶ Puma cita ca Yoosepa ädige, bulubulu cäbletääpe ne jeletnige, Yeesu ne sitru-ngamtige, cäbletääpe ca tope etnige, siige gape cabu me ecitige, lui gape ne ituge uurana baborage kula ngalebora. Piba tabe baborage kula ne epetrenäjige gape grana armime. ⁴⁷ Mariya Magadala cewe magebi piyepu Mariya Yoose me mage teepi jepänäsi, tabe Yeesu ne luma ecitige.

16

Yeesu Budre cabu ca Arpinantige

(Matayo 28:1-8; Luuka 24:1-12; Yoane 20:1-10)

¹ Sabade bimu liba apirige, Mariya Magadala cewe magebi, Mariya Yakobu me mage, piyepu Salome, teepi miijirage lengo ngängye bine jeletnemänisi Yeesu me budrekaake ne aganame. ² Sande krokerage, bimu te liba tacitige, teepi ujige gape gome me. ³ Gaabe cabu teepi ajanänisi egä, “Laati te pui kula ne epeträngtenige gape grana cabu ca mime tääpume?” ⁴ Teepi apu ajanänisi, inge kula lui baborage ge. Siige teepi liba atyaräninisi, ire acranänisi, siige jepänänisi, egä kula lui apeträngteji ge. ⁵ Teepi gape cabu me ebäcnänisi, mamye biname ne jepänänisi bulubulu lecaleca cäbletääpe ca asigräneji ge, camu poto cidi ca adnatäneji ge, siige magebi cina cälu te jätänige. ⁶ Tabe teebibine jääjänige egä, “Gone cälu te jitänuge. Weene Yeesu Nasareta cewe biname ne jirngenäneniye, lui ne baarge uli cabu tibyecrumesi. Tabe ama lica gyene. Acejiyame te teebine budre cabu ca berpinantige. Weene ire! Agesa lui puupu cabu teebine sitwitumesi. ⁷ Äte ujeje! Peteru naabibine jejemeye, egä tabe teeme niinäce gaabe me ädenige Galilaya me. Puma teepi opopa eyenisi teta cama, tabe lipu itu jaajemepi teebibine.” ⁸ Magebi cina äsänisi gape cabu ca, siige uucratnänisi, inge teepi mage cälu te jätänige piyepu jaalocnänige wälu name pi. Teepi nuuja biname ne lica jejisi ai poto cidi me, inge teepi wälu ge.

Yeesu Aboclomtige Teeme Abiberäja Bägrä bime bau me

(Matayo 28:9-10, 16-20; Luuka 24:13-53; Yoane 20:11-18; 20:19-23; Apostolo 1:6-11)

⁹ Sande bimu krokerage Yeesu budre cabu ca liba arpinantige, tabe aboclomtige niinäce Mariya Magadala cewe magebi bau me, lui me trupa cabu ca tabe itu yääsecräremepi seben niija cable bine. ¹⁰ Tabe oclige abiberäja bägrä bime bau me, lui cina Yeesu ne ele jelwisi, jejemige ai poto cidi me. ¹¹ Yepä teepi liba itecijemige, egä Yeesu barpinantige piyepu tabe teebine bii jepänige, teepi lica jitrungisi.

¹² Ai ingwe gaabe ca Yeesu aboclomtige mara opo ca neeneni abiberäja bägrä bime bau me, teepi liba gaabe cabu aaclige babo cewe kaake poto cidi ca. ¹³ Siige teepi babo cewe me acnenütäsi poto abiberäja bägrä bime bau me, jejemäsi, egä teepi Yeesu ne bii jepänäsi, yepä teepi lica jätärungisi teebibine.

¹⁴ Ingwe ca Yeesu aboclomtige lebin abiberäja bägrä bime bau me, teepi liba deedei cabu jage. Tabe teebibine jicnecimige teeme ätrunga cäco piyepu äteciija cäco mule name pi, inge teepi lica pui biname bine titrungimumesi, lui cina teebine tepänanumesi, egä tabe budre cabu ca itu tarpinantumi. ¹⁵ Tabe teebibine jejemige egä, “Äte naaclepi, iyeta cewe gaabegabe ta Miiji Mene ne ecananepeye iyeta biname bime bau me ai gawecewe cabu. ¹⁶ Laati te liba Miiji Mene ne jätärunguge piyepu teebine liba niije ca cuta jääcisäjuye, tabe cirege iyeteta ireclota ne päpäna. Laati te liba lica jätärunguge, teeme niija mule cina yaacrajuge, siige teebine cirege atrana. ¹⁷ Lui biname cina Miiji Mene jätärungusi, teepi ai ciitaca mule bine pagege waweneca: teepi cäme ngii cabu niija cable bine pagege äyecreja biname bime trupa cabu ca, piyepu teepi teeme umle cäco mene ca pagege iicema. ¹⁸ Teepi liba cobyame bine joomlemusi coo piyepu budre niije liba yaanusi, pui cina äblicäco teebibine sabe wawena. Teepi pagege teeme ime acrana pita biname bime papa cabu me, siige teepi miiji läbitininusi.”

¹⁹ Yeesu Yageyame te liba ai mene teebibine jejananemige, pui kaake poto cidi ca Acejiyame te teebine ecanige cabucewe me, siige tabe Acejiyame me camu poto cidi ca adnatige. ²⁰ Abiberäja bägrä cina ecluji, Miiji Mene ne ecananujisi iyeta poto ta. Yageyame te kokre ecärimuji teepi ciitaca mule bine wawenecame naace tääpume awabame, egä Miiji Mene toraca gyene.

LUUKA ME MIIJI MENE

Niinäce Mene

¹ Yoo, Babo biname Teopilo, maane umle gäte egä bucurage biname cina ituge gije abacita mene oogärame pui modamoda mule poto cidi me lui cina cime gome täbitenäjimesi. ² Cine peei poto cidi me mene ituge ätecija biname bau ca lui cina teemämu ituge päpäna iyeta peei mule teeme agedna cabu ca, piba peei poto cidi me jaajanane mepesi. ³ Yoo, ai name pi cane iyeta pui mule poto cidi me cängenarage itu yaabiberäjemepene, cane jitrane cängena mene oogärame määme tääpume, ⁴ maane ai cabu ca toraca umle äbitame pui mule poto cidi me teepi meebine lui itu naabiberäjepesi.

Umlé Mene Yoane Niye ca Äciseja Biname me Aplimla poto cidi me

⁵ Ai mene ne gije jebacitenine Heroda liba Mopeyame tääpume enajuji Israela gawe cabu. Puga ge yepä Acejiyame me iiwäreja biname teeme ngii Sakariya. Tabe yepä iiwäreja babo biname ngii Abija me sange cabu kaakesea jaawenuge. Teeme coga ngii Elisabeta cama teepi neeneni lui Aarona me kaakesaare gegi. ⁶ Teepi miijirage laanajuge Acejiyame me opo gaabe je, iyeta mime Yageyame me singi piyepu cotre conocäco jaawenäsi. ⁷ Yepä teepi bägrä cäco ge, ingle Elisabeta äblicäco bägrä päpäna, cuta piyepu teepi moda molyege ge.

⁸ Nuuja taje teeme padare cabu Sakariya teeme iiwäreja kaakesea jewenanuji Acejiyame tääpume. ⁹ Yoo, pui iiwäreja biname bime mule apu ge: teepi matimati kula bine teeme ngii cama yiisabäjemusii teeme maramara kaakesea peema cita ca päpäname. Pui bimü cabu Sakariya lui kaakesea jepänige pui kula yiisabeja cabu ca miijimiji lengo gwidape Acejiyame tääpume uubuderame. Uubudera padare te tatarantige, tabe piba Acejiyame me iiwäreja mete ngalebora me abacitige, ¹⁰ bucurage biname cina liba tabasecretnige pui mete caale bora me irecu ätmutame.

¹¹ Piba Acejiyame me mename seemo te Sakariya bau me taboclomtige, pui miiji lengo gwidape uubudera dade camu poto ca jeclajutige. ¹² Sakariya liba jepänige teebine, cälu te jitige, wälu te joomlige. ¹³ Yepä, mename seemo te jejige egä, “Sakariya, wälu gone! Acejiyame te määme awejena ne secatumi; määme coga Elisabeta imäbägrä ne pa jääpänepi. Maane teebine ngii ecärepi Yoane ca. ¹⁴ Maane ngenecu miiji piyepu gege pa äbitepi, piyepu bucurage biname cina babo gege pa läbitipesi teeme aplimla name pi. ¹⁵ Tabe babo cirege äbita Acejiyame me opo gaabe je. Tabe gone waina niye, coo nuuja sice pana niye nänäja. Teeme aplimla cabu ca Aceji Seemo teeme trupa cabu babo pa läbitepi. ¹⁶ Tabe bucurage Israela biname bine pa yaatatrongäremepi Acejiyame mime Yageyame bau me. ¹⁷ Teeme otni lui mime Yageyame me niinäce gaabe myene. Teeme seemo ireclota piyepu kokre mename biname Eliya pana pagege äbita. Yoo, tabe te babe bime ngenecu pa jaatatrongäremepi teeme bägrä bime bau me, piyepu ätecija cäco biname bime ngene atwanena pa jaatatrongäremepi toraca conocäco mule wawename. Tabe Yageyame me biname bine pa yaamacetnäjemepi teeme otni tääpume.”

¹⁸ Siige, Sakariya piba mename seemo ne mene jejige egä, “Cane lipu ai mene toraca umle äbita? Cane moda gäne; cäme coga cuta molyege gwene.”

¹⁹ Mename seemo te jejige egä, “Cane Gabriyela säne, Acejiyame me opo gaabe naclaju-tuge. Tabe te cebine nätyepige ai miijirage mene meebine jajime. ²⁰ Yepä, maane cäme mene lica nacatite, peei name pi maane buduma pana äbitenite mene iicemame. Maane bojäcu naanajepi, ngälu pui bimü cabu cäme mene te liba toraca me pa läbitepi. Yoo, peei te teeme padare cabu toraca me pa läbitepi.”

²¹ Siige, iiwäreja mete caale bora je biname cina Sakariya ne jewagriisi egä, “Ngena te bäbitige mete ngalebora je? Mage leca padare, tabe ngena name pi enajenige, lica tasatenige?” ²² Siige, tabe liba tasatige, äblicäco teebibine mene jaji. Teepi puma cita ca umle äbitinini egä tabe pama apacyera gwidape ne bii jepänige puma. Mene cäco tabe ime ca teebibine umle jenenemige.

²³ Siige teeme pui kaakesea padare liba apirige, Sakariya acnenutige cewe me. ²⁴ Pui ingwe ca teeme coga Elisabeta mäpümäpu äbitige. Tabe mete gome waanajuge faib mabye cama, jiiçige egä, ²⁵ “Yageyame te cebine nätyärumi apu äbitame. Ingwe ca cane lica nuuja biname cama ajiri pana lenaja bägrä cäco.”

Umlé Mene Yeesu me Aplimla poto cidi me

²⁶ Elisabeta liba siks mabye mäpümäpu cama onajige, pui padare cabu Acejiyame teeme mename seemo Gabriyela ne jityepige Nasareta cewe Galilaya probins cabu me. ²⁷ Teeme mene puga ge yepä ngulebägrä tääpume, ngii Mariya. Teeme ciwelooyame ngii Yoosäpa, tabe sasa Mopeyame Daawida me ingle biname ge. ²⁸ Yoo, Gabriyela Mariya bau me ädige,

jojige egä, “Sebore Mariya! Acejiyame maane cama gyene. Tabe babo singi gyene mäame täápume meebine müiji ceerame.”

²⁹ Mariya liba peei mene utecijige, tabe ngenecu joclönige, mage ngene jotwananige pui mene ngena täápume. ³⁰ Puma cita ca mename seemo teebine jojige egä, “Mariya, wälu gone, inge Acejiyame te babo ngenecu müiji gyene mäame täápume.” ³¹ Maane mäpumäpu pa äbitepi, imäbägrä ne pa jepänepi. Teebine ngii ecärepi Yeesu. ³² Tabe lui baborage cirege; Caburage Acejiyame me bägrä ca pa yaainepesi. Yageyame Acejiyame teebine mopeyame me cire jaawenepi epu pana teeme kaakesaare Daawida lipu mopeyame itu enajui. ³³ Tabe te Yakobu me kaakesaare bine iyeteta cire yaawademepi, inge teeme waadena lui ngälu cäco gyene.

³⁴ Mariya mename seemo ne itemlige egä, “Cane mäpumäpu lipu äbita, inge camu gäne rooriye cama atejäclmuta?”

³⁵ Mename seemo te jojige egä, “Aceji Seemo te mäame bau me pa tädepi, piba Caburage Acejiyame me kokre mäame cabu pa yaanajepi, peei name pi peei bägrä maane lui ne pa eplimlepi tabe Acejiyame tääpu myene, piyepu Acejiyame me bägrä ca pa yaainepesi. ³⁶ Yoo, mäame inge biname Elisabeta cuta imäbägrä pa jääpänepi. Teebine lui täápume biname cina jwaajusi egä “äblicäco bägrä päpäna,” ngänu gwene page molyege, tabe siks mabye cama mäpumäpu gwene. ³⁷ Iyeta gwidape Acejiyame täápume ibibi gemi wawena.”

³⁸ Siige, Mariya piba jejige egä, “Cane Acejiyame me biname gäne teeme singi wawename. Iyeta müiji gyene cäme täápume äbita maane lui mene bii najite.” Siige, mename seemo piba teebine obmalige.

Mariya Elisabeta ne Ongrärige

³⁹ Yoo, pui mene ingwe ca, Mariya gwidape emacnetnäjige, wata oclige yepä cewe Yuudea doro gawe cabu me. ⁴⁰ Tabe Sakariya me mete me puga abacitige, Elisabeta ne sebore jowenige. ⁴¹ Yoo, Elisabeta liba Mariya me mene utecijige, teeme bägrä te piba apinyarige came bora ätni diiba cabu, piyepu Aceji Seemo Elisabeta me trupa cabu babo äbitige. ⁴² Tabe babo tage ca Mariya ne jojige egä, “Acejiyame te meebine babo müiji naawenige iyeta magebi cabu ca, piyepu maane lui bägrä ne pa eplimlepi, tabe Acejiyame me babo müiji cama gyene. ⁴³ Cane ngeno me ai müiji ne päpäna, cäme Yageyame me mage te cebine nädärenige! ⁴⁴ Cane liba mäame sebore mene nätecijige, piba taatu bägrä te gege cama apinyarige cäme came bora ätni diiba cabu. ⁴⁵ Maane ngenecu gege gäte, inge mime Yageyame me mene maane jaatrungepete egä mäame poto cidi me pagege äbita.” Siige.

Ai Lui Mariya me Uupera Mene Acejiyame täápume

⁴⁶ Mariya jicige egä, “Cane Acejiyame ne ewepyeräjenine iyeta cäme ngenecu cama.

⁴⁷ Cäme seemo te gege äbitenige Acejiyame täápume, lui te cebine nüiya cabu ca cirege asata.

⁴⁸ Tabe owecu cama cebine näpänumi, cane lui teeme matikolä kaakesaare bägrä gäne.

Ama cita ca iyeta biname cina cebine pa nainepesi “gege gwene,”

⁴⁹ peei modamoda gwidape name pi Acejiyame lui bine teeme kokre ca itu tewenemumi cäme täápume.

Teeme ngii lui jamyacu conocäco gyene.

⁵⁰ Bägrä bime padare cabu ca piyepu maramara kaakesaare bime padare cabu ca, tabe biname bine owecu jaawenemuge,

lui cina teebine opo gaabe me yaacitisi.

⁵¹ Tabe kokre mule bine ime ca itu jaawenemepi;

biname lui cina ngenecu bora teemeteme babo me läbituge, teebibine jaawenemepi maramara me aplidnerame.

⁵² Tabe modamoda mope biname bine gawe me itu yaajaremepi teeme müijimiji puupu cabu ca,

yepä matimati biname bine ituge awepenta.

⁵³ Deedei cäco biname bine tabe yäängäremepi müijimiji deedei ca,

yepä dogwe biname bine deedei cäco yäayecräjemepi.

⁵⁴⁻⁵⁵ Tabe cängena jaawenemepi lui mene mime kaakesaare bine ituge jaji; mibibine itu nitityäripi lui gemi teeme kaakesaare bägrä ngii Israela cabu ca.

Tabe teeme mene lica ngene jäätrimallepi, owecu wawename Abrahamo piyepu teeme kaakesaare bine iyeteta.”

⁵⁶ Siige, Mariya Elisabeta cama onajige nesae mabye cama, piba acnenutige teeme cewe me.

Yoane Nüye ca Äciseja Biname me Aplimla poto cidi me

⁵⁷Yoo, Elisabeta me padare liba tatyaramtigi, tabe imäbägrä ne eplimlige. ⁵⁸Siige, teeme inglewale piyepu cewe mameta lui biname cina liba mene itecijemige Yageyame te lipu Elisabeta ne babo owecu jowenige, teepi ten cama gege äbitininisi.

⁵⁹Imäbägrä te liba eit bimu joomlige, teeme binamewale cina seclige Acejiyame me cewecu acita mule wawename tääpe matikolä iirputa ca. Teepi singi bägrä ne babe me ngii ceerame, Sakariya, ⁶⁰yepä teeme mage te jejemige egä, “Ewe! Teeme ngii lui Yoane.”

⁶¹Teepi mage me mene jowecnistisi egä, “Peei ngii weeme ingle cabu lica gyene.”

⁶²Teepi puma cita ca babe ne ime ca jewenisi teebine ätemlame egä, “Maane ngena ngii tääpume singi bägrä ceerame?”

⁶³Sakariya oogära gwidape tääpume jejige, peei cabu yoogäriige egä, “Teeme ngii lui Yoane.” Biname cina cälu te jitemige. ⁶⁴Piba taatu Sakariya me wätä te miiji me äbitige, piyepu teeme tagepogogo te tasatige. Tabe mene me gije abacitige Acejiyame ne awepyeräjame. ⁶⁵Cewe mameta biname cina wälu äbitininisi; peema cita ca idre ecenanisi Yuudea podo gawe cabu iyeta pota ta. ⁶⁶Iyeta lui cina peei mene itecijemige, mage ngene jotwa-naninisi, ätemläjiniisi egä, “Ai bägrä tääpume lipu äbitenige?” Yoo, Biname bime tääpume pajecu ge egä Acejiyame me kokre ime puga ge pui bägrä cama.

Sakariya te Acejiyame me Tagepogogo Mene Jiicige

⁶⁷Aceji Seemo te Yoane me babe Sakariya me trupa cabu me babo äbitige; tabe Acejiyame me tagepogogo mene jiicemige egä,

⁶⁸“Acejiyame mime Israela biname bime Yageyame ne mine pa yaawepyeräjesi, ingle tabe mibibine bii ningrärininige piyepu mime niija cabu ca äsecrera gaabe bii nicärininige.

⁶⁹Tabe mime tääpume kokre äsecrera biname ne bii tityepige, lui teeme kaakesea bägrä Daawida me kaakesaare gyene.

⁷⁰Ujarage, tabe teeme conocäco mename biname bime tagepogogo ca jiicuji egä,

⁷¹tabe mibibine cire niyebingipi mime cubuyame bau ca, piyepu teeme ime cabu ca lui cina mibibine nimugetnininusi.

⁷²Tabe te jiicuji egä tabe mime kaakesaare bine owecu wawename, piyepu teeme conocäco jajeji mene tabe lica ngene ätrimelame.

⁷³Tabe mime kaakesaare Abrahamo ne teeme kokre ngii cabu jejuji

⁷⁴egä mibibine cirege äsecrera cubuyame me ime cabu ca, mine piba teeme tääpume kaakesea wälu cäco wawenecame, ⁷⁵piyepu ngenecu epucäco conocäco lenajame teeme opo gaabe je iyeta mime ireclota ngalebora.

⁷⁶Yoo, cäme bägrä, biname cina meebine pa naainepesi mename biname ca mime Caburage Acejiyame tääpume,

Ingle maane niinäce pa ädepi gaabe amacetnäjame Yageyame tääpume,

⁷⁷teeme biname bine umle wawename egä äsecrera gaabe pisi nyene, teepi liba kälyä jääpänemusi Acejiyame bau ca teeme niija mule tääpume.

⁷⁸Mime Acejiyame lui baborage owecu piyepu owelaamelame cama; teeme äsecrera biname te bimu me ajara pana, cabucewe ca mime bau me pa tädepi,

⁷⁹saapaclyärepi biname cabu lui cina krokeciye mule cabu icrajinige, piyepu teeme budre mule name pi wälu gemi.

Tabe cuta mibibine pa niwadipi poode ireclota gaabe cabu otnime.”

⁸⁰Yoo siige, pui bägrä te uutige, babo me äbitige, cuta teeme seemo kokre me äbitige. Tabe daapo taatu cewe cabu enajige, ngälu pui bimu tabe liba teeme kaakesea gije jebacitige Israela biname bime tääpume.

2

Yeesu me Aplimla pota cidi me

(Matayo 1:18-25)

¹Pui padare cabu, Rooma Babo Mopeyame Siisa Agosto te mene jityepäjemige iyeta cewe cabu ta egä iyeta biname cina miiji otni teeme ngii acranecame biname acnema tääpume.

²Yoo, biname ngii Kwairiniyus tabe Suriya probins Mopeyame ge pui mule te liba äbitige.

³Iyeta biname cina otninisi teeme saare bime cewe me teeme ngii acranecame.

⁴Yoo, biname ngii Yoosepa tabe ädige Nasareta cewe cabu ca, piba Galilaya probins ne sebmalige, Yuudea probins abacitige, ädige Betelehema cewe me, sasa Israela Mopeyame Daawida luma aplimluji, ingle tabe Daawida me kaakesaare ge. ⁵Yoo, teeme ciwelooloyame Mariya ten cama oclige ngii acitame. Mariya mäpumäpu gwene. ⁶Egäcäro teepi liba Betelehema cewe cabu puga ge, piba teeme padare te tatyaramtigi iigyärame. ⁷Tabe teeme niinäce bägrä ne jepänige, imäbägrä, teebine cäbletääpe ca etnige, kau bime deedei acrana

puupu cabu ecwanige, ingle teepi kau mete cabu aanajige. Teeme täápume puupu lica ge otnetneja biname bime ute mete cabu.

Menname Seemo piijepu Maamoi Ire Atwi Biname

⁸ Yoo, pui cewe mameta puga ge maamoi ire atwi biname lui cina baace cewe cabu uta cama icrajige teeme maamoi bine cängena ire atwime. ⁹ Mime Yageyame me mename seemo te teeme bau aboclomtige, piba taatu mime Yageyame me jamyacu apaclyera te teeme gome tuungepmalige. Babo wälu te teebibine joomlemige, ¹⁰ piba pui mename seemo te jejemige egä, “Wälu gone! Cäme babo müjirage mene agha weeme täápume. Peei mene te iyeta biname bine baborage ngenecu gege me pa jaawenemepi. ¹¹ Page ai ciye imäbägrä te aplimlige Daawida me cewe cabu je. Tabe weeme niya cabu ca äsecrera biname pagege äbita; tabe Keriso sine weeme Yageyame. ¹² Yoo, weene ai cabu ca umle pa äbitineye cäme mene toraca gyene: weene bägrä ne jepäniye cäbletäpe ca tope atneji gyene, siige kau bime deedei acrana puupu cabu acwanäneji gyene.”

¹³ Piba taatu bucurage mename seemo cina aboclomäjininisi pui niinäce mename seemo gome. Teepi Acejiyame ne uupera ca ewepyeräjsi egä,

¹⁴ “Jamyacu apaclyera lui mime caburage Acejiyame tääpu myene.

Gawe cabu biname cina ngenecu poode pa läbitipesi, tabe lui bime täápume ngenecu müiji gyene.”

¹⁵ Siige, pui mename seemo cina liba teeme bau ca cabucewe me äcnäriige, piba maamoi ire atwi biname cina teemeteme ajananinisi egä, “Biiri naclege Betelehema me ai mule ne päpäname Yageyame te lui poto cidi me mibibine nijinige.” ¹⁶ Siige, puma cita ca teepi watawata eclige, Mariya Yoosepa naabibine jääpäniisi piijepu teeme bägrä ne jepäniisi pui kau bime deedei acrana puupu cabu. ¹⁷ Liba bägrä ne jepäniisi, piba biname bine pui mene jejananemisi, mename seemo te lipu jejemige teebibine ai bägrä poto cidi me. ¹⁸ Iyeta lui cina itecijemige, cälu te jitemige pui maamoi ire atwi biname bime mene poto cidi me, ¹⁹ yepä Mariya teeme ngenecu bora icranemige iyeta pui mene bine. Tabe baborage ngene jotwananige peei poto cidi me. ²⁰ Pui maamoi ire atwi biname cina piba äcnäriige teeme cewe me. Teepi Acejiyame ne uupera ca ewepyeräjsi iyeta gwidape täápume teepi lui itecijemige piijepu jepänemisi. Yoo, iyeta pepu äbitige mename seemo te lipu itu tejemumi. Siige.

Teepi Ngii Einäsi Yeesu

²¹ Eit bimu ingwe ca padare te tatyaramtige bägrä täápume Acejiyame me cewecu mule wawename tääpe matikolä iirputa ca. Teepi teebine ngii einäsi Yeesu. Peese nyene pui ngii mename seemo te lui Mariya ne jwaajepi tabe mäpumäpu piba lica ge pui padare cabu.

Yeesu ne Ecanäsi Babo Iiwäreja Mete me

²² Yoo, padare te piba tatyaramtige Yoosepa naabi Mariya Acejiyame me cotre mule cängena wawename, Moose lui ne itu soogäruji marnga äyeblyngta poto cidi me. Teepi pui yepä padare cabu bägrä ne ecanäsi Yerusalema me teebine Yageyame täápume mara me wawename. ²³ Yoo, mime Yageyame me Oogäräneji Mene pisi nyene egä iyeta niinäce aplimläneji imäbägrä bine müiji Acejiyame täápume mara me wawename, cuta piijepu niinäce aplimläneji rooriye ngeerangera cibi plongo bine müiji Acejiyame Yageyame täápume mara me wawename. ²⁴ Siige, puga Yeesu me mage babe cina teeme owecu gwidape Acejiyame ne ecäräsi iiwärejame marnga äyeblyngta mule apirame, ingle mime Yageyame me Cotre Mene jücenige egä müiji neeneni giwi ele, coo neeneni gimäe plongo ca iiwäreja pui mule me apira täápume.

²⁵ Yoo, puga ge Yerusalema babo cewe cabu yepä biname ngii Simeona. Tabe müjirage biname ge; Acejiyame bau irecu lätumutanuge. Tabe Acejiyame me padare ne jewagrienge Israela biname bine teeme niya cabu ca äsecrera. Aceji Seemo lui teeme cabu yaanajuge, ²⁶ teebine ituge jaji egä, “Maane lica budre päpäna ngälu maane Yageyame me biname ne cire jepänepi, Israela biname cina lui ne jewagrijenisi teebibine niya cabu ca äsecrera.”

²⁷ Yoo, pui bimu cabu tabe iiwäreja mete caale bora abacitige. Piba Yeesu me mage babe cina bägrä ne ecanäsi pui mete puupu cabu me, Cotre Mene teeme poto cidi me cängena wawename. ²⁸ Simeona bägrä ne teeme ime ca ecätige, Acejiyame ne piba eso ecäriige egä, ²⁹ “Oo, Yageyame, cane määme kaakesea bägrä ngenecu poode cama budre pagege, ingle maane lui mene cebine itu najujite page toraca me bäbitige.

³⁰ Cane irecu ca bii jepänine määme biname, cibibine lui te cirege niya cabu ca äsecrera,

³¹ maane lui poto cidi me ituge jaji tabe aboclomtenige iyeta biname bime opo gaabe.

³² Tabe ngale pana pagege äbita gaabe ceerame maramara gawe biname bine niya cabu ca äsecrera,

piijepu jamyacu apaclyera ne acaname määme Israela biname bime bau me.”

³³ Siige, bāgrā me mage babe cina călu te jăătige Simeona me mene tăăpume. ³⁴⁻³⁵ Simeona teebibine miiji jaawenānige teeme mene ca, piba bāgrā me mage Mariya ne umle mene jojige egā, “Maane ngenecu măpu cirege pāpāna, epu pana turikā te määme ngenecu lipu cire naatrapepi, ingle bucurage Israela biname cina ai bāgrā ne cire jăägypesi piba peei cabu ca teeme măpu daremu pāpāname. Yepā, nuuja cina babo miiji teeme bau ca cirege pāpāna. Yoo, Acejiyame teebine pa yaaboclomtepi Israela biname bime tăăpume, piyepu lui cina teebine jăāsādusi, teepi teeme niija ngene atwanena pepu yaaboclomājemusī.”

³⁶ Siige, cuta puga ge yepā Acejiyame me mename biname, magebi gwene, teeme ngii Ana tune. Teeme babe me ngii Panuela, Asera me ingle cabu ca. Tabē molyege gwene, lui te teeme mamye cabu rooriye ne ecatige, ten cama seben kāmāge taatu onajige, ³⁷ piba tabē cuubla waanajepi ngālu pui padare eitifooa kāmāge oomlaname. Tabē lica nuuja gome waacluge, yepā iiwāreja mete caale bora waanajuge ciye bimū, Acejiyame me ngii ne yaawepāntuge irecu ātumuta ca cuta piyepu deedei căco lenaja ca. ³⁸ Tabē mameta me toclige, pui padare Simeona mene jicemige. Tabē Acejiyame ne eso ecārige teeme Bāgrā tăăpume, piba mene pui bāgrā poto cidi me jejananemige iyeta biname bine, Yerusalemā ngalebora lui cina Acejiyame me padare ne jewagrijenisi teebibine niija cabu ca āsecrerame.

Teepi Ācnārānisi Nasareta Cewe me

³⁹ Teepi liba iyeta pui cotre mule epiremāsī, lui Yageyame me Oogārāneji Mene cabu, piba Galilaya gawe cabu teeme cewe Nasareta me ācnārānisi. ⁴⁰ Bāgrā te uutige, kokre ābitige. Tabē babo umle cama ābitige, piyepu Acejiyame te teebine babo miiji me jewenanige.

Yeesu Liba Imābāgrā Jage, Tabē Iiwāreja Mete me Ādige

⁴¹ Yoo, iyeta kāmāge gaabegabe Yeesu me mage babe cina Yerusalemā me waatnetnejāsī Āsuplengta trii tăăpume, Israela biname bime āsecrera Aikupito cabu ca ngene apename. ⁴² Yeesu liba twelb kāmāge joomlige, tabē teeme mage babe cama pui trii tăăpume ādige, teeme mule lipu ge. ⁴³ Yoo, iyeta pui trii mule liba apirinini, teeme mage babe liba gaabe cabu aalige cewe me acnenutame, teeme bāgrā Yeesu lui Yerusalemā je puma enajige, yepā mage babe nuuja umle lica ge peei poto cidi me. ⁴⁴ Teepi apu jaangige egā tabē niināce gaabe me biname cama bādige, peei name pi pui bimū teepi papa aalige ngālu māmleteca me, piba giye jecitāsī teebine ārngime teeme binamewale bau ca, piyepu gaabe cabu lui nuuja teeme biname cina otninisi teeme bau ca. ⁴⁵ Yepā, teepi teebine lica jepānāsī, peei name pi acnenutāsī Yerusalemā me teebine puma ārngime. ⁴⁶ Neeneni bimū ingwe ca teepi teebine iiwāreja mete caale bora je jepānāsī, poto abiberāja biname cama adnatāneji ge. Tabē teebibine itemlājemige piyepu teeme mene cāngena jitecijemige. ⁴⁷ Iyeta biname lui cina teeme mene jitecijisi, călu te jitemige teeme miiji daremu mene piyepu teeme umle poto cidi me. ⁴⁸ Teeme umle lica ge cina călu te jăătige liba teebine puma jepānāsī. Mage te jejige egā, “Cāme bāgrā, maane ngeno me cibibine pepu niwenite? Määme babe cama cine mage ngenecu măpu cama meebine năārngenago.”

⁴⁹ Tabē teebibine mene jaajige egā, “Weene ngena tăăpume cebine nārngeniye? Baa, weene umle lica gegi egā cane miiji căme Babe me mete cabu nanajenige?” ⁵⁰ Yepā, teepi teeme mene ne opo lica ewatnāsī.

⁵¹ Yoo, Yeesu ten cama acnenutige Nasareta cewe me. Tabē teeme mene iyeta padare cāngena yăatecijanuge. Teeme mage te iyeta pui mule bine ngenecu bora icranemige. ⁵² Siige, Yeesu babo ābitige, piyepu toraca umle cama ābitige. Biname cina teeme tăăpume ngenecu miiji me ābitinini, Acejiyame cuta piyepu ngenecu miiji ge teeme tăăpume.

3

Yoane Niije ca Āciseja Biname te Mene Jejananemige

(Matayo 3:1-12; Mareko 1:1-8; Yoane 1:19-28)

¹ Yoo, padare apu ge: Fiftin kāmāge cama Babo Mopeyame Tiberiyu pui gawe ire jetwige Rooma cewe cabu ca. Poto teeme mameta biname ai fooa cina ai gawe maramara ire jetwemisi. Pontiyu Pilato te Yuudea gawe ne ire jetwige, Heroda te Galilaya gawe ne ire jetwige, teeme naane Pilipo te Iturea piyepu Trakoniti gawe bine ire jaatwige, piyepu Lusaniya te Abilene gawe ne ire jetwige. ² Pui padare cabu Anas piyepu Kayapa lui iiwāreja mope biname ge. Yoo, pui padare cabu Acejiyame me mene te tatyaramtige Sakariya me bāgrā Yoane bau me. Tabē lui puga ge daapo taatu cewe cabu je. ³ Tabē piba otnetnājige iyeta cewe maramara Yoridana baduge wajwa ta, biname bine jejananemige egā, “Weene weeme niija mule cabu ca atatrōngārīneye Acejiyame bau me, niije ca āciseja ne ecateye weeme kirece mule ne awabudnitame, siige Acejiyame te weeme niijaniya mule bine pa

yääyblengemepi.”⁴ Yoo, mename biname Isaya te mene itu soogäremuji Yoane poto cidi me egä,

“Daapo taatu cewe cabu biname te babo tagepogogo ca cire jiicepi egä,

Yageyame me gaabe emaceträjäye,
weeme mule bine conocäco jewenemeye teeme otni täápume.

⁵ Iyeta payapaya bine miiji äclidna,
piiyepu iyeta dorodoro gawe bine miiji ämuleca.

Cubecube gaabe bine miiji conocäco waweneca,
piiyepu dräcudräcu gaabe bine miiji lale wawena.

⁶ Piba iyeta biname cina pa jääpänepesi Acejiyame me niya cabu ca äsecrera teeme täápume.’”

⁷ Siige, bucurage biname cina Yoane bau totninisi niye ca äciseja täápume. Tabe teebibine jejemige egä, “Weeme angletneja lui cobyame pana gyene! Weene ai äciseja mule ca singi uucraname niya mule cabu ca, piba muye puupu cabu me lica otni, yepä weene lica toraca Acejiyame bau me latatrongärininuye.”⁸ Weene miiji pui mule bine waweneca lui cina yaaboclomäjininusi egä weene niya mule cabu ca ituge atatrongära. Gone weemeweme lajananinuye egä, ‘Cine Abrahamo me kaakesaare gemi, peei name pi miiji gemi. Cane jijenininine egä Acejiyame ibibi gyene nuuja bägrä Abrahamo täápume wawena ai kula cabu ca, tabe liba singi gyene.’⁹ Weene epu pana gemi uli liiyepu. Yäpä acitäneji gyene uli maape je. Iyeta uli lui cina miijirage kuu lica, yääyemepesi, pa yaargawemepesi, muye cabu me pa yiisabepesi ayime.”

¹⁰ Siige, biname cina teebine itemlisi egä, “Cine ngena ne miiji wawena?”

¹¹ Tabe teebibine jejemige egä, “Laati te neeneneni cäbletääpe cama, miiji gyene yepä ceera biname ne lui teeme cäbletääpe lica gyene, piiyepu lui cina deedei cama yaacrajuge, miiji gyene pacupacu ätreca.”

¹² Poto täks rarekaake atomleca biname cina cuta teeme bau otninisi niye ca äciseja täápume, siige itemlisi egä, “Abiberäja biname, cine te cuta ngena miiji wawena?”

¹³ Tabe teebibine jejemige egä, “Gone rarekaake papa uutecrena, yepä weene biname bime toraca täks rarekaake taatu yaawadanemuye.”

¹⁴ Piba poto cubu biname cina teebine itemlisi egä, “Cine cuta lipu? Cine ngena ne miiji wawena?”

Tabe cuta teebibine jejemige egä, “Gone nuuja biname bime rarekaake juutecranemuye, coo rarekaake walya aitneja cabu ca gone yaacatuye, yepä weeme kaakesa daremü pui rarekaake ibibi yaawadanemuye. Gone cerämu poto täápume singi.”

¹⁵ Yoo, iyeta Israela biname cina niya cabu ca äsecrera biname ne jewagrijenisi. Teepe liba Yoane me umle mene itecijemige, piba ngene jotwananinisi egä pama tabe sine.¹⁶ Piba Yoane teebi-bine jejemige egä, “Cane weebibine niye ca jicisäjenininine Acejiyame me ngii cabu, yepä lui biname te tädenige, tabe cäme bau ca epu baborage gyene egä cane ibibi lica gäne teeme ernge gwidape seea bine iibirame. Tabe weebibine Aceji Seemo ca piiyepu muye ca pa jicisäjipi.”¹⁷ Teeme padare cudecewe lica gyene miiji mule biname piiyepu niya mule biname bine abelename. Tabe epu pana gyene calwacupi biname liiyepu lui teeme wiiti kuu ämleceja gwidape pisi nyene ime cabu. Tabe miiji kuu bine pa jaabalodnemepi, piba pa yaawademepi mete me, yepä mälwä pa juubudäremepi ätuma cäco muye cabu.”

¹⁸ Yoo, bucurage mene ca Yoane te biname bine cängena yaablawäjemuge, teebibine miiji mene jaajanemuge.¹⁹ Tabe cuta Mopeyame Heroda ne eblawäjige, ingle Heroda teeme naane me coga Herodiyas juutecrige, teeme coga me jowenige, piiyepu bucurage nuuja niya mule bine jaawenemuge.²⁰ Piba Heroda nuuja niyarage mule ne jewenige, tabe liba Yoane ne krokeciye mete bora ecitige.

*Yeesu Niye ca Äciseja Mule ne Ecatige Yoane bau ca
(Matayo 3:13-17; Mareko 1:9-11)*

²¹ Iyeta biname liba Yoane bau me seclige, tabe te teebibine niye ca äcisejame Acejiyame me ngii cabu, cuta Yeesu äciseja ne becatige Yoane bau ca. Egäcäro Yeesu Acejiyame bau irecu ätumutige, cabucewe te äplige,²² piiyepu Aceji Seemo te täinige teeme papa cabu me gimäe ele pana opo cama. Siige, tagepogogo te cabucewe ca tiicige egä, “Maane cäme ngenecurage bägrä gäte. Cane baborage ngenecu miiji gäne mäame täápume.”

*Yeesu me Kaakesaare poto cidi me
(Matayo 1:1-17)*

²³ Yeesu liba gije jebacitige teeme abiberäja kaakesea waweneme, tabe piba teeti kämäge cama ge. Biname cina apu jengemige tabe Yoosepa me bägrä ge. Yoosepa me babe lui Heli sine; Heli me babe lui Matat sine;²⁴ Matat me babe lui Leebi sine; Leebi me babe lui Melki sine; Melki me babe lui Yanai sine; Yanai me babe lui Yoosepa sine;²⁵ Yoosepa

me babe lui Matatiya sine; Matatiya me babe lui Aamos sine; Aamos me babe lui Nahuma sine; Nahuma me babe lui Cesili sine; Cesili me babe lui Nagai sine; Nagai me babe lui Maati sine; ²⁶ Maati me babe lui Matatiya sine; Matatiya me babe lui Semei sine; Semei me babe lui Yoseka sine; Yoseka me babe lui Yooda sine; ²⁷ Yooda me babe lui Yoanan sine; Yoanan me babe lui Reesa sine; Reesa me babe lui Serubabelu sine; Serubabelu me babe lui Salatiyelu sine; Salatiyelu me babe lui Neeri sine; ²⁸ Neeri me babe lui Melki sine; Melki me babe lui Aadi sine; Aadi me babe lui Kosam sine; Kosam me babe lui Elmada sine; Elmada me babe lui Cera sine; ²⁹ Cera me babe lui Yosuwa sine; Yosuwa me babe lui Eliyesa sine; Eliyesa me babe lui Yorim sine; Yorim me babe lui Matat sine; Matat me babe lui Leebi sine; ³⁰ Leebi me babe lui Simeona sine; Simeona me babe lui Yuuda sine; Yuuda me babe lui Yoosepa sine; Yoosepa me babe lui Yoonam sine; Yoonam me babe lui Eliyakima sine; ³¹ Eliyakima me babe lui Melea sine; Melea me babe lui Mena sine; Mena me babe lui Matata sine; Matata me babe lui Natana sine; Natana me babe lui Daawida sine; ³² Daawida me babe lui Yese sine; Yese me babe lui Obeda sine; Obeda me babe lui Boasa sine; Boasa me babe lui Salamona sine; Salamona me babe lui Naasona sine; ³³ Naasona me babe lui Aminadaba sine; Aminadaba me babe lui Arama sine; Arama me babe lui Hesoroma sine; Hesoroma me babe lui Perese sine; Perese me babe lui Yuuda sine; Yuuda me babe lui Yakobu sine; ³⁴ Yakobu me babe lui Isacako sine; Isacako me babe lui Abrahamo sine; Abrahamo me babe lui Teera sine; Teera me babe lui Nahora sine; Nahora me babe lui Seruge sine; ³⁵ Seruge me babe lui Reeu sine; Reeu me babe lui Pelege sine; Pelege me babe lui Ebere sine; Ebere me babe lui Seela sine; ³⁶ Seela me babe lui Kainan sine; Kainan me babe lui Arpasada sine; Arpasada me babe lui Seem sine; Seem me babe lui Nooa sine; Nooa me babe lui Laameke sine; ³⁷ Laameke me babe lui Metusela sine; Metusela me babe lui Eenoka sine; Eenoka me babe lui Yaarede sine; Yaarede me babe lui Mahalalel sine; Mahalalel me babe lui Kainan sine; ³⁸ Kainan me babe lui Enosa sine; Enosa me babe lui Seeta sine; Seeta me babe lui Adamu sine; piyepu Adamu me babe lui Acejiyame sine.

4

Satani te Yeesu ne Epicetnärige (Matayo 4:1-11; Mareko 1:12-13)

¹ Yeesu liba acnenutige Yoridana Baduge gome ca, Aceji Seemo te babo äbitige ten cabu, teebine ecanige daapo taatu cewe me. ² Puga Satani te teebine mage epicetneräjige footi bimu cama. Iyeta pui padare tabe nuuja deedei lica erwige, peei name pi pui footi bimu liba apirininisi, tabe baborage loolomecewe ge.

³ Satani piba teebine jejige egä, “Maane liba Acejiyame me Bägrä gäte, ai kula ne jeji buluduu me atepengtame.”

⁴ Yepä, Yeesu jejige egä, “Oogäräneji Mene te apu jiicenige egä, ‘Deedei taatu te ireclota lica yäcärimuge biname bine.’”

⁵ Piba Satani teebine caburage me ecanige, wata jewabäjige iyeta maramara mope biname bime gawe, ⁶ jejige egä, “Cane meebine yageyame pa naawenepene iyeta ai gawecewe täapume, piyepu iyeta teeme biname piyepu iyeta teeme jamyacu gwidape bine mäame ime cabu pa yaacranemepene, ingle cane te iyeta ituge waadena, peei name pi cane laati ne singi ceera, cane miiji gäne teebine ceerame. ⁷ Maane liba kokorare ca äapednutenite cäme täapume cebine awejename, piba ai gwidape iyeta lui mäami nemi.”

⁸ Siige, Yeesu jejige egä, “Oogäräneji Mene te jiicenige, ‘Yageyame mäame Acejiyame ne yaawejanuye, cuta teeme taatu singi ne jewenepi.’”

⁹ Puma cita ca Satani teebine Yerusalem me ecanige, iiwäreja mete caburage toro cabu etecwantige, puma jejige egä, “Maane liba Acejiyame me bägrä gäte, maane ama cita ca uuplacamti gawe me, ¹⁰ ingle Oogäräneji Mene te jiicenige egä, ‘Acejiyame te teeme mename seemo bine pa jaajemepi meebine cängena ire atwime. ¹¹ Teepe meebine teeme ime cabu pa naacanepesi, piba maane mäame ernge ne kula cabu lica pa jimudnärepi.’”

¹² Yepä, Yeesu jejige egä, “Oogäräneji Mene te jiicenige egä, ‘Maane gone läbitute Yageyame mäame Acejiyame ne apicetnärime.’”

¹³ Siige, Satani liba iyeta epirige Yeesu ne apicetnära, tabe piba teebine ebmalige, ingwe padare ne jewagrijenige.

Yeesu Teeme Kaakesea ne Jegednige Galilaya Probins cabu (Matayo 4:12-17; Mareko 1:14-15)

¹⁴ Puma cita ca Yeesu acnenutige Galilaya probins me; Aceji Seemo me kokre lui ten cama ge. Teeme poto cidi me idre mene ecanisi pui gawe iyeta poto ta. ¹⁵ Tabe biname bine ebiberäjemige teeme maramara abasecretna mete cabu, piyepu iyeta biname cina teebine ewepyeräjisi.

*Nasareta Cewe Biname cina Yeesu ne Jigyisi
(Matayo 13:53-58; Mareko 6:1-6)*

¹⁶ Yeesu ädige Nasareta cewe me, tabe luma babo me äbituji. Israela biname bime Sabade bimu cabu, tabe abasecretna mete me ädige, teeme mule liiyepu. Tabe puma abujängtige Oogäräneji Mene acnemame. ¹⁷ Teepi peba ecärisi Isaya lui ne soogäruji. Tabe peba ne jüitnige, jepänige ai mene luma oogäräneji ge, siige ecnemige egä,

¹⁸ "Yageyame me Seemo pisi nyene cäme cabu.

Tabe peei name pi cebine itu najepi teeme Miiji Mene owecu mete biname bine jajanename.

Tabe cebine itu nätyepipi krokeciye mete biname bine mene jajanena teeme äsecrera poto cidi me,

piiyepu irecu määsumäsu biname bine jajanena egä teepi teeme irecu ca cängena cirege päpäne.

Tabe cebine itu nätyepipi biname bine ätityerame teeme mäpu ireclota cabu ca äsecrera,

¹⁹ piiyepu iicemame egä, "Yageyame me ätityera padare lui age sena."

²⁰ Siige, Yeesu piba peba ne iclubicige, kaakesea biname bau me ewecnistige, adnatige. Iyeta biname pui abasecretna cabu teebine ire jetwisi. ²¹ Tabe teebibine jejemige egä, "Page ai Oogäräneji Mene te toraca me äbitenige weeme ätecija cabu."

²² Siige, teepi iyeta singi ge teeme mule tääpume, cälu te jitemige, ingle babo miijirage mene täsige teeme tage cabu ca. Piba teemeteme ätemläjinisi egä, "Nää, ai lui Yoosepa me bägrä gyene?"

²³ Yeesu piba teebibine jejemige egä, "Cane umle gäne weene singi cebine mime sasa mene jajime egä, 'Dokta maane määmämu miiji me äbiti!' Weene cuta singi cebine jajime egä, 'Cine mene nitecijinige egä maane ciitaca mule ne Kaprenauma cewe cabu tewenemumete. Maane peei bine ama jebenemi määmerage cewe cabu!' ²⁴ Cane weebibine jijenininine egä ngänu gyene nuuja cewe biname cina mename biname tääpume singi, teemerage cewe biname cina teeme mene lica jaacatusi. ²⁵ Yoo, weene mename biname Eliya me padare poto cidi me ngene jotwananineye. Puga ngupe te lica seciruji nesae kämäge cebo cama, piiyepu gane te täduji iyeta poto ta. Cane weebibine jijenininine egä cuubla bucurage ge pui padare Israela gawe cabu, ²⁶ yepä Acejiyame te lica Eliya ne jityepuji teeme yepä ne ätityerame. Eewe, Acejiyame teebine jityepuji Sidona gawe cabu, Sarepata cewe me, puga tabe yepä cuubla ne utityäruji. ²⁷ Yoo, weene ngene jotwananineye cuta nuuja mename biname Elisa me padare poto cidi me. Piba puga ge Israela gawe cabu bucurage biname niiyarage tääpe pita cama, yepä lica teeme yepä te miiji ne jepänuji, yepä Nacamano lui Suriya gawe biname ge, tabe taatu miiji ne jepänuji. Yoo, pui sasa mename biname cina ätrunga ne jepänäsi nuuja gawe cabu, yepä lica teeme Israela biname bime bau ca."

²⁸ Pui abasecretna biname cina liba Yeesu me mene itecijemige, baborage claabe te teebibine joomlemige. ²⁹ Teepi abujänginisi, teebine iyecräjisi cewe cabu ca, ecanisi pui podo papa cabu, teeme cewe lui podo wajwa cabu jage, siige teepi singi teebine puma cita ca ajarame, ³⁰ yepä Yeesu teeme ngalebora ädige, siige ebmalemige teebibine.

*Yeesu Niya Cable ne Iyecräjige
(Mareko 1:21-28)*

³¹ Yeesu puma cita ca Kaprenauma cewe me ädige, lui gyene Galilaya Probins ngalebora. Tabe biname bine ebiberäjemige Sabade bimu cabu. ³² Teepi iyeta mutäcäco äbitininisi teeme abiberäja mene name pi, ingle teeme mene kokre piiyepu conocäco cama ge. ³³ Abasecretna mete cabu puga ge yepä biname niya cable te lui ne yaacanange. Tabe babo tage ca jejige egä, ³⁴ "Yeesu Nasareta ceweyame, maane singi ngena wawename cime tääpume? Maane cibibine sabe wawename? Cane umle gäne maane laasi näte: maane lui Acejiyame me conocäcorage Bägrä gätel!"

³⁵ Yeesu niya cable ne kokre cama jejige egä, "Maane bojä naagege. Tasati teeme trupa cabu ca!" Niya cable te pui biname ne gawe cabu izarige, iyeta biname bime opo gaabe piba tasatige teeme cabu ca, yepä teebine lica nuuja niya jebenige.

³⁶ Iyeta peei biname mutäcäco äbitininisi, siige teemeteme ätemläjinisi egä, "Ai lipu mene gyene? Teeme conocäco piiyepu kokre pisi nyene niya cable bine mene jajime, siige teepi täsige!" ³⁷ Siige, teeme poto cidi me idre ecanisi pui gawe iyeta poto ta.

*Yeesu Bucurage Biname bine Miiji me Jewenemige
(Matayo 8:14-17; Mareko 1:29-34)*

³⁸ Yeesu piba abasecretna mete ne sebmaliige, Simona me mete me ädige. Simona me gite molyege puga ge gebale cama ge. Pita name pi teepi Yeesu ne jejisi teebine ätityerame.

³⁹ Tabe ädige teeme ute puupu gome jeclajutige, teeme gebale pita ne jejige teeme bau ca

äyebtingtame. Siige, pita te obmalige teebine, tabe piba taatu abujängntige, teebine mogobi jewenemige.

⁴⁰ Yoo, bimu äpula ingwe ca, iyeta biname cina teeme pita biname bine sewademisi Yeesu bau me. Tabe ime ecitanige teeme papa cabu, iyeta miiji me jewenemige. ⁴¹ Niija cable cina poto pui biname bine sebmalemisi. Teepi babo tage ca jüicemisi egä, “Maane Acejiyame me Bägrä gäte!”

Yeesu teebibine bojä jewenemige, ingle teepi umle ge egä tabe Keriso sine, Israela biname cina lui ne jewagrijenisi teebibine niija cabu ca äsecrerame.

*Yeesu Mene Jejananemige Maramara Abasecretna Mete cabu je
(Mareko 1:35-39)*

⁴² Baani liba siplige, Yeesu pui cewe ne sebmalige, ädige biname cäco cewe me. Siige, biname cina gije abacitinisi teebine ärngime, siige liba jepänisi, jejisi egä, “Gone cibibine nibmalininute!” ⁴³ Yepä, tabe jejemige egä, “Ai Miiji Mene Acejiyame te biname bine Waadena poto cidi me, cane miiji cuta nuuja cewe maramara cabu jajanena, ingle Acejiyame peei tääpume cebine itu nätyepuji.”

⁴⁴ Piba Yeesu biname bine mene jejananemige teeme maramara abasecretna mete cabu Yuudea gawe iyeta poto ta.

5

*Yeesu Poto Cibubade Biname bine Ala Tesoglecmige
(Matayo 4:18-22; Mareko 1:16-20)*

¹ Nuuja taje Yeesu liba Genesareta* Sawa ligi je jeclajutige, biname cina seclige, teebine jewaclomtisi, teeme mameta me ätyepəcäjininisi Acejiyame me mene teeme bau ca ätecijame. ² Tabe piba neeneni poo bine jääpäniige doro cabu, cibu bade biname lui bine aabmalisi net äcisejame. ³ Yeesu piba acenutige yepä pui poo cabu, pui lui Simona me poo ge, säige teebine itemlige poo ne matikolä atyepelitame niije cabu me. Yeesu poo cabu adnatige, piijepu puma cita ca biname bine cängena ebiberäjemige.

⁴ Tabe liba mene jajanena siige, Simona ne jejige egä, “Piijeme ai poo ne jewetänti uugle niije cabu me. Weeme net bine niije hora icranemeye cibu oomläjecame.”

⁵ Simona piba teebine jejige egä, “Babo biname, cine ciije baborage kaakesea jewenisi ngälu sewalige, piijepu nuuja cibu bine lica joomlemisi, yepä mäame mene name pi, cane net bine icranenenine.” ⁶ Teepi peei jewenisi, piba bucurage cibu bine joomläjemisi, net te mameta ädereca cibu mäpu name pi. ⁷ Teepi teeme cibubade binamewale nuuja poo cabu ca ime ca tewenemisi, teebibine ätityerame. Teepi aalige, piba neeneni poo bine cibu ca gigri jäängärisi ngälu poo cina mameta abuma. ⁸ Yoo, Simona Peteru liba peei mule ne jepänige, kokorare ääpednutige Yeesu gome, teebine jejige egä, “Yageyame, cäme bau ca äyebtingti, ingle cane conocono mule biname gäne!”

⁹ Tabe peei mene jüicige, ingle tabe teeme biname cama iyeta mutäcäco äbitininisi cibu lipu bucurage jepänemisi. ¹⁰ Cuta teeme nuuja cibubade binamewale Yakobu piijepu Yoane, Jebedayo me bägrä, teepi cuta mutäcäco äbitäsi. Yeesu piba Simona ne jejige egä, “Wälu gone! Weene ingwe ca lica cibu bine joomlemuye, yepä biname bine pa joomlemepeye cäme bau waadename.”

¹¹ Teepi poo neeneni aatecwamtisi doro cabu, piba iyeta gwidape sebmalemisi Yeesu cama otnime.

*Yeesu Lepera Pita Biname ne Miiji me Jewenige
(Matayo 8:1-4; Mareko 1:40-45)*

¹² Nuuja taje Yeesu liba yepä cewe cabu jage, biname puga ge lepera pita cama. Tabe liba Yeesu ne jepänige, teemämu gawe cabu ajarige Yeesu gome, teebine itinärige egä, “Babo biname, maane liba singi gäte, maane miiji gäte cebine pita cäco me wawena!”

¹³ Yeesu ime uutige, teebine joomlige, jejige egä, “Yoo, cane singi gäne. Maane pita cäco äbiti!” Piba taatu pui lepera pita te teebine ebmalige. ¹⁴ Yeesu piba teebine kokre cama jejige egä, “Gone nuuja biname bine ai poto cidi me jaajanenemute, yepä maane conocäco ädi iiwäreja biname bau me, tabe meebine ire pa naatwanäjepi egä maane miiji gäte. Piba mäame owecu gwidape teebine ecäri tabe Acejiyame ne iiwärejame, Moose lipu mule ne ebiberäjemuji. Peei ne jewenepi, piba biname cina umle pa läbitipesi egä mäame pita siige.”

¹⁵ Yepä, Yeesu poto cidi me idre ecananisi iyeta poto ta. Bucurage biname cina piba teeme bau me saacluge teeme mene ätecijame piijepu teeme maramara pita cabu ca miiji me äbitame. ¹⁶ Yepä, tabe liba padare bine jääpänanemuge, piba biname cäco cewe me waatnetnäjuge Acejiyame ne puma awejename.

* 5:1: Genesareta: Genesareta lui nuuja ngii gyene Galilaya sawa tääpume.

*Yeesu Miiji me Jewenige Tääpe Nuuja Poto Budre Biname ne
(Matayo 9:1-8; Mareko 2:1-12)*

¹⁷ Nuuja bimu Yeesu liba biname bine ebiberäjemige, poto Parisea sigu biname piipepu poto cotre abiberäja biname puga adnatäreji ge. Teepi ituge abasecretna iyeta cewe Galilaya Probins cabu ca piipepu Yuudea Probins cabu ca cuta poto lui babo cewe Yerusalema ca. Siige, mime Yageyame me kokre puga ge pita biname bine miiji me wawenecame. ¹⁸ Yoo, poto biname cina piba waaku cabu secanisi biname ne lui me tääpe nuuja poto budre ge. Teepi liga teebine ecanisi mete ngalebora Yeesu me opo gaabe je acitame, ¹⁹ biname ca mete tapanige, peei name pi äblicäco teebine äsinglenta piiyeme. Yoo, teepi piba teebine ecanisi mete toro cabu me, puma bora cängena jewenisi, teebine waaku cabu puma cita ca siyiniisi mete bora biname tomi ngalebora me, Yeesu me opo gaabe je ecitisi. ²⁰ Yoo, Yeesu liba jepänemige egä teepi baborage ätrunga cama gemi, piba tääpe nuuja poto budre biname ne jejige egä, “Cäme biname, maane kälyä gäte määme niijaniya mule cabu ca.”

²¹ Siige, pui Parisea sigu biname piipepu cotre abiberäja biname cina teemeteme ätemläjiniisi egä, “Luma cita ca gyene ai biname, lui te Acejiyame me ngii pepu jiseblecäjenige? Nuuja biname te ibibi lica ge biname bime niija mule äyebhengame, yepä Acejiyame taatu ibibi gyene peei ne wawename.”

²² Yeesu teeme ngene atwanena umle äbitige, teebibine jejemige egä, “Weene ngeno me pepu ngene jotwananiniye weeme ngenecu bora je? ²³ Lui gyene plowa iicana ai pita biname ne jajime egä, ‘Maane kälyä gate määme niija mule cabu ca,’ coo ‘Arpinanti, abujängti, siige ädi?’ ²⁴ Cane weeme tääpume aboclomtenine egä cane lui Acejiyame bau ca tädujine biname me äbitujine, cäme conocäco pisi nyene ai gawecewe cabu biname bime niija mule äyebhengame.” Tabe piba pui tääpe nuuja poto budre biname ne jejige egä, “Cane meebine naajenine, abujängti, määme waaku ne ecati, mete me ädi!”

²⁵ Piba taatu peei biname te iyeta biname bime opo gaabe abujängtige, teeme waaku ne ecatige, gege cama mete me ädige. Tabe Acejiyame ne ewepyeräjenge. ²⁶ Biname iyeta mutäcäco äbitiniisi. Wälu cama teepi Acejiyame ne ewepyeräjisi egä, “Mararage ciitaca mule ne cine page bii jepänisi.”

*Yeesu Leebi ne Ala Tesoglicige
(Matayo 9:9-13; Mareko 2:13-17)*

²⁷ Peei mule ingwe ca Yeesu asatige sawa ligi me, puga babo gaabe gome yepä täks rarekaake uutecrena biname ne jepänige, ngii Leebi. Tabe adnatäneji ge kaakesea puupu cabu. Yeesu teebine jejige egä, “Tädi cane cama otnime.” ²⁸ Piba Leebi abujängtige, teeme kaakesea iyeta gwidape cama ebmalemige Yeesu cama otnime.

²⁹ Siige, Leebi babo soriyomu jewenige Yeesu tääpume. Bucurage täks rarekaake uutecrena biname piipepu nuuja biname cina puga ten cama deedei äbitiniisi. ³⁰ Puma cita ca poto Parisea sigu biname piipepu cotre abiberäja biname lui cina teeme yepä sigu cabu, teepi Yeesu me abiberäja bägrä bine jejemisi egä, “Weene ngeno me deedei äbitiniiniye täks rarekaake uutecrena biname piipepu cotre atropengäja biname cama?”

³¹ Yeesu pui mene itecijige, teebibine jejemige egä, “Biname lui cina miiji birige, teepi singi lica dokta tääpume, yepä biname lui cina pita cama birige, teepi singi dokta tääpume. ³² Yoo, cane lica tädujine biname bine ala asoglecame lui cina apu jaangemuge, egä teepi conocäco biname gemi, yepä cane conocono biname bine ala asoglecame tädujine teeme ngenecu atatrongärame Acejiyame bau me.

*Ätemleja Deedei Ärwäja cäco Lenaja poto cidi me
(Matayo 9:14-17; Mareko 2:18-22)*

³³ Poto biname cina Yeesu ne mene jejisi egä, “Yoane niye ca äciseja biname me abiberäja bägrä cina deedei ärwäja cäco yaacrajuge poto bimu cabu Acejiyame ne awejename, piipepu Parisea sigu biname bime abiberäja bägrä cina cuta peei yepä mule ne jaawenusi, yepä määme abiberäja bägrä cina deedei yäärwäjimusi iyeta bimu gaabegabe.”

³⁴ Yeesu teebibine jejemige egä, “Yoo, Atejäclmuta soriyomu ne liba yaaclitusi, mamye rooriye me binamewale cina deedei ärwäja cäco lica yaacrajuge. ³⁵ Yepä, padare te pa tatyaramtepi liba mamye rooriye ne pa yaacatepesi. Teepi piba pa yaacrajemepi deedei ärwäja cäco.

³⁶ Yeesu ngene ca agli mene jejemige, neeneni mule bine aaboclomtigi. Tabe jejemige egä, “Biname te licarage pläsu ne yääderäruge kirece cäbletääpe cabu ca sasa cäbletääpe bora cabu acitame, ingle peei mule te neeneni cäbletääpe bine sabe jaawenuge: kirece cäbletääpe piba äderera birige, piipepu sasa cäbletääpe miiji opo lica birige kirecerage pläsu cama.” Yeesu pepu jejemige, naace popi tabe singi biname cina umle äbitame egä teepi liba singi Acejiyame me kirece mule ne oomlaname, teepi piba äblicäco sasa saarewale bime

mule bine äcwetna. ³⁷ Tabe piba jejemige egä, “Piiyepu nuuja te kirece waina niije ne lica yaapaduruge gouti tääpe ca wawenäneji sasa ängära gwidape cabu. Tabe liba yaapaduruge, kirece waina niije teeme kokre te sasa tääpe ca wawenäneji gwidape ne yääpluge, ingle tuutnecuge. Siige, waina niije te lapaduruge gawe me piiyepu ängära gwidape te sabe läbituge. ³⁸ Eewe! Umle biname te kirece waina niije kirece tääpe cabu jäängäruge. ³⁹ Yoo, nuuja biname te lica kirece waina niije tääpume singi, tabe liba sasa ne yaapicnantuge, yepä jiiucuge egä, ‘Sasa lui miijirage gyene.’” Siige, Yeesu peei mene biname bine jejemige aboclomtame egä biname cina singi lica sasa mule ne abmalame kirece mule tääpume.

6

*Ätemleja Sabade Cotre poto cidi me
(Matayo 12:1-8; Mareko 2:23-28)*

¹ Israela biname bime Sabade bimu cabu Yeesu teeme abiberäja bägrä cama wiiti calwacupi ngalebora gaabe cabu ädige. Teeme otni cabu abiberäja bägrä cina wiiti mope bine ecrecimisi, ime ca mälwä bine jimlecäjemisi, kuu taatu bine erwäjemisi, gaabe cabu otnetneja biname bime mule lipu ge. ² Poto Parisea biname cina piba abiberäja bägrä bine jejemisi egä, “Weene ngena ne jeweniye? Mime cotre pisi nyene pepu kaakesea wawena Sabade bimu cabu!”

³ Yeesu teebibine jejemige egä, “Nää, weene lica mene ituge acnema Daawida teeme biname cama ngena itu jewenuji, teepi liba loolomecewe icrajuji? ⁴ Tabe Acejiyame me iiwäreja mete me abacituji, buluduu ne ecatuji, lui Acejiyame tääpume iiwäräneji ge, peei ne erwuji, piiyepu lui biname ten cama teebibine ecäremuji teeme deedei tääpume. Yoo, mime tääpume cotre gyene buluduu puma cita ca acata loolo me, yepä iiwäreja biname taatu peei bine yäärwäjimusi.” ⁵ Siige, Yeesu piba jejemige egä, “Yoo, cane lui Acejiyame bau ca tädujine biname me äbitujine, cane Yageyame gäne Sabade bimu tääpume. Cäme conocäco pisi nyene jajime ai bimu cabu ngena wawename.”

*Biname Lui me Camu Poto Ime Duudemu Ge
(Matayo 12:9-14; Mareko 3:1-6)*

⁶ Cuta nuuja taje Sabade bimu cabu, Yeesu abasecretna mete me abacitige biname bine ebiberäjemige. Biname puga ge lui me camu poto ime duudemu ge. ⁷ Poto cotre abiberäja biname piiyepu Parisea sigu biname cina singi ingle ne päpäname Yeesu ne aitnejame. Teepi peei name pi Yeesu ne cängena ire jetwisi egä tabe pama pui biname ne miiji me jewenige Sabade bimu cabu. ⁸ Yepä, Yeesu teeme ngene atwanena umle ge, pui biname lui me ime duudemu ge, teebine jejige egä, “Abujängti, tädi aima niinäce gaabe me.” Puma cita ca pui biname te abujängtige, Yeesu gome jeclajutige. ⁹ Yeesu piba teebibine jejemige egä, “Yoo, cäme ätemla pisi nyene weeme tääpume. Cotre mene te lipu jiiicene, mine ngena miiji ge wawena Sabade bimu cabu: biname ne miiji wawena, coo biname ne niija wawena? Biname ne ätityera ireclotame, coo biname me ireclota ne sabe wawena?” ¹⁰ Tabe iyeta biname bine cängena ire jetwemige, piba peei ime duudemu biname ne jejige egä, “Määme ime tuuti.” Tabe pepu jewenige, siige teeme ime te miiji me äbitige.

¹¹ Yepä, pui cotre abiberäja biname piiyepu Parisea sigu biname teepi iyeta mage claabe te joomlemige, teemeteme ätemläjinisi egä, “Mine ngena jewenenisi ai biname tääpume?”

*Yeesu Twelb Ätyepäneji Biname bine Jejäcremige
(Matayo 10:1-4; Mareko 3:13-19)*

¹² Nuuja taje Yeesu podo cabu me jegelige irecu ätumulame. ¹³ Tabe iyeta pui ciije puma enajige Acejiyame bau irecu ätumulame. Bimu te liba tacitige, tabe teeme abiberäja bägrä bine ala tesoglecmige teeme bau otnime, piba twelb bine jejäcremige pui tomi cabu ca teeme ätyepäneji biname tääpume äbitame. ¹⁴ Age tema pui twelb biname: Simona tabe lui ne einige Peteru ca, piiyepu teeme igane Andrea; Yakobu piiyepu Yoane; Pilipo piiyepu Bartoloma; ¹⁵ Matayo piiyepu Tooma; Yakobu Alapeus me bägrä piiyepu Simona, lui Kanana sigu biname ge; ¹⁶ Yuuda, lui nuuja Yakobu me bägrä ge, piiyepu Yuuda Isakariyota, lui te Yeesu ne budre tääpume awaba biname äbitige.

*Yeesu Biname bine Ebiberäjemige piiyepu Pita cabu ca Miiji me Jewenemige
(Matayo 4:23-25)*

¹⁷ Yeesu pui biname cama täimige podo cabu ca, jeclajutige gawe miiji cabu. Bucurage teeme abiberäja bägrä puga ge ten cama, piiyepu bucurage biname lui cina teeme bau me seclige iyeta Yuudea gawe cabu ca, piiyepu babo cewe Yerusalema cabu ca, cuta piiyepu neeneni malu cewe Turo piiyepu Sidona cabu ca. ¹⁸ Teepi seclige teeme mene ätecijame piiyepu teeme maramara pita cabu ca miiji me äbitame. Lui bine niyaniya cable cina niiyarage ngene atwanena cama yaawadanemusi, teepi cuta miiji me äbitinisi. ¹⁹ Yoo,

iyeta biname cina singi teebine oomlaname, ingle kokre te teeme cabu ca tasatenige teebibine iyeta miiji me wawename.

*Ngenecu Miiji piiyepu Ngenecu Mäpu
(Matayo 5:1-12)*

- ²⁰ Yeesu teeme abiberäja bägrä bine ire jetwemige, jejemige egä,
“Weene lui owecumete pana inajininige, ngenecu miiji äbitineye,
ingle weene Acejiyame me waadena cabu itu yääbäcnepeye.
- ²¹ Weene lui loolomecewe gemi page, ngenecu miiji äbitineye,
ingle weene camuge cirege päpäna.
Weene page lui cina ele ingenininige, ngenecu miiji äbitineye,
ingle weene ngange gege cama cirege.
- ²² Ngenecu miiji äbitineye biname cina liba weebibine jimugetinusi, jigyunusi, jicnecinusi,
coo piiyepu weeme ngii sabe jiwenininusi, ai name pi ingle weene cebine nätrunguye,
cane lui te Acejiyame bau ca tädujine biname me äbitujine.
- ²³ Yoo, piba ngenecu miiji me äbitineye piiyepu gege cama uuplatäjineye, ingle miijirage
daremu pisi nyene weeme täápume cabucewe je. Yoo, teepi lui cina weebibine niija
jiwenininusi, teeme kaakesaare cina pepu mule itu tewenenanemumesi Acejiyame me
mename biname bime täápume.
- ²⁴ Yepä, weene lui cina dogwe biname pana inajininige page, weene ngenecu mäpu
äbitineye,
ingle weeme lui plowa pana ireclota ituge päpäna, siige cirege apira.
- ²⁵ Weene lui cina camuge apanininiye page, ngenecu mäpu äbitipeye,
ingle weene loolomecewe cirege lenaja.
Piiyepu weene lui cina ngange cama inajininige page, weene ngenecu mäpu äbitipeye,
ingle weene ele cire ingenitipi.
- ²⁶ Ngenecu mäpu me äbitipeye, weene lui bine iyeta biname cina jäje iwepyeräjininusi. Yoo,
teeme kaakesaare cina pepu mule itu tewenenanemumesi walya mename biname bime
täápume.”

*Abiberäja Mene Cubuyame poto cidi me
(Matayo 5:38-48; 7:12a)*

- ²⁷ Yeesu cääri biname bine mene jejemige egä, “Cäme mene piti nemi weeme täápume
lui cina cebine nätecjeniyeye egä weeme cubuyame bime täápume singi inajipi. Lui biname
cina weebibine jimugetinusi, weene teebibine cuta yäätityeräjemuye. ²⁸ Lui biname cina
weebibine mene ca niija me jiwenininusi, weene Acejiyame ne yaawejanuye teeme
miiji täápume. Cuta teeme täápume irecu lätumutinuye lui cina weeme ireclota mäpu me
jiwenininusi. ²⁹ Yoo, biname te liba weeme nuuja ne yoororuge lakace cabu, tabe miiji
cuta atatronga nuuja poto lakace ne ceerame. Biname te liba weeme nuuja me ätrugera
gwidape ne yaacatuge, gone teebine iibana cuta soto ne acata. ³⁰ Lui biname te weebibine
liba itinärinuge, weene teeme singi gwidape yääcärüye, piiyepu biname te liba weeme
gwidape ne yaacatuge, gone teebine jaajuye peei ne awecnistame. ³¹ Yoo, weene singi
biname cina ngena wawename weeme täápume, weene miiji pepu wawena teeme täápume.
- ³² Weene gone Acejiyame bau ca miiji daremu ne awagrija, weene liba eei biname bime
taatu cabu me singi, lui cina weeme täápume singi, ingle cuta niija mule biname cina pepu
jaawenemusi.
- ³³ Piiyepu gone Acejiyame bau ca miiji daremu ne awagrija, weene liba eei biname bine
taatu miiji jaawenemuye lui cina weebibine miiji niwenininuge. Cuta niija mule biname
cina pepu jaawenemusi. ³⁴ Piiyepu gone Acejiyame bau ca miiji daremu ne awagrija,
weene liba eei biname bine taatu gwidape watawata yääcäremuye lui cina weebibine
gwidape pagege awecnista. Cuta niija mule biname cina teeme gwidape nuuja niija
mule biname bine yääcäremusi, teepi liba yepä pana gwidape teeme bau ca pagege päpäna.
- ³⁵ Pepu mule lica ge ibibi, yepä weene weeme cubuyame bime täápume singi inajipi,
teebibine miiji jaawenemuye, piiyepu gwidape liba watawata yääcäremuye biname bine,
gone awagrija peei awecnista täápume. Acejiyame te piba weebibine babo daremu cire
icäripi, piiyepu Caburage Acejiyame me bägrä pagege weene lenaja. Ingle tabe cuta niija
mule biname bine owecu jaawenemuge, piiyepu eei bine lui cina eso mene umle cäco
iicana. ³⁶ Yoo, weene iyeta biname bine epu pana owecu jaawenemuye, mime Babe Cabu
je biname bine owecu lipu jewenininige.”

*Abiberäja Mene Biname bine Atrana poto cidi me
(Matayo 7:1-5)*

³⁷ “Weene gone biname bine jaatranemuye, piba Acejiyame weebibine lica cirege atrana; gone singi nuuja biname te mäpu daremu ne päpäname, piba Acejiyame weebibine lica mäpu daremu cirege ceera. Nuuja biname bime niiya mule bine weeme ngene atwanena cabu ca yääyecräjemuye, piba Acejiyame weeme niiya mule bine cirege äyecreja. ³⁸ Nuuja biname bine gwidape yäacäremuye, piba Acejiyame weebibine gwidape pa icäripi. Yoo, tabe bucurage ätityera weebibine pa icäripi. Epu pana diiba te deedei ca lipu tapanuge, weeme ime ibibi lica birige iyeta teeme miiji oomlana, weeme ireclota cuta pa tapanepi teeme miiji ca. Yoo, weene liba nuuja biname ne matimati yäätityäruye coo baborage yäätityäruye, Acejiyame te yepä ibi weebibine pagege ätityera.”

³⁹ Yeesu cuta ngene ca agli mene jicige egä, “Yepä, irecu mäasumasu biname te äblicäco nuuja irecu mäasumasu biname ne gaabe cabu awecluja. Tabe liba peei ne jaawenuge, siige teepi iyeta cäsü cabu me laatramuge. ⁴⁰ Yoo, abiberäja bägrä te lica ge baborage teeme abiberäja biname cabu ca, yepä iyeta abiberäja bägrä lui cina iyeta cängena labiberäjininusi, piba teepi teeme abiberäja biname pana pagege äbita. ⁴¹ Weene ngeni me singi matikolä conocono weeme nuuja biname me ireclota cabu päpäname, yepä baborage conocono weeme ireclota cabu weene lica päpänä? ⁴² Peei lui epu pana mäame irecu cabu baborage uli pargi liba pisi nyene piyepu maane liba mäame biname ne jaji egä, ‘Cäme biname, cane mäame irecu cabu ca pläpu ne jaacatene!’ Weene walya biname gemi! Weene miiji niinäce uli pargi ne weeme irecu cabu ca acata, piba weene cängenarage jepäneniye weeme biname me irecu cabu ca pläpu ne acatame.”

Abiberäja Mene Uli piyepu Teeme Kuu poto cidi me

(Matayo 7:16-20; 12:33-35)

⁴³ Yeesu piba jicige egä, “Miijirage uli te lica yäayuge niiyarage kuu cama; cuta piyepu niiyarage uli te lica miijirage kuu cama yäayuge. ⁴⁴ Yoo, weene iyeta uli bine opo yaawatnemuye teeme kuu cabu ca: weene äblicäco miijirage kuu epu piigi kuu bine äwäcuta gaalegale seea cabu ca, coo waina kuu bine äwäcuta käkäco mete cabu ca. ⁴⁵ Yoo pepu pana gemi, biname lui me miijimiji ngene atwanena teeme ngenecu bora piti nemi, teeme mule piyepu teeme mene cuta miijirage gemi. Yepä, biname lui me niyaniya ngene atwanena teeme ngenecu bora piti nemi, teeme mule piyepu teeme mene cuta niiyarage gemi. Ingle biname bime tage cabu ca lui mene cina täsuge, peei lui teeme ngenecu bora cabu ca saacluge.”

Abiberäja Mene Neeneni Mete Raranga Biname poto cidi me

(Matayo 7:24-27)

⁴⁶ Yeesu cuta jejemige egä, “Weene ngenome cebine nainuye ‘Yageyame’ ca, yepä cäme singi mene lica jaawenuye? ⁴⁷ Yoo, iyeta biname lui cina cäme bau me saacluge, cäme mene yääticijemuge, piba cuta yaacatusi ibi wawename, ⁴⁸ teepi lui epu pana biname liiyepu lui te miijirage mete ne erangige. Tabe gawe ngalebora me juurige kula luma birige, piba cängena caage bine jermecimige, mete ne peei cabu erangige. Siige, igi te tädige, pui mete ne irmitige, yepä lica apinicige, ingle kokrerage caage cabu rarangäneji ge. ⁴⁹ Yepä, lui biname te cäme mene papa yääticijuge, yepä lica jaawenuge, tabe lui epu pana biname liiyepu lui te caage bine tumerage je jermecimige, cuta peei cabu mete ne erangige. Igi liba tädige, pui mete ne ijarige, mete te itramige, siige iyeta sabe äbitige.”

7

Yeesu Cubu Mope Biname me Kaakesea Bägrä ne Miiji me Jewenige

(Matayo 8:5-13)

¹ Yeesu liba iyeta peei mene epiremige biname bine jajanename, piba tabe Kaprenauma cewe me abacitige. ² Pui cewe cabu puga ge yepä Rooma cabu ca cubu mope biname. Teeme ngenecurage kaakesea bägrä baborage pita cama ge budre mameta. ³ Pui Rooma cubu mope biname te liba mene itecijige Yeesu poto cidi me, tabe poto Israela modamoda biname bine Yeesu bau me jityepemige teebine ätemlame teeme kaakesea bägrä ne miiji wawename. ⁴ Pui Israela modamoda biname cina seclige, Yeesu ne owecu cama itineräjisi egä, “Maane miiji teebine ätityerame, ingle tabe miiji biname gyene. ⁵ Tabe babo owecu mime biname bime täapume, piyepu cime abasecretna mete ne eranguji teeme rarekaake ca.”

⁶ Yoo, Yeesu piba ten cama ädige. Tabe teeme mete mameta me liba atyaramtige, piba pui Rooma cubu mope biname te poto teeme binamewale bine tityepemige Yeesu bau me mene cama egä, “Babo Biname, gone mäpu me läbitute cäme täapume. Cane ibibi lica gäne maane abacitame cäme mete me, ⁷ peei name pi cane lica otni mäame opo gaabe me. Maane mene taatu jüci, piba cäme kaakesea bägrä te miiji pa läbitege. ⁸ Yoo, cane umle gäne mene lipu kokre gyene. Cane miiji cäme babo biname bime mene ätecija, piyepu cäme ire atwi

cabu piti nemi cubu biname. Cane yepä ne jaajune, 'Ädi,' siige tabe läduge; cane nuuja ne jaajune, 'Tädi,' siige tabe täduge. Cane căme kaakesea băgrä ne jaajune, 'Ai jeweni,' siige tabe peei ne jaawenuge. Peei name pi cane umle gäne egä määme mene cabu kokre pisi nyene."

⁹ Yeesu mutăcăco äbitige, pui mene liba itecijige. Tabe ingwe gaabe me tatadrongtige, ten cama lui biname cina seclige, teebibine jejemige egä, "Cane weebibine jijenininine egä apu baborage ätrunga ne cane lica ituge păpăna Israela biname bime cabu ca, yepä ai biname cabu taatu jepänine."

¹⁰ Pui mename biname cina liba äcnäridge Rooma cubu mope biname me mete me, siige teepi pui kaakesea băgrä ne miiji jepänisi.

Yeesu Budre Biname ne Erpinantige

¹¹ Peei ingwe ca Yeesu ädige yepä matikolä cewe me, ngii Naina. Teeme abiberäja băgrä piyepu bucurage nuuja biname cina ten cama eclige. ¹² Tabe liba pui cewe grana gome atyaramtige, biname cina yepä budre biname ne secanisi cewe cabu ca. Tabe mamye biname ge, teeme mage me japurage imăbăgrä; cuta mage lui cuubla ge. Bucurage pui cewe biname cina ten cama seclige. ¹³ Yageyame liba teebine jopänige, tabe baborage owecu äbitige teeme täapume, jojige egä, "Ele gone!" ¹⁴ Tabe piba awetântige, budre biname me keeso kaake ne joomlige. Pui keeso acana biname cina piba imyemutemige, siige Yeesu pui budre biname ne jejige egä, "Mamye biname, cane meebine naajenine arpinanti!" ¹⁵ Siige, pui budre biname te arpinantige, piba gije abacitige mene me. Yeesu teeme mage ne ocărige.

¹⁶ Iyeta biname cina wălu me äbitininisi, Acejiyame ne ewepyeräjisi egä, "Acejiyame me baborage mename biname te mime bau me tädige!" Teepi cuta jicisi egä, "Acejiyame bii tädige teeme biname bine ätityerame."

¹⁷ Yeesu ne idre jecenanisi Yuudea gawe iyeta poto ta piyepu cuta poto gawe mameta cabu ta.

Mename Biname cina Seclige Yoane Niiye ca Āciseja Biname bau ca

(Matayo 11:2-19)

¹⁸ Yoane iyeta peei mule poto cidu me itecijige teeme äbiberäja băgrä bime bau ca. Tabe piba ala taasoglicige teeme neeneni abiberäja băgrä, ¹⁹ teebibine Yageyame bau me jättyepige, teebine ätemlame egä, "Năă, maane săte pui biname, iyeta biname cina lui ne jewagrijenisi otnime, coo cine miiji nuuja ne awagrija?"

²⁰ Pui neeneni biname cina Yeesu bau me liba atyaramtăsi, jejăsi egä, "Yoane niiye ca äciseja biname te cibibine määme bau me nityepige meebine ätemlame egä, 'Năă, maane săte pui biname, iyeta biname cina lui ne jewagrijenisi otnime, coo cine pama miiji nuuja ne awagrija?"

²¹ Puirage padare cabu Yeesu bucurage biname bine miiji me jewenemige maramara pita cabu ca, piyepu niiya cable bine iyecräjemige, piyepu bucurage irecu määsumăsu biname bine miiji me jewenemige. ²² Pui neeneni biname lui Yoane bau ca tabe teebibine mene jaawecnistige egä, "Weene Yoane bau me acne-nuteye, teebine jejepeye weene ngena ituge păpăna piyepu ätecija naace irecu määsumăsu biname cina cāngena jăăpănanemus; ernge niyaniya biname cina miiji waatninusi; lepera pita biname cina miiji me läbitininusi; tablame buduma biname cina cāngena yăătecijanemuge; budre biname cina larpinerăjiminusi ireclota me; cuta piyepu owecumete biname bine Miiji Mene jaajanemus. ²³ Yoo, ngenecu miiji eei gemi laati bemi ätrunga ne lica yaapesarusi căme bau."

²⁴ Pui biname Yoane bau ca liba acnenutăsi teeme bau me, Yeesu gije abacitige biname bine mene Yoane poto cidu me jajanename. Tabe teebibine itemlemige egä, "Weene liba daapo taatu cewe me lăsipeye, weene singi puma ngena păpăname? Weene lica otni duuwe baace păpăname buuwe te papa yaacenanuge. ²⁵ Liba peei lica, weene ngena păpăname lăsipeye peeyeme? Weene lica otni biname ne păpăname, lui te labasogăruge miijimiji căbletăăpe cama, ingle pepu pana biname cina modamoda biname bime mete cabu yaacrajuge luma miijimiji gwidape birige. ²⁶ Cebine najeye, weene ngena păpăname lăsipeye peeyeme? Weene năă Acejiyame me mename biname ne singi păpăname? Yoo, cane weebibine jijenininine egä weene baborage mename biname ne puga ituge păpăna. ²⁷ Oogărăneji Mene cabu Acejiyame te Yoane poto cidu me jicenige egä, 'Cane căme mename biname ne määme niinăce gaabe me cire jättyepene. Tabe te gaabe cire yaamacetnăjepi määme otni täapume.' " ²⁸ Yeesu piba jejemige, "Cane weebibine jijenininine egä Yoane lui baborage gyene iyeta ai gawecewe biname bime cabu ca lui cina ituge ai gawecewe cabu lenaja ngălu Yoane me padare oomlaname, yepä page ai kirece padare cabu, eei cabu ca lui te matikăli gyene Acejiyame te lui bine ewadenemige, tabe baborage gyene Yoane cabu ca."

²⁹ Yoo, iyeta biname piyepu cuta täks rarekaake uutecrena biname cina liba Yeesu me mene yäätcejemepi, piba jiicepesi egä, "Acejiyame me gaabe toraca conocãco gyene," siige teepi peei name pi äciseja mule ne ituge acatena Yoane bau ca. ³⁰ Yepä, Parisea sigu biname piyepu cotre abiberäja biname cina Yoane me äciseja mule ne jäägyusi, pepu pi teepi cuta Acejiyame me teeme tääpume singi gaabe ne jäägyusi.

³¹ Siige, Yeesu jiiçige egä, "Cane ngena cabu yaatonäremene biname bine page lui cina ireclota gemi? ³² Teepi epu pana gemi matimati bägrä liiyepu, lui cina adnatäreji yaacrajuge aletnaletna puupu cabu, siige teemeteme ala abayaninusi egä, 'Cine dobidobi bine jääcnäjemus, yepä weene giire lica jääwäjuye. Cine owecumete uupera yaatangusi, yepä weene singi lica ele me.' ³³ Yoo, Yoane niye ca äciseja biname te tädepi piyepu poto bimu deedei cãco yaanajuge piyepu waina niye lica yäänäjuge. Weene singi lica teeme mule tääpume, teeme poto cidi me jiiçemuye egä, 'Niya cable te teebine ecanenige.' ³⁴ Cane lui Acejiyame bau ca tädujine biname me äbitujine, cane piba tädepene. Cane deedei läbitune piyepu niye yäänäjune, yepä weene cuta singi lica cãme mule tääpume, cãme poto cidi me jiiçemuye egä, 'Jepäneye ai biname ne! Tabe mage looloyame gyene piyepu waina niye änäjäyame! Täks rarekaake uutecrena biname piyepu cotre atropengäja biname teepi lui teeme biname gemi!' ³⁵ Yoo, weene pepu jiiçemuye, yepä lui biname cina yaacatusi Acejiyame me singi mule bine, teeme ireclota cabu ca mine opo yaawatnusi egä Acejiyame lui umlerage gyene."

Parisea Sigu Biname te Yeesu ne Tesoglicige Teeme Mete me

³⁶ Yepä Parisea sigu biname ngii Simona tabe Yeesu ne ala tesoglicige ten cama deedei äbitame. Yeesu ädige teeme mete me, puga adnatige deedei me. ³⁷ Puga ge pui cewe cabu yepä eroero magebi. Tabe liba mene utecijige egä Yeesu deedei äbitenige pui Parisea biname me mete cabu, tabe piba matikolä karpu ne miiji lengo ngedo cama ecatige, peei cama oclige Simona me mete me. ³⁸ Puga tabe Yeesu me kaake poto ca joclajutige teeme ernge gome. Tabe ele ongenige piyepu teeme ele mäcu cina sitrametnemige Yeesu me ernge cabu. Tabu pui ele mäcu bine jicisäjemige, teeme lecalca edingäli ca, teeme ernge jeteçnige, piba pui miiji lengo cama ngedo ne ernge cabu epadurige. ³⁹ Yoo, pui Parisea biname lui te Yeesu ne ala tesoglicige, tabe liba peei mule ne jepänige, teeme ngenecu bora jiiçige Yeesu poto cidi me egä, "Ai biname liba toraca mename biname gyene, tabe piba umle cama gyene ai magebi poto cidi me, lui te teebine joomlemige, egä teeme ireclota lui magerage conocono gyene!"

⁴⁰ Piba Yeesu pui Parisea biname ne jejige egä, "Simona, cane singi gãne meebine matikolä mene jajime."

Simona jejige egä, "Abiberäja biname, ngena mene gyene?"

⁴¹ Yeesu ngene ca agli mene teebine jejige egä, "Neeneni biname cina rarekaake ituge waadena yepä rarekaake ire atwi biname bau ca. Pui yepä biname te faib hanred rarekaake yaawademepi piyepu nuuja te fifti taatu rarekaake yaawademepi. Yoo, yepä pui rarekaake me ibi lui daremu gyene yepä bimu me kaakesea tääpume. ⁴² Siige, ingwe ca pui neeneni äblicãco ge pui rarekaake awecnistame, peei name pi rarekaake ire atwi biname te teebibine jaajige egä, 'Ngãnu gyene peei bine awecnista. Cane weeme ngii ituge äyebingta daremu oogärãneji peba cabu ca.' Yoo, Simona cane meebine näätmenline egä pui neeneni cabu ca laasi nyene baborage singi pui rarekaake ire atwi biname tääpume?"

⁴³ Simona teebine jejige egä, "Pama pui biname lui me baborage daremu ne ituge äyebingta."

Yeesu jejige, "Yoo, mäãme mene toraca gyene." ⁴⁴ Tabu piba pui magebi bau me atatrongãrige, Simona ne jejige egä, "Jopãni ai magebi? Cane liba mäãme mete me abacitine, maane cebine niye lica näcãrite ernge äciseja tääpume, mime mule lipu gyene, yepä ai magebi cãme ernge teeme ele mäcu ca näcisäjige, piba nebo jicisäjige teeme edingäli ca. ⁴⁵ Maane cebine lica natecnite awablame, mime mule liiyepu, yepä cãme abacita cabu ca ai magebi te cãme ernge jãje natecnanige. ⁴⁶ Maane cãme mope olibi migi ca lica napyacite, mime mule liiyepu, yepä tabe te cãme ernge miijimi ngedo ca bii napyacige. ⁴⁷ Cane meebine naajenine egä teeme bucurage conocono mule bine ituge äyebingta, peei name pi teeme owecu baborage gyene cãme tääpume. Yepä, lui biname me nesae taatu niya mule ituge äyebingta, teeme matikolä singi taatu pisi nyene."

⁴⁸ Yeesu puma cita ca magebi ne jojige egä, "Mäãme niyaniya mule bine ituge äyebingta."

⁴⁹ Piba pui nuuja biname lui cina pui dade gome adnatäreji gemi, teepi teemãmu ätemläjinisi egä, "Laasi nyene ai biname lui te cuta biname bime niyaniya mule bine yäyebingemuge?"

⁵⁰ Yeesu piba magebi ne jojige egä, "Acejiyame te meebine näätityãrige mäãme niya mule cabu ca asatame, ingle maane cebine nätrungite. Äte, ngenecu poode cama ocli."

8

Poto Magebi cina Yeesu ne Yääityärusi

¹ Peei padare ingwe ca Yeesu modamoda cewe piyepu matimati cewe cabu ta ot-netnäjige, puga Miiji Mene biname bine jejananemige Acejiyame te biname bine waadena poto cidi me. Teeme twelb abiberäja bägrä cina ten cama otninisi. ² Cuta ten cama puga ge poto magebi, Yeesu lui bine pita cabu ca miiji me itu jaawenemepi piyepu niya cable bine itu yäayecräjemepi teeme poto cabu ca. Teeme poto ngii age temi: Yepä lui Mariya, teeme nuuja ngii Magadala tage, Yeesu lui me trupa cabu ca seben niya cable bine itu yäayecräjemepi. ³ Nuuja teeme ngii Yoana tage. Tabu lui Kusa me coga gwene, Kusa lui te Mopeyame Heroda me mete piyepu gwidape bine ire jaatwemuge. Cuta nuuja teeme ngii Susana tage, cuta piyepu bucurage nuuja magebi cina ten cama puga ge. Teepi Yeesu piyepu teeme abiberäja bägrä bine yääityäremusi teemerge rarekaake piyepu gwidape cabu ca.

*Ngene ca Agli Mene Kuu Gije Iisabeja poto cidi me
(Matayo 13:1-9; Mareko 4:1-9)*

⁴ Biname cina Yeesu bau me totninisi maramara cewe cabu ca. Liba bucurage biname cina abasecretnege, tabe ai ngene ca agli mene jebaitnemige egä:

⁵ “Yepä biname te äduji calwacupi me kuu gije bine iisabejame. Egäcäro tabe kuu bine gweeti cabu yiisabäjemige, poto cina gaabe cabu itrametnemige. Puga biname cina kuu bine jibrecäjemisi piyepu ele cina erwäjemisi. ⁶ Poto kuu cina itrametnemige kula gawe cabu. Kuu cabu ca gije liba tuupletnäriige, teepi maaje me äbitininisi, ingle pui kula gawe cabu niye lica ge. ⁷ Poto kuu cina itrametnemige pägepäge mete bora me. Pägepäge cina gije cama uutininisi, siige gije bine jetäyemisi. ⁸ Poto kuu cina itrametnemige miijirage gawe cabu. Pui cabu ca gije cina tuupletnäriige, uutininisi, kuu jepänemisi, nuuja cina yepä hanred kuu jepänemisi.”

Yeesu peei mene jejemige, piba babo tage ca jiiicige egä, “Weeme liba tablame piti nemi ätecijame, itecijinege umle äbitame!”

*Agesa Ingle Yeesu Biname bine Yaabiberäjemuge Ngene ca Agli Mene ca
(Matayo 13:10-17; Mareko 4:10-12)*

⁹ Ingwe ca Yeesu me abiberäja bägrä cina teebine itemlisi pui ngene ca agli mene me aboclomta poto cidi me. ¹⁰ Yeesu teebibine jejemige egä, “Lui umle niinäce aboclomtäneji lica ge, egä Acejiyame te lipu biname bine waadena, weebibine umle ituge ceera. Yepä nuuja biname bime bau me cane ngene ca agli mene ca jiiicune, ai name pi ‘puu ire acita cabu, teepi lica jääpänusi, piyepu puu ätecija cabu, teepi lica umle läbitininisi.”

*Yeesu Ngene ca Agli Mene ne Eboclomtige Kuu Gije Iisabeja poto cidi me
(Matayo 13:18-23; Mareko 4:13-20)*

¹¹ Yeesu abiberäja bägrä bine jejemige egä, “Cane kuu gije iisabeja poto cidi me mene ne eboclomtene: Pui kuu lui epu pana Acejiyame me mene liiyepu. ¹² Lui kuu cina gaabe cabu itrametnemige, pui gawe epu pana biname lui cina Miiji Mene yäätecijemuge, yepä Satani te läduge, pui mene ne wata yäayeblingtuge teeme ngenecu bora ca, ingle tabe singi lica ge teepi pui mene ätrungame, piba teeme niya cabu ca äsecrerase. ¹³ Lui kuu cina kula gawe cabu itrametnemige, pui gawe lui epu pana biname liiyepu lui cina Miiji Mene yäätecijemuge, gege cama yaacatusi, yepä epu pana gije me braju te äblicäco kula gawe bora abacitame, pui mene te äblicäco teeme ngenecu bora me abacitame. Matikolä padare teepi jäätrungusi, yepä apicetnära te liba täduge, teepi piba teeme ätrunga ne yaabmalusi. ¹⁴ Lui kuu cina pägepäge mete cabu itrametnemige, pui gawe lui epu pana biname liiyepu lui cina Miiji Mene yäätecijemuge, yepä teeme ngenecu mäpu, coo teeme bucurage gwidape, coo piyepu teeme singi ai ireclota me gege mule tääpume, peei cina pägepäge seesea pana Miiji Mene ne jäätäyusi. Peei name pi teeme ireclota cabu pui mene te äblicäco nuuja kuu wawename. ¹⁵ Lui kuu cina miiji gawe cabu itrametnemige, pui gawe lui epu pana biname liiyepu lui cina miijirage piyepu toraca ngenecu cama Miiji Mene yäätecijemuge, ngenecu cabu cängena joomlusi, piyepu durau cäco miijimiji mule bine jaawenemusi kuu tääpume.”

*Ngene ca Agli Mene Lampa poto cidi me
(Mareko 4:21-25)*

¹⁶ “Nuuja biname te lampa ne lica jaabotuge, piba diiba ca yäätrugäruge coo yaacituge dade lolebora me. Yepä, tabe lampa ne cabu je yaatecwantuge, piba biname lui cina mete me yääbäcnusi, teepi lampa apacyera ne jääpänusi.

¹⁷ Pepu pana ge page biname bime bau ca ngena ämlitäneji gyene, pajecu me pagege äbita teeme tääpume, piyepu lui mule biname cina umle lica gemi page, teepi pagege umle äbita.

¹⁸ Peei name pi weene cängena ngena jotwananineye lipulipu äteciame, ingle lui biname me umle pisi nyene, Acejiyame teebine cerämu pa yääcärepi; piyepu lui biname me umle lica gyene, Acejiyame teeme bau ca pa yaacatepi lui matikäli umle tabe apu angi egä pisi nyene.”

Mene Yeesu me Ingle Biname poto cidi me

(Matayo 12:46-50; Mareko 3:31-35)

¹⁹ Yeesu me mage piyepu iganewale cina teeme bau seclige, yepä teepi äblicäco teeme mameta me otni biname tomi name pi. ²⁰ Yepä biname te Yeesu ne piba jejige egä, “Määme mage piyepu iganewale mete kaake poto je jeclajutemige. Teepi singi määme täápume.”

²¹ Yeesu piba iyeta biname bine jejemige egä, “Lui cina Acejiyame me mene jääteciusi piyepu yaacatusi wawename, teepi căme täápume epu pana mage piyepu iganewale liyepu.”

Yeesu Sawa cabu Buuwe ne Jiibige

(Matayo 8:23-27; Mareko 4:35-41)

²² Nuuja bimu Yeesu teeme abiberäja bägrä cama acetnärige poo cabu me, teebibine jejemige egä, “Mine sawa ne yuuresi nuuja poto doro me,” siige teepi abyemärinisi. ²³ Poo te liba niye cabu ädige, Yeesu ute ogrige. Piba baborage buuwe te tipwäjige sawa cabu. Pui poo cabu uule kuu cina tatarweräjjenisi, poo te mameta abuma. ²⁴ Puma cita ca Yeesu me abiberäja bägrä cina awetenäjjininisi teeme mameta me, teebine elotnantisi ute cabu ca, jejisi egä, “Abiberäja biname, mine labumetninago!”

Yeesu abujängtige, buuwe piyepu uule kuu bine kokre mene ca jiibemige, siige sawa te bulubulu mataru enajige. ²⁵ Tabe piba teeme abiberäja bägrä bine jejemige egä, “Lese nyene weeme ätrunga?”

Teepi wälu piyepu mutäcäco äbitininisi, siige teemeteme ätemläjjinisi egä, “Ai biname tabe laasi nyene? Tabe mene jejemige buuwe piyepu uule bine, siige teepi jitecijsi teeme mene!”

Yeesu Niya Cable cama Biname ne Itityärige

(Matayo 8:28-34; Mareko 5:1-20)

²⁶ Teepi poo cabu eclige ngälu atyarininisi Gerasene* biname bime gawe cabu. Pui gawe lui Galilaya sawa nuuja poto doro ca. ²⁷ Yeesu liba poo cabu ca arpatige doro me, yepä pui cewe biname te opopa eyige ten cama, lui biname ne niya cable cina yaacananusi. Leca padare cama tabe cäbletääpe căco waatnetnäjuge, singi lica ge mete cabu lenajame, yepä kula waja cabu yaanajuge, cewe biname cina luma teeme budre biname bine gape yaacranemus. ²⁸ Pui biname te Yeesu ne liba jepänige, ala abayige, teeme bau me piba itramige, babo tage ca jejige egä, “Yeesu, maane lui Caburage Acejiyame me Bägrä gäte, maane singi gäte căme täápume ngena wawename? Cane meebine naawejanenine, maane cebine gone sabe nawenute!” ²⁹ Yoo, tabe peei mene jejige, ingle Yeesu niya cable ne bii jejige asatame peei biname ne abmalame. Yoo, bucurage padare pui niya cable te pui biname ne joomlananuge, ngänuge tabe ätäyäneji yaanajuge ayana sea teeme ime piyepu ernge cama, pepu padare cabu tabe ayana sea bine yaagabicmuge, siige cable te piba teebine yaacanuge daapo taatu cewe cabu me.

³⁰ Yoo, Yeesu teebine itemlige egä, “Maane ngii laasi näte?”

Tabe jejige egä, “Cane ngii lui Sange,” ingle bucurage niya cable teeme trupa cabu yaacrajuge. ³¹ Pui cable cina Yeesu ne jejisi egä, “Gone cibibine nityepininute piyemrage cupicu cabu me.

³² Puga ge teeme mameta je baborage ngeerangera blome tomi lui cina podo wajwa cabu deedei täápume yuunguretnäjemisi. Pui niya cable cina Yeesu ne jejisi teebibine ätyepame blome bime trupa ngalebora me; siige tabe teebibine piyeme jityepemige. ³³ Yoo, cable cina pui biname ne ebmalisi, blome cabu me ebäcnisi, siige iyeta pui blome cina podo cabu ca uuwametnige, sawa niye hora uupletnärige, puga abumitnige, siige.

³⁴ Pui blome ire atwi biname cina liba peei ne jepänisi, teepi cewe me uuwametnige, idre ne ecanenisi matimati cewe cabu ta piyepu pui babo cewe cabu me. ³⁵ Cewe biname cina äsecrärige pui mule ne päpäname. Teepi liba Yeesu bau me eclige, piba pui niya cable cama biname ne jepänisi Yeesu gome adnatäneji ge, cäbletääpe asigräneji ge, piyepu miiji ngena atwanena cama ge. Teepi piba iyeta wälu äbitininisi. ³⁶ Lui biname cina peei mule ne jepänisi, teepi nuuja biname bine jejemisi Yeesu lipu peei biname ne miiji me jewenige. ³⁷ Puma cita ca iyeta pui Gerasene gawe biname cina Yeesu ne jejisi teeme bau ca äyeblihtame, ingle teepi mage wälu gemi. Peei name pi Yeesu poo cabu ca acenutige otnime.

* **8:26:** Gerasene: Gerasene piyepu Gadara biname lui yepä biname gemi.

³⁸Piba pui biname, cable cina lui ne ebmalisi, tabe Yeesu ne jejige egä, “Nää, lipu gäne cane maane cama otnime?”

Yepä, Yeesu teebine jityepige apu mene cama egä, ³⁹“Maane ama. Cewe me acnenuti biname bine jajanenama Acejiyame te ngena miiji mäame täapume bii naawenige.”

Pui biname te puma cita ca iyeta pui cewe cabu otnetnäjige, biname bine jejananemige Yeesu ngena ne teeme täapume jewenige.

Yairus me Ngulebägrä piyepu Pita cama Magebi

(Matayo 9:18-26; Mareko 5:21-43)

⁴⁰Yeesu liba atyaramtige sawa nuuja poto doro me, biname tomi puga ge teebine jewablisi, ingle teepi iyeta teeme acnenuta täapume jewagrijenisi. ⁴¹Piba biname ngii Yairus te teeme bau me atyaramtige. Tabe lui yepä babo biname gyene pui cewe me abasecretna mete täapume. Tabe teemämu gawe me ajarige Yeesu me ernge gome, teebine ewejanige teeme mete otnime, ⁴²ingle teeme bägrä mameta ge budre. Teeme lui yepä taatu bägrä, twelb kāmäge cama gwe, ngulebägrä gwe.

Yoo, Yeesu liba abymärige Yairus me mete otnime, biname bucurage ge tomi cabu, teepi teebine gaabe cabu jityepicäjisi. ⁴³Puga ge biname tomi cabu yepä magebi lui te uudi apira pita cama ge twelb kāmäge ngalebora. Tabe iyeta teeme rarekaake ituge apira dokta bime bau otnetnejame, yepä teepi äblicäco teebine miiji me wawena. ⁴⁴Tabe Yeesu me kaake poto ca toclige, teeme cäbletääpe pepyämu ne joomlige, siige piba taatu ätecitige teeme uudi pita te. ⁴⁵Yeesu biname bine itemlemige egä, “Laati te cebine noomlige?”

Iyeta biname cina liba aininisi, Peteru piba jejige egä, “Abiberäja biname, biname piti nemü iyeta poto ta, meebine naawaclomtisi, teepi te iyeta näädudnecäjisi.”

⁴⁶Yepä, Yeesu jiicige egä, “Yepä biname te cebine bii noomlige. Cane asicnantine egä cäme kokre te basatige.” ⁴⁷Pui magebi liba ngene ca beglige egä tabe äblicäco ge ämlita, ngena te teeme täapume bäbitige, tabe piba aloneca cama oclige, Yeesu me opo gaabe utramige. Tabe piba biname bime sobe cabu teebine jejige ngena name pi teeme cäbletääpe ne joomlige, piyepu tabe lipu wata miiji me bäbitige. ⁴⁸Yeesu teebine piba joige egä, “Bägrä, mäame ätrunga te meebine miiji bii naawenige. Äte, ngenecu poode cama ocli.”

⁴⁹Egäcäro Yeesu peei mene jiicige, biname te mene cama tädige pui babo biname me mete cabu ca. Tabe Yairus ne jejige egä, “Mäame ngulebägrä te budre gwene. Gone Abiberäja Biname ne papa yaacanute.”

⁵⁰Yepä, Yeesu liba peei mene itecijige, Yairus ne jejige egä, “Wälu gone, yepä cebine nätrungi. Mäame ngulebägrä te miiji pa läbitepi.”

⁵¹Yeesu liba Yairus me mete me atyaramtige, tabe biname bine jüibemige puutucu je, yepä Peteru, Yoane, Yakobu, piyepu pui ngulebägrä me mage babe taatu ten cama abacitige. ⁵²Iyeta biname cina ele engenetnemige pui ngulebägrä täapume. Yeesu teebibine ele jüibemige, jejemige egä, “Ele gone! Bägrä te budre lica, yepä ute gwene.”

⁵³Teepi teebine ngange ewäcnisi, ingle teepi umle gemi egä peei ngulebägrä toraca budre gwene. ⁵⁴Yeesu piba ngulebägrä ne ime gome jwoomlige, babo tage ca jojige egä, “Bägrä, arpinanti!” ⁵⁵Tabe ireclota jepänige, ingle seemo te tacnenutige, siige wata abujängtige. Siige, Yeesu piba teebibine jejemige egä, “Ngulebägrä ne deedei ocäreye!”

⁵⁶Teeme mage babe cina mutäcäco äbitäsi. Yeesu teebibine jaajige egä, “Gone nuuja biname bine jaajanemuye ai poto cidi me.”

9

Yeesu Teeme Twelb Abiberäja Bägrä bine Jityepäjemige

(Matayo 10:5-15; Mareko 6:7-13)

¹Yeesu teeme twelb abiberäja bägrä bine teeme gome tebasecretnemige, teebibine kokre piyepu conocäco ecäranemige iyeta niija cable bine äyecrejame piyepu maramara pita bine äyebengäjame. ²Tabe piba teebibine jityepäjemige Acejiyame te biname bine waadena poto cidi me mene jajanenama piyepu pita biname bine miiji me wawenecame. ³Tabe teebibine jejemige egä, “Weene gone nuuja gwidape bine yaawademuye weeme otni täapume. Gone yaawademuye otnetneja suru piyepu diiba. Rarekaake piyepu deedei gone yaawademuye, cuta tuwängle cäbletääpe gone yaawademuye. ⁴Lui biname cina weebibine jiwablininusi, teeme mete cabu inajininuge ngälu weene pui cewe ne saabmaluye. ⁵Cewe biname cina liba weebibine lica awabla, pui cewe ne liba saabmaluye, tuuwe bine jäägglubäjemuye weeme ernge cabu ca. Teepi ai mule cabu ca umle läbitininusi egä teepi pagege niija daremu ne päpäna.”

⁶Siige, abiberäja bägrä cina Yeesu ne puga ebmalisi, teepi otnininisi iyeta pui cewe cabu ta, biname bine Miiji Mene jejananemisi piyepu pita biname bine miiji me jewenanemisi iyeta poto ta.

*Mopeyame Heroda te Ngenecu Wälu pana Äbitige
(Matayo 14:1-12; Mareko 6:14-29)*

⁷Yoo, Galilaya probins mope biname Heroda te mene itecijige iyeta Yeesu me waweneca poto cidi me. Pajecu lica ge teeme täápume ngena cina äbiteninini, ingle biname bime mene maramara ge. Poto biname cina jüicusi egä, “Pama Yoane pui niye ca äciseja biname te budre cabu ca tarpinantige!” ⁸Nuuja cina jüicusi egä, “Pama Eliya te taboclomtige.” Piiyepu nuuja cina jüicusi egä, “Pama yepä sasa mename biname te budre cabu ca tarpinantige.” ⁹Heroda piba jüicige egä, “Peei lui lica ge Yoane, ingle cane te itu jaajemepene teeme mope ne äläcnutame; tabe budre ge. Peei biname tabe baa laasi nyene, cane lui poto cidi me mene nätecijige?” Tabe peei name pi äbitenige Yeesu ne päpäname.

*Yeesu Faib Tausen Biname bine Engäremige
(Matayo 14:13-21; Mareko 6:30-44; Yoane 6:1-14)*

¹⁰Yoo, ätyepäneji biname cina täcnärininisi, Yeesu ne jejisi iyeta teepi ngena ituge wawena. Tabe piba teebibine ewademige, siige teepi taatu eclige yepä cewe me, ngii Betesaida, ¹¹yepä biname cina liba umle äbitininisi, teepi Yeesu ne ingwe icwisi. Tabe iyeta teebibine jewablümige, mene jejananemige Acejiyame te lipu biname bine yaawademuge, piiyepu pita biname bine müji me jewenemige.

¹²Mämle bimu me liba, teeme twelb abiberäja bägrä cina Yeesu bau me seclige, teebine jejisi egä, “Maane biname bine jityepemi mameta calwacupi cewe me piiyepu maramara cewe me teeme deedei piiyepu ute puupu bine päpäname, ingle biname cäco cewe gyene ai.”

¹³Yepä, Yeesu teebibine jejemige egä, “Weene te teebibine deedei ecäremeye.” Teepi puma cita ca jejisi egä, “Cime nuuja deedei lica gyene, yepä ai faib buluduu piiyepu neeneni bumate cibi taatu gemi. Baa, maane singi cine otni deedei aletname ai bucurage biname täápume?” ¹⁴Yoo, puga ge pama faib tausen rooriye, magebi bägrä cama.

Yeesu teeme abiberäja bägrä bine piba jejemige egä, “Weene biname bine jejemeye adnaterame maramara tomi cabu, fifti pana biname yepäyepä tomi cabu.”

¹⁵Abiberäja bägrä cina pepu jwenemisi Yeesu me singi liiyepu. Iyeta biname cina liba adnatärinisi, ¹⁶Yeesu piba ewademige pui faib buluduu piiyepu neeneni bumate cibi bine. Tabe cabu me ire acitige, Acejiyame ne eso ecärige, pui deedei cibi bine itrecimige, abiberäja bägrä bine piba ecäremige biname bime bau awadename. ¹⁷Iyeta biname cina teeme ibi jepänisi liba erwäjisi. Piba abiberäja bägrä cina deedei pacupacu diiba bora ebäcnemisi, siige twelb diiba cina tapanininisi.

*Peteru Yeesu ne Jewabudnitige egä Tabe Keriso Sine
(Matayo 16:13-20; Mareko 8:27-30)*

¹⁸Nuuja taje Yeesu liba ten taatu Acejiyame bau irecu ätumutige, piiyepu teeme abiberäja bägrä puga ge teeme gome, tabe piba teebibine itemlemige egä, “Nää, biname cina lipu jüicusi egä cane laasi näne?”

¹⁹Teepi jejisi egä, “Poto cina jüicusi egä maane niye ca äciseja biname Yoane säte. Nuuja cina jüicusi egä maane Eliya säte. Piiyepu nuuja cina jüicusi egä maane yepä sasa mename biname gäte lui te budre cabu ca tarpinantumete.”

²⁰Tabe itemlemige egä, “Cije weene, weene lipu jüiceniye egä cane laasi näne?”

Peteru jejige teebine egä, “Maane Keriso säte, Acejiyame lui ne ituge ätyepa biname bine niyya cabu ca äsecerame.

*Yeesu Mene Jüicemige Teeme Mäpu Padare piiyepu Budre poto cidi me
(Matayo 16:20-28; Mareko 8:30-9:1)*

²¹Piba Yeesu teeme abiberäja bägrä bine kokre cama jejemige egä, “Ai poto cidi me gonerage nuuja biname ne jaji. ²²Tabe cuta jejemige egä, “Cane lui Acejiyame bau ca tädujine, biname me äbitujine, cane müji mäpurage gwidape bine pagege päpäna. Yoo, Israela modamoda biname, piiyepu modamoda iiwäreja biname, piiyepu cotre abiberäja biname, teepi cebine pa nägyepesi, budre me pa nawenepesi, yepä cane ireclota me pa larpinantepene nesae bimu ingwe ca.”

²³Yeesu puma cita ca iyeta biname bine jejemige egä, “Biname te liba singi cane cama otnime, tabe müji teemerage singi bine gawe me acrana, teeme baarge uli ne palace cabu bimu gaabegabe acanena, siige cebine ingwe äcwi. ²⁴Ingle lui biname te ai gawecewe ireclota cäme täápume yaapesaruge, tabe toraca ireclota ne cire jääpänepi, yepä lui te ai gawecewe ireclota täápume wälu cama ire jaatwuge piiyepu singi lica cäme ime cabu acitame, tabe toraca ireclota ne cire yaapesarepi. ²⁵Yoo, biname te nuuja müji ne lica cire jääpänepi, ngänu gyene tabe puu iyeta ai gawecewe ne yaacatuge, yepä peei cabu ca teeme ireclota ne yaapesaruge. ²⁶Yoo, biname te liba ajiri birige cäme täápume piiyepu

cäme mene tääpume, piba cane lui Acejiyame bau ca tädujine biname me äbitujine, cane teebine cire jäägyepene pui padare cane liba jamyacu apaclyera cama cire tacnenutepene ai gawecewe me. Yoo, pui padare cabu Aceji Babe me jamyacu apaclyera piiyepu iyeta mename seemo bime jamyacu apaclyera cane cama cirege lenaja. ²⁷ Cane toraca mene weebibine jijenininine egä ama poto lui cina jeclajutäjemenige, teepi lica pagege budre äbita, ngälu teepi pa jääpänepesi Acejiyame te lipu biname bine yaawademusi.”

*Yeesu Mara Opo me Äbitige
(Matayo 17:1-8; Mareko 9:2-8)*

²⁸ Yoo, pama eit bimu ingwe ca Yeesu liba peei mene jaajemepi, tabe Peteru, Yoane, Yakobu naabibine aacanänige podo cabu me irecu ätumutame. ²⁹ Egäcäro tabe irecu ätumutige, teeme opo te piba mara me äbitige piiyepu teeme cäbletääpe bulubulurage äbitige, paamlepaamle pana. ³⁰⁻³¹ Piba taatu neeneni biname cina cabucewe apaclyera cama puga teeme gome taboclomtäsi. Teepi sasa mename biname Moose naabi Eliya tage. Teepi Yeesu cama mene jücemäsi egä teeme padare mameta ge budre päpäname Yerusalema babo cewe cabu je, tabe lipu Acejiyame me singi pa jaawenepi biname bine ätityerame. ³² Yoo, Peteru piiyepu ten cama lui biname teepi ute opo pana aanajänige. Liba peei cabu ca cängena alotneränänisi, piba Yeesu ne jamyacu apaclyera cama jepänänisi, piiyepu peei neeneni biname bine jääpänanisi lui ten cama jeclajutäsi. ³³ Pui neeneni liba mameta gegi Yeesu ne abmala, Peteru te piba Yeesu ne jejige egä, “Abiberäja biname, cine miijirage gämi cama. Cine nesae matimati mete bine pa yaarangemesi: yepä määme tääpume, yepä Moose tääpume, piiyepu yepä Eliya tääpume.” Yoo, Peteru cängena umle lica ge tabe ngena mene jücemige.

³⁴ Tabe liba mene cabu jage, carbe te piba tädige, teebibine aacwabänige. Abiberäja bägrä cina wälu me äbitininisi carbe te liba icwabemige teebibine. ³⁵ Piba carbe cabu ca tagepogogo te tädige egä, “Ai lui cäme bägrä gyene, cane teebine jejujine cäme kaakesea wawena tääpume. Weene teebine jitecijoje!”

³⁶ Liba apirige pui tagepogogo te, teepi Yeesu ne taatu jepänänisi. Yoo, abiberäja bägrä cina peei poto cidi me bojä me äbitininisi. Pui padare cabu teepi lica nuuja biname ne jaji ngena ne bii jepänisi.

*Yeesu Miiji Jewenige Niitya Cable cama Bägrä ne
(Matayo 17:14-18; Mareko 9:14-27)*

³⁷ Nuuja bimu teepi liba podo cabu ca täinetnänige, bucurage biname cina ten cama opopa eyisi. ³⁸ Biname tomi cabu ca yepä biname te babo tage cama Yeesu ne jejige egä, “Abiberäja biname, cäme bägrä ne jepäni. Tabe lui cäme yepä taatu imäbägrä gyene. ³⁹ Niitya cable te teebine liba joomluge ala abayename jaawenuge, piba tabe uumanumana me läbituge, teeme tage cabu ca mote acwe cina täsuge. Cable te teebine jaje joomlanuge, teeme tääpe ne iyeta sabe jaawenuge. ⁴⁰ Cane mäame abiberäja bägrä bine liga jaajemune pui cable ne äyeblyngtame, siige teepi äblicäco ge.”

⁴¹ Yeesu biname bine jejemige egä, “Weene ätrunga cäco biname gemi, weeme mule lui niiyarage gyene! Luma ngälu padare cane miiji weene cama lenaja? Luma ngälu padare cane miiji weeme ätrunga cäco mule päpäna?” Tabe piba pui biname ne jejige egä, “Bägrä ne secani!”

⁴² Egäcäro bägrä te tädige, cable te teebine ijarige gawe cabu, tabe juumemige. Yeesu piba niitya cable ne jejige äyeblyngtame, imäbägrä ne miiji me jewenige, piba teeme babe bau me ewecnistige. ⁴³ Siige, iyeta biname cina mutäcäco äbitininisi Acejiyame me babo kokre name pi.

*Yeesu Cääri Mene Jücemige Teeme Budre poto cidi me
(Matayo 17:22-23; Mareko 9:30-32)*

Yoo, biname cina mage ngenä jotwananinisi Yeesu me mara mule poto cidi me, ⁴⁴ piba Yeesu teeme abiberäja bägrä bine jejemige egä, “Weene cängena ngenä jotwananiniye ai mene poto cidi me: Cane lui Acejiyame bau ca tädujine, biname me äbitujine, teepi cebine biname bime ime cabu pa nacitepesi.” ⁴⁵ Yepä, abiberäja bägrä cina teeme mene ne opo lica ewatnisi, ingle teeme tääpume ämlitäneji pana ge pui mene, peei name pi teepi cängena umle lica ge, piiyepu teepi wälu ge teebine ätemlame.

*Laasi Nyene Baborage
(Matayo 18:1-5; Mareko 9:33-37)*

⁴⁶ Abiberäja bägrä cina gije jebacitisi atraname egä laati te teeme cabu ca baborage pagege äbita. ⁴⁷ Yeesu teeme ngenä atwanena umle ge, peei name pi bägrä matikolä ne ala tosoglicige teeme opo gaabe je aclajutame. ⁴⁸ Tabe piba abiberäja bägrä bine jejemige egä, “Biname lui te apu matikolä bägrä ne jaawabluge cäme ngii cabu, tabe cuta nawabluge

cebine; piieyepu biname lui te cebine nawabluge, tabe Acejiyame ne cuta jaawabluge lui te cebine nätyepuji. Yoo, weeme cabu ca lui te matikolä gyene biname bime opo gaabe, tabe sine baborage Acejiyame me opo gaabe.”

Lui te Mibibine Lica Nicisärmutininuge, Tabe Lui Mime tääpu Myene (Mareko 9:38-40)

⁴⁹ Yoane te piba jejige egä, “Abiberäja biname, cine biname ne jepänisi lui te niia cable bine yääyecräjemuge mäame ngii cabu. Cine teebine jejisi peei mule ne abmalame, ingle tabe lica mine cama labasutuge.”

⁵⁰ Yeesu piba Yoane piieyepu nuuja abiberäja bägrä bine jejemige egä, “Teebine gone jiihuyee, ingle biname lui te mibibine lica nicisärmutininuge, tabe lui mime tääpu myene.”

Yepä Cewe Samariya Gawe cabu, Puma Biname cina Yeesu ne Jigyisi

⁵¹ Yoo, Yeesu me acnenuta padare cabucewe me seeji mameta me täbitige, tabe ngene piba jotwige Yerusalema me otnime, siige abyemäriige. ⁵² Tabe biname bine niinäce gaabe me jityepemige Samariya gawe cabu yepä cewe me teeme lenaja puupu ne amacetrnäjame.

⁵³ Yepä, pui cewe biname cina singi lica ge teebibine puupu ceerame, ingle teepi umle ge egä tabe mara iiwäreja mule tääpume Yerusalema me ädenige. ⁵⁴ Yoo, abiberäja bägrä Yakobu naabi Yoane liba peei ägyi mule ne jepänäsi, teepi claabe cama jejäsi egä, “Yageyame, nää maane singi gäte cine Acejiyame ne awejename muye ne ätyepame ai biname bine aglecame?”

⁵⁵ Yepä, Yeesu atadrengtige, teeme abiberäja bägrä bine jejemige pepu mene gone iicemame. ⁵⁶ Puma cita ca teepi iyeta abyemärinisi nuuja cewe otnime.

Mene Yeesu ne Ingwe Äcwi poto cidi me (Matayo 8:19-22)

⁵⁷ Teepi liba teeme gaabe cabu otninisi, yepä biname te Yeesu ne jejige egä, “Ngänu gyene maane liiyeme ädenite, cane mäame ingwe ädeninel!”

⁵⁸ Yeesu teebine jejige egä, “Poks bime bora piti nemi lenaja tääpume, piieyepu ele bime mete uli cabu piti nemi, yepä cane lui Acejiyame bau ca tädujine, biname me äbitujine, cäme tääpume puupu lica gyene cäme mope acitame. Nää, maane singi gäte pepu otnetnejame cane cama ireclota tääpume?”

⁵⁹ Yeesu piba nuuja biname ne jejige egä, “Tädi, cane cama otnime,”

Yepä, pui biname te jejige egä, “Babo biname, cane singi gäne meebine ingwe äcwime, yepä cane lipu gäne niinäce otni cäme babe ne gape acitame?”

⁶⁰ Yeesu teebine jejige egä, “Laati bemi seemo ireclota cabu budre, teeme tääpume ebmalepi budre biname bine gape cabu acraname; yepä maane ädi, biname bine jajaname Acejiyame te lipu biname bine yaawademuge.”

⁶¹ Nuuja biname te jejige, “Babo biname, cane maane cama ädenine, yepä cane niinäce cäme binamewale bine yewo tawenemene.”

⁶² Yeesu teebine jejige egä, “Lui biname te gije labacituge gawe ängwädname cooso piieyepu ängwädna gwidape cama, piba latadrengtige ingwe gaabe ireme, tabe miiji biname lica birige Acejiyame me biname bine waadena kaakesea tääpume.”

10

Yeesu Sebentituu Biname bine Jityepäjemige

¹ Yoo, peei ingwe ca Yeesu sebentituu biname bine jejäcremige, neeneni neeneni jityepäjemige niinäce otnime iyeta cewe tabe liiyeme singi ingwe ca otnime. ² Tabe teebibine jejemige egä, “Ai padare lui epu pana calwacupi gyene liiyepu, deedei luma bucurage, yepä kaakesea biname nesae gemi pui deedei waadename. Miiji Yageyame ne awejena egä tabe kaakesea biname bine pa jäätjepemepi biname bine teeme bau me waadename. ³ Äte naaclege! Cane weebibine maamoi plongo pana jityepininine, girigale drego pana biname cina luma icrajenige. ⁴ Gone rarekaake waadena, cuta diiba piieyepu ernge gwidape gone waadena. Awabla ge gone aclajutame gaabe cabu. ⁵ Weene lui mete me labacitinuye, niinäce jiiicuye egä, ‘Poode yaanajeye iyeta ai mete biname cabu.’ ⁶ Yoo, biname liba pisi nyene lui te singi poode cama lenajame, pui poode te piba teeme bau yaanajuge, yepä liba puma pepu biname lica gyene, peei poode te piba pa tacnenutepi weeme cabu me. ⁷ Weene pui yepä mete cabu pa inajipi, gone mete maramara cabu waatninuye. Lipu deedei piieyepu niieye bine teepi icärininusi, weene miiji gemi peei bine ärwäja piieyepu änäja, ingle biname miiji gemi daremu ne päpäna teeme kaakesea cabu ca. ⁸ Yoo, weene liba nuuja cewe me labacitinuye, piieyepu pui cewe biname cina weebibine jiwablininusi, teepi lipu deedei icärininusi, peei bine yäärwäjuye. ⁹ Pita biname bine miiji me jaawenemuye pui cewe cabu, piieyepu biname bine jaajemuye egä, ‘Acejiyame mameta gyene weebibine waadename.’”

¹⁰ Yepä, weene liba cewe me labacitinuye, piyepu cewe biname cina liba lica jiwablininusi, piba cewe gaabe cabu jiclajutinuge, piba jaajemuye egä, ¹¹ 'Cine weeme cewe tuuwe bine jiglubäjenemisi cime ernge cabu ca awabame egä pepu ätecija cäco mule lui miiji lica gyene. Yepä, weene ngene gone ätrimela egä Acejiyame mameta ge weebibine waadename, yepä weene peei ne bii jigyiye.' ¹² Siige, cane weebibine umle jiwenininine egä atrana bimu cabu Acejiyame me daremu pui cewe täapume mäpurage cirege äbita Sodoma cewe me daremu cabu ca."

*Ätrunga cäco Cewe poto cidi me
(Matayo 11:20-24)*

¹³ "Korasine cewe biname, babo niyarage cirege weeme täapume! Betesaida cewe biname cuta piyepu, babo niyarage cirege weeme täapume! Cane lui ciitaca mule bine ituge wawena weeme bau me, liba peei bine Turo piyepu Sidona cewe biname bime bau me cire jaawenemejine, teepi teeme niya mule bine cire yaabmalecmejisi, cäme bau cire tatatrongärinejisi. Teepi ragre cire lasigrärinejisi, piyepu mriibe ca cire lapyacinejisi awabudnitame egä teepi ituge abmaläcema teeme niya mule bine. Puu weene te ciitaca mule bine ituge päpäna, yepä weene licarage cäme bau me tatatrongäripeye. ¹⁴ Yoo, atrana bimu cabu Acejiyame me owecu Turo piyepu Sidona cewe biname bime täapume baborage cirege äbita, teeme owecu cabu ca Korasine piyepu Betesaida cewe biname bime täapume. ¹⁵ Cuta weene Kaprenauma cewe biname, nää weene toraca apu jingenininige egä Acejiyame te weebibine cabu me jiwenininine? Eewe, weene gawerage me cirege otni, niya puupu cabu me, weeme ätrunga cäco mule name pi."

¹⁶ Yeesu piba teeme abiberäja bägrä bine jejemige egä, "Yoo, lui cina weeme mene jitecjinusi, teepi cuta cebine nätecijusi, piyepu weebibine lui cina jigyunusi, teepi cuta cebine nägyusi, cuta piyepu lui cina cebine nägyusi, teepi cuta teebine jäägyusi lui te cebine itu nätyepuji."

Sebentituu Biname cina Täcnärininisi

¹⁷ Siige, pui sebentituu biname Yeesu lui bine jäätyepemepi, teepi ngenecu gege cama täcnärininisi, Yeesu ne jejisi egä, "Niya cable cina biname bime cabu ca läyebblinginusi, cine liba teebibine mäame ngii cama jaajemusi!"

¹⁸ Yeesu teebibine jejemige egä, "Yoo, cane Satani ne jääpänepene, tabe paamlepamle pana saatramepi cabucewe cabu ca. ¹⁹ Nätecijeye, cane weebibine kokre ituge ceera uutrutame mime cubuyame Satani cabu ca. Weene ibibi gemi cobyame piyepu potetagetage cabu otni; nuuja gwidape te äblicäco weebibine niya wawena. ²⁰ Yoo, weene gege gemi, ingle weeme mene te niya cable bine yääyebblendemuge, yepä nuuja gwidape baborage gyene peei cabu ca. Weene miiji baborage ngenecu gege läbitininuye, ingle naace gyene weeme ngii oogäräneji piti nemi cabucewe je Acejiyame bau."

*Yeesu Eso Ecäriige Teeme Cabucewe Babe ne
(Matayo 11:25-27; 13:16-17)*

²¹ Yoo, pui padare cabu Aceji Seemo te babo ngenecu gege me jewenige Yeesu ne. Yeesu jejige egä, "Cäme Babe, maane lui Yageyame gäte cabucewe piyepu gawecewe täapume. Cane meebine babo eso näcärenine naace täapume egä maane ai gwidape bine ituge ämletna umle biname piyepu miijimiji mopemuli biname bime bau ca, siige abiberäja cäco biname bime bau me ituge aboclomäja. Yoo, Babe, peei lui mäame miijirage singi gyene."

²² Yeesu puma cita ca biname bine jejemige egä, "Cäme Babe te iyeta gwidape itu saabmalemepi cäme ime cabu me. Nuuja biname te umle lica gyene cäme täapume, cane lui Aceji Bägrä gäne, yepä Babe taatu umle gyene. Piyepu nuuja biname te umle lica gyene Aceji Babe täapume, yepä cane teeme Bägrä taatu umle gäne, cuta piyepu lui biname täapume cane singi teebine aboclom-ta, teepi taatu umle gemi."

²³ Yeesu piba atarongtige teeme abiberäja bägrä bime bau me, teebibine taatu jejemige egä, "Babo ngenecu miiji weeme täapume lui cina ai gwidape bine irecu ca jepänenemiye. ²⁴ Cane weebibine jijenininine egä sasa cabu ca bucurage mename biname piyepu mope biname cina babo singi ge päpäname, weene page lui mule bine jepänenemiye, yepä teepi lica itu jepänemujisi, piyepu teepi babo singi ge ätecijame weene page lui mene itecijenenige, yepä lica itu itecjinuji."

Ngene ca Agli Mene Samariya Biname me Miiji Mule poto cidi me

²⁵ Yepä cotre abiberäja biname te Yeesu gome jeclajutige. Tabe singi Yeesu me abiberäja ne apicetnerame, peei name pi itemlige egä, "Abiberäja biname, cane miiji ngena ne wawena iyeteta ireclota ne päpäname?"

²⁶ Yeesu teebine jejige egä, "Oogäräneji Mene te lipu jüicenige? Maane ngena mene bine peei cabu yaacnemute?"

²⁷ Pui biname te jejige egä, “‘Biname te miiji Acejiyame teeme Yageyame täápume singi iyeta teeme ngenecu cama, iyeta teeme seemo cama, iyeta teeme kokre cama, piyepu iyeta teeme ngene atwanena cama,’ piyepu, ‘biname te miiji teeme nuuja biname ne yepä pana singi cama jaawenuge tabe lipu singi cama teemämu lasicnantuge.’”

²⁸ Yeesu jejige egä, “Määme mene conocäco gyene. Peei ne liba jaawenute, maane piba iyeteta ireclota cire jepänepi.”

²⁹ Yepä, pui cotre abiberäja biname te singi teeme mene conocäco me wawename biname bime opo gaabe, peei name pi tabe Yeesu ne cääri itemlige egä, “Cane miiji lui biname täápume pepu wawena?”

³⁰ Yeesu teebine ngene ca agli mene ca umle jebenige apu egä, “Yoo, yepä biname te äduji Yerusalemä ca Yeriko me. Gaabe cabu ero biname cina teebine joomlisi, iyeta teeme gwidape bine jiiircimisi, teebine eglisi, gaabe gome ebmalisi ejijejija. ³¹ Yepä iiwäreja biname te pui gaabe cabu ädige, liba biname ne jepänige ätwitäneji, gaabe nuuja poto ca ädige. ³² Cuta yepä iiwäreja biname me ätitye-rayame te ädige, pui biname ne liba jepänige, mameta me ädige ireme, piba gaabe ne jeclänu-tige, nuuja poto ca ädige. ³³ Puma cita ca yepä Samariya gawe biname te pui gaabe cabu cuta ädige, liba pui bina-me ne dupe cama jepänige, siige babo owecu me äbitige. ³⁴ Tabe teeme bau me ädige, olibi migi piyepu waina niye dupe cabu icranemige, piba cäbletäape pläsu ca jetäyemige dupe bine. Tabe piba pui dupe biname ne teeme dongki cabu etecwamtige, otnetneja biname bime mete me ecanige. Tabe puga teebine ire jetwige. ³⁵ Nuuja bimü tabe neeneni silba rarekaake bine aasatige, pui otnetneja mete ire atwi biname ne ecäriige, jejige, ‘Peei biname ne cängena ire jetwepi! Ai rarekaake liba ibibi lica gyene, cane cerämu meebine pa nääcärepena, cane liba ai gaabe cabu pagege acnenuta.’”

³⁶ Siige, Yeesu puma cita ca cotre abiberäja biname ne itemlige egä, “Lipu gyene määme ngene atwanena? Pui nesae biname cabu ca laati te dupe biname ne toraca biname me jewenige?”

³⁷ Cotre abiberäja biname te jejige egä, “Pui biname lui te teebine owecu cama itityärige.” Yeesu jejige egä, “Maane ädi, pepu pana mule bine jaawenemute!”

Yeesu Maareta Mariya naabibine Äädäriige

³⁸ Yoo, Yeesu teeme abiberäja bägrä cama gaabe cabu liba eclige, yepä cewe me atyarige. Puga yepä magebi ngii Maareta teebine teeme mete cabu jewablige. ³⁹ Teeme maade Mariya puga ge. Tabe Yeesu gome adnatige, iyeta teeme abiberäja mene cängena utecijige. ⁴⁰ Yepä, Maareta iyeta teeme maramara mete kaakesea name pi ngenecu mäpu me äbitige, puma cita ca Yeesu bau me oclige, jejige egä, “Yageyame, maane lica jepänite egä cäme maade te iyeta kaakesea cäme bau me sebmalemige? Teebine joji cebine ätityerame!”

⁴¹ Siige, Yageyame teebine jojiige egä, “Maareta, Maareta, bucurage gwidape cina meebine ngenecu mäpu me naawenenisi, ⁴² yepä pisi nyene yepä taatu baborage gwidape. Mariya peei miiji gwidape bii jepänige, siige peei ne lica gyene teeme bau ca uutecra.”

11

*Yeesu me Abiberäja Irecu Ätumuta poto cidi me
(Matayo 6:9-13; 7:7-11)*

¹ Nuuja taje Yeesu Acejiyame bau me irecu ätumutige yepä cewe cabu. Teeme irecu ätumuta liba siige, yepä teeme abiberäja bägrä te teebine jejige egä, “Yageyame, nibiberäjinini cibibine irecu ätumutame, Yoane teeme abiberäja bägrä bine lipu itu seabiberäjemumi.”

² Yeesu piba teebibine jejemige egä, “Weene liba irecu lätimutinuye, apu jicemuye egä:

‘Babe,

Määme miijirage ngii ne opo gaabe me naacitesi.

Maane tädepi biname bine waadename.

³ Cime bimü gaabegabe deedei nicäranipi.

⁴ Cime niya mule bine yääyblengemute.

Iyeta nuuja biname bime niya mule cime täápume cine cuta iyebhengemepi cime ngene atwanena cabu ca.

Cuta gone cibibine niwadininute mäpurage apicetnära cabu me.’”

⁵ Siige, Yeesu piba teeme abiberäja bägrä bine ngene ca agli mene jejemige egä, “Pama weeme yepä te teeme biname bau me läduge ciye duusa, teebine jaajuge egä, ‘Cäme biname, maane nesae buluduu watata näcäri. ⁶ Cäme yepä biname te teeme gaabe cabu ca bii tatyaramtige. Cäme nuuja deedei lica gemi teebine ceerame.’ ⁷ Yoo, määme biname te mete cabu ca piba meebine naajuge egä, ‘Gone cebine sabe nawenute, ingle cime grana armeji gyene; cine iyeta bägrä cama ute puupu cabu temi. Cane äblicäco gäne arpinenta

määme singi gwidape ceerame.’ ⁸ Yoo, ngänu gyene tabe teeme biname ge, tabe singi lica ciye duusa arpinentame buluduu ceerame, yepä cane weebibine jijenininine egä, tabe pa larpinantege iyeta teeme singi gwidape ceerame, pui nuuja te liba ajiri lica teebine jaje ätineräja. ⁹ Yoo, peei name pi cane weebibine jijenininine: Acejiyame ne itinäreje, tabe pa icäripi; jirngeje, weene pa jepänepeje; eyäjeje, piba Acejiyame te gaabe pa jiiitnepi weeme täöpume. ¹⁰ Ingle iyeta lui cina yäätinärusi, teebibine yäcäremusi; lui cina jäärgusi, teepi jääpänusi; piijepu lui cina yäyäjusi, gaabe teeme täöpume jiiitnusi. ¹¹ Yoo, weene lui babe gemi, weeme bägrä cina liba cibi täöpume jaji, weeme nuuja te licarage teeme bägrä ne niyarage cobyame ne ceera. ¹² Co, tabe liba paulo kuu täöpume jaji, weeme nuuja te licarage potagetage ne ceera. ¹³ Toraca gyene, weene miiji biname lica gemi, yepä weene umle gemi miiji gwidape taatu bägrä bine ceera. Siige, mime Babe cabucewe je lui miijirage gyene iyeta biname cabu ca, tabe Aceji Seemo toraca pa täätjepi teeme bau me lui cina teebine yäätineräjusi.

*Yeesu piijepu Beelsebul, Satani ca Lui ne Cuta Einenisi
(Matayo 12:22-30; Mareko 3:20-27)*

¹⁴ Yeesu te yepä niija cable ne biname cabu ca iyecräjige. Pui cable te äblicäco mene iicana, peei name pi liba asatige, tabe pui biname te piba gije abacitige mene iicaname. Tomi cabu lui biname cina mutäcäco äbitinisi, ¹⁵ yepä poto cina walya mene jiiicisi egä, “Beelsebul lui niija cable bime mopeyame gyene, tabe te teebine kokre ecäranenige niija cable bine äyecrejame.”

¹⁶ Yoo, nuuja biname cina singi Yeesu me kokre ne apicetne-rame, peei name pi teebine jejsi mara ciitaca mule wawename, awabame teeme kokre liba Acejiyame bau ca täduge. ¹⁷ Yepä, Yeesu teeme ngene atwanena umle äbitige, teebibine jejemige egä, “Nuuja gawe biname cina liba labelaninusi teemeteme cubu me, teepi wata lapirininusi, cuta piijepu ingle biname cina liba teemeteme labelaninusi cubu me, peei ingle te wata lapiruge. ¹⁸ PEEI name pi Satani me niija cable cina liba maramara tomi cabu läbitinusi, teemeteme laglinusi, Satani me waadena mule te piba lipulipu kokre lenaja? Yoo, weene apu jiiicemuye egä Beelsebul, lui ne Satani ca yaainusi, tabe te cebine kokre näcäruge teeme niija cable bine äyecrejame. PEEI toraca lica gyene, ingle Satani singi lica gyene teeme niija cable bine biname cabu ca äyecrejame. ¹⁹ Yoo, poto weeme abiberäja bägrä cina niija cable bine cuta yäyecräjemusi. Luma cita ca teeme kokre peei mule ne wawename? Licarage Beelsebul bau ca. PEEI name pi weemerage abiberäja bägrä cina jaawabudnitusi egä weeme mene cäme poto cidi me lui conocono gyene. ²⁰ Eewe, cäme kokre lui Beelsebul, coo Satani, bau ca lica gyene. Cäme kokre niija cable bine äyecrejame lui Acejiyame me ime cabu ca gyene. PEEI kokre te jaawabudnituge egä Acejiyame me biname bine waadena mule te ituge atyaramta weeme bau me.

²¹ “Yoo, Satani te apu pana gyene kokre biname, lui te teeme cubu gwidape cama teeme mete gome ire cama yaanajuge, siige iyeta teeme gwidape cängena yaacrajuge, ²² yepä cane lui te teeme cabu ca kokre gyene, cane liba teebine joomlune, cubu cama yuutrutune, iyeta teeme cubu gwidape bine piba juutecrunne, tabe lui bine jäätrungemuge, siige teeme ero ca awadäneji gwidape bine piba jaabelanemune.

²³ “Yoo, laati te cäme biname lica gyene, tabe cebine näcäsämutuge; piijepu laati te cäme bau me lica taabasecretni-muge, tabe yaaplidnäremuge.

*Yeesu me Mene Niija Cable me Acnenuta poto cidi me
(Matayo 12:43-45)*

²⁴ “Yoo, niija cable te liba biname cabu ca lasatuge, tabe niije cäco cewe cabu ta waatnetnäjuge, puupu ne jäärguge ngene oocaname. Liba lica jääpänuge, tabe jiiicuge egä, ‘Cane acnenine piijeme, cane lui mete ne sebmalumene.’ ²⁵ Tabe siige lacnuge, mete ne jääpänuge lui apretnäneji piijepu cängena acranäneje ge. ²⁶ Tabe piba läduge seben mage niyarage cable bine arwojame, siige teepi iyeta saacluge pui biname cabu lenajame. Niinäce pui biname miiji lica birige, yepä page tabe siige mage niyarage me läbituge.”

Toraca Gege

²⁷ Yeesu liba pui mene bine jiiicemige, biname tomi cabu ca yepä magebi te babo tage ca jejege egä, “Gege gwene pui magebi lui te meebine itu naplimluji, ngame näcäranuji!”

²⁸ Yeesu teebine joiige egä, “Teepi toraca gege gemi lui cina Acejiyame me mene cängena yäätjecijemuge piijepu jaawenusi.”

*Biname cina Singi Ge Yeesu Ciitaca Mule Wawename
(Matayo 12:38-42)*

²⁹ Biname cina Yeesu gome liba tomi yootisi, tabe piba teebibine jejemige egä, “Weene lipu niyarage biname gemi page ai padare cabu lui cina ireclota gemi! Weene singi gemi

cäme bau ca ciitaca mule ne päpäname, yepä weene nuuja ciitaca mule ne lica pa jepänepeye, yepä taatu Acejiyame me mename biname Yoonä tääpume lipu mule te äbituji, peei ne pa jääpänepesi. ³⁰ Yoo, Yoonä tääpume lipu ituge äbita, peei te Ninewa biname bime tääpume itu jewabudnituji egä teeme mene lui Acejiyame bau ca ge. Cane lui Acejiyame bau ca tädujine, biname me äbitujine, cäme tääpume lipu pagege äbita, peei te pa jaawabudnitepi egä cäme mene ai padare cabu lui Acejiyame bau ca gyene. ³¹ Yoo, atrana bimü cabu Siiba gawe mope magebi lui sasa padare cabu onajuji, teebine liba weene cama cire twaarpinantepi atrana tääpume, tabe weebibine cire jiwabipi egä weene ätecija cäco biname gemi, ingle tabe mage cudecewe ca tocluji uule poto ca Solomona me umle mene ätecijame. Yoo, cane weebibine jijenininine egä cane age säne baborage Solomona cabu ca. ³² Yoo, atrana bimü cabu Ninewa cewe biname cina cirege abujenga, weebibine cire jiwabipesi egä weene ätecija cäco gemi, ingle teepi te niija mule cabu ca itu tatatrongärininijisi, liba Yoonä me mene itecijemuji. Yoo, cane age säne baborage Yoonä cabu ca, yepä weene singi lica gemi cäme mene ätecijame!”

*Irecu Lui Tääpe me Lampa Gegi
(Matayo 5:15; 6:22-23)*

³³ Nuuja biname te lica lampa ne jaabotuge piba yäämlituge, coo diiba ca yäätrugärüge, yepä tabe cabu me yaatecwantuge. Piba biname cina apaclyera ne jääpänsusi mete cabu me, liba yääbäcnusi. ³⁴ Yoo, irecu lui lampa pana gegi tääpe tääpume. Määme irecu liba miiji birige, määme tääpe te, iyeta apaclyera taatu birige, yepä määme irecu liba niija birige, määme tääpe te cuta krokeciije cabu yaanajuge. ³⁵ Yoo, cängena ire egä määme cabu lui apaclyera te lica krokeciije gyene. ³⁶ Siige, määme cabu apaclyera te liba babo läbituge, piyepu määme cabu nuuja krokeciije liba lica birige, piba määme ireclota iyeta lui apaclyera cabu birige, epu pana apaclyera te lampa cabu ca meebine lipu naapaclyärüge.

*Parisea Sigu Biname piyepu Cotre Abiberäja Biname bime Mule poto cidi me
(Matayo 23:1-36; Mareko 12:38-40)*

³⁷ Yeesu pui mene bine liba epiremige, yepä Parisea sigu biname te teebine ala tesoglicige ten cama matikolä deedei äbitame. Siige, Yeesu teeme mete me abacitige, deedei tääpume adnatige. ³⁸ Pui Parisea sigu biname älu te jitige, liba jepänige egä Yeesu lica bäcisäjige ingwe ca piba deedei äbitame, Parisea biname bime mule liiyepu. ³⁹ Peei name pi Yageyame teebine jejige egä, “Yoo, weene Parisea biname cina weeme tääpe cängena jääcisäjemuye, piyepu weeme niije kwäye piyepu deedei kwäye liiyepu kaakepoto bine jääcisäjemuye, yepä weeme trupa ngalebora niija singisingi piyepu conocono piti nemi. ⁴⁰ Weene buduma gemi! Acejiyame lui te weeme tääpe bine ituge wawena, tabe cuta weeme trupa bine ituge wawena. ⁴¹ Yepä, weeme kwäye ngalebora ngena piti nemi, ecäremepeye owecumete biname bine, siige iyeta jugi cäco pa läbitepi weeme tääpume.

⁴² Yoo, Parisea biname, mage mäpu cirege weeme tääpume! Weene Acejiyame ne yepä yääcäruye weeme iyeta ten deedei mite wawena laame ngii minti, ruu, piyepu lija nuuja laame cabu ca, ngänu gyene Cotre cabu pui mule lui baborage lica gyene. Yepä, weene lica jaawenemuye lui Cotre mule modamoda gemi apu egä iyeta biname bine yepä pana ire jaatwemuye, piyepu toraca singi läbitininuye Acejiyame tääpume. Weene miiji ai modamoda mule bine wawenetnäja, cuta gone ngene ätrimela poto matimati mule bine wawenetnäjame.

⁴³ Parisea biname, mage mäpu cirege weeme tääpume! Weene singi modamoda biname bime puupu cabu adnaterame abasecre-tna mete cabu, piyepu weene singi gemi biname cina weebibine awablame aletna puupu cabu. ⁴⁴ Weene mäpu cirege päpäna, ingle weene epu pana gemi gape liiyepu lui gawe cabu ämlitäneji yaanajuge. Lui biname cina peei cabu waatninusii, teepi nuuja umle lica gemi egä ocwäwäneji gwidape pisi nyene gawe bora. Pepu pana, biname lui cina weeme mameta me otäni, teepi nuuja umle lica gemi egä ngalebora weene niija gemi.”

⁴⁵ Puma cita ca yepä cotre abiberäja biname te jejige egä, “Abiberäja biname, määme mene te cuta cibibine ngenecu mäpu me niwenininige!”

⁴⁶ Yeesu jejemige teebibine egä, “Yoo, cotre abiberäja biname, weene cuta piyepu mage mäpu cirege päpäna. Weene biname bine mäpu me jaawenemuye weeme bucurage cotre liba teebibine owecu cäco yääcäremuye, yepä weene singi lica teebibine ätityerame peei cotre bine cängena wawenecame. ⁴⁷ Yoo, mage mäpu cirege weeme tääpume! Weene miijimiji kula caale bine yaarangemuye Acejiyame me sasa mename biname bine ngene apecname, puirage mename biname weeme kaakesaare cina lui bine itu eglecimujisi. ⁴⁸ Page weeme mule mara lica gyene weeme kaakesaare bime cabu ca. Teepi mename biname itu eglecimujisi, cuta page weene pui mename biname bime ngene apecna kula bine jaawenemuye. ⁴⁹ Yoo, Acejiyame umle cama itu jüicemuji egä, ‘Cane maramara mename

biname bine teeme bau pa jäätyepemepene. Poto bine teepi niiya pa jaawenemepesi; poto bine budre me pa yaaglecemepesi.⁵⁰ Yoo, weene lui gemi ireclota cama page, weene pui mäpu daremu cirege päpäna iyeta mename biname bime agleca täápume piyepu teeme uudi apira täápume agedna padare cabu ca ngälu page.⁵¹ Abela lui niinäce biname ge lui ne budre egluji, siige puma cita ca agleca mule te enajuji ngälu Sakariya ne budre me eglujsi iiwäreja mete piyepu iiwäreja dade cole puupu cabu je. Yoo, cane weebibine jijenininine egä page lui biname cina icrajinige, teepi te iyeta ai agleca täápume daremu ne cire jääpänepesi!

⁵² Yoo, cotre abiberäja biname, mage mäpu cirege weeme täápume! Weene gaabe ne ituge armi biname cina Acejiyame me singi toraca umle äbitame. Weene weemämu lica umle äbita, piyepu weene biname bine jibemuye lui cina singi gemi umle äbitame!”

⁵³ Siige, teeme mene liba epiremige, Yeesu pui mete ne sebma-lige. Cotre abiberäja biname piyepu Parisea sigu biname cina teebine jimugetrnisi. Pui padare cabu ca teepi bucurage maramara gwidape poto cidi me itemläjisi,⁵⁴ ingle teepi singi teebine giri acita yepä conocono mene iicaname, piba pui cabu ca teebine oomlaname.

12

Yeesu Mene Jejemige Walya Biname poto cidi me (Matayo 10:26-27)

¹ Pui padare cabu bucurage tausen biname cina abasecretnige; teepi tomi cabu ädudnecäjininisi. Siige, Yeesu niinäce teeme abiberäja hägrä bine jejemige egä, “Weene walya mule gone, ai Parisea sigu biname liiyepu. Utneca gwidape te buluduu ne lipu joomluge, siige iyeta poto ta juutnecuge, pepu pana walya mule te biname me ireclota ne iyeta joomluge.² Weene äblicäco walya mule cabu iyeteta lenaja. Ngena gyene ämlitäneji, pagege pajecu me äbita; ngena gemi ogä, pagege awabudnäja.³ Yoo, lui mene bine weene krokeciye cabu jicemuye, biname cina bimü cabu pa yäatecijemepi, piyepu mete bora weene siiyä mene ca biname me tablame cabu ngena ituge jaji, mete toro cabu ca pagege jajanena.”

Laati täápume Miiji Wälu (Matayo 10:28-31)

⁴ “Cäme binamewale, cane weebibine jijenininine egä, “Wälu gone biname täápume. Biname te nuuja biname ne yaagluge, yepä budre ingwe ca tabe äblicäco pui biname ne nuuja niiya wawena.⁵ Pätä, weene miiji Acejiyame täápume wälu, ingle teeme kokre pisi nyene biname me budre ingwe gaabe ca teeme seemo ne cuta niiya puupu cabu me ajarame. Yoo, peei name pi cane weebibine jijenininine egä weene miiji Acejiyame täápume wälu.

⁶ Yoo, faib matimati ele bine biname cina jaaletnemusi neeneni cäsäcäsä rarekaake ca, yepä Acejiyame te lica yepä pui ele poto cidi me ngena jäätrimaluge.⁷ Yoo, tabe cuta weeme poto cidi me iyeta umle gyene; tabe umle weeme edingäli lija gemi. Peei name pi weene wälu gone, ingle Acejiyame me singi weeme täápume lui baborage gyene teeme ele täápume singi cabu ca.”

Wälu Gone Keriso poto cidi me Mene Jajanename (Matayo 10:32-33; 12:32; 10:19-20)

⁸ “Cane lui Acejiyame bau ca tädujine, biname me äbitujine, cane weebibine jijenininine egä lui biname te biname bime sobe cabu jaajemuge egä, ‘Cane Yeesu Keriso me biname gäne,’ cane te Acejiyame me mename seemo bine pa jaajemepene pui biname poto cidi me egä, ‘Tabe cäme biname gyene.’⁹ Yepä, lui biname te cebine biname bime sobe cabu nainuge, cane cuta teebine pa jaainepene Acejiyame me mename seemo bime opo gaabe je.

¹⁰ Yoo, lui biname te cebine näcisecräjuge, cane lui Acejiyame bau ca tädujine, biname me äbitujine, Acejiyame pui niiya ne cirege äyeblingta, yepä lui biname te niiyarage mene jicemuge Aceji Seemo poto cidi me, peei niiya ne lica cirege äyeblingta.

¹¹ Yoo, weebibine liba ablaweja täápume iwadininusi abasecre-tna mete cabu me, coo nuuja mope biname bime opo gaabe je, piba bucurage ngena atwanena gone egä, ‘Cane ngena mene pa jaajemepene?’ coo, ‘Cane lipu gäne daremu mene awecnistame?’¹² Ingle naace gyene Aceji Seemo pui padare cabu meebine mene pa icäripi iicemame.”

Ngene ca Agli Mene Yepä Buduma Mule Dogwe Biname poto cidi me

¹³ Tomi cabu ca yepä biname te piba jejige egä, “Abiberäja biname, cäme naane ne jeji cäme täápume abelename cime babe te lui gwidape bine itu saabmalemepi!”

¹⁴ Yeesu teebine jejige egä, “Nuuja biname te lica cebine najepi weeme ablaweja biname coo atrana biname me äbitame. Gone cebine najute gwidape bine abelaname weeme täápume.” ¹⁵ Tabe puma cita ca iyeta biname bine jejemige egä, “Cängena ire, gone singisingi läbitininuye bucurage maramara gwidape täápume, ingle biname me ireclota baborage gyene gwidape cabu ca, ngänu gemi teeme peei gwidape lipu bucurage.”

¹⁶ Tabe piba teebibine jejemige ai ngene ca agli mene egä, “Yepä gwidape dogwe biname te yaanajepi. Teeme gawe cabu bucurage deedei cina luutipesi. ¹⁷ Tabe ngene jwaatwananepi egä, ‘Cane ngena pa jaawenepene, ingle căme cumä täápume mete ibibi lica gemi iyeta ai deedei bine äbăcname?’ ¹⁸ Tabe piba jiiçige egä, ‘Cane apu pa jaawenene! Cane cumä täápume mete bine pa jiiçnemepene, piba cuta modamoda bine pa yaarange-mepene. Iyeta căme calwa-cupi deedei piiyepu căme nuuja gwidape bine peei cabu pa yăăbăcnemepene cumä täápume. ¹⁹ Piba cane cămămu pa jiiçepene egä, ‘Căme gwidape bucurage gemi, ibibi gemi poto kămăge täápume. Cane ngene pa loocepene, deedei äbitame, niije nanime, gege taatu lenajame.’ ” ²⁰ Yepä, Acejiyame teebine jejige, ‘Maane buduma gäte! Ai ciije cabu määme ireclota te apireniçe. Iyeta gwidape maane lui määme täápume tomitomi tewenemumete, baa laati te pa yaawademepi?’ ”

²¹ Yeesu pui mene ne epirige egä, “Pepu pana pa läbitepi teeme täápume lui cina gwidape tomitomi äbitininisi, yepä gwidape singisingi name pi, teeme padare lica gyene Acejiyame täápume.

Acejiyame ne Jäärunguye Weeme Bimu Gaabegabe Deedei piiyepu Gwidape täápume (Matayo 6:25-34)

²² Yeesu piba teeme abiberäja băgrä bine jejemige egä, “Yoo, peei name pi ngenecu mäpu gone läbitininuye weeme ireclota täápume ngena yaarwuye, coo weeme tääpe täápume ngena lasigrärinuye. ²³ Ingle naace gyene weeme ireclota lui baborage gyene deedei cabu ca, piiyepu weeme tääpe baborage gyene căbletăäpe cabu ca. ²⁴ Yoo, sändäyame bine jepänemeye. Teepi giçe lica yăätemusı, lica yăărucnemusi, teeme nuuja puupu lica ge deedei cumä täápume acraname, yepä Acejiyame te teebibine cängena ire jetwenenemige. Yoo, ele cabu ca weene modamoda gemi Acejiyame me ngene atwanena cabu! ²⁵ Năă, weene ibibi gemi weeme ireclota yepä bimu cerămu leca me wawena weeme bucurage ngene atwanena cabu ca? Weene äbăcăco! ²⁶ Yoo, weeme bucurage ngene atwanena liba ibibi lica ai matikolä gwidape wawename, piba ngeno me bucurage ngene atwanena iyeta nuuja gwidape poto cidi me? ²⁷ Baace popo bine jepänemeye teepi lipu uutenininisi miijirage. Teepi kaakesea lica jaawenemusı, coo piiyepu căbletăäpe lica yaaterutăjemusi. Yepä, cane weebibine jijenininine egä ngänu gyene mope biname Solomona puu jamyacurage căbletăäpe ca abasogărui, yepä tabe epu miiji opo lica äbitui ai baace popo bime yepä te liiyepu. ²⁸ Acejiyame te liba apu yaabasogăremuge baace bine, lui cina page luutinusı, ciyeciye siige muye cabu me yiisabemusı, egăsu tabe cuta weebibine isigrerăjininuge căbletăäpe ca. Weeme ätrunga lipu matimati gemi! ²⁹ Weeme ngenecu gone deedei piiyepu niije cabu me yaacranemuye; gonerage ngenecu mäpu me äbita. ³⁰ Acejiyame umle căco biname teepi te jäärngemusı iyeta ai gwidape bine, yepä weeme Cabucewe je Babe te umle gyene egä weeme singi piti nemi ai gwidape täápume. ³¹ Pătä weene miiji äbitipeye tabe te weebibine waadename, siige tabe cuta weeme singi gwidape bine pa icăranipi.”

Gone Gwidape bine Yaatomlicmuye Ai Gawecewe cabu (Matayo 6:19-21)

³² Yeesu jejemige egä, “Weene lui epu pana matikolä maamoi tomi, yepä wălu gone, ingle weeme Babe geçe gyene weebibine piiyeme waadename. ³³ Weene gwidape bine yaacranemuye aletna täápume, siige pui cabu ca lui rarekaake owecumete biname bine yăăcăremuye. Yoo, rarekaake äbăcna diiba cina sasa me läbitininusi; ai gawecewe gwidape cina lämletrnininusi. Peei name pi miijimiji gwidape cabucewe je puupu cabu yaacranimuye. Weene liba miiji mule jaawenemuye, peei lui apu gyene weene miijimiji gwidape bine cabucewe je cumä täápume acraname. Puma teepi lica lämletrnininusi, ingle ero biname te äbăcăco gyene waadena, piiyepu potăte cina lica jaatecimusi. ³⁴ Yoo, määme miijimiji gwidape luma, määme ngenecu cuta puma birige.”

Amacetnăjëneji Inajininuge Mime Yageyame me Acnenuta täápume

³⁵ Yeesu jejemige egä, “Amacetnăjëneji inajininuge, căbletăäpe labasogărininuye, piiyepu weeme lampa bine abotăneji yaacranemuye. ³⁶ Weene epu pana läbitininuye kaakesea băgrä liiyepu, lui cina teeme babo biname ne jaawagrijiusi soriyomu cabu ca liba acnenutame. Tabe liba tädige, grana cabu soororăjuge, siige teepi grana ne wata jiiçnusi teeme täápume. ³⁷ Babo miijirage teeme täápume lui bine teeme babo biname te ireclota cama amacetnăjëneji jăăpănemuge teeme acnenuta padare cabu. Cane weebibine toraca

jijenininine egä, tabe cäbletääpe pa lasigrepi kaakesea me, teebibine deedei täápume pa yaawednetäjemepi, teebibine cängena ire pa jaatwemepi. ³⁸ Yoo, babo miijirage pui kaakesea biname bime täápume, teeme babo biname liba ciyedusa täduge, coo sewali mameta liba täduge, yepä teebibine cuta ireclota cama jääpänemuge. ³⁹ Cuta ai potu cidi me ngena jwaatwa-naninuye. Mete yageyame liba ero biname me otni padare potu cidi me umle ge, tabe piba ero biname ne jiibuge teeme mete cabu abacitame. ⁴⁰ Yoo, weene miiji amacetrnäjäneji lenaja, ingle cane lui Acejiyame bau ca tädujine, biname me äbitujine, cane lica weeme singi padare cabu acnenuta, yepä weene nuuja umle lica gemi cäme otni padare.”

*Miiji Kaakesea Bägrä piijepu Niija Kaakesea Bägrä
(Matayo 24:45-51)*

⁴¹ Peteru Yeesu ne itemlige egä, “Yageyame, maane peei ngena ca agli mene, nää cime täápume taatu jiiemite, coo iyeta biname bime täápume jiiemite?”

⁴² Yageyame teebine jejige egä, “Cäme mene lui iyeta toraca ngenecu piijepu umle cama biname bime täápume. Teepi lui epu pana gemi kaakesea bägrä liijepu, teeme babo biname te lui ne mete ire atwi kaakesea pa yääcärepi teeme nuuja kaakesea bägrä bine teeme deedei kupae toracarage padare cabu ceerame. ⁴³ Tabe babo biname te piba nuuja cewe me pa lädepi. Yoo, babo miiji, babo gege pui kaakesea bägrä täápume, teeme babo biname lui ne cängenarage kaakesea cabu pa jääpänepi teeme acnenuta padare cabu. ⁴⁴ Yoo, cane weebibine jijenininine egä pui babo biname te piba teebine pa jaajepi iyeta teeme gwidape bine ire atwemame. ⁴⁵ Yepä, pui kaakesea bägrä te liba lajuge egä, ‘Cäme babo biname te pama lica wata pa tacnenuitepi,’ piba nuuja kaakesea ngulebägrä imäbägrä bine pa yaatemeläjemepi, bucurage deedei pa läbitepi, sice pa yäänäjemepi, siige sice buduma pa läbitepi. ⁴⁶ Yoo, pui babo biname te liba pa tatyaramtepi, kaakesea bägrä piba cälu te pa jäätepi, ingle tabe teeme acnenuta padare umle lica ge. Babo biname te piba teebine pa yaaglepi, pa yaajarepi muye puupu cabu me, mene ätecija cäco biname cina luma cirege lenaja.

⁴⁷ Yoo, lui kaakesea bägrä te umle ge teeme babo biname ngena kaakesea täápume singi tabe wawename, yepä tabe lica amacetrnäjige pui kaakesea wawename, babo biname te teebine mäpu cmecme ca pa yaatemeläjepi. ⁴⁸ Yepä, kaakesea bägrä lui te umle lica ge teeme babo biname ngena kaakesea täápume singi tabe pui ne wawename, piba teeme umle cäco name pi tabe buduma mule jaawenuge, lui täápume teebine miiji ge atemeläja, piba teeme babo biname teebine däägu pa yaatemeläjepi. Yoo, lui biname ne bucurage gwidape ituge ceera, bucurage gwidape cuta teeme bau ca pa saacwetnemepi, piijepu lui biname ne ire atwi kaakesea täápume itu jaajepi, tabe miiji teeme kaakesea mage cängenarage wawename.”

*Poode Lica Gyene Ai Gawecewe täápume
(Matayo 10:34-36)*

⁴⁹ Yeesu cuta jejemige egä, “Cane tädujine ai gawecewe ne muye ca abotame. Cane baborage singi egä pui muye te gije tabacitumi ayime. ⁵⁰ Yepä, niinäce gaabe cane miiji mäpurage padare cabu abacitame, epu pana abacita biname liijepu lui te niije bora liiglenutuge äcisejame, peei name pi cane ngenecu mäpu cama nanajenige page, ngälu peei mäpu cabu ca pa lasatepene. ⁵¹ Nää, weene apu jingenininige egä cane tädujine poode ne ai gawecewe cabu acaname? Eewe, cane weebibine jijenininine egä cane lica poode ne secanujine, yepä biname cina maramara me pagege äbita cäme name pi. ⁵² Yoo, ai padare cabu ca, biname lui cina cebine nätrungenisi piijepu teeme ätrunga cäco binamewale, teepi maramara pa läbitipesi. Faib biname yepä mete cabu ca teepi neeneni tomi pa jaawenepesi: nesae cina mara me pagege äbita nuuja neeneni cabu ca, piijepu neeneni cina mara me pagege äbita pui nesae cabu ca. ⁵³ Babe cina mara me pa läbitipesi teeme imäbägrä cabu ca, piijepu mage cina mara me pa läbitipesi teeme ngulebägrä cabu ca, cuta piijepu cnaatete cina teepi maramara me pa läbitipesi.”

*Ai Padare me Aboclomta potu cidi me
(Matayo 16:2-3)*

⁵⁴ Yeesu biname bine jejemige egä, “Weene liba cäsäcäsä carbe ne jääpänuye ciije potu ca tädenige, weene piba jiiucuye egä, ‘Ngupe te tädenige aimopo,’ siige pepu läbituge. ⁵⁵ Piijepu weene liba uule buuwe jääpänuye, weene piba jiiucuye egä, ‘Bimu nuunu me pa läbitege,’ siige pepu läbituge. ⁵⁶ Weene walya umleumle biname gemi! Weene umle gemi gawe piijepu dume cabu ca bimu ne opo awatname, yepä weene äblicäco gemi opo awatna page ai padare cabu lui mule cina äbitininisi, teepi ngena tääpu memi.”

*Weeme Conocono bine Weemämu Yaablawäjuye
(Matayo 5:25-26)*

⁵⁷ “Weene ngenome lica weemämu atranineye ngena mule gemi conocäco wawename? ⁵⁸ Yoo, nuuja biname te liba singi weeme yepä ne ablaweja puupu cabu me acaname, pui neeneni liba gaabe cabu otni, tabe miiji apicetnera pui nuuja ne puma gaabe cabu je poode wawename. Piba pui biname te lica teebine yaacanuge ablaweja biname me opo gaabe me, cuta piba ablaweja biname te teebine teeme ätityera biname me ime cabu lica yaacituge krokeciye mete bora äsinglentame. ⁵⁹ Cane weebibine jijenininine egä tabe liba krokeciye mete me labacituge, tabe peema cita ca lica tasatuge, ngälu iyeta pui rarekaake yäcäruge lui teeme conocono mule me daremu.”

13

Weene Niïya Mule cabu ca Latatrongärininuye

¹ Pui padare cabu puga ge poto biname lui cina Yeesu ne umle jwenisi yepä mäpu mule poto cidi me. Teepi jejisi egä Mopeyame Pilato te poto Israela biname bine Galilaya probins cabu ca eglecimige iiwäreja mete caale bora je, teepi liba yiwäräjisi Acejiyame ne. ² Yeesu piba teebibine itemlemige egä, “Weene lipu ngene jotwananiniye, nää pei Galilaya biname cina baborage niïya itu tewenumesi nuuja Galilaya biname bime cabu ca, ingle teepi pepu budre ne tepänumesi? Eewe pepu lica ge. ³ Cane weebibine jijenininine egä weene liba lica atatrongäripeye weeme niïya mule cabu ca, piba weene iyeta niïya budre ne pa jepänepeye. ⁴ Piiyepu, weene pui eitn Siloama cewe biname bime poto cidi me ngene jotwananiniye, lui cina budre ne itu jääpänesi cabu me lecarage mete te teeme cabu liba itu saatramepi. Nää, weene apu jingenininige egä teepi niïyarage biname gemi iyeta nuuja biname cabu ca lui cina Yerusalema babo cewe cabu icrajenige? ⁵ Eewe, teeme niïya baborage lica ge weeme cabu ca. Cane weebibine jijenininine egä weene liba lica atatrongäripeye weeme niïya mule cabu ca, piba weene iyeta niïya budre ne pa jepänepeye.”

Ngene ca Agli Mene Yepä Uli poto cidi me

⁶ Yeesu piba jücemige ai ngene ca agli mene biname bine umle wawename egä Acejiyame te matikolä padare taatu ecärenemige teepi teeme ireclota cängena amacetnäjame. Teeme mene apu ge, “Yepä biname teeme piigi uli puga ge teeme calwacupi cabu je. Yoo, nuuja taje tabe piigi kuu täapume ädige, yepä kuu lica jepänige. ⁷ Tabe puma cita ca teeme calwacupi kaakesea biname ne jejige egä, ‘Ai uli jepäni! Cane liba aima twaatnepene nesae kämäge cama, kuu bine jäärngemepene, yepä lica jääpänemepene. Ai uli ne irgi! Miiji lica ai gawe cabu papa kuu cäco lenajame!’ ⁸ Yepä, calwacupi kaakesea biname te jejige egä, ‘Babo biname, ai yepä kämäge täapume ebmal. Cane ai gome gawe calwacalwa pa jaawenepene, piiyepu kau bime liïya ca pa jääsinepene uli ingle ne. ⁹ Ai liba kuu bine pa jääpänemepi nuuja kämäge, piba babo miiji gyene, yepä liba kuu cäco pa yaanajepi, piba pagege ärgi.’ ”

Sabade Bimu cabu Yeesu Magebi ne Miiji me Jowenige

¹⁰ Yepä Sabade bimu cabu, Yeesu biname bine ebiberäjemige teeme abasecretna mete cabu je. ¹¹ Puga ge yepä magebi lui te niïya cable cama waanajenanepi eitn kämäge cama. Tabe äpednu-teji uuwe kukuku totnäjumi, ingle tabe äblicäco conocäco aclajuta. ¹² Yeesu liba teebine jopänige, tosoglicige teeme bau otnime, piba jojige egä, “Magebi, maane pita cabu ca miiji bäbititel” ¹³ Tabe ime bine teeme papa cabu aacitige, siige magebi te piba taatu conocäco joclajutige, Acejiyame ne piba ewepyeräjige.

¹⁴ Yepä, pui abasecretna mete babo biname te claabe me äbitige, ingle Yeesu lipu magebi ne omacetnäjige Sabade bimu cabu. Tabe abasecretna biname bine jejemige egä, “Mime siks bimu piti nemi kaakesea täapume; weene miiji pui bimu cabu weeme täape amacetnäja täapume otnime, yepä Sabade bimu cabu gone!”

¹⁵ Yageyame teebine jejige egä, “Maane walya biname gäte! Weene umle gemi weeme kau piiyepu dongki bine iibira piiyepu waadana niïye nänäjame Sabade bimu cabu. ¹⁶ Yoo, age tuna weeme biname, Abraham me kaakesaare gwene, Satani te lui ne eitn kämäge cama tocenenäjumi. Nää, cane miiji gäne Sabade bimu cabu peei pita cabu ca teebine miiji me wawename?” ¹⁷ Iyeta Yeesu me cubuyame cina ajiri me äbitininisi, teeme mene liba jiteciijisi, yepä bucurage biname cina gege äbitininisi iyeta miijirage gwidape name pi tabe lui bine jewenanemige.

*Ngene ca Agli Mene Mastad Kuu Gije poto cidi me
(Matayo 13:31-32; Mareko 4:30-32)*

¹⁸ Yeesu itemlemige egä, “Acejiyame me mule biname bine waadana täapume lipu pana gyene? Cane lipu peei mule ne etonärenine weeme täapume? ¹⁹ Peei lui epu pana gyene mastad kuu gije liiyepu, biname te lui ne ecatige teeme calwacupi cabu jecnige. Pui gije

uutige, uli pana äbitige, siige ele cina ciipe cabu teeme mete bine yaarangemusi. Pepu pana gyene Acejiyame ne waadena mule, lui mastad kuu pana matikolärage, peei cabu ca uli pana babo me läbituge.”

*Ngene ca Agli Mene Uutneca Gwidape poto cidi me
(Matayo 13:33)*

²⁰ Yeesu cääri itemlemige egä, “Yoo, cane lipu Acejiyame me biname bine waadena mule weeme täapume etonärenine? ²¹ Peei lui epu pana gyene uutneca gwidape liiyepu, magebi te lui ne ecatige, baborage bulu cama elenglecäjige, ngälu siige peei iyeta te tuutnecuge.”

*Grana Susu Gyene Iyeteta Ireclota cabu Abacitame
(Matayo 7:13-14, 21-23)*

²² Yeesu liba gaabe cabu ädige Yerusalema me, tabe cewe yepäyepä cabu biname bine ebiberäjemige. ²³ Nuuja taje gaabe cabu yepä biname te teebine itemlge egä, “Babo biname, nää Acejiyame te nesae taatu biname bine niya cabu ca pa yäasecräremepi?”

Yeesu biname bine piba jejemige egä, ²⁴ “Weene kokre äbitipeye susurage grana cabu me äbäcname, ingle cane weebibine jjenininine egä bucurage biname cina naabe äbitininisi äbäcname. ²⁵ Padare te cire tädepi, mete yageyame te grana ne liba cire saarmepi. Piba weene liba mete kaakepoto ca cire inajipi, grana ne cire seyäjepeye, cire jejepeye egä, ‘Babo biname, grana ne tiitni cime täapume!’ Yepä, tabe weebibine cire jiwecnistipi egä, ‘Cane umle lica gäne weene. Weene luma cita ca gemi?’ ²⁶ Weene piba cire jejepeye egä, ‘Cine ituge deedei äbita piyepu niye nänäja maane cama. Maane cime cewe cole puupu cabu itu nibiberäjipete.’ ²⁷ Tabe puma cita ca cire jijipi egä, ‘Cane umle lica gäne weeme täapume, weene luma cita ca gemi! Weene niya mule biname, iyeta äyebingineye căme bau ca!’ ²⁸ Weene piba ele cire ingenitnipi piyepu giricu cire etebecmepeye, liba Abrahamo, Isacako, Yakobu, piyepu iyeta sasa mename biname bine cire jepänemepeye Acejiyame me waadena cabu ge, yepä weene äyebingjeji gemi. ²⁹ Yoo, biname cina cire saaclepi bimu acita gome ca piyepu bimu äpula gome ca, piyepu kämäge poto ca piyepu uule poto ca. Teepi cire ladnatärepi soriyomu täapume Acejiyame me waadena padare cabu je. ³⁰ Yoo, poto biname lui ingwe gaabe biname gemi page, teepi niinäce gaabe me cire läbitipesi pui padare cabu, cuta piyepu poto lui niinäce gaabe biname gemi page, teepi ingwe gaabe me cire läbitipesi.”

*Yeesu Owecu Ge Yerusalema täapume
(Matayo 23:37-39)*

³¹ Puirage padare poto Parisea sigu biname cina Yeesu bau me seclige, jejisi egä, “Maane ama cita ca äyebingti, nuuja gome ädi, ingle ai Probins Mopeyame Heroda singi meebine aglime.”

³² Yeesu teebibine jejemige egä, “Naclege, pui angletneja biname ne jejeje egä, ‘Cane căme kaakesea jewenenine: niya cable bine iyecräjenenemine piyepu pita biname bine emacetrnäjenemine page piyepu ciyeciye, piba nesae bimu ingwe ca ai kaakesea ne pa yaapirepene.’ ³³ Yoo, cane miiji căme kaakesea gaabe cabu otni ai poto bimu cama, siige Yerusalema ne piba oomlaname, ingle iyeta Acejiyame me mename biname cina Yerusalema je teepi budre jääpänanusi.”

³⁴ Yeesu piba ngenecu mäpu cama jüicige egä, “Yerusalema biname, Yerusalema biname, weene lui cina Acejiyame me mename biname bine yaaglecimuye, piyepu kula ca jääbyecremuye lui bine weeme bau me ätyepäneji gemi! Bucurage padare cama, cane singi ituge weeme biname bine yepä gome waadena, epu pana paulo te lipu teeme plongo bine yepä gome jaabasecretinimuge taame ca ätrugerame, yepä weene singi lica ge. ³⁵ Ire, weeme iiwäreja mete lui abmaläneji gyene Acejiyame bau ca. Cane weebibine page jjenininine egä weene cebine ingwe ca lica päpäna ngälu pui padare weene liba pa jüicepeye egä, ‘Miiji pa läbitege lui te Yageyame me ngüi cabu tädenige.’”

14

Yeesu Pita Biname ne Miiji me Jewenige

¹ Yepä Sabade bimu cabu, yepä Parisea sigu babo biname te Yeesu ne teeme mete me ala tesoglicige deedei täapume. Puga iyeta biname cina teebine ire jetwanisi, ² ingle puga ge teeme opo gaabe yepä biname lui me ime piyepu ernge ädreji ge. ³ Yeesu puma cita ca cotre abiberäja biname piyepu Parisea sigu biname bine itemlemige egä, “Mime cotre mene te lipu jüicenige, nää miiji gyene pita biname ne miiji me wawena Sabade bimu cabu, coo liiyepu?”

⁴ Yepä, teepi nuuja mene lica jejisi. Yeesu piba pui pita biname ne ecatige, teebine miiji me jewenige, siige jityepige. ⁵ Tabe piba peei biname bine jejemige egä, “Sabade bimu cabu

weeme yepä me bäärä te, coo kau te, uugle cupicu bora me liba yaatramuge, tabe pui bimu cabu wata cuta saarpatuge, nää toraca?"⁶ Siige, teepi äblicäco nuuja mene teebine jaji.

Umle Mene Äärenä Biname bime poto cidi me

⁷ Yeesu biname bine jepänemige egä pui mete cabu lui cina deedei täöpume adnatäreji ge, teepi singi ge modamoda biname bine puupu cabu lenajame. Tabe peei name pi ai ngene ca agli mene teebibine jejemige egä,⁸ "Yoo, biname te liba weebibine soriyomu täöpume ala tisoglicinuge, gone modamoda biname bime puupu cabu adnatera, ingle pama soriyomu ire atwi biname te nuuja biname ne cuta ala taasoglicuge, lui ge baborage weeme cabu ca.⁹ Tabe piba weeme yepä ne pa jaajepi egä, 'Agesa babo biname, teebine ai miijirage puupu ecäri.' Piba weeme yepä te ajiri cama puupu ne saabmaluge, läduge papa biname cina luma yaacrajuge.¹⁰ Yepä, weebibine liba ala tisoglicinisi soriyomu täöpume, weene papa biname bime puupu cabu ladnatärinuye. Piba soriyomu ire atwi biname te weebibine pa jijipi egä, 'Ayo, căme biname, ai miiji puupu cabu adnatame.' Piba weene miiji opo pa päbitipeye nuuja biname bime opo gaabe.¹¹ Siige, lui biname te singi teeme ngii babo me wawename, tabe matikolä me pa läbitepi, piipepu lui biname te teeme ngii ne teemämu matikolä me jaawenuge, tabe babo ngii ne pagege päpäna."

¹² Piba Yeesu te pui mete yageyame ne jejige egä, "Maane liba biname bine ala tasoglecemute mäame mete me niye nänäjame, coo deedei äbitame, gone mäame binamewale, coo dogwe biname taatu ala tasoglecemute, ingle teepi piba meebine cuta pagege ala asogleca mäame mule ne awecnistame.¹³ Yepä, maane liba biname bine babo deedei täöpume ala tasoglecemute, maane miiji owecumete biname piipepu tääpe niyaniya biname, irecu määsumäsu biname, cuta piipepu ernge niya biname ala tasoglecemute.¹⁴ Pepu biname cina äblicäco mäame miiji mule ne daremu wawena. Piba maane Acejiyame bau ca miiji daremu ne cire jääpänepete, tabe liba conocäco biname bine budre cabu ca cire yaarpinärepi."

Ngene ca Agli Mene Babo Soriyomu poto cidi me
(Matayo 22:1-10)

¹⁵ Yepä te, pui biname cabu ca lui cina Yeesu cama deedei äbitinisi, Yeesu me ngene ca agli mene liba itecijige, teebine piba jejige egä, "Babo miijirage gyene teeme täöpume lui cina cabucewe je cire ladnatäripesi deedei täöpume Acejiyame luma biname bine yaawademuge."

¹⁶ Yeesu teebine ai nuuja ngene ca agli mene piba jejige egä, "Yepä, biname te babo soriyomu ne jenenige. Tabe bucurage biname bine ala tesoglecmige pui soriyomu cabu otnime.¹⁷ Iyeta liba amacetnäjäneji ge soriyomu täöpume, tabe piba teeme kaakesea biname ne jityepige ala asogläcneji biname bine jajanenime egä, 'Weene iyeta naaclege, cane bamacetnäjine soriyomu täöpume'.¹⁸ Yepä, iyeta lui bine ituge ala asogleca, teepi yepäyepä gije abacitinisi teeme singi gaabe bine aboclomäjame. Niinäce biname te mene jityepige pui kaakesea biname cama soriyomu yageyame bau me egä, 'Owecu, cane äblicäco gäne otni, ingle cane gawe ne bii jeletnine. Page cane miiji otni peei ne päpäname.'¹⁹ Nuuja te mene jityepige egä, 'Owecu, cane äblicäco gäne otni, ingle cane ten kau bine bii jeletnemine căme kaakesea wawenime. Cane page ädenine teeme kokre apicetnärame!²⁰ Cuta nuuja te mene jityepige egä, 'Owecu, cane äblicäco gäne otni, ingle cane coga ne bii bocatine.'²¹ Yoo, pui kaakesea biname te tacne-nutige, iyeta pui mene teeme babo biname ne jejige. Puma cita ca pui mete yageyame te claabe me äbitige, teeme kaakesea biname ne piba jejige egä, 'Maane wata ädi ai babo cewe iyeta gaabe cabu ta, siige puma cita ca biname bine sewademepi aimopo: owecumete biname piipepu tääpe niya biname, ernge niya biname, irecu määsumäsu biname iyeta sewademepi.'²² Matikolä padare ingwe ca pui kaakesea biname te tacnenutige, jejige egä, 'Babo biname, cine mäame singi ne bii jenenisi, yepä puupu cuta pisi nyene.'²³ Soriyomu yageyame te piba teebine jejige egä, 'Maane cewe cabu ca asati iyeta gaabe cabu ta, biname bine jejemepi cewe äbäcname, siige căme mete te piba tapanenige.²⁴ Cane meebine naajenime egä pui niinäce ala asogläcneji biname bime cabu ca, nuuja te lica căme deedei pa läbitepi!'"

Yeesu me Ätrunga Binamewale Miiji Teebine Niinäce Gaabe me Acita
(Matayo 10:37-38)

²⁵ Bucurage biname cina Yeesu cama otninisi. Tabe teeme bau me atatröngtuge, jejemige egä,²⁶ "Biname te liba căme bau otni, tabe miiji teeme mage babe, coga bäärä, nanigane, cuta piipepu teemämu, iyeta ingwe me acrana, tabe liba singi căme biname me äbitame.²⁷ Tabe miiji teeme nuuja singi bine abmalame. Yoo, cane baarge uli cabu budre lipu pagege päpäna, tabe cuta miiji amacetnäjäneji lenaja mäpu cămiji pi päpäname. Lui te singi lica cebine pepu pana ingwe äcwime, tabe äblicäco căme abiberäja bäärä me lenajame.²⁸ Yoo,

niinäce cängena ngene jotwanani weeme yepä te, liba singi gyene căme abiberäja băgrä me äbitame. Pui lui epu pana gyene biname liiyepu, lui te singi cabu me lecarage mete ne rarangame. Tabe niinäce ladnatuge, rarekaake poto cidi me mage ngene jwaatwananuge liba teeme rarekaake ibibi gyene pui mete ne ämlitame. ²⁹ Tabe umle ge egä teeme rarekaake liba ibibi lica ge, tabe miiji mete kaake ne abmala. Piba iyeta biname lui cina päpäna, teepi teebine ngange pa yääcwäcnepesi egä, ³⁰ 'Ai biname te mete ne gije jebacitige rara-ngame, yepä tabe ibibi lica gyene ämlitame!' ³¹ Yoo, pepu pana gyene gawe mope biname te liba singi cubu iicaname nuuja gawe mope biname cama. Tabe niinäce ladnatuge, mage ngene jwaatwananuge egä teeme ten tausen cubu biname liba ibibi gemi cubu iicaname nuuja twenti tausen cubu biname cama lui cina saaclenuge. ³² Tabe liba ngene jwaatwananuge egä, 'Cine äblicăco gemi!' piba mename biname bine pa jäätyepemepi pui nuuja mope biname bau me, tabe liba cudecewe gyene, teebine ätemlame egä, 'Mine miiji conocăco ngene atwanena pa jääpänago, piba poode ne wawename.' ³³ Yoo, pepu pana gyene weeme täápume. Weene miiji cängena ngene atwanena niinäce gaabe me egä weene nää toraca singi gemi iyeta abmalame căme täápume? Weene liba singi lica gemi, weene piba äblicăco căme abiberäja băgrä me lenajame."

Ätrunga Biname te Liba Gege căco me Läbituge
(Matayo 5:13; Mareko 9:50)

³⁴ "Yoo, ätrunga biname bime miijirage kaakesea pisi nyene ai gawecewe cabu, cuta caapereniye täápume miiji kaakesea pisi nyene, yepä teeme mite te liba lapiruge, siige ingwe ca äblicăco caapereniye ne wawena mite me. ³⁵ Piba mite căco teeme nuuja kaakesea lica birige, cuta gawe täápume teeme kaakesea lica. Biname cina papa yaajarusi. Weeme liba tablame piti nemi ätecijame, itecijinege umle äbitame."

15

Ngene ca Agli Mene Apesareji Maamoi poto cidi me
(Matayo 18:12-14)

¹ Nuuja padare bucurage täks rarekaake uutecrena biname piyepu nuuja conocono mule biname cina abasecretnige Yeesu me mene ätecijame. ² Piba Parisea sigu biname piyepu cotre abiberäja biname cina mudru mene jiiicemisi egä, "Ai biname te babo singi gyene conocono biname cama lenajame cuta piyepu deedei äbitame ten cama!" ³ Peei name pi Yeesu ai ngene ca agli mene teebibine jejemige egä,

⁴ "Weeme yepä me hanred maamoi liba piti nemi, piyepu yepä maamoi te liba lapesaruge, tabe ngena jaawenuge? Tabe teeme nuuja naintinain maamoi bine yaabmalemuge baace cewe cabu, piba waatnetnäjuge pui yepä ne ärngime ngälu päpäname. ⁵ Liba jääpänuge, baborage gege cama saatecwantuge teeme palace cabu, ⁶ saacanuge cewe me. Piba teeme binamewale bine ala tasogle-cmuge, teebibine jaajemuge egä, 'Agesa căme maamoi lui te tapesarumi, siige bii jepänine teebine. Mine gege pa läbitipago.' ⁷ Yoo, yepä pana mule pisi nyene cabucewe je luma gege baborage birige yepä taatu conocono mule biname täápume, lui teeme niya mule cabu ca latatrongtuge. Cane weebibine jjenininine egä peei gege baborage birige nuuja gege cabu ca naintinain conocăco biname täápume, lui bime singi lica gyene atatrongärame."

Ngene ca Agli Mene Apesareji Rarekaake poto cidi me

⁸ "Yoo, magebi me liba ten silba rarekaake piti nemi, siige yepä ne liba pa yaapesarepi, tabe ngena jaawenuge? Tabe lampa ne jaabotuge, mete ne yaapretnäjuge, iyeta poto ta cängena jäärnguge, ngälu siige jääpänuge. ⁹ Liba jääpänuge, teeme binamewale bine gege cama ala taasoglecmuge, jaajemuge egä, 'Agesa căme rarekaake lui ne sepesarumene, bii jepänine!' ¹⁰ Yoo pepu pana, cane weebibine jjenininine egä cabucewe je Acejiyame me mename seemo babo gege me läbitusi, yepä conocono mule biname te liba niya mule cabu ca latatrongtuge."

Ngene ca Agli Mene Apesareji Imäbägrä poto cidi me

¹¹ Yeesu cuta ai mene jejemige: "Yepä, biname teeme neeneni imäbägrä puga ge. ¹² Iganeyame te babe ne jejige egä, 'Căme babe, mäame lui gwidape bine jebelanemi, căme poto năcări!' Puma cita ca teeme babe te gwidape jebelanemige teeme neeneni băgrä täápume. ¹³ Nesae bimu ingwe ca, igane te teeme gwidape tomi iyeta aletna täápume ewademige, pui rarekaake cama piba abyemäriige otnime cudecewe gawe cabu me. Tabe cudecewe me ädige, puma teeme rarekaake iyeta papapapa jimlemige. ¹⁴ Liba teeme rarekaake bine epiremige, mage gane padare te pui gawe cabu me tatyaramtuge. Tabe gwidape căco enajige, ¹⁵ peei name pi kaakesea jepänige yepä pui gawe biname bau ca. Tabe teebine blome bime lenaja puupu me jityepige, blome bine ire atwime.

¹⁶ Loolomecewe name pi tabe singi blome deedei ärwäjame; yepä, nuuja biname te teebine lica nuuja gwidape yääcäruge. ¹⁷ Piba taatu teeme ngene atwanena te tatyaramtige, tabe jiiçige egä, 'Iyeta căme babe me kaakesea băgră bime deedei bucurage gemi, yepä cane budre mameta găne deedei căco! ¹⁸ Cane abyemărenine, căme babe bau ädenine, teebine pa jaajepene egä, 'Căme babe, cane conocono mule itu tewenumene Acejiyame tăăpume piyepu măăme tăăpume. ¹⁹ Cane äblicăco găne măăme băgră me cuta äbita, yepä măăme kaakesea băgră me cebine naweni.' ²⁰ Yoo, tabe piba abujăngtige babe bau me acnenutame.

Cudecewe ca teeme babe te teebine gaabe cabu tepănige. Tabe baborage owecu äbitige, teeme băgră bau me uuwamige, teebine jejecletnăjige, lakace cabu jetecnige. ²¹ Puma cita ca băgră te babe ne jejige egä, 'Căme babe, cane conocono mule itu tewenumene Acejiyame tăăpume piyepu măăme tăăpume. Cane äblicăco găne măăme băgră me cuta äbita.' ²² Yepä, babe te kaakesea băgră bine ala tesoglecmige, jejemige egä, 'Wata, kirece miijirage căbletăăpe secaneye teeme asigrame. Oplacmelăja pana gwidape teeme ime kukluta cabu esigreya, cuta piyepu ernge gwidape esigreya. ²³ Piba mime ngeerangera kau plongo ne secaneye aglime. Mine soriyomu ne gege name pi pa jaawenesi! ²⁴ Ingle ai băgră te budre pana itu lăbitepi, yepä page ireclota gyene. Tabe mime bau ca lapesarepi, yepä page bii jepănisi.' Siige, teepi soriyomu jewenisi.

²⁵ Pui padare cabu naane te calwacupi cabu jage. Tabe liba tacnenutige, mete mameta liba tatyaramtige, siige giire uupera itecijige puma. ²⁶ Tabe puma cita ca yepä kaakesea băgră ne ala tesoglicige, itemlige egä, 'Teepi ngena ne jewenenisi?' ²⁷ Pui kaakesea băgră te jejige egä, 'Măăme igane te tatyaramtige page. Măăme babe te niijnige ngeerangera kau plongo ne aglime, ingle teeme băgră căngenarage bii tacnenutige.' ²⁸ Siige, naane te claabe me äbitige, lica mete cabu me abacitige. Piba babe te tasatige, teebine jejige abacitame. ²⁹ Naane te babe ne jejige egä, 'Maane năătecijige! Iyeta kămăge gaabegabe cane baborage kaakesea măăme tăăpume jaawenune, iyeta măăme singi cabu waatnune. Maane căme tăăpume ngena ituge wawena? Maane cebine gouti plongo licarage itu năcărepete cane soriyomu ne căme cecegece cama wawename! ³⁰ Yepä, măăme ai băgră te măăme gwidape bine papa itu yaapeserăjemepi eroero magebi cama, teeme rarekaake liba apirinini, piba tacnenutige. Siige, maane ngeerangera kau plongo ne cuta teeme tăăpume eglite!' ³¹ Babe te jejige egä, 'Căme băgră, maane cama naanajenige, iyeta căme gwidape lui măăme nemi. ³² Yepä, mine miiji gemi ai soriyomu wawena gege äbitame, ingle măăme igane te budre pana itu lăbitepi, yepä page ireclota gyene. Tabe mime bau ca lămlitepi, page bii tacnenutige.' "

16

Ngene ca Agli Mene Angletnejayame Ire Atwi Biname poto cidi me

¹ Yeesu teeme abiberăja băgră bine ai ngene ca agli mene jejemige egä, "Yepä dogwe biname me kaakesea băgră puga ge teeme gwidape bine ire atwime. Tabe mene itecijige egä peei ire atwi kaakesea băgră te teeme gwidape bine papa yaajaremuge. ² Tabe pui kaakesea băgră ne tesoglicige, jejige egä, 'Cane ngena ne nătecijumi egä maane căme gwidape bine papa me tewenumumete. Iyeta măăme peba bine rarekaake piyepu gwidape poto cidi me emacetnăjemi căme ire me, ingle cane singi lica găne maane căme gwidape bine ingwe ca ire atwime.' ³ Pui kaakesea biname teemămu jejige egä, 'Căme babo biname te cebine pa năyebingtepi; cane ngena pa jaawenene? Căme kokre ibibi lica gyene kaakesea wawename căsu bine äplegecame, piyepu cane ajiri găne papa ätinerăjame. ⁴ Yoo, cane umle găne ngena ne wawename! Cane liba ai ne căngena jewenenine, cebine liba năyebingtepi căme ire atwi kaakesea cabu ca, piba căme piti nemi binamewale cebine teeme mete cabu me nacanansi.' ⁵ Puma cita ca tabe iyeta biname bine tesoglecmige lui bime ngii piti nemi teeme peba cabu gwidape coo rarekaake awecna poto cidi me. Tabe niinäceyame ne itemlige egä, 'Maane lija gwidape bine ituge waadena, yepä daremu camu gâte ceera?' ⁶ Biname te jejige egä, 'Yepä hanred dram olibi migi cama itu yaawademepene.' Pui ire atwi biname te piba teebine jejige egä, 'Yoo, agesa peba pui acnama cama. Maane adnati wata yoogări fifti taatu peei hanred me puupu cabu.' ⁷ Pui ire atwi biname te cuta nuuja ne itemlige egä, 'Maane cuta lija gwidape bine ituge waadena, yepä daremu camu gâte ceera?' Pui biname te jejige egä, 'Yepä tausen wiiti kuu baiko.' Ire atwi biname te jejige, 'Yoo, peba agesa pui acnama cama, eit hanred yoogări peei tausen me puupu cabu!' ⁸ Yoo, ingwe ca pui dogwe biname te teeme conocono kaakesea băgră poto cidi me jiiçige egä, 'Mage umle gyene pui conocono biname te!' Siige, peei conocono biname me mule cabu ca mine opo ewatneye egä ai gawecewe biname cina umle ge lipu nuuja teeme pana biname bine binamewale me wawename, yepä biname lui cina Acejiyame me apacyera cabu

yaacrajuge, nuuja taje teepi umle lica gemi nuuja biname bine teeme binamewale me wawena.”

⁹ Yeesu cuta jejemige egä, “Cane peei name pi weebibine jijenininine egä nuuja biname bine itityeräjemeye ai gawecewe me gwidape piyepu rarekaake ca, teebibine binamewale me wawena weeme conocäco mule ca. Piba ai gawecewe iyeta teeme gwidape cama liba cirege apira, weeme puupu pisi nyene cabucewe je lenajame iyeteta ngälu cäco. ¹⁰ Yoo, biname lui te matimati gwidape cängena ire jaatwemuge, tabe cuta modamoda gwidape cängena ire jaatwemuge; cuta piyepu biname lui te angletneja umle ge matimati gwidape poto cidi me, tabe cuta angletneja umle ge modamoda gwidape poto cidi me. ¹¹ Peei name pi biname lui te ai gawecewe me gwidape bine cängenarage conocäco lica ire jaatwemuge, tabe cuta lipu Acejiyame me toraca gwidape bine cängenarage ire atwema. ¹² Cuta piyepu biname te liba nuuja biname me gwidape bine cängena lica ire jaatwemuge, nuuja te lica teebine teemerage gwidape pa yäcärepäi.”

¹³ Yoo, kaakesea biname te äblicäco neeneni babo biname täapume kaakesea wawena yepä padare cabu. Tabe yepä ne jäägyuge; nuuja täapume singi läbituge. Tabe yepä ne opo gaabe me yaacituge, nuuja ne kaake ca säacelyäruge. Weene äblicäco neeneni bine acenena: Acejiyame piyepu rarekaake.”

Yeesu Poto Umle Mene Jiicemige

(Matayo 11:12-13; 5:31-32; Mareko 10:11-12)

¹⁴ Parisea sigu biname cina Yeesu me mene itecijemige, siige teebine ngange ecwänisi, inge teepi baborage singi rarekaake täapume. ¹⁵ Yeesu teebibine jejemige egä, “Weene peete nemi lui babo singi gemi biname cina weebibine päpäname egä, ‘conocäco biname,’ yepä Acejiyame umle gyene weeme ngenecu lipu gemi. Weene awepyeräja ne biname bau ca jääpänuye sinäme miiji mule name pi, yepä Acejiyame pui mule ne jäägyuge.”

¹⁶ Moose lui Cotre Mene itu soogäremuji, piyepu mename biname cina lui mene ituge oogära, peei mene cina weebibine ituge waadena ngälu Yoane niye ca äciseja biname te tatyaramtuge. Teeme padare cabu ca Miiji Mene jejananemisi egä Acejiyame te biname bine yaawadumuge, siige iyeta biname cina kokre me äbiteninini teeme waadena mule cabu me äbäcname. ¹⁷ Yepä, Cotre Mene me kaakesea cuta pisi nyene page, lica ituge äyebingta; iyeta matimati cotre piti nemi page. Yoo, gawecewe piyepu cabucewe teeme lenaja lipu lecarage, Acejiyame me Cotre Mene me lenaja pepu lecarage gyene.

¹⁸ Page cuta pisi nyene cotre egä biname lui te coga ne jwäägyuge, piba nuuja coga ne waacatuge, tabe sargi ero mule ne jaawenuge; cuta pepu gyene biname lui te pui ägyeji magebi ne waacatuge, tabe cuta sargi ero mule ne jaawenuge.”

Ngene ca Agli Mene Yepä Dogwe Biname piyepu Lajaro poto cidi me

¹⁹ “Puga ge yepä dogwe biname lui te mararage ududi piyepu bulubulu cäbletääpe bine lasigreräjuge. Tabe iyeta teeme singi gwidape iyeta bimü gaabegabe yaawadanemuge. ²⁰ Cuta puga ge yepä owecumete biname, teeme ngii Lajaro, droobodrobo tääpe cama ge. Biname cina teebine yaacanusi pui dogwe biname me mete grana gome, ²¹ inge tabe singi deedei pacupacu ärwäja, lui cina dogwe biname me dade cabu ca saatrametnemuge. Yoo, drego cina waatinusi teeme gome teeme tääpe droobo aclotejame. ²² Siige, pui owecumete biname te budre äbitige. Acejiyame me mename seemo cina piba teeme seemo ne ecanisi cabucewe me Abrahamo gome me. Pui dogwe biname te cuta budre äbitige, siige gape cabu ecitisi. ²³ Tabe muye puupu cabu yaanajuge baborage pita cama. Puma cita ca tabe ire cabu me acitige, Abrahamo ne jepänige cudecewe ca, piyepu Lajaro teeme gome puga ge. ²⁴ Tabe babo tage ca jejige egä, ‘Cäme Babe Abrahamo! Cebine owecu naweni! Lajaro ne tityepi teeme ime kukluta niye cabu iiglenutame cäme wätä ne gäbu waweneme, inge cane babo pita gäne ai muye puupu cabu!’ ²⁵ Yepä, Abrahamo jejige egä, ‘Cäme bägrä, maane ngene jepecni mäame gawecewe ireclota padare poto cidi me. Maane miijimiiji gwidape cama naanajuge, yepä Lajaro me ireclota puga niyarage ge. Page teeme lenaja miijirage gyene, yepä maane niya cabu naanajenige. ²⁶ Cuta piyepu, pisi nyene mime cole je baborage cäsu, biname te peei name pi ama cita ca äblicäco peeyeme otni, cuta peema cita ca biname cuta piyepu äblicäco aimopo otni.’ ²⁷ Piba pui dogwe biname te cuta jejige egä, ‘Yoo, cäme babe, cane naajenine, owecu, Lajaro ne gawecewe cabu me jityepi cäme babe me mete me. ²⁸ Cäme faib iganewale puma piti nemi. Lajaro ne jityepi teebibine umle mene jajime, teepi piba lica ai muye puupu cabu me otni.’ ²⁹ Abrahamo jejige egä, ‘Oogäräneji Mene piti nemi mäame iganewale täapume, Moose piyepu sasa mename biname cina lui mene ituge oogära. Mäame iganewale miiji gemi teeme peei mene ätecija.’ ³⁰ Yepä, tabe jejige egä, ‘Cäme babe Abrahamo, peei mene taatu ibibi lica gyene, yepä biname te liba budre cabu ca teeme bau acnenutame, teepi piba teeme niya mule cabu ca pa latatrongäripesi.’ ³¹ Yepä, Abrahamo jejige egä, ‘Teepi liba singi lica Moose piyepu

mename biname bime oogäräneji mene ätecijame, teepi cuta piyepu biname ne lica ätecija tabe liba budre cabu ca acnenuta teebibine mene jajime.’ ”

17

Gone Biname ne Acana Niiya Mule cabu me

(Matayo 18:6-7; Mareko 9:42)

¹ Yeesu teeme abiberäja bägrä bine jejemige egä, “Yoo, maramara gwidape cina saacluge lui biname bine jaawenemusi niiya mule wawenecame, yepä babo niyarage gyene biname täapume lui te pui gwidape bine saawademuge. ² Pepu biname mäpu kula ne liba teeme singicace cabu jaaglotusi, siige malu cabu yaajarusi budre me, peei mäpu lui plowa birige pui mäpu cabu ca tabe lui ne cirege päpäna liba ai matimati bägrä yepä ne niiya mule cabu yaacanuge. ³ Peei name pi cängena inajininuge!”

Weeme Binamewale bime Niiya Mule poto cidi me

(Matayo 18:21-22)

“Yoo, mäame biname te liba niiya mule jaawenuge, maane teebine umle mene jaajute. Tabe liba tatatrongtuge pui niiya cabu ca, maane miiji teeme niiya mule äyebingta mäame ngene atwanena cabu ca. ⁴ Yoo, tabe liba meebine niiya naawenanuge cuta seben gäabu yepä bimu cabu, cuta seben gäabu mäame bau me liba lacnenutanuge, naajanauge egä, ‘Cäme ngenecu te batatrongtuge,’ piba maane miiji iyeta teeme niiya äyebinga mäame ngene atwanena cabu ca.”

Mene Kokre Ätrunga poto cidi me

⁵ Puma cita ca pui twelb ätyepäneji biname cina Yageyame Yeesu ne jejisi egä, “Cime ätrunga babo me jeweni!”

⁶ Tabe Yageyame te jejemige egä, “Weeme ätrunga liba epu pana baborage gyene ai matikolä mastad kuu gije liiyepu, weene piba ibibi gemi ai uli ne jaji egä, ‘Määmämu ai gawe cabu ca äpäcuti iyeta braju cama, piba malu cabu acni määmämu!’ Siige, ai uli te weeme mene piba pa jaaweneji.”

Kaakesea Bägrä bime Mule poto cidi me

⁷ “Weeme yepä me kaakesea bägrä liba pisi nyene, teebine liba jäätyepuge calwa wawename, coo nuuja taje maamoi ire atwime, tabe liba kaakesea cabu ca mete me tiinuge, teeme babo biname te lica teebine piba jaajuge egä, ‘Määme deedei agesa.’ ⁸ Yepä, tabe teebine jaajuge egä, ‘Cäme deedei nawenemi, piba määmämu amacetnäji cäme deedei piyepu niye ceerame. Peei ingwe ca, maane mäame deedei äbiti piyepu niye nani.’ ⁹ Nää, pui babo biname teeme kaakesea bägrä ne eso pa jaajepi liba teeme mene cängena jaawenemuge? Eewe, pama lica! ¹⁰ Weene pepu pana kaakesea bägrä gemi. Weene liba iyeta Acejiyame me singi kaakesea cängena ituge wawena, piba gone singi awepyeräja teeme bau ca päpäname, yepä apu jiicuye egä, ‘Cine kaakesea bägrä gemi; cine cime kaakesea taatu bine jaawenemusi.’ ”

Yeesu Ten Täape Niiyaniya Biname bine Miiji me Jewenemige

¹¹ Yeesu liba Yerusalema me ädige, tabe Galilaya piyepu Samariya gawe teeme ngälugaabe cabu ädige. ¹² Tabe liba yepä cewe me atyaramtuge, ten biname bine opopa jebenemige lui cina niyarage täape pita, lepera pita, cama ge. Teepi cudecewe ca imyemutenige, ¹³ puma cita ca babo tage ca jejisi egä, “Yeesu, Babo Biname, cibibine owecu niwenini!”

¹⁴ Yeesu teebibine jepänemige, jejemige egä, “Naaclege modamoda iiwäreja biname bime bau me teepi weeme täape awatnejame egä miiji.”

Siige, gaabe cabu teepi liba eclige, teeme täape iyeta miiji me äbitininisi. ¹⁵ Teeme yepä te liba jepänige egä teeme täape miiji ge, piba tacnenutuge Yeesu bau me, Acejiyame ne babo tage ca ewepyeräjige. ¹⁶ Tabe teemämu gawe cabu ajarige Yeesu me ernge gome, teebine baborage eso eçarige. Pui biname lica Israela biname, yepä Samariya gawe biname ge. ¹⁷ Yeesu biname bine itemlemige egä, “Cane ten biname bine miiji me jebenemine, cije nain cina lete nemi? ¹⁸ Nää, nuuja biname te lica tacnige Acejiyame ne awepyeräjame, yepä ai catecewe biname taatu?” ¹⁹ Siige, Yeesu teebine jejiige egä, “Abujängti, ädi mäame gaabe cabu. Määme ätrunga te meebine miiji me bii naawenige.”

Acejiyame me Biname bine Waadena Padare te Lipulipu Tatyaramtuge

(Matayo 24:23-28, 37-41)

²⁰ Yoo, poto Parisea sigu biname cina Yeesu ne itemlisi egä Acejiyame me biname bine waadena padare te liba pa tatyaramtepi? Tabe jejemige egä, “Yoo, biname cina äblicäco Acejiyame me biname bine waadena padare ne irecu ca päpäna egä tatyaramtenige.”

²¹ Biname cina äblicäco apu iicana egä, 'Ire, age sena!', coo 'Peese nyene!', ingle Acejiyame te weebibine iwadininine weeme ngenecu cabu."

²² Tabe piba teeme abiberäja bägrä bine jejemige egä, "Padare te pa tädepi weene piba babo singi cane cama lenajame yepä bimu taatu, yepä cane lui te Acejiyame bau ca tädujine, biname me äbitujine, cane ama lica pagege pui bimu cabu. ²³ Biname cina piba weebibine pa jijipesi egä, 'Taba peese,' coo 'Taba age sena,' yepä teeme ingwe ca gone naacluge cebine ärngime, ²⁴ ingle căme acnenuta te liba cire tatyaramtepi, weene piba cāngena umle cire äbitipeye. Yoo, pamlepamle te dume cabu lipu tuungepmeläjuge, iyeta poto yaapaclyeräjuge, cane lui te Acejiyame bau ca tädujine, biname me äbitujine, căme acnenuta te cuta pepu pana cire läbitepi. ²⁵ Yepä, peei te căro camuge äbita; cane miiji niinäce babo mäpurage padare ne päpäna, piyepu ai padare me biname cina cebine pa nägyepesi. ²⁶ Yoo, ujarage Nooa me padare cabu lipu itu äbituji, pepu pana căme acnenuta padare cabu cirege äbita. ²⁷ Pui padare iyeta biname cina deedei täbitenäjumesi, niye senäjənäjumesi, piyepu biname cina tawadrecanimumesi, ngälu pui bimu cabu Nooa liba baborage buto cabu me acenutuji. Siige, babo igi te piba täduji iyeta biname bine eglecimuji. ²⁸ Yoo, Loota me padare cabu lipu itu äbituji, cuta pepu pana căme acnenuta padare cabu cirege äbita. Iyeta biname cina deedei täbitenäjumesi, niye senäjənäjumesi, gwidape teletnemäjemesi, gije sitememäjumesi, piyepu mete bine serangemäjumesi, ²⁹ ngälu pui bimu Loota te Sodoma cewe ne liba sebmaluji. Piba muye wiiryere piyepu matimati nuunurage kula cina cabucewe ca sitrametnemuji, siige iyeta biname bine eglecimujisi. ³⁰ Yoo, biname cina pepu pana mule cire jaawenemepesi căme acnenuta bimu cabu, teepi liba iyeteta umle cire läbitipesi egä cane Acejiyame bau ca gāne.

³¹ Pui bimu cabu, lui biname te mete toro cabu, lui puupu cabu yaanajuge, tabe miiji lica mete me abacita teeme gwidape äsecreraame, cuta piyepu biname lui te calwacupi cabu gyene, tabe miiji lica cewe me acnenutame. ³² Loota me coga poto cidi me ngene jotwananineye, tabe lipu teeme ingwe gaabe me ire acituji. Yoo, pui bimu cabu gone pepu pana äbita! ³³ Lui biname te singi teeme ai gawecewe ireclota ne teemämu ire atwime, ingle tabe wälu ge teeme ireclota ne apeserame, tabe toraca ireclota ne cire yaapesarepi; yepä, lui biname te teeme ireclota ne căme täápume yaapesaruge, tabe toraca ireclota ne cire jääpänepi. ³⁴ Yoo, cane weebibine jijinininine egä căme acnenuta padare cabu, ciye padare liba, neeneni biname cina piba yepä puupu cabu ute wagräsi: yepä ne cire yaacatepesi, nuuja ne cire yaabmalepesi. ³⁵ Bimu padare liba, neeneni magebi cina wiiti kuu bine kula ca cire jäämulecemepäsi, yepä ne cire waacatepesi, nuuja ne cire waabmalepesi. ³⁶ Neeneni rooriye cina babo calwacupi cabu kaakesea cire jaawenemepäsi: yepä ne cire yaacatepesi, nuuja ne cire yaabmalepesi."

³⁷ Siige, abiberäja bägrä cina piba teebine itemlisi egä, "Yageyame peei te luma cire läbitepi?"

Yeesu teebibine jejemige egä, "Budrekaake luma, sändäyame cina piyeme labasecret-nuge. Pepu pana pui padare te liba cire tatyaramtepi, weene piba umle cire äbitipeye."

18

Ngene ca Agli Mene Cuubla piyepu Ablaweja Biname poto cidi me

¹ Puma cita ca Yeesu teeme abiberäja bägrä bine jejemige ai ngene ca agli mene umle ceerame egä teepi durau gone äbita Acejiyame ne awejename. ² Tabe apu jiiicege egä, "Yepä cewe cabu pugä ge ablaweja biname lui te nuuja singi lica ge Acejiyame täápume, cuta piyepu nuuja singi lica ge biname bime täápume. ³ Cuta pugä ge cuubla, lui te ablaweja biname bau me jäje waatnuge jajanenname egä, 'Cebine nätiyäri căme cubuyame cabu ca uutrutame.' ⁴ Siige, leca padare cabu pui ablaweja biname te singi lica teebine ätiyeraame, yepä ingwe ca tabe teemämu jiiicege egä, 'Cane nuuja singi lica gāne biname bime täápume, coo piyepu Acejiyame täápume,' ⁵ yepä ai magebi te cebine mage tii nawenenige, peei name pi cane teebine pa wäätiyärepenne. Cane liba lica utiyärenine, tabe jäje pa twacnepi aima, ngälu siige gloose te cebine pa noomlepi.' "

⁶ Siige, Yageyame piba jejemige egä, "Yoo, weene pui conocono ablaweja biname me mene jiteciyeje. Weene lipu ngene jotwa-naniniye? ⁷ Pui conocono biname te liba cuubla ne utiyäriige teeme tii name pi, Acejiyame lui conocäco gyene, tabe piba teemerage binamewale bine pa yäätiyärepeni lui cina teebine ciye bimu cama yaawejanusu? Nää, tabe weebibine wata lica pa itiyäripi? ⁸ Cane weebibine jijenininine egä tabe wata pa itiyäripi conocäco päpäname. Yepä, cane lui te Acejiyame bau ca tädujine, biname me äbitujine, cane liba cire tacnenutepene, nää cane biname bine ätrunga cama cire jääpänemepene, coo lica?"

Parisea Sigu Biname piyepu Täks Rarekaake Uutecrena Biname

⁹ Yeesu cuta ngene ca agli mene biname bine jejemige lui cina apu jaangemuge egä teepi conočäco biname gemi, cuta peei name pi iyeta nuuja biname bine gawe me yaapremalemusi. ¹⁰ Tabe apu jiiçige egä, “Neeneni biname cina iiwäreja mete me aacluji irecu ätumutame. Yepä lui Parisea sigu biname ge, cuta nuuja lui täks rarekaake uutecrena biname ge. ¹¹ Parisea sigu biname te jeclajutige, teeme poto cidi me irecu ätumutige egä, ‘Acejiyame, cane meebine eso nääcärenine egä cane lica nuuja biname bime pana gäne, lui cina biname bime gwidape juutecranemusi, nuuja conocono mule jaawenemusi, coo piiyepu sargi mule jaawenemusi. Yoo, cane meebine eso nääcärenine egä cane lica gäne ai täks rarekaake uutecrena biname pana. ¹² Iyeta wiik ngalebora cane neeneni bimu cama deedei cäco nanajuge; piiyepu iyeta cäme ten rarekaake cabu ca cane yepä nääcärune, siige.’ ¹³ Yepä, pui täks rarekaake uutecrena biname te matikolä cudecewe padare cuta jeclajutige. Tabe cabu me lica ire äbitige, yepä ergo ecirige irecu ätumutame, cuta jejiige egä, ‘Acejiyame, cebine owecu nawenepi, inge cane conocono biname gäne.’ ¹⁴ Yoo siige, cane weebibine jijenininine egä pui täks rarekaake uutecrena biname te Acejiyame bau ca kälyä jepänige teeme niyaniya mule cabu ca, siige pui conočäco cama acnenutige mete me, yepä pui nuuja te kälyä ne lica jepänige. Ai inge naace gyene lui biname te teemämu babo me läbituge, tabe matikolä me pagege äbita, cuta piiyepu lui biname te teemämu matikolä pana me läbituge, tabe babo me pagege äbita.”

*Yeesu Ime Aacitige Bägrä bime papa cabu me Teeme Miiji tääpume
(Matayo 19:13-15; Mareko 10:13-16)*

¹⁵ Poto biname cina teeme matimati bägrä bine Yeesu bau me sewademisi tabe ime teeme papa cabu acitename bägrä bime miiji tääpume. Yepä, abiberäja bägrä cina peei mule ne liba jepänisi, teepi piba biname bine jicnecimisi. ¹⁶ Yepä, Yeesu te bägrä bine teeme bau me ala tesoglecmige, cuta abiberäja bägrä bine jejemige egä, “Bägrä cina saaclege cäme bau me. Gone jiißemuye, inge lui biname bime ätrunga ai matimati bägrä pana me, Acejiyame teebibine yaawademuge. ¹⁷ Cane weebibine toraca jijenininine egä lui biname te singi lica gyene Acejiyame me waadena ne matikolä bägrä pana yaacatuge, tabe licarage abacitame.”

*Dogwe Biname te Yeesu ne Edäriige
(Matayo 19:16-30; Mareko 10:17-31)*

¹⁸ Yepä Israela babo biname te Yeesu ne itemlige egä, “Miijirage abiberäja biname, cane ngena ne miiji wawena iyeteta ireclota ne päpäname?”

¹⁹ Yeesu teebine jejiige egä, “Maane ngenome cebine nainite miijirage ca? Acejiyame taatu miijirage gyene, nuuja cina miijirage lica gemi. ²⁰ Maane cotre mene umle gäte egä: ‘Sargi mule gone; gone biname ne budre me agli; gone gwidape ero; walya äitneja gone; mage babe bine miiji opo gaabe me acita.’ ”

²¹ Siige, pui biname te jejiige egä, “Cane bägrä cabu ca iyeta peei cotre bine itu sicwetnanemumene.”

²² Siige, Yeesu liba teeme mene itecijige, teebine piba jejiige egä, “Yoo, mäame yepä gwidape pisi nyene wawename. Mäame gwidape iyeta ewademepi aletna tääpume, pui rarekaake owecumete biname bine ecäranemepi, maane peema cita ca miijimiji gwidape bine cirege päpäna cabucewe je. Piba tädepi cane cama otnime.” ²³ Yepä, peei biname te liba Yeesu me mene itecijige, tabe babo ngenecu mäpu me äbitige, inge tabe babo dogwe biname ge. Tabe singi lica ge teeme gwidape bine abmaläcema Yeesu cama otnime.

²⁴ Yeesu jepänige egä tabe babo ngenecu mäpu ge, piba jiiçige egä, “Mage mäpu gyene dogwe biname cina Acejiyame me waadena cabu äbäcname! ²⁵ Baborage gwidape kamela cibü pana, tabe äblicäco matikolä gaabe epu pana nilo bora me abacita, siige asata, yepä mäpurage gyene cuta peei cabu ca dogwe biname te Acejiyame me waadena cabu abacitame.”

²⁶ Biname lui cina peei mene itecijemige, teepi piba Yeesu ne itemlisi egä, “Piba laati te miiji gyene teeme niya cabu ca asata iyeteta ireclota ne päpäname?”

²⁷ Yeesu jejemige egä, “Biname cina äblicäco teemämu peei ne wawena, yepä Acejiyame te miiji gyene iyeta gwidape bine wawenecame.”

²⁸ Peteru piba jejiige egä, “Cije cine lipu gemi? Cine iyeta ituge abmala maane cama otnime.”

²⁹ Yeesu teebibine jejemige egä, “Yoo, cane toraca mene jijenininine egä lui biname te cewe ne saabmaluge piiyepu coga, bägrä, mage, babe, naane, iganewale saabmaläcemuge Acejiyame me biname bine waadena name pi, ³⁰ pui biname bucurage cerämu tuwängle pa jääpänemepi ai padare cabu, cuta piiyepu ciige padare cabu iyeteta ireclota ne cire jääpänepi.”

*Yeesu Cääri Mene Jiicemige Teeme Budre poto cidi me
(Matayo 20:17-19; Mareko 10:32-34)*

³¹ Yeesu teeme twelb abiberäja bägrä bine biname bime sobe cabu ca mara me ewademige, jejemige egä, "Itecijinege, mine Yerusalema cewe me naclenige. Puma iyeta mene sasa mename biname cina lui ituge oogära cäme poto cidi me toraca me pa läbitipesi. Cane lui te Acejiyame bau ca tädujine, biname me äbitujine, ³² cebine nuuja gawe cabu ca biname bime ime cabu pa nacitepesi. Teepi cebine ätutena pana pa nawenepesi, pa näncepesi, piyepu mote ca pa nätywepesi. ³³ Teepi cebine pa nadnanepesi, cuta budre me pa naglepesi, yepä nesae me lui bimu cabu cane pa larpinantepene cääri ireclota me."

³⁴ Siige, abiberäja bägrä cina cängena lica opo ewatnisi iyeta peei mene bine, ingle teeme aboclomta lui ämlitäneji ge teerne bau ca, peei name pi teeme tääpume pajecu lica ge.

*Yeesu Ireçu Määsumäsu Biname ne Ireçu Asatame Jewenige
(Matayo 20:29-34; Mareko 10:46-52)*

³⁵ Yeesu liba Yeriko cewe mameta me atyaramtige, gaabe wajwa je yepä ireçu määsumäsu biname adnatäneji enajige, gwidape piyepu rarekaake tääpume yäätineräjemuge. ³⁶ Pui biname te liba biname guugla itecijsige, itemlemige egä, "Ngena te äbitenige?"

³⁷ Biname cina teebine jejisi egä, "Yeesu Nasareta ceweyame te mime cewe ne isuplingtenige."

³⁸ Tabe puma cita ca babo tage ca jejige egä, "Yeesu, Daawida me Kaakesaare, cebine owecu nawenepi!"

³⁹ Niinäce gaabe biname cina teebine eblawisi, jejisi bojä agime. Yepä, tabe cuta baborage tage ca jejige egä, "Daawida me Kaakesaare, cebine owecu nawenepi!"

⁴⁰ Yeesu inyemutige, mene jejemige ireçu määsumäsu biname ne teeme bau me acaname. Tabe liba teeme mameta me tädige, Yeesu teebine itemlige egä, ⁴¹ "Maane ngeno mäte singi cane mäame tääpume waweneme?"

Tabe jejige egä, "Babo Biname, cane singi cääri ireçu asatame."

⁴² Yeesu piba teebine jejige egä, "Ireçu aasati! Mäame ätrunga te miiji bii naawenige meebine."

⁴³ Piba taatu tabe ireçu aasatige päpäname. Tabe piba Yeesu ne ingwe icwige, Acejiyame ne eso ecäranige. Siige, biname cina jepänisi, piba iyeta Acejiyame ne ewepyeräjisi.

19

Yeesu Sakaiyo ne Edäriige

¹ Yeesu peema cita ca Yeriko cewe me abacitige, piyepu gaabe ta isuplingtenige. ² Cewe cabu puga ge täks rarekaake uutecrena babo biname, ngii Sakaiyo, tabe lui mage dogwe biname ge. ³ Yoo, Sakaiyo baborage singi Yeesu ne ireçu ca päpäname, yepä äblicäco ge, biname tomi name pi, ingle tabe tuube biname ge, piyepu pui niinäce gaabe biname cina teebine jilyengisi. ⁴ Tabe peei name pi niinäce gaabe me uuwamige, sukumuro piigi uli ne jegelige Yeesu ne puma cita ca päpäname, tabe peei gaabe cabu liba tädige. ⁵ Yeesu liba teeme mameta me atyaramtige, cabu me ire acitige, jepänige, piba jejige egä, "Sakaiyo, wata täini! cane mäame mete cabu page nanajenige."

⁶ Siige, Sakaiyo wata täinige, babo gege cama teebine teeme mete me ecanige. ⁷ Iyeta biname liba peei ne jepänisi, Yeesu ne jiietnisi egä, "Ai biname te singi conocono biname ne ädärame. Tabe teeme mete cabu me cuta abacitenige!"

⁸ Mete je Sakaiyo abujängtige, Yageyame ne jejige egä, "Babo biname, cebine näteciji. Cane cebo iyeta cäme gwidape cabu ca pa yääcäremepene owecumete biname bine, cuta piyepu cane liba nuuja biname bime rarekaake angletneja mule ca itu yaawadanemepene, cane fooa rarekaake bine pa yaawecnepene tuwängle me iyeta yepäyepä tääpume."

⁹ Piba Yeesu teebine jejige egä, "Yoo, Acejiyame te ai mete biname bine teeme niija cabu ca page bisecräremige, ingle Sakaiyo lui Abrahamo me kaakesaare lui ituge apesera, yepä page bii tacnenutige teeme ingle cabu me. ¹⁰ Yoo, cane lui Acejiyame bau ca ätyepäneji gäne biname me äbitame, cane ai tääpume tädujine: apesäreji biname bine ärngemame teeme niija mule cabu ca äsecerame, piba Acejiyame bau me waadename."

*Ngene ca Agli Mene Gol Rarekaake poto cidi me
(Matayo 25:14-30)*

¹¹ Siige, gaabe cabu biname cina Yeesu me mene itecijemige. Tabe mameta ge atyaramta Yerusalema cewe cabu me, piyepu biname cina apu jengemige egä Acejiyame me biname bine waadena padare mametarage gyene gije abacitame. Tabe singi biname bine umle waweneme egä waadena padare te camurage gyene, yepä kaakesa pisi nyene ai awagrija padare cabu waweneme. ¹² Tabe peei name pi ai ngene ca agli mene teebibine jejemige egä, "Yoo, yepä babo biname te enajuji. Tabe abyemäriige cudecewe gawe me otnime mope

biname me ngii puma cita ca pöpäname, piba teeme gawe me acnenutame. ¹³ Camuge abyemera, tabe ten kaakesea bägrä bine tesoglecemige, teebibine yepäyepä gol rarekaake ecäranemige, jejemige egä, 'Cane liba biiri, cäme looye cabu je weene kaakesea tewenepeye ai rarekaake babo me wawename.' ¹⁴ Yoo, teeme gawe biname cina teebine mage jimugetnisi, peei name pi poto teeme biname bine teeme ingwe jityepemisi mene cama egä, 'Cine singi lica ai biname te cime moyeyame täapume lenajame.'

¹⁵ Peei mene ngänuge, tabe moyeyame ngii ne jepänige, piba tacnenutige. Teeme atyaramta ingwe ca tabe wata mene jejemige pui kaakesea bägrä bine, lui cina teeme ten gol rarekaake bine itu sewademumesi, teepi teeme bau otnime. Tabe singi teeme bau ca umle äbitame pui niinäce rarekaake ca teepi lija rarekaake bine bii tepänemumesi. ¹⁶ Yoo, niinäce kaakesea bägrä te tädige, jejige egä, 'Babo biname, cane ten gol rarekaake bine cuta tepänemumene pui yepä cabu ca.' ¹⁷ Babo biname teebine jejige egä, 'Maane miiji tewenumete. Maane miiji kaakesea bägrä gäte! Ai ingle naace gyene maane kaakesea cängena tewenumete matikolä gwidape ire atwime, peei name pi page cane ten cewe bine määme ire atwi cabu pa yaacranemepene.' ¹⁸ Piba nuuja pui kaakesea bägrä te tädige, jejige egä, 'Babo biname, cane faib gol rarekaake bine cuta tepänemumene pui yepä rarekaake ca maane lui itu näcärepete.' ¹⁹ Babo biname pui kaakesea bägrä ne jejige egä, 'Yoo miiji, cane piba faib cewe bine määme ire atwi cabu pa yaacranemepene.' ²⁰ Piba nuuja pui kaakesea bägrä te tädige, jejige egä, 'Babo biname, acesa määme gol rarekaake. Cane cumä täapume cäbletääpe cabu yäämlitune. ²¹ Cane wälu ge määme täapume, pui name pi cäbletääpe pläsu ngalebora simlitumene. Cane umle gäne maane mage kokre babo biname gäte. Maane ime kaakesea lica jaawenemute, yepä maane gwidape yaawadanemute nuuja biname bime kaakesea cabu ca, piyepu maane calwacupi deedei yaawademute maane te luma gije lica ätema.' ²² Babo biname te teebine jejige egä, 'Maane niiyarage kaakesea bägrä gäte! Määmerage mene te meebine naaitnäjige! Maane umle gäte egä cane kokre cama babo biname gäne, lui te gwidape yaawadanemune nuuja biname bime kaakesea cabu ca, piyepu calwacupi deedei bine yaawademune cane te luma gije lica yäätumene. ²³ Yoo, maane piba ngena name pi cäme rarekaake lica acita rarekaake ire atwi mete cabu? Piba cane cerämu rarekaake cire jääpänejine pui niinäce rarekaake me kaakesea cabu ca.' ²⁴ Babo biname te piba teeme gome kaakesea bägrä bine jejemige egä, 'Peei gol rarekaake ne teeme bau ca juutecreye, teebine ecäreye lui te ten gol rarekaake cama gyene.'

²⁵ Kaakesea bägrä cina teebine jejisi egä, 'Babo biname, pui biname me ten gol rarekaake piti nemi!' ²⁶ Babo biname te jejige egä, 'Cane weebibine jijenininine egä biname lui teeme kaakesea cabu ca kuu piti nemi, teebine cuta gaabe pa yäcärepepe cerämu kuu waadename, yepä biname lui me kaakesea kuu cäco gyene, cuta teeme lui matimati gwidape piti nemi, peei bine teeme bau ca pa yääyebingemepene. ²⁷ Yoo, cäme cubuyame poto cidi me, lui cina singi lica cane teeme mope biname täapume lenaja, teebibine aima sewademeye, eglecemeye cäme opo gaabel! "

Yeesu Yerusalema me Abacitige

(Matayo 21:1-11; Mareko 11:1-11; Yoane 12:12-19)

²⁸ Yeesu peei mene jejemige, piba teeme niinäce gaabe me ädige Yerusalema gaabe cabu. ²⁹ Tabe liba mameta atyaramta neeneni matimati cewe cabu me, ngii Betepage piyepu Betaniya, lui puga ge Olibi Uli podo cabu jage, teeme neeneni abiberäja bägrä bine niinäce gaabe me jäätypige. ³⁰ Camuge ätyepa tabe teebibine jaajige egä, "Äte, iclege niinäce gaabe me, lui cewe peese. Weene liba abaciteniye, piba jepäneniye mamye dongki ne ägräräneji gyene, pui papa cabu biname te camu ge adnata. Peei ne tiibirepeye, aima secanepeye. ³¹ Biname te liba weebibine itemlenige egä, 'Ngenome jiihireniye?' piba teebine jejepeye egä, 'Yageyame te singi gyene teeme täapume.' "

³² Siige, teepi aaclige, iyeta gwidape bine ibibi jepänemäsi Yeesu lipu jaajige. ³³ Egä cäro teepi pui mamye dongki ne jiihiräsi, dongki yageyame cina teebibine äätelmisi egä, "Weene dongki ne ngenome jiihireniye?"

³⁴ Teepi piba jejemäsi egä, "Yageyame te singi gyene teeme täapume." ³⁵ Siige, teepi mamye dongki ne Yeesu bau me ecanäsi, teeme cäbletääpe bine papa cabu eretnemäsi, Yeesu ne piba itityäräsi acenutame mamye dongki papa cabu. ³⁶ Yeesu liba ädenige, biname cina teeme cäbletääpe bine gaabe cabu eretnemisi teeme otni täapume.

³⁷ Tabe liba Yerusalema mameta me tatyaramtige Olibi Uli podo cabu ca, gaabe te luma täinige Yerusalema abacitame, puga teeme bucurage abiberäja bägrä cina gije abacitinisi Acejiyame ne eso ceeramé gege cama, piyepu teebine babo tage ca ewepyeräjisi iyeta miijirage ciitaca mule täapume, teepi lui bine ituge pöpäna Yeesu bau ca. ³⁸ Teepi jiičemisi egä, "Acejiyame te cime mope biname miiji naawenege lui te Yageyame me ngii cabu

tädenite! Mime poode pisi nyene cabucewe je. Acejiyame lui caburage gyene, jamyacu apaclyera te tāduge teeme cabu ca.”

³⁹ Piba poto Parisea sigu biname pui tomi cabu ca Yeesu ne jejisi egä, “Abiberäja Biname, mäame bägrä bine jejemi bojä agime!”

⁴⁰ Yeesu teebibine jejemige egä, “Cane weebibine jijenininine egä ai biname liba bojä äbitininisi, piba gaabe wajwa lui kula cina ala pa labayipesi!”

Yeesu Ele Engenige Yerusalema Cewe Biname bime täöpume

⁴¹ Yeesu babo cewe Yerusalema mametarage me ädige, cewe ne liba jepänige, tabe owecu cama ele engenige pui cewe biname cina lipu mäpu ne ciige cirege päpäna. ⁴² Tabe jücemige egä, “Yerusalema cewe biname, miiji page weene umle cama icrajeji lipu gyene poode ne päpäname, yepä page ämlitäneji gyene weeme päpäna cabu ca! ⁴³ Yoo, bimu cina cire saaclepi weeme cubuyame cina piba weebibine cire jiwaclomtipesi; teepi gawe ca caale cire jaawenepesi, iyeta poto ta pepu weeme bau me cire saaclepini. ⁴⁴ Teepi weeme cewe ne pa jilbyagecepesi cuta piyepu iyeta biname bine cewe caale ngalebora lui cina yaacrajuge; licarage yepä raranga kula ne teeme puupu cabu cire yaabmalepesi, ingle weene padare ne lica opo ewatneniye Acejiyame liba weeme bau me otni weebibine niija cabu ca äsecrerame.”

Yeesu Ädige Iiwäreja Mete me

(Matayo 21:12-17; Mareko 11:15-19; Yoane 2:13-22)

⁴⁵ Yeesu ädige iiwäreja mete caale ngalebora me, puma gije abacitige aletnaletna biname bine äyecrejame, ⁴⁶ teebibine jejemige egä, “Acejiyame te jücenige Oogäräneji mene cabu egä, ‘Cäme mete lui irecu ätumuta mete täöpume cirege lenaja,’ yepä weene te itu seta-trongärümeye epu puupu me eromaame cina luma lämletneräjininusi!”

⁴⁷ Yoo, piba iyeta bimu gaabegabe Yeesu biname bine yaabiberäjemuge iiwäreja mete caale bora puutucu je. Modamoda iiwäreja biname, cote abiberäja biname, piyepu nuuja mope biname cina singi ge teebine aglime, ⁴⁸ yepä teepi padare ne lica jepänisi peei ne wawename, ingle iyeta biname cina baborage singi teeme mene ätecijame.

20

Ätemla Yeesu me Conocäco poto cidi me Tabu Mule bine Wawenecame

(Matayo 21:23-27; Mareko 11:27-33)

¹ Nuuja bimu, Yeesu liba puga ge iiwäreja mete caale bora je biname bine ebiberäjemige piyepu Miiji Mene jejananemige, piba modamoda iiwäreja biname piyepu cote abiberäja biname cina nuuja modamoda biname cama teeme bau me seclige, ² jejisi egä, “Cibibine nijini, mäame ngena conocäco pisi nyene ai mule bine wawenecame? Laati bau ca gyene mäame conocäco?”

³ Yeesu jejemige egä, “Yoo, cäme ätemla cuta pisi nyene weeme täöpume. Cebine najeye, ⁴ laati te Yoane ne conocäco yäacärepini tabe biname bine niije ca äcisejame, Acejiyame te coo nää biname bine?”

⁵ Siige, teepi teemeteme mene jitransisi egä, “Mine lipu jejenisi? Mine liba jejenisi egä, ‘Yoane me conocäco lui Acejiyame bau ca gyene,’ tabe piba nijeninige egä, ‘Cije weene ngena name pi piba Yoane ne lica jättrungepeye?’ ⁶ Yepä, mine liba apu jejenisi egä, ‘Yoane me conocäco lui biname bime cabu ca gyene,’ piba ai biname tomi te mibibine kula ca nibyecrininisi, ingle teepi jitru-ngenisisi egä Yoane lui Acejiyame me mename biname ge.” ⁷ Siige, teepi Yeesu ne jejisi egä, “Cine umle lica gemi laati te Yoane ne conocäco yäacärepini biname bine niije ca äcisejame.”

⁸ Yeesu teebibine jejemige egä, “Piba cane cuta weebibine lica jijenininine laati te cebine conocäco näcärepini ai mule bine wawenecame.”

Ngene ca Agli Mene Calwacupi Ire Atwi Biname bime poto cidi me

(Matayo 21:33-46; Mareko 12:1-12)

⁹ Yeesu piba biname bine ai ngena ca agli mene jejemige egä, “Yepä biname te waina gije bine itemige. Tabe kaakesea biname bime ime cabu ecitige ire atwime, kämage gaabegabe teepi te poto kuu teebine ceeraname. Tabe piba teeme gawe ne sebmilige leca padare cama. ¹⁰ Yoo, padare liba tatyaramtigi waina kuu ngade awacame, tabe pui yageyame te kaakesea bägrä ne jityepige teeme poto kuu bine waadena calwacupi ire atwi biname cabu ca. Yepä, pui calwacupi ire atwi biname cina pui kaakesea bägrä ne etemeläjisi, piba ime taatu jityepisi teeme babo biname bau me. ¹¹ Calwacupi yageyame te piba nuuja kaakesea bägrä ne cuta jityepige, siige calwacupi ire atwi biname cina cuta teebine etemeläjisi, ajiri me jewenisisi, piba cuta ime taatu jityepisi. ¹² Calwacupi yageyame cuta nuuja kaakesea bägrä ne jityepige; siige, pui calwacupi ire atwi biname cuta teebine niija

jewenisi, calwacupi cabu ca piba iyecrājisi. ¹³Piba calwacupi yageyame te jiiçige egā, ‘Cane ngena pa jaawenepene? Cāme ngenecurage bāgrā ne pama miiji cane ātyepa. Teepe pama teebine opo gaabe me ecitenisi.’ ¹⁴Yepā, calwacupi ire atwi biname cina yageyame me bāgrā ne liba jepānisi, piba teemeteme ajananinisi egā, ‘Age sena yageyame me bāgrā. Tabe te ai calwacupi ne cire yaacatepi. Mine pa yaaglesi, siige calwacupi mime yene.’ ¹⁵Siige, teepi puma cita ca pui bāgrā ne calwacupi cabu ca iyebllngtisi, piba budre me eglisi.”

Yeesu piba itemlemige egā, “Siige, Pui calwacupi yageyame te ngena ne pa jaawenepi calwacupi ire atwi biname bime tääpume? ¹⁶Taba pa tādēpi, pui biname bine budre me pa yaaglecemēpi, piba teeme calwacupi ne nuuja biname bine pa jaajemēpi ire atwime.”

Siige, biname cina liba pei mene itecijemige, jiiçisi egā, “Peei te pepu gone ābita!” ¹⁷Yeesu piba teebibine ire jetwemige, itemlemige egā, “Piba ngena gyene ai Oogārāneji Mene me aboclomta? Mene egā:

‘Lui kula ne raranga biname cina jigysi,

baborage bābitige iyeta nuuja cabu ca.’

¹⁸Cane sāne pui kula piyepu iyeta biname lui cina cāme papa cabu pa yaatrametnemepesi, teepi cuta pa laglemelājipesi. Cāme kokre te liba yepā biname cabu kula pana pa saatramēpi, pui biname te secre pana pa lapliwerājēpi.”

Ātemla Tāks Rarekaake Ceera poto cidi me

(Matayo 22:15-22; Mareko 12:13-17)

¹⁹Siige, cotre abiberāja biname piyepu modamoda iiwāreja biname cina singi Yeesu ne puiage padare cabu oomlaname, inge teepi opo ewatnisi egā peei ngena ca agli mene lui teeme poto cidi me. Yepā teepi biname tääpume wālu ge, inge peei biname tomi te singi ge Yeesu tääpume. ²⁰Teepi peei name pi teebine ire ca ecananisi, piyepu teeme poto biname bine jityepemisi Yeesu bau me sināme abiberājame. Teepi singi Yeesu ne teeme mene cabu ca oomlaname, piba Rooma cabu ca mope biname me kokre ime cabu acitame. ²¹Peei name pi pui sināme abiberāja bāgrā cina Yeesu ne itemlisi egā, “Abiberāja biname, cine umle gemi määme mene piyepu abiberāja lui conocāco gyene. Cine umle gemi egā iyeta biname lui yepā pana gemi määme opo gaabe je, lica nuuja te baborage, yepā maane iyeta biname bine toraca mene yaabiberājemute Acejiyame me gaabe poto cidi me. ²²Yoo, maane cibibine nijini, nāā miiji gyene cine tāks rarekaake Rooma Babo Mope Biname Siisa ne ceerame, coo miiji lica gyene ceera?”

²³Yepā, Yeesu opo ewatnige egā teepi singi teebine mene cabu ca oomlaname, siige teebibine jejemige egā, ²⁴“Yepā bulubulu rarekaake secani! Laati me opo piyepu laati me ngii, laati me cewecu pisi nyene ai rarekaake cabu?”

Teepi jejisi egā, “Siisa teemi yene.”

²⁵Yeesu piba jejemige egā, “Yoo, lui gwidape gemi Siisa me, teebine ecāreye pui, piyepu lui gwidape gemi Acejiyame me, teebine ecāreye pui.”

²⁶Siige, teepi āblicāco teebine teeme mene cabu ca oomlana puma biname bime sobe cabu. Siige, teepi mutācāco ābitininisi Yeesu me mene name pi, bojā jejemige.

Ātemla Mene Budre cabu ca Arpinera poto cidi me

(Matayo 22:23-33; Mareko 12:18-27)

²⁷Piba poto Sadukea sigu biname cina Yeesu bau me seclige. Yoo, Sadukea biname cina apu jiiçisi egā, “Biname cina lica budre cabu ca cirege arpinera.” Yoo, teepi Yeesu ne itemlisi egā, ²⁸“Abiberāja biname, Moose te cotre ne mime tääpume soogāruji egā, ‘Biname te liba budre läbituge, coga ne bāgrā cāco twaabmaluge, teeme igane te miiji cuubla ne acata bāgrā wawename teeme naane me ngii tääpume.’ ²⁹Yoo, seben naniganewale icrajuji. Naane te coga ne ocatige, siige bāgrā cāco budre ābitige. ³⁰Piba teeme gomecayame igane te pui cuubla ne ocatige, siige bāgrā cāco cuta budre ābitige. ³¹Pepu cuta ābitige puma cita ca gomeyame tääpume, piyepu iyeta teeme iganewale bime tääpume, iyeta seben teepi budre ābitininisi bāgrā cāco. ³²Ingwe ca pui magebi te cuta budre ābitige. ³³Yoo, pui bimu cabu budre biname cina liba cirege arpinera ireclotame, piba taba laati me coga cirege lenaja, inge iyeta pui seben nanigane cina teebine ocananisi teeme coga tääpume?”

³⁴Yeesu teebibine jejemige egā, “Yoo, ai gawecewe ireclota cabu magebi rooriye cama lawadrininusi. ³⁵Yepā, pui magebi rooriye lui cina ibibi gemi cirege arpinera ciige ireclota cabu lenajame, teepi puma lica awadrecā, ³⁶cuta puma biname cina lica budre cirege ābita. Teeme ireclota lui Acejiyame me mename seemo pana budre cāco. Teepi Acejiyame me bāgrā gemi, taba lui bine ituge budre cabu ca arpinera ten cama iyeteta lenajame. ³⁷Yoo, Oogārāneji Mene, Moose lui itu soogāruji, peei cabu mene cuta pisi nyene budre biname me arpinera poto cidi me. Pui padare cabu Moose te jeclajutuji ayeji uli gome, taba mime Yageyame me mene itecijuji, ingwe ca yoogāruji egā, ‘Cane Abrahamo, Isacako, Yakobu naabibine Acejiyame gāne.’ ³⁸Yoo, Acejiyame lui ireclota cama biname bime Acejiyame

gyene; tabe lica budre biname bime Acejiyame, ingle biname cina lica iyeteta budre, yepä iyeta biname täápume ireclota cuta pisi nyene.”

³⁹ Puma cita ca poto cotre abiberäja biname cina jejisi egä, “Abiberäja biname, maane miiji tiicite!” ⁴⁰ Yoo, pui padare cabu ca biname cina singi lica teebine cääri ätemlejame.

Keriso Laasi Nyene

(Matayo 22:41-46; Mareko 12:35-37)

⁴¹ Yeesu teebibine jejemige egä, “Biname cina lipu jicemusi egä, ‘Keriso biname bine lui te niija cabu ca cire yäasecräremepi, tabe Daawida me ingle cabu ca pa tädepi?’ ⁴² Yepä, Daawida teemämu jicenenige Salamo uupera peba cabu egä, ‘Yageyame te cäme Yageyame ne jejuji:

Maane adnati cäme camu poto cidi ca,

⁴³ ngälu cane mäame cubuyame bine

mäame ernge gawe me cire yaacranemepene.’

⁴⁴ Yoo, Daawida teebine einuji teeme Yageyame ca. Cije Keriso te piba lipu Daawida me kaakesaare gyene?”

Yeesu Umla Mene Jejananemige Cotre Abiberäja Biname bime Mule poto cidi me

(Matayo 23:1-36; Mareko 12:38-40)

⁴⁵ Iyeta biname cina liba Yeesu me mene jitecijisi, tabe teeme abiberäja bägrä bine jejemige egä, ⁴⁶ “Cängena ire cotre abiberäja biname bime täápume. Teepi singi gemi teeme lecaleca cäbletäape cama otnetnejame, piiyepu biname bime bau ca awabla piiyepu awepyeräja päpäna aletna puupu cabu. Teepi singi gemi modamoda biname bime puupu cabu adnaterame abasecretna mete cabu, cuta piiyepu soriyomu ne liba yaaclitisi, teepi ladna-tärüge müjirage puupu cabu. ⁴⁷ Teepi cuublacubla bine baborage rarekaake ngälu yäacäremusi, pepu pi teeme gwidape piiyepu mete iyeta jäämlemusi, piba teepi lecaleca irecu ätumuta jaawenemusi biname bime sobe cabu. Yoo, teepi teeme mage mäpu daremu ne cirege päpäna!”

21

Cuubla me Owecu Gwidape

(Mareko 12:41-44)

¹ Yeesu ire acitige, jepänemige dogwe biname bine lui cina rarekaake ebäcnemisi iiwäreja mete rarekaake acrana gwidape cabu. ² Tabe piba yepä owecumete cuubla ne jopänige lui te neeneni matimati rarekaake äasinglantige pui rarekaake acrana gwidape cabu. ³ Süige, tabe abiberäja bägrä bine jejemige egä, “Cane toraca mene jijenininine, ai owecumete cuubla te baborage becitige iyeta pui nuuja biname cabu ca. ⁴ Pui nuuja biname bime rarekaake lui bucurage gemi, piiyepu peei cabu ca teepi poto bine ecärisi, yepä cuu-bla te becitige iyeta teeme lui pisi nyene lenaja täápume.”

Yeesu me Mene Iiwäreja Mete Igareca poto cidi me

(Matayo 24:1-2; Mareko 13:1-2)

⁵ Poto abiberäja bägrä cina mene abaitninisi iiwä-reja mete poto cidi me egä pui mete me opo jamyacu ge, oplacmeläja kula ca rarangä-neji ge, piiyepu biname cina miijimiji gwidape Acejiyame ne ituge ceera peei mete cängena waweneme. Yeesu piba teebibine jejemige egä, ⁶ “Weene ire iyeta ai miiji-miji gwidape, padare te cirege atyaramta liba iyeta ai kula bine teeme puupu cabu ca cirege äyebenga. Yoo, iyeta cirege iisabeja.”

Mäpu cina Lipu Cirege Otni

(Matayo 24:3-14; Mareko 13:3-13)

⁷ Abiberäja bägrä cina teebine itemlisi egä, “Abiberäja biname, ai mule te liba pagege äbita? Mine lipu peei padare ne pagege opo awatna?”

⁸ Yeesu jejemige egä, “Cängena ire! Piba nuuja te lica weebibine ingletnäjinuge, ingle bucurage biname cina cäme ngii cabu pa twaatnipesi, mene pa jicemepesi egä, ‘Cane age säne tabe!’ coo piiyepu, ‘Padare bii tatyaramtigel!’ Yepä, pepu biname bime mene gone jääteciemuye. ⁹ Cuta piiyepu, weene liba idre pa itecijanipi egä, ‘Biname cina teeme mopeyame ne cubu cama iyeblingtisi,’ coo, ‘Biname cina cubu jicenisii,’ piba wälu gone läbitininuye. Pepu mule pa läbitipesi, yepä ai padare me ngälugaabe cäro camu gyene.”

¹⁰ Tabe piba jejemige egä, “Yepä gawe biname cina nuuja gawe biname cama cubu cire jicepesi, piiyepu yepä mope biname te nuuja mope biname cama cubu cire jicepäsi. ¹¹ Modamoda ocneja piiyepu gane padare cina cewe maramara cabu ta cire twaatnipesi. Niija pita cina cire twaatnipesi biname bine oomläjecame. Wälu cama cewecu gwidape dume cabu cirege aboclomäja. ¹² Yepä, ai mule cina liba camu ge äbitena, peei niinäce gaabe me, biname cina weebibine pa joomläjicipesi, mäpu cabu pa icranipesi. Teepi weebibine

maramara abasecretna mete cabu pa iwadipesi atrana täapume, piba krokeeciye mete bora pa ibäcniyesi. Weene mope biname piyepu nuuja modamoda biname bime opo gaabe pa jicljatupi cäme ngii name pi. ¹³ Piba peese nyene weeme padare Miiji Mene teebibine jajanename. ¹⁴ Yoo, weeme ngene atwanena yaacituye, piba bucurage maramara ngene atwanena gone pui padare cabu egä ngena mene teebibine awecnistame, ¹⁵ ingle cane te umle piyepu mene pa icäripene. Piba iyeta weeme cubuyame cina äblicäco pui mene aina, coo äseblecäja. ¹⁶ Yoo, weeme ätrunga cäco inglewale piyepu binamewale cina weebibine weeme cubuyame bime ime cabu pa icäripesi, lui cina weeme poto bine cuta budre me pa yaaglecemepesi. ¹⁷ Iyeta biname weebibine pa jimugetnipesi weeme cäme bau ätrunga name pi. ¹⁸ Yepä, teepi äblicäco weeme ireclota papa acata Acejiyame liba singi lica weeme budre täapume. Teeme kokre epu baborage gyene egä tabe ibibi cuta iyeta weeme edingäli cängena ire atwime. ¹⁹ Peei name pi weeme ätrunga cabu cängena jicljatutinuge ngälu weene iyeteta ireclota cabu äbäcname.”

Yeesu Cerämu Mene Jejemige Yerusalema ne Iigareca poto cidi me

(Matayo 24:15-21; Mareko 13:14-19)

²⁰ Yeesu jejemige egä, “Yoo, weene liba bucurage cubu biname bine cire jepänemepeye Yerusalema cewe ne jewaclomäjensisi, piba weene umle gemi egä padare te mameta me täbitenige pui cewe ne iigarecame. ²¹ Piba pui biname lui cina Yuudea gawe cabu icrajininige, teepi miiji podo cabu me uucratna; piyepu lui cina babo cewe cabu icrajininige, teepi miiji cewe abmala; piyepu lui cina babo cewe kaake poto je icrajininige, teepi miiji lica cewe me äbäcname, yepä cudecewe me miiji uucratna. ²² Ingle pui padare cabu Yerusalema cewe biname cina mäpu daremu cirege päpäna, piba Oogäräneji Mene te ibibi me cire läbitepi. ²³ Ogi nemi pui padare cabu lui mäpumäpu magebi piyepu bägrä ngame meeramera magebi. Mage mäpu padare cire tädepi ai gawecewe cabu me; ai biname cina mäpu daremu cire jääpänepesi. ²⁴ Cubuyame cina poto bine cubu turikä ca cire yaaglecemepesi, piyepu nuuja bine ätäyäneji cire jääteyepäjemepeesi iyeta gawe maramara cabu me. Siige, nuuja gawe biname cina Yerusalema cewe ne cire yiiglicnäjepesi, piyepu pui gawe ire jaatwepesi, ngälu pui biname bime padare cire lapirepi.”

Yeesu me Acnenuta poto cidi me

(Matayo 24:29-31; Mareko 13:24-27)

²⁵ Yeesu piba jejemige egä, “Maramara cewecu cina cire tateplengäjipesi bimü cabu, piyepu mabye, wale cabu je. Ai gawecewe cabu, maramara gawe biname cina ngenecu niyya cire läbitipesi. Teepi wälu name pi cuta mutäcäco cire läbitipesi, malu te liba uule mumwämu cama cire tädepi, cuta piyepu gobe gotäte te babo uule kuu ne cire saacanepi. ²⁶ Yoo, poto biname cina irecu cire laboclomäjipesi wälu name pi, teepi liba cire jääpänanepesi lui niyya cina totinisi gawecewe iyeta poto ta. Ingle dume cabu ljalija kokre gwidape piti nemi, pui bine teeme otnetneja gaabe cabu ca cire yäyecräjemepi. ²⁷ Piba cane säne lui te Acejiyame bau ca tädujine, biname me äbitujine, cane piba carbe cabu cire täinepene baborage kokre piyepu jamyacu apacljera cama. ²⁸ Yoo, ai mule cina liba cire gije labacitipesi, piba weene abujängipeye, piyepu mope ewepengäjemepeye, ingle weeme äsecrera piba mameta gyene Acejiyame bau otnime.”

Ngene ca Agli Mene Piigi Uli poto cidi me

(Matayo 24:32-35; Mareko 13:28-31)

²⁹ Yeesu teebibine piba ai ngene ca agli mene jejemige egä, “Jepänemeye piigi uli piyepu iyeta nuuja uli bine. ³⁰ Kirece laame cina liba täsuge, weene piba umle egä kämäge mameta birige. ³¹ Pepu pana weene liba pui mäpu mule bine cire jääpänemepeye, weene piba umle cirege äbita egä Acejiyame me biname bine waadena padare te mameta gyene.

³² Cane weebibine toraca jijenininine egä biname lui cina ireclota page ai taje, teepi iyeta budre lica cirege äbita, ngälu iyeta ai mule cina liba cire läbitipesi. ³³ Yoo, dume piyepu gawe cirege apira, yepä cäme mene te lica cirege apira.”

Yeesu Jejemige egä Ireire Lenajame

³⁴ Yeesu cuta jejemige egä, “Weene ireire inajipi! Miiji lica cäme acnenuta bimü te weebibine buduma mule cabu oomlaname. Weeme ngene atwanena gone acrana singisingi mule cabu, coo sice nänäja cabu, coo piyepu ngenecu mäpu cabu ai gawecewe me gwidape poto cidi me. Piba pui bimü te weebibine lica buduma mule cabu ädära mage, cuta piba dici pana weebibine pa jibrecipi. ³⁵ Ingle pui bimü te cire tädepi iyeta biname bime bau me lui cina ai gawecewe cabu yaacrajuge. ³⁶ Peei name pi ire cama cängena inajipi, piyepu Acejiyame ne yaawejanuye kokre ceerame iyeta pui gwidape cabu ca cängena äsecrera, piba cäme opo gaabe je aclajutäjame, cane lui te Acejiyame bau ca tädujine, biname me äbitujine.”

³⁷ Siige, pui poto bimu gaabegabe Yeesu biname bine yaabiberäjemuge iiwäreja mete caale bora je. Ciyiye liba, tabe babo cewe cabu ca tasatuge Olibi Podo cabu lenajame. ³⁸ Kroke gaabegabe, iyeta biname cina iiwäreja mete me cuta yaacluge teeme mene ätecijame.

22

Gläämu Jecijemige Yeesu ne Aglime

(Matayo 26:1-5; Mareko 14:1-2; Yoane 11:45-53)

¹ Trii padare mameta ge Israela biname cina liba uutneca cäco buluduu bine yäärwäjemus, lui deedei teepi Äsuplengta Trii ca yaainusi. ² Yoo, iiwäreja babo biname piyepu cotre abiberäja biname cina singi gaabe ne päpäname Yeesu ne aglime, yepä biname bime name pi wälu, teepi singi ogä oomlaname.

Yuuda Mene Jewenige Yeesu ne Awabame Budre tääpume

(Matayo 26:14-16; Mareko 14:10-11)

³ Yuuda lui yepä ge Yeesu me twelb abiberäja bägrä cabu ca, teeme nuuja ngii Isakariyota. Satani te Yuuda me ngalebora me abacitige. ⁴ Tabe piba modamoda iiwäreja biname piyepu iiwäreja mete awamuta mope biname bime bau me ädige, ten cama mene jüicemige lipulipu Yeesu ne teeme ime cabu acitame. ⁵ Siige, teepi gege ge teeme ätityera tääpume, mene jejisi rarekaake daremu teebine ceerame. ⁶ Yuuda teeme mene ecatige, müjirage padare ne jirngige Yeesu ne teeme ime cabu acitame, biname sobe liba lica ge.

Yeesu Teeme Neeneni Abiberäja Bägrä bine Jäätyepige Äsuplengta Trii Wawename

⁷ Teepi uutneca cäco buluduu bine yäärwäjimus seben bimü ngalebora, siige pui padare me niinäce bimü te tädige teepi liba maamoi plongo bine yaaglecimusi Äsuplengta Trii deedei wawename. ⁸ Yeesu te Peteru naabi Yoane jaajige egä, “Weene iclege mime deedei amacetnäjame Äsuplengta Trii tääpume.”

⁹ Teepi teebine itemläsi egä, “Maane singi cine ai deedei ne luma wawename?”

¹⁰ Tabe jaajige egä, “Cängena nätecijeye. Weene liba babo cewe me abaciteniye, piba weene biname ne jepäneniye niye iitana cabu ca lui te tacnenige. Weene teebine ingwe icwepeye, tabe lui mete me abacitenige, weene peei mete me cuta abacitepeye, ¹¹ pui mete yageyame ne jejepeye egä, ‘Cime mene pisi nyene Abiberäja Biname bau ca egä: Puupu lese nyene cane cäme abiberäja bägrä cama Äsuplengta deedei äbitame?’ ¹² Tabe piba baborage cabu puupu ne jiwabenige lui iyeta gwidape cama gyene. Weene puma deedei emacetnäjemepye!”

¹³ Siige, teepi aalige, iyeta gwidape ibibi jepänemäsi Yeesu lipu teebibine jaajige. Teepi puga äsuplengta deedei ne emacetnäjäsi.

Yeesu Teeme Abiberäja Bägrä cama Aareto ne Erwige

(Matayo 26:26-30; Mareko 14:22-26; 1 Korinito 11:23-25)

¹⁴ Yoo, padare liba tatyaramtigit, Yeesu dade gome adnatige teeme twelb ätyepänäji biname cama. ¹⁵ Tabe teebibine jejemige egä, “Cane baborage singi ai Äsuplengta deedei weene cama äbitame. Cane ebä jepänenine mäpu padare ne, yepä niinäce cane weene cama deedei äbitenine. ¹⁶ Cane weebibine jijenininine egä cane ai äsuplengta deedei ne ingwe ca lica pa yaarwepene ngälu teeme aboclomta toraca me cire läbitepi, cane liba biname bine niya cabu ca äsecerame, Acejiyame me waadena cabu äbäcname.

¹⁷ Yeesu kwäye ne ecatige, Acejiyame ne eso ecärige, piba jejemige egä, “Weene ecateye, iyeta eneye. ¹⁸ Yoo, cane weebibine jijenininine egä cane waina niye ne cuta cääri lica pa yaanepene ngälu padare te cire tatyaramtepi Acejiyame te biname bine waadename.”

¹⁹ Tabe piba buluduu ne ecatige, Acejiyame ne eso ecärige, itrecige, teebibine ecäremige, jejemige egä, “Ai lui cäme tääpe gyene lui weeme tääpume budre äbitenine. Erweye, cebine ngene apecneme.” ²⁰ Deedei ingwe ca, tabe yepä pana mule ca kwäye ne ecatige, jejemige egä, “Ai kwäye te klaje jecnenige weeme tääpume Acejiyame lui kirece mene ituge jaji biname bine niya cabu ca äsecerame, cäme uudi liba tapirenige.

²¹ Yepä, ire! Biname lui te cebine cäme cubuyame bime bau me nawabenige, tabe age sena mine cama ai dade cabu. ²² Yoo, cane lui te Acejiyame bau ca tädujine, biname me äbitujine, cane budre me ädenine, inge Acejiyame te singi gyene cane peei ne wawename. Yepä, mage mäpu gyene teeme tääpume lui te cebine cubuyame bime tääpume nawabenige!”

²³ Siige, abiberäja bägrä cina teemeteme ätemläjinisi egä, “Mime tomi cabu ca laasi nyene, lui te peei ne jenenenige?”

Toraca Babo Biname Lipu Gyene

²⁴ Abiberäja bāgrā cina jicelisi egā teeme cabu ca lui te babo biname me pagege äbita. ²⁵ Yeesu peei name pi jejemige egā, “Ai gawecewe mope biname cina teeme biname bine babo kokre cama ire jaatwemusi, piyepu biname cina teebibine yaainemusi ‘Babo Ätityera Biname.’ ²⁶ Yepä, gone teeme pana mule ne yaacatuwe. Eewe, weeme cabu ca laasi nyene baborage, tabe miiji matikolä pana äbita, piyepu weeme babo biname tabe miiji kaakesea bāgrā pana lenajame. ²⁷ Yoo, laasi nyene baborage ai neeneni cabu ca, nää biname lui te ladnatuge deedei äbitame, coo biname lui te deedei teeme bau me yaawaduge? Yoo, tabe sine baborage lui te ladnatuge, yepä cane lui weeme täapume epu pana gāne weeme kaakesea bāgrā liiyepu.

²⁸ Yoo, weene cebine lica ituge abmala mine liba mäpu bine jääpānānemepesi, ²⁹ cuta epu pana cāme Babe te lipu cebine conocāco ituge ceera cane biname bine waadename, cane cuta pepu weebibine conocāco cirege ceera weene biname bine waadename. ³⁰ Weene piba cabucewe je cāme dade cabu deedei cirege äbita piyepu niye nānāja cāme waadēna padare cabu. Weene babo puupu cabu cire adnatāripeye Israela biname bime twelb ingle biname bine atraname.”

Yeesu piyepu Peteru

(Matayo 26:31-35; Mareko 14:27-31; Yoane 13:36-38)

³¹ Yeesu jejige egā, “Simona, Simona, cebine näteciji! Satani teeme singi bii jepānige weebibine iyeta apicetnerame, epu pana calwacupī biname te kuu bine mälwā lipu jäämlecājemuge miiji kuu taatu waadename. ³² Yepä, Simona, cane cuta mäāme täapume ituge awejena egā maane lica mäāme ätrunga ne abma-lame. Maane liba pui apicetnera cabu ca pa tacnenutepete, piba maane mäāme binamewale bine cuta ngenecu kokre jēwenemepi.”

³³ Peteru jejige egā, “Yageyame, cane amacetnājāneji gāne maane cama otnime krokeciye mete cabu me, coo budre äbitame.”

³⁴ Yeesu piba jejige egā, “Peteru, cane meebine naajenine egā maane cebine nesae gāābu nainenite, paulo te ingwe ca ala sengenenige.”

Yeesu Abiberäja Bāgrā bine Umle Mene Jejemige egā Äsädeca te Teeme bau me Pa Tädepi

³⁵ Yeesu piba teeme abiberäja bāgrā bine itemlemige egā, “Pui niinäce padare cabu, cane liba weebibine jityepājipene rarekaake cāco, bulu diiba cāco, cuta piyepu ernge gwidape cāco, nää weeme singi puga ge nuuja gwidape täapume?”

Teepi jejisi egā, “Cine singi lica ge nuuja gwidape täapume.”

³⁶ Yeesu jejemige egā, “Yepä, page laati me bulu diiba piyepu rarekaake piti nemi, tabe miiji ten cama waadēna. Piyepu cuta laati te cubu turikā cāco gyene, tabe miiji aletname teeme acwaba cābletäape ca. ³⁷ Cane weebibine jijenininine egā Oogārāneji Mene te cāme potō cidi me miiji ibibi äbitame egā, ‘Teebine ecitenisi conocono biname cama yepä.’ Yoo, ngena mene cāme potō cidi me oogārāneji gyene, toraca me äbitenige.”

³⁸ Abiberäja bāgrā cina piba jejisi egā, “Yageyame, age tegi neeneni cubu turikā.”

Tabe jejemige egā, “Siige, ibibi gyene!”

Yeesu Olibi Uli Podo cabu Ireçu Ätumutige

(Matayo 26:36-46; Mareko 14:32-42)

³⁹ Yeesu piba cewe ne sebmālige, Olibi Uli podo cabu me ädige, teeme bimū gaabegabe mule lipu ge. Teeme abiberäja bāgrā cina teeme ingwe ca eclige. ⁴⁰ Tabē liba teeme singi puupu ne joomlige, piba teebibine jejemige egā, “Acejiyame ne ewejaneye egā weene apicetnera cabu ca lica pagege atrametna.”

⁴¹ Tabē piba matikolä äyēblingtige teeme bau ca, epu pana kula me ajara leca liiyepu. Tabē kokorare ääpednutige, Acejiyame ne ewejanige egā, ⁴² “Cāme babe, maane liba singi gāte, ai mäpu ne iyēblingti cāme bau ca, yepä gone jaawenute cāme singi ne, mäāme singi ne jēwenepi.” ⁴³ Piba mename seemo te cabucewe ca teeme bau me taboclomtige teebine kokre ceerame. ⁴⁴ Yeesu baborage ngenecu mäpu cama ewejanige. Teeme mlage cina uudi ipecu pana sitrametnemige gawe cabu.

⁴⁵ Tabē liba abujāngtige teeme ireçu ätumuta cabu ca, teeme abiberäja bāgrā bime bau me liba ädige, teebibine ute cabu jepānemige, ingle teepi mage ngenecu mäpu ge. ⁴⁶ Tabē teebibine jejemige egā, “Weene ngena ute gemi? Arpinārīneye, Acejiyame ne ewejaneye egā weene apicetnera cabu ca lica pagege atrametna.”

Yeesu ne Joomlisi

(Matayo 26:47-56; Mareko 14:43-50; Yoane 18:3-11)

⁴⁷ Yeesu liba peei mene cabu jage, piba taatu biname sange te tatyaramtige. Pui biname, ngii Yuuda, lui yepä ge twelb abiberäja bāgrā cabu ca, tabe te opo jēwenemige teebibine. Tabē Yeesu gome ädige teebine lakace cabu atecname, teeme awabla mule liiyepu ge.

⁴⁸ Yepä, Yeesu jejige egä, “Yuuda, cane lui te Acejiyame cabu ca tädujine, biname me äbitujine, nää maane cebine nawabenite budre me atecna cabu ca?”

⁴⁹ Yoo, Yeesu cama lui abiberäja bägrä cina liba jepänemisi ngena te pa läbitege, teepi jejisi egä, “Yageyame, nää cine miiji agleca cubu turikä ca?” ⁵⁰ Puma cita ca teeme yepä te iiwäreja mope biname me kaakesea bägrä ne jemomäntige turikä ca, camu poto tablame ne jeläcutige.

⁵¹ Yepä, Yeesu jejemige egä, “Siige ai mule!” Tabe ime ne ecitige pui kaakesea bägrä me tablame cabu, teebine miiji me jewenige.

⁵² Piba pui modamoda iiwäreja biname piyepu poto iiwäreja mete awamuta mope biname, piyepu poto Israela modamoda biname bine, iyeta lui cina seclige Yeesu ne oomlaname, tabe teebibine jejemige egä, “Weene ngenome cubu turikä piyepu gabagaba cama naaclige, epu pana egä cane cubucubu biname gäne?” ⁵³ Yoo, cane weene cama liba nanajuge iiwäreja mete caale bora bimu gaabegabe, weene piba singi lica cebine oomlaname. Yepä, ai lui weeme padare gyene, krokeciye te liba weebibine joomlinige waadename.”

Peteru Yeesu ne Jeinige

(Matayo 26:57-58, 69-75; Mareko 14:53-54, 66-72; Yoane 18:12-18, 25-27)

⁵⁴ Siige, teepi Yeesu ne joomlisi, teebine ecanisi Iiwäreja Mope Biname me mete me. Peteru cudecewe pana teebine ingwe icwige. ⁵⁵ Poto biname cina muye yuungisi cole puupu cabu puutucu je, puga adnatäreji icrajige, cuta Peteru teeme gome adnatige. ⁵⁶ Yepä mete kaakesea ngulebägrä te teebine jepänige, muye apaclyera cabu adnatänejige. Tabe teebine cängena ewatnäjige, piba jiicige egä, “Ai biname te ten cama waatnuge!”

⁵⁷ Yepä, Peteru ainige, jojige egä, “Ngulebägrä, cane umle lica gäne tabe!”

⁵⁸ Matikolä ingwe ca, nuuja biname te teebine jepänige, jejige egä, “Maane cuta yepä teeme tomi cabu ca gäte!”

Yepä, Peteru jejige egä, “Eewe, cane lica!”

⁵⁹ Yepä awa ingwe ca cuta nuuja biname te kokre cama jiicige egä, “Toraca gyene, ai biname ten cama waatnetnäjuge, ingle tabe Galilaya biname gyene.”

⁶⁰ Yepä, Peteru te jejige egä, “Maane lui täapume jiienenite, cane umle lica gäne!”

Tabe liba camu peei mene iicema cabu jage, piba taatu paulo te ala sengenige. ⁶¹ Yageyame te tatatrongtige, Peteru ne conocäco ire jetwige, siige Peteru piba ngene jotwige Yageyame lui mene teebine bii jejige egä, “Page paulo te ingwe ca ala sengenenige, niinäce maane nesae gäabu cebine nainenite.” ⁶² Siige, Peteru asatige, mage ele engenige.

Awamuta Biname cina Yeesu ne Niiya Bäaclena me Jewenisi

(Matayo 26:67-68; Mareko 14:65)

⁶³ Lui biname cina Yeesu ne jewamutisi, teepi teebine niiya bäaclena me jewenisi, piyepu jidnanenisi. ⁶⁴ Teepi teeme irecu icwabisi cäbletääpe ca, piba jejisi egä, “Nijini, laati te meebine noororige?” ⁶⁵ Teepi cuta bucurage nuuja niiya mene ca teebine jicnecisi.

Yeesu Israela Mutre Biname bime Opo Gaabe je

(Matayo 26:59-66; Mareko 14:55-64; Yoane 18:19-24)

⁶⁶ Bimu te liba tacitige, Israela mutre biname, epu egä modamoda iiwäreja biname piyepu cotre abiberäja biname, teepi abasecretnige, piba Yeesu ne ecanisi teeme opo gaabe je aclajutame, ⁶⁷ teebine jejisi egä, “Nijini, nää maane Acejiyame bau ca Keriso säte?”

Yeesu teebibine jejemige egä, “Cane liba weebibine jijenininine, weene lica cäme mene ätrunga, ⁶⁸ cuta piyepu, cane liba weebibine itemläjinine, weene lica daremu mene awecnista. ⁶⁹ Yepä, ai padare cabu ca cane lui te Acejiyame cabu ca tädujine, biname me äbitujine, cane Kokre Acejiyame me camu poto ime cabu pa ladnatepene.”

⁷⁰ Teepi iyeta piba itemlisi egä, “Nää maane jiiicite apu egä maane Acejiyame me Bägrä gäte?”

Tabe teebibine jejemige egä, “Yoo, weene toraca jiiicemiye egä cane tabe säne.”

⁷¹ Teepi piba ajananinisi egä, “Ngänuge mime nuuja aitneja biname. Cine bii nitecijinige tabe lipu teemämu taitnige!” Siige.

23

Yeesu Pilato me Opo Gaabe je

(Matayo 27:1-2, 11-14; Mareko 15:1-5; Yoane 18:28-38)

¹ Siige, pui abasecretnänejige biname iyeta abujängige, Yeesu ne ecanisi Rooma ca Mope Biname Pilato bau me. ² Puga teepi teebine aitnejame gije abacitinisi egä, “Cine ai biname ne jepänisi cime biname bine conocono abiberäja cabu ewademige. Tabe teebibine apu

jejemige egä täks rarekaake gone ceera Babo Mope Biname Siisa ne, cuta piyepu jejemige egä tabe lui nuuja mope biname gyene, lui me ngii Keriso.”

³ Pilato teebine itemlige egä, “Nää, maane Israela biname bime mope biname säte?”

Yeesu jejige egä, “Yoo, maane peega bii jüicite.”

⁴ Puma cita ca Pilato te modamoda iiwäreja biname piyepu tomi cabu lui biname bine jejemige egä, “Cane lica nuuja ingle ne jepänine ai biname ne mäpu cabu acitame.”

⁵ Yepä, teepi kokre cama Pilato ne jejisi egä, “Teeme mara abiberäja cabu ca Yuudea gawe iyeta poto ta tabe biname bine giri jaacranimuge teeme singi acatame. Tabe mene jajanenname gije itu labacitepi Galilaya gawe cabu, cuta puma cita ca tädumi aimopo.”

Yeesu Mope Biname Heroda me Opo Gaabe je

⁶ Pilato liba peei mene itecijige, piba itemlemige egä, “Ai, nää Galilaya biname gyene?”
⁷ Tabe liba umle äbitige egä Yeesu lui Galilaya probins cabu ca ge, Heroda luma mope biname tääpume enajenige, piba teebine Heroda bau me jityepige, ingle pui padare Heroda cuta Yerusalema cewe cabu enajige. ⁸ Yoo, Heroda te gege äbitige Yeesu ne päpäname, ingle tabe mene ituge ätecija Yeesu poto cidi me, peei name pi leca padare cama tabe singi ge teebine päpäname. Tabe babo singi ciitaca mule päpäname Yeesu bau ca, ⁹ siige teebine bucurage mene ca itemläjige, yepä Yeesu nuuja daremu mene lica jewecnistige. ¹⁰ Yoo, modamoda iiwäreja biname piyepu cotre abiberäja biname cina abujängisi, teebine mage kokre mene ca jeitnäjisi. ¹¹ Heroda teeme cubu biname cama piba Yeesu ne niyarage bääclena me jewenisi piyepu niyaniya mene jüicemisi teeme poto cidi me. Teepi mope biname me sasa cäbletääpe ca esigrisi, teebine pui cama sewecnistisi Pilato bau me. ¹² Yoo, pui bimü cabu Heroda naabi Pilato biname me äbitäsi. Peei niinäce gaabe me teepi cubuyame ge.

Pilato Yeesu ne Budre me Jitränige

(Matayo 27:15-26; Mareko 15:6-15; Yoane 18:39–19:16)

¹³ Piba Pilato te modamoda iiwäreja biname, mope biname, piyepu iyeta biname bine ala tesoglecemige abasecretname, ¹⁴ teebibine jejemige egä, “Weene ai biname ne secaniye cäme bau me, piyepu cebine najiye egä tabe biname bine niya mule bine yaabiberäjemuge lui gemi cotre kaake poto ca. Cane teeme ireclota bii jüingine weeme opo gaabe, yepä lica jepänine nuuja niya ne teeme bau ca iyeta weeme aitneja mene cabu ca. ¹⁵ Cuta Heroda piyepu, tabe nuuja niya ne lica jepänige teeme cabu, peei name pi teebine cuta sewecnistige. Ai biname te nuuja niya ne lica ituge wawena lui ibibi gyene teebine budre daremu ceerame. ¹⁶ Cane peei name pi cäme cubu biname bine pa jaajemene teebine adnaname, piba asatame.” ¹⁷ Yoo, Pilato iyeta kämäge gaabegabe apu läbitanuge, tabe yepä biname ne krokeciye mete cabu ca saasatuge äsuplengta trii padare cabu, Israela biname cina lui biname tääpume singi.

¹⁸ Siige, iyeta biname cina pui tomi cabu ala abayaninisi egä, “Ai biname ne budre me eglepi! Baraba ne sisati cime tääpume!” ¹⁹ Yoo, pui biname Baraba te cubu ituge iicana Yerusalema cewe ngalebora cewe mope biname me kaakesea biname cama, cuta piyepu tabe nuuja biname ne ituge agli, peei name pi krokeciye mete bora me itu yaacitepi.

²⁰ Siige, Pilato te singi ge Yeesu ne asatame, peei name pi biname bine cääri jejemige peei poto cidi me, ²¹ yepä teepi jäje ala abayanenisi egä, “Baarge uli cabu jibyecreye; baarge uli cabu jibyecreye!”

²² Yepä, Pilato teebibine nesae me jejemige egä, “Tabe ngena niya ne ituge wawena? Cane teeme cabu nuuja niya ne lica jepänine lui ibibi gyene teebine budre daremu ceerame! Cane cäme cubu biname bine pa jaajemene teebine adnaname, piba pa yaasatene.”

²³ Yepä, pui biname cina ala abayaninisi egä teebine baarge uli cabu toto ca äbyecrame. Siige, teeme kokre mene te ibibi äbitige, ²⁴ Pilato piba mene jejemige biname bime singi wawenname Yeesu ne budre me acitame. ²⁵ Teepi lui biname tääpume singi, tabe teebine isatige, lui ne cubu name pi piyepu biname agli name pi krokeciye mete bora me acitäneji ge. Tabe Yeesu ne piba teeme ime cabu ecitige teepi teeme singi ne wawenname teeme tääpume.

Yeesu ne Baarge Uli cabu Jibyecrisi

(Matayo 27:32-44; Mareko 15:21-32; Yoane 19:17-27)

²⁶ Siige, Rooma cubu biname cina Yeesu ne liba ecanisi cewe cabu ca, teepi piba opopa eyisi yepä biname cama, teeme ngii Simona. Tabe Kurene cewe biname ge, lui te babo cewe me tabacitenige calwacupi cewe cabu ca. Yoo, cubu biname cina Simona ne joomlisi, Yeesu me baarge uli ne teeme palace cabu ecitisi, teebine jejisi Yeesu me ingwe ca acaname.

²⁷ Bucurage biname cina Yeesu ne ingwe icwisi. Puga ge poto magebi pui biname tomi cabu lui cina mage ele engenetnemige teeme tääpume. ²⁸ Yeesu teeme bau me

tatatrongtige, jejemige egä, “Yerusalemage mabege, ele gone căme tăăpume, yepä weene miiji ele weeme tăăpume piijepu weeme băgrä bime tăăpume. ²⁹ Ingle naace gyene padare te cire tatyaramtepi, biname cina piba cire jüicemepesi egä, ‘Lipu gege gemi peei mabege lui cina băgrä căco gemi, lui cina băgrä bine lica jäärngecusi piijepu băgrä bine lica ngame meeramera, teepi page cuta lica teeme băgrä bime măpu jepănanemisi.’ ³⁰ Pui măpu padare cabu biname cina podo bine cire jaajemepesi egä, ‘Cibibine nitrugărineyel’ piijepu doru bine cire jaajemepesi egä, ‘Cibibine nicwabărineyel’ ³¹ Yoo, teepi cebine liba apu nawenenisi, cate uli pana nărgenisi, teepi piba weebibine lipu cire jiwenipesi, weene lui cina maaje uli pana gemi?”

³² Rooma cubu biname cina cuta nuuja neeneni biname bine aacanisi Yeesu cama yepä padare cabu budre me wawename, yepä pui neeneni lui niijarage mule biname ge. ³³ Teepi iyeta liba pui puupu cabu me atyarige, ngii Mopekaake, puga Yeesu ne baarge uli cabu toto ca jibyecrisi. Teepi pui neeneni niija mule biname bine cuta uli cabu jăăbyecrisi, yepä biname Yeesu me camu poto ca, cuta nuuja teeme säwăci poto ca. ³⁴ Yeesu jejige egä, “Căme Babe, ai niija mule ne iyeblingti măăme ngene atwanena cabu ca, ingle teepi toraca umle lica gemi teepi ngena ne tewenenisi.”

Rooma cubu biname cina matimati kula cabu teeme ngii bine yoogăremisi, piba yiis-abăjemisi pui kula bine umle äbitame egä teepi lipulipu Yeesu me căbletăäpe bine abelename. ³⁵ Yoo, biname cina ire tăăpume imyemutemige. Israela mope biname cina teebine niija băăclena me jewenanisi, jejisi egä, “Tabe nuuja biname bine niija cabu ca yăăsecrăremuge, tabe miiji cuta teemămu ai niija cabu ca asata, tabe liba toraca Acejiyame bau ca jajeji gyene Keriso tăăpume!”

³⁶ Rooma cubu biname cina teebine cuta niija băăclena me jewenanisi. Teepi teeme mameta me eclige, caapocapo waina niije singi ge ceerame, ³⁷ piba jejisi egä, “Maane măămămu ai niija cabu ca asati, maane liba năă toraca Israela biname bime mopeyame gäte!”

³⁸ Yoo, ai oogăra mene teepi ecitisi Yeesu me baarge uli cabu mope gome egä, “Ai biname lui Israela biname bime mopeyame gyene.”

³⁹ Siige, yepä pui niija biname lui Yeesu me wajwa je acităneji ge, tabe cuta teebine jicnecige egä, “Maane lui Acejiyame me Keriso gäte, năă? Piba ai niija cabu ca asati, cuta piijepu cibibine nisati!”

⁴⁰ Yepä, pui nuuja te niinäceyame ne eblawăjige egä, “Năă, maane wălu lica gäte Acejiyame tăăpume? Mine iyeta yepä pana daremu cabu temi. ⁴¹ Mime daremu lui conocăco gyene, mime niija mule ibibi gyene, yepä tabe, nuuja niija mule ne lica ituge wawena. ⁴² Tabe puma cita ca Yeesu ne jejige egä, “Maane căme tăăpume ngene totwepi, maane liba biname bine waadename cire twaatnepi!”

⁴³ Yeesu teebine jejige egä, “Cane meebine naajenine, maane page cane cama naanenige Acejiyame me jamyacu lenaja puupu cabu.”

Yeesu me Budre

(Matayo 27:45-56; Mareko 15:33-41; Yoane 19:28-30)

⁴⁴ Yoo, bimü duusa liba äbitige, bimü te gawe me lica sepa-clyărige, krokeciije te iyeta gawe ne sicwabige nesae awa cama. ⁴⁵ Pui padare cabu baborage căbletăäpe lui iiwăreja mete cabu atecwanteji ge, pui te äderărige, siige neeneni pargi äbităsi. ⁴⁶ Yeesu piba babo ala abayige egä, “Căme Babe, căme seemo ne măăme ime cabu ecitenine!” Tabe peei mene jüicige, siige budre äbitige.

⁴⁷ Yoo, Rooma cubu biname bime mope biname te liba peei mule ne jepănige, Acejiyame ne ewepyerăjige egä, “Toraca, ai lui conocăco biname ge!”

⁴⁸ Yoo, iyeta lui biname cina abasecretnige puma ireme, teepi liba peei mule ne jepănisi, iyeta piba dare adnaninisi, ngenecu măpu cama äcnărige mete me. ⁴⁹ Yepä, iyeta lui cina umlerage gemi Yeesum tăăpume, cuta piijepu lui mabege cina ten cama seclumi Galilaya Probins cabu ca, teepi cudecewe pana amyemuteji icrajige peei mule bine păpăname.

Yeesu ne Gape cabu Ecitisi

(Matayo 27:57-61; Mareko 15:42-47; Yoane 19:38-42)

⁵⁰⁻⁵¹ Puga ge yepä biname ngii Yoosepa, lui Israela biname bime matikolă cewe cabu ca, ngii Arimatea. Tabe conocăco, miiji biname ge lui Acejiyame me biname bine waadena padare ne jewagrijenige. Tabe Israela mutre biname bime abasecretna cabu ge, yepä singi lica ge teeme atrana piijepu waweneca Yeesu poto cidi me. ⁵² Tabe Pilato bau ädige, Yeesu me budrekaake tăăpume itinärige. ⁵³ Tabe piba Yeesu me budrekaake baarge uli cabu ca sitrungamtige, lecaleca căbletăäpe ca tope etnige, piba gape cabu isinglantige, puupu cabu ecitige. Pui gape lui kula uureji ge, kirece wawenăneji ge, piijepu lica ituge nuuja biname

ne acita puma. ⁵⁴ Bimu lui Fraide ge, Sabade bimu me amacetrnäja bimu, piyepu teeme Sabade bimu mameta ge atyaramta.

⁵⁵ Pui magebi lui cina Yeesu cama seclumi Galilaya Probins cabu ca, teepi Yoosepa cama eclige, gape ne engrärisi, ewatnäjisii Yeesu me budrekaake lipu ge acitäneji puma. ⁵⁶ Teepi piba mete me äcnärige, miiji lengo ngängye bine emacetrnäjemisi teeme tääpe ne ingwe ca piba apyacame.

Yepä, Israela biname bime Sabade bimu cabu teepi ngene oocinisi teeme cotre lipu jiiucisi.

24

Yeesu Budre cabu ca Arpinantige

(Matayo 28:1-10; Mareko 16:1-8; Yoane 20:1-10)

¹ Sande krokerage, pui magebi cina lui miiji lengo gwidape bine tewenimumesi, teepi pui cama gape me eclige. ² Teepi puma jepänisi egä kula te apeträngteji ge gape gaabe cabu ca, ³ siige ebänisi, yepä Yageyame Yeesu me budrekaake ne lica jepänisi. ⁴ Teepi puga jeclajutemige maramara ngene atwanena cama, piba taatu neeneni biname cina apaclyäreji cäbletääpe cama teeme gome jaacclajutige. ⁵ Magebi cina wälu name pi ergo eciretnemige gawe me. Pui neeneni cina teebibine jejemäsi egä, “Weene ngenome gape cabu ireclota biname ne jirngeniye? ⁶ Tabe ama lica gyene; tabe barpinantige ireclota me! Yoo, weene ngene jotwineye tabe lui mene weebibine ituge jaji weene liba Galilaya je egä, ⁷ ‘Cane lui te Acejiyame bau ca tädujine, biname me äbitujine, cane miiji niyaniya mule biname bime ime cabu lenajame. Teepi cebine baarge uli cabu pa näbyecrepesi budre me, yepä nesae me lui bimu cane pa larpinantepene ireclota cama.’”

⁸ Magebi cina pui mene piba ngene jotwinisi, ⁹ gape cabu ca täcnärininisi, peei mule ne jeitnäjisii pui lebin abiberäja bägrä bime bau me piyepu iyeta bime bau me lui cina ten cama ge. ¹⁰ Pui magebi lui Mariya Magadala, Yoana, naabi Mariya Yakobu me mage, cuta piyepu potu lui ten cama ge. Yoo, teepi peei mule potu cidi me ätjepäneji biname bine jejemisi, ¹¹ yepä pui magebi bime mene teepi lica jitrungemisi, ingle apu jengemige egä walya mene ge. ¹² Yepä, Peteru te abujängtige, gape gome me uuwamige. Puga gape cabu me äcupige, apemmeläjige, cäbletääpe taatu bine jepänemige lui ca teeme tääpe ne tope setnumesi. Tabe piba mete me acnenutige, mage ngene jotwananige ngena te bii bäbitige.

Yeesu Neeneni Biname cabu me Aboclomtige Emaus Gaabe cabu

(Mareko 16:12-13)

¹³ Pui yepä bimu cabu, neeneni Yeesu me biname cina Emaus cewe me aalige. Peei lui cebocebo bimu me otni ge Yerusalema cabu ca. ¹⁴ Teepi mene abaitnenäsi iyeta gwidape potu cidi me lui cina pui nesae bimu cabu täbitimesi. ¹⁵ Egäcäro teepi liba mene ajana piyepu ätemleja cabu ge, Yeesu piba mameta me tädige, piyepu ten cama gaabe cabu ädige. ¹⁶ Yepä, teepi biname taatu jepänäsi, äblicäco teebine opo awatna. ¹⁷ Yeesu teebibine äätemlige egä, “Weene ngena potu cidi me jiienenemiye gaabe cabu?”

Teepi puma cita ca ngenecu mäpu cama äämyemutige. ¹⁸ Teeme yepä te, ngii Kleopa, teebine jejige egä, “Maane pama yepä taatu biname gäte Yerusalema cabu ca lui te umle lica ngena mule cina täbitimesi ai nesae bimu ngalebora!”

¹⁹ Tabe äätemlige egä, “Ngena mule?”

Teepi jejemige egä, “Pui mule cina Yeesu Nasareta ceweyame tääpume lui cina täbitimesi. Pui biname te Acejiyame me mename biname ge. Tabe kokre ciitaca mule bine jaawenemuge, piyepu kokre cama mene jaajanemuge. Iyeta biname cina teeme kokre ne opo sewatnumesi egä Acejiyame bau ca ge. ²⁰ Cime modamoda iiwäreja biname piyepu nuuja mope biname cina teebine Rooma ca mope biname me ime cabu secitumesi budre tääpume. Piba Rooma cubu biname cina teebine baarge uli cabu tbyecrumesi. ²¹ Yoo, cime cime ngene atwana teeme cabu itu yaacitopesi egä tabe pama peese nyene biname Israela biname bine niya cabu ca äsecerame. Cuta peei taatu lica, page lui nesae me bimu gyene peei mule ingwe ca. ²² Page potu magebi cime tomi cabu ca teepi cibibine mutäcäco me niwenininisi. Teepi liba krokerage gape gome eclige, ²³ teeme budrekaake ne lica jepänisi puma. Siige, teepi täcnärige, cibibine nijininisi egä neeneni mename seemo bine jääpänsi lui cina teebibine jejemäsi egä Yeesu ireclota gyene. ²⁴ Yoo, piba potu cime tomi cabu ca gape ne engrärisi. Teepi iyeta gwidape bine pepu jepänemisi magebi cina lipu jiiemisi, yepä teepi Yeesu ne lica jepänisi.”

²⁵ Yeesu piba teebibine jaajige egä, “Weene lipu pi umle cäco gegi? Weene däägudägurage joomleniye sasa mename biname bime mene! ²⁶ Weene cire umle läbitejiye egä biname bime niya cabu ca äsecerera biname te miiji mäpurage padare ne päpäna, piba peei cabu ca jamyacu apaclyera padare cabu me abacitame.” ²⁷ Puma cita ca Yeesu teeme tääpume

eboclomäjige iyeta mene lui teeme poto cidi me oogäräneji gemi. Tabe gije abacitige mene cabu ca Moose lui bine itu soogäremuji, puma cita ca teeme mene te otnige iyeta sasa mename biname bime cabu ca.

²⁸ Siige, teepi lui cewe me singi otni, pui mameta me atyaränisi, piba Yeesu tabe otni taatu äbitige, ²⁹ yepä teepi teebine jibbecläsi, jejäsi egä, "Maane cine cama naanajegel! Bimu te mameta gyene äpula, krokeciye me äbitenige." Peei name pi tabe teeme mete me abacitige ten cama lenajame. ³⁰ Tabe ten cama dade cabu adnatige, buluduu ne ecatige, Acejiyame ne eso ecäriige, piba itrecige, ääcäriige teebibine. ³¹ Teeme irecu piba pajecu me äbitininisi, siige teebine opo ewatnäsi, yepä tabe puma cita ca teeme bau ca äyeblingtige. ³² Teepi piba teemeteme ajanäsi egä, "Toraca, mime ngenecu cina niclonige gaabe cabu, tabe liba mene nijanige piyepu Oogäräneji Mene bine mime tääpume eboclomäjemigel!"

³³ Teepi dade gome ca wata abujengtäsi, Yerusalema cewe me acnenutäsi, puga edäremäsi pui lebin abiberäja bägrä bine piyepu ten cama lui biname cina abasecretlige. ³⁴ Puma iyeta jaajisi teebibine egä, "Yageyame te toraca barpinantige! Tabe Simona bau bii taboclomtigel!"

³⁵ Piba pui neeneni cina teebibine jejemäsi teeme tääpume ngena te äbitige gaabe cabu, piyepu teepi lipu Yageyame ne opo ewatnäsi, tabe liba buluduu ne itremantige.

*Yeesu Aboclomtige Teeme Abiberäja Bägrä bime bau me
(Matayo 28:16-20; Mareko 16:14-18; Yoane 20:19-23; Apostolo 1:6-8)*

³⁶ Teepi liba peei mene cabu jage, piba taatu Yageyame Yeesu te teeme gome jeclajutige, teebibine jejemige egä, "Poodde weene cama yaanajegel!"

³⁷ Teepi calu te jitemige wälu name pi, ingle teepi apu jenge-mige egä, "Cable gyene ai!" ³⁸ Yepä, tabe teebibine jejemige egä, "Weene ngenome ngenecu jiclonininige? Ngenome neeneni ngene atwanena cama gemi?" ³⁹ Jepänemeye cäme ime piyepu cäme ernge. Cane säne! Cebine noomleye, piba umle äbitiniyiye, ingle cable te lica mäju piyepu kaake cama ge, weene cebine lipu näpäneniye tääpe cama."

⁴⁰ Tabe peei mene jejemige, teeme ime ernge jewabemige. ⁴¹ Siige, teepi camuge cängena ätrunga, ingle teepi mutäcäco äbitininisi gege name pi. Tabe peei name pi teebibine itinäriige egä, "Nää, deedei pisi nyene?" ⁴² Teepi teebine toce cibü ecärisi, ⁴³ tabe ecatige, siige teeme opo gaabe je erngige.

⁴⁴ Tabe piba teebibine jejemige egä, "Age tema pui mule cane lui poto cidi me weebibine ituge jaji liba weene cama nanajepi. Yoo, cane apu jijipene egä iyeta Oogäräneji Mene cäme poto cidi me miiji ibibi me äbita; apu ge pui mene Moose lui itu soogäremuji, piyepu mename biname lui mene soogäremujisi, cuta piyepu iyeta Salamo uupera cabu lui mene."

⁴⁵ Tabe piba teeme ngene atwanena jiiitemige Oogäräneji Mene cängena umle äbitame. ⁴⁶ Tabe teebibine jejemige egä, "Apu mene oogäräneji ge egä, Keriso, Israela biname bime niya cabu ca äsecrera biname te miiji mäpu piyepu budre päpäna, piba nesae bimu ingwe ca cirege arpinenta budre cabu ca. ⁴⁷ Cuta apu oogäräneji ge egä, biname cina miiji ai mene jajanena iyeta mene maramara biname bine. Pui kaakesea miiji Yerusalema cewe cabu gije abacitame, piba cuta jajanena iyeta poto ta. Teepi miiji biname bine jajanena egä biname lui cina niya mule cabu ca latatrongärininusi piyepu cebine nätrungusi, Acejiyame teeme niya mule bine pa yäyeblingemepi teebibine teeme biname me wawenecame. ⁴⁸ Weene lui ire arbi biname gemi iyeta ai mule poto cidi me. ⁴⁹ Yoo, cane weeme bau me pa tätyepepene cäme Babe te lui ne ituge jaji weebibine ceerame, peei lui Aceji Seemo gyene. Yepä, weene ama ai babo cewe cabu inajininige ngälu teeme kokre te cabucewe ca pa täinepi weeme cabu me."

*Yeesu ne Ecatige Cabu me
(Mareko 16:19-20; Apostolo 1:9-11)*

⁵⁰ Yeesu teeme abiberäja bägrä bine ewademige Yerusalema cabu ca Betaniya cewe mameta me. Puma tabe ime aawepäntige miiji ne acitame teeme cabu me. ⁵¹ Egäcäro teebibine miiji ecäremige, tabe teebibine sebmalemige. Acejiyame me kokre te teebine cabu me ewepäntige. ⁵² Abiberäja bägrä cina teebine ewepyeräjisi, piba babo gege piyepu ngenecu miiji cama äcnäriige Yerusalema cewe me. ⁵³ Teepi iiwäreja mete caale bora yaacrajuge, puga Acejiyame ne eso yäcäranusi.

Siige mene ngälu peese.

YOANE ME MIJI MENE

Mene Lui Biname Gyene

¹ Gawecewe te cäro camu ge aci, Mene te uja ge. Mene te Acejiyame cama ge, tabe Acejiyame ge. ² Agedna me niinäce gaabe me tabe lui Acejiyame cama ge. ³ Iyeta gwidape bine Acejiyame teeme cabu ca jevenimujji; teeme cäco je nuuja gwidape te lica äbituji. ⁴ Teeme cabu ireclota puga ge; pui ireclota lui apaclyera ge biname bime täápume. ⁵ Pui apaclyera te krokeciye cabu me tuungepmalenige, yepä biname lui cina krokeciye cabu je, teepi opo lica ituge awatna pui apaclyera ne.

⁶ Acejiyame te tityepuji biname ngii Yoane ne ⁷ pui apaclyera ne aitnejame naace täápume iyeta biname cina teebine ätecijame piyepu ätrungame. ⁸ Tabe te lica ge pui apaclyera, tabe yepä jeitnäjuji teebine. ⁹ Toraca apaclyera, lui te iyeta biname bine saapaclyäremuge, täduji gawecewe cabu me. ¹⁰ Tabe gawecewe cabu jage, Acejiyame lui ne teeme cabu ca jewenuji, yepä biname cina teebine opo lica ewatnujisi. ¹¹ Tabe teemerage gawe cabu me täduji, yepä teemerage biname cina teebine lica ecatuji. ¹² Yepä lui cina teebine ecatuji piyepu jitrungujisi, tabe teebibine conocäco ecärimuji Acejiyame me bägräwale täápume. ¹³ Teepi Acejiyame me bägräwale me epu lica äbitinujisi, biname bime cabu ca lipu laplimlinusi binamerage babe me bägrä me, yepä tabe Acejiyamerage te jevenimujji teeme bägräwale me.

¹⁴ Yoo, Mene te äbituji biname me, mine cama senajenäjumi. Tabe lui Babe me japurage Bägrä ge. Mine jepänujisi kokre ne, Babe te lui secäruji teebine. Tabe lui toraca piyepu owecu biname ge. ¹⁵ Yoane te teebine jeitnäjuji, ala abyanuji egä, “Age sena, cane lui täápume jiiicepene egä: Cäme ingwe poto ca lui te pa tädepi, baborage gyene cäme bau ca, ingle cane liba camu ge aplimla, tabe piba Babe cama jage.”

¹⁶ Tabe baborage owecu mime täápume, peei name pi tabe bucurage müjimiji mule bine tewenemäjumi mime täápume. Tabe iyeta padare cabu miiji niwenenanimi. ¹⁷ Acejiyame te Cotre mene secäruji Moose ne, yepä Yeesu Keriso te taacanuji owecu mule ne piyepu toraca mule ne. ¹⁸ Nuuja te lica ituge Acejiyame ne päpäna, yepä teeme japurage Bägrä, lui te Acejiyame cama yepä gyene, piyepu lui te Babe gome enajenige, tabe te teebine biname bime cabu me sebolomtjuj.

Yoane Niye ca Äciseja Biname te Yeesu ne Jeitnäjige (Matayo 3:1-12; Mareko 1:1-8; Luuka 3:1-18)

¹⁹ Israela biname cina Yerusalema ca jityepimisi iiwäreja biname bine piyepu Leebi me ingle cabu ca biname bine Yoane bau me teebine ätemlame egä, “Maane laasi näte?” ²⁰ Yoane lica ainige, yepä tabe cängenarage awabudnitige egä, “Cane Keriso lica gäne, Acejiyame te lui ne äteypame tiicuji biname bine niija cabu ca äsecrerame. Cane pui lica gäne.” ²¹ Teepi piba itemlisi egä, “Cije maane laasi näte? Maane nää Acejiyame me mename biname Eliya säte?” Tabe jejemige egä, “Eewe, cane Eliya lica gäne.” Teepi cuta itemlisi egä, “Nää, maane pui mename biname gäte, cine lui ne jewagrijenisi?” Tabe jejemige egä, “Eewe, cane tabe lica gäne.” ²² Teepi puma cita ca jejisi egä, “Nijini toracarage, maane laasi näte, cine piba daremu mene jewecnistenemisi, lui cina cibibine nityepinisi. Maane lipu ngenen jotwananenite, egä maane laasi näte?” ²³ Yoane jejemige teebibine mename biname Isaya me mene ca egä, “Cane age säne pui biname, lui te ala abyanenine daapo taatu cewe cabu ca egä, ‘Gaabe ne conocäcorage emacetnäjeye Yageyame me otni täápume!’”

²⁴ Pui biname cina seclige Yoane bau me, ingle Parisea sigu biname cina tityepimisi. ²⁵ Yoo siige, teepi cuta teebine itemlisi egä, “Cije maane piba ngena täápume biname bine niije ca jääcisäjemute, maane liba Keriso lica gäte, coo liba Eliya lica gäte coo piyepu pui Acejiyame me mename biname, cine lui ne jewagrijenisi?” ²⁶ Puma cita ca Yoane teebibine jejemige egä, “Cane niye ca biname bine jicisäjenenemine, yepä weene cama pisi nyene nuuja biname, weene lui täápume umle lica gemi. ²⁷ Tabe cäme ingwe gaabe ca teeme kaakesea ne tegedninige, yepä tabe baborage gyene cäme cabu ca. Cane ibibi lica gäne teeme ernge gwidape sea bine iibirame.” ²⁸ Ai mule te äpletnutige Betaniya cewe je Yoridana baduge me bimu acita gome ca, Yoane luma biname bine niye ca jicisäjemige.

Acejiyame me Maamoi

²⁹ Nuuja bimu cabu Yoane jepänige Yeesu ne otni je teeme bau me, siige tabe jiiicige egä, “Ire, Acejiyame me Maamoi peese nyene, gawecewe me niija ne lui te pa yaacatepi. ³⁰ Tabe sine pui biname, cane lui täápume tiicumene egä, ‘Cäme ingwe gaabe ca biname te pa tädepi, yepä tabe baborage gyene cäme bau ca, ingle cane liba camu ge aplimla, tabe uja Babe cama

jage.’ ³¹ Cane cuta niinäce umle lica ge, tabe laati tage, yepä cane puu gije labacitepene Israela biname bine niije ca äcisejame teepi umle äbitame teeme poto cidi me.”

³² Puma cita ca Yoane Yeesu ne jeitnäjige egä, “Cane jepänine Aceji Seemo ne äina je cabucewe ca gimäe ele pana siige teeme papa cabu lenaja je. ³³ Cane umle lica ge tabe, yepä Acejiyame lui te cebine nätyepepi biname bine niije ca äcisejame, tabe najepi egä, ‘Maane lui me papa cabu pa jepänepi Aceji Seemo te äina je siige teeme papa cabu lenaja je, tabe peese nyene, lui te biname bine Aceji Seemo ca pagege äciseja.’ ³⁴ Cane siige ai mule ne tepänumene, siige jeitnäjine, egä tabe peese nyene Acejiyame me Bägä.”

Yeesu me Niinäce Abiberäja Bägä

³⁵ Nuuja bimu cabu Yoane niije ca äciseja biname cääri cuta puga ge teeme neeneni abiberäja bägä sama. ³⁶ Tabe liba Yeesu ne jepänige teebibine äsuplengta je, tabe jaajige egä, “Ire, Acejiyame me Maamoi peese nyene!” ³⁷ Teeme neeneni abiberäja bägä cina liba äätecijige tabe apu iicana je, teepi Yeesu me ingwe poto ca aaclige. ³⁸ Yeesu tatatrongtige, jääpäniige teeme bau me otni je, äätemlige egä, “Baa, weene ngena ne jirngeniye?” Teepi jejäsi egä, “Raabi, maane luma naanajiniige?” (Raabi me aboclomta mene lui ‘Abiberäja biname.’) ³⁹ Tabe jaajige egä, “Siclege päpäname.” Teepi aaclige, siige jepänäsi teeme lenaja puupu ne. Ai mule te äbitige mämle bimu me, siige teepi pui bimu ne epiräsi Yeesu cama lenaja je.

⁴⁰ Yoo, Yoane me mene lui neeneni biname cina äätecijige, siige Yeesu cama aaclige, teeme yepä lui Andrea tage. Andrea lui Simona Peteru me igane ge. ⁴¹ Teeme otni ingwe ca ge, tabe niinäce teeme naane Simona ne jirngige, jejige egä, “Cine Mesaya ne bii jepänago. Tabe peese nyene biname, lui te biname bine niija cabu ca cirege äsecreta.” (Mesaya me aboclomta lui yepä gyene Keriso cama.) ⁴² Siige Andrea te Simona ne Yeesu bau me ecanige. Yeesu ire acitige teeme cabu me, jejige egä, “Maane lui Simona säte, Yoane me bägä. Cane meebine ngii naainenine Keepa ca.” (Keepa Griik mene ca lui Peteru, lui me aboclomta mene egä ‘Kula’.)

Yeesu Ala Taasoglicige Pilipo naabine Natanaela

⁴³ Nuuja bimu Yeesu ngena jotwanige Galilaya probins me otnime. Puma cita ca tabe Pilipo ne jepänige, jejige egä, “Tädi cane cama otnime!” ⁴⁴ Pilipo lui Betesaida ceweyame ge, Andrea naabi Simona luma cita ca ge. ⁴⁵ Pilipo Natanaela ne jepänige, jejige egä, “Cine pui biname ne jepänisi, Moose lui poto cidi me ituge Cotre cabu mene iicana, piipepu cuta Acejiyame me mename biname cina lui poto cidi me ituge oogära. Tabe lui Yeesu sine, Yoosepa me bägä Nasareta babo cewe cabu ca.” ⁴⁶ Natanaela Pilipo ne itemlige, “Nää, nuuja miiji gwidape miiji gyene pepu papa cewe ca otni Nasareta liiyepu?” Pilipo jejige egä, “Maane tädi äima päpäname!” ⁴⁷ Yeesu liba jepänige Natanaela ne teeme bau me otni je, tabe jiicige teeme poto cidi me egä, “Ai biname lui toraca Israela biname gyene. Teeme cabu nuuja walya lica gyene.” ⁴⁸ Natanaela Yeesu ne itemlige egä, “Maane lipu umle gäte cane?” Yeesu jejige egä, “Cane niinäce meebine nääpäniine piigi uli gawe je, Pilipo ingwe ca ala naasoglicige.” ⁴⁹ Puma cita ca Natanaela teebine jejige egä, “Abiberäja biname, maane Acejiyame me Bägä gäte! Maane Israela biname bime mope bime gäte!” ⁵⁰ Yeesu Natanaela ne jejige, “Maane naace name pi cebine nätrungenite, ingle cane lipu naajine, egä cane meebine nääpäniine piigi uli gawe je. Ai puu matikäli mule gyene, yepä ebä pagege maane modamoda mule bine päpänenä. ⁵¹ Cane toraca jijenine weebibine, egä weene cabucewe ne pagege päpäna iitneji, siige Acejiyame me mename seemo cina page yaaclepi cabu me cuta puma cita ca page täinetnepi biname cabu me, Acejiyame bau ca lui te täduji biname me äbituji.”

2

Atejächmuta Soriyomu Kaana Cewe je

¹ Nesae bimu ingwe gaabe ca atejächmuta soriyomu puga ge Kaana cewe je Galilaya probins ngalebora. Yeesu me mage puga ge, ² cuta Yeesu ne teeme abiberäja bägä sama ituge ala asogleca. ³ Biname cina liba deedei loolo cabu jage, waina niije te piba apirige. Puma cita ca Yeesu me mage te teebine jejige egä, “Teeme waina niije lica gyene.” ⁴ Yeesu teeme mage ne jojige, “Magebi, maane cebine gone jaji cane ngena wawenname. Cäme padare te lica bii tatyaramtige.” ⁵ Yepä mage te kaakesea bägä bine jejemiige egä, “Weene jeweneye, Yeesu ngena tääpume jijeniniige.”

⁶ Teeme Israela biname bime cotre puga ge teepi lipulipu äcisejame cude gwidape oomlana cabu ca. Ai ingle name pi pui mete cabu puga ge kula ca wawenäneji siks modamoda niije ängärena gwidape; teepi iyeta ibibi ge yepä hanred liita niije tääpume. ⁷ Puma Yeesu kaakesea bägä bine jejemiige, “Weene ai bine niije jengäremeyel” Teepi siige jengärimisi, ngälu tapananinisi. ⁸ Piba tabe teebibine jejemiige, “Weene niije siitete ängära

gwidape cabu ca, ecaneye deedei ire atwi biname bau me.” Siige kaakesea bägrä cina ängära gwidape cabu ca niye siitisi, ecanisi deedei ire atwi biname bau me. ⁹ Tabe liba mite eglige, niye te uja waina niye me bäbitige. Laatibi siitisi niye ne, teepi umle ge, egä waina niye luma cita ca gyene, yepä deedei ire atwi biname te tabe umle lica ge. Peei name pi tabe ala tesoglicige mamye rooriye ne, ¹⁰ jejige egä, “Mime mule gyene soriyomu biname bine miiji waina niye niinäce ceera, siige teepi liba bucurage yäänäjimusi, ingwe ca piba yääcāranemusi papa waina niye. Maane lipulipu miijirage waina niye ne ewetnite ceräcerägääbu ceerame?”

¹¹ Yeesu ai teeme niinäcerage ciitaca mule ne jewenige Kaana cewe je Galilaya probins ngalebora. Apu pi tabe teeme kokre ne eboclomtige, siige teeme abiberäja bägrä cina teebine jitrungisi.

¹² Ai ingwe gaabe ca Yeesu ädige Kaprenauma cewe me teeme mage, iganewale piyepu abiberäja bägrä cama. Teepi puga icrajige nesae bimu cama.

Yeesu Ädige Iiwäreja Mete me

(Matayo 21:12-13; Mareko 11:15-17; Luuka 19:45-46)

¹³ Israela biname bime äsuplengta soriyomu padare te liba mameta ge Yeesu piba ädige Yerusalema me. ¹⁴ Puma tabe abacitige iiwäreja mete caale bora me, siige jepänimige biname bine kau, maamoi piyepu gimäe ele bine aletnena je iiwäreja täapume. Tabe cuta jepänimige rarekaake äbasuwäja biname adnatäreji ge teeme dade gome. ¹⁵ Puma cita ca tabe seea bine sigu jewenimige, siige teebibine teeme kau piyepu maamoi cama iyecräjemige iiwäreja mete caale bora ca. Piba tabe rarekaake äbasuwäja biname bime rarekaake bine jeglemeläjimige gawe cabu me piyepu teeme dade bine eboclomäjimige. ¹⁶ Gimäe bine lui cina aletname saawadanemusi, tabe teebibine jejemige egä, “Gimäe bine isemey! Weene cäme Babe me mete ne gone jeweneniye aletnaletna puupu me!” ¹⁷ Abiberäja bägrä cina liba jepänisi, Yeesu ngena jewenige, teepi ngena jotwinisi mene lipu oogäräneji gyene egä, “Cäme ngenecu nabenige Acejiyame me mete täapume.”

¹⁸ Israela modamoda biname cina liba jepänisi Yeesu ngena jewenige, teepi itemlisi egä, “Maane ngena ciitaca mule ne jewenite cine päpāname, egä määme conocāco pisi nyene ai mule ne wawename?” ¹⁹ Yeesu jejemige egä, “Ai iiwäreja mete ne yigarecepeye. Cane te nesae bimu cama cääri pa yaarangepene.” ²⁰ Teepi teeme mene ingle ne opo lica ewatnisi, siige jejisi egä, “Ai iiwäreja mete ne lui footisiks kāmäge ngalebora erangujisi. Nää, maane te nesae bimu cama pa perangepi?”

²¹ Yepä Yeesu pui iiwäreja mete poto cidi me lica jiiucuji, yepä tabe teeme täape poto cidi me jiiucuji. ²² Ingwe gaabe ca tabe liba budre cabu ca arpinantuji, teeme abiberäja bägrä cina piba ngena jotwinujisi teeme ai mene, siige teepi jitrungujisi lui mene oogäräneji gyene, cuta teepi jitrungujisi Yeesu ngena ituge iicana.

Yeesu Umle Gyene Biname cina Lipu Gemi

²³ Yeesu liba Yerusalema je puga ge äsuplengta trii padare cabu, bucurage biname cina teebine jitrungisi, teepi lipu jepänisi tabe lui ciitaca mule bine jewenimige. ²⁴ Yepä Yeesu lica awabudni-tige biname bime bau me, ingle tabe umle ge, teepi iyeta lipu gemi. ²⁵ Yeesu singi lica ge nuuja te teebine umle wawename, egä biname lipu gemi, ingle tabe iyeta umle ge teeme poto cidi me.

3

Yeesu piyepu Nikodemo

¹ Puga ge yepä Parisea sigu biname ngii Nikodemo. Tabe Israela biname bime yepä mutre biname ge. ² Ciye cabu tabe Yeesu bau me ädige, jejige egä, “Raabi, cine umle gemi, egä Acejiyame te meebine näätpepuji abiberäjame. Nuuja te äblicāco gyene apu ciitaca mule bine wawenena maane lui bine jewenenemite, liba Acejiyame lica gyene teta cama.”

³ Yeesu teebine jejige egä, “Cane toraca naajenine, biname te liba kirece lica laplimluge, tabe äblicāco äbita biname me, Acejiyame lui ne yaacanuge.” ⁴ Yepä Nikodemo Yeesu me mene opo lica ewatnige, siige itemlige egä, “Babo biname te lipulipu cääri laplimluge? Tabe äblicāco mage me came bora me abacita cuta cääri aplimla täapume!” ⁵ Yeesu jejige egä, “Cane toraca naajenine, biname te liba lica birige aplimla niye piyepu Aceji Seemo cabu ca, Acejiyame te lica teebine acana. ⁶ Biname me täape laplimluge mage cabu ca, yepä Acejiyame me Seemo te teeme seemo ne ireclota yääcäruge. ⁷ Peei name pi cālu te gone näätuge, cane lipu naajine, egä weene miiji kirece aplimla. ⁸ Buuwe te singi liiye yene, tabe piyeme jääpawäuge. Weene mumwāmu itecijinuge, yepä weene umle lica gemi, luma cita ca tädenige coo liiyeme ädenige. Pepu gyene biname bime täapume, lui cina Aceji Seemo cabu ca laplimli-ninusi.”

⁹ Nikodemo Yeesu ne itemlige, “Peei lipu gyene?” ¹⁰ Yeesu jejige egä, “Maane Israela biname bime abiberäja biname gäte, maane lipulipu umle lica gäte ai poto cidi me! ¹¹ Cane toraca naajenine meebine, egä cine jii cemusi, cine lui täapume umle, cuta jaaitnimusi cine lui bine jääpänimusi, yepä weene lica yaacatu ye cime mene ne. ¹² Weene cebine lica nätrungu ye, cane liba jijananimusi ai gawecewe me mule poto cidi me; weene piba lipulipu cije ätrunga cebine, cane liba jijananimusi cabucewe me mule poto cidi me. ¹³ Nuuja te lica ituge otni cabucewe me, yepä Acejiyame bau ca lui te täduji biname me äbituji, tabe taatu ge.

¹⁴ Moose te daapo taatu cewe cabu cobyame ne ewepäntuji cabu me. Lui cina pui cobyame cabu me ire acranininujisi, teepi ireclota icrajuji. Cuta pepu pana pagege baarge uli cabu awepenta teebine, Acejiyame bau ca lui te täduji biname me äbituji, ¹⁵ siige iyeta lui cina teebine jäätrungusi, teepi iyeteta ireclota ne birige päpäna. ¹⁶ Acejiyame te epu babo singi ge biname bime täapume, egä tabe teeme japurage Bägrä ne tityepuji, siige laati te liba teebine jäätrunguge, tabe lica birige apesera yepä tabe iyeteta ireclota ne päpäna. ¹⁷ Acejiyame te lica teeme Bägrä ne tityepuji ai gawecewe cabu me biname bine atraname niya puupu cabu me otnime, yepä tabe naace täapume tityepuji tabe teebibine niya cabu ca äsecrerase. ¹⁸ Laati te teebine jäätrunguge, Acejiyame te lica pui biname ne jaatranuge. Yepä laati te lica jäätrunguge teebine, pui biname ne uja ituge atrana, ingle tabe lica ituge ätrunga acita Acejiyame me japurage Bägrä me ngii cabu me. ¹⁹ Teepi atranäneji gemi, ingle apacylera te itu täduji ai gawecewe cabu me, yepä teepi singi lica ge apacylera täapume; teepi krokeciye täapume singi, ingle teeme mule lui niyarage gemi. ²⁰ Iyeta lui cina niyaniya mule bine jaawenimusi, teepi apacylera ne jäägyusi. Teepi lica saacluge apacylera cabu me, cije apacylera te teeme mule bine jaawabudnemuge. ²¹ Yepä laati toraca mule bine jaawenimusi, teepi apacylera cabu me saacluge, siige apacylera te jaawabudne-muge, egä teepi lui mule bine jaawenimusi, Acejiyame me singi ibi gemi.”

Yeesu piyepu Yoane Niye ca Äciseja Biname

²² Ai ingwe gaabe ca Yeesu teeme abiberäja bägrä cama ädige Yuudea probins cabu me. Tabe puga teta cama enajige matikolä padare cabu, biname bine niye ca jicisäjemige. ²³ Yoane cuta niye ca biname bine jicisäjemige cewe ngii Aenona je lui Salima cewe mameta ge, ingle baborage niye puga ge, siige biname cina totnini Yoane bau me niye ca äciseja täapume. ²⁴ Yoane ne camu ge pui padare cabu krokeciye mete cabu me äsinglenta.

²⁵ Puma cita ca Yoane me abiberäja bägrä cina gije abacitinisi yepä Israela biname cama äcelame teeme Israela biname bime äciseja mule poto cidi me, teepi lipulipu cude gwidape cabu ca kälyä läbitaninusi. ²⁶ Siige teepi seclige Yoane bau me, jejisi egä, “Abiberäja biname, maane cama lui biname tage Yoridana baduge nuuja poto doro ca, maane lui ne teitnäjumete, tabe cuta page biname bine niye ca jicisäjenenemige, siige bucurage cina piyeme otneninini teeme bau me.” ²⁷ Yoane jejemige egä, “Nuuja biname te äblicäco pepu mule ne acata, Acejiyame te liba lica yääcäruge teebine. ²⁸ Weene weemänu ituge ätecija, cane lipu itu jii cepene, egä cane Keriso lica gäne, Acejiyame te lui ne ätyepa biname bine niya cabu ca äsecrerase, yepä cebine teeme niinäce gaabe me ituge ätyepa. ²⁹ Mamye magebi lui mamye rooriye täapu mwene. Yepä mamye rooriye me biname lui te jaaclajutuge teeme gome, teeme mene jäätecijuge, tabe gege birige teeme tagepogogo ätecijame. Yeesu lui mamye rooriye pana gyene, peei name pi cane babo gege gäne teeme täapume. ³⁰ Tabe miiji baborage me äbita, cane matikolä me äbita.

³¹ Lui te cabucewe ca täduji, tabe sine baborage iyeta bime cabu ca. Lui te gawecewe cabu ca gyene, tabe gawecewe täapu myene, siige gawecewe mule poto cidi me jii cemimuge. Yepä cabucewe ca lui te täduji, tabe baborage gyene iyeta poto bime bau ca. ³² Tabe eei bine jeitnäjenenemige, tabe lui bine ituge päpänenä piyepu tabe lui poto cidi me ituge ätecijana, yepä biname cina lica ecatisi teeme aitneja ne. ³³ Yepä laati te liba yaacatuge teeme mene ne, tabe jaawabudnituge, egä Acejiyame lui toraca gyene. ³⁴ Acejiyame lui ne tityepuji, tabe Acejiyame me Mene jii cemimuge, ingle Acejiyame te teebine Aceji Seemo iyeta teeme kokre cama ituge ceera. ³⁵ Babe te singi gyene teeme Bägrä täapume, siige iyeta gwidape ituge acrana teeme ime cabu. ³⁶ Laati te Bägrä ne jäätrunguge, tabe iyeteta ireclota ne jääpänuge. Yepä laati te Bägrä ne lica jäätrunguge, tabe pui ireclota ne lica jääpänuge, yepä Acejiyame me claabe te yaanajuge teeme cabu.”

4

Yeesu piyepu Samariya Magebi

¹ Parisea sigu biname cina itecijemige, egä Yeesu bucurage biname bine niye ca jicisäjemige, Yoane nesae bine; cuta teeme abiberäja bägrä bucurage ge, Yoane me nesae ge. ² Puu Yeesurage te biname bine lica jicisäjemige yepä teeme abiberäja bägrä cina. ³ Yeesu

liba umle äbitige, egä Parisea sigu biname cina umle bäbitininisi ai potu cidi me, tabe Yuudea probins ne ebmalige, ädige Galilaya probins cabu me. ⁴ Tabe miiji ge Samariya probins cabu ta otni Galilaya probins ne oomlaname.

⁵ Tabe liba ädige, tabe atyaramtige yepä Samariya cewe ngii Suuka me. Pui cewe lui calwacupi mameta gyene, Yakobu lui calwacupi teeme bägrä Yoosepa ne ecäruji. ⁶ Yakobu me niye cupicu cuta puga ge. Yeesu worämu te joomlige, ingle lecaleca padare lipu otnige, siige tabe adnatige cupicu gome. Pui lui bimu duusa ge.

⁷ Puma cita ca yepä Samariya magebi te toclige niye iitaname. Yeesu jojige egä, “Cäme niye niiti nanime!” ⁸ Abiberäja bägrä puga lica ge. Teepi cewe me beclige deedei aletname. ⁹ Siige magebi te Yeesu ne jejige egä, “Maane lui Israela biname gäte, maane lipulipu najite cane Samariya magebi te mäame niye iitaname?” Tabe naace popi apu jejige, ingle Israela biname piyepu Samariya biname teepi cude padare ge. Teepi gigri deedei gwidape bine lica jääbämuyäjimusii.

¹⁰ Yeesu magebi ne jojige egä, “Maane liba umle cirege, egä Acejiyame te ngena bine miiji gyene ceera piyepu cane laasi näne lui te meebine niye täapume näätinärine, maane nätinärejite, cane ireclota niye nääcärejine meebine.” ¹¹ Magebi te jejige, “Babo biname, cupicu lui uuglerage gyene, cuta mäame iitana gwidape lica gyene; luma cita ca pui ireclota niye ne siitenite?” ¹² Nää, maane baborage gäte mime kaakesaare Yakobu bau ca, ai cupicu ne lui te nicärinuji? Tabe ama cita ca niye ne senajenäjumi, cuta teeme bägrä cina piyepu cuta teeme ngeerangera cibi cina.” ¹³ Yeesu jojige egä, “Iyeta, lui cina ai niye ne enenisi, pagege cääri niyemecewe jajwi. ¹⁴ Yepä laati te yaanuge, cane lui niye yäacärune, tabe ingwe ca lica pagege niyemecewe jajwi. Cane lui niye yäacärune, teeme cabu waja ne läbituge, siige tuudruge iyeteta ireclota täapume.” ¹⁵ Piba magebi te jejige, “Babo biname, näcäri pui niye! Piba ingwe ca cane lica pagege niyemecewe jajwi, cuta lica pa twaatnepene aima niye iitanenane.”

¹⁶ Yeesu jojige egä, “Äte, mäame rooriye ne serwojuti!” ¹⁷ Tabe jejige egä, “Eewe, cäme rooriye lica gyene.” Yeesu jojige egä, “Toraca gyene, maane lipu najite, egä mäame rooriye lica gyene. ¹⁸ Maane niinäce faib rooriye bine yaawadanemepete, page lui rooriye ne ecananenite, määmerage rooriye lica gyene peei. Maane peei toraca najite.” ¹⁹ Magebi te Yeesu ne jejige egä, “Babo biname, cane ngena ca naagline, egä maane Acejiyame me mename biname gäte. ²⁰ Cine Samariya biname bime kaakesaare cina ai podu cabu irecu lätumutanininusi Acejiyame bau me, yepä weene Israela biname cina jüicuye, egä Acejiyame ne miiji Yerusalema taatu je awejena. Maane lipu ngena jotwananenite ai potu cidi me?” ²¹ Yeesu jowecnistige egä, “Cäme mene nacati, padare te pa tädepi, biname cina liba lica Acejiyame bau me pagege irecu ätumuta ai podu cabu coo Yerusalema je. ²² Weene Samariya biname toraca umle lica gemi, weene laati bau me irecu lätumutanininuye, yepä cine Israela biname cina umle gemi, cine laati bau me irecu lätumutanininago, ingle Israela biname bime cabu ca gyene biname, lui te pagege biname bine niya cabu ca äsecrera. ²³ Padare te tädenige – siige uja bii tatyaramtige – liba toraca irecu ätumuta biname cina Acejiyame bau me pagege irecu ätumuta teeme seemo ca piyepu toraca ngena atwanena cama. Apu irecu ätumuta biname täapume Acejiyame singi gyene. ²⁴ Acejiyame lui Seemo gyene, siige laati teeme bau me irecu lätumutanininusi, teepi miiji irecu ätumuta teeme seemo ca piyepu toraca ngena atwana cama.”

²⁵ Puma cita ca magebi te Yeesu ne jejige egä, “Cane nata umle gäne, egä Mesaya, lui ne yaainusi Keriso ca, pagege otni, siige tabe te iyeta gwidape bine mime bau me pagege aboclomäja.” ²⁶ Yeesu jojige egä, “Cane age säne pui biname, lui te mene naajanenine.”

Abiberäja Bägrä cina Täcnärige

²⁷ Puirage padare cabu abiberäja bägrä cina tatyariige, cälu te jitemige, liba Yeesu ne jepänisi magebi cama mene icema je. Yepä nuuja te lica itemlige, egä tabe ngena täapume singi, cuta magebi cama ngena täapume mene jüicemenige. ²⁸ Puma cita ca magebi te teeme niye iitana gwidape ne ebmalige cupicu gome, oclige babo cewe me, siige biname bine jejemige puma egä, ²⁹ “Naaclege biname ne päpäname, lui te umle gyene iyeta, cane ngena ituge wawenetnäja. Nää pama Keriso sine, Acejiyame te lui ne ätyepame biname bine äsecrera niye cabu ca?” ³⁰ Siige teepi babo cewe ne sebmalisi, Yeesu bau me seclige.

³¹ Magebi te liba babo cewe jage, abiberäja bägrä cina piba Yeesu ne jejisi egä deedei äbitame. ³² Yepä tabe jejemige egä, “Cäme piti nemi deedei loolo me, weene lui täapume umle cäco gemi.” ³³ Abiberäja bägrä cina teemeteme jitraniisi, egä nuuja biname te pama bii tewadimige deedei teeme loolo me. ³⁴ Yeesu piba jejemige egä, “Cäme deedei lui eei gyene, cane teeme singi ne wawenane lui te cebine itu nätyepuji piyepu ämlitejame tabe lui kaakesea itu näcäruji cane wawenane. ³⁵ Weene jüiceniye egä, ‘Cerämu fooa mabye piti nemi piyeme ärucna padare oomla-name.’ Yepä cane jüiceniye, egä calwacupi bine

jepänemeyel! Iyeta gwidape kuu cama gemi ärucna tääpume. ³⁶ Siige ärucna biname te page daremu ne jepänenige, kuu bine etomlecnemige iyeteta ireclota tääpume. Siige ätema biname piyepu ärucna biname teepi gigri gege äbitenäsi. ³⁷ Ai iicana lui toraca gyene egä, 'Nuuja te yäätemuge, nuuja te yäärucnimuge.' ³⁸ Cane weebibine itu jityepipene ärucname, weene luma kaakesea lica ituge wawena. Poto cina ituge puma kaakesea wawena, weene yepä ärucna taatu memi."

³⁹ Bucurage biname pui Samariya cewe cabu Yeesu ne jitru-ngisi, ingle pui magebi te lipu teebine jeitnäjige egä, "Tabe umle gyene iyeta cane lui bine ituge wawenetnäja." ⁴⁰ Puma cita ca Samariya biname cina liba eclige Yeesu bau me, teepi jejisi teta cama lenajame, siige tabe puma enajige neeneni bimu cama. ⁴¹ Cerämu bucurage biname cina Yeesu ne jitrungisi, teepi liba itecijemige teeme mene. ⁴² Teepi pui magebi ne jojisi egä, "Siige page cine cerämu määme mene name pi taatu teebine lica jitrunge-nisi, ingle cine cinerage te bii nitecijnige teeme mene. Cine siige umle gemi, egä peese nyene biname, lui te biname bine pa yääsecräremepi niija cabu ca."

Yeesu Miiji Jewenige Babo Biname me Bägrä ne

⁴³ Neeneni bimu ingwe gaabe ca Yeesu Samariya probins ne sebmalige Galilaya probins cabu me ädige, teemerage cewe luma. ⁴⁴ Tabe apu ituge iicana egä, "Acejiyame me mename biname ne yaacatusi iyeta poto ta, yepä lica teemerage cewe cabu je." ⁴⁵ Yepä ai taje tabe liba Galilaya probins cabu me ädige, biname cina miijirage jewablisi, ingle teepi niinäce itu yaaclepi Yerusalema babo cewe me äsuplengta bimu ne ngenge apename; siige teepi puga jääpänepesi, Yeesu ngena mule bine jaawenemepi.

⁴⁶ Puma cita ca Yeesu Kaana cewe me acnenutige lui Galilaya probins cabu jage. Peese nyene pui cewe, tabe luma niinäce niyerage ne waina niye tääpume yaateplingtepi. Galilaya probins cabu Kaprenauma cewe je yepä Rooma gabmani babo biname puga ge, lui me bägrä pita cama ge. ⁴⁷ Tabe liba itecijige, egä Yeesu Yuudea probins cabu ca tacnige Galilaya probins cabu me, tabe ädige, siige jejige tabe Kaprenauma cewe me otrime teeme bägrä, lui te budre mameta ge, teebine pita cabu ca miiji wawename. ⁴⁸ Yeesu teebine jejige, "Weene liba ciitaca mule piyepu kokre mule bine lica jääpänimuye, weene ätrunga lica birige." ⁴⁹ Yepä tabe Yeesu ne jejige egä, "Yageyame, tädi watata, cije căme bägrä te budre läbituge." ⁵⁰ Yeesu jejige egä, "Äte acnenuti, määme bägrä te ireclota gyene!" Siige tabe Yeesu me mene jecatige, acnenutige teeme cewe me. ⁵¹ Tabe liba acnenutige, teeme kaakesea bägrä cina teebine potera jewenisi gaabe lamlecu je, jejisi egä, "Määme bägrä ireclota gyene." ⁵² Siige tabe itemlimige, egä lui padare cabu tabe gije abacitige miiji äbitame. Teepi jejisi egä, "Birice bimu duusa kaake poto cidi ca gebale te piba sebmalumi teebine." ⁵³ Babe te ngenge jotwige, egä puirage padare cabu Yeesu piba najumi egä, "Määme bägrä ireclota gyene." Siige tabe teeme binamewale cama Yeesu ne jitrungige.

⁵⁴ Ai lui neeneni manu ciitaca mule gyene Yeesu wawename, tabe liba Yuudea probins cabu ca Galilaya probins cabu me tacnenutige.

5

Yeesu Yepä Biname ne Miiji Jewenige Beteseda Cupicu Gome

¹ Ai ingwe gaabe ca Yeesu Yerusalema babo cewe me ädige Israela biname bime yepä soriyomu tääpume. ² Yerusalema lui kula ca atreji ge. Teeme yepä grana ne yaainusi Maamoi grana ca. Pui grana gome cupicu puga ge, lui awaclomteji ge faib caageage toro mete ca. Heberu mene ca pui cupicu me ngii lui Beteseda. ³ Mete gawe me bucurage pita biname ge ätwitäneji: irecu määsumäsu biname, ernge niyaniya biname, nuuja poto tääpe budre biname. Teepi jaawagrijsi niye apineca padare ne, ⁴ ingle nuuja taje Yageyame me mename seemo te täinuge niye ne iibricname. Lui pita biname te niinäce läglenuuge niye cabu me, niye te liba lapinucige, tabe miiji läbituge teeme pita cabu ca.

⁵ Yepä biname puga ge, lui te pita cama senajenäjumi teetieit kämäge ngalebora. ⁶ Yeesu teebine jepänige ätwitäneji puma, siige tabe umle ge, egä tabe lecaleca padare pita cama itu senajenäjumi. Tabu puma cita ca itemlige egä, "Nää, maane singi gäte miiji äbitame?" ⁷ Pita biname te jejige egä, "Babo biname, nuuja biname lica gyene cebine ätityerame cupicu cabu me acaname, niye te liba tuudruge. Cane liga căme ca otrime läbitune, nuuja te uja luupluge." ⁸ Yeesu jejige egä, "Arpinanti, määme waaku ne ecati, siige ädi!" ⁹ Tabu piba taatu miiji äbitige, teeme waaku ne ecatige, siige ädige.

Yepä pui lui Sabade bimu ge. ¹⁰ Israela biname cina jejisi, lui te miiji äbitige egä, "Ai lui Sabade bimu ge. Egäsu cotre gyene maane waaku ne acaname." ¹¹ Tabu jejemige egä, "Lui biname te miiji nawenige, tabe te najige cane waaku ne acatame siige otrime." ¹² Teepi itemlisi egä, "Laasi nyene pui biname, lui te naajige maane waaku ne acatame siige otrime?" ¹³ Yepä lui te miiji äbitige, tabe umle lica ge, egä laati tage, ingle bucurage

biname puga ge, piyepu Yeesu puma cita ca nuuja gome me uja äyebblingtuji. ¹⁴ Ingwe ca Yeesu liba teebine jepänige iiwäreja mete caale bora je, tabe jejige egä, “Maane siige miiji gäte page. Ingwe ca niya mule gone jaawenute, cije maane baborage niya ne jääpänute.” ¹⁵ Puma cita ca pui biname te ädige, Israela biname bine jejemige egä, “Pui lui Yeesu tage, lui te cebine miiji nawenige.” ¹⁶ Siige puma cita ca Israela biname cina gije abacitinisi Yeesu ne sabe wawename, ingle tabe Sabade bimubabu pita biname ne miiji jewenige. ¹⁷ Yepä Yeesu teebibine jejemige egä, “Cäme Babe te iyeta padare cabu kaakesea jewenenige, cane cuta piyepu miiji kaakesea wawena.” ¹⁸ Yeesu me ai mene name pi Israela biname cina magerage singi äbitinisi teebine budre me aglime, ingle tabe Sabade cotre taatu ne lica jetropangtige, yepä tabe Acejiyame cama yepä me äbitige, teebine lipu Babe ca einige.

Acejiyame me Bägrä me Conocäco Pisi Nyene Gwidape bine Wawename

¹⁹ Yeesu Israela biname bine jejemige egä, “Cane toraca jijenininine weebibine, egä Bägrä te nuuja gwidape teemerage singi ca lica jaawenuge, yepä tabe ngena ne jääpänuge Babe te wawena je, tabe cuta pui ne jaawenuge. Babe te ngena ne jaawenuge, cuta Bägrä te pui ne jaawenuge. ²⁰ Babe te singi gyene Bägrä täapume, siige jaawabuge iyeta gwidape, tabe lui bine jaawenimuge. Weene jepäniye Bägrä te pita biname ne lipu miiji jewenige, yepä Babe te teebine cerämu poto modamoda kaakesea pagege awaba tabe wawenecame, weene lui cabu ca calu te pa jitäjipi. ²¹ Babe te lipu biname bine budre cabu ca cirege arpinera siige ireclota ceera teebibine, Bägrä te cuta piyepu biname bine pagege ireclota ceera, tabe lui bime täapume singi ceerame. ²² Babe te nuuja biname ne lica atrana, yepä tabe Bägrä ne ituge conocäco ceera atrana täapume ²³ naace täapume biname cina teebine cuta opo gaabe me acitame, Babe ne lipu opo gaabe me yaacitusi. Laati te Bägrä ne opo gaabe me lica yaacituge, cuta Babe ne piyepu opo gaabe me lica yaacituge, lui te Bägrä ne tityepuji.

²⁴ Cane toraca mene jijenininine, egä laati te cäme mene yäatecijuge, siige jäätrunguge teebine, lui te nätyepuji cebine, tabe iyeteta ireclota ne jääpänuge. Pui biname ne lica pagege atrana, ingle tabe uja ituge budre gaabe ne abmala, siige ireclota gaabe cabu ädenige. ²⁵ Cane toraca jijenininine, egä padare te tädenige – siige uja biiri tatyaramtuge – budre biname cina liba Acejiyame me Bägrä me tagepogogo ätecija. Laatibi yäatecijemuge, teepi ireclota ne pa jääpänepesi. ²⁶ Babe te Bägrä ne yepä kokre ituge ceera, teeme lui pisi nyene biname bine ireclota ceerame. ²⁷ Cuta tabe Bägrä ne conocäco ituge ceera atrana täapume, ingle tabe Acejiyame bau ca täduji biname me äbituji. ²⁸ Calu te gone jitinuge, egä padare te cire tädepi budre biname cina teeme tagepogogo ne ätecijame teeme gape bora ca, ²⁹ siige cire täsipesi puma cita ca. Laatibi miijimiji mule ituge waweneca, teepi ngälu cäco ireclota cabu me cire tarpinärepi. Yepä laatibi niyaniya mule bine ituge waweneca, teepi atrana täapume cire tarpinärepi teeme mule ibi daremu ne päpäname.”

Yeesu ne Aitneja

³⁰ “Cane cäme singi ca äblicäco gäne nuuja mule ne wawena. Cane jaatranimune, Babe te lipu najuge. Cäme atrana lui conocäco gyene, ingle cane cäme singi ne lica jaawenune yepä teeme singi ne jaawenune, cebine lui te nätyepuji. ³¹ Cane liba cämämu laitänjune, cäme aitneja lui toraca lica birige. ³² Yepä pisi nyene nuuja biname, lui te cebine naitnäjenige. Cane umle gäne, egä teeme aitneja cäme poto cidi me lui toraca gyene. ³³ Yoo, weene biname bine täatyepemepeye Yoane niye ca äciseja biname bau me teeme mene ätecijame. Lui toraca gyene, tabe peei ne jaaitnäjepe. ³⁴ Cane nuuja singi lica gäne biname me aitneja täapume, yepä cane ai ne naace name pi jijenine, egä weene pagege ireclota ne päpäname. ³⁵ Yoane lui epu pana ge lampa liyepu, lui te layenuge, siige yaapacläyuge. Weene singi ge teeme apacläyera cabu matikolä padare lenajame. ³⁶ Tabe cebine naitnäjepe, yepä nuuja aitneja cuta pisi nyene, lui baborage gyene. Babe te lui kaakesea itu näcäruji cane wawename, siige cane lui kaakesea jewenenimine, pui cina naitnäjenisi cebine, egä Babe te cebine itu nätyepuji. ³⁷ Cuta piyepu Babe lui te cebine nätyepuji, tabe cuta naitnäjenige. Weene teeme tagepogogo lica ituge ätecija piyepu teeme opo lica ituge päpäna. ³⁸ Teeme mene te weeme cabu lica yaanajuge, ingle weene lica jäätrunguye Babe te lui ne ituge ätyepa. ³⁹ Weene Oogäräneji mene cabu ca abiberäjininiye, siige apu jingenininige, egä weene iyeteta ireclota ne peema cita ca jääpänuye. Yepä weene ngena ca lica egleniye, egä cäme poto cidi me jijenige. ⁴⁰ Weene äbwäricinininiye cäme bau me otnime ireclota ne päpäname.

⁴¹ Cane nuuja singi lica gäne biname cina cebine awepyeräjame. ⁴² Yepä cane umle gäne weeme poto cidi me; cane umle gäne, weeme ngenecu bora nuuja singi lica gemi Acejiyame täapume. ⁴³ Cane itu tädepene cäme Babe me ngii cabu, yepä weene lica itu nawablepeye cebine. Nuuja te liba täduge teemerage ngii cabu, teebine weene jaawabluye. ⁴⁴ Cuta weene lipulipu ätrungame, ingle weemeweme awepyeräja ne jäärnguye, yepä weene eei awepyeräja ne lica jäärnguye, yepä taatu Acejiyame bau ca lui te täduge. ⁴⁵ Weene gone

apu jinginge, egä cane te cirege weebibine Babe me opo gaabe je aitneja. Eewe, weeme aitneja biname lui Moose sine, weene lui cabu me weeme ngene atwanena singi bine ituge acrana. ⁴⁶Weene liga toraca cire jäätrungejiye teebine, weene cuta cebine piba nätrungejiye, inge tabe căme poto cidi me ituge oogăra. ⁴⁷Yepă inge weene teeme oogărenejı mene ne lica jitrungeniye, peei name pi weene lipulipu ätrungame căme mene ne.”

6

Yeesu Faib Tausen Biname bine Engărimige
(Matayo 14:13-21; Mareko 6:30-44; Luuka 9:10-17)

¹ Ai ingwe gaabe ca Yeesu Galilaya sawa ne yuurige, Tiberiya sawa ca lui ne cuta einenisi. ² Bucurage biname cina teebine ingwe icwisi, inge teepi itu jääpănanepesi tabe teeme kokre ca pita biname bine miiji wawenena. ³ Yeesu podo cabu me teeme abiberăja băgră cama jegelige, siige puga adnatige. ⁴ Pui padare Israela biname bime äsuplengta trii padare mameta ge. ⁵ Yeesu ire acitige, jepănige bucurage biname cina teeme bau me otni je. Tabe puma cita ca Pilipo ne jejige egă, “Mine ai biname bime ibibi deedei luma jeletnenemisi?” ⁶ Tabe ai lui naace täapume jüicige Pilipo ne apicetnărame, yepă tabe umle ge, tabe ngena ne jewenenige. ⁷ Pilipo Yeesu ne jejige egă, “Mine puu neeneni hanred silba rarekaake ca buluduu bine liba aletna je, poto cina erwăjınisi, poto cina abamutenisi.” ⁸ Piba teeme nuuja abiberăja băgră, Simona Peteru me igane Andrea te Yeesu ne jejige egă, ⁹ “Ama pisi nyene yepă băgră, lui me piti nemi faib buluduu piyepu neeneni bumate cibı, yepă puu ibibi lica gemi iyeta ai biname bime täapume.”

¹⁰ Pui cewe cabu puga ge babo baace. Yeesu teeme abiberăja băgră bine jejemige egă, “Biname bine jejemige adnatărame baace papa cabu,” siige teepi adnatărejige. Teepi iyeta lui faib tausen rooriye ge. ¹¹ Yeesu buluduu bine ewadimige, Acejiyame ne eso ecărige, siige biname bine ecăremige, lui cina adnatăreji icrajimige puma. Tabe cuta cibı ecăremige, siige teepi erwăjımisi, teepi luma ngălu singi ge. ¹² Teepi liba iyeta ngene jeglemige, Yeesu abiberăja băgră bine jejemige egă, “Deedei, cibı pacupacu etomle-cmeyer iyeta, nuuja ne gone yaabmaluye.” ¹³ Teepi siige etomlecmisi, lui deedei pacupacu abmalınınisi pui faib buluduu cabu ca, biname cina liba erwăjımisi, siige twelb diiba bine jengărimisi apaname.

¹⁴ Biname cina liba jepănisi ai ciitaca mule ne, Yeesu lui jewenige, teepi jüicisi egă, “Toraca, ai lui Acejiyame me pui mename biname gyene, mine lui ne jewagrijenisi otnime.” ¹⁵ Yeesu umle ge egă, “Teepi teeme singi ca cebine acıtame naweninisi mope biname täapume, yepă căme singi lica ge.” Siige tabe căari taatu ädige podo cabu me.

Yeesu Niıye papa cabu Otnige
(Matayo 14:22-33; Mareko 6:45-52)

¹⁶ Liba mămleteca me, abiberăja băgră cina piba podo cabu ca täinitnige, sawa ligi me eclige, ¹⁷ poo cabu me acetnărige, siige sawa ne yuurisi Kaprenauma cewe me äcnărame. Teepi liba sawa cabu jage, ciıye te piba tumlige, yepă Yeesu căro camu ge teeme bau me atyaramta. ¹⁸ Buuwe te kokre cama tipwăjıge, siige uule kuu cina modamoda me äbitınınisi. ¹⁹ Abiberăja băgră cina liba poo ne biiri ewăcisi faib kilomiita pana padare me doro cabu ca, teepi puma cita ca jepănisi Yeesu ne niıye papa cabu otni je poo gome me, siige teepi mage wălu ge. ²⁰ Yepă Yeesu teebibine jejemige egă, “Wălu gone, cane săne!” ²¹ Piba teepi singi ge teebine acenutame, siige piba taatu poo te doro ne joomlige, teepi liıyeme singi ge otnime.

Biname cina Yeesu ne Jırngisi

²² Nuuja bimı cabu lui biname cina sawa nuuja poto doro cabu itu tabmalimesi, teepi umle äbitınınisi egă, “Yepă taatu poo lui te birice aga ge, abiberăja băgră cina pui gaabe suurumesi sawa nuuja poto doro me, cuta Yeesu teta cama lica tädumi.” ²³ Piba poto poo cina seclige Tiberiya cewe cabu ca eeyeme, teepi luma deedei bine serwăjımumesi, Yageyame te lui deedei täapume Acejiyame ne eso secărumi. ²⁴ Lui cina puga ge piyepu lui cina seclige, teepi liba umle äbitınınisi egă, “Yeesu ama lica gyene, cuta abiberăja băgră lica gemi,” teepi poo cabu me acetnărijınınisi, Kaprenauma cewe me yuurisi Yeesu ne ärngime.

Yeesu Lui Ireclota Deedei Gyene

²⁵ Lui biname cina Yeesu ne jırngisi, teepi teebine puma jepănisi sawa nuuja poto doro je, siige itemlisi egă, “Abiberăja biname, maane cuta liba tädite aima?” ²⁶ Yeesu jejemige egă, “Cane toraca jıjenınınine weebibine, egă weene cebine naace name pi lica nărngeniye, inge weene ciitaca mule bine itu tepănanemumeye căme bau ca. Yepă weene naace popi nărngeniye, inge weene lbibi deedei bine serwăjımumeye. ²⁷ Weene gone watata deedei bine jäärngemuye, yepă eei deedei ne jırngepeye, lui te iyeteta ireclota biname bine yăăcărangemuge. Lui te Acejiyame bau ca tăduji biname me äbituji, tabe te pa icăripi

weebibine pui deedei, ingle Aceji Babe te teebine ituge conocäco ceera peei ne wawenane.”
 28 Teepi Yeesu ne itemlisi egä, “Cine miiji ngena wawena, egä cine Acejiyame me kaakesea bine jaawenimusi?” 29 Yeesu jejemige egä, “Peei lui Acejiyame me kaakesea gyene weeme cabu, egä weene cebine nätrungeniye, tabe lui ne nätyepuji.” 30 Teepi jejisi egä, “Maane ngena ciitaca mule ne jewenenite cine päpäname siige cine piba meebine ätrungame? Maane ngena jewenenite? 31 Maane lipu gäte cibibine maana deedei ceerame, cime kaakesaare cina lui deedei bine serwäjananemumesi daapo taatu cewe cabu je. Oogäräneji mene te jicenige ai poto cidi me egä, ‘Acejiyame te cabucewe ca teebibine deedei secäranemuji.’”

32 Yeesu jejemige egä, “Cane toraca jijenininine, egä Moose cabucewe ca weebibine deedei lica icäraninuji, yepä cäme Babe te toracarage deedei cabucewe ca sicäraninuge. 33 Acejiyame me deedei lui tabe sine, cabucewe ca lui te täduji biname bine ireclota ceerame.” 34 Teepi puma cita ca Yeesu ne jejisi egä, “Babo biname, maane pui deedei iyeta padare cabu nicäranipi.” 35 Yeesu jejemige egä, “Cane säne pui ireclota deedei. Lui te cäme bau me täduge, tabe lica pagege loolomecewe jajwi. Cuta lui te cebine nätrunguge, tabe lica pagege niyemecewe jajwi. 36 Yepä cane weebibine ituge jaji, egä weene itu näpänanumeye cebine, yepä weene ätrunga lica gemi. 37 Iyeta lui cäme Babe te näcäranuge, teepi cäme bau me saacluge, piyepu laati te cäme bau me täduge, cane lica yääyecräjune. 38 Cane cabucewe ca lica tädujine cäme singi ne wawenane, yepä cane tädujine teeme singi ne wawenane, lui te cebine nätyepuji. 39 Piyepu lui te cebine nätyepuji, tabe singi gyene, egä cane nuuja ne lica apesera tabe lui cebine ituge ceera, yepä cane teebibine ireclota cabu me cire yaarpinäremepene ceräcerägäabu bimu cabu je. 40 Cäme Babe te singi gyene, egä iyeta lui cina näpänusi cane teeme Bägrä ne piyepu nätrungusi, teepi iyeteta ireclota ne cire jääpänesipi piyepu cane teebibine cire yaarpinäremepene ceräcerägäabu bimu cabu je.”

41 Israela biname cina gije abacitinisi Yeesu ne ängejame, ingle tabe lipu jicige egä, “Cane säne deedei, lui te cabucewe ca tädujine.” 42 Teepi jicisi egä, “Cije ai lui Yeesu lica gyene, Yoosepa me bägrä. Cine umle gemi teeme mage babe. Cije tabe piba lipulipu jicenige, egä tabe cabucewe ca itu täduji.” 43 Yeesu teebibine jejemige egä, “Weene peei ängeja mene ne ebmaleye! 44 Nuuja te äblicäco cäme bau me otni, liba Babe lui te cebine nätyepuji, teebine lica taawenuge cäme bau me otnime, siige cane teebine ireclota cabu me cire yaarpinantepene ceräcerägäabu bimu cabu je. 45 Acejiyame me mename biname cina itu yoogärujisi egä, ‘Acejiyame te iyeta biname bine pagege abiberäja.’ Iyeta lui cina Babe ne jättecijusi, teeme bau ca labiberäjininusi, teepi cäme bau me saacluge. 46 Ai lui naace tääpume lica gyene, egä nuuja te ituge Babe ne päpäna, yepä tabe taatu lui te Babe bau ca täduji, tabe te teebine ituge päpäna. 47 Cane toraca jijenininine: laati te birige ätrunga, tabe ireclota ne jääpänuge.

48 Cane lui ireclota deedei gäne. 49 Weeme kaakesaare cina daapo taatu cewe cabu pui maana deedei ne serwäjananemumesi, yepä teepi budre täbitenäjimesi. 50 Yepä laati te liba yaarwuge cabucewe ca lui deedei te täduge, tabe budre ne lica jääpänuge. 51 Cane age säne pui ireclota deedei, cabucewe ca lui te tädujine. Laati te liba ai deedei yaarwuge, tabe iyeteta yaanajuge. Cane lui deedei ceera, cäme tääpe gyene, cane lui ne pagege äyemela biname cina iyeteta ireclota ne päpäname.”

52 Puma cita ca Israela biname cina gije abacitinisi teemeteme atraname egä, “Tabe lipulipu mibibine teeme tääpe ceera mine arwime?” 53 Yeesu jejemige egä, “Cane toraca jijenininine: weene liba cäme tääpe ne lica yaarwuge, Acejiyame bau ca lui te tädujine biname me äbitujine, piyepu liba lica cäme uudi ne yaanuye, weeme cabu ireclota lica birige. 54 Yepä laati te cäme tääpe ne yaarwuge piyepu cäme uudi ne yaanuge, tabe iyeteta ireclota ne jääpänuge, siige cane teebine ireclota cabu me cire yaarpinantepene ceräcerägäabu bimu cabu je. 55 Cäme tääpe lui toraca deedei gyene, cäme uudi lui toraca niye gyene. 56 Laati te cäme tääpe ne yaarwuge, cäme uudi ne yaanuge, tabe cäme cabu yaanajuge, cane teeme cabu nanajuge. 57 Ireclota Babe te cebine nätyepuji, siige cane teeme cabu ca ireclota ituge päpäna. Pipu pi laati te cäme tääpe ne yaarwuge, tabe cäme bau ca ireclota ne jääpänuge. 58 Ai pui deedei gyene, cabucewe ca lui ituge otni. Ai lui epu deedei lica gyene, weeme kaakesaare cina lui ne serwanenanumusi, yepä teepi äblicäco gje budre cabu ca uocratna. Yepä laati te ai deedei yaarwuge, tabe iyeteta yaanajuge.”

59 Yeesu iyeta ai mene jicemige Kaprenauma cewe je, tabe liba biname bine ebiberäjimige teeme abasecretna mete cabu.

Mene Iyeteta Ireclota tääpume

60 Yeesu ne lui cina ingwe icwisi, teepi liba itecijemige ai mene, teeme bucurage cina jicisi egä, “Ai abiberäja lui mage mäpurage gyene. Laati te miiji gyene ai ne acatame?”
 61 Nuuja te Yeesu ne lica jejige, yepä tabe umle äbitige, teepi ngena poto cidi me jitransisi,

siige tabe itemlimige egä, “Nää, căme abiberăja te weebibine niija opo me jiwenininige? ⁶² Cije piba lipu gyene, weene liba ăpăna je Acejiyame bau ca lui te tăduji biname me ăbituji acnenuta cabucewe me, tabe luma niinăce ituge. ⁶³ Aceji Seemo te biname bine ireclota me jaawenimuge, teepi teeme ca ăblicăco nuuja gwidape wawena. Cane lui mene bii jijanininine, Aceji Seemo piyepu ireclota cama. ⁶⁴ Yepă weene poto cina cebine lica nătrungeniye.” Yeesu ai mene naace name pi jiicige, ingle tabe ujaruge umle ăbituji, laati bemi lica teebine ătrunga piyepu laati te teebine budre me pa jaawabepi. ⁶⁵ Puma cita ca tabe căări jiicige egä, “Ai ingle name pi cane bii jininine weebibine, egä nuuja te ăblicăco gyene căme bau me otni, Babe te liba lica teebine jaawenuge otnime.”

⁶⁶ Yeesu me ai mene name pi bucurage teeme ingwe ca ăcwi biname cina teebine ebmalisi, siige teta cama lica otninisi. ⁶⁷ Piba Yeesu teeme twelb abiberăja băgră bine itemlimige egä, “Weene năă cuta singi gemi cebine abmalame?” ⁶⁸ Simona Peteru te jewecnistige teeme mene egä, “Yageyame, cije cine ingwe ca laati bau me otni? Măăme piti nemi mene iyeteta ireclota tăăpume! ⁶⁹ Cine siige năătrungenisi piyepu umle gemi, egä maane peese năte, Acejiyame te lui ne mara me ituge wawena teeme tăăpume.” ⁷⁰ Yeesu teebibine jejemige egä, “Cane weene twelb bine puu iyeta itu jijăcripene, yepă weeme yepă cabu pisi nyene Satani.” ⁷¹ Yeesu Yuuda, Simona Isakariyota me băgră tăăpume jiicige. Ngănuge, tabe puu teeme twelb abiberăja băgră cabu ca yepă ge, tabe te teebine budre me pa jaawabepi.

7

Yeesu piyepu Teeme Iganewale

¹ Ai ingwe gaabe ca Yeesu Galilaya probins cabu ta otnetnăjige. Tabe singi lica ge căări cuta Yuudea probins me otnime, ingle Israela biname cina puma padare ne jirngisi teebine budre me acitame. ² Padare te mameta me ăbitige Israela biname bime Wăbuyaga mete trii tăăpume. ³ Siige iganewale cina Yeesu ne jejisi egä, “Ai cewe ne ebmali, Yuudea me ădi, piba măăme ingwe ăcwiyame biname cina jepănenemisi maane lui mule bine jenenemite, ⁴ ingle laati te singi birige biname cina teeme poto cidi me umle ăbitame, tabe nuuja mule ne ogă lica jaawenuge. Yoo, ingle maane apu mule bine jaawenanemute, maane miiji pajecu me ăbita biname cina măăme poto cidi me umle ăbitame.” ⁵ Teeme iganewale cina naace popi ai mene jiicisi, ingle cuta teepi teebine lica jitrungisi. ⁶ Yeesu jejemige egä, “Iyeta padare cabu weeme tăăpume papa gyene otni, yepă căme padare te camu gyene atyaramta. ⁷ Ai gawecewe biname bime nuuja ingle lica gyene weebibine ămugetname, yepă teepi cebine nămugetnusi, ingle cane jeitnăjenenemine, egä teeme mule lui niiyarage gemi. ⁸ ăte naaclege weene ai trii tăăpume. Cane lica ădenine, ingle căme tăăpume miiji padare lica gyene otnime.” ⁹ Tabe apu jiicige, siige Galilaya je enajige.

Yeesu Wăbuyaga Mete Trii cabu

¹⁰ Yepă iganewale cina liba beclige trii tăăpume, Yeesu teeme ingwe ca piba ogă ădige, ingle tabe singi lica ge biname cina umle ăbitame teeme otni poto cidi me. ¹¹ Yerusalema je puma Israela biname cina teebine trii biname bime sobe cabu jirngisi. Teepi biname bine itemlăjemisi egä, “Lese nyene pui biname?” ¹² Biname cina siiyă mene ca ajananinisi teeme poto cidi me. Poto cina jiicisi egä, “Tabe lui miiji biname gyene.” Poto cina jiicisi egä, “Ewe, tabe miiji biname lica gyene. Tabe biname bine yaangletnăjemuge.” ¹³ Yepă teepi cabucabu lica jiicemisi teeme poto cidi me, ingle teepi wălu ge Israela biname bime tăăpume.

¹⁴ Trii padare lamlecu je Yeesu iiwăreja mete me abacitige biname bine abiberăjame. ¹⁵ Israela biname cina călu te jitemige, jiicisi egä, “Tabe lipulipu baborage umle gyene. Tabe nuuja abiberăja cabu me lica ituge otni.” ¹⁶ Yeesu jejemige egä, “Căme abiberăja lui căme lica gyene, yepă Acejiyame myene, lui te cebine itu nătyepuji. ¹⁷ Laasi nyene liba singi Acejiyame me singi ne wawename, tabe umle pa lăbitepi, egä căme abiberăja lui Acejiyame te itu năcărui coo cane năă cămerage mene jiicemenine. ¹⁸ Laati te liba teemerage ngene atwanena mene jiicemuge, tabe teeme tăăpume awepyerăja ne jăărnguge. Yepă laati te teeme tăăpume awepyerăja ne jăărnguge, teebine lui te itu tityepuji, tabe lui conocăco gyene piyepu teeme cabu nuuja walya lica gyene. ¹⁹ Egăsu Moose nata weebibine Cotre icărininuji, yepă weeme nuuja te lica Cotre bine yăăcwetnimuge. Weene ngena name pi cebine aglime naweniniiye?”

²⁰ Biname cina teebine jejisi egä, “Ewe, cine meebine aglime lica naawenenisi. Măăme niija cable pisi nyene!” ²¹ Yeesu jejemige egä, “Weene călu te jitipi, cane lipu yepă găăbu Sabade bimu cabu kaakesea jaawenepene. ²² Moose te cotre icărininuji weene weeme tăăpe matikolă iirputame Acejiyame me cewecu acata tăăpume. (Puu toraca Moose te lica ge, yepă mime kaakeseaare cina jegednu-jisi pui mule ne.) Siige weene pui cewecu băgră ne

jaawenuye tääpe iirputa ca, ngänu gyene liba Sabade bimu. ²³ Yoo siige, weene liba bägrä me tääpe cabu cewecu jaawenuye Sabade bimu cabu naace täápume Moose me cotre ne äcwetname, weene piba ngeno memi claabe, cane liba biname ne iyeta miiji jaawenepene Sabade bimu cabu. ²⁴ Ätecitipeye papapapa atrana mule, miiji weene niinäce cängena ingle ne ärngi, piba atrana.”

Yeesu nää Keriso Sine?

²⁵ Poto Yerusalemä biname cina jiiçisi egä, “Cije ai lui pui biname lica gyene, teepi lui ne aglime jewenenisi? ²⁶ Weene jepäneye, tabe lipu pajecurage jiiçemenige, yepä teepi nuuja mene lica ge! Ire taatu jetwisi! Pama modamoda biname cina umle bäbitiniisi, egä toraca tabe Keriso sine biname bine niija cabu ca äsecreraame? ²⁷ Yepä tabe äblicäco gyene Keriso lenaja, ingle mine umle gemi, egä tabe luma cita ca gyene. Keriso te liba otni, nuuja biname te umle lica gyene, egä tabe luma cita ca gyene.”

²⁸ Yeesu iiwäreja mete caale bora je biname bine ebiberäjimige. Tabe baborage tagepogogo ca jiiçemige egä, “Yoo, weene umle gemi cane, piijepu weene umle gemi cane luma cita ca gäne. Yepä cane căme singi ca lica itu tädujine. Lui te cebine itu nätyepuji, tabe sine toraca, yepä weene umle lica gemi tabe. ²⁹ Cane umle gäne tabe, ingle cane teeme bau ca itu tädujine. Tabe te cebine nätyepuji.” ³⁰ Piba teepi singi ge teebine oomlaname, yepä nuuja te ime ne lica ecitige teeme papa cabu me, ingle teemeraage padare te camu ge atyaramta. ³¹ Bucurage biname cina teebine jitrungisi, siige teemeteme ätemlajiniisi egä, “Keriso liba cire tädepi, nää tabe pama cerämu apu poto ciitaca mule bine cire jaawenemepi ai biname te lipu jewenenemige?”

Iiwäreja Mete Awamuta Biname bine Jityepimisi Yeesu ne Oomlaname

³² Parisea sigu biname cina itecijemige, biname cina lipu siiyä mene ca jiiçemisi Yeesu poto cidi me, siige teepi modamoda iiwäreja biname cama poto iiwäreja mete awamuta biname bine jityepimisi Yeesu ne oomlaname. ³³ Yeesu biname bine jejemige egä, “Cane matikäli padare cerämu nanajinige weene cama, piba cane teeme bau me pa lacnenuitepene, cebine lui te nätyepuji. ³⁴ Weene piba cebine pa närngepeye, yepä weene lica pa näpänepeye, ingle weene äblicäco gemi otni, cane lui puupu cabu me pa lädepene lenajame.”

³⁵ Puma cita ca Israela modamoda biname cina teemeteme jitraniisi egä, “Tabe baa liiyeme otnime äbitinige, siige piba mine äblicäco teebine päpäna? Nää, tabe pama ngene jotwanenige Griik gawe cabu me otnime, Israela biname cina luma icrajinige, siige puma Griik biname bine abiberärame?” ³⁶ Ngena täápume tabe apu jiiçige egä, ‘Weene cebine pa närngepeye, lica pa näpänepeye,’ cuta egä ‘Cane liiyeme pa lädepene lenajame, weene äblicäco piiyeme otni.’ Tabe ngena täápume pepu jiiçige?”

Ireclota Niye

³⁷ Trii padare me ngäluğaabe bimu lui baborage gyene. Yeesu piba abujängtige, baborage tagepogogo ca jiiçige egä, “Laati te liba niyemecewe, tabe miiji căme bau me otni niye nanime! ³⁸ Mene oogäräneji gyene, egä laati te cebine nätrunguge, ireclota niye te teeme ngeneçu cabu ca tuudruge.” ³⁹ Yeesu ai mene Aceji Seemo poto cidi me jiiçige. Laatibi Yeesu ne jäätrungusi, teepi pagege Aceji Seemo ne päpäna. Pui padare cabu teebine căro camu ge ätyepa, ingle Yeesu camu ge acnenuta cabucewe me teeme apacıyera cabu me.

Biname cina Abelaninisi Yeesu name pi

⁴⁰ Laatibi Yeesu me ai mene itecijemige, teeme poto cina jiiçisi egä, “Toraca, ai biname lui pui mename biname gyene, mine lui ne jewagrijenisi.” ⁴¹ Poto bime ngenä atwanena apu ge egä Yeesu lui Keriso sine, Acejiyame te lui ne cirege ätyepa biname bine niija cabu ca äsecreraame. Yepä poto cina jiiçemisi egä, “Keriso äblicäco Galilaya probins cabu ca otni, ⁴² ingle Oogäräneji mene te jiiçenige egä tabe Daawida me kaakesaare gyene, siige tabe Daawida me cewe Betelehema cabu ca cire tädepi.” ⁴³ Puma cita ca biname cina abelaninisi Yeesu miji pi. ⁴⁴ Poto cina singi ge teebine oomlaname, yepä nuuja te ime ne lica ecitige teeme papa cabu.

Israela Modamoda Biname Ätrunga căco Ge

⁴⁵ Iiwäreja mete ne lui cina jaawamutusi, modamoda iiwäreja biname piijepu Parisea sigu biname cina lui bine jityepimisi Yeesu ne oomlana täápume, siige teepi ime taatu äcnärige. Lui cina teebibine jityepimisi, teepi itemlimisi egä, “Weene ngena name pi teebine lica secaniye aimä?” ⁴⁶ Awamuta biname cina jejemisi egä, “Cine nuuja biname ne niinäce lica ituge ätecija apu mene iicema cabu je.” ⁴⁷ Piba Parisea sigu biname cina jejemisi egä, “Oo siige, tabe cuta weebibine bingletnäjimige? ⁴⁸ Weene nää ituge ätecija, egä Parisea biname bime yepä te coo modamoda biname bime yepä te teebine jitrungenige? ⁴⁹ Yepä ai papa biname, lui bime cabu Acejiyame me claabe pisi nyene, ingle teepi umle lica gemi

Moose me Cotre, teepi te jitrungenisi teebine.”⁵⁰ Nikodemo, lui pui Parisea biname bime cabu ca yepä ge piyepu lui te Yeesu ne niinäce yäädärepä ciye cabu je, tabe jejemige egä,⁵¹ “Mime Cotre te nijenininige, egä mine äblicäco biname ne papa atrana. Mine miiji niinäce teebine ätecija piyepu umle äbita, egä tabe ngena ne ituge wawena.”⁵² Puma cita ca teepi jejisi egä, “Cuta maane peese näte nuuja Galilaya biname! Maane Oogäräneji mene miiji abiberäjeppi umle äbitame, egä Acejiyame me nuuja mename biname te Galilaya probins cabu ca lica cire tädepi.”⁵³ Siige puma cita ca teepi iyeta mete me etengläjsi.

8

Sargi Magebi

¹ Yeesu Olibi Uli podo cabu me ädige. ² Nuuja bimu krokerage tabe cuta cääri acnenutige iiwäreja mete cabu me. Biname cina abasecretnige teeme bau me, siige tabe adnatige, gije abacitige teebibine abiberäjame. ³ Puma cita ca cotre abiberäja biname piyepu Parisea sigu biname cina yepä magebi ne tocanisi, lui ne jwoomlisi sargi mule wawena cabu, biname sobe cabu ocitisi, ⁴ siige Yeesu ne jejisi egä, “Abiberäja biname, cine ai magebi ne sargi mule wawena cabu twoomlisi. ⁵ Moose me Cotre te apu nijinininige, egä apu muleyame biname bine miiji kula ca äbyecra budre me aglime. Maane lipu ngene jotwanenite ai poto cidi me?” ⁶ Teepi ai mene naace name pi jejisi, ingle teepi singi ge teebine mene cabu oomlaname, siige ingle ne päpäname teebine aitnejame. Yeesu äcupige, ime kukluta ca mene yoogäriige gawe cabu. ⁷ Teepi liga teebine tii jewanansi, tabe jeclajutige, jejemige egä, “Weeme cabu liba biname pisi nyene, lui te umle cäco niija mule wawena, tabe te niinäce kula ne yaajarege teeme cabu me.” ⁸ Tabe cuta cääri äcupige, gawe cabu ngii yoogäriige. ⁹ Teepi liba Yeesu me mene itecijemige, teepi ngene ca eglisi egä cime niija mule piti nemi. Siige teepi gije abacitinisi yepäyepä atenglejame, modamoda biname cabu ca ngälu matimati biname, ngälu Yeesu taatu te ityepurige pui magebi cama, teeme opo gaabe je lui te joclajutige. ¹⁰ Piba Yeesu jeclajutige, utemlige egä, “Magebi, lete nemi teepi, lui cina meebine naacansi aima kula ca äbyecrame? Cije teepi lica jewenisi peei mule ne?” ¹¹ Tabe jejige egä, “Eewe babo biname.” Puma cita ca Yeesu jojige egä, “Cane cuta meebine kula ca lica naacnenine. Äte ocli, ingwe ca niija mule gone jaawenute!”

Yeesu Apaclyera Gyene Biname bime tääpume

¹² Yeesu liba biname bine cääri ebiberäjimige, tabe jejemige apu egä, “Cane age säne apaclyera ai gawecewe tääpume. Laati te cebine ingwe näcwuge, tabe krokeciye cabu lica waatnuge, ingle tabe apaclyera ne jääpänuge teeme ireclota tääpume.” ¹³ Puma cita ca Parisea sigu biname cina Yeesu ne jejisi egä, “Maane määmämu aitnäjenite, pipu pi määme aitneja lui toraca lica gyene.” ¹⁴ Yeesu jejemige egä, “Cane puu cämämu aitnäjenine, yepä cäme aitneja lui papa me lica äbitenige, ingle cane umle gäne, cane luma cita ca gäne piyepu liiyeme ädenine. Yepä weene nuuja umle lica gemi, cane luma cita ca gäne piyepu liiyeme ädenine. ¹⁵ Weeme atrana lui biname bime pana gyene. Cane nuuja biname ne licarage pa jaatranepene. ¹⁶ Yepä cane liba atrana je, cäme atrana lui conocäcorage ge, ingle cane taatu lica gäne. Babe lui te cebine nätyepuji, tabe cane cama gyene. ¹⁷ Nata weeme Cotre mene te cuta jiićenige, egä neeneni biname bime aitneja lui ibibi birige. ¹⁸ Yoo siige, cane cämämu aitnäjenine piyepu Babe, lui te cebine nätyepuji, tabe cuta naitnäjenige cebine.” ¹⁹ Puma cita ca teepi Yeesu ne itemlisi egä, “Baa, lese nyene määme babe?” Yeesu jejemige egä, “Weene umle lica gemi cane piyepu cäme Babe. Weene liga umle cirege cane, weene cuta piba umle cirege tabe.”

²⁰ Yeesu ai mene jiićenige, tabe liba biname bine ebiberäjimige iiwäreja mete caale bora je rarekaake acrana puupu gome. Siige nuuja te teebine lica joomlige, ingle teeme padare te camu ge atyaranta.

“Weene Äblicäco Gemi Otni, Cane Liiyeme Ädenine”

²¹ Yeesu biname bine cääri mene jejanemige. Tabe apu jiićige egä, “Cane ama cita ca äyebtingtenine. Weene pa närngepeye cebine, yepä weene weeme niija mule cabu budre cire äbitipeye. Weene äblicäco gemi otni, cane liiyeme ädenine.”

²² Puma cita ca Israela biname cina jiićisi egä, “Nää, tabe pama teemämu aglime pa läbitepi, ingle tabe jiićige egä, “Weene äblicäco gemi otni, cane liiyeme pa lädepene?” ²³ Yeesu jejemige egä, “Weene lui gawecewe cabu ca gemi, yepä cane lui cabucewe cabu ca gäne. Weene ai gawecewe tääpu memi, yepä cane lica gäne ai gawecewe tääpume. ²⁴ Cane jijjinine, egä weene budre läbitininuye weeme niija mule cabu. Weene liba ätrunga lica birige, egä cane pui biname gäne, cane lui poto cidi me jiićenenemine, weene toraca budre cire äbitipeye.” ²⁵ Teepi puma cita ca teebine itemlisi, “Baa, maane laasi näte?” Yeesu jejemige egä, “Cane uja weebibine lipu ituge jaji?” ²⁶ Cäme bucurage mene piti nemi weeme poto cidi

me iicemame piyepu weebibine ablawejame. Yepä cane peei taatu mene jaajanamemune biname bine, cane lui mene nätecijanuge teeme bau ca, cebine lui te nätyepuji. Tabe lui toraca gyene.”

²⁷ Teepi opo lica ewatnisi, egä Yeesu Babe poto cidi me jicige. ²⁸ Puma cita ca Yeesu teebibine cuta cääri jejemige egä, “Weene liba pa nawepäntepeye cebine, Acejiyame bau ca lui te tädujine biname me äbitujine, piba weene umle pa äbitipeye, egä cane pui biname gäne, cane lui poto cidi me jicemimune. Cane nuuja gwidape ne cäme singi ca lica jaawenune, yepä Babe te ngena ituge abiberäja cebine, cane peei poto cidi me taatu jicemimune. ²⁹ Lui te cebine nätyepuji, tabe pisi nyene cane cama. Tabe cebine taatu lica ituge abmala, ingle cane ngena bine jaawenetnäjimune, peei cina teebine ngenecu miiji me jaawenusi.” ³⁰ Bucurage biname cina Yeesu ne jitrungisi, teepi liba itecijemige tabe apu iicema je.

Laati Beml Toraca Abrahamo me Bägräwale

³¹ Lui Israela biname cina Yeesu ne jitrungisi, tabe teebibine jejemige egä, “Weene liba cäme abiberäja ne kokre cama joomle-nye, weene cäme toracarge abiberäja bägrä gemi piba. ³² Piba weene umle läbitininuye, toraca ngena gyene, siige pui toraca te weebibine kälyä jiwenininuge.” ³³ Teepi opo lica jewatnisi, Yeesu ngena täapume jejemige, siige teepi jejisi egä, “Cine lui Abrahamo me kaakesaare gemi. Cine nuuja biname me aletnäneji biname lica gemi, cije maane ngena name pi nijinite cine kälyä äbitame?”

³⁴ Yeesu jejemige egä, “Cäme mene nacateye: iyeta lui cina niyya mule bine yaacnemusi, pui niyya mule cina teebibine kokre joomle-musi epu pana, aletnäneji biname ne teeme yageyame te lipu kokre joomluge. ³⁵ Aletnäneji* biname te iyeteta lica yaanajuge teeme babo biname me mete cabu. Yepä bägrä te iyeteta teeme babe me mete cabu yaanajuge. ³⁶ Siige Bägrä te liba weebibine kälyä jiwenininuge niyya mule cabu ca, weene piba toraca kälyä birige. ³⁷ Yoo, cane umle gäne, egä weene Abrahamo me kaakesaare gemi. Yepä weene cebine aglime naweninuye, ingle weene singi lica gemi cäme mene ätecijame. ³⁸ Cane jijanininune, cane ngena ituge päpäna Babe me gome. Weene cuta piyepu jaawenimuye, weeme babe te ngeno me jijanininuge weebibine.”

³⁹ Teepi jejisi egä, “Cime babe Abrahamo sine.” Yeesu jejemige egä, “Weene liga Abrahamo me bägrä cirege, weene epu mule bine cire jaawenemejiye tabe liiyepu. ⁴⁰ Yepä weene siige cebine aglime naweninuye, ingle cane toraca mene poto cidi me ituge jajanena, Babe bau ca cane lui mene ituge ätecijana. Abrahamo weeme pana lica äbituji. ⁴¹ Weene weemerage babe ne jütaneniyee.” Teepi puma cita ca Yeesu ne jejisi egä, “Cine babe cäco biname lica gemi. Cime yepä taatu Babe pisi nyene. Tabe lui Acejiyame sine.” ⁴² Yeesu jejemige egä, “Liga Acejiyame weeme Babe cirege, weene piba cäme täapume singi cirege, ingle cane teeme bau ca tädujine, siige cane page age säne. Cane cäme singi ca lica tädujine, yepä tabe te cebine nätyepuji. ⁴³ Weene ngena name pi cäme mene umle lica gemi? Weene naace name pi umle lica gemi cäme mene, ingle weeme tablame bermemiyee cäme mene ätecija wälu name pi. ⁴⁴ Satani peesse nyene weeme babe, siige weene weeme babe me singi bine jaawenemuye. Tabe lui agliyame gyene agedna cabu ca ngälu page. Tabe toraca mene ne jigyenige, ingle teeme bau ca cude padare gyene. Tabe liba walya waatromuge, tabe teemerage mule ne jaawenuge; tabe walya biname gyene, babe gyene iyeta walya täapume. ⁴⁵ Cebine weene pui name pi lica nätrunguye, ingle cane jicemimune, ngena gyene toraca. ⁴⁶ Baa, weeme nuuja te jaawabudnitege, egä cane ngena niyya ne ituge wawena. Cane liba toraca mene poto cidi me jicemune, weene piba ngena name pi lica cebine nätrunguye. ⁴⁷ Laati te Acejiyame bau ca gyene, tabe te teeme mene jättecijuge. Yepä weene Acejiyame me bägräwale lica gemi, peei name pi weene lica teebine jättecijuye.”

Yeesu piyepu Abrahamo

⁴⁸ Israela biname cina Yeesu ne jejisi egä, “Cime mene pama toraca gyene, egä maane Samariya biname gäte, cuta mäame niyya cable pama pisi nyene?” ⁴⁹ Yeesu teebibine icisäremige egä, “Eewe, cane niyya cable cama lica gäne. Cane cäme Babe ne opo gaabe me ecitenine, yepä weene cebine opo gaabe me lica naciteniyee. ⁵⁰ Cane singi lica gäne cäme ngii te babo äbitame. Nuuja te pisi nyene, lui te singi ge cäme ngii te babo äbitame. Tabe te biname bine cirege atrana. ⁵¹ Cane toraca jijenininune weebibine, egä laati te cebine nätrunguge, tabe budre lica läbituge.” ⁵² Puma cita ca Israela biname cina jejisi egä, “Siige cine aga toraca umle läbitininago, egä mäame niyya cable pisi nyene. Abrahamo uja budre äbituji, piyepu Acejiyame me mename biname cina uja budre äbitininujisi, siige maane piba cije lipu jicenite, egä laati te liba mäame mene yättecijuge, tabe budre lica läbituge. ⁵³ Nata maane baborage lica gäte mime kaakesaare Abrahamo bau ca, lui te budre itu läbitepi.

* **8:35:** aletnäneji biname: Nuuja taje cuta nuuja te jaaletnuge pui biname ne coo yageyame te jaajuge egä, “Maane siige cäme cabu ca, mäame singi gaabe ädepi.”

Piiyepu mename biname cina budre ituge äbita. Maane lipu ngene jotwaninite, egä maane baa laasi näte?”

⁵⁴ Yeesu teebibine jejemige, “Cane liba cämämu babo läbitune, peei lui toraca lica ge. Yepä Babe te cäme ngii ne babo jaawenuge, weene lui ne weeme Acejiyame ca eineniye. ⁵⁵ Weene lica ituge umle äbita teeme poto cidi me, yepä cane umle gäne tabe. Cane liba iicana je, egä cane umle lica gäne tabe, cane piba weeme pana walya biname gäne. Yepä cane umle gäne tabe piiyepu teeme mene jäätecijune. ⁵⁶ Weeme kaakesaare Abrahamo gege ge, inge tabe umle ge, egä tabe cebine cirege päpäna. Tabe näpänuji, siige mage gege äbituji.” ⁵⁷ Israela biname cina jejisi egä, “Maane camu gäte fifti kämäge oomlana, maane piba cije lipu pi jicenite, egä maane Abrahamo ne ituge päpäna?” ⁵⁸ Yeesu jejemige egä, “Cane toraca jijenininine weebibine, egä cane uja ge, Abrahamo ingwe ca aplimlujii.”

⁵⁹ Puma cita ca Israela biname cina kula bine ewadimisi teebine äbyecrame, yepä Yeesu ämlitige, siige iiwäreja mete ne sebmalige.

9

Yeesu Miiji Jewenige Ireçu Määsumäsu Biname ne

¹ Yeesu otni cabu ireçu määsumäsu biname ne jepänige, lui te pepu ärngeji ge. ² Abiberäja bägrä cina Yeesu ne itemlisi egä, “Abiberäja biname, laati me niiya mule name pi tabe apu gyene, teeme coo teeme mage babe bime?” ³ Tabe jejemige egä, “Tabe ireçu määsumäsu ärngeji lica gyene teeme niiya mule inge name pi coo teeme mage babe bime niiya mule name pi. Tabe naace name pi ireçu määsumäsu gyene egä Acejiyame me kokre ne teeme cabu ca päpäname. ⁴ Bimu apacylera te liba enajenige, mine miiji teeme kaakesea wawena, cebine lui te nätyepuji. Ciye te tädenige, piba nuuja te äblicäco kaakesea wawena. ⁵ Cane liba gawecewe cabu säne, cane apacylera gäne gawecewe tääpume.”

⁶ Ai mene ingwe gaabe ca Yeesu mote ne eclemutige gawe cabu me, gawe cama elengläcitige, siige pui ngate ne ecatige, teeme ireçu bine aaganige. ⁷ Piba tabe jejige egä, “Äte ädi, opo äcisäji Siloama cupicu cabu.” (Siloama me aboclomta lui ‘Ätyepäneji.’) Tabe ädige, opo äcisäjiige, siige ireçu aasatäneji tacnige.

⁸ Puma cita ca lui biname cina teeme gome icrajige, cuta lui cina teebine niinäce ituge päpänenä ätinera je, teepi ätemläjinisi egä, “Nää, age sena pui biname, mine lui ne ätinera je jääpänanusi?” ⁹ Poto cina jicisi egä, “Yoo, tabe sine,” potö cina egä, “Eewe, tabe lica gyene, yepä teeme opo pui biname me pana gyene.” Yepä tabe pui biname te teemämu jicige egä, “Cane age säne pui biname.” ¹⁰ Teepi itemlisi egä, “Määme ireçu cina lipulipu baasatäsi?” ¹¹ Tabe jejemige egä, “Biname ngii Yeesu, tabe te mote ne elengläcitige gawe cama, siige pui ngate ca naganige cäme ireçu, nätyepige Siloama cupicu cabu cane opo äcisejame. Cane liba ädine, siige jicisäjiine, piba cäme ireçu cina aasatäsi.” ¹² Teepi teebine itemlisi egä, “Lese nyene tabe?” Tabe jejemige egä, “Cane umle lica gäne.”

Parisea Sigu Biname cina Itemläjisi Lui Ireçu Määsumäsu Biname te Miiji Äbitige

¹³ Lui ireçu määsumäsu biname te miiji bäbitige, teebine ecanisi Parisea sigu biname bime cabu me. ¹⁴ Lui bimu cabu Yeesu gawe ne mote cama elengläcitige, siige teeme ireçu bine miiji jaawenige, pui lui Sabade bimu ge. ¹⁵ Puma cita ca Parisea sigu biname cina teebine itemlisi egä, “Määme ireçu lipulipu miiji bäbitäsi?” Tabe jejemige egä, “Pui biname, tabe gawe ne teeme mote cama elengläcitige, pui ngate ca cäme ireçu naganige. Cane opo äcisäjiine, siige page cane gwidape bine jepänenemine.” ¹⁶ Piba poto Parisea sigu biname cina apu jicisi egä, “Lui biname te pepu mule ne jewenige, tabe äblicäco ge Acejiyame bau ca otni, inge Sabade cotre ne jetropangtige.” Yepä poto cina jicisi egä, “Lipu miiji gyene conocono biname te apu ciitaca mule bine waweneca?” Siige teepi yepä ngene atwana lica ge Yeesu poto cidi me.

¹⁷ Parisea sigu biname cina cuta cääri itemlisi pui biname ne egä, “Maane lipu ngene jotwaninite pui biname poto cidi me, meebine lui te miiji naawenige?” Tabe jejemige egä, “Cane apu ngene jotwaninine, egä tabe lui Acejiyame me mename biname gyene.” ¹⁸ Yepä Israela biname cina ätrunga lica ge, egä tabe ireçu määsumäsu ärngeji ge, siige page jepänenemige, peei name pi teepi teeme mage babe bine ala taasglicisi, ¹⁹ äätemlisi egä, “Nää, ai lui weeme bägrä gyene? Lipu, tabe ireçu määsumäsu ärngeji ge? Tabe page siige lipulipu jepänenemige?” ²⁰ Mage babe cina jejemäsi egä, “Yoo, cine umle gegi egä tabe cime bägrä gyene, cuta ireçu määsumäsu ärngeji ge, ²¹ yepä cine nuuja umle lica gegi, tabe lipulipu ireçu bii baasatige coo laati te miiji bii jewenige teebine. Weene teebine itemleye. Tabe baborage gyene weebibine daremu mene jajime.” ²² Teepi naace popi apu jicäsi, inge teepi wälu ge Israela modamoda biname bime tääpume. Israela biname cina apu ituge iicana, egä laati te jaawabudnituge Yeesu ne, egä tabe Keriso sine, Acejiyame lui ne cirege ätyepa biname bine niiya cabu ca äsecreraame, piba pui biname ne yääyeblingtusi teeme ireçu

ätumuta cabu ca. ²³ Peei name pi teeme mage babe cina jüicäsi egä, “Taba baborage gyene. Teebine itemleye.”

²⁴ Puma cita ca Parisea sigu biname cina cuta cääri ala tesoglicisi irecu määsumäsu ärngeji biname ne, jejisi egä, “Cine umle gemi, egä lui biname te meebine miiji naawenige, tabe conocono biname gyene. Maane lipu ngena jotwaninite teeme poto cidi me? Maane ngene gone näätimaluge, egä Acejiyame te nääticienige, peei name pi maane toraca mene nijini.” ²⁵ Tabe jejemige egä, “Cane umle lica gäne, egä tabe conocono biname gyene coo liiyepu, yepä cane umle gäne, cane irecu määsumäsu ge niinäce, siige page jepänenemine.” ²⁶ Puma cita ca Parisea sigu biname cina itemlisi egä, “Taba ngena jöwenige määme irecu cabu? Taba lipulipu meebine irecu miiji naawenige?” ²⁷ Taba jejemige egä, “Cane uja bii jijinine, yepä weene lica bitecijinige. Weene ngena täápume singi gemi peei yepä gwidape täápume cääri ätecijaname? Pama weene singi gemi cuta teeme abiberäja bägrä me äbitame!” ²⁸ Parisea biname cina teebine jisädisi, jejisi egä, “Maane peese näte teeme abiberäja bägrä. Cine Moose me abiberäja bägrä gemi.” ²⁹ Cine umle gemi, egä Acejiyamerage te Moose ne jejanuji, yepä cine peei biname poto cidi me umle lica gemi, egä tabe luma cita ca gyene.” ³⁰ Pui biname te jejemige, “Taba cäme irecu bii napatnige, yepä weene umle lica gemi, tabe laasi nyene. Cane cälu te nätige wemiji pi. ³¹ Mine umle gemi, egä Acejiyame te conocono biname ne lica jättecijuge, yepä tabe eei biname ne jättecijuge, lui te teebine opo gaabe me yaacitanuge piyepu teeme singi ibibi jaawenimuge. ³² Agedna cabu ca ngälu page nuuja biname te lica ituge ätecija, egä biname te irecu määsumäsu ärngeji biname me irecu bine jaapatnige. ³³ Acejiyame te peei biname ne liga lica cire täätöpejeji, tabe ibibi lica gyene apu mule bine wawenecame.” ³⁴ Parisea biname cina jejisi teebine egä, “Maane niiyarage biname gäte määme aplimla cabu ca ngälu page. Maane ngena miiji gäte cibibine abiberäjame!” Siige teepi teebine teeme abasecretna mete cabu ca ijarisi.

Seemo Ireclota Ngalebora Lui Ireclu Määsumäsu Gemi

³⁵ Yeesu itecijige, egä tabe lui biname ne miiji jöwenige, teebine sijarisi abasecretna mete cabu ca. Taba liba teebine jepänige, tabe jejige egä, “Maane nää jitrungenite Acejiyame bau ca lui te täduji biname me äbituji?” ³⁶ Taba pui biname te Yeesu ne jejige egä, “Babo biname, naji cebine, tabe laasi nyene, cane teebine piba jitrungenine?” ³⁷ Yeesu jejige egä, “Maane uja biiri jepänite teebine. Taba page maane cama mene jüicemenige.” ³⁸ Taba Yeesu ne jejige egä, “Yageyame, cane näätungenine meebine.” Piba tabe kokorare ca ääpednutige teeme opo gaabe je. ³⁹ Yeesu puma cita ca jüicige egä, “Cane naace täápume ai gawecewe cabu me itu tädujine biname bine atraname siige piba irecu määsumäsu cina päpänename, cuta lui cina jätäpänenemusi teepi irecu määsumäsu me äbitame.” ⁴⁰ Poto Parisea sigu biname lui cina teta cama puga ge, itecijemige Yeesu ai mene iceme je, siige teepi teebine itemlisi egä, “Nää, maane apu naangeninige, egä cine cuta irecu määsumäsu gemi?” ⁴¹ Yeesu jejemige egä, “Weene liba toraca irecu määsumäsu lenaja je, piba nuuja te äblicäco weebibine niija mule poto cidi me aitneja; yepä weene jüicenenemiye, egä weene cängena jepänenemiye, siige weebibine cirege atrana, ingle weeme niija mule piti nemi.”

10

Ngene ca Agli Mene Maamoi poto cidi me

¹ Yeesu jüicemige egä, “Cane toraca jijenininine weebibine, egä lui biname te maamoi caale bora me lica labacituge grana cabu, yepä tabe jaageluge caale nuuja poto ca, tabe lui eromaame birige piyepu cuta agliyame birige. ² Yepä lui biname te labacituge caale granarage cabu, tabe peese nyene maamoi ire atwi biname. ³ Teeme täápume grana ire atwi biname te grana ne jüitnuge, piyepu maamoi cina umle gemi teeme tagepogogo, siige tabe teemerage maamoi bine ngiirage ca jätäjäcrimuge, caale cabu ca yäasemuge. ⁴ Taba liba teebibine yäasemuge, tabe niinäce gaabe me läduge. Maamoi cina teebine ingwe yäacwusi, ingle teepi umle birige teeme tagepogogo. ⁵ Teepi idne biname ne ingwe lica yäacwusi. Teepi teeme bau ca luocratnuge, ingle teepi umle lica birige teeme tagepogogo.”

⁶ Yeesu teebibine ai ngena ca agli mene jejemige, yepä teepi opo lica ewatnisi, egä ngena tääpu myene.

Miijirage Maamoi Ire Atwi Biname

⁷ Yeesu cääri jüicemige egä, “Cane toraca jijenininine weebibine, egä cane age säne grana maamoi bime täápume. ⁸ Iyeta lui cina cäme niinäce gaabe ca itu saaclepi, teepi lui eromaame gemi piyepu aglecayame gemi, yepä maamoi cina teebibine lica jättecijemusi. ⁹ Cane age säne grana. Laati te cäme cabu ca tabacituge, tabe ireclota ne jätäpänuge. Taba tabacituge caale ngalebora me, cuta lasatuge, siige tabe jätäpänimuge baace loolo me. ¹⁰ Eromaame te yepä täduge acatame, sabe wawename piyepu budre me aglime. Yepä cane te tädujine naace täápume egä maamoi cina toraca miijirage ireclota ne päpäname.

¹¹ Cane age sãne miijirage maamoi ire atwi biname, lui te teeme ireclota ne yãayemaluge maamoi name pi. ¹² Liba daremu cama biname te maamoi bine ire jaatwemuge, lui te toraca ire atwi biname lica birige piyepu lui me maamoi lica birige, tabe liba jããpãnuge wulp ne otni je, tabe maamoi bine yaabmalimuge, luucruge. Puma cita ca wulp te maamoi bine jããngecrerãjimuge, maamoi cina maramara yaaplidnãrusi. ¹³ Daremu cama lui ire atwi biname te luucruge, ingle teeme toracarage ngenecu lica gyene maamoi bime tããpume. ¹⁴ Cane sãne miijirage maamoi ire atwi biname. Cane umle gãne cãme maamoi, teepi umle gemi cane, ¹⁵ epu pana Babe te lipu umle gyene cane, cane lipu umle gãne tabe. Cane cãme ireclota ne pa yãayemalene maamoi name pi. ¹⁶ Cãme piti nemi poto maamoi ai caale cabu lui lica gemi. Cane cuta miiji teebibine awecetnãra, siige teepi cãme tagepogogo cire nãtecijepesi. Siige yepã maamoi tomi cirege, cuta teeme tããpume yepã ire atwi biname cirege.

¹⁷ Babe te singi gyene cãme tããpume, ingle cane singi gãne cãme ireclota ne ãyemalame naace tããpume cuta cããri pãpãname. ¹⁸ Nuuja biname te lica pagege cebine teeme singi ca agli, yepã cane cãmãmu pagege cãme ireclota ceera budre tããpume. Cãme conocãco pisi nyene cãme ireclota ceerame cuta cããri pãpãname. Cãme Babe te apu ituge jaji cane wawename.”

¹⁹ Yeesu me ai mene te Israela biname bine cuta cããri maramara ngene atwanena me jewenimige. ²⁰ Teeme bucurage cina jiicisi egã, “Teeme niiya cable pisi nyene. Tabe buduma biname gyene. Weene teebine ngeno me jitecijeniye?” ²¹ Yepã poto cina jiicisi egã, “Niiya cable cama biname te ãblicãco apu mene iicerna. Ingle naace gyene, niiya cable cama biname te lipulipu irecu mããsumãsu biname bine jaawenimuge teepi pãpãname.”

Israela Biname cina Yeesu ne Jigyisi

²² Padare te tatyaramtige Yerusalema ge iiwãreja mete ne ngene apename. Pui lui gãbu padare ge. ²³ Yeesu liba ãdige Solomona me caagecage toro mete gawe cabu Acejiyame me iiwãreja mete caale bora je, ²⁴ piba Israela biname cina teebine jewaclomtisi, jejisi egã, “Maane lipu lecaleca padare naanajinige cibibine jaji cãco, egã maane laasi nãte? Nijini conocãco, maane liba Keriso sãte, Acejiyame te lui ne ãtyepame tiicuji biname bine mãpu cabu ca ãsecrãrame.” ²⁵ Yeesu jejemige, “Cane uja ituge jaji weebibine, yepã weene lica itu nãtrungepeye cebine. Cane lui ciitaca mule bine ituge waweneca cãme Babe me ngii cabu je, pui cina cebine naitnãjenisi. ²⁶ Yepã weene lica nãtrungeniye cebine, ingle weene cãme maamoi lica gemi. ²⁷ Cãme maamoi cina cãme tagepogogo nãtecijusi, siige cane umle gãne teepi. Teepi cãme ingwe poto ca saacluge. ²⁸ Nuuja te ãblicãco teebibine cãme bau ca ãsecrãra, yepã cane teebibine iyeteta ireclota cire yããcãremepene, siige teepi budre ne lica cire jããpãnepesi. ²⁹ Cãme Babe lui te ituge cebine ai maamoi ceera, tabe sine baborage. Nuuja te ãblicãco gyene teebibine Babe me ime cabu ca ãsecrãra. ³⁰ Cine Babe cama yepã gegi.”

³¹ Piba Israela biname cina cuta cããri kula bine etomlicmisi Yeesu ne ãbyecrame. ³² Yeesu teebibine jejemige egã, “Cane weeme opo gaabe bucurage miijimiji mule ituge waweneca, Babe te lui tããpume ituge jaji. Lui mule name pi weene cebine kula ca ãbyecrame naweniniye?” ³³ Israela biname cina jejisi egã, “Cine mããme miiji mule name pi kula ca ãbyecrame lica naaweninisi, yepã maane lipu Acejiyame me ngii ne sabe itu tewenumete. Maane binamerage gãte, yepã maane Acejiyame me ãbitenite!” ³⁴ Yeesu jejemige egã, “Weeme Cotre cabu oogãrãneji gyene, egã Acejiyame te jiicuji, ‘Weene acejiyame gemi!’ ³⁵ Mine umle gemi, egã Oogãrãneji mene te ngena jicenige, iyeteta toraca enajenige. Siige Acejiyame te liba acejiyame ca einemuji pui biname bine, Acejiyame me Mene lui bine ecãremuji, ³⁶ cije weene piba ngena name pi najeniye cebine, Babe te lui ne teeme tããpume mara me nawenuji, siige gawecewe cabu me nãtyepuji, egã cane Acejiyame me ngii ne sabe jaawenune, teeme Bãgrã ca liba lainune. ³⁷ Cane liba cãme Babe me kaakesea bine lica jaawenimune, piba weene gone cebine nãtrunguye. ³⁸ Yepã cane liba jaawenimune, weene miiji cãme kaakesea poto cidi me ãtrunga, ngãnu gyene liba weene cebine lica nãtrunguye. Piba weene umle ãbitininuye, egã Babe te cãme cabu pisi nyene, cane Babe cabu pisi nãne.”

³⁹ Israela biname cina cuta cããri ãbitininisi Yeesu ne oomla-name, yepã tabe uucrige.

⁴⁰ Puma cita ca Yeesu cããri acnenutige Yoridana baduge nuuja poto doro me, pui puupu cabu me, Yoane luma niinãce biname bine niye ca jããcisãjemepi, siige tabe puga enajige. ⁴¹ Bucurage biname cina totninisi teeme bau me. Teepi jiicisi egã, “Yoane nuuja ciitaca mule ne lica itu jaawenepi, yepã tabe lui mene jicemepi ai biname poto cidi me, toraca gyene.” ⁴² Bucurage biname cina Yeesu ne puma jitrungisi.

¹ Yepä biname ngii Lajaro pita cama ge. Tabe Betaniya cewe je enajige teeme neeneni ngule cama Maareta piyepu Mariya. ² Age tona pui Mariya, lui te miiji lengo oil ne yaapadurepi Yageyame me ernge cabu, siige teeme edingäli ca jääcisäjeppi. Teeme wate Lajaro tage, lui te pita cama ge. ³ Siige ngule cina mene jityepäsi Yeesu bau me egä, “Yageyame, mäame miijirage biname te pita cama gyene.” ⁴ Yeesu liba peei mene itecijige, tabe jüicige egä, “Ai pita te Lajaro ne budre me lica pa jaawenepi, yepä biname bine pa jaawenemepi Acejiyame me jamyacu apaclyera ne awepyeräjame. Piiyepu ai cabu ca Acejiyame me Bägrä me jamyacu apaclyera ne pa jääpänepesi.” ⁵ Yeesu babo singi ge Maareta teeme maade cama piyepu teeme wate Lajaro täapume.

⁶ Yoo, Yeesu liba itecijige, egä Lajaro pita cama ge, tabe cäro camu puga enajige neeneni bimu cama. ⁷ Puma cita ca tabe teeme abiberäja bägrä bine jejemige, “Biiri naclege Yuudea probins cabu me.” ⁸ Teepi jejisi egä, “Abiberäja biname, cemacema Israela biname cina meebine kula ca puga liga näabyecrinumesi budre me, nää maane cuta piyeme otnime äbitimite?” ⁹ Yeesu jejemige egä, “Cije bimu me ngalebora twelb awa lica gemi kroke cabu ca ngälu mämloteca oomlaname? Laati te bimu apaclyera cabu läduge, tabe lica yaatramuge, inge tabe ai gawecewe me apaclyera ne jääpänuge. ¹⁰ Yepä ciye cabu laati te liba läduge, tabe yaatramuge, inge teeme cabu nuuja apaclyera lica birige.” ¹¹ Puma cita ca tabe abiberäja bägrä bine jejemige, “Mime biname Lajaro ute gyene, yepä cane ädenine teebine alotnentame.” ¹² Teepi jejisi egä, “Yageyame, tabe liba ute ogrenige, miiji äbitenige teeme pita cabu ca.” ¹³ Yeesu ai mene Lajaro me budre poto cidi me jüicige, yepä abiberäja bägrä cina apu jengemige, egä papa ute me jüicige. ¹⁴ Piba Yeesu pajecurage jejemige teebibine egä, “Lajaro budre gyene. ¹⁵ Cane wemiji pi gege gäne, egä cane weme puga lica ge, tabe lui padare cabu budre täbitumi, inge peei cabu ca weene umle päbitipeye cebine ätrungame. Biiri naclege teeme bau me!” ¹⁶ Puma cita ca Tooma, ‘Päädepäde’ ca lui ne einenisi, nuuja abiberäja bägrä bine jejemige egä, “Yoo siige, mine biiri naclege iyeta Yeesu cama budre me.”

Yeesu Lui Ireclota Ceera Biname Gyene

¹⁷ Yeesu liba Betaniya me atyaramtige, tabe umle äbitige, egä Lajaro ne uja secitumesi, siige gape ngalebora fooa bimu cama senajumi. ¹⁸ Betaniya lui trii kilomüita padare ge Yerusalema ca. ¹⁹ Bucurage Israela biname cina itu tabasecretnumi Maareta Mariya naabi bau me sigita täapume teeme wate me budre name pi.

²⁰ Maareta liba utecijige, egä Yeesu biiri tädenige, tabe oclige teebine awacletnäjame, yepä Mariya mete cabu je onajige. ²¹ Maareta liba Yeesu ne jepänige, tabe jejige egä, “Yageyame, maane liga ama cirege, cäme wate te budre lica cire läbiteji. ²² Yoo, tabe puu budre gyene, yepä cane umle gäne, egä Acejiyame te nääcärenige, maane ngeno me jejenite.” ²³ Yeesu Maareta ne jojige, “Mäame wate te budre cabu ca alotnantenige ireclota me.” ²⁴ Tabe jejige egä, “Yoo, cane umle gäne, egä ceräcerägääbu bimu cabu iyeta biname cina liba budre cabu ca ireclota me cire larpinäripesi, tabe cuta piba cirege arpinenta.” ²⁵ Yeesu jojige egä, “Cane age säne budre cabu ca lui te biname bine cirege arpinera piyepu ireclota ceera. Laati te cebine nätrunguge, ngänuge tabe puu budre gyene, yepä tabe ireclota gyene. ²⁶ Piiyepu laati te ai ireclota cabu nätrunguge cebine, tabe iyeteta budre ne lica jääpänuge. Nää, maane cäme mene nätrungenite?” ²⁷ Tabe jejige egä, “Yoo Yageyame, cane näätrungenine, egä maane Keriso säte, Acejiyame lui ne itu näätyepuji biname bine äsecrera me mäpu cabu ca. Maane lui Acejiyame me Bägrä gäte, lui ne jewagrijenisi otnime.”

Yeesu Ele Engenige

²⁸ Puma cita ca Maareta Yeesu ne ebmalige, acnenutige cewe me, teeme igane Mariya ne ogä jojige egä, “Abiberäja biname te bii tädige, tabe mäame täapume nätemlige cebine.” ²⁹ Mariya liba utecijige, tabe watatarage mete cabu ca asatige, oclige teebine päpäname. ³⁰ Yeesu cäro camu ge cewe ngalebora me abacita, yepä tabe camu puga ge Maareta luma teebine niinäce edäriige. ³¹ Sigita me lui Israela biname cina seclumi, teepi liba jopänisi Mariya ne abujengta je watatarage asata je, siige teepi teebine ingwe ucwisi, inge teepi apu jengemige, egä tabe gape cabu me oclenige ele me.

³² Mariya liba pui puupu cabu me atyaramtige, Yeesu luma enajige, siige teebine liba jepänige puma, tabe teeme opo gaabe je utramige, jejige egä, “Yageyame, maane ama liga cirege, cäme wate te budre lica cire läbiteji.” ³³ Yeesu liba jopänige teebine ele angena je cuta liba jepänimige teta cama lui Israela biname cina seclige ele angenetna je, tabe ngenec mäpu me äbitige. ³⁴ Tabe itemli-mige egä, “Weene teebine luma secitumeye?” Teepi jejisi egä, “Yageyame, maane tädi ire me.” ³⁵ Puma cita ca Yeesu ele enge-nige. ³⁶ Israela biname cina jüicisi egä, “Jepäneye, tabe lipu baborage singi ge teeme täapume!” ³⁷ Yepä poto cina jüicisi egä, “Tabe irecu määsümüsu biname ne miiji jaawenepi. Tabe ama liga cirege, tabe pama Lajaro me budre gaabe ne cuta cire yaarmeji.”

Yeesu Lajaro ne Budre cabu ca Erpinantige

³⁸ Yeesu cääri ngenecu mäpu me äbitige, siige ädige gape gome me. Pui gape lui kula bora uureji ge. Grana kula ca armeji ge. ³⁹ Yeesu biname bine jejemige kula ne apetrenngtame. Puma cita ca budre biname me ngule Maareta te jejige egä, “Yageyame gone, tabe niiyarage lengo cama gyene, inge fooa bimu cama gape bora senajumi!” ⁴⁰ Yeesu jojige, “Egäsu nata cane naajine meebine, egä maane liba ätrunga cama gäte, maane Acejiyame me kokre ne jepänenite.” ⁴¹ Puma cita ca teepi kula ne epeträngtisi. Yeesu piba cabu me ire acitige, jüicige egä, “Babe, cane eso nääcärenine, egä maane cebine nätecijenite. ⁴² Cane umle gäne, egä maane iyeta padare cabu cebine nätecijanute, yepä cane ai mene biname bime name pi jüicenine piba teepi ätrungame, egä maane te cebine itu nätyepujite.” ⁴³ Ai mene iicana ingwe gaabe ca tabe baborage tagepogogo ca ala abayige egä, “Lajaro, tasati peema cita ca!” ⁴⁴ Siige tabe tasatige gape cabu ca, teeme ime ernge cäbletääpe ca tope atneji ge piiyepu opo cäbletääpe ca acwabäneji ge. Yeesu piba biname bine jejemige, “Jiibireme, siige lädege tabe.”

Gläämu Jecijemige Yeesu ne Aglime

(Matayo 26:1-5; Mareko 14:1-2; Luuka 22:1-2)

⁴⁵ Mariya bau me lui Israela biname cina sigita me saaclepi, teepi jepänisi Yeesu ngena mule ne jewenige, siige teeme bucurage cina jütrungisi teebine. ⁴⁶ Yepä teeme nesae cina äcnärige Parisea sigu biname bime bau me, teebibine jejemisi, Yeesu ngena mule ne jewenige. ⁴⁷ Puma cita ca Parisea sigu biname piiyepu modamoda iiwäreja biname cina, teepi iyeta mutre biname bine ala tesoglicmisi mene atraname, siige jejemisi egä, “Mine ngena ne jeweneni? Ai biname te bucurage ciitaca mule bine jewenetnäjenemige. ⁴⁸ Mine liba ire taatu jecitenisi tabe apu mule wawenecame, piba iyeta biname cina teebine jütrungenisi, siige teeme bau me eclenige. Piba Rooma cubu biname cina pa saaclepi iiwäreja mete ne sabe wawename piiyepu cuta iyeta biname bine sabe wawename, inge Rooma gabmani* te singi lica gyene nuuja biname te mope me äbitame.”

⁴⁹ Teeme yepä te ngii Kayapa, lui tage iiwäreja mope biname pui padare cabu, jejemige egä, “Weene lipu buduma gemi! ⁵⁰ Nää, weene umle lica gemi, egä yepä biname te miiji budre äbita iyeta biname bime tääpume, lica iyeta biname cina?” ⁵¹ Ai lui teeme ngene atwanena mene lica ge. Yepä pui padare cabu tabe tage iiwäreja mope biname, siige Acejiyame te piba ngena atwanena ecäridge, egä Yeesu te miiji budre äbita iyeta Israela biname bime tääpume. ⁵² Cuta tabe teeme taatu tääpume lica budre yepä iyeta Acejiyame me bägräwale bime tääpume, lui cina aplidnäreji gemi ai gawecewe cabu iyeta poto ta, naace name pi teebibine yepä gome me abasecretname. ⁵³ Pui padare cabu ca Israela mutre biname cina gläämu jecijemige Yeesu ne budre me acitame. ⁵⁴ Peei ingwe gaabe ca Yeesu cabucabu lica otnetnäjige Yuudea probins cabu. Tabe pui gawe ne piba sebmälige, ädige yepä cewe me ngii Eperema, lui daapo taatu cewe gome jage. Tabe puga teeme abiberäja bägrä cama enajige.

⁵⁵ Israela biname bime äsuplengta trii mameta ge, siige bucurage biname cina abasecret-nige cewe maramara cabu ca Yerusalema me. Trii padare camuge, teepi niinäce eclige naace tääpume cude gwidape cabu ca kälyä äbitame piba ingwe ca trii cabu me äbäcname. ⁵⁶ Teepi puma Yeesu ne jirngisi, siige iiwäreja mete cabu ätemläjinisi egä, “Weene lipu ngene jotwanininiye, nää tabe pama tädenige ai trii padare tääpume coo lica?” ⁵⁷ Modamoda iiwäreja biname piiyepu Parisea sigu biname cina jüicisi egä, “Laati te liba päpäna je, egä tabe luma enajenige, pui biname te miiji cibibine umle wawename, cine piba teebine oomlana.”

12

Mariya te Yeesu ne Oil ca Eganige Betaniya Cewe je

(Matayo 26:6-13; Mareko 14:3-9)

¹ Piiyeme siks bimu ge äsuplengta trii padare oomlaname, Yeesu piba Betaniya cewe me ädige, Lajaro luma senajenäjumi, tabe lui ne budre cabu ca yaarpenantepi. ² Yeesu ne deedei puga ecärisi. Lajaro pui bime yepä ge, lui cina teta cama deedei äbitinimisi. Maareta mogobi jewenimige. ³ Piba Mariya ecatige miiji lengo camlecample nardus oil karpu ne, babo daremu ca lui oil ne jaaletnusi, epadurige Yeesu me ernge cabu, piba edingäli ca jüicisäjige. Miijirage lengo te mete ne iyeta joomlige.

⁴ Yeesu me yepä abiberäja bägrä ngii Yuuda Isakariyota, lui te teebine pagege budre me awaba, tabe Yeesu ne jejige egä, ⁵ “Ngena name pi mine ai oil ne acata cäco aletname trii hanred silba rarekaake ca, siige pui rarekaake owecumete biname bine ceerame?”

* 11:48: Rooma gabmani: Rooma gabmani te Yeesu me padare cabu Israela gawe ne ecenanige.

⁶ Tabe ai mene naace name pi lica jicige, egä tabe owecumete biname bime täapume owecu ge, yepä tabe naace popi jicige, ingle tabe eromaame ge. Tabe te teeme iyeta bime rarekaake ire jaatwemuge, siige peema cita ca yaawadimuge rarekaake bine teeme singi gaabe wawenetnäjame. ⁷ Yeesu Yuuda ne jejige egä, “Obmali teebine. Tabe ewetnenige teeme lui oil cebo pisi nyene cebine gape cabu acita bimu täapume. ⁸ Owecumete biname cina weene cama iyeteta pa yaacrajepi, yepä cane weene cama iyeteta lica pagege lenaja.”

Mene Jewenisi Lajaro ne Aglime Budre me

⁹ Bucurage Israela biname cina itecijemige, egä Yeesu Betaniya sine. Puma cita ca teepi eclige Betaniya cewe me lica Yeesu taatu name pi, yepä teepi cuta singi Lajaro ne päpäname, Yeesu lui ne budre cabu ca itu yaarpinantepli. ¹⁰ Siige modamoda iiwäreja biname cina gläämu jicrajige Lajaro ne cuta budre me aglime, ¹¹ ingle temiji pi bucurage Israela biname cina Yeesu me poto cidi me äbitinisi, teebine jitrungisi.

Yeesu Yerusalema me Abacitige

¹² Nuuja bimu cabu äsuplengta trii täapume lui biname cina itu tabasecretnumi, teepi itecijemige, egä Yeesu biiri tädenige Yerusalema me. ¹³ Teepi uli ciipe bine icnapimisi, eclige teebine awacletnäjame. Teepi baborage tagepogogo ca abayinisi egä,

“Acejiyame ne yaawepyeräjesi!

Yageyame me ngii cabu lui te tädenite, tabe miiji naawenege meebine!

Acejiyame te Israela mope biname ne miiji naawenege!”

¹⁴ Yeesu mamye dongki ne jepänige, siige acenutige teeme papa cabu me. Apu ibibi äbitige Oogäräneji mene, lui te jicinenige egä,

¹⁵ “Babo cewe lui Siiyona podo cabu, maane wälu gone!

Määme mope biname te aga tädenige mamye dongki papa cabu.”

¹⁶ Pui padare cabu abiberäja bägrä cina ai mule ne opo lica ewatnujisi, yepä Acejiyame te liba Yeesu ne budre cabu ca erpinan-tuji, teepi piba ngene jotwinujisi, egä apu oogäräneji gyene teeme poto cidi me, cuta teepi apu ituge wawena teeme täapume.

¹⁷ Lui biname cina jääpänepesi Yeesu lipu Lajaro ne gape cabu ca ala taasoglecepi, siige budre cabu ca yaarpinantepli ireclota me, teepi biname bine umle jaawenanemepesi.

¹⁸ Siige biname cina seclige Yeesu ne awacletnäjame, ingle teepi peei ciitaca mule poto cidi me ituge ätecija. ¹⁹ Puma cita ca Parisea sigu biname cina teemeteme ajananinisi egä, “Jepäneye! Mine äblicäco gemi nuuja mule ne wawena! Iyeta biname cina teebine ingwe icwenisi!”

Poto Griik Biname cina Yeesu ne Jirngisi

²⁰ Poto Griik biname cina cuta puga ge pui biname bime sobe cabu, lui cina Yerusalema me seclumi äsuplengta trii padare cabu Acejiyame ne awejename. ²¹ Teepi Pilipo bau me seclige. Tabe lui Betesaida cewe biname ge, lui cewe Galilaya probins ngalebora jage. Teepi Pilipo ne jejisi egä, “Babo biname, cine singi gemi Yeesu ne päpäname.” ²² Puma cita ca Pilipo ädige, Andrea ne jejige, siige teepi gigri aaclige Yeesu ne umle wawename. ²³ Yeesu teebibine jaajige egä, “Padare te bii tatyaramtige Acejiyame te awabudni-tame, egä teeme bau ca lui te täduji biname me äbituji, tabe lipu jamyacu apaclyera cama gyene. ²⁴ Cane toracarage jijenine weebibine: wiiti kuu te liba gawe cabu me lica yaatramuge, siige budre liba lica läbituge, teeme cabu ca äblicäco nuuja gwidape te agi. Yepä liba budre läbituge, siige bucurage kuu cina täpletnäruge. ²⁵ Laati te teeme ireclota täapume singi yaanajuge, tabe teeme ireclota ne yaapesaruge. Yepä laati te liba teeme ireclota täapume singi lica birige ai gawecewe cabu, tabe teeme ireclota ne yaamacetnäjuge iyeteta ireclota täapume. ²⁶ Laati te liba singi căme kaakesea wawename, tabe cane cama tädenige naace name pi egä căme kaakesea bägrä te emä lenajame cane luma. Căme Babe te eei ne opo gaabe me yaacituge, lui te căme kaakesea ne jaawenuge.”

Yeesu Teeme Budre poto cidi me Jiicenige

²⁷ “Page căme ngenecu mäpu gyene, siige cane miiji ngena iicaname! Nää, cane apu irecu lätumutene egä, ‘Babe, lui mäpu te tädenige căme niinäce gaabe me, maane iyeblingtepi.’ Eewe, cane äblicäco pepu irecu ätumuta, ingle cane aima tädujine ai mäpu cabu cewe oocaname. ²⁸ Babe, määme ngii me jamyacu apaclyera ne seboclomtepi!” Puma cita ca tagepogogo te cabucewe ca tädige egä, “Cane căme ngii me jamyacu apaclyera ne ituge aboclomta, cuta cane pagege căări aboclomta!”

²⁹ Lui biname cina puma aclajuteji icrajige, teepi liba ai tagepogogo itecijemige, teepi jicisi egä, “Maadubi ala ge pama,” yepä poto cina jicisi egä, “Acejiyame me mename seemo te mene tejige teebine.” ³⁰ Yeesu puma cita ca teebibine jejemige egä, “Ai tagepogogo te lica tädige căme name pi, yepä weeme name pi. ³¹ Siige page padare gyene ai gawecewe ne atraname. Ai gawecewe ne lui te ecanenige, teebine iyeblingtenisi page. ³² Cebine liba

gawe cabu ca atecwenta cabu me, cane iyeta biname bine pa saawademepene căme bau me.”³³ Ai mene iicema ca tabe eboclomtuge, tabe lipulipu gaabe cabu budre pa lăbitepi.

³⁴ Puma cita ca biname cina jejisi teebine egă, “Mime Cotre te nijenininige, egă Keriso, biname bine măpu cabu ca lui te cirege ăsecrera, tabe iyeteta lenaja myene. Maane cije piba lipulipu jiiците, egă Acejiyame bau ca lui te otni biname me ăbitame, teebine miiji cabu me atecwenta? Laasi nyene ai, lui te Acejiyame bau ca cirege otni biname me ăbitame?”

³⁵ Yeesu jejemige egă, “Apaclyera te cerămu matikolă padare weene cama pa yaanajepi. Weene otni-neye, apaclyera liba taatu camu pisi nyene weene cama, cije krokeciyye te itrugărinuge weebibine. Krokeciyye cabu lui te waatnuge, tabe umle lica gyene liiyeme otni.

³⁶ Weene ătrunga eciteye apaclyera cabu me, tabe liba pisi nyene weene cama, piba weene apaclyera cama biname birige.”

Israela Biname cina ătrunga căco Gemi

Ai mene ingwe gaabe ca Yeesu piba ădige, ămlitige biname bime bau ca. ³⁷ Yeesu puu bucurage ciitaca mule bine ituge waweneca Israela biname bime irewale je, yepă teepi lica jitrungisi teebine ³⁸ naace tăăpume Acejiyame me mename biname Isaya me mene te toraca me ăbitame egă,

“Yageyame, biname cina ătrunga căco ituge cime mene poto cidi me, piyyepu teepi umle căco măăme kokre.”

³⁹ Teepi naace popi ăblicăco ge ătrungame, ingle Isaya cuta itu jiiцуji egă,

⁴⁰ “Acejiyame te teeme irecu bine ireďărimе me jewenimuji, egă teepi cije căngena jăăpănusi.

Tabе teebibine mopemuli căco me jewenemuji,

egă teepi cije umle lăbitininusi,

piyyepu cuta tatatrongăruge căme bau me lui Acejiyame găne

naace name pi egă cane teebibine miiji wawename.”

⁴¹ Isaya ai mene jiiцуji, ingle tabe niinăce gaabe me Yeesu me kokre ne jepănuji, peei name pi tabe teeme poto cidi me apu jiiцуji.

⁴² Ngănuge puu iyeta ai mule cina ăpletnera, yepă cuta bucurage modamoda Israela biname cina Yeesu ne jitrungisi. Yepă Parisea sigu biname bime wălu name pi teepi cabucabu lica jitrungisi, cije teebibine ăyebłengăja mage teeme irecu ătumuta cabu ca.

⁴³ Teepi singi biname cina teeme tăăpume miijirage ngene atwana cama lenajame, yepă lica Acejiyame te.

Yeesu Mene Jiiцige Atrana poto cidi me

⁴⁴ Yeesu baborage tagepogogo ca jiicemige egă, “Laati te nătrunguge cebine, tabe cebine taatu lica nătrunguge, yepă cuta teebine jăătrunguge, cebine lui te nătyepuji. ⁴⁵ Laati te cebine năpănuge, tabe cuta jăăpănuge eei ne, cebine lui te nătyepuji. ⁴⁶ Cane tăđujine ai gawecewe cabu biname bine apaclyera tăăpume, egă iyeta lui cina cebine nătrungusi, teepi krokeciyye cabu lica page yaacrajemepi. ⁴⁷ Laati te yăătecijuge căme mene, yepă lica yaacatuge, cane teeme atrana biname lica găne, ingle cane lica itu tăđujine aima biname bine atraname yepă niyya cabu ca ăsecrerame. ⁴⁸ Atrana pisi nyene pui biname tăăpume, lui te cebine năgyuge piyyepu căme mene jăăgyemuge. Cane lui mene bine ituge iicema, pui cina teebine cirege atrana. ⁴⁹ Cane cămerage ngii cabu lica ituge iicema, yepă Babe lui te cebine nătyepuji, tabe te ituge ajanena cane ngena jajanename piyyepu iicemame. ⁵⁰ Cuta cane umle găne, egă Acejiyame lui mene jiicemimuge, iyeteta ireclota yăăcăranemuge biname bine pui mene te. Yoo siige, cane jiicemimune, Babe te ngena ituge jajanena cebine.”

13

Yeesu Teeme Abiberăja Băgră bime Ernge Jicisăjemige

¹ ăsupłengta trii liba nuuja bimu ge, Yeesu tabe umle ge, egă teeme padare te bii tatyaramtuge ai gawecewe ne abmalame siige Babe bau me acnenutame. Tabe iyeta padare singi ituge pui bime tăăpume, ai gawecewe cabu lui teemi nemi. Teeme budre te liba mameta me tăbitige, tabe lica teebibine jigymige, yepă tabe singi ge teeme tăăpume ngălu ngălugaabe oomlaname.

² Yeesu teeme abiberăja băgră cama liba deedei cabu jage, Satani te uja ngene atwana ecăruji Yuuda ne, lui Simona Isakariyota me băgră ge, tabe Yeesu ne awabame budre me aglıme. ³ Yeesu umle ge, egă Babe te iyeta kokre teebine ituge ceera. Tabe cuta umle ge, egă tabe Acejiyame bau ca itu tăđuji cuta teeme bau me acnenutenige. ⁴ Siige tabe abujăngtuge deedei loolo dade cabu ca, teeme căbletăăpe ne iyeblingtuge, taweli ca amlemaltige ibi cabu. ⁵ Piba tabe niyye ne disi cabu epadurige, siige gije abacitige abiberăja băgră bine ernge ăcisejame. Liba yepă ne jăăcisăjuge, pui taweli ca cuta nebo jăăcisăjuge, lui te teeme ibi

cabu amlomalteji ge. ⁶ Tabe liba Simona Peteru gome tädige teeme ernge äcisejame, Peteru jejige egä, “Yageyame, nää maane te äbitenite căme ernge äcisejame?” ⁷ Yeosu jejige egä, “Maane page umle lica gäte, cane ai lui ngena ne jewenenine, yepä maane ingwe ca umle pagege äbita.” ⁸ Peteru jejige egä, “Eewe, pipu padare te lica tädenige egä maane căme ernge äcisejame!” Yeosu jejige egä, “Cane liba mäame ernge lica nääcisäjemine, maane piba căme abiberäja băgrä lica gäte.” ⁹ Simona Peteru te jejige egä, “Yageyame, piba căme ernge taatu gone näcisäjute, yepä ime piiyepu mope cama näcisäjepii!” ¹⁰ Yeosu jejige egä, “Laati te liba gooni loowanguge, tabe nuuja gwidape tääpume singi lica, yepä tabe ernge taatu jääcisäjuge, siige tabe piba jugi căco birige. Weene jugi căco gemi, yepä weeme iyeta cina lica.” ¹¹ Yeosu umle ge, egä laati te teebine budre me pa jaawabepi, peei name pi tabe jiiçige, egä teepi iyeta jugi căco lica gemi.

¹² Yeosu liba apirige abiberäja băgrä bine ernge äciseja ca, tabe teeme căbletäape asigrige, acnenutige teeme puupu cabu me adnatame, piba abiberäja băgrä bine itemlimige egä, “Weene nää umle bäbitininiye, cane ngena bii jewenine weeme tääpume?” ¹³ Weene naininiye Abiberäja biname ca piiyepu Yageyame ca. Weene peei lui toraca mene jiiçeniye, ingle cane pipu gäne. ¹⁴ Siige liba cane, weeme Yageyame piiyepu Abiberäja biname te weeme ernge bii jicisäjemine, weene cuta miiji pepu weemeweme ernge äcisejana. ¹⁵ Cane ai ne naace tääpume bii jewenine weene cebine ätutename. ¹⁶ Cane toraca jijenininine, egä kaakesea băgrä te lica birige baborage teeme babo biname bau ca, cuta mename biname te babo lica birige teeme bau ca, teebine lui te jättyepuge. ¹⁷ Weene aga umle bäbitininiye ai mule poto cidi me, siige lipu gege gemi weene, liba apu läbitininuye.

¹⁸ Cane weeme iyeta poto cidi me ai mene lica jiiçenine, ingle cane umle gäne weene lipu biname gemi, cane lui bine ituge äjäcra. Oogäräneji mene te lipu jiiçenige egä, ‘Lui te cane cama deedei äbitenige, tabe cebine pa näcisärmutepi,’ ai mene te miiji toraca me äbitame. ¹⁹ Cane ai mene naace name pi niinäce gaabe me jijenininine weebibine, egä ai mule te liba pa läbitepi weene piba ätrungame, egä cane pui biname gäne, lui tääpume cane jijanininune weebibine. ²⁰ Cane toraca jijenininine, egä laati te yaacatuge, cane lui ne jättyepune, tabe cebine nacatuge. Piiyepu laati te cebine nacatuge, tabe cuta teebine yaacatuge, cebine lui te nätyepuji.”

Yeesu piiyepu Yuuda

(Matayo 26:20-25; Mareko 14:17-21; Luuka 22:21-23)

²¹ Ai mene iicema ingwe gaabe ca Yeosu mage ngenecu mäpu me äbitige, pajecurage jiiçige egä, “Cane toraca jijenininine weebibine, egä weeme yepä te page nawabenige cebine budre tääpume!” ²² Abiberäja băgrä cina teemeteme ire atwananinisi umle căco, egä tabe laati poto cidi me jiiçige ai mene.

²³ Abiberäja băgrä bime yepä te, Yeosu lui tääpume babo singi, tabe teeme gome adnatäneji ge. ²⁴ Simona Peteru teebine irecu cubu ca jewenige Yeosu ne ätemlame, egä tabe laati poto cidi me jiiçige peei mene. ²⁵ Siige pui abiberäja băgrä te äbyenutige Yeosu bau me, itemlige egä, “Yageyame, maane laati tääpume jiiçite peei mene?” ²⁶ Yeosu teebine jejige egä, “Cane liba buluduu pacu ne yiiglenutenine jurä cabu me, siige liba laati ne ecärenine, peese nyene pui biname.” Siige tabe buluduu pacu ne ecatige, yiiglenutige, ecäriige Yuuda ne, lui Simona Isakariyota me băgrä ge. ²⁷ Liba Yuuda buluduu ne juutecrige, piba taatu Satani te abacitige teeme trupa cabu me. Yeosu Yuuda ne jejige egä, “Maane ngena wawena mäte singi, watawata jeweni.” ²⁸ Nuuja abiberäja băgrä cina nuuja umle lica ge, egä Yeosu ngena tääpume teebine apu jejige. ²⁹ Ingle Yuuda lui teeme rarekaake ire atwi biname ge, poto abiberäja băgrä cina apu jengemige, egä Yeosu teebine jejige ai soriyomu tääpume gwidape aletname coo owecumete biname bine rarekaake ceerame. ³⁰ Siige Yuuda liba buluduu pacu juutecrige, tabe piba taatu asatige. Pui lui ciye ge.

Kirece Cotre

³¹ Yuuda liba asatige, Yeosu piba abiberäja băgrä bine jejemige egä, “Siige Acejiyame bau ca lui te täduji biname me äbituji, teeme jamyacu apacyera ne page jepänenisi, cuta Acejiyame me jamyacu apacyera ne jepänenisi teeme cabu ca. ³² Siige Acejiyame me jamyacu apacyera ne liba jepänenisi teeme cabu ca, piba Acejiyame te teeme Acejiyamerage cabu ca pajecu me jewenenige pui me jamyacu apacyera ne, teeme bau ca lui te täduji biname me äbituji. Tabe peei ne watatarage jewenenige. ³³ Căme miiçirage băgrăwale, cane matikăli padare taatu cerămu nanajinige weene cama. Weene cebine pa nămgepeye, yepä cane peei yepä mene jijenininine weebibine, cane lipu Israela biname bine ituge jaji, egä cane liiyeme ädenine, weene peeyeme äblicăco gemi otni. ³⁴ Cane weebibine kirece cotre icărininine: weene miiji weemeweme singi äbitena. Cane lipu weeme tääpume singi ituge, weene cuta miiji pepu weemeweme singi äbitena. ³⁵ Weene liba weemeweme singi läbitininuye, pui cabu ca biname cina umle birige, egä weene căme abiberäja băgrä gemi.”

*Yeesu piyepu Peteru**(Matayo 26:31-35; Mareko 14:27-31; Luuka 22:31-34)*

³⁶ Simona Peteru te Yeesu ne itemlige egä, “Yageyame, maane liiyeme ädenite?” Yeesu jejige egä, “Page maane äblicäco gäte cane cama otni, cane liiyeme ädenine, yepä maane ingwe ca cire tädepi.” ³⁷ Peteru jejige egä, “Yageyame, ngena name pi cane äblicäco gäne page maane cama otnime? Cane bamacetnäjine mämiji pi budre äbitame.” ³⁸ Yeesu jejige egä, “Maane nää toraca bamacetnäjite cämiji pi budre äbitame? Cane toraca mene naajenine, airage ciye cabu maane niinäce cebine nesae gääbu nainenite, paulo te ingwe ca ala piba sengenenige.”

14*Yeesu Gaabe Gyene Babe bau me*

¹ “Weene ngenecu mäpu gone! Acejiyame ne jitrungeye cuta cebine nätrungeye. ² Cäme Babe me mete cabu bucurage puupu piti nemi, siige cane ädenine weeme täapume amacetnäjame. Puupu liga lica cirege, cane piba weebibine apu lica cire jijinejine. ³ Cane puu niinäce ädenine weeme täapume puupu ne amacetnäjame, cane cuta cire tacnepene weebibine arwojame cäme bau me. Weene puma cire inajipi, cane luma. ⁴ Weene umle gemi gaabe, pui puupu cabu me lui gaabe te ädenige, cane luma pagege lenaja.”

⁵ Tooma Yeesu ne jejige, “Yageyame, cine umle lica gemi, maane liiyeme ädenite, cine piba lipulipu pagege umle äbita gaabe piyeme otnime?” ⁶ Yeesu Tooma ne jejige egä, “Cane age säne gaabe, cane age säne toraca, cane age säne ireclota. Nuuja gaabe lica gyene Babe bau me otni me, yepä cane säne gaabe. ⁷ Weene liba toraca umle cirege cane, weene piba cuta umle cirege Babe. Siige page ama cita ca weene umle gemi tabe; weene ituge teebine päpäna.”

⁸ Pilipo Yeesu ne jejige, “Yageyame, Babe niwabini cibibine! Cine peei taatu memi singi.” ⁹ Yeesu teebine jejige egä, “Pilipo, maane nää toraca umle cäco gäte cane, ngänuge cane puu lecalca padare weene cama itu nanajenanumi. Laati te liba cebine näpänuge, tabe cuta Babe ne jääpänuge, peei name pi maane lipulipu jicite egä, ‘Babe niwabini cibibine.’ ¹⁰ Maane nää ätrunga lica gäte, egä cane pisi näne Babe cabu, Babe pisi nyene cäme cabu. Cane cäme ngene atwana mene lica jicemimune, yepä Babe te cäme cabu sine, siige cäme cabu ca kaakesea jewenenige. ¹¹ Weene müji ätrunga, egä cane Babe cabu säne, Babe cäme cabu sine. Weene liba nuuja ingle name pi lica birige ätrunga, weene müji cäme kaakesea miji pi ätrunga. ¹² Cane toraca jijenininine weebibine, egä laati te cebine nätrunguge, tabe epu mule bine jaawenimuge cane liiyepu. Cuta cerämu potu jaawenimuge, ingle cane Babe bau me ädenine. ¹³ Iyeta weene lui täapume yäätumluye cäme ngii cabu, cane jaawenune weeme täapume naace name pi biname cina piba Bägrä cabu ca päpäname Babe me jamyacu apacyera ne. ¹⁴ Weene liba ngena täapume yäätumluye cäme ngii cabu, cane icärininune.”

Yeesu Abiberäja Bägrä bine Jejemige Aceji Seemo ne Ätjepame

¹⁵ “Weene liba singi cäme täapume, weene cäme mene ibi jaawenimuye. ¹⁶ Cane Babe ne itemlenine, tabe te nuuja Ätityerayame pa sicäripi weebibine. Pui te weene cama iyeteta pa yaanajepi. Tabe lui Seemo gyene, lui te saaboclomtuge, ngena gyene toraca. ¹⁷ Ätrunga cäco biname cina äblicäco teebine acata, ingle teepi äblicäco teebine päpäna coo teeme potu cidi me umle äbita. Yepä weene umle gemi tabe, ingle tabe weene cama enajenige piyepu tabe weeme cabu pagege lenaja.

¹⁸ Cane weebibine taatu lica pa sibmalipene, yepä cane cuta pa tacnenutepene weeme bau me. ¹⁹ Matikäli padare ingwe gaabe ca ätrunga cäco biname cina cebine lica pa näpänepesi, yepä weene pa näpänepeye. Ingle naace popi cane ireclota nanajinige, weene cuta ireclota pinajipi. ²⁰ Pui bimü cabu weene umle page äbitipeye, egä cane Babe cabu säne, weene cäme cabu temi, cane weeme cabu säne.

²¹ Laati te cäme mene ne yaacatuge, siige yäacwetnuge, tabe peese nyene biname, lui te cäme täapume singi. Laati te cäme täapume singi, cäme Babe te teeme täapume singi birige. Cane cuta singi gäne teeme täapume, siige teeme bau me pa laboclomtepene.” ²² Yuuda, lica Isakariyota me bägrä yepä nuuja Yuuda, tabe Yeesu ne jejige egä, “Yageyame, peei lipu gyene, egä maane cime bau me pa taboclomtepi, lica ätrunga cäco biname bime bau me?” ²³ Yeesu Yuuda ne jejige, “Laati te liba cäme täapume singi, tabe cäme abiberäja mene bine yäacwetnimuge. Cäme Babe te teeme täapume singi, siige cine cäme Babe cama pa niclepi teeme bau me teeme cabu lenajame. ²⁴ Yepä laati te liba cäme täapume singi lica, tabe cäme abiberäja mene bine lica yäacwetnimuge. Weene lui abiberäja mene bine ituge ätecija, cäme lica gemi, yepä cäme Babe memi, lui te cebine nätyepuji.

²⁵ Cane ai mene bii jijanininine weebibine, page cane liba weene cama camu pisi näne. ²⁶ Yepä Aceji Seemo, Acejiyame te lui ne cäme ngii cabu pagege ätjepa weebibine

ätityeraname, tabe te iyeta mule poto cidi me pa sibiberäjiipi piyepu cääri umle pa tiwena-niipi, cane ngena poto cidi me itu jijananiipene.

²⁷ Cane poode ne sebmalenine weeme bau me. Cane cämerage poode icärininine weebibine, peei name pi ngenecu mäpu gone, wälu gone! Pepu pana poode ne weene äblicäco päpäna ai gawecewe cabu ca. ²⁸ Weene bii nätecijiye cane licana ye egä, 'Cane weebibine page sibmalipene, cuta page tacnenutepene weeme bau me.' Weene liba cäme täápume toraca singi gemi, weene gege gemi, egä cane Babe bau me ädenine, ingle tabe baborage gyene cäme bau ca. ²⁹ Cane aga niinäce gaabe me iyeta bii jijananiinine weebibine naace täápume, egä ai cina liba pa läbitipesi, weene piba pagege ätrunga. ³⁰ Cane äblicäco gäne cerämu weene cama mene iicema, ingle ai gawecewe ne lui te ecaninige, tabe te tädenige. Tabe nuuja kokre lica gyene cäme täápume, ³¹ yepä ätrunga cäco biname cina miiji gemi umle äbita, egä cane singi gäne Babe täápume piyepu jaawenimune iyeta, tabe ngena täápume cebine ituge jaji.

Abujängineye! Biiri läsinago, naclege ama cita ca."

15

Waina Uli piyepu Teeme Ciipe

¹ "Cane age säne toraca waina uli, piyepu cäme Babe te calwacupi ire atwiyame gyene. ² Tabe cäme cabu ca yaacnapimuge iyeta ciipe bine, lui cina kuu cäco gemi. Yepä lui ciipe cina kuu cama birige, tabe cängenarage yaamacetnäjimuge, jugi bine jääglubäjemuge naace täápume teepi cerämu kuu päpäname. ³ Cäme mene te uja weebibine jugi cäco me ituge wawena. ⁴ Inajinege cäme cabu, piba cane cuta weeme cabu pagege lenaja. Ciipe te liba lica uli mage cabu birige lenaja, tabe äblicäco kuu päpäna. Pepu gemi weene cuta äblicäco kuu päpäna, weene liba cäme cabu lica birige lenaja.

⁵ Cane waina uli gäne, weene ciipe gemi. Laati te cäme cabu yaanajuge, cane lui me cabu nanajuge, tabe bucurage kuu jääpänimuge. Cäme cäco je weene nuuja gwidape ne äblicäco wawena. ⁶ Laati te cäme cabu lica yaanajuge, teebine yaajarusi uli ciipe ne liiyepu, siige maaje me läbituge. Maaje ciipe bine yaatomli-cmusi, uliobo cabu me yiisabimus, siige teepi puma layinusi. ⁷ Weene liba cäme cabu inajininuge piyepu cäme mene te liba weeme cabu pisi nyene, piba weene jääpänimuye iyeta, weene lui täápume cebine nätinäruye. ⁸ Weene liba bucurage kuu bine jääpänimuye, peei cabu ca cäme Babe me jamyacu apaclyera te babo läbituge, siige weene lawabudnitininuye, egä weene cäme abiberäja bägrä gemi. ⁹ Cäme Babe te lipu singi gyene cäme täápume, cane cuta pipu singi gäne weeme täápume. Weene cäme singi cabu inajipi. ¹⁰ Weene liba cäme mene bine yäacwetnimuye, cäme singi te weeme cabu yaanajuge, epu pana cane lipu cäme Babe me mene bine yäacwetnimune, siige teeme singi te cäme cabu yaanajuge.

¹¹ Cane ai mene naace täápume jijananiinine egä cäme gege te weeme cabu lenajame, cuta weeme gege te babo äbitame. ¹² Cane weebibine jijenininine, egä weene weemämu singi äbitanipeye, cane lipu weeme täápume singi ituge. ¹³ Eei gyene baborage singi, biname te liba teeme ireclota ne yääyemaluge budre me teeme binamewale bime täápume. ¹⁴ Weene liba cäme mene ibi jaawenimuye, weene cäme binamewale gemi. ¹⁵ Cane ingwe ca lica iyinininine weebibine kaakesea bägrä ca, ingle kaakesea bägrä te umle cäco teeme babo biname te ngena jewenenige. Yepä cane iyinininine cäme binamewale ca, ingle cane ituge weebibine jajanena iyeta, cane cäme Babe bau ca ngena ituge ätecijana. ¹⁶ Weene te cebine lica itu noomlepeye, yepä cane te weebibine itu joomlipene. Cane weebibine joomlipene, jijiipene otnime bucurage kuu bine päpäname, pepu kuu lui cina iyeteta gemi. Piba Babe te page icäripi iyeta gwidape, weene lui täápume yäätinäruye cäme ngii cabu. ¹⁷ Ai lui cäme singi gyene, egä weene miiji weemämu singi äbitanipeye."

Ätrunga cäco Biname cina Jäägyemusi Yeesu me Binamewale bine

¹⁸ "Liba ätrunga cäco biname cina weebibine jimugitninusi, weene gone ngene jitrimalinuge, egä teepi cebine niinäce pepu ituge ämugetna. ¹⁹ Weene liga ai gawecewe biname cama yepä cirege, teepi piba singi cirege weeme täápume, teepi lipu singi teeme täápume. Yepä weene teta cama yepä lica gemi, ingle cane te ituge weebibine teeme cabu ca omlana, peei name pi teepi weebibine jimugitninusi.

²⁰ Weene ngene gone jitrimalinuge, cane lipu jijininine egä, 'Kaakesea bägrä te baborage lica gyene teeme babo biname bau ca.' Peei name pi cebine liba ituge sabe wawena, cuta weebibine piba pagege sabe wawena. Biname cina liba cäme mene ituge ätecija, teepi cuta weeme mene piba pepu pagege ätecija. ²¹ Yepä teepi weebibine iyeta ai pa jiwenanipesi cämiji pi, ingle teepi umle lica gemi tabe, cebine lui te nätyepuji. ²² Cane liga lica cire tädejine teebibine mene jajanenname, piba teepi umle lica cirege, egä teepi niija mule biname gemi. Yepä page teepi äblicäco licana, egä teepi niija mule biname lica gemi. ²³ Laati te cebine

nämugitnuge, tabe cuta căme Babe ne jäämugetnuge. ²⁴ Cane liga biname bime sobe cabu epu mule lica cire jaawenemejine, lui bine nuuja te lica ituge waweneca, teepi piba umle lica cirege, egä teepi niyya mule biname gemi. Yepä teepi ituge päpäna, cane ngena ituge wawenena, siige teepi nimugetnusi cibibine Babe cama. ²⁵ Apu ibibi äbitenige teeme Cotre mene te egä, ‘Teepi papa taatu cewe je cebine nämugitnusi.’

²⁶ Cane pa täätyepene weeme bau me Aceji Seemo ne weebibine ätityeräjame piyepu aboclomtame, ngena gyene toraca. Tabe Babe bau ca pa tädepi, siige cebine pa naitnäjepi. ²⁷ Weene cuta pagege cebine aitneja, ingle weene cane cama ituge lenaja căme kaakesea agedna cabu ca.”

16

¹ “Cane naace täापume ai mene jijanininine egä weene ätrunga ne lica apesera. ² Israela biname cina weebibine teeme irecu ätumuta cabu ca pagege äyecreja. Cuta padare te page tädepi, liba lui cina weebibine budre me pa iglecipesi, teepi apu pa jaangemepi egä, ‘Cine miiji mule ne jewenisi Acejiyame täापume.’ ³ Teepi naace name pi apu pagege wawena, ingle teepi umle lica ituge Babe piyepu cane. ⁴ Yepä cane ai mene naace täापume jijanininine egä weene căme mene ngenaepecname, ai cina liba pagege äbita.”

Aceji Seemo me Kaakesea

“Cane niinäce ai poto cidi me lica jijipene weebibine, ingle cane weene cama ge. ⁵ Siige page cane teeme bau me ädenine, lui te cebine itu nätyepuji; yepä weeme nuuja te lica nätemlenige egä, ‘Maane liiyeme ädenite?’ ⁶ Siige page cane lipu jijanininine weebibine, pui name pi weene ngenecu mäpu gemi. ⁷ Cane toraca mene jijenininine weebibine, egä ai lui miiji gyene cane weeme bau ca äyeblyngtame, ingle cane liba lica äyeblyngtenine, piba Aceji Seemo te lica pagege weeme bau me otni weebibine ätityerame. Yepä cane liba äyeblyngtenine, cane pa täätyepene teebine weeme bau me. ⁸ Siige Ätityerame te liba pa tädepi, tabe te pagege awabudnäja ai gawecewe biname bime täापume niyya mule piyepu ngena gyene conocäco piyepu Acejiyame te lipu biname bine atrana. ⁹ Teepi cängena umle lica gemi, niyya mule ngena gyene, ingle teepi cebine lica nätrungenisi. ¹⁰ Teepi cängena umle lica gemi, ngena gyene conocäco, ingle cane ädenine Babe bau me, siige weene cebine ingwe ca lica pa näpänepeye. ¹¹ Piiyepu teepi atrana poto cidi me cängena umle lica gemi, ingle ai gawecewe ne lui te ecanenige, teebine uja ituge atrana.

¹² Căme bucurage mene piti nemi weebibine jajanename, yepä page weene ibibi lica gemi umle äbitame. ¹³ Yepä Aceji Seemo, lui toraca gyene, liba pagege otni, tabe te pa sibiberäjipi iyeta ngena gyene toraca. Tabe teemerage ngii cabu lica pagege iccama, yepä tabe eei mene pa jüicemepi, tabe ngena ituge ätecija. Tabe ciige gwidape poto cidi me pa jijanani. ¹⁴ Tabe te weeme täापume pagege awaba, egä cane lipu janyacu apacyera cama gāne, ingle tabe căme bau ca ngena mene pa yäätēcijanepi, pui mene pa jijanani weebibine. ¹⁵ Iyeta lui cina căme Babe memi, teepi cuta cămi nemi. Peei name pi cane apu jüicine, egä Aceji Seemo te pa yaacatepi, cane teebine ngena pagege ceera, siige piba weebibine pa jijanani.”

Mäpu Ngenae Atwana te Pa Lateplyngtepi Gege Me

¹⁶ “Matikäli padare ingwe gaabe ca weene cebine lica page näpänepeye. Cuta puma cita ca matikäli padare ingwe gaabe ca weene cuta cääri cebine page näpänepeye.” ¹⁷ Poto abiberäja bägrä cina teemeteme ätemläjinisi egä, “Tabe baa ngena täापume nijinige egä, ‘Matikolä padare ingwe gaabe ca weene lica page näpänepeye cebine. Cuta puma cita ca matikolä padare ingwe gaabe ca weene cääri cuta page näpänepeye cebine.’ Tabe cuta jüicige egä, ‘Apu gyene, ingle cane Babe bau me ädenine.’ ¹⁸ Ngena gyene ingle teeme ai ‘matikäli padare ingwe gaabe ca’ mene täापume. Mine umle lica gemi, tabe ngena täापume jüicenige.” ¹⁹ Yeesu umle äbitige, egä teepi singi peei poto cidi me ätemlame, siige tabe jeyemige egä, “Weene nää pui poto cidi me ngenae jötwanininiye, cane lipu jüininine egä, ‘Matikäli padare ingwe gaabe ca weene lica cebine pa näpänepeye. Cuta puma cita ca matikäli padare ingwe gaabe ca weene cuta cääri cebine pa näpänepeye.’ ²⁰ Cane toraca jijenininine, egä weene ele pingeni-tnipi, yepä ätrunga cäco biname cina gege pagege. Weene ngenecu mäpu cama pinajipi, yepä weeme peei ngenecu mäpu te gege me pa lateplyngtepi. ²¹ Magebi te liba bägrä ärngime läbituge, tabe ngenecu mäpu birige, ingle pui padare cabu baborage pita ne jaasicnantuge. Yepä liba bägrä ne jäärnguge, tabe pita ngenae jwäätrimaluge, ingle tabe gege birige, bägrä te lipu laplmluge ai gawecewe cabu me. ²² Cuta pepu gyene weeme täापume, weene page ngenecu mäpu cama gemi, yepä cane weebibine cääri pa jipänipene. Piba weene gege taatu pinajipi, siige nuuja te äblicäco gyene weebibine pui gege uutecra.

²³ Pui padare cabu weene cebine lica pagege ätemla nuuja gwidape poto cidi me. Cane toraca jijenininine, egä weene liba ngena täápume yäätinäruye Babe ne căme ngii cabu, tabe icărininuge. ²⁴ Weene Babe ne lica ituge ätinera nuuja gwidape täápume căme ngii cabu ngălu page. Itinärepeye, siige weene pa jepănepeye piba weeme gege te babo pa lâbitepi.”

Yeesu Gawecewe Mule bine Epremalemige

²⁵ “Cane ngene ca agli mene ca bii jijanininine weebibine ai mule poto cidi me. Yepă padare te pa tădepi, cane liba ngene ca agli mene ca lica pagege jajanena weebibine yepă cane pajecurage page jijanipene căme Babe poto cidi me. ²⁶ Pui padare cabu weene weemămu irecu pa pătumutanipeye Babe bau me căme ngii cabu; siige cane lica jijenininine, egă cane pagege weeme täápume irecu ätumuta Babe bau me, ²⁷ ingle Babe te teemămu singi gyene weeme täápume. Tabe naace popi singi gyene weeme täápume, ingle weene singi ituge căme täápume piiyepu weene ituge ätru-nga, egă cane Acejiyame bau ca tădujine. ²⁸ Cane Babe bau ca tădujine ai gawecewe cabu me, siige page cane ai gawecewe ne sebmalenine, acnenutenine Babe bau me.”

²⁹ Puma cita ca abiberăja băgră cina Yeesu ne jejisi egă, “Maane siige page pajecurage jicenenemite, lica ngene ca agli mene ca. ³⁰ Page cine siige umle băbitinago, egă maane umle gâte iyeta gwidape. Maane niinăce umle lâbitute biname cina singi ngena täápume ätemlame. Peei name pi cine siige jitrungenisi, egă maane Acejiyame bau ca itu tădujite.” ³¹ Yeesu jejemige teebibine egă, “Weene siige page jitrungeniye. ³² Padare te tădenige – siige uja bii tatyaramtige – weene liba eplidnăreniye weeme yepăyepă bime mete me, cebine taatu nabmaleniye. Yepă cane taatu lica găne, căme Babe pisi nyene cane cama. ³³ Cane naace name pi weebibine iyeta ai mene bii jijanininine egă weene căme cabu ca poodde ne păpăname. Ai gawecewe cabu weene măpu bine jăăpănanemuye, yepă wălu gone äbita, cane gawecewe mule bine ituge apremela.”

17

Yeesu Ireçu Ätumutenige Abiberăja Băgră bime täápume

¹ Yeesu liba mene iicema iyeta apirige, tabe ire acitige cabucewe me, jiiçige egă, “Babe, căme padare te biiri tatyaramtige. Maane biname bime bau me eboclomtepi, egă cane määme Băgră lipu jamyacu apaclyera cama găne piba cane biname bime cabu me pagege aboclomta, egă maane lipu jamyacu apaclyera cama gâte. ² Maane cebine conoacă itu năcărepete iyeta biname bine waadename naace täápume cane iyeteta ireclota ceerame iyeta eei biname bine, maane lui ituge ceera cebine. ³ Lui cina umle gemi maane, lui sâte yepă taatu toraca Acejiyame piiyepu cuta lui cina umle gemi cane, Yeesu Keriso, maane lui ne ai gawecewe cabu me nătyepujite, teepi uja iyeteta ireclota cabu me bebăcnisi.

⁴ Babe, cane määme jamyacu apaclyera ne ituge aboclomta ai gawecewe cabu, ingle cane siige bepirine, maane lui kaakesea itu năcărepete cane te wawename. ⁵ Babe, määme opo gaabe je maane pui yepă jamyacu apaclyera năcărepi, căme lui apaclyera puga ge, cane liba maane cama jage agedname niinăce gaabe me.

⁶ Cane ai biname bine umle ituge wawena määme poto cidi me, maane lui ituge äjăcra căme täápume ai gawecewe cabu ca. Teepi lui määme biname ge, yepă cebine itu năcărepete maane. Teepi määme mene ituge ätrunga, ⁷ siige page teepi umle gemi, egă iyeta maane lui ituge ceera cebine, määme bau ca gemi. ⁸ Maane lui mene itu năcărepete cebine, cane teebibine ituge jajanena, siige teepi becatisi. Teepi umle gemi, egă toraca gyene, egă cane määme bau ca itu tădujine. Teepi jitrungenisi, egă maane te cebine itu nătyepujite.

⁹ Cane ireçu ätumutenine teeme täápume. Cane lica ireçu ätumutenine biname bime täápume, lui cina icrajenige gawecewe mule cabu, yepă cane ai bime täápume ireçu ätumutenine, maane lui ituge cebine ceera, ingle teepi määmi nemi. ¹⁰ Iyeta lui cina cămi nemi, cuta määmi nemi; piiyepu lui cina määmi nemi, cuta cămi nemi. Biname cina teeme cabu ca jăăpănusi, egă cane lipu jamyacu apaclyera cama găne. ¹¹ Babe, cane siige page määme bau me ädenine. Cane ai gawecewe cabu lica pa nanajepi, yepă teepi ama pagege. Miijirage Babe, maane miiji määme ngii me kokre ca ire atwemame teebibine, lui ngii maane ituge cebine ceera, piba teepi yepă äbitame, mine liiyepu yepă gegi. ¹² Cane liba taatu aga ge teta cama, cane teebibine căngena ire jaatwemune määme ngii me kokre ca, maane lui ngii cebine ituge ceera. Cane ituge căngenarage teebibine ire atwema, siige nuuja te lica ituge apesera, yepă pui taatu gyene, lui te miiji otni niya puupu cabu me naace täápume Oogărăneji mene te toraca me äbitame.

¹³ Babe, cane page ädenine määme bau me. Cane ai mene naace täápume jicenenemine, cane liba taatu ai gawecewe cabu je, egă căme gege te teeme cabu babo äbitame. ¹⁴ Cane määme mene ituge jajanena teebibine, siige ai gawecewe muleyame biname cina teebibine jăămugetnemusi, ingle teepi gawecewe me lica gemi epu pana, cane lipu ai gawecewe me lica

gäne. ¹⁵ Cane lica naawejanenine maane teebibine äsecreraime ai gawecewe cabu ca, yepä cane naawejanenine maane teebibine awecetnärame Satani te oomlana wälu pi. ¹⁶ Teepi ai gawecewe me lica gemi cane liiyepu. ¹⁷ Määme mene ca lui toraca gyene, maane teebibine mara me jewenemepi määme täापume. ¹⁸ Maane cebine lipu itu nätyepujite ai gawecewe cabu me, cane cuta piyepu teebibine ituge ätyepa ai gawecewe cabu me. ¹⁹ Cane temiji pi căme ireclota ecitenine määme ime cabu naace täापume teepi cuta toracarage mara me äbitame määme täापume.”

Yeesu Irecu Ätumutenige Iyeta Ätrunga Biname bime täापume

²⁰ “Cane ai abiberäja bägrä bime täापume taatu irecu lica ätumutenine, yepä cane cuta irecu ätumutenine eei bime täापume, lui cina cebine pa nätrungepesi teeme aitneja name pi. ²¹ Cane irecu ätumutenine naace täापume teepi yepä me äbitame epu pana maane Babe te lipu căme cabu, cuta cane liiyepu määme cabu. Cane irecu ätumutenine, egä teepi cuta mine cama yepä me äbitame naace täापume ai gawecewe muleyame biname cina piba ätrungame, egä maane te nätyepujite cebine.

²² Cane teebibine yepä jamyacu apaclyera ituge ceera, maane lui näcärujite cebine, naace täापume teepi yepä me äbitame mine lipu yepä gegi. ²³ Cane teeme cabu pisi näne, maane căme cabu pisi näte teepi piba toraca yepä äbitame. Siige piba ai gawecewe muleyame biname cina umle äbitinini, egä maane te itu nätyepujite cebine piyepu maane te singi ituge teeme täापume, maane lipu singi ituge căme täापume.

²⁴ Babe, maane cebine ai abiberäja bägrä itu näcärepete, siige cane singi gäne teepi cane cama lenajame, cane luma pagege lenaja, cuta cane singi gäne teepi päpäname jamyacu apaclyera ne, maane lui cebine ituge ceera, inge maane niinäce singi ituge căme täापume, ingwe ca ai gawecewe ne jewenujite. ²⁵ Conocăco Babe, ai gawecewe muleyame biname cina umle lica gemi maane, yepä cane umle gäne maane piyepu ai cina umle gemi, egä maane te cebine itu nätyepujite. ²⁶ Cane meebine ituge awabudnita teeme bau me, cuta cerämu naawabudnäjinine naace name pi, egä määme lui singi pisi nyene căme täापume teeme cabu cuta lenajame cuta cane teeme cabu lenajame.”

18

Yeesu ne Joomlisi

(Matayo 26:47-56; Mareko 14:43-50; Luuka 22:47-53)

¹ Ai irecu ätumuta mene ingwe gaabe ca Yeesu piba ädige teeme abiberäja bägrä cama, siige teepi Kidrona calame ne yuurisi. Calame nuuja potu doro ca puga ge calwacupi cewe. Yeesu abiberäja bägrä cama piyeme ädige. ² Teeme budre me awaba biname Yuuda, tabe cuta umle ge pui cewe, inge Yeesu teeme abiberäja bägrä cama bucurage gäabu labasecretinini puma. ³ Puma cita ca Yuuda tädige pui calwacupi cabu me. Modamoda iiwäreja biname piyepu Parisea sigu biname cina teta cama jityepimisi yepä sange cubu biname bine piyepu potu iiwäreja mete awamuta biname bine. Teepi lampa piyepu ngale bine ewadimisi. Teeme cuta cubu gwidape puga ge.

⁴ Yeesu umle ge ngena te äbitenige teeme täापume, peei name pi tabe niinäce gaabe me awetäntige, jejemige egä, “Weene laati ne jirngeniye?” ⁵ Teepi jejisi egä, “Cine Yeesu Nasareta cewe biname ne jirngeni.” Yeesu jejemige egä, “Cane age säne.”

Pui biname bime sobe cabu cuta Yuuda puga ge, Yeesu ne budre täापume awabayame biname te. ⁶ Yeesu liba apu jejemige egä, “Cane age säne,” teepi ingwe gaabe me äsininini, siige itrametne-malemige gawe cabu me. ⁷ Yeesu cääri itemlimige egä, “Weene laati ne jirngeniye?” Teepi jejisi egä, “Cine Yeesu Nasareta cewe biname ne jirngeni.” ⁸ Yeesu jejemige egä, “Cane nata uja bii jijinine, egä cane age säne. Yoo, weene liba cebine närngeniye, weene ire taatu jicranemeye ai cina otnime.” ⁹ Apu toraca me bäbitige teeme niinäce gaabe mene te egä, “Cane nuuja ne lica ituge apesera, maane lui ituge cebine ceera.”

¹⁰ Simona Peteru me cubu turikä puga ge, siige tabe sisatige, jeläcnutige yepä biname me camu potu tablame ne iyeta. Tabe lui iiwäreja mope biname me kaakesea bägrä, ngii Malkus tage. ¹¹ Yepä Yeesu Peteru ne jejige egä, “Isinglanti cubu turikä ne siiti bora me. Nää, maane apu naangeneniye, egä cane singi gäne uucraname ai mäpu cabu ca, căme Babe te lui mäpu cebine ituge ceera?”

Yeesu ne Ecanisi Anas bau me Ätemleja täापume

¹² Cubu biname, teeme mope biname piyepu iiwäreja mete awamuta biname, teepi Yeesu ne joomlisi, seea ca jetäyisi, ¹³ siige ecanisi Anas bau me. Anas lui sasa mope iiwäreja biname ge, Kayapa me gite ge. Kayapa tage pui kāmäge cabu iiwäreja mope biname. ¹⁴ Tabe peese nyene biname, lui te Israela biname bine jejemige egä, “Ai lui müiji gyene yepä biname te budre äbitame iyeta biname bime täापume.”

*Peteru Yeesu ne Jeinige**(Matayo 26:69-70; Mareko 14:66-68; Luuka 22:55-57)*

¹⁵ Simona Peteru piiyepu nuuja abiberäja bägrä, teepi Yeesu ne ingwe icwäsi. Iiwäreja mope biname te umle ge pui nuuja abiberäja bägrä, peei name pi tabe Yeesu cama abacitige iiwäreja mope biname me mete caale ngalebora me. ¹⁶ Peteru caale kaake poto ca imyemutige. Puma cita ca pui nuuja abiberäja bägrä, iiwäreja mope biname te lui poto cidi me umle ge, tabe tacnenutige, grana ire atwi ngulebägrä ne jojige, siige Peteru ne sisinglantige caale ngalebora me. ¹⁷ Puma cita ca pui grana ire atwi ngulebägrä te Peteru ne itemlige egä, “Nää, maane pui biname me abiberäja bägrä yepä gäte?” Peteru jojige egä, “Eewe, cane lica.”

¹⁸ Pui lui gäbu padare ge. Kaakesea bägrä piiyepu iiwäreja mete awamuta biname cina uliobo yuungisi, siige gäbu jemajimige. Peteru cuta puga ge teeme sobe cabu gäbu jemajige.

*Iiwäreja Mope Biname te Yeesu ne Itemläjige**(Matayo 26:59-66; Mareko 14:55-64; Luuka 22:66-71)*

¹⁹ Iiwäreja mope biname te Yeesu ne itemläjige teeme abiberäja bägrä poto cidi me piiyepu teeme abiberäja mene poto cidi me. ²⁰ Yeesu teebine jejige egä, “Cane pajecurage biname bine jaajanemune piiyepu yaabiberäjimune abasecretna mete cabu ta piiyepu iiwäreja mete cabu, iyeta Israela biname cina liiyeme labasecretnaninusi. Cane nuuja mene ogä lica ituge iicana. ²¹ PEEI name pi maane ngeno me cebine nätemlite? Pui bine itemlimi, lui cina yäatecjanimuge, cane ngena ituge jajanena. Teepi umle gemi, cane ngena ituge iicema.”

²² Yeesu ai mene liba jicige, yepä awamuta biname lui tage teeme gome, ime ca maapace gome yoorige, jejige egä, “Iiwäreja mope biname gyene tabe. Maane lipulipu mene jejite teebine!” ²³ Yeesu jejige egä, “Cane liba niyaniya jicine, nawabudniti, ngena gyene niya. Yepä cane liba conocäco jicine, maane piba ngeno me cebine nooorite?”

²⁴ Piba Anas Yeesu ne ätäyäneji jityepige iiwäreja mope biname Kayapa bau me.

*Peteru Cääri Yeesu ne Jeinige**(Matayo 26:71-75; Mareko 14:69-72; Luuka 22:58-62)*

²⁵ Simona Peteru camu aclajuteji ge puga uliobo gome, gäbu jemajige. Lui biname cina aclajuteji ge teta cama, jejisi egä, “Nää, maane age säte nuuja teeme abiberäja bägrä?” Yepä tabe jeinige, jejemige egä, “Eewe, cane lica.” ²⁶ Iiwäreja mope biname me kaakesea biname bime yepä te, pui me ingle biname Peteru lui me tablame jeläcutitige, tabe Peteru ne itemlige egä, “Cije cane meebine lica nääpänine teta cama calwacupi je?” ²⁷ Peteru cääri jeinige, siige piba taatu paulo te ala sengenige.

*Pilato Yeesu ne Itemläjige**(Matayo 27:1-2; Mareko 15:1-5; Luuka 23:1-5)*

²⁸ Yeesu ne iiwäreja mope biname Kayapa me mete cabu ca isatisi, Rooma gabmani babo biname ngii Pilato bau me ecanisi. Pui lui krokerage ge. Israela biname cina lica ebäcnisi Pilato me mete cabu me, ingle teeme täapume cude gyene äsuplengta deedei loolo, teepi liba yääbäcnisi biname me mete cabu me, lui Israela biname lica ge. ²⁹ Siige Pilato asatige mete cabu ca teeme bau me, itemlimige egä, “Weene ai biname ne ngeno me secaniye cäme bau me? Tabe ngena niya ne ituge wawena?” ³⁰ Teepi jejisi egä, “Tabe liga conocäco cirege, cine piba mäame bau me lica cire saacanejisi.” ³¹ Pilato jejemige egä, “Yoo siige, weene ecaneje, weemämu eblawäpepeje weeme cotre ibi.” Israela biname cina Pilato ne jejisi egä, “Cime conocäco lica gyene biname ne budre me acitame.” ³² Ai te naace täapume äbitige Yeesu me niinäce gaabe mene teeme budre gaabe poto cidi me toraca me äbitame.

³³ Piba Pilato acnenutige teeme mete cabu me, Yeesu ne ala tesoglicige teeme bau me otnime, siige itemlige egä, “Nää, maane Israela biname bime mope biname gäte?” ³⁴ Yeesu jejige egä, “Maane nää mäame ngene atwanena mene jicite, coo nuuja cina bii naajisi meebine?” ³⁵ Pilato jejige egä, “Ebägä cane Israela biname gäne. PEEI lui weemerage biname piiyepu teeme modamoda iiwäreja biname, lui cina naacaniisi meebine cäme bau me. Maane ngena niya ne itu tewenumete?” ³⁶ Yeesu jejige Pilato ne egä, “Cane ai gawecewe mope biname bime pana lica gäne. Cane liga teeme pana cirege, cäme kaakesea bägrä cina cire laringejisi, cebine lica cire nabmalejisi Israela biname bime ime cabu. Yepä cane ai gawecewe mope biname bime pana lica gäne.” ³⁷ Piba Pilato Yeesu ne itemlige egä, “Nää siige toraca gyene, egä maane mope biname gäte?” Yeesu jejige egä, “Maane nata peega bii najite egä, ‘Maane mope biname gäte’. Cane aplimlujine piiyepu ai gawecewe cabu me naace täapume tädujine biname bine jajanename, egä ngena gyene toraca. Laatibi toraca mene ibi yaacrajuje, teepi nätecijusi cebine.”

³⁸ Pilato Yeesu ne jejige egä, “Ngena gyene toraca?”

*Pilato Yeesu ne Budre me Jitranige**(Matayo 27:15-31; Mareko 15:6-20; Luuka 23:13-25)*

Puma cita ca Pilato asatige mete cabu ca biname bime bau me, jejemige egä, “Cane nuuja ingle ne lica jepänine teebine budre me atraname. ³⁹ Yepä ai lui mule gyene egä cane äsuplengta soriyomu padare cabu yepä biname ne asatame krokeciye mete cabu ca weeme täápume. Weene nää singi gemi cane Israela biname bime biname ne asatame?”

⁴⁰ Biname cina ala abayaninisi egä, “Eewe, tabe lica! Cine singi maane Baraba ne asatame!” Baraba lui cubucubu biname ge.

19

¹ Piba Pilato jejemige Yeesu ne acaname adnana täápume. ² Cubu biname cina pägepäge seeasea ne jemlemaltisi, teeme mope cabu ecitisi krauni täápume piyepu ciriyäciriyä cäbletääpe ca esigreräjisi. Teepi ai ne ätutena pana jewenisi, egä tabe babo mope biname gyene. ³ Piba teepi seclige teeme bau me, jewablisi egä, “Sebore Israela biname bime mope biname,” siige ime ca yoorisii.

⁴ Puma cita ca Pilato cuta cääri asatige teeme mete cabu ca, biname bine puutucu je jejemige egä, “Weene ire! Cane teebine sisatenine weene päpäname, egä cane nuuja ingle ne lica jepänenine teebine atraname budre täápume.” ⁵ Puma cita ca Yeesu tasatige. Pägepäge seeasea puga ge teeme mope cabu piyepu pui ciriyäciriyä cäbletääpe cama ge tabe. Pilato jejemige egä, “Jepäneye, age sena biname!”

⁶ Liba modamoda iiwäreja biname piyepu iiwäreja mete awamuta biname cina teebine jepänisi, teepi ala abayaninisi egä, “Baarge uli cabu jibyecreye! Baarge uli cabu jibyecreye!” Pilato teebine jejemige egä, “Weene weemämu ecaneye teebine, baarge uli cabu jibyecreye. Cane nuuja ingle ne lica jepänenine teebine budre me acitame.” ⁷ Israela biname cina Pilato ne jejisi egä, “Cime cotre te jüicenige, egä tabe miiji budre äbita, ingle tabe itu tainanumi Acejiyame me Bägrä ca.”

⁸ Pilato liba itecijige ai mene, tabe baborage wälu äbitige, ⁹ abacitige mete bora me. Tabe puga Yeesu ne itemlige, “Maane luma cita ca gäte?” Yepä Yeesu bojäcu ge, nuuja mene lica jüicige. ¹⁰ Pilato jejige egä, “Nää, maane singi lica gäte cäme mene awecnistame? Cije maane umle lica gäte, egä cäme conocäco pisi nyene meebine asatame coo baarge uli cabu acitame?” ¹¹ Yeesu jejige egä, “Määme conocäco ebä lica cirege, Acejiyame te liba lica cire nääcäreji meebine, peei name pi laati te cebine nacitige mäame ime cabu, teeme niija lui baborage gyene.”

¹² Pilato liba ai mene itecijige, tabe naabe liga äbitanige Yeesu ne asatame, yepä Israela biname cina ala abayaninisi egä, “Maane liba teebine sisatenite, maane Rooma gawe babo mope biname Siisa me biname lica gäte. Lui biname te lainuge mope biname ca, tabe Siisa ne yääcisärmutuge.”

¹³ Pilato liba itecijige biname cina apu ala abayena je, tabe puma cita ca Yeesu ne sisatige, ädige, adnatige emä, biname bine luma jaatranimusii. Pui puupu lui kula ca acwabäneji ge, peei name pi einenisi ‘Kula Puupu’ ca. Heberu mene ca lui egä ‘Gabata’.

¹⁴ Ai mule te äpletnutige bimu duusa poto cidi me, äsuplengta trii bimu me niinäce gaabe ca lui bimu ge. Pilato Israela biname bine jejemige egä, “Peese nyene weeme mope biname.”

¹⁵ Teepi ala abayaninisi Pilato bau me egä, “Budre me egli, budre me egli! Baarge uli cabu jibyecreye!” Pilato teebine itemlimige egä, “Cije weene singi gemi cane weeme mope biname ne baarge uli cabu me äbyecrame?” Modamoda iiwäreja biname cina jejisi egä, “Cime nuuja mope biname lica gyene, yepä Siisa sine!”

¹⁶ Puma cita ca Pilato Yeesu ne ecitige teeme ime cabu teepi teebine baarge uli cabu acitame.

*Yeesu ne Baarge Uli cabu Jibyecrisi**(Matayo 27:32-44; Mareko 15:21-32; Luuka 23:26-43)*

Puma cita ca teepi Yeesu ne ecanisi. ¹⁷ Tabe teeme baarge uli ne teemämu ecanige. Teepi atyarige cewe me lui ne einenisi ‘Mopekaake Cewe’ ca, Heberu mene ca lui ‘Gologota’.

¹⁸ Teepi puga teebine toto ca jibyecrisi baarge uli cabu. Neeneni biname bine cuta puga jääbyecrisi teeme gome, yepä lui nuuja poto ca cuta yepä lui nuuja poto ca, siige Yeesu teeme cole je. ¹⁹ Pilato jejemige oogärame egä, YEESU NASARETA CEWEYAME, ISRAELA BINAME BIME MOPE BINAME, siige pui mene äbyecrame baarge uli cabu Yeesu me mope gome. ²⁰ Bucurage Israela biname cina ecnemisi pui mene bine, ingle lui puupu cabu jibyecrisi, cudecewe lica ge babo cewe gome ca. Pui mene lui oogäräneji ge Heberu mene ca, Latin mene ca, Griik mene ca. ²¹ Modamoda iiwäreja biname cina jejisi Pilato ne, “Maane ngeno me yoogärite egä, ‘Israela biname bime mope biname.’ Maane cire yoogärejite egä

‘Ai biname te teemämu lainuge Israela biname bime mope biname ca.’ ” ²² Pilato jejemige egä, “Cane ngena bii byoogärine, pepu yaanajepi!”

²³ Cubu biname cina liba Yeesu ne baarge uli cabu toto ca jibyecrisi, peei ingwe gaabe ca teepi teeme cäbletääpe bine jewadimisi, jebelanemisi, fooa tomi bine jewenimisi, ingle teepi fooa biname ge. Puga ge nuuja cäbletääpe, lui mucmucu ge, äswäräneji deedi lica ge, Yeesu lui asigräneji yaacananuge ngalebora ca. ²⁴ Teepi jüicisi egä, “Mine ai ne gone yäädericusii, yepä mine ngii cama kula bine yiisabäjenenemisi päpäname, egä laati te ecatenige.” Apu ibibi äbitige Oogäräneji mene te egä, “Teepi cäme cäbletääpe bine jebelanemisi, piyepu bääclena äbäclaninisi cäme yepä cäbletääpe tääpume.” Yoo, cubu biname cina pepu jewenisi.

²⁵ Yeesu me baarge uli gome jeclajutemige teeme mage, piyepu teeme mage me maade, cuta Kloopa me coga Mariya piyepu Mariya Magadala ceweyame magebi. ²⁶ Yeesu liba jopänige teeme mage ne ämyemuteji teeme baarge uli gawe me pui abiberäja bägrä cama, tabe lui tääpume babo singi, siige tabe teeme mage ne piba jojige egä, “Yääye, ire määme bägrä peese nyene määme gome!” ²⁷ Piba tabe pui abiberäja bägrä ne jejige, “Ire, määme mage peeto nvene!” Peema cita ca pui abiberäja bägrä te ocanige Yeesu me mage ne teeme mete me lenajame.

Yeesu me Budre

(Matayo 27:45-56; Mareko 15:33-41; Luuka 23:44-49)

²⁸ Yeesu umle ge, egä teeme kaakesea ne bepirige. Naace tääpume Oogäräneji mene te toraca me äbitame tabe jüicige egä, “Cane niije mäne.” ²⁹ Caapocapo waina niije puga ge. Puma cita ca yepä biname te waarpopale pana gwidape ne yüiglenutige pui waina niije cabu me, cusopi suru ca jigadige, ewepäntige, Yeesu me tage cabu ecitige, ³⁰ siige tabe enige. Piba ingwe ca tabe jüicige egä, “Iyeta cäme kaakesea bine siige biiri bepirimine.” Piba teeme mope te ergo ecirige, siige tabe budre äbitige.

Yeesu ne Drawace Gome Jigadisi

³¹ Pui lui Israela biname bime Sabade amaceträja bimu ge, peei name pi teepi eclige Pilato ne jajime, egä lipu gyene baarge uli cabu lui nesae biname bime pupuwace kaake bine acnapecame piyepu budrekaake bine ätrungame. Teepi singi lica Sabade bimu te puma wawenname budrekaake bine atacwäneji baarge uli cabu, ingle pui Sabade lui baborage bimu ge teeme tääpume. ³² Puma cita ca cubu biname cina eclige, Yeesu cama lui neeneni biname bine jääbyecrisi, teepi teeme pupuwace kaake bine icnapimisi. ³³ Teepi liba seclige Yeesu bau me, teepi teebine jepänisi budre, peei name pi teeme pupuwace kaake bine lica ääcnäputisi. ³⁴ Piba teeme yepä te kalaku ca jigadige teebine drawace gome. Pui dupe cabu ca uudi piyepu niije cina tapiräsi. ³⁵ Yoo lui te ai ne jepänuji, tabe jeitnäjenige naace tääpume weene cuta piba ätrungame. Tabe ngena jeitnäjenige, toraca gyene. Tabe umle gyene, egä tabe toraca mene jüicenige. ³⁶ PEEI cina äbitinisi ai Oogäräneji mene te ibibi äbitame egä, “Teeme nuuja kaake ne lica pagege ägäbuta.” ³⁷ Cuta nuuja gome jüicenige egä, “Teepi teebine ire jetwenisi, kalaku ca lui ne drawace gome jigadisi.”

Yeesu ne Gape cabu Ecitisi

(Matayo 27:57-61; Mareko 15:42-47; Luuka 23:50-56)

³⁸ Ai ingwe gaabe ca yepä biname ngii Yoosepa, Arimatea cewe biname, te ädige Pilato bau me. Tabe cuta peese nyene yepä Yeesu me abiberäja bägrä. Yepä tabe cabucabu lica jitrungige, ingle tabe wälu ge Israela modamoda biname bime tääpume. Tabe Pilato ne itinärige Yeesu me budrekaake ne ätrungentame. Pilato teebine ‘yoo’ mene jejige, siige Yoosepa ädige Yeesu me budrekaake ne ätrungentame. ³⁹ Yepä biname ngii Nikodemo, tabe peese nyene Yeesu ne lui te ciye cabu yäädärepi, tabe cuta tädige piyeyeme. Tabe secanige teeti kilo miijirage lengolengo ngängye, lui wawenäneji ge miira uli ngedo ca piyepu aloe uli miigi ca. ⁴⁰ Teepi Yeesu ne itrungentäsi, cäbletääpe bine ipyacemäsi pui ngängye ca, siige tope etnäsi. Israela biname cina apu jaawenimusi teeme budrekaake bine gape cabu acraname. ⁴¹ Pui puupu gome Yeesu ne luma baarge uli cabu ecitisi, calwacupi puga ge. Pui calwacupi cabu kula bora uureji ätruna cäco gape puga ge. ⁴² Ingle Sabade bimu me amaceträja bimu ge, peei name pi teepi puma ecitisi, ingle pui gape lui teeme budre puupu mameta ge.

20

Yeesu Budre cabu ca Arpinantige

(Matayo 28:1-8; Mareko 16:1-8; Luuka 24:1-12)

¹ Sande krokerage baani te liba seclitige, Mariya Magadala cewe magebi te piba oclige gape ängrärame, siige jepänige, egä baborage kula te apeträngteji gyene gape grana gome ca. ² Puma cita ca tabe uuwamenamena oclige Simona Peteru piyepu pui nuuja abiberäja

bägrä bau me, Yeesu lui tääpume baborage singi, siige jaajige egä, “Teepi mime Yageyame ne becatisi gape cabu ca. Cine umle lica gemi, teebine luma bii becatisi?”

³ Piba Peteru piiyepu pui nuuja abiberäja bägrä aalige gape cabu me. ⁴ Teepi niinäce yepä ibi uuwamäsi, yepä pui nuuja abiberäja bägrä te Peteru ne itucäridge, siige niinäce atyaramtige gape gome me. ⁵ Tabe äcupige, apepmalige gape bora me, bulubulu cäbletääpe bine jepänimige, yepä tabe lica abacitige. ⁶ Teeme ingwe ca Simona Peteru te tädige, siige gaabe ta abacitige gape bora me. Tabe jepänimige bulubulu cäbletääpe bine puma, Yeesu ne lui ca tope setnumesi, ⁷ cuta cäbletääpe ne jepänige, teeme mope ne lui ca tope setnumesi. Pui cäbletääpe lui mara gome enajige, lica poto cäbletääpe luma. Pepu tope enajige, Yeesu me mope ne lipu setnumesi. ⁸ Piba pui nuuja abiberäja bägrä, lui te niinäce atyaramtige, tabe cuta abacitige. Tabe liba jepänige iyeta, siige tabe piba jitrungige. ⁹ Teepi camu umle cäco aanajige, Oogäräneji mene te lipu jicenige, egä tabe budre cabu ca cirege arpinenta. ¹⁰ Puma cita ca abiberäja bägrä cina acnenutäsi mete me.

*Yeesu Aboclomtige Mariya Magadala Ceweyame Magebi bau me
(Matayo 28:9-10; Mareko 16:9-11)*

¹¹ Mariya puga ge ele cama aclajuteji gape grana gome. Tabe liba ele cabu camu ge, tabe piba apepmalige gape cabu me, ¹² neeneni Acejiyame me mename seemo bine jääpäniige adnatäneji ge pui puupu cabu, Yeesu ne luma secitumesi. Teepi bulubulu cäbletääpe asigräreji ge. Nuuja te lui mopingle jage, nuuja te lui ernge gome jage, siige teepi Mariya ne jöjäsi egä, ¹³ “Magebi, maane ngeno mäte ele?” Tabe jaajige egä, “Teepi cäme Yageyame ne becatisi. Cane umle lica gäne baa luma becatisi.”

¹⁴ Ai mene ingwe gaabe ca tabe atatröngtige, jepänige Yeesu ne aclajuteji, yepä tabe teebine opo lica ewatnige. ¹⁵ Yeesu utemlige egä, “Magebi, maane ngeno mäte ele? Laati ne jirngenite?” Mariya apu jongige, egä calwacupi ire atwi biname ge, peei name pi tabe jejige egä, “Babo biname, maane liga Yageyame ne becatite, cebine naji, maane luma bii becatite, cane piba oclenine acatame.” ¹⁶ Yeesu jöjige teebine egä, “Mariya!” Piba Mariya cääri atatröngtige, teebine jejige Heberu mene ca egä, “Raboni.” Peei lui egä ‘Abiberäja biname.’ ¹⁷ Yeesu Mariya ne jöjige egä, “Gone cebine noomlute, ingle cane camu gäne cäro Babe bau me otni. Maane äte ocli cäme abiberäja bägrä bime bau me, jejemepi, egä cane ädenine teeme bau me, lui sine cäme Babe piiyepu teeme Babe, cäme Acejiyame piiyepu teeme Acejiyame.” ¹⁸ Piba Mariya Magadala cewe magebi te oclige, teeme abiberäja bägrä bine jejemige egä, “Cane Yageyame ne bii jepänine,” piiyepu tabe jejemige Yeesu teebine ngena jöjige.

*Yeesu Aboclomtige Teeme Abiberäja Bägrä bime bau me
(Matayo 28:16-20; Mareko 16:14-18; Luuka 24:36-49)*

¹⁹ Pui Sande mämleteca me abiberäja bägrä cina abasecretnige yepä mete cabu me, siige gaabe armeji ge Israela modamoda biname bime wälu name pi. Yeesu puma cita ca tädige, teeme cole je jeclajutige, jejemige egä, “Poode weene cama yaanajige!” ²⁰ Ai mene iicema ingwe gaabe ca tabe teeme ime aaboclomtige teeme bau me cuta drawace ne eboclomtige. Abiberäja bägrä cina babo gege ge, teepi lipu Yageyame ne jepänisi. ²¹ Piba Yeesu cääri jejemige egä, “Poode weene cama yaanajige! Cäme Babe te lipu cebine nätyepuji, cane pepu jityepininine weebibine.” ²² Puma cita ca tabe buuwemope ne jipwälutige teeme bau me, jejemige egä, “Aceji Seemo ne ecateye!” ²³ Weene liba biname ne jaajuye egä ‘Määme niija mule äcisäjeji gemi,’ siige tabe kälyä läbituge. Yepä weene liba jaji cäco peei mene, tabe piba kälyä lica läbituge.”

Tooma me Ätrunga cäco Mule

²⁴ Tooma, twelb abiberäja bägrä bime yepä, lui ne einenisi ‘Päädepäde’ ca, tabe poto abiberäja bägrä cama lica ge pui tomi cabu, Yeesu liba teeme bau me aboclomtige. ²⁵ Teepi Tooma ne jejisi egä, “Cine Yageyame ne biiri jepänisi.” Tooma jejemige egä, “Cane ebä jitrungininine weebibine, cane liba toto dupe bine jääpänenine teeme ime cabu, piiyepu ime kukluta aacitenine piiyeme, cuta liba ime ecitenine teeme drawace cabu.”

²⁶ Seben bimü ingwe gaabe ca abiberäja bägrä cina cääri abasecretnige yepä mete me. Tooma cuta puga ge. Gaabe armeji ge, yepä Yeesu abacitige, jeclajutige teeme cole je, jejemige egä, “Poode weene cama yaanajige!” ²⁷ Puma cita ca tabe Tooma ne jejige egä, “Maane ire cäme ime cabu me! Määme ime kukluta taaciti ama cäme ime dupe cabu, cuta drawace cabu määme ime seciti. Gone ätrunga cäco naanajuge, yepä maane miiji ätrunga!” ²⁸ Tooma Yeesu ne jejige, “Cäme Yageyame, cäme Acejiyame!” ²⁹ Yeesu teebine jejige egä, “Maane ätrunga gäte page, maane lipu näpänite cebine. Gege gemi eei biname, päpäna cäco je lui cina ätrunga.”

Ai Peba me Ingle Ngena Gyene

³⁰ Yeesu bucurage poto ciitaca mule bine jewenimige teeme abiberäja bägrä bime irewale je, yepä teepi oogäräneji lica gemi ai peba cabu. ³¹ Ai bine ituge oogäretnäja weene piba ätrungame, egä Yeesu lui Keriso sine, Acejiyame me Bägrä gyene, siige weene liba birige ätrunga, weene piba iyeteta ireclota ne jääpänuye.

21

Yeesu Aboclomtige Seben Abiberäja Bägrä bime bau me

¹ Ai ingwe gaabe ca Yeesu teeme abiberäja bägrä bime bau me cääri aboclomtige Tiberiya sawa gome. Peei mule lui apu gyene: ² Simona Peteru piyepu Tooma, lui ne 'Päädepäde' ca eninisi, piyepu Natanaela Kaana cewe biname Galilaya probins cabu ca piyepu Jebedayo me bägrä neeneneni, cuta nuuja abiberäja bägrä neeneneni, iyeta teepi puga ge. ³ Simona Peteru poto bine jejemige egä, "Cane cibubade me lädene." Teepi jejisi egä, "Cine cuta naclenige maane cama." Piba teepi eclige, poo cabu me acenärige, yepä pui ciye cabu teepi nuuja cibü ne lica joomlisi.

⁴ Krokerage bimü te liba tajarige, Yeesu niye ligiligi jeclajutige, yepä abiberäja bägrä cina opo lica ewatnisi teebine. ⁵ Piba tabe itemlimige egä, "Cäme binamewale, cibü bine weene lica hii joomlemiye?" Teepi jejisi egä, "Eewe, cime nuuja gwidape lica gyene." ⁶ Tabe jejemige egä, "Weeme net ne ijareye poo camu poto cidi ca, piba weene cibü bine joomlenemiye," siige teepi net ne pui poto cidi me ijarisi piyeme. Mäpu name pi teepi äblicäco ge net ne aswecla poo cabu me acenutame, ingle bucurage cibü bine joomlemige.

⁷ Puma cita ca pui abiberäja bägrä, Yeesu lui täápume babo singi ge, Peteru ne jejige egä, "Ai lui Yageyame sine." Simona Peteru liba itecijige, egä Yageyame sine ai, tabe cäbletääpe ca amlemaltige, ingle tabe cäbletääpe bine iirecäneji ge, siige piba niye cabu me uuplige doro atwangame. ⁸ Poto abiberäja bägrä cina poo ne sewäcisi doro me, net ne cuta selädniisi teeme cibü cama, ingle teepi cudecewe lica ge doro cabu ca, yepä hanred miita pana padare ge doro oomlaname. ⁹ Teepi liba poo cabu ca ärpige, teepi jepänisi egä cibü muye wiiryere cabu puga ge piyepu buluduu cuta puga ge. ¹⁰ Yeesu jejemige egä, "Sewademeye poto cibü, weene lui bine joomlemiye."

¹¹ Yoo, poo liba doro jage, Simona Peteru acenutige poo cabu me, net ne piba selädniige doro me bucurage modamoda cibü cama. Pui lui yepä hanred fiftitri cibü ge. Ngänuge puu bucurage cibü, yepä net te lica äderäriige. ¹² Yeesu jejemige egä, "Naaclege deedei äbitame." Abiberäja bägrä cina wälu ge ätemlame egä, "Maane laasi näte?" ingle teepi umle ge, egä ai lui Yageyame sine. ¹³ Puma cita ca Yeesu ädige, buluduu sewadige, teebibine ecäranemige piyepu cibü ecäranemige. ¹⁴ Ai lui Yeesu nesae me aboclomtige abiberäja bägrä bime bau me, tabe liba budre cabu ca arpinantige.

Yeesu piyepu Peteru

¹⁵ Teepi liba deedei äbita siige, piba Yeesu Simona Peteru ne itemlige, "Simona Yoane me bägrä, mäame singi cäme täápume nää baborage gyene ai poto bime singi cabu ca?" Tabe jejige egä, "Yoo Yageyame! Maane umle gäte, egä cane singi gäne mäame täápume." Yeesu teebine cuta jejige, "Maane cäme maamoi bine cängena engärempi!" ¹⁶ Puma cita ca tabe neeneneni me itemlige egä, "Simona Yoane me bägrä, äi nää maane singi gäte cäme täápume?" Peteru jejige, "Yoo Yageyame! Maane umle gäte, egä cane singi gäne mäame täápume." Yeesu jejige, "Maane cäme maamoi bine ire natwemepi." ¹⁷ Puma cita ca tabe nesae gääbu me cuta itemlige egä, "Simona Yoane me bägrä, äi nää maane singi gäte cäme täápume?" Peteru ngenecu mäpu me äbitige, ingle Yeesu lipu nesae gääbu teebine itemläjige yepä mene ca. Puma cita ca tabe Yeesu ne jejige egä, "Yageyame, maane umle gäte iyeta gwidape, cije maane umle gäte, egä cane singi gäne mäame täápume!" Yeesu jejige teebine, "Cäme maamoi bine engärempi. ¹⁸ Cane toraca naajenine, maane liba mamye biname ge, maane lamacetnäjute, siige lädute maane liiyeme singi otnime. Yepä maane liba moda je cirege, maane ime cire utepi, siige nuuja te cire naamacetnäjepi otnime, cire naacanepi, maane liiyeme singi lica gäte otnime."

¹⁹ Ai iicema ca Yeesu eboclomtige Peteru lipulipu gaabe ca cirege budre päpäna Acejiyame me ngii ne awepentame. Piba Yeesu Peteru ne jejige egä, "Cebine ingwe näcwepi!"

Yeesu piyepu Nuuja Abiberäja Bägrä

²⁰ Puma cita ca Peteru atatröngtige ingwe gaabe me, pui nuuja abiberäja bägrä ne jepänige, Yeesu lui täápume babo singi ge. Tabe peese nyene, lui te Yeesu cabu me läbyenutepi, teepi liba deedei äbita cabu jage, yäätlemlepi egä, "Yageyame, laati te meebine naawabenige budre me?" ²¹ Yoo siige, Peteru liba teebine jepänige, tabe Yeesu ne jejige egä, "Yageyame, ai biname täápume ngena te cire läbitepi?" ²² Yeesu Peteru ne jejige egä, "Cane liba singi gäne tabe ama lenajame ngälu cane cire tacnenutepene, peei mäame bau lica gyene. Maane cebine yepä ingwe näcwepi!"

²³ Siige mene te iyeta otneñäjjige eei biname bime cabu me, Yeesu ne lui cina jitrungenisi, egä ai abiberäja bägrä te lica budre cire läbitepi. Yepä Yeesu lica jiiçige, egä tabe budre lica cire läbitepi, yepä tabe jiiçige egä, “Cane liba singi gäne tabe ama lenajame ngälu cane cire tacnenutepene, peei mäame bau lica gyene.”

²⁴ Tabe sine pui abiberäja bägrä, lui te jeitnäjemige iyeta ai mule bine, cuta tabe te yoogäremige iyeta ai mene bine. Mine umle gemi, egä tabe ngena jiiçemige, toraca gyene.

²⁵ Yeesu bucurage poto mule bine jewenimige. Iyeta peei bine liba oogära je yepäyepä, cane apu ngene jotwanenine, egä puupu ibi lica gyene ai gawecewe cabu iyeta peei peba bine acraname. Cäme mene ngälu peese nyene.

APOSTOLO: YEESU ME ÄTYEPÄNEJI BINAME BIME KAAKESEA POTO CIDI ME

¹ Yoo Teopilo, cane niinäce lui mene ne itu yogärepenne, pui cabu puga ge mene Yeesu me kaakesea piyepu abiberäja poto cidi me, teeme kaakesea me gije abacita cabu ca ² ngälu Acejiyame te teebine cabucewe me ecatuji. Yeesu camuge cabucewe me otni, tabe lui biname bine ituge jäjäcra teeme ätyepäneji biname me äbitame, teebibine bäärmi jegednemige Aceji Seemo me kokre ca. ³ Yoo, teeme budre ingwe ca, Yeesu lui footi bimu ngalebora bucurage padare cabu awabudnitaniige teeme opo gaabe, pipu pi teepi toraca umle äbitininisi egä tabe lui ireclota ge. Teepi teebine jepänanisi, tabe mene teebibine jejananemige Acejiyame te lipu biname bine yaawademuge. ⁴ Tabe liba ten cama enajige, jejemige teebibine egä, “Gone saabmaluye Yerusalema ne, yepä puma jewagrijepeye Babe te lui ätiyera poto cidi me umle ituge wawena, piyepu cane lui poto cidi me jijipene. ⁵ Yoo, Yoane nüye yaacituge biname bime cabu teeme nüya mule äcisejame, yepä nesae pana bimu ingwe ca Acejiyame pa yaacitepi Aceji Seemo weeme yepäyepä trupa cabu me.

Yeesu Ädige Cabucewe me

⁶ Yeesu me ätyepäneji biname cina ten cama liba abasecretnige, teebine itemlisi egä, “Yageyame, nää maane ai padare cabu Israela biname cääri padare nicärininite cimyägämu ire atwime?”

⁷ Yeesu teebibine jejemige egä, “Peei lui weeme cabu lica gyene umle äbitame Babe te lui bimu piyepu lui padare ituge acrana, ingle iyeta mule lui teeme ime cabu temi. ⁸ Yepä, Aceji Seemo liba pa tädepi weeme yepäyepä trupa cabu me, weene piba kokre ne pa jepänepeye teeme bau ca, siige mene pa jüicemepeye cebine aitnejame Yerusalema cewe ngalebora, piyepu iyeta Yuudea gawe cabu ta, Samariya gawe cabu ta, cuta piyepu iyeta gawecewe cabu ta.” ⁹ Ai mene liba siige, Acejiyame te Yeesu ne ecatige cabu me teeme ätyepäneji biname bime opo gaabe je. Carbe te teebine piba icwabige teeme päpäna ca.

¹⁰ Yoo, tabe liba ädige cabu me, teepi ire ca ecanisi. Piba taatu neeneni biname bulubulu cäbletäape cama tawabudnitäsi, jaaclajutige teeme gome, ¹¹ jejemäsi egä, “Galilaya biname, weene ngena täapume aclajuteji gemi ire cabu me? Peei Yeesu lui Acejiyame becattige weeme bau ca, tabe cire tacnenutepi yepä pana mule ca weene lipu jepäniye tabe otni cabu me.”

Biname Lui te Yuuda me Kaakesea Puupu ne Jecatige

¹² Siige, piba Yeesu me ätyepäneji biname cina Olibi Uli podo cabu ca äcnärige Yerusalema me. Peei podo lui babo cewe mameta ge. ¹³ Teepi liba atyarige babo cewe cabu me, yepä mete cabu puupu cabu me eclige, teepi luma icrajiniige: Peteru, Yoane, Yakobu piyepu Andrea, Pilipo piyepu Tooma, Bartoloma piyepu Matayo, Yakobu lui Alapeus me bägrä, Simona lui Kanana sigu biname ge, piyepu Yuuda lui nuuja Yakobu me bägrä ge. ¹⁴ Teepi jaje labasecretnuge yepä gome irecu ätumutame, cuta ten cama puga ge poto magebi piyepu Yeesu me mage Mariya piyepu Yeesu me iganewale.

¹⁵ Poto bimu ingwe ca Yeesu bau me ätrunga biname cina abasecretnige, iyeta lui pama yepä hanred twenti biname ge. Puma cita ca Peteru abujängtige mene jajanenime. Tabe jejemige egä, ¹⁶ “Cäme binamewale, Acejiyame me Oogäräneji Mene te ibibi bäbitige, Aceji Seemo lui mene jüicuji Daawida me tage cabu ca ciige ngena cire läbitespesi Yuuda poto cidi me, lui Yeesu ne jaawabepi cubuyame bau me. ¹⁷ Yuuda mime tomi cabu ge, ingle Yeesu teebine itu ecatuji mime gigri kaakesea wawename.”

¹⁸ Yoo, Yuuda lui rarekaake ecatuji teeme nüya kaakesea täapume, tabe peei ca yepä gawe ne jeletnuji. Puga pui gawe cabu tabe itramuji, camuge ipluji, came iyeta täsuji, siige budre äbituji. ¹⁹ Iyeta biname lui cina icrajuji Yerusalema cabu je, mene itecijemuji peei poto cidi me. Peei name pi teepi pui gawe ne teeme mene ca einujisi Akeladama ca, peei me aboclomta lui Uudi Gawe.

²⁰ Siige, Peteru puma cita ca jejemige egä, “Salamo uupera peba cabu mene pisi nyene Yuuda poto cidi me egä,

‘Teeme mete te kaake läbitege;
nuuja te puma gone yaanajuge.’
Cuta nuuja mene egä:

‘Nuuja te teeme kaakesea puupu ne yaacatege.’

²¹⁻²² Siige, pepu pi müiji nuuja biname te mine cama abasuta mene iicaname Yeesu me arpinenta poto cidi me. Müiji yepä ne acata mime tomi cabu ca; yepä lui te mine cama

waatnetnäjuge iyeta pui padare cabu, Yageyame Yeesu liba mine cama ge. Pui padare ne gije jebacituji, Yoane liba niye ca äciseja mene jüicemuji; siige pui padare teeme ngälu gaabe gyene, Yeesu liba lädepi mime bau ca cabucewe me.”

²³ Teepei puma cita ca jaajisi neeneni rooriye bine ngii: Yoosepa lui ne yaainusi Barsaba ca, teeme nuuja ngii lui Yuustus sine. Tabe yepä biname gyene, cuta nuuja biname ngii lui Matiya sine. ²⁴ Teepei piba irecu ätmutinisi egä, “Yageyame, maane umle gäte iyeta biname bime ngene atwanena, peei name pi ai neeneni biname cabu ca niwabinini, maane lui ne ituge jaji. ²⁵ Nää, maane singi laati te ai ätyepäneji biname me kaakesea pa yaacatege Yuuda lui ne itu saabmalepi, tabe liba budre täbitumi, nüyarage puupu cabu me tädumi?” ²⁶ Yoo siige, teepi peei neeneni biname ngii bine yoogärisi matimati kula cabu. Matiya me kula te yuutrutige, siige teebine ecitisi pui lebin ätyepäneji biname cama abasutame.

2

Aceji Seemo me Otni poto cidi me

¹ Pentikos bimu liba tädige, iyeta Yeesu bau me ätrunga biname cina abasecretnige yepä mete cabu me. ² Teepei piba taatu itecijemige babo mumwämu carbe cabu ca. Pui mumwämu lui babo kokre buuwe pana ge, mete iyeta ngalebora tabacitige teepi luma icrajige. ³ Teepei puma cita ca jepänisi muye wädräji pana gwidape bine lui cina äpletnäriige, otninisi iyeta biname bime mope papa cabu. ⁴ Aceji Seemo te abacitanige teeme yepäyepä trupa ngalebora iyeta poto cabu lenajame. Teepei mene maramara jüicemisi. Aceji Seemo te lui mene ecäremige, teepi papa jüicemisi.

⁵ Puga ge Yerusalema je Israela biname lui cina itu saaclepi iyeta gawe maramara cabu ca. Teepei iyeta Acejiyame ne yaawejanusi. ⁶ Bucurage biname cina abasecretnige peei mene maramara liba itecijemige. Teepei iyeta ngenecu jelonecmige mene ätecijame, ingle Yeesu bau me ätrunga biname cina mene jüicemisi pui biname bime yepäyepä tagepogogo ca. ⁷ Teepei mutäcäco äbitinisi, piba jüicemisi egä, “Lui biname cina mene jüicenenemisi, teepi iyeta Galilaya biname gemi! ⁸ Peei lipu gyene egä mine teebibine jitecijenemisi mimerage cewe mene iicema cabu ca? ⁹ Mine Partiya gawe cabu ca, Mediya cabu ca, piyepu Elama cabu ca; Mesopotamiya gawe cabu ca, Yuudea piyepu Kapadokiya gawe cabu ca gemi; Pontus piyepu Asiya cabu ca gemi; ¹⁰ Pirugiya piyepu Pampuliya cabu ca gemi; cuta piyepu Aikupito cabu ca, piyepu poto Libiya cewe cabu ca gemi, lui Kurene cewe mameta gyene. Poto mine lui Rooma cabu ca gemi; ¹¹ cuta piyepu pui tomi cabu ca poto lui Israela biname gemi, poto lui Israela biname lica gemi, yepä mine iyeta Israela biname bime mule jättrungemusi; cuta piyepu poto mine lui Krete curä cabu ca piyepu Arabiya gawe cabu ca gemi; yepä mine iyeta jitecijemisi teepi mimerage mene maramara ca jüicetnäjemisi. Teeme mene lui peei babe müiji mule poto cidi me Acejiyame lui bine itu jaawenemepi.” ¹² Yoo siige, biname cina mutäcäco äbitinisi piyepu maramara ngene atwanena jepänemisi, piba teemeteme ätemläjinisi egä, “Ai ngena mule gyene?”

¹³ Yepä, poto cina ätrunga biname bine bääclena me jewenemisi, jüicemisi egä, “Ai biname lui sice buduma gemi!”

Peteru me Mene

¹⁴ Peteru puma cita ca jeclajutige pui lebin ätyepäneji biname cama, piyepu babo tage ca gije abacitige mene jajaneneme biname bine egä, “Israela biname piyepu weene iyeta lui cina Yerusalema cabu je inajininige, căme mene nätecijeye! Cane weebibine umle jüwenininine ai mule lui ngena tääpu myene. ¹⁵ Ai biname sice buduma lica gemi, weene lipu jüiceninije, ingle bimu lui nain okdok kroke gyene. Peei lui sice nänäja padare lica gyene. ¹⁶ Yepä, ai mule lui eei tääpu myene Acejiyame me mename biname Yoele lipu itu jüicuji egä,

¹⁷ ‘Acejiyame jüicige: Age sena mene cane ngena cire jaawenepene ceräcerägäabu padare cabu.

Cane căme Seemo ne cire yaacitepene iyeta biname bime trupa cabu.

Weeme imäbägrä piyepu ngulebägrä cina căme tagepogogo mene cirege iicema; weeme manye rooriye cina maramara mule bine wama pana cirege päpäna; piyepu weeme moda cina wama bine cirege päpäna.

¹⁸ Yoo, căme kaakesea biname, rooriye cuta magebi piyepu, pui padare cabu căme Seemo cane cire yaacitepene teeme yepäyepä trupa cabu.

Teepei cuta piyepu căme tagepogogo mene cirege iicema.

¹⁹ Cane owowä gwidape cirege wawena dume cabu, piyepu kokre mule gwidape cirege wawena gawe cabu.

Uudi, muyemuye, piyepu waaniwaniba kloka weene cirege päpäna;

²⁰ bimu te căsä me cirege äbita,

- cuta mabye te uudi pana uududi me cirege äbita.
 Iyeta ai mule cina niinäce cirege äbita,
 piba ingwe ca mime Yageyame me babo ceräcerägäabu bimu te cire tädepi.
- ²¹ Siige, iyeta biname lui cina Yageyame me ngii yaawejanusi,
 tabe teebibine niiya cabu ca cire yäasecrärempi.' Siige.
- ²² Israela biname, ai mene itecijinege! Acejiyame ciitaca mule, cälu täti gwidape,
 piyepu owowä gwidape bine cängena jaawabäjemepi weeme opo gaabe; tabe pui bine
 Yeesu Nasaretayame cabu ca jaawenanemepi. Weene pui umle gemi, ingle weeme gome
 jaawenanemepi. Tabe pepu pi singi weebibine umle wawenname egä Yeesu lui ätyepäneji ge
 teeme bau ca. ²³ Acejiyame teeme singi ca itu iyemaluji Yeesu ne weeme bau me ätyepame.
 Tabe pui padare umle ge ngena cirege äbita. Weene teebine piba budre me jaawenepeye,
 liba niiya mule biname bine giri jaacranemepeye teebine baarge uli cabu äbyecrame.
- ²⁴ Yepä, Acejiyame teebine budre cabu ca yaarpinantepi, teeme budre mäpu cabu ca
 yääyebllingtepi, ingle naace gyene budre te teebine äblicäco cängena gawe me apremela.
- ²⁵ Yoo, Daawida te mene jücuji teeme poto cidi me egä,
 'Iyeta padare cane Yageyame ne jääpänune cäme niinäce gaabe je;
 cane niiya päpäna äblicäco gäne, ingle tabe iyeta padare cane cama gyene.
- ²⁶ Peei name pi cane ngenecu müüji gäne, piyepu gege cama mene jücune.
 Yoo, Acejiyame, cane budre cire läbitepene, yepä cane mäame trämä papa nanajenige,
²⁷ ingle maane licarage cäme seemo ne cire nabmalepi biname bime cable cewe cabu je,
 cuta piyepu lica cirege cäme trupa ne abmala gape cabu ocwäwame, cane lui mäame
 müjirage kaakesea biname gäne.
- ²⁸ Maane ireclota gaabe itu nawabepete;
 piyepu cane mäame gome gege cama nanajenige.' "
- ²⁹ Siige, Peteru piba jejemige, "Cäme binamewale, lui mene mime kaakesaare Daawida
 poto cidi me, cane müüji weeme täapume pajecu me wawena. Tabe budre ge, gape cabu
 ecituji; teeme gape pisi nyene ama mime gome. ³⁰ Tabe Acejiyame me mename biname
 ge. Tabe umle ge Acejiyame lui mene teeme kokre ngii cama teebine ituge jaji egä, 'Yepä
 mäame kaakesaare cane mope biname ne cire jaawenepene maane liiyepu.' ³¹ Siige,
 Daawida ngene ca egluja Acejiyame ngena singi cirege wawena, peei name pi tabe mene
 jücuji Keriso me arpanenta poto cidi me egä,
 'Acejiyame teebine lica ebmalige biname bime cable cewe cabu je;
 teeme trupa te lica gape cabu ocwäwige.'
- ³² Siige, ai mene lui Yeesu poto cidi me. Acejiyame teebine yaarpinantepi budre cabu
 ca. Cine iyeta teebine tepänanumesi ireclota ge. ³³ Acejiyame liba teebine yaarpinantepi,
 puupu teeme gome yäacärepi, piba teebine Aceji Seemo cuta yäacärepi, teeme Babe te lipu
 itu jejuji wawenname. Yoo, page weene lui bine jepänemiye piyepu lui maramara mene
 itecijenininige, peei iyeta lui Yeesu bau ca gyene. ³⁴ Siige, Daawida lica Yeesu pana äduji
 cabucewe me, yepä tabe apu mene jücuji egä,
 'Yageyame te cäme Yageyame ne jejuji:
 Ama adnati cäme camu poto cidi ca,
³⁵ ngälu cane mäame cubuyame bine mäame ernge gawe me cire yaacranemepene.'
- ³⁶ Yoo, Israela biname iyeta, weene müüji cängena umle egä peese nyene pui Yeesu weene
 lui ne itu yaacitepeye baarge uli cabu. Acejiyame teebine itu jaawenepi Yageyame piyepu
 Keriso."

Cine Ngena ne Müüji Wawena

³⁷ Siige, biname cina Peteru me mene liba itecijemige, teepi mage ngenecu mäpu
 äbitininisi teeme conocono mule name pi. Teepi Peteru piyepu nuuja ätyepäneji biname
 bine itemlemisi egä, "Binamewale, cine ngena ne müüji wawena?"

³⁸ Peteru teebibine jejemige egä, "Atatrongärineye weeme niyaniya mule cabu ca,
 piyepu niye ca äciseja ne ecateye Yeesu Keriso me ngii cabu. Piba Acejiyame te weebibine
 niiya cabu ca pa isecräripi, cuta teeme müjirage owecu gwidape pa täätyepepi weeme bau
 me, peei lui Aceji Seemo gyene. ³⁹ Peei mene Acejiyame bau ca lui weeme täapume, piyepu
 weeme bägrä, weeme saarewale täapume, cuta piyepu iyeta biname bime täapume lui
 cina cudecewe cabu icrajenige, iyeta biname Acejiyame mime Yageyame lui bine cire
 taasoglecmepi teeme bau otnime."

⁴⁰ Peteru jejednemige peei bääirmi, piyepu bucurage nuuja mene ca teebibine se-
 wadanemige egä, "Täsecräripeye conocono mule cabu ca, ingle mäpu daremu te tädenige
 ai niyyarage biname bime bau me!" ⁴¹ Bucurage biname cina ätrunga ca ecatisi teeme
 mene ne, piyepu niye ca äciseja ne ecatisi Yeesu me ngii cabu. Pui yepä bimu cabu
 pama trii tausen biname cina ätrunga biname bime tomü cabu ebäcnisi. ⁴² Bucurage

padare teepi singi ge Yeesu me ätyepäneji biname bime bau ca mene abiberäjame. Teepi labasecretnininusi mene abaitname, deedei gigri läbitininusi, piyepu cuta Acejiyame bau gigri irecu lätumutininusi.

Ätrunga Biname bime Mule

⁴³ Acejiyame me ätyepäneji biname cina bucurage ciitaca mule piyepu kokre mule gwidape Acejiyame me kokre ca jaawenemusi. Biname iyeta mutäcäco läbitaninusi. ⁴⁴ Iyeta lui cina Yeesu ne jitrungisi, teepi yepä gome labasecretnuge piyepu teeme gwidape lui gigri. ⁴⁵ Teepi poto gwidape piyepu gawe bine aletnename jaawenemusi, siige rarekaake jääpänemusi. Lui bime singi piti nemi, teeme täapume jaabelanemusi. ⁴⁶ Iyeta bimu teepi labasecretnuge Acejiyame me iiwäreja mete caale ngalebora, puma cita ca toraca gege cama yaacluge teeme mete me deedei gigri äbitame. ⁴⁷ Teepi eso yääcärusi egä, “Acejiyame lui babo miiji gyene!” Iyeta biname teeme ngenecu miiji ge pui ätrunga biname bime bau me. Iyeta bimu gaabegabe Yageyame Yeesu te biname bine yääbäcnanemuge teeme tomi cabu me, lui cina niyya cabu ca äsecrejeji gemi.

3

Ernge Niyaniya Biname te Miiji Äbitige

¹ Nuuja bimu Peteru Yoane naabi aalige Acejiyame me iiwäreja mete me teeme mämle irecu ätumuta padare trii oklok. ² Puga ge iiwäreja mete caale cabu yepä grana, ngii Jamyacu. Cuta puga ge peei grana gaabe gome yepä rooriye lui me ernge niyaniya ge. Tabo otnetneja äblicäco, ingle pepu ärngeji ge. Iyeta bimu gaabegabe biname cina teebine yaacanansi, peei grana gome yaabmalusi biname bine rarekaake täapume ätineräjame, lui cina yääbäcnusi iiwäreja mete caale ngalebora me. ³ Tabo liba Peteru Yoane naabibine jääpäniige abacita je, teebibine äätinäruji rarekaake täapume. ⁴ Teepi ire acitäsi teeme bau me, Peteru piba jejige, “Ire cime bau me!” ⁵ Tabo puma cita ca ire jaatwige teebibine, teemämu ngene jotwanige egä, “Teepi pama ceera me singi gegi.” ⁶ Peteru jejige, “Cäme rarekaake licarage gyene, yepä cäme lui pisi nyene, cane pa näacärene: Yeesu Keriso Nasareta ceweyame me ngii cabu, cane meebine naajenine egä abujängti otnime!” ⁷ Tabo teeme camu poto ime ca joomlige, teebine ewejängtige. Piba taatu pui biname me ernge dugulace kokre äbitige. ⁸ Tabo piba abujängtige, jeclajutige teeme ernge ca, piba gije abacitige otnetnejame. Tabo ten cama iiwäreja mete caale ngalebora me abacitige. Tabo otnetnäjige, uuplatäjige, piyepu Acejiyame ne ewepyeräjige. ⁹ Biname cina teebine jepänisi otni je piyepu Acejiyame ne awepyeräja je. ¹⁰ Teepi liba umle äbitininisi egä pui ätineräja biname peese nyene, lui te ladnatuge iiwäreja mete caale grana ngii Jamyacu gome, teepi cälu te jitemige, lui miiji te tädige teeme bau me.

Peteru te Mene Jejemige Iiwäreja Mete Puutucu je

¹¹ Pui ernge niyaniya biname egäcäro Peteru Yoane naabibime ime joomlige, iyeta biname ngenecu alonca cama tuuwametnige teeme bau me. Teepi iiwäreja mete caale ngalebora pui puupu cabu jage, lui ne ngii yaainusi “Solomona me Caagecage Toro Mete” ca. ¹² Peteru te liba biname bine jepänemige, jejemige egä, “Israela biname, weene ngena name pi cälu te jitemige? Weene ngena täapume cime bau me ire sinajininige? Nää, weene apu jinge-nininige egä cime kokre ca, coo cime miiji mule ca, ai biname ne otnetnejame jewenago? Licarage!” ¹³ Acejiyame peese nyene lui ne Abrahamo, Isacako, piyepu Yakobu yaawejanusi; Acejiyame peese lui ne mime sasa kaakesaare cina yaawejanusi. Tabo te peei ne bii jewenige, teeme miiji kaakeseyame Yeesu ne jamyacu apaclyera ceerame. Yoo, weene Yeesu ne yääcärepeye Israela modamoda biname bime bau me, piyepu teebine jäägyepeye Pilato me opo gaabe, ngänu gyene tabo itu ngene jwaatwanepi teebine asatame. ¹⁴ Yeesu lui mara conocäco biname gyene, yepä weene teebine jäägyepeye, Pilato ne jaajepeye cubucubu biname weebibine ceerame, lica Yeesu. ¹⁵ Weene pepu pi teebine budre me jaawenepye, lui te biname bine ireclota gaabe jaawabäjemuge, yepä Acejiyame teebine yaarpinatepi budre cabu ca. Cine ire arbi biname gemi peei poto cidi me. ¹⁶ Peei Yeesu me ngii te ai biname ne kokre becäriige. Yoo ai biname weene lui ne jepäneniye piyepu sasa umle gemi, teeme ernge dugulace kokre bäbitige teeme ätrunga ca Yeesu me ngii cabu. Yeesu bau ätrunga te teebine miiji bii jewenige weeme opo gaabe je.

¹⁷ Yoo cäme binamewale, cane umle gäne, weene liba Yeesu ne niyya jaawenepye, weene umle lica gemi weene ngena jaawenepye. Weeme modamoda biname piyepu, teepi umle lica gemi. ¹⁸ Yepä, peei mule ca Acejiyame te teeme sasa mene ibibi itu jaawenepi. Sasa cabu ca iyeta teeme mename biname cina peei mene jaaitnäjusi egä teeme Keriso mage mäpu cire jääpänepi. ¹⁹ Yoo, ebmaleye page weeme niyaniya ngena atwanena Yeesu poto cidi me, atatröngärineye Acejiyame bau me. Tabo piba weeme niyaniya mule pa

yääyebhengemepi. Peei jewenepeye, ²⁰ piba ngenecu plowa pa tädepi Yageyame bau ca, piyepu tabe cire täätyepipi Yeesu Keriso, lui ne ituge jaji weeme bau ätyepame. ²¹ Page tabe miiji cabucewe je yaanajuge, ngälu pui padare te cire tädepi Acejiyame liba iyeta gwidape bine kirece me cire jaawenemepi. Ujarage Acejiyame te mene jiuuji peei poto cidi me, piyepu teeme miiji mename biname cina jaaitnäjusi pui mene bine. ²² Moose jicenige Oogäräneji Mene cabu egä, 'Acejiyame weeme Yageyame te nuuja mename biname cire täätyepipi, cebine liyepu itu nätyepuji. Tabe lui weeme biname cabu ca cirege otni. Weene iyeta teeme mene miiji jewenepeye. ²³ Laati te teeme mene lica yaacatuge, teebine yääyebhngtusi Acejiyame me biname bime bau ca iyeteta.' ²⁴ Iyeta mename biname, Samwela piyepu iyeta teeme ingwe ca lui cina secluji, iyeta lui cina Acejiyame me tagepogogo mene jicemusi, teepi mene jicemujisi ngena cina täbitimesi ai padare cabu. ²⁵ Acejiyame me sasa mename biname cina jeitnujisi tabe ngena cire jaawenepi. Teeme pui mene lui weeme tääpu myene. Cuta piyepu weeme tääpu myene ai nuuja mene, Acejiyame te weeme sasa kaakesaare bine lui ecäranemuji, tabe liba Abrahamo ne jejuji egä, 'Cane iyeta biname bine ai gawecewe cabu je miiji cire jaawenemepene mäame ingwe kaakesaare cabu ca.' ²⁶ Yoo, Acejiyame liba teeme kaakesaare hägrä Yeesu ne yaarpinantepi, siige teebine tityepipi niinäce weeme bau me weebibine miiji ceerame, tabe liba weebibine iyeta pa itatrongäripi weeme niija mule cabu ca."

4

Peteru Yoane naabi Israela Modamoda Biname bime Opo Gaabe je Jaclajutige

¹ Peteru Yoane naabi liba mene jejemäsi biname bine, poto Acejiyame tääpume iiwäreja biname, piyepu iiwäreja meite awamuta mope biname, cuta piyepu poto Sadukea sigu biname, teepi iyeta piba atyarinisi. ² Teepi ngenecu niija cama itecijemige Peteru naabi Yoane biname bine ebiberäjemäsi egä, "Yeesu lui budre cabu ca itu larpinantepi, peei name pi teeme kokre pisi nyene cuta biname bine budre cabu ca arpinerame." ³ Yoo, pui biname cina singi lica teeme peei mene äteciyame, peei name pi Peteru Yoane naabibine joomlisi. Mämmlerage ge, peei name pi krokeciye mete bora me äasinglantisi ngälu nuuja kroke. ⁴ Yepä, bucurage biname cina lui Peteru Yoane naabibime mene itecijemige, teepi peei mene jitrungisi, siige ätrunga biname cina bucurage äbitinini, faib tausen joomlige.

⁵ Nuuja bimu cabu, poto Israela mope biname, nuuja modamoda biname, piyepu cotre abiberäja biname cina yepä gome me abasecretnege Yerusalema cewe cabu je. ⁶ Teepi mene ajananinisi iiwäreja babo biname Anas cama piyepu Kayapa cama, Yoane piyepu Aleksanda cama, cuta piyepu Anas me poto inge biname cama. ⁷ Teepi piba Peteru Yoane naabibine taasoglicisi teeme opo gaabe je aclajutame, piba teebibine äätemlisi egä, "Weene peei biname ne lipu miiji tewenumeye? Nää, ngena kokre ca piyepu laati me ngii cama tewenumeye?"

⁸ Siige, Aceji Seemo te babo äbitige Peteru me trupa cabu. Tabe puma cita ca teebibine jejemige egä, "Mope biname piyepu nuuja modamoda biname, ⁹ weene nää cibibine nitemleniye pui mule poto cidi me lui te täbitumi ernge niyaniya biname tääpume? Nää, weene singi umle äbitame cine lipu tewenumago peei mule ne? ¹⁰ Weene iyeta miiji umle äbita, piyepu Israela biname iyeta miiji umle, egä Yeesu miji kokre te ai biname ne iyeta miiji me tewenumi, lui biname te aclajuteji gyene weeme opo gaabe je. Yeesu Keriso Nasareta ceweyame peese nyene, weene lui ne baarge uli cabu itu yaatecwamtepeye. Acejiyame teebine budre cabu ca itu yaarpinantepi. ¹¹ Tabe peese nyene lui poto cidi me Oogäräneji mene te jicenige egä,

'Lui kula ne weene raraŋga biname cina jigysi, baborage bäbitige iyeta nuuja cabu ca.'

¹² Siige, Yeesu peese nyene lui taatu ibibi gyene biname bine niija cabu ca äsecerame. Ai gawecewe cabu Acejiyame te nuuja biname me ngii lica ituge ceera lui te ibibi gyene mibibine niija cabu ca äsecerame."

¹³ Siige, pui mutre biname cina mutäcäco äbitinini Peteru naabibine Yoane päpäname egä teepi lui wälu umle cäco gegi, cuta umle äbitame egä teepi papa biname gegi, sukulu cäco. Teepi puma cita ca umle äbitinini Peteru naabi Yoane Yeesu cama cuta waatnetnejäsi. ¹⁴ Yepä, teepi nuuja mene äblicäco ge iicana, inge teepi ernge niyaniya biname ne jepänisi Peteru Yoane cama aclajuteji ge, lui ne miiji me tewenumäsi. ¹⁵ Siige, teepi Peteru Yoane naabibine jaajisi pui mutre biname tomi äyebhengame puutucu me asatame puma awagrijame. Puma cita ca teemeteme mene ajananinisi egä, ¹⁶ "Mine ngena ne jaawenesi ai neeneni biname poto cidi me? Iyeta biname Yerusalema cabu umle gemi egä teepi peei mara ciitaca mule ne tewenumäsi. Mine äblicäco peei ne aina. ¹⁷ Yepä, mine singi lica ai mene te otnetnejame, peei name pi mine miiji teebibine ablawejame egä, 'Ingwe ca gone Yeesu me ngii cabu nuuja biname ne mene jaji.'

¹⁸ Siige, teepi Peteru Yoane naabibine cääri taasoglecisi, jaajisi egä, “Gone Yeesu me ngii cabu mene jaajanemuye, coo biname bine yaabiberäjimuye!” ¹⁹ Yepä, Peteru naabi Yoane jejemäsi egä, “Weene weemämu atranineye egä Acejiyame me opo gaabe je lui gyene conocäco, nää weebibine ätrungame, coo Acejiyame ne ätrungame. ²⁰ Cine ngena ituge päpäna piyepu ätecija, cine äblicäco bojä lenaja peei poto cidi me.” ²¹ Puma cita ca pui mutre biname cina teebibine kokre mene cama aablawjäsi, siige jäätyepisi. Teepi äblicäco teebibine niiya cabu acita, ingle biname tääpume wälu ge. Biname iyeta Acejiyame me ngii ne ewepyeräjisi pui gwidape tääpume lui cina ituge äbita. ²² Lui biname te ciitaca mule cabu ca miiji me täbitumi, tabe footi kāmäge cama senajumi piyepu cerämu poto.

Ätrunga Biname cina Irecu Ätumutini Acejiyame bau me

²³ Peteru naabi Yoane liba tasatäsi, teepi acenutäsi teeme ätrunga binamewale bime bau me, teebibine jeitnemäsi ngena mene modamoda iiwäreja biname piyepu nuuja modamoda biname cina bii jaajisi teebibine. ²⁴ Ätrunga biname cina teeme mene liba itecijemige, teepi iyeta irecu ätumutini Acejiyame bau me egä, “Yageyame, maane lui tewenemujite cabucewe, gawecewe, malu, piyepu iyeta lui peei cabu temi, maane mene itu jejujite mäame kaakesea biname, cime kaakesaare Daawida ne. ²⁵ Tabe piba Aceji Seemo me ätityera ca peei mene jeitnuji apu egä, ‘Ngena name pi maramara gawe biname cina babo claabe gemi?

Teepi ngena name pi gläämu bine papapa jewenemisi?

²⁶ Gawe maramara mope biname cina cubu gwidape bine emacetnäjenemisi.

Modamoda biname cina yepä gome abasecretnege cubu agedname Yageyame pi-iyepu teeme jaji biname Keriso cama.’

²⁷ Siige, ai mene te iibi läbitepi Heroda piyepu Pontiyo Pilato liba ai cewe ngalebora nuuja gawe biname piyepu poto Israela biname cama labasecretnipesi mäame conocäco kaake-seayame Yeesu ne äciseräjame, maane lui ne ituge jaji biname bine niiya cabu ca äsecrerame. ²⁸ Teepi labasecretnepi iyeta mäame singi wawename, maane lipu uja ngene jotwanujite Yeesu bau ngena te äbitame. ²⁹ Yoo, Yageyame, cuta page maane mene bii näätacijige, teepi lipu opo cabu nirmäjiniisi. Gone ätecija taatu, yepä maane mäame kaakesea bägrä bine nitityäripi mäame mene wälu cäco iicemame. ³⁰ Mäame kokre niwabinini pita biname bine miiji me wawenecame, piyepu owowä piyepu ciitaca mule bine wawenecame Yeesu mäame conocäco kaakeseyame me ngii cabu.”

³¹ Teeme irecu ätumuta mene liba siige, piba taatu pui mete teepi luma tabasecretnege, peei te akocnäjige. Aceji Seemo te babo äbitige iyeta teeme yepäyepä trupa cabu. Teepi gije abacitini Acejiyame me mene wälu cäco iicemame.

Ätrunga Biname cina Jebelanemisi Gwidape bine

³² Iyeta ätrunga biname teeme ngenecu piyepu teeme singi lui yepä ge. Nuuja biname te lica jüicige egä, “Cäme gwidape lui cämi nemi,” yepä teepi iyeta teemeteme jebelanemisi. ³³ Yeesu me ätyepäneji biname cina babo kokre cama ire jerbisi Yageyame Yeesu me arpinenta poto cidi me, piyepu Acejiyame me baborage miiji ten cama ge. ³⁴ Teeme tomi cabu nuuja biname lica ge lui te singi cama enajige bimu gaabegabe gwidape tääpume. Laatibi yageyame ge gawe coo mete tääpume, teepi aletname jaawenimusi, aletna rarekaake saawecnemusi, ³⁵ piba ätyepäneji biname bine yääcäremusi. Teepi peei rarekaake jaabelanemusi teeme yepäyepä laati bemü gwidape cäco.

³⁶ Biname ngii Yoosepa pepu jewenige. Tabe Leebi me ingle cabu ca ge; teeme aplimla puupu lui Kupro curä cabu. Ätyepäneji biname cina teebine yaainusi Banaba ca, peei me aboclomta lui kokre ne ceerayame biname ge. ³⁷ Yoosepa poto gawe aletname jwenige, gawe aletnäneji rarekaake bine ewademige, puma cita ca ätyepäneji biname bime ime cabu icranemige.

5

Ananiya naabi Sapira

¹ Yepä, pugä ge rooriye ngii Ananiya lui teeme coga Sapira cama poto teeme gawe aletname jwenäsi. ² Yepä, tabe poto aletnäneji rarekaake mara gome icranemige teeme tääpume, poto taatu ecäremige ätyepäneji biname bine, engletnäjemige egä, “Camle-camle daremu gyene ai pui gawe tääpume.” Teeme coga iyeta umle ge peei poto cidi me. ³ Peteru rooriye ne jejige, “Ananiya, maane ngenome ire taatu jecitite Satani te meebine acaname. Maane angletneja mule bii jwenite Aceji Seemo bau me, maane liba poto gawe aletna rarekaake ne cumä tewenumete. ⁴ Pui gawe liba aletna cäco ge, mäame yene piba, cuta peei gawe tääpume lui rarekaake sewademumete, mäami nemi iyeta. Peei name pi maane ngenome ngene totwananumete peei angletneja mene iicemame? Maane walya mene lica

jiicite biname bau me, yepä maane Acejiyame bau me walya bii jiicite!”⁵ Ananiya liba peei mene itecijige, puirage padare cabu budre tama itramige. Siige, iyeta lui cina itecijemige peei poto cidi me, teepi mage wälu.⁶ Mamyee rooriye cina mete ne sebäcnisi, Ananiya me budrekaake ne etnisi, ecanisi, gape piba ecitisi.

⁷ Matikolä padare ingwe gaabe ca, Sapira te peei mete me tabacitige, yepä tabe umle lica ge ngena te bäbitige teeme rooriye poto cidi me.⁸ Peteru teebine utemlige egä, “Cebine naji, nää ai rarekaake lui camlecamle daremu gyene, maane piyepu mäame rooriye lui secatumeye weeme gawe täapume?” Tabe jejige egä, “Yoo, camlecamle daremu peese nyene.”

⁹ Siige, Peteru jojige teebine, “Maane piyepu mäame rooriye weene ngenome mene tewenumeye Aceji Seemo ne walya mene ca apicnentame? Pui biname cina lui mäame rooriye ne gape me becitisi, age tema mete grana gome, cuta meebine naasatenisi!”¹⁰ Piba taatu tabe utramige Peteru me ernge gome, siige budre äbitige. Pui mamyee rooriye cina mete ne sebäcnisi, jopänisi budre, puma cita ca teebine usatisi, cuta gape ocitisi teeme rooriye gome.¹¹ Iyeta Yeesu bau ätrunga biname piyepu iyeta nuuja biname lui ai mule poto cidi me itecijemige, teepi iyeta mage wälu äbitininisi.

Ciitaca Mule Gwidape poto cidi me

¹² Yeesu me ätyepäneji biname cina bucurage owowä mule piyepu ciitaca mule bine jaawenemusi biname sobe cabu. Ätrunga biname iyeta yepä gome labasecretname iiwäreja mete caale ngalebora me, Solomona me Caagecage Toro Mete cabu je.¹³ Nuuja laatibi ätrunga biname lica, teepi wälu ge ten cama abasecretname, ngänu gyene iyeta biname cina miiji mene taatu jiicusi teeme poto cidi me.¹⁴ Yepä bucurage magebi piyepu rooriye cina mime Yageyame Yeesu ne jäätrungusi, piyepu ätrunga biname bime tomi cabu ebäcnisi.¹⁵ Ätyepäneji biname bime ätityera mule name pi, biname cina pita biname bine yaawademusi babo gaabe gome, waaku coo tiire cabu yaabmalemusi, ingle naace popi teepi singi Peteru me ceege teebibine awabame, tabe liba peei pita biname bine yääsuplingtemuge.¹⁶ Bucurage biname lui yaacrajemuge Yerusalema mameta, cewe matimati cabu, teepi babo cewe me yäabäcnusi ätyepäneji biname bime bau me yaacluge, pita biname yaawademusi piyepu poto biname lui niyya cable cama gemi. Siige, teepi iyeta miiji me läbitininisi.

Ätyepäneji Biname cina Mäpu Padare Jepänisi

¹⁷ Iiwäreja babo biname piyepu iyeta lui cina ten cama ge, teepi iyeta lui Sadukea sigu biname ge. Teepi claabemete jepänanemisi, ingle biname cina babo singi ätyepäneji biname bime täapume. Teepi peei claabe name pi mene jitranisi ätyepäneji biname bine niyya wawename.¹⁸ Teepi teebibine joomlemisi, babo cewe krokeciye mete cabu me ebäcnemisi.¹⁹ Yepä, mime Yageyame me mename seemo te peei ciye cabu tädige, krokeciye mete gaabe ne jiiitnige, ätyepäneji biname bine pui mete cabu ca ewademige, teebibine piba jejemige egä,²⁰ “Weene biiri, naaclege iiwäreja mete me. Puma jiclajutipi, biname bine ebiberäjemepeye iyeta mene ai kirece ireclota poto cidi me.”²¹ Ätyepäneji biname cina peei ne jebenisi. Bimu liba tacitige, teepi iiwäreja mete me ebäcnisi, gije abacitinisi biname bine abiberäjame.

Pui iiwäreja babo biname piyepu teeme binamewale tesoglecimisi iyeta Israela modamoda biname cina abasecretname mutre biname tomi täapume. Teepi piba teeme ätityera biname bine krokeciye mete me jityepemisi ätyepäneji biname bine teeme bau me waadename.²² Yepä, pui biname cina liba atyarige, teepi lica krokeciye mete cabu jepänemisi teebibine, peei name pi cuta äcnärige, abasecretname biname bime bau jeitnemisi egä,²³ “Cine liba krokeciye mete me atyarinago, gaabe jepänisi armeji ge, iyeta awamuta biname gaabe bine jewamutemisi, yepä cine liba gaabe jiiitnisi, mete ngalebora pui biname bine lica jepänemisi!”²⁴ Modamoda iiwäreja biname piyepu iiwäreja mete awamuta mope biname, teepi liba peei itecijemige, calu te jitemige egä, “Baa, ngena te bäbitige? Lete nemi pui biname?”²⁵ Puma cita ca yepä biname te tabacitige, teebibine jejemige egä, “Cäme mene nätecijeye! Peei rooriye weene lui bine krokeciye mete me sebäcnimume, teepi iiwäreja mete cabu temi, biname bine puma ebiberäjemenisi!”²⁶ Pui awamuta mope biname te piba ädige teeme ätityera biname cama, ätyepäneji biname bine sewademisi, yepä teepi ime ca lica joomlemisi, ingle teepi wälu ge egä biname cina pama teebibine kula ca äbyecra mage, ai name pi teepi owecu gemi ätyepäneji biname bime täapume.

²⁷ Teepi ätyepäneji biname bine ebäcnemisi mutre biname bime opo gaabe je aclajutame. Iiwäreja babo biname te piba teebibine jejemige egä,²⁸ “Cine weebibine uja itu jijanipago kokre mene ca egä, ‘Gone peei biname me ngii cabu yaabiberäjemuye,’ yepä weene cime

mene lica ituge ätecija, siige iyeta biname bine Yerusalema ngalebora je ebiberäjaniemiye, piyepu weene singi cibibine aitna-me egä cine te Yeesu ne budre me itu yaacitepesi.”

²⁹ Peteru piyepu nuuja Acejiyame me ätyepäneji biname cina mene jewecnistisi egä, “Cine miiji Acejiyame me singi wawena, lica biname bime singi ne. ³⁰ Acejiyame peese nyene laati ne mime sasa kaakesaare cina yaawewanusi. Tabe te Yeesu ne budre cabu ca yaarpinantepi, weene liba teebine budre me itu yaacitepeye baarge uli cabu. ³¹ Acejiyame teebine itu yaarpinantepi teeme camu poto me, teebine biname bine Waadena Biname piyepu niya cabu ca Äsecerera Biname me itu jaawenepi. Yoo, tabe singi Israela biname bine padare ceerame teeme niya mule abmaläcemame piyepu pui niya cabu ca äsecerame. ³² Cine ire arbi biname gemi peei gwidape poto cidi me, cuta Aceji Seemo piyepu, Acejiyame lui ne täätyepuge biname bime cabu me, laatibi teeme singi jaawenusi.”

Gamaliya te Mutre Biname bine Bäärmii Jegednemige

³³ Siige, peei mutre biname cina ai mene liba itecijemige, teepi mage claabe ge, singi ge ätyepäneji biname bine budre me wawename. ³⁴ Yepä, puga ge yepä Parisea biname teeme ngii Gamaliya. Tabe cotre abiberäja biname ge, lui te baborage ge iyeta biname bime ngene atwanena cabu. Tabe abujängtige pui mutre biname bime sobe cabu, jejemige egä ätyepäneji biname bine miiji äsime puutucu me. ³⁵ Siige, tabe piba mutre biname bine bäärmii jegednemige egä, “Cäme Israela binamewale, weene miiji cängena ngene jotwananineye weene singi peei biname poto cidi me ngena wawename. ³⁶ Weene ngene jepecneye biname ngii Tiyudas poto cidi me. Poto kämäge niinäce gaabe me tabe täduji, biname bine jejemuji egä, ‘Cane babo biname gäne.’ Pama fooa hanred rooriye cina ten cama abasutinujisi. Yepä, tabe budre jepänuji, teeme biname cina piba maramara äbitininujisi, siige wata apiruji teeme sigu te. ³⁷ Tiyudas me ingwe ca, biname bime ngii acnema padare cabu, Yuuda Galilaya ceweyame te piba täduji. Tabe cuta bucurage biname ewademuji ten cama otnetnejame, yepä tabe cuta budre jepänuji, siige teeme biname cina maramara äbitininujisi. ³⁸ Yoo, peei name pi ai biname bime poto cidi me cane weebibine jijenininine, gone teebibine niya jaawenemuye, yepä ebmalemepeye! Liba biname bau ca gyene teeme ngene atwanena piyepu teeme waweneca, piba peei te papa me pagege äbita, ³⁹ yepä liba Acejiyame bau ca gyene, weene äblicäco teebibine iibana. Weene piba Acejiyame cama pa aglipeye!”

Siige, mutre biname cina Gamaliya me mene jecatisi. ⁴⁰ Teepi tesoglecemisi ätyepäneji biname bine, teebibine etemeläjemisi, piba jejemisi, “Gone mene cääri jiccemise Yeesu me ngii cabu.” siige teebibine jityepemisi. ⁴¹ Ätyepäneji biname cina peei mutre biname bine ebmalemisi gege cama, ingle naace popi Acejiyame ngene jotwanige egä teepi miiji ge Yeesu me ngii name pi mäpu päpäname. ⁴² Iyeta bimu teepi iiwäreja mete cabu piyepu biname bime mete maramara cabu mene jaajananemusi, biname bine yaabiberäjemisi Miiji Mene Yeesu Keriso poto cidi me.

6

Seben Ätityera Biname poto cidi me

¹ Ingwe ca Yeesu me ätrunga biname cina liba bucurage äbitininisi, Israela biname lui cina Griik mene jiccemisi, teepi jicnecimisi Heberu mene biname bine egä, “Teepi liba cuublacubla bine rarekaake yääcäranemusi, cime cuublacubla bine kupae lica jaawenemusi.”

² Puma cina ca pui twelb ätyepäneji biname cina tesoglecemisi iyeta ätrunga biname bine yepä gome abasecretna-me, jejemisi teebibine egä, “Miiji lica gyene cine liba Acejiyame me bäärmii mene jajanena kaakesea ne abmalame rarekaake ire atwi tääpume. ³ Cime binamewale, peei name pi weeme cabu ca jejäcremeye seben rooriye bine, lui cina umle biname gemi, piyepu Aceji Seemo ne cängena jäätrungusi, cuta piyepu iyeta biname cina lui tääpume ngenecu miiji gemi. Cine teebibine rarekaake ire atwi kaakesea pa yääcäremepesi. ⁴ Siige, cine piba iyeta padare irecu ätumuta piyepu bäärmii kaakesea cabu pa lacranipago.”

⁵ Siige, iyeta ätrunga biname singi ge pepu wawename. Teepi seben rooriye bine ngii jejäcremisi. Age temi teeme ngii: Setepano lui me ätrunga baborage ge piyepu lui me trupa cabu Aceji Seemo te baborage ge, cuta Pilipo, Prokora, Nikano, Timona, Parmenas, piyepu Nikolas lui Antiyoka ceweyame ge. Tabe Israela biname lica, yepä tabe Israela biname bime irecu ätumuta mule ne ituge acata. ⁶ Siige, ätrunga biname cina teebibine ewademisi ätyepäneji biname bine bau me. Teepi irecu ätumutiniisi piyepu ime etacwe-misi peei seben biname bime papa cabu.

⁷ Siige, Acejiyame me Miiji Mene te otnetnäjige iyeta poto ta. Yeesu bau ätrunga biname cina ablinisi Yerusalema ngalebora, cuta piyepu bucurage Acejiyame tääpume iiwäreja biname cina peei Miiji Mene ne jitrungisi.

Israela Modamoda Biname cina Setepano ne Joomlisi

⁸ Setepano lui te baborage ätityera piyepu kokre jääpänuge Acejiyame bau ca, tabe ciitaca mule piyepu owowä mule bine jaawenemuge Aceji Seemo me kokre ca biname bime opo gaabe je. ⁹ Yepä, poto biname cina Setepano cama mene abajininisi. Teepi lui Israela biname bime yepä abasecretna mete cabu ca, pui mete ngii yaainusi egä 'abasecretna mete asatäneji biname bime täápume.' Puga ge pui abasecretna cabu Israela biname lui Kurene piyepu Aleksandriya cewe cabu ca gemi, piyepu poto nuuja Israela biname Kilikiya piyepu Asiya Probins cabu ca. Teepi iyeta gije abacitininisi Setepano cama mene abajame. ¹⁰ Yepä, Aceji Seemo te Setepano ne babo umle ecäridge. Peei umle cama tabe liba mene jüicemuge, teepi äblicäco daremu mene iicana. ¹¹ Teepi peei name pi poto biname bine ogä rarekaake ecäremisi walya mene jajime. Teepi apu jüicisi egä, "Cine Setepano ne jitecijisi, tabe Moose me cotre mene bine jiseblecäjemige, cuta piyepu Acejiyame ne jiseblecäjige." ¹² Pepu pana teepi ngenecu alongecame jewenemisi biname bine, piyepu modamoda biname, cuta piyepu cotre abiberäja biname. Teepi Setepano ne joomlisi, ecanisi mutre biname bime opo gaabe me. ¹³ Teepi piba poto biname bine ebäcnemisi walya mene iicaname Setepano poto cidi me. Pui cina jejemisi egä, "Ai biname te jääseblecäjemuge ai cudege iiwäreja mete poto cidi me piyepu Moose me cotre mene poto cidi me. ¹⁴ Cine ituge ätecija tabe jaji je egä Yeesu pui Nasareta ceweyame te ai iiwäreja mete ne pagege iibyageca, piyepu mime sasa mule lui Moose bau ca gyene, peei ne mara me pagege wawena!" ¹⁵ Iyeta lui cina mutre biname tomi cabu adnatärenige, teepi ire jetwa-nanisi Setepano ne, jepänisi egä teeme opo lui mename seemo pana ge.

7

Setepano me Mene

¹ Iiwäreja babo biname te Setepano ne itemlige egä, "Nää, teeme mene toraca gyene mäame poto cidi me?"

² Setepano jejemige egä, "Cäme babewale, binamewale, cäme mene nätecijeye! Ujarage mime kaakesaare Abrahamo liba camuge Harana cewe me otni, Acejiyame lui jamyacu apacyera cama ge, tabe teemämu aboclomtuji Abrahamo bau. Pui padare tabe Mesopotamiya gawe cabu enajuji. ³ Acejiyame teebine jejige egä, 'Ebmalemi mäame inglewale bine, piyepu mäame gawecewe ne ebmali, nuuja gawe cabu me ädi, cane lui gawe ne pagege awaba mäame täápume.' ⁴ Siige, Abrahamo piba ebmaluji Kaladea gawe ne, äduji Harana cewe me lenajame. Liba Abrahamo me babe budre äbituji, Acejiyame piba teebine jityepuji otnime ai Kanana gawe cabu me, weene page luma inajininige. ⁵ Yepä, pui padare Acejiyame te yepä gawe matikolä lica ecäruji Abrahamo ne teemerage gawe lenaja täápume, yepä Acejiyame teebine mene jejuji gawe ceera teeme täápume piyepu teeme kaakesaare täápume ingwe ca. Yoo, pui padare Acejiyame liba peei mene jejuji, Abrahamo bägrä cäco enajuji. ⁶ Age Acejiyame me mene teeme bau me: 'Mäame ingwe kaakesaare cina cirege otni mage cudecewe me nuuja biname bime gawe cabu lenajame, puma mäpurage daremu cäco kaakesea cirege wawena. Teeme ireclota mäpu cirege foom hanred kämage cama. ⁷ Yepä, pui gawe biname lui bime täápume teepi mäpurage kaakesea cire jaawenepesi, cane teebibine teeme mäpu daremu cirege ceera. Ingwe ca mäame kaakesaare cirege äsecrera peei gawecewe cabu ca. Teepi cäme bau piba cirege awejena airage gawe cabu.' ⁸ Siige liba peei mene apiruji, Acejiyame piba Abrahamo ne jejuji teeme cewecu acitame teeme tääpe matikolä iirputa ca. Peei cewecu ca Abrahamo te Acejiyame me jajeji mene ecatuji teeme täápume teeme biname me äbitame. Pui name pi Abrahamo, Isacako te liba aplimlujji, teeme tääpe matikolä jüirputuji seben bimu teeme aplimla ingwe ca; piyepu ingwerage Isacako teeme bägrä Yakobu me tääpe matikolä cuta jüirputuji. Yakobu me padare liba, tabe cuta teeme twelb imäbägrä bime tääpe matimati cuta jüirpeclimuji pui cewecu acitame. Pui twelb imäbägrä cina kaakesaare me äbitininujisi mime twelb ingwe lenajame.

⁹ Pui bägrä cina claabemete jepänujisi Yoosepa ne lui teeme yepä ge, siige teebine aletname ecanujisi daremu cäco kaakesea wawename Aikupito gawe cabu je. Yepä, Acejiyame puga ge ten cama, ¹⁰ teebine cängena isatuji iyeta teeme peei mäpu cabu ca. Yoosepa liba jeclajutuji Aikupito gawe Mopeyame Parao me opo gaabe je, Acejiyame te Parao ne ngenecu miiji jewenuji Yoosepa täápume, piyepu Yoosepa ne babo umle ecäruji. Parao piba Yoosepa ne ecituji Aikupito gawe piyepu iyeta Parao me mete bine ire atwime. ¹¹ Gane padare piba täduji Aikupito piyepu Kanana gawe cabu iyeta; biname cina mage loolo me cewe icrajuji. Mime kaakesaare licarage nuuja deedei bine jepänemujisi. ¹² Peei name pi Yakobu liba itecijuji egä deedei puga ge Aikupito je, tabe teeme bägräwale, lui gemi mime kaakesaare, teebibine jityepemuji teeme niinäce gaabe me piyeme. ¹³ Ingwe ca

teepi liba cääri äcnäruji, Yoosepa teeme naniganewale bime bau aboclomtuji. Parao pui padare cabu umle äbituji Yoosepa me ingle biname poto cidi me. ¹⁴ Yoosepa piba mene jityepuji teeme babe Yakobu te otnime teeme inglewale cama Aikupito me. Teepi iyeta lui sebenti faib biname ge. ¹⁵ Puma cita ca Yakobu äduji Aikupito me. Tabu puga ge budre, cuta teeme bägrä iyeta budre puga ge. ¹⁶ Ingwe ca teeme kaakesaare cina pui saarewale bime budrekaake ewademujisi Kanana gawe cabu me cewe ngii Sekem me, puga kaake bine gape jerbemujisi, lui gapecewe ne Abrahamo te rarekaake ca itu jeletnuji Hamora biname bime bau ca.”

¹⁷ Setepano mene jicemige egä, “Acejiyame me padare liba mameta ge atyaramta teeme jajeji mene toraca me äbitame, lui mene Abrahamo ne itu jejuji, mime biname cina piba Aikupito gawe cabu bucurage itu ablinujisi. ¹⁸ Pui padare cabu kirece mope biname te gije abacituji Aikupito gawe ne ire atwime; tabe umle lica ge Yoosepa poto cidi me. ¹⁹ Pui mopeyame piyepu teeme biname cina mime biname bine engletnäjemujisi, mime kaakesaare bime ireclota mäpu me jewenemujisi. Teepi teebibine giri jicranemujisi teeme engäbägrä bine puutucu abmalame budre äbitame. ²⁰ Siige, Moose pui padare cabu aplimluji; tabe jamyacu bägrä ge. Nesae mabye teeme mage babe cina teebine mete cabu ire jetwujäsi. ²¹ Moose ne liba nuuja puupu cabu me imilitäsi, pui Parao me ngulebägrä te teebine esicrutuji, joomluji teeme bägrä täápume. ²² Aikupito umleumle biname cina Moose ne ebiberäjujisi. Tabe babo me äbituji teeme mene piyepu teeme waweneca cabu.

²³ Moose liba footi kämäge joomluji, tabe ngene jotwananuji teeme Israela binamewale bine ädärame. ²⁴ Tabe jepänuji Aikupito biname te yepä Israela biname ne egluji. Moose pui ne itityäruji, Aikupitoyame ne daremu jecwcnistuji, budre tama egluji, siige. ²⁵ Moose apu jengenuji egä teemerage Israela biname cina umle ge egä Acejiyame te teebine pa jaajepi teebibine äsecrerrame teeme mäpu ireclota cabu ca, yepä Israela biname umle lica ge peei poto cidi me. ²⁶ Nuuja bimu tabe jääpänuji neeneni Israela biname arngi cabu jage. Moose singi teeme claabe ne agawame, jaajuji egä, ‘Siige, weene yepä biname gegi. Weene ngenome weemämu arngeniye?’ ²⁷ Yepä, lui te nuuja ne egluji, tabe Moose ne iyebingäjui, teebine itemluji egä, ‘Meebine laati te bii naajige cime ire atwi biname piyepu ablaweja biname äbitame?’ ²⁸ Wää, maane singi cebine agli mäte, maane lipu birice Aikupito biname yepä ne seglumete?’ ²⁹ Siige, Moose liba peei mene itecijuji, tabe Aikupito gawe cabu ca äyebingtuji cudecewe me, siige Midiyan gawe cabu gije abacituji lenajame. Puga teeme coga te neeneni imäbägrä bine aplimluji.”

Setepano cerämu cuta jicemige egä, ³⁰ “Footi kämäge liba apirininuji, Moose piba Sinai podo wajwa je daapo taatu gawe cabu enajuji, siige Acejiyame me mename seemo te teeme bau taboclomtuji. Uli te puga ayige, pui wäd räji cabu peei mename seemo ne jepänuji. ³¹ Moose cälu te jituji peei uli ne liba jepänuji ayi je, äduji mameta me cängena ireme. Tabe piba Acejiyame me tagepogogo itecijuji egä, ³² ‘Cane Acejiyame säne, lui ne mäme kaakesaare Abrahamo, Isacako, piyepu Yakobu yaawejänusi.’ Moose me tääpe te wälu name pi jeclonuji, tabe wälu ge ireme. ³³ Acejiyame teebine jejuji, ‘Määme ernge gwidape yiirecimi, ingle maane aclajuteji gäte cude puupu cabu. ³⁴ Yoo, cane jääpänemune cäme biname bime ireclota Aikupito je lui mage mäpurage ge. Cane teeme mäpu cabu cewe oocanena nätecijanuge; cane bii täinine teebibine mäpu cabu ca äsecrerrame. Ayo, cane meebine Aikupito me pa näätyepene.’

³⁵ Siige, Moose peese Israela biname cina lui ne itu jigyuji, teebine jejuji egä, ‘Laati te meebine naajige cibibine ire atwime piyepu ablaweja?’ Yepä, Moose peese nyene lui ne Acejiyame te itu tityepuji Israela biname bine ire atwime piyepu teebibine teeme mäpu ireclota cabu ca äsecrerrame. Pui mename seemo lui te ayeji uli cabu taboclomtuji, tabe Moose ne itityäruji. ³⁶ Moose peese nyene lui te biname bine ewademujisi Aikupito gawe cabu ca. Footi kämäge cama tabe ciitaca gwidape bine jewenanemujisi Aikupito ngalebora piyepu Uududi Malu gome piyepu pui daapo taatu cewe cabu. ³⁷ Moose peese nyene lui te Israela biname bine jejemuji egä, ‘Acejiyame nuuja mename biname ne cire täätyepipi, tabe cebine liiyepu itu nätyepuji. Tabe weeme cabu ca yepä cirege.’ ³⁸ Siige, Moose peese nyene lui puga ge Israela biname cama pui daapo taatu cewe cabu je. Tabe puga ge mime sasa kaakesaare cama piyepu pui mename seemo cama, lui teebine mene jejuji Sinai Podo cabu je. Tabe puga sewademujisi Acejiyame miji ireclota mene mibibine jajanename.

³⁹ Yepä, mime kaakesaare cina äbwäricninujisi teeme mene ätecijame, siige Moose ne jigyuji. Teepi singi ge cuta Aikupito me äcnärame. ⁴⁰ Peei name pi teepi Moose me naane Aarona ne jejuji egä, ‘Mime uuje bine jewenemi mime niinäce gaabe otnime. Mine nuuja umle lica gemi ngena te itu täbitumi Moose täápume podo cabu je, lui te mibibine Aikupito gawe cabu ca niwadipi.’ ⁴¹ Teepi puma cita ca uuje ne jewenujisi awejename, teeme opo lui kau plongo pana ge. Teepi peei ne yiwäräjujisi, babo deedei jewenujisi, lui teeme ime ca wawenäjeji gwidape ge. ⁴² Peei name pi Acejiyame te kaake ca icelyäremujisi teebibine,

ire ta jicranemuji teeme peei singi gaabe cabu otnime dume piyepu wale bine iiwärejame. Mene pisi nyene Oogäräneji Mene cabu Acejiyame me mename biname bime bau ca egä, 'Israela biname, peei lui căme täápume lica gyene
weene lui footi kāmäge cabu cibucibu gwidape yaaglecimuye, yiwäräjemye pui daapo taatu cewe cabu je.

⁴³ Yepä, Moloko uuje täápume weene cäbletääpe ca mete ne erangujiye, pui ne ecanujiye, cuta piyepu weeme uuje Rapana, teeme ämyeji wale ne ecanujiye.

Teepi lui ime ca wawenäneji gwidape ge iiwäreja täápume.

Cane peei name pi weebibine cudecewe me cirege ätyepa Babloniya nuuja poto me.'

⁴⁴ Siige, mime kaakesaare bime iiwäreja mete puga ge pui daapo taatu cewe cabu je. Peei watata rarangäneji mete lui cäbletääpe ca wawenäneji ge. Peei lui Acejiyame me mete ge biname cama lenajame. Teepi peei ne cängena jewenujisi epu pana Acejiyame te Moose bau me lipu eboclomtuji mene taatu ca mete raranga täápume. ⁴⁵ Ingwe ca teepi peei mete teeme bägrä bine äcäremujisi. Teeme bägrä cina pui mete ne piba ecanujisi ten cama, teepi liba Yosuwä cama ecluji ai Kanana gawe bine waadename, Acejiyame te teeme niinäce gaabe ca liba iyecräjemuji maramara biname bine. Pui mete te ten cama enajuji ngälu Daawida me padare. ⁴⁶ Yoo, Acejiyame ngenecu miiji ge Daawida täápume. Tabe Acejiyame ne itemlujitabe te meterage wawename Acejiyame täápume, lui ne iyeta mine Yakobu me kaakesaare cina yaawejanusu. ⁴⁷ Yepä, Daawida me bägrä Solomona te peei mete ne eranganuji.

⁴⁸ Yepä, Caburage Acejiyame tabe lica yaanajuge mete cabu lui ne biname cina yaarangusi, teeme mename biname te lipu jiiucuji egä,

⁴⁹ 'Yageyame te jiičenige: căme puupu gyene cabucewe je, cane biname bine puma cita ca ire pa taatwemepene.

Gawecewe lui căme ernge acita puupu gyene.

Lipu mete ne weene singi căme täápume rarangame?

Lese nyene puupu căme lenajame?

⁵⁰ Cije cane iyeta gwidape cämämu lica jewenemujine? "

⁵¹ Siige, puma cita ca Setepano cuta jejemige egä, "Weene ätrunga cäco gemi. Weene ngene atwana Acejiyame bau lica gemi. Weene Acejiyame me mene ätecija cäco gemi. Weeme sasa kaakesaare liiyepu weene pepu gemi. Teepi lipu singi lica Aceji Seemo ne ätecijame, weene cuta piyepu. ⁵² Wää, nuuja mename biname puga ge weeme kaakesaare cina lui ne niija lica jaawenusi? Eewe, teepi niija jaawenemusi iyeta mename biname bine! Teepi Acejiyame me mename biname bine budre me jaawenemusi lui cina mene jeitnäjujisi teeme Conocäco Kaakeseayame Yeesu me otni poto cidi me. Siige, ai padare weene walya mule ca teebine budre me itu yaaglepeye. ⁵³ Weene peete nemi lui cina Acejiyame me cotre mene ewademujiye, mename seemo cina lui cotre weebibine icärininujisi, yepä weene lica peei cotre bine jaawenemuye!"

Biname cina Setepano ne Kula ca Jibyecrisi

⁵⁴ Siige, pui mutre biname cina liba Setepano me mene itecijemige, teepi claabemete jepänisi, giricu bine etebecmisi teeme claabe name pi. ⁵⁵ Yepä, Aceji Seemo Setepano me trupa cabu baborage ge. Setepano cabu me ire acitige, Acejiyame me jamyacu apaclyera ne jepänige piyepu Yeesu ne jepänige aclajuteji ge Acejiyame me camu poto ca. ⁵⁶ Tabe jiiuce, "Ire cabu me! Cane jepänenine dume äpäcuteji ge piyepu teebine, lui Acejiyame bau ca täduji biname me äbituji, tabe aclajuteji ge Acejiyame me camu poto ime je!"

⁵⁷ Baborage ala cama pui mutre biname cina teeme tablame bine ime ca ermemisi, piba taatu Setepano bau me tuuwametnige, ⁵⁸ teebine babo cewe cabu ca wata iyebllingtisi, kula ca jibyecrisi. Teepi teeme acwabeja cäbletääpe ebmalemisi yepä mamye biname gome je, teeme ngii Saulo. ⁵⁹ Teepi Setepano ne jäje jibyecranisi, siige tabe mime Yageyame ne jejige egä, "Yageyame Yeesu, nacati căme seemo!" ⁶⁰ Tabe kokorare ca ääpednutige, piba babo tage ca jejige egä, "Yageyame, gone ngene taapecnute teeme poto cidi me ai niija mule ne." Tabe ai mene jiiuce, siige budre äbitige.

8

¹ Yoo, Saulo singi ge Setepano me budre täápume.

Saulo te Ätrunga Biname bine Mage Niija Jaawenanemuge

Puirage bimü cabu poto biname cina gije abacitinisi ätrunga ingle biname bime ireclota mäpurage wawename Yerusalema je. Teepi iyeta ätrunga biname bine iyecräjemisi, siige teepi uucratni-ge cewe maramara me Yuudea piyepu Samariya probins ngalebora me. Ätyepäneji biname taatu icrajige Yerusalema je. ² Poto cängena ätrunga biname cina Setepano ne gape me ecitisi, mage ele ewäyisi.

³ Yepä, Saulo gije abacitanege ätrunga biname bine äyebhengame. Tabe mete yepäyepä ngalebora abacitanige, ätrunga biname bine sisecreräjemige, siige magebi rooriye bine icranemige krokeciye mete bora me.

Samariya Cewe cabu ta Miiji Mene Jaajananemusi

⁴ Lui ätrunga biname bine iyecräjemisi, teepi otninisi cewe gaabegabe ta, Miiji Mene iyeta poto ta jejananemisi. ⁵ Pilipo ädige babo cewe Samariya me, puga biname bine umle jewenemige Keriso poto cidi me, lui te biname bine niiya cabu ca yäasecräremuge. ⁶ Bucurage biname tomitomi cabu teepi cängena itecijemige Pilipo ngena mene jejananemige. Teepi iyeta teeme mene jitecijanisi, piyepu ciitaca mule bine jepänemisi, tabe lui bine jewenemige. ⁷ Niiya cable cina mage ala cama äsinisi bucurage biname cabu ca; piyepu biname lui bime ime ernge apineca cäco ge, piyepu biname lui eepanepana otni, teepi miiji me äbitininisi. ⁸ Yoo, peei name pi baborage gege puga ge Samariya cewe cabu je.

⁹ Pui babo cewe cabu yepä biname ngii Simona te enajige. Mage padare cama tabe Samariya biname bine cälu te ätime jaawenemuge teeme piiseba mule ca. Tabe jücemige egä tabe babo biname ge. ¹⁰ Iyeta biname pui babo cewe Samariya cabu, matimati cabu ca ngälu modamoda me, teepi teeme mene jättecijusi, jüicusi egä, "Tabe peese nyene biname lui Acejiyame me kokre cama gyene, lui ne yaainusi Babo Kokreyame ca." ¹¹ Lecaleca padare cama teeme piiseba mule name pi biname cina mutäcäco läbitininisi, peei name pi teeme mene jättecijanusi. ¹² Yepä, teepi liba Pilipo me mene jitecijisi, Miiji Mene Acejiyame te biname bine waadena poto cidi me piyepu Yeesu Keriso poto cidi me, teepi piba niiye ca äciseja ne ecatisi, rooriye magebi iyeta. ¹³ Simona cuta peei mene liba itecijige, teebine cuta niiye ca jicisäjisi Yeesu me ngii cabu. Peei ingwe gaabe ca, tabe Pilipo me mameta je enajige, piba cälu te jitige kokre mule gwidape piyepu ciitaca mule bine liba jepänemige, Pilipo lui bine jaawenemuge Aceji Seemo me kokre ca.

¹⁴ Yerusalema cabu lui ätyepäneji biname cina liba itecijemige egä Samariya biname cina itu yaacatepesi Acejiyame me mene ne, siige teepi piba Peteru Yoane naabibine jättyepisi teeme bau me. ¹⁵ Teepi liba atyaramtäsi, Acejiyame ne puma ewejänäsi pui ätrunga biname bime täapume egä Aceji Seemo te pa labacitanenege teeme yepäyepä trupa cabu me, ¹⁶ ingle naace popi Aceji Seemo te camuge abacitana teeme nuuja biname cabu, yepä teepi niiye ca äciseja taatu itu yaacatepesi mime Yageyame Yeesu me ngii cabu. ¹⁷ Puma cita ca Peteru naabi Yoane ime icranemäsi teeme papa cabu, siige Aceji Seemo te piba teeme yepäyepä trupa cabu abacitanige.

¹⁸ Simona liba jepänige egä Aceji Seemo te ätrunga biname bime trupa cabu babacitanige, ätyepäneji biname cina liba ime icranemäsi teeme papa cabu, tabe piba singi rarekaake ceerame Peteru Yoane naabibine, ¹⁹ jaajige teebibine egä, "Cuta cebine näcäreye peei kokre, egä cane lui biname cabu cäme ime laacitune, Aceji Seemo te piba labacitune teeme cabu me."

²⁰ Yepä, Peteru teebine jejige egä, "Maane äte, mäame rarekaake cama ädi ngälu cäco niiya puupu me, ingle naace popi maane ngene bii jotwanite Acejiyame me owecu gwidape ne aletname rarekaake ca! ²¹ Maane äblicäco gäte cine cama gigri kaakesea wawenane, ingle mäame ngene atwana conocono gyene Acejiyame me opo gaabe. ²² Ebmali page ai niiya mule ne, Acejiyame ne ewejani mäame niiya ngene atwanena poto cidi me. Tabe pama meebine kälyä pa naawenege. ²³ Cane nääpänenine egä maane niiya claabe gäte cime kokre poto cidi me. Mäame niiya mule te meebine bii noomlige."

²⁴ Puma cita ca Simona te Peteru Yoane naabibine jaajige egä, "Owecu, weene Yageyame ne ewejaneye cäme täapume egä nuuja peei niiya gwidape te, weene lui poto cidi me bii najiye, lica pagege äbita cäme täapume."

²⁵ Siige, Peteru naabi Yoane Yeesu me ireclota poto cidi me liba jücemäsi, piyepu Yageyame me mene liba jejananemäsi, teepi peei ingwe ca acnenutäsi Yerusalema me. Cuta gaabe cabu liba aaclige, Miiji Mene jejananemäsi Samariya gawe biname yepäyepä cewe cabu ta.

Pilipo Miiji Mene Jejige Yepä Etiyopiya Gawe Biname ne

²⁶ Acejiyame me mename seemo te Pilipo ne jejige, "Maane amacnepi, uule poto me ädi, ngälu gaabe cabu atyaramtepi, lui gaabe gyene Yerusalema ca Gaasa me." Yoo, ai taje biname lica waatnetnäjinusi peei gaabe cabu. ²⁷⁻²⁸ Siige, Pilipo amacnetnäjige, abyemäriige. Yepä Etiyopiya gawe ngii biname puga ge gaabe cabu teeme cewe otnime. Tabe lui rarekaake ire atwi mope biname ge magebi täapume lui te Etiyopiya gawe ne ire jaatwuge. Tabe itu lädepi Yerusalema me Acejiyame ne iiwärejame; tabe tacne-nutenige cewe me teeme älädnälädna gwidape cabu. Gaabegabe liba tädige, tabe Oogäräneji Mene bine secnemige, Acejiyame me menameyame Isaya lui bine soogäruji. ²⁹ Aceji Seemo te Pilipo ne jejige egä, "Ädi älädnälädna gwidape gome me." ³⁰ Puma cita ca Pilipo uuwamige

Etiyopiya biname mameta me, teebine jitecijige Isaya me Oogäräneji Mene acnema cabu. Tabe teebine itemlige egä, “Nää, iyeta umle gäte ai mene lui ecnenenemite maane?”

³¹ Etiyopiya biname te jejige egä, “Cane lipu umle äbita; nuuja biname liba lica pisi nyene cebine abiberäjame?” Tabe piba Pilipo ne jejige, “Tacenuti älädnälädna gwidape cabu, cäme gome adna-ti!” ³² Age peei neeneni Oogäräneji Mene pargi Yeesu poto cidi me tabe lui bine acnenige:

“Tabe epu maamoi pana, aglime lui ne ecanisi.

Tabe maamoi plongo pana, lui te bojäcu yaanajuge teeme ngäli liba jaacclamusi.

Tabe nuuja mene lica.

³³ Teepi ajiri me jewenisi teebine, yepä äwärimta biname lica ge teeme täápume.

Nuuja biname te äblicäco mene iicana teeme ingwe kaakesaare poto cidi me, ingle naace popi teeme ireclota ai gawecewe cabu ngälu bii joomlige.”

³⁴ Siige, pui biname te Pilipo ne jejige, “Cebine naji, laati ne peei mename biname te jeitnenige? Teeme täápume aitränjenige, coo nuuja biname ne jeitnäjenige?” ³⁵ Pilipo piba gije abacitige mene me. Tabe jegednige peeirage mene pargi cabu ca, piba teebine jejanige Müiji Mene Yeesu poto cidi me. ³⁶ Teepi liba gaabe cabu aacliche, niye gome atyaramtäsi, piba pui biname te jejige egä, “Agesa niye. Nää, maane lipu gäte cebine niye ca äcisejame Yeesu me ngii cabu?” ³⁷ Pilipo te jejige teebine egä, “Yoo, cane müiji gäne meebine niye ca äcisejame mäame ngenecu bora liba ätrunga pisi nyene.” Tabe jejige egä, “Yoo, cane jitrungenine egä Yeesu Keriso lui Acejiyame me bägrä gyene.”

³⁸ Pui biname liba mene jejige teeme kaakeseayame te älädnälädna gwidape iibaname, piba Pilipo piyepu Etiyopiya biname niye cabu me äglenutäsi, siige Pilipo piba Yeesu me ngii cabu jicisäjige teebine. ³⁹ Teepi liba tarpatäsi niye cabu ca, mime Yageyame me Seemo te Pilipo ne ecatige. Pui biname te teebine ingwe ca lica jepänige; yepä, gege cama teeme gaabe cabu ädige. ⁴⁰ Pilipo piba jepänige egä tabe lui babo cewe ngii Asotus cabu jage. Puma cita ca tabe ädige, iyeta cewe cabu ta Müiji Mene jejanemige, ngälu siige Kesarea cewe me atyaramtige.

9

Saulo Ätrunga Biname me Äbitige

¹ Peei padare cabu Saulo te biname bine drämä ca jewenemige egä tabe singi Yageyame me ätrunga biname bine budre me aglecame. Tabe iiwäreja mope biname bau me ädige, ² teebine itemlige peba ceerame egä tabe peei peba cama müiji gyene Israela biname bime abasecretna mete yepäyepä cabu me abacitaname, lui cina babo cewe Damaseko ngalebora jage. Saulo singi ge peei peba bine naace täápume päpäname, egä tabe liba biname bine jääpänemuge lui cina Yageyame me gaabe cabu waatninusi, magebi piyepu rooriye, siige peei peba te conocäco yääcärüge oomlemame, Yerusalema me waadename.

³ Saulo liba babo cewe Damaseko mameta atyaramtige, piba taatu apaclyera te carbe cabu ca teebine tuungepmalige. ⁴ Tabe itramige gawe cabu me, tagepogogo piba itecijige egä, “Saulo, Saulo, maane ngenome cebine niya nawenenite?”

⁵ “Babo Biname, baa maane laasi näte?”

“Cane Yeesu säne, maane lui ne niya nawenenite. ⁶ Abujängti, ädi babo cewe me, cane puma mene pa naajene maane ngena waweneme.”

⁷ Saulo cama lui biname cina eclige, teepi imyemutemige mene cäco. Teepi tagepogogo itecijemige, yepä nuuja biname ne lica jepänisi. ⁸ Siige, Saulo gawe cabu ca abujängtige, irecu aasatige, yepä äblicäco ge päpäna gwidape bine. Teepi peei name pi teeme ime joomlisi, eweclujisi, Damaseko cewe me ecanisi. ⁹ Nesae bimu ngalebora tabe äblicäco ge päpäna. Pui padare cabu tabe deedei piyepu niye cäco enajige.

¹⁰ Puga ge Damaseko cewe je yepä ätrunga biname ngii Ananiya. Yageyame teebine wama pana jejige egä, “Ananiya!”

Tabe jejige, “Yageyame, cane age säne.”

¹¹ Yageyame piba teebine jejige egä, “Abujängti, ädi yepä gaabe cabu me, pui gaabe ngii Conocäco ge. Puma Yuuda me mete cabu je maane itemlepi yepä Taasu cewe biname täápume, teeme ngii Saulo. Tabe irecu ätumutenige. ¹² Tabe Saulo te wama pana yepä biname ne bii jepänige, ngii Ananiya, teeme mete me lui te tabacitige, ime aacitige teeme papa cabu, piba tabe cäari irecu aasatige.”

¹³ Ananiya jejige, “Eewe, Yageyame! Bucurage biname cebine itu najanepesi ai biname poto cidi me, tabe lipu baborage niya jaawenemuge mäame biname bine Yerusalema ngalebora je. ¹⁴ Tabe peba cama Damaseko me tädumi, cuta peei peba cabu conocäco pisi nyene modamoda iiwäreja biname bime bau ca iyeta biname bine oomläjecame Acejiyame me ngii lui cina yaawejanusi.”

¹⁵ Puma cita ca Yageyame te jejige, “Maane äte, teeme bau me ädi, ingle naace popi cane teebine itu jaajepene căme kaakesea wawename, căme ngii aitnejame nuuja gawe biname bime bau me, piyepu maramara gawecewe mope biname bime bau me, cuta piyepu Israela biname bime bau me. ¹⁶ Cane cămămu teebine pa jaawabepene iyeta măpu tabe lui pagege păpăna cămiji pi.”

¹⁷ Siige, Ananiya ädige, pui mete me abacitige, piba ime aacitige Saulo me papa cabu. Tabe jejige egă, “Căme biname Saulo, Yageyame Yeesu lui măăme bau me taboclomtumi gaabe cabu maane liba aima tădumete, tabe te cebine bii nătyepige, ingle naace tăăpume maane căări păpăname piyepu Aceji Seemo te măăme trupa cabu abacitame.” ¹⁸ Piba taatu cibu idre pana gwidape cina taatramige Saulo me irecu cabu ca. Tabe piba irecu aasatige ireme. Tabe abujăntige; piba Ananiya teebine niye ca jicisăjige Yeesu me ngii cabu. ¹⁹ Tabe liba deedei äbitige, teeme kokre te căări piba tacnenutige.

Saulo te Mijji Mene Jejananemige poto Damaseko Abasecretna Mete cabu je

Nesae bimu cama Saulo ätrunga biname cama enajige Damaseko cewe je. ²⁰ Tabe conocăco ädige poto abasecretna mete me, gije abacitige mene jajaneneme egă Yeesu lui Acejiyame me Băgră gyene.

²¹ Iyeta lui cina itecijemige, călu te jitemige, teemeteme ätemlăjiniis egă, “Baa, agesa tabe lui te Yerusalema je pui biname bine yaaglecimuge lui cina Yeesu me ngii yaawejanusii? Tabe pama aima tădumi, ingle naace popi tabe singi ätrunga biname bine oomlăjecame modamoda iiwăreja biname bime bau waadename!”

²² Yepă, Saulo me mene kokrerage äbitige. Tabe toraca conocăco Yeesu ne jewabudnitige, jejemige egă, “Tabe peese nyene lui ne Israela biname cina jewagrijanisi teebibine niya cabu ca äsecrera.” Siige, Damaseko cewe je lui Israela biname, teepi äblicăco ge teeme mene awecnista.

²³ Bucurage bimu ingwe ca, poto Israela biname cina abasecre-tnige, mene jitranisi Saulo ne aglime. ²⁴ Yepă, nuuja biname te teebine jejige teepi ngena mene jitranisi. Ciyye bimu teepi cewe grana gome ire jetwisi teebine aglime. ²⁵ Yepă, ciyye cabu Saulo me binamewale cina teebine ecanisi cewe kula caale gome me. Puma cita ca teebine baborage diiba ngalebora isinglantisi, kula gaga cabu ca iyinisi gawe me.

Saulo Yerusalema Ngalebora je

²⁶ Saulo piba Yerusalema me ädige. Tabe singi ätrunga biname cama alenglecăjame, yepă teepi Saulo me mene lica jecatisi egă tabe lui toraca ätrungayame gyene. Teepi iyeta wălu ge teeme tăăpume. ²⁷ Puma cita ca Banaba teebine itityărige, ecanige ätyepăneji biname bime bau me. Banaba teebibine jejananemige Saulo lipu mime Yageyame ne itu jăăpănepi Damaseko gaabe cabu, piyepu Yageyame te ngena mene itu jaajepi teebine. Tabe cuta piyepu jejitnige Saulo te mene Yeesu me ngii cabu lipu wălu căco jaaananemepi Damaseko cewe cabu je. ²⁸ Saulo peei name pi ten cama enajige piyepu Yerusalema ngalebora ta otnetnăjige. Tabe mene wălu căco jicemige mime Yageyame me ngii cabu. ²⁹ Puga ge Israela biname lui Griik mene ca jicemusi. Tabe ten cama mene jicemige, teebibine jiseblecăjemige, yepă teepi singi ge teebine aglime. ³⁰ Ätrunga biname liba umle äbitininiis ai poto cidii me, teepi Saulo ne ecanisi Kesarea malu cewe me, puma cita ca teebine jityepisi Taasu cewe me.

³¹ Siige, piba iyeta ätrunga ingle biname cina Yuudea, Galilaya, piyepu Samariya gawe cabu poode jepănanisi. Teepi kokre äbitininiis, piyepu bucurage me äbitininiis Aceji Seemo me ätiyera name pi, piyepu Yageyame me opo gaabe je teepi căngenarage icrajige.

Peteru Ädige Cewe Neeneni Luuda piyepu Yoopa me

³² Peteru iyeta cewe ta otnetnăjige. Nuuja taje tabe ädige Luuda me, Acejiyame me biname bine puma engrăjemige. ³³ Puga tabe biname ne jepănige ngii Aenea lui me ime ernge apineca căco ge. Eit kămăge ngalebora tabe äblicăco ge teeme ute puupu cabu ca arpimenta. ³⁴ Peteru teebine jejige egă, “Aenea, Yeesu Keriso te meebine mijji naawenenige. Arpinanti, măăme ute gwidape emacetnăjemii!” Siige, Aenea piba taatu arpinantige. ³⁵ Iyeta biname cina lui Luuda piyepu Sarena cewe ngalebora icrajige, Aenea ne jepănisi. Teepi piba mime Yageyame bau tatatrongăraninisi.

³⁶ Puga ge Yoopa cewe cabu yepă magebi ngii Tabita lui ätrunga biname gwene. Yoo, teeme Griik ngii lui Dooka, peei me aboclomta lui diiya. Iyeta padare tabe mijjimiji kaakesea jaawenemuge, owecumete biname bine yăătityăremuge. ³⁷ Peei padare cabu teebine pita te jwoomlige, siige budre äbitige. Teepi teeme budrekaake ne jucisăjisi, cabu je lui mete puupu, pui cabu ocitisi. ³⁸ Yoopa cewe cudecewe lica ge Luuda cewe ca. Peei name pi Yoopa je ätrunga biname liba umle äbitininiis egă Peteru lui Luuda cewe cabu jage, teepi neeneni biname bine jăăttyepisi teeme hau me mene cama egă, “Owecu,

wata tädepi cime bau me.”³⁹ Siige, Peteru piba amacetnäjige, ten cama ädige. Tabe liba Yoopa me atyaramtige, teepi ecanisi pui cabu puupu me. Iyeta cuublacubla cina teebine jowaclomtisi, ele jolwisi, maramara asigreräja gwidape Peteru ne piba jawebäjisi, Dooka lui bine itu yaaterutäjemepi tabe liba ireclota ge.⁴⁰ Siige, Peteru iyeta biname bine iyebhengemige peei puupu cabu ca, kokorare ca piba äpednu-tige Acejiyame bau irecu ätumutame. Puma cita ca tabe atatrongtige budrekaake bau me, jojige teebine egä, “Tabita, arpinanti!” Tabe irecu aasatige, Peteru ne liba jepänige, piba adnatige.⁴¹ Peteru teebine ime ca jwoomlige, owejäntige. Tabe piba tesoglecemige ätrunga biname bine cuta cuublacubla bine iyeta, teebibine jewabemige egä Tabita ireclota gwene.⁴² Iyeta Yoopa ngalebora biname cina itecijemige ai poto cidi me, siige bucurage biname cina Yageyame ne jitrungisi.⁴³ Peteru poto bimu cama Yoopa je enajige, biname ngii Simona teeme mete cabu. Simona me kaakesea lui cibi tääpe bine yaamacetnäjemuge maramara kaakesea tääpume.

10

Koroneliyo te Peteru ne Ala Tesoglige

¹ Puga ge Kesarea cewe je yepä biname ngii Koroneliyo lui ge mope biname Rooma cubu biname bime yepä sange tääpume. Pui sange ne yaainusi ‘Italiya Sange’ ca.² Tabe babo singi irecu ätumuta mule tääpume. Tabe piyepu teeme ingle biname iyeta Acejiyame ne yaawejanusi. Teeme äityera baborage ge Israela owecumete biname bime tääpume, piyepu tabe jäje irecu lätumutanuge Acejiyame bau me.³ Yoo, yepä mämlebimu me trii oklok poto cidi me, tabe wama pana pajecurage jepänige mename seemo ne, lui tädige, teebine jejige egä, “Koroneliyo!”

⁴ Tabe pui mename seemo ne wäluwälu ire jetwige, piba jejige egä, “Yageyame, ngena gyene?”

Mename seemo te jejige egä, “Acejiyame te ngenecu miiji gyene mäame irecu ätumuta tääpume piyepu mäame owecu mule tääpume. Tabe singi ge meebine miiji mene jajime.⁵ Page Yoopa me mäame biname bine jityepimi yepä biname ne ärngime teeme ngii Simona Peteru.⁶ Nuuja biname ngii Simona lui te cibi tääpe bine yaamacetnäjemuge, tabe teeme mete cabu enajenige. Pui mete lui malu ligi jage.”⁷ Siige, mename seemo te liba peei mene teebine bii jejige, piba abyemäriige. Puma cita ca Koroneliyo ala taasoglicige teeme neeneneni mete kaakesea biname bine piyepu yepä cubu biname ne, lui tage teeme miiji kaakeseyame, cuta lui te Acejiyame ne yaawejanuge.⁸ Koroneliyo teebibine jääjänige ngena te bii bäbitige, siige piba Yoopa me jäätjepänige.

Peteru Babo Gwidape ne Wama pana Jepänige

⁹ Nuuja bimu teepi liba gaabe cabu jage Yoopa cewe mameta atyara, peei padare Peteru piba jegelige mete toro cabu lui puupu cabu me irecu ätumutame. Bimu duusa mameta ge.¹⁰ Peteru loolo me cewe te joomlige, tabe singi deedei tääpu mage. Deedei gädnäja trämä, tabe wama pana jepänige,¹¹ dume te iitnige, puma cita ca yepä gwidape te gawe me täinige, lui babo daamledamle cäbletääpe pana ge; teeme fooa mutre ca siyiniisi gawe me.¹² Puga ge pui gwidape papa cabu maramara cibi piyepu biicwale piyepu glunubora ele.¹³ Piba tagepogogo te jejige teebine egä, “Peteru, arpinanti, eglecemi, erngäjemi!”

¹⁴ Yepä, Peteru jejige, “Eewe, Yageyame, cude gemi! Cane umle cäco gäne gwidape ärngäja lui gemi cude cime tääpume, coo piyepu lui gemi cibucibu lica.”

¹⁵ Pui tagepogogo te cuta jejige, “Maane gone gwidape bine yaainemute cude ca, Acejiyame lui bine cibi me itu jaawenemepi!”¹⁶ Nesae gääbu liba pepu äbitige, peei cäbletääpe ne gwidape cama piba cabu me ewecnistisi.

¹⁷ Peteru mage ngene jotwananige teeme wama pana mule me aboclomta poto cidi me. Puirage padare lui biname bine Koroneliyo itu täätjepämi, teepi Simona me mete ne jepänäniisi, siige mete gaabe gome jaacclajutänige.¹⁸ Teepi ala abayänisi, biname ne itemläniisi egä, “Pisi nyene, nää, biname ngii Simona Peteru?”

¹⁹ Peteru te liba ngene jotwananige peei wama pana mule me aboclomta poto cidi me, Aceji Seemo te piba teebine jejige egä, “Ire! Nesae biname age tämi, meebine näärngänäniisi.²⁰ Maane amacetnäji, äini, gone däägudägu läbitute ten cama otnime, ingle cane te bii jäätjepänine teebibine.”²¹ Siige, Peteru äinige, pui biname bine jejemige, “Cane age säne weene lui biname ne jirngeniye. Weene ngenome tuije?”

²² Teepi jejänisi egä, “Cubu mope biname Koroneliyo te nityepämi. Tabe miijirage biname gyene, lui te umle gyene Acejiyame ne awejena, piyepu iyeta Israela biname ngenecu miiji gemi teeme poto cidi me. Acejiyame me conocäco mename seemo te Koroneliyo ne tejumi meebine asoglecame teeme mete me otnime, naace tääpume tabe mäame mene ätecijame.”²³ Siige, Peteru pui biname bine mete me ääsinglentänige yepä ciye cama ute me.

Peteru Atyaramtige Koroneliyo me Mete me

Nuuja bimu tabe amacetrnäjige, siige ten cama ädige. Poto ätrunga biname Yooa cewe cabu ca ten cama eclige. ²⁴ Yepä bimu ingwe ca, Peteru atyaramtige Kesarea cewe me, Koroneliyo luma teebine jewagrjige. Koroneliyo cama puga ge teeme inglewale piyepu poto binamewale, tabe lui bine tesoglecemige. ²⁵ Peteru liga mete me abacitige, Koroneliyo teeme bau ädige, kokorare ca teeme gome äpednutige, ²⁶ yepä, Peteru teebine ewejängtige, jejige egä, “Abujängti! Cane cuta biname gäne.” ²⁷ Peteru Koroneliyo ne mene jejanige egäcäro teepi mete me abacitäsi. Tabe puma pui biname bine jepänemige. ²⁸ Tabe jejemige egä, “Weene umle gemi egä cime Israela biname bime cotre pisi nyene egä, cine lica ädära coo abasuta nuuja gawe biname cama. Yepä, Acejiyame cebine nabiberäjumi egä: ‘Gone nuuja biname ne jäägyuye, gone teebine cude me jaawenuye.’” ²⁹ Peei name pi maane liba cebine nasoglumete, cane tädine meebine ädärame, ngänu gyene maane Israela biname lica gäte. Siige, cane page näätlemenine, maane cebine ngenome nasoglumete?”

³⁰ Koroneliyo jejige, “Nesae bimu liba bapirige, cane piba mämlebimu me trii oklok poto cidi me, page liyepu ge, cäme mete cabu irecu tätumutanumene. Piba taatu yepä biname te, lui me cäbletääpe apaclyäreji cama ge, cäme opo gaabe teclajutumi, ³¹ najumi egä, ‘Koroneliyo, Acejiyame te mäame irecu ätumuta mene bii bitecijige, cuta nääpänige maane owecumete biname bine lipu yäätityäremute. ³² Maane Yooa me mäame biname bine jityepemepi, yepä biname ngii Simona Peteru bau me. Tabe lui nuuja Simona me mete cabu jage, lui te cibi tääpe yaamacetrnäjemuge. Teeme mete lui malu ligi jage.’” ³³ Puma cita ca cane biname bine tityepemumene meebine lowejutame, siige baborage eso maane lipu tädite. Page cine age temi Acejiyame me opo gaabe je, meebine naawagrjienisi maane cibibine umle wawename Yageyame te ngena mene naajumi jajime.”

Peteru me Mene

³⁴ Siige, Peteru Koroneliyo naabibine mene jejemige egä, “Cane page umle bäbitine lipu toraca gyene egä Acejiyame te yepä pana ire nitwenininige. ³⁵ Tabe singi iyeta gawecewe biname bime tääpume, lui cina teeme ngii yaaweanusi piyepu miiji taatu mule bine jaawenemusi. ³⁶ Weene umle gemi Acejiyame lui mene Israela biname bime bau itu jityepuji egä poode pisi nyene Acejiyame cama Yeese Keriso name pi. Tabe Yageyame gyene iyeta biname bime tääpume. ³⁷ Weene umle gemi ngena itu äbituji Galilaya je piyepu iyeta poto Israela gawe cabu ta pui padare ingwe gaabe ca, Yoane liba mene jejemuji niyye ca äciseja poto cidi me. ³⁸ Weene umle gemi Yeese Nasareta ceweyame poto cidi me, Acejiyame te lipu teeme cabu Aceji Seemo ne ecituji cuta kokre ne ecituji. Yeese iyeta poto ta waatnetnäjuge, miijimi mule jaawenemuge, piyepu iyeta biname bine miiji me jaawenemuge lui cina Satani me kokre cabu yaacrajuge, ingle Acejiyame lui ten cama ge. ³⁹ Cine ire arbi biname gemi iyeta mule tääpume Yeese lui bine itu jewenemuji Israela biname bime gawe cabu cuta piyepu Yerusalema ngalebora je. Teepi teebine budre me jewenujisi baarge uli cabu äbyera ca. ⁴⁰ Yepä, nesae bimu ingwe gaabe ca Acejiyame teebine budre cabu ca erpinantuji, piyepu cuta eboclomtuji, ⁴¹ lica iyeta biname bime bau me, yepä cime bau me. Cine ire arbi biname gemi, tabe lui bine itu nijinuji ai kaakesea tääpume. Yeese me budre piyepu arpinenta ingwe ca cine ten cama deedei erwäjujisi cuta piyepu niyye enujisi. ⁴² Yeese cibibine nijinuji biname bine Miiji Mene jajanename, piyepu aitnejame egä tabe peese nyene Acejiyame lui ne atrana biname me jewenuji ireclota biname piyepu budre biname bime tääpume. ⁴³ Iyeta sasa mename biname cina mene jeitnujisi teeme poto cidi me, jiiicemujisi egä iyeta biname lui cina teebine jäätrungusi, Acejiyame teeme niyanyiya mule cabu ca kälyä cire jaawenemepi Yeese me kokre name pi.”

Aceji Seemo te Nuuja Gawe Biname bime Yepäyepä Trupa cabu Abacitanige

⁴⁴ Peteru liba mene iicema cabu je, Aceji Seemo te abacitanige iyeta lui cina teeme mene jitecijiisi. ⁴⁵ Israela ätrunga biname lui cina Peteru cama seclige Yooa ca, teepi cälu te jitemige Acejiyame liba teeme ätityerayame Aceji Seemo ne cuta nuuja gawe biname bime cabu ecitanige. ⁴⁶ Teepi teebibine jitecijemisi maramara tagepogogo ca iicema je piyepu Acejiyame me kokre ne awepeyeräja je. Peteru piba jejemige egä, ⁴⁷ “Aceji Seemo te ai biname bime cabu babacitige tabe uja lipu tabacitanuji mime cabu me. Nää, miiji gyene nuuja biname te teebibine iibaname, teepi liba niyye ca äciseja ne acatame Yeese me ngii cabu?” ⁴⁸ Tabe puma cita ca Koroneliyo naabibine jejemige Yeese Keriso me ngii cabu niyye ca äciseja acatame. Teepi pui kaake poto ca Peteru ne jejisi poto bimu cama ten cama lenajame.

¹ Yuudea gawe cabu ta ätyepäneji biname piyepu iyeta ätrunga biname cina itecijemige egä nuuja gawe biname cina Acejiyame me Miiji Mene ne itu secatumesi. ² Peteru liba ädige Yerusalema me, puga ge poto ätrunga biname lui singi gemi nuuja gawe biname cina Acejiyame me cewecu ne acatame, teeme tääpe matikolä iirputa ca Israela biname pana äbitame. Teepi peei name pi Peteru ne jiyingäjisi egä, ³ "Maane lipulipu labacitepete nuuja gawe biname me mete cabu me, lui Israela biname lica gyene piyepu lui me tääpe ne lica ituge iirputa mime pana. Maane cuta piyepu deedei teta cama läbitepete? Maane peei lui mime cotre ne jaatropangtepete!" ⁴ Peei äingeja mene name pi Peteru teebibine jjeananemige iyeta lui itu läbitepesi pui mule me agedna cabu ca. Tabe apu jiiicige egä:

⁵ "Yoo, cane liba Yooa cewe cabu irecu lätumutepene, cane piba yepä gwidape ne wama pana jääpänepene. Peei gwidape lui daamledamle cäbletääpe pana ge, teeme fooa mutre ca sänepesi gawe me, siige cäme mameta me liibepi. ⁶ Cane piba ngalebora me cängena ire jaatwananepene. Puga cibu gwidape bine piyepu cibu cäco gwidape, biicwale, glunubora ele bine jääpänepene. ⁷ Cane puma cita ca tagepogogo nätecijepi, cebine lui najepi egä, 'Peteru, arpinanti, eglecemi, erngäjemi!' ⁸ Yepä, cane jaajepene, 'Eewe, Yageyame, cane umle cäco gäne nuuja cude cibu piyepu cibu cäco gwidape cäme tage cabu acita.' ⁹ Pui tagepogogo mene cabucewe ca piba neeneni me najepi, 'Gone yaainute cibu cäco gwidape ca Acejiyame lui ne cibu me jaawenuge.' ¹⁰ Nesae gäabu pepu läbitepi, siige piba pui gwidape bine iyeta yaawecnemepi cabu me. ¹¹ Puirage padare nesae biname lui bine cäme bau täätjepämepi Kesarea cewe cabu ca, teepi mete me tataräpese, cane lui mete cabu nanajepi. ¹² Aceji Seemo te cebine najepi pui biname cama wata otnime. Siige, ai siks ätrunga biname cina Yooa ca cane cama yaaclepi Kesarea me. Puga cine iyeta Koroneliyo me mete me yäbäcnepesi. ¹³ Koroneliyo piba cibibine nijipi tabe lipu mename seemo ne jääpänepi, teeme mete cabu lui aclajuteji, jaajepi teebine egä, 'Maane biname bine jityepemepi Yooa me yepä biname ne arwojutame, teeme ngii Simona-Peteru. ¹⁴ Tabe meebine mene pa naajepi maane piyepu määme inglewale lipulipu niya mule cabu ca äsecrerase.' ¹⁵ Siige, cane liba gije labacitepene mene me, Aceji Seemo te piba teeme yepäyepä trupa cabu me labacitanepi, ai ätrunga mule agedna cabu je mime trupa cabu lipu abacitanuji. ¹⁶ Cane piba mime Yageyame me mene ngene jaapecnepene tabe lipu tiicuji egä, 'Yoane lipu niye yaacituge biname bime papa cabu niye ca äciseja tääpume, Acejiyame te pepu Aceji Seemo weeme trupa cabu pa yaacitanepi.' ¹⁷ Cäme tääpume pajecu gyene egä Acejiyame pui nuuja gawe biname bime trupa cabu yepä pana Ätityerayame ne yaacitanepi tabe lui ne mime cabu itu ecitanuji, mine liba Yageyame Yeesu Keriso ne niinäce jitrungujisi. Nää, cäme kokre pisi nyene Acejiyame ne iibaname teeme Ätityerayame ne ceerame? Eewe, äblicäcol?"

¹⁸ Siige, ätrunga biname cina Peteru me mene liba jitecijisi, teepi pui äingeja mule ne piba ebmalisi, Acejiyame me ngii ewepäntisi, jiiicisi egä, "Acejiyame padare cuta yäcäremepi nuuja gawe biname bine atatrongärame teeme niyaniya mule cabu ca toraca ireclota ne päpäname lui ngälu cäco gyene."

Mene Antiyoka Ätrunga Ingle Biname bime poto cidi me

¹⁹ Ätrunga biname cina Yerusalema cabu ca uucratnuji maramara gawe cabu me, teeme mäpu ireclota name pi Setepano me budre ingwe ca. Poto cina cudecewe me eclige Poenikiya, Kupro, piyepu Antiyoka me. Teepi Israela biname taatu bine Miiji Mene jjeananemisi. ²⁰ Yepä, poto ätrunga biname cina Kupro curä piyepu Kurene gawe cabu ca cuta Antiyoka cewe me eclige. Teepi puga mene jjeananemisi biname bine lui Israela biname lica gemi, teebibine umle jjeenanemisi Miiji Mene mime Yageyame Yeesu poto cidi me. ²¹ Mime Yageyame me kokre ten cama ge, peei name pi bucurage biname cina mime Yageyame bau me tatatrongärininisi, teebine jitrungisi.

²² Idre ecanisi peei mule poto cidi me Yerusalema ätrunga biname bime bau me. Teepi puma cita ca Banaba ne Antiyoka cewe me jityepisi. ²³ Siige, Banaba liba atyaramtuge Antiyoka me, jepänige Acejiyame te biname bine lipu miiji itu jaawenemepi. Tabe Banaba te piba gege äbitige, teebibine iyeta bäärmi jegedne-mige mime Yageyame ne toraca ätrungame, teeme gome cängena lenajame. ²⁴ Yoo, Banaba miijirage biname ge, teeme ätrunga baborage, piyepu Aceji Seemo me kaakesea te teeme cabu babo äbitige. Siige, bucurage biname cina Yageyame ne jitrungisi teeme mene name pi.

²⁵ Banaba puma cita ca Taasu cewe me ädige Saulo ne ärngime, ²⁶ liba jepänige teebine, ecanige Antiyoka cewe me. Yepä kämäge ngalebora teepi puga ätrunga biname cama abasutinisi, bucurage biname bine ebiberäjemäsi. Antiyoka je teepi Keriso me binamewale bine ciitacarage einemisi egä 'Kristiyan'.

²⁷ Pui padare poto Acejiyame me mename biname cina Yerusalema ca eclige Antiyoka me. ²⁸ Teeme yepä te ngii Agabu abujängtuge, Aceji Seemo me kokre ca mene jiiicige egä,

“Gane padare mameta gyene otni iyeta gawe cabu ta.” Yoo, pui gane padare te täduji Klaudiyus liba enajuji Rooma Mopeyame tääpume. ²⁹ Ätrunga biname cina mene jitranisi rarekaake ätyepame teeme biname bine Yuudea gawe cabu ätiyerame. Laatibi rarekaake cama, teepi yootonisi. Bucurage rarekaake cama biname cina, teepi bucurage icranemisi; rarekaake cäco biname lui, teepi nesae icranemisi. ³⁰ Siige, pui rarekaake jityepemisi Banaba piyepu Saulo cama Yuudea ätrunga ingle mutre biname bime bau me.

12

Heroda te Ätrunga Biname bine Mäpu cabu Icranemige

¹ Pui padare Mope Biname Heroda gije abacitige poto ätrunga biname bine mäpu cabu acranecame. ² Tabe cubu biname bine jejemige Yoane me naane Yakobu ne budre me aglime cubu turikä ca. ³ Heroda liba umle äbitige egä poto Israela biname cina singi ge pepu agleca mule tääpume, tabe piba cuta Peteru ne joomlige. Pui te äbitige Israela biname bime trii padare ngalebora, teepi liba uutneca cäco buluduu bine yäärwäjusi. ⁴ Yoo, Peteru ne liba joomlisi, teepi piba teebine krokeciye mete cabu me isinglantisi, awamuta biname bime ime cabu ecitisi. Yoo, puga ge fooma sigu awamuta biname; yepä sigu lui fooma biname cama, cuta iyeta nuuja sigu piyepu. Siige, Heroda ngene jotwanige Peteru ne atraneme biname sobe cabu Israela biname bime Äsuplengta trii ingwe poto ca. ⁵ Siige, Peteru krokeciye mete cabu enajige, yepä ätrunga biname cina Acejiyame ne jäje yaawejanusi teeme poto cidi me.

Peteru Krokeciye Mete cabu ca Tasatige

⁶ Lui bimu cabu Heroda singi ge Peteru ne acaname krokeciye mete cabu ca biname sobe cabu atraneme, pui bimu me niinäce gaabe ciye cabu, Peteru ute ogrige neeneni awamuta biname bime cole je. Tabe ätäyäneji ge neeneni ayana seea ca, piyepu cuta poto awamuta biname puga ge krokeciye mete grana gome. ⁷ Piba taatu Yageyame me mename seemo puga aclajuteji ge Peteru mameta gome, piyepu apacylera te tuungepmalige puupu cabu me tabe luma enajige. Pui mename seemo te Peteru ne palace gome joomlige, elotnicige arpinentame, jejige egä, “Wata arpinanti!” Puirage padare ayana seea cina aatramige Peteru me ime cabu ca. ⁸ Mename seemo piba jejige, “Määme baagi ca amlemalti, ernge gwidape aasigräri!” Peteru pui jaawenige, siige mename seemo piba jejige, “Määme acwabeja cäbletääpe ca ätrugäri, cane cama tädi!” ⁹ Peteru teebine ingwe icwige krokeciye mete cabu ca, yepä tabe umle lica ge egä mename seemo te ngena jewenenige, nää toraca gyene coo lipu. Tabe apu jengenige egä, “Cane pama wama ogrenine.” ¹⁰ Teepi niinäce sigu awamuta biname bine sisuplengemäsi, puma cita ca nuuja sigu ne sisuplengemäsi, siige ceräcärägäbu tatyaramtäsi ayana grana gome me cewerage abacitame. Pui gaabe te teemämu äpäcutige, siige teepi asatäsi, mete me otni gaabe cabu aaclige, piba taatu mename seemo te Peteru ne ebmalige.

¹¹ Peema cita ca Peteru toraca umle äbitige ngena te bäbitige teeme tääpume. Tabe jüicige egä, “Ai lui toraca ge! Yageyame te teeme mename seemo ne tityepige, cebine Heroda me ime cabu ca nasatige piyepu iyeta niija gwidape cabu ca Israela biname cina lui singi gemi cäme bau waweneme.”

¹² Peteru pui ingwe ca ädige Yoane-Mareko me mage Mariya teeme mete me. Bucurage biname puga tabasecretnumi, irecu ätumutanisi. ¹³ Peteru puutucu gaabe ne seyäjige, piba mete kaakesea ngulebägrä ngii Rooda toclige ireme. ¹⁴ Tabe liba Peteru me tagepogogo opo ewatnige, tabe gege name pi uuwamige, puutucu gaabe ne lica jüitnige, yepä mete me cääri abacitige, jejemige egä, “Peteru pisi nyene puutucu je.” ¹⁵ Teepi jojisi egä, “Buduma gäte maane!” Yepä, Rooda jejemige, “Ai lui toraca mene gyene!” Puma cita ca teepi jowecnistisi, “Peel lui pama teeme mename seemo gyene!”

¹⁶ Iyeta pui padare Peteru gaabe ne seyäjjanige. Siige, teepi liba gaabe ne jüitnisi, cälu te jitemige Peteru ne päpäname. ¹⁷ Peteru teebibine ime ca bojä jewenemige, jejemige Yageyame te lipu teebine sisatige krokeciye mete cabu ca. Peteru piba jejemige egä, “Yakobu* naabibine jejemepye ai mule poto cidi me.” Siige, tabe teebibine ebmalemige, nuuja gome me ädige.

¹⁸ Krokerage liba, awamuta biname cina mage teemeteme äcnecininisi egä, “Peteru liiyeme bädige?” ¹⁹ Piba Heroda teebibine jejemige Peteru ne ärngime, yepä teepi lica jepänisi. Puma cita ca Heroda awamuta biname bine itemlemige, siige teeme cubu biname bine jejemige pui awamuta biname budre me acraname.

Pui ingwe gaabe ca, Heroda Yuudea gawe cabu ca ädige Kesarea gawe cabu me puma matikolä lenajame.

* **12:17:** Yakobu: Pui Yakobu lui Yeesu me igane gyene. Ire Matayo 13:55.

Heroda me Budre poto cidi me

²⁰ Heroda mage claabe ge Turo piyepu Sidona cewe biname cama, peei name pi teepi gigri otninisi Heroda cama mene me. Teepi Heroda me mete ire atwiyame ngii Blasto bau me niināce seclige, teebine teeme biname me jewenisi. Siige, piba Heroda bau me eclige, teebine itemlisi poode ten cama äbitame, ingle naace popi teepi teeme deedei gwidape yaawadanemusi Heroda me gawecewe cabu ca.

²¹ Puma cita ca Heroda bimu ne ecitige, siige teeme mararage cäbletääpe ne pui bimu cabu asigrärige, adnatige teeme atrana puupu cabu, puma cita ca biname bine mene jejananemige. ²² Biname cina ala cama jüicemisi egä, “Biname pana mene lica gyene peei, yepä uuje gyene!” ²³ Piba taatu Yageyame te mename seemo ne tityepige. Tabē Heroda ne budre pita ecärige, ingle naace popi Heroda singi lica ge Acejiyame ne opo gaabe me acitame, yepä biname bime awepyeräjä bine tabe ewademige teeme tääpume. Cuple cina teeme tääpe erwisi, budre me itwitisi.

²⁴ Yoo siige, iyeta padare bucurage biname cina Acejiyame me Miiji Mene yäätēcijemuge, Yeesu ne piba jäätrungusi.

²⁵ Banaba naabi Saulo rarekaake waadena ne liba epiräsi, teepi Yerusalemā ca tac-nenutäsi, mamye biname ngii Yoane-Mareko ne ten cama secanäsi.

13

Antiyoka Ätrunga Biname cina Banaba Saulo naabibine Kaakesea tääpume Jäätyepisi

¹ Puga ge Antiyoka ätrunga biname cama poto Acejiyame me tagepogogo mene iicana biname piyepu abiberäjä biname: Banaba; Simeona, lui yaainusi cäsäcäsä tääpe biname ca; Lukiyus, lui Kurene ceweyame ge; Manena, lui Mopeyame Heroda me keege ge teepi liba bägrä je; cuta piyepu Saulo. ² Teepi liba Yageyame ne ewepyeräjisi piyepu deedei cäco icrajige Acejiyame ne ngene apecname, Aceji Seemo piba teebibine jejemige egä, “Weene Banaba Saulo naabibine cäme gome tääyebingteye kaakesea wawenāme cane lui tääpume teebibine ituge jaji.”

³ Peei ingwe ca teepi iyeta deedei cäco cuta cääri icrajige, irecu ätumutaninini, piba ime icranemisi Banaba Saulo naabibime papa cabu, piba jäätyepisi teebibine.

Kupro Curä je

⁴ Aceji Seemo te Banaba Saulo naabibine jäätyepige. Teepi asatäsi Selukiya malu cewe me, puma cita ca poo gaabe aalige Kupro curä me. ⁵ Teepi liba pui curä cabu Salami cewe me atyaramtäsi, teepi puga Acejiyame me mene Israela biname bime abasecretna mete cabu jejananemäsi. Puga ge ten cama Yoane-Mareko teeme kaakesea cabu ätityerame.

⁶ Teepi curä ne piba jeclänutäsi nuuja poto malu me, Paapos cewe me atyaramtäsi. Teepi puga opopa jewenäsi yepä piiseba biname lui me ngii Bar-Yeesu. Tabē Israela biname ge lui te walya jüicuge egä, “Cane Acejiyame me mename biname gäne.” ⁷ Bar-Yeesu lui curä Mopeyame Sargiyu-Paulu me biname ge. Mopeyame Sargiyu-Paulu lui mage ngene atwanena biname ge. Tabē Banaba Saulo naabibine taasoglicige teeme opo gaabe otnime, ingle naace popi tabe singi Acejiyame me mene äteciyame. ⁸ Yepä, pui piiseba biname, teeme nuuja ngii Griik mene ca lui Eluma, tabe singi Saulo Banaba naabibime mene iibaname, cuta singi Mopeyame Sargiyu-Paulu me gaabe armime Yeesu bau ätrungame. ⁹ Saulo lui teeme nuuja ngii Paulo, Aceji Seemo me kokre te babo äbitige teeme cabu. Paulo piba pui piiseba biname conocäco ire jetwige, ¹⁰ jejige egä, “Maane Satani me bägrä gäte! Maane cubuyame gäte iyeta conocäco mule tääpume. Määme angletneja mule bucurage gemi. Maane singi gäte cime Yageyame me toraca mene aboclomtame walya mene me! ¹¹ Yageyame te teeme ime yaacitege määme cabu me, siige määme irecu cina määsumäsu page läbitäsi. Teeme singi padare ngalebora maane bimu apaclyera ne lica pa jepänaneji.”

Siige, piba taatu krokeciye pana klokakloka te teeme irecu aacwabige. Tabē otnetnäji ge biname ne ärngime teebine ime ca aweclujame. ¹² Mopeyame Sargiyu-Paulu liba peei ne jepänige, Paulo me mene jitrungige. Tabē ngenecu jelonicege mime Yageyame poto cidi me abiberäjä name pi.

Antiyoka Cewe Pisidiya Gawe cabu je

¹³ Paulo piyepu ten cama lui biname, teepi Paapos cewe ca poo gaabe eclige cewe ngii Perga me, lui Pampuliya gawe cabu. Puga teeme ätityerayame Yoane-Mareko teebibine taabmalige, Yerusalemā me acnenutige. ¹⁴ Teepi Perga cewe ca dorō gaabe aalige, Antiyoka cewe me atyaramtäsi, lui Pisidiya gawe cabu. Sabade bimu cabu teepi abasecretna mete me abacitäsi, adnatäsi. ¹⁵ Puga biname cina poto cotre mene ecnemisi Oogäräneji Mene cabu ca, Moose lui mene sogäremuji, cuta piyepu poto Oogäräneji Mene mename biname cina lui sogäremujisi. Peei liba siige, abasecretna mete modamoda biname cina piba mene jityepisi Paulo Banaba naabibime bau me egä, “Cime biname, cine singi weene

biname bine bäärmii aagedname, weeme mene liba pisi nyene cibibine kokre ceerame.”
 16 Puma cita ca Paulo jeclajutige, ime ewejängtige, piba gije abacitige mene jajanename.
 Agesa teeme mene:

Paulo me Mene Israela biname bime tääpume

“Ama lui Israela biname piiyepu iyeta nuuja gawecewe biname lui cina Acejiyame bau me irecu lätumutaninini, weene căme mene nätecijeye! 17 Acejiyame lui ne Israela biname cina yaawejanusi, mime sasa kaakesaare bine jejäcremuji, teebibine piba ablime jenenemuji pui padare cabu teepi liba säärppe biname icrajuji Aikupito gawe cabu je. Acejiyame teeme babo kokre ca teebibine Aikupito cabu ca sewademuji. 18 Footi kāmāge ngalebora Israela biname ätecija căco icrajuji, yepā tabe teebibine cāngena ire jetwemuji pui daapo taatu cewe cabu je. 19 Tabe seben maramara biname tomi bine Kanana gawe cabu ca iyecräjemuji, piba teeme Israela biname bine yageyame me jenenemuji Kanana gawe tääpume. 20 Tabe pama foom hanred fifti kāmāge ngalebora peei bine epiremuji.

Pui padare ingwe ca tabe ablaweja biname ecāranemuji Israela biname bine teeme ire atwime, ngālu mename biname Samwela me padare te tatyaramtuji. 21 Siige, teepi liba Acejiyame ne mope biname tääpume itinärüjisi, tabe piba Saulo teeme mopeyame tääpume ecāremuji. Saulo lui Küisa me bāgrā ge Benjamina me inge cabu ca. Tabe Israela biname bime mopeyame enajuji footi kāmāge cama, 22 siige Acejiyame teebine iyeblingtuji, piba Daawida ne mopeyame me jewenuji. Age Acejiyame me mene Daawida potu cidi me: ‘Cane asicnantine Yese me bāgrā Daawida lui căme singirage biname gyene, lui te iyeta căme singi jaawenemuge.’ 23 Yepā Daawida me kaakesaare Yeesu peese nyene, Acejiyame lui ne jewenuji Israela biname bine niya mule cabu ca äsecraram, tabe lipu itu jiiujuji. 24 Yeesu liba camuge gije abacita teeme kaakesea, piba Yoane niye ca äciseja biname te iyeta Israela biname bine bäärmii mene jegednemuji teeme niyaniya mule cabu ca atatrongrārame piiyepu niye ca äciseja ne acatame. 25 Yoane teeme kaakesea ne apirame liba äbitige, tabe biname bine jejemuji egā, ‘Weene lipu ngenne jotwaniniye egā cane laasi nāne? Weene lui ne jewagrieniye, cane tabe lica gāne. Yepā, weene ire! Tabe tädenige căme ingwe potu ca. Cane miiji lica gāne teeme ernge gwidape iirecame teeme ernge cabu ca.’
 Siige.

26 Yoo, căme binamewale, weene lui Abrahamo me kaakesaare gemi, piiyepu weene lui cina Acejiyame ne yaawejanuyeyepā Abrahamo me kaakesaare lica gemi, mime tääpume Acejiyame te mene tityepuji egā äsecrera pisi nyene niyaniya mule cabu ca. 27 Peei mene lui mime tääpume, inge naace gyene Israela biname lui cina Yerusalemā ngalebora icrajenige piiyepu teeme mutre biname, teepi umle lica ge egā Yeesu peese nyene pui biname teebibine niya cabu ca äsecraram. Cuta piiyepu teepi cāngena umle lica ge mename biname bime mene, teepi lui Oogārāneji Mene cabu yaacnemusi iyeta Sabade bimū cabu. Yepā, teepi pui mename biname bime mene toraca me jenenemuji, teepi liba Yeesu ne jigyujisi. 28 Ngānu gyene teepi äblicāco toraca inge ne pāpāna Yeesu me agli tääpume, yepā teepi Pilato ne itemlujisi teebine budre me acitame. 29 Teepi liba iyeta mene libi jenenemuji, lui piti nemi sasa Oogārāneji Mene cabu Yeesu potu cidi me, piba teebine baarge uli cabu ca itrungantujisi, gape me ecitujisi. 30 Yepā, Acejiyame teebine budre cabu ca erpinantujisi, 31 siige bucurage bimū cabu tabe taboclomtanuji teeme bau me, lui cina Galilaya ca itu ecluji ten cama Yerusalemā me. Pui cina page ire arbi biname gemi teebine aitname mime Israela biname bine umle wawename. 32-33 Cine age temi page, ai mene cuta weeme bau acaname egā Acejiyame lui mene mime kaakesaare bine jejemuji tabe pagege wawena, tabe mime padare cabu itu jewenuji mime tääpume, lui teeme kaakesaare gemi, tabe liba Yeesu ne budre cabu ca erpinantujisi. Pui potu cidi me mene pisi nyene Salamo uupera peba poce neeneni cabu egā,
 ‘Maane căme bāgrā gāte;

cane page määme Babe me bābitine.’

34 Cuta agesa nuuja mene Acejiyame lui jiiujuji Yeesu me budre cabu ca arpinanta piiyepu teeme tääpe ocwāwa căco potu cidi me egā,
 ‘Cane weebibine toraca cāngena miiji cire jiwenipene, cane lipu mene Daawida ne jejujine.’

35 Daawida peei mene jeitnuji egā,

‘Maane căme trupa ne licarage cirege abmala gape cabu ocwāwame, cane lui määme miijirage kaakesea biname gāne.’

36 Daawida lui padare cabu ireclota enajuji, tabe Acejiyame me singi jenenemuji, piba budre äbituji. Teepi gape me teebine ecitujisi teeme kaakesaare gome, siige teeme tääpe gape cabu ocwāwuji. 37 Yepā, pepu lica äbituji teeme tääpume Acejiyame lui ne budre cabu ca erpinantujisi. Peei lui Yeesu sine. 38-39 Yoo, căme binamewale, weene iyeta miiji toraca umle egā peei lui Yeesu me cabu ca gyene cane weebibine jijenininine ai Miiji Mene niyaniya

mule cabu ca kälyä äbita poto cidi me. Weene miiji umle egä iyeta biname lui cina Yeesu ne jäätrungusi, teepi iyeta äseji gemi teeme niianiya mule cabu ca, lui mule cabu ca Moose me cotre äblicäco weebibine äsecerera. ⁴⁰⁻⁴¹ Oogäräneji Mene te apu jüicenige egä, 'Ire, weene laatibi Acejiyame ne jäägyuye!

Cäro, weene cälu te pa jitipi, piba budre päbitipeye, ingle naace popi page cane ngena jewenenine, weene lica jitrungeniye, ngänu gyene cuta nuuja te liba weebibine ibiberäjininuge!'

Yoo, weene cängena inajininige, piba peei mename biname bime sasa mene weeme bau lica pa läbitepi!''

⁴² Siige mene, Paulo naabi Banaba liba abasecretna mete ne sebmäläsi, biname cina teebibine jaajisi acnenutame nuuja Sabade cabu teebibine cuta cerämu abiberäjame peei mene poto cidi me. ⁴³ Ingwe ca biname cina abasecretna mete ne liba sebmälisi, poto Israela biname piyepu poto nuuja gawe biname lui cina Israela biname bime irecu ätumuta mule itu yaacatepesi, teepi Paulo Banaba naabibine ingwe ääcwisi. Peei neeneni ätyepäneji biname piba teebibine mene jejemäsi piyepu bääirmi jegednemäsi teepi Acejiyame me baborage miiji cabu cängena lenajame.

Paulo piyepu Banaba bime Mene Acejiyame Umlä cäco biname bime tääpume

⁴⁴ Nuuja Sabade bimü cabu, pama iyeta biname pui cewe cabu tabasecretnige mime Yageyame poto cidi me mene äteciyame. ⁴⁵ Yepä, poto Israela biname cina biname tomi ne liba jepänisi, teepi ire patre eglemisi egä, "Cime biname bine bewadimige," piba Paulo me mene jeclanisi, teebine jicnecisi. ⁴⁶ Yepä, Paulo naabi Banaba wälu cäco jejemäsi egä, "Miiji ge cine Acejiyame me mene niinäce weeme bau iicana, yepä ingle weene jigveniye peei mene ne, apu egä weene ibibi lica gemi iyeteta ireclota tääpume, peei name pi cine weebibine ibmalininago, nuuja gawe biname bime bau me niclenige. ⁴⁷ Cine apu jewenenago, ingle Yageyame cibibine ituge jaji egä,

'Cane weebibine apacyera pana icitenine nuuja gawe biname bime tääpume, toraca ireclota gaabe iyeta gawecewe biname bine awabame.' "

⁴⁸ Siige, nuuja gawe biname liba peei mene jiteciyisi, teepi gege ge, Yageyame me mene ewepyeräjisi. Laati bine Acejiyame ituge jäjäcra toraca ireclota lui ngälu cäco päpäname, teepi Yeesu ne jitrungisi.

⁴⁹ Bucurage biname lui cina Antiyoka cewe mameta icrajige, mime Yageyame me mene iteciymige. ⁵⁰ Yepä, poto Israela biname cina cewe modamoda biname bine ngenecu alonecame jewenemisi, cuta piyepu poto dogwe magebi bine ngenecu alonecame jewenemisi, lui cina Acejiyame ne yaawejanusu. Pui Israela biname piba giije abacitinisi Paulo Banaba naabibine mäpu cabu acitame, siige teeme gawe cabu ca ääyecräjisi. ⁵¹ Pui neeneni ätyepäneji biname cina teeme ernge cabu ca secre äglubejäsi. Teepi singi pepu mule ca awabame egä biname bime ätrunga cäco mule name pi teepi cewe ne sebmäläsi. Teepi puma cita ca Ikoniya cewe me aalige. ⁵² Siige, Paulo me mene name pi Antiyoka ätrunga biname cina mage gege cama icrajige, piyepu Aceji Seemo me kokre ten cama ge.

14

Ikoniya Cewe je

¹ Peei yepä mule te äbitige Ikoniya cewe je. Paulo naabi Banaba aalige Israela biname bime abasecretna mete cabu me, puga mene jejananemäsi kokre cama. Siige, bucurage Israela biname piyepu nuuja gawe biname piba Yeesu ne jitrungisi. ² Yepä, poto Israela biname lui cina singi lica ge Yeesu ne ätrungame, teepi poto nuuja gawe biname bine ngenecu alonecame jewenemisi, niya mene ca teeme ngenä atwanena jetatrongtemisi ätrunga biname bime bau ca. ³ Yoo, Paulo naabi Banaba puga anaajige lecaleca padare cama. Teepi mene wälu cäco jejananemäsi Yageyame poto cidi me. Tabe te kokre äcärige teebibine ciitaca mule bine wawename. Tabe pepu jewenige awabame egä teeme mene lui toraca ge, egä Acejiyame owecu gyene biname bime tääpume cuta singi teebibine ätiyterame. ⁴ Ikoniya cewe biname cina äplini: poto cina singi Israela modamoda biname bime tääpume; poto cina singi pui neeneni ätyepäneji biname bime tääpume.

⁵ Puma cita ca poto Israela biname piyepu poto nuuja gawe biname teeme modamoda biname cama mene jitransisi ätyepäneji biname bine niya wawename piyepu kula ca budre me äbyecrame. ⁶ Paulo naabi Banaba peei poto cidi me liba umle äbitäsi, teepi uucräsi Lukaniya gawe cabu me, luga ge neeneni cewe ngii Lustra piyepu Derbe cuta piyepu poto matimati cewe. ⁷ Teepi puga Miiji Mene biname bine jejananemäsi.

Lustra Cewe piyepu Derbe Cewe je

⁸ Puga ge Lustra cewe je yepä biname lui teeme ernge niianiya ge. Tabe pepu aplimläneji ge, äblicäco otnetneja. ⁹ Tabe adnatäneji ge, Paulo me mene jiteciyige. Paulo teebine

opo ewatnige egä tabe teeme mene jitrungenege, siige peei ätrunga name pi tabe miiji ge miiji me äbita. Paulo piba teebine conocäco ire jetwige, ¹⁰ babo tage ca jejige, “Abujängti, mäame ernge ca conocäco naaclajutege!” Peei rooriye te wata abujängtige, siige otnetnäjige. ¹¹ Biname cina jepänisi Paulo lui ne jewenige, teepi piba ala abayisi teeme Lukaniya gawe mene ca egä, “Cabucewe uuye cina ai gawecewe biname pana me bateplengtäsi, täinäsi mime bau me!” ¹² Teepi Banaba ne ngii ecärisi Jeeu piyepu Paulo ne ngii ecärisi Hermes, inge Paulo te mene jiicige. Teepi apu jewenisi, inge teepi jengemige egä cabu je piti nemi neeneneni uuye Jeeu piyepu Hermes. ¹³ Yoo, Jeeu me iiwäreja mete puga ge cewe wajwa je. Siige, Jeeu täapume iiwäreja biname te rooriye kau bine piyepu uli popo sewadige cewe grana gome me. Piba pui iiwäreja biname piyepu biname tomi cina singi kau aglime ätyepänejä biname bine iiwärejame, inge teepi apu jengemige egä Paulo piyepu Banaba lui Jeeu piyepu Hermes naabi tegi.

¹⁴ Banaba naabi Paulo biname bime mene liba äätecijige, teepi ngenecu mäpu name pi teeme cäbletääpe iderecmäsi piyepu uuwamäsi biname tomi cabu me, siige baborage tage ca mene jejemisi egä, ¹⁵ “Biname, weene ngena jeweneniye? Cine ai gawe biname gegi, weene liiyepu! Cine age tegi Miiji Mene ainame, weebibine ai walya gwidape cabu ca atatrongärame Acejiyame bau me opire wawename, tabe lui toraca ireclota gyene. Peese nyene Acejiyame lui te cabucewe, gawecewe, piyepu malu bine jewenemuji iyeta teeme gwidape cama. ¹⁶ Sasa cabu ca tabe biname bine ire ta jaacitanemuge teepi biname cina teeme singi gaabe cabu otnetnejame. ¹⁷ Yepä, iyeta padare tabe teemämu conocäco taboclomtuge teeme miiji ätityera mule cabu. Tabe ngupe ne weeme bau me täätypuge dume cabu ca, piyepu gije bine jaawenemuge kuu wawenecame teeme maramara äyi padare cabu kämäge ngalebora. Tabe pepu weebibine deedei icäraninuge weeme ngenecu ne gege wawename.” ¹⁸ Paulo ai mene ca jüibemige biname bine lui cina singi teebibine kau ca iiwärejame, yepä plowa lica ge teebibine iibaname peei mule cabu ca.

¹⁹ Piba seclige poto Israela biname cina Pisidiya gawe Aniyoka cewe cabu ca piyepu Ikoniya cewe cabu ca. Teepi biname bine giri jecitanemisi teeme singi wawename. Teepi Paulo ne kula ca jibyecrisi, piba teebine elädniisi pui babo cewe Lustra cabu ca. Teepi apu jengemige tabe budre ge. ²⁰ Yepä, ätrunga biname cina liba seclige, Paulo ne jewaclomtisi, tabe piba arpinantige, acne-nutige pui cewe me. Siige, nuuja bimü Paulo naabi Banaba aaclige Derbe cewe me.

Paulo naabi Banaba Suriya Gawe Antiyoka Cewe me Acnenutäsi

²¹ Paulo naabi Banaba Derbe cewe biname bine Miiji Mene jejananemäsi. Puga bucurage biname teeme mene jitrungisi. Teepi piba acnenutäsi Lustra cewe me, puma cita ca Ikoniya cewe me, puma cita ca matikolä Antiyoka cewe me Pisidiya gawe cabu. ²² Iyeta peei cewe cabu teepi ätrunga biname bine ngenecu kokre ecäremäsi piyepu teebibine bäärmi jegednemäsi conocäco Yeesu bau ätrungame. Teepi biname bine ebiberäjemäsi egä, “Ai ireclota cabu mine iyeta bucurage mäpu cabu ca täsinago, ingwe ca piba Acejiyame me biname bine waadena cabu me cire yäabäcnepesi.” ²³ Ätrunga inge yepäyepä cabu Paulo naabi Banaba biname bine jejäremäsi mope biname me äbitame ätrunga biname bine waadename. Iyeta cewe cabu teepi irecu ätumutanäsi piyepu deedei cäco aanajige Acejiyame ne ngene apename, piba pui cewe ätrunga biname bine mime Yageyame me ime cabu icranemäsi, teepi lui bau me teeme ngenecu ituge acita.

²⁴ Pisidiya gawe liba jeläcnutäsi, teepi cääri atyaramtäsi Pampuliya gawe cabu me. ²⁵ Teepi Miiji Mene Perga cewe cabu jejananemäsi, puma cita ca Ataliya cewe me aaclige. ²⁶ Teepi puma cita ca poo gaabe abyemeräsi Antiyoka babo cewe otnime, luma ätrunga biname cina teebibine Acejiyame me miiji ire atwi cabu ituge acita peei kaakesea täapume, page lui ne bii jimlitäsi.

²⁷ Teepi liba Antiyoka babo cewe me atyaramtäsi, ätrunga biname bine tebasecretnemäsi, jejanemäsi iyeta Acejiyame te ten cabu ca lui itu jaawenemepi, piyepu tabe gaabe ne lipu itu jüitnepi gawe maramara biname bime täapume Yeesu ne ätrungame. ²⁸ Siige, teepi leca padare cama Antiyoka ätrunga biname cama aanajige.

15

Babo Abasecretna Puga Ge Yerusalema je

¹ Poto biname Yuudea ca seclige Antiyoka me, puga gije abacitinisi ätrunga biname bine walya abiberäjame egä, “Weene äblicäco weeme niya mule cabu ca äsi weene liba lica acata Israela biname bime cotre Moose lui sogäremuji, egä imäbägrä bime tääpe matikolä iirpeclame Acejiyame me cewecu acitame.” ² Siige, Paulo naabi Banaba pui Yuudea ca biname bime mene jisädemäsi, ten cama mage äciseräjininisi tääpe iirputa mule poto cidi me. Siige, teepi iyeta mene jitransisi Paulo Banaba naabibine piyepu poto nuuja Antiyoka

ätrunga biname bine Yerusalema me ätyepame, puma ätyepäneji biname piyepu nuuja ätrunga mope biname cama mene atraname tääpe iirputa cotre poto cidi me egä lui biname cina miiji acatame.

³ Siige, ätrunga biname piba teebibine jityepemisi Yerusalema me otnime. Teepe gaabe cabu eclige, Poenikiya piyepu Samariya gawe liba ääsuplangtisi, gaabegabe ätrunga biname bine jejemisi egä, "Gawe maramara biname cina Acejiyame bau me ituge atrongära." Ai mene te babo ngenecu gege me jewenemige iyeta ätrunga biname bine. ⁴ Teepe liba atyarige Yerusalema me, ätyepäneji biname piyepu nuuja mope biname, piyepu iyeta ätrunga ingle biname cina teebibine jewacletnäjemisi. Teepe teebibine jeitnemisi iyeta Acejiyame te ten cabu ca ngena bine ituge wawena. ⁵ Yepä, poto ätrunga biname lui Parisea sigu biname gemi, teepi jeclajutemige, jejemige egä, "Cuta nuuja gawe ätrunga biname miiji teeme tääpe matikolä iirpecla. Weene miiji teebibine jaji iyeta Moose me cotre mene wawename."

⁶ Ätyepäneji biname piyepu nuuja ätrunga mope biname cina piba abasecretnige mene atraname pui tääpe iirputa cotre poto cidi me. ⁷ Lecarage padare teepi mene aciseräjininisi.

Peteru me Mene

Peei ingwe ca Peteru abujängtige, jejemige egä, "Cäme ätrunga binamewale, weene umle gemi egä ujarage Acejiyame te cebine weeme cabu ca nätranutuji Miiji Mene Yeesu poto cidi me jajaname nuuja gawe biname bine teepi ätecijame piyepu ätrunga-me. ⁸ Acejiyame lui iyeta biname bime ngene atwanena umle gyene. Tabe Aceji Seemo ne jityepuji cuta nuuja gawe biname bime bau me, tabe teebine mime bau me lipu itu tityepuji. Tabe pepu jewabuji egä, cuta nuuja gawe biname miiji gemi teeme bau otnime. ⁹ Tabe nuuja mara lica jewenemuji cime tääpume piyepu teeme tääpume. Tabe cuta teeme ngenecu cabu ca niiji mule iyebngemuji teeme ätrunga name pi. ¹⁰ Yoo siige, weene page ngenome singi gemi Acejiyame ne apicetnärame? Lui ätrunga biname Israela biname lica gemi, teeme palace cabu weene cotre bine icranemeye, lui bine mine piyepu mime kaakesaare äblicäco ge wawena. ¹¹ Pepu gone! Mine jäätrungusi egä pui lui Yeesu Keriso me owecu piyepu müjirage ätityera miiji pi mine niyaniya mule cabu ca läsecrärinago, teepi liiyepe, lica cotre wawena name pi."

¹² Siige, teepi iyeta bojäcu piba icrajige Banaba Paulo naabibime mene ätecijame, teepi liba mene jeitnemäsi iyeta ciitaca mule piyepu kokre mule gwidape poto cidi me, Acejiyame lui bine ten cabu ca itu jewenemuji nuuja gawe biname bime tääpume.

Yakobu me Mene

¹³ Teeme mene liba siige, Yakobu piba abujängtige mene me egä, "Cäme ätrunga binamewale, cäme mene nätecijeye! ¹⁴ Simona-Peteru bii nijinige, Acejiyame teeme owecu niinäce lipu jewabemuji pui biname bine lui Israela biname lica gemi, teeme poto bine liba sewademuji teeme biname me äbitame. ¹⁵ Ai Simona-Peteru me mene ibibi gyene Acejiyame me sasa mename biname bime mene cama, ingle Oogäräneji Mene cabu pisi nyene egä,

¹⁶ "Yageyame te Daawida me ingle ne mete ca etonärige, jüicige egä:

Ingwe ca cane liba cire tacnepene,

cane piba Daawida me atramäneji mete cire yaawejängtepene;

poto pui sasa pargi cama cääri cire yaarangepene;

kokrerage me cire jaawenepene.

¹⁷ Piba iyeta nuuja biname cäme bau cire saaclepi, iyeta lui Israela biname lica gemi,

cane lui bine ituge äjäcra cäme biname me äbitame.

¹⁸ Apu jicenige Yageyame te, lui ujarage biname bine umle jewenemuji ai poto cidi me." "

¹⁹ Siige, Yakobu piba jejemige ätrunga biname bine egä, "Cäme ngene atwanena apu egä mine miiji lica ngenecu mäpu ceera pui biname bine lui Israela biname lica gemi, lui cina Acejiyame bau tatatrongärinini. ²⁰ Yepä, mine miiji mene oogära teeme bau teebibine jajime egä: Gone deedei yäärwäjimuye lui cude ge, ingle iiwäräneji ge uuje bine; piyepu gone cibi yäärngäjimuye lui teeme mäju cabu uudi yaanajuge; piyepu gone uudi yäänäjuye; cuta piyepu sargi mule gone wawena. ²¹ Siige, teepi miiji ai cotre bine wawena, ingle naace popi bucurage kämäge ngalebora biname cina Moose me Cotre bine yaacnemusi iyeta Israela biname bime abasecretna mete cabu iyeta Sabade bimu, cuta piyepu Moose me Cotre mene jajanäneji ge iyeta cewe cabu ta."

Teepi Nuuja Gawe Ätrunga Biname bime bau Mene Jityepemisi

²² Siige, pui ätyepäneji biname piyepu nuuja ätrunga mope biname cina iyeta ätrunga ingle biname cama mene jitranisi poto biname bine äjäcrame teeme cabu ca, teebibine ätyepame Antiyoka cewe me Paulo naabi Banaba cama otnime. Teepe neeneni biname bine

jaajisi: yepä lui Yuuda, lui ne yaainusi Barsaba ca, cuta nuuja lui Siila. Pui neeneni cina lui modamoda ätrunga biname gegi. ²³ Teepi apu leta ne yoogärisi, ten cama jityepisi egä:

“Ätrunga biname lui Israela biname lica gemi, lui cina icrajenige Antiyoka babo cewe cabu, piyepu Suriya, Kilikiya gawe cabu je, cine weebibine seboire jiweninago.

Cine weeme biname gemi, ätyepäneji biname piyepu nuuja mope biname.

²⁴ Cine mene nitecijinige egä cime poto biname weeme bau me itu saaclepi, lui cina teeme kokre mene ca weebibine ngenecu mäpu itu icäripesi. Yepä, teepi cime bau ca lica mene jääpänepesi peei ne wawename. ²⁵ Yoo, cine pui name pi yepä gome tabasecretninago. Cine yepä ngene atwanena cama mename biname bine jaajisi weeme bau ätyepame. Teepi Banaba naabi Paulo cama aaclenige, lui cime ngenecurage biname gegi, ²⁶ lui cina mäpu ireclota jepänanujäsi mime Yageyame Yeesu Keriso me kaakesea name pi. ²⁷ Yoo, cine Yuuda naabi Siila jäätyepenisi weeme bau me. Teepi weeme opo gaabe pa jüicepäsi cine lui mene ne yoogärenago. ²⁸ Cine Aceji Seemo cama mene jitransi nuuja mäpu cotre lica weebibine ceerame, yepä ai taatu cotre egä: ²⁹ Gone deedei yäärwäjimuye lui iiwäräneji ge uuje bine; gone uudi yäänäjuye; gone cibi yäärngäjimuye lui teeme mäju cabu uudi yaanajuge; piyepu sargi mule gone jaawenuye. Siige, weene miiji pagege lenaja, weene liba ai cotre bine cängena jaawenemuye.

Mene peese. Äto.”

³⁰ Yerusalema ätrunga biname puma cita ca Yuuda Siila naabibine pui mene cama jäätyepisi Antiyoka me. Puga teepi iyeta ätrunga biname bine jebasecretnemäsi, teebibine pui oogäräneji mene ecäremäsi. ³¹ Antiyoka ätrunga biname pui mene liba ecne-misi, teepi mage gege ge, inge naace popi peei mene te teeme ngene atwanena plowa me jewenemige. ³² Yuuda naabi Siila lui Acejiyame me tagepogogo mene iicema biname gegi, teepi leca padare cama ten cama mene jüicemäsi teebibine kokre piyepu miiji ngenecu ceerame. ³³ Teepi poto bimü ten cama liba aanajige, piba Antiyoka ätrunga biname cina teebibine aawecnistisi poode cama. Teepi teeme bau me acnenutäsi lui cina teebibine ituge ätyepa. ³⁴ Yepä, Siila ngene jotwanige puma lenajame Antiyoka cewe cabu je.

³⁵ Paulo naabi Banaba poto mabye cama aanajige Antiyoka je. Teepi piyepu poto nuuja ätrunga biname teta cama mene jejananemisi piyepu biname bine ebiberäjemisi Yageyame Yeesu poto cidi me.

Paulo naabi Banaba Maramara me Äbitäsi

³⁶ Poto mabye ingwe ca Paulo jejige Banaba ne egä, “Mine biiri, lacnenutago, mime ätrunga biname bine yäärngäremago iyeta cewe cabu ta, mine luma mene tejanemumago mime Yageyame Yeesu poto cidi me. Mine miiji umle äbita teepi page lipu icrajenige.”

³⁷ Siige, Banaba singi Yoane, teeme nuuja ngii Mareko, ten cama otnime. ³⁸ Yepä, Paulo ngene jotwanige egä miiji lica gyene teebine acana, inge pui niinäce otni cabu Yoane-Mareko lica ten cama enajuji teeme kaakesea ngälu gaabe oomlaname, yepä tabe atatrongtuji, teebibine aabmaluji Pampuliya gawe cabu je. ³⁹ Paulo naabi Banaba mene äciseräjäsi, siige maramara me äbitäsi. Banaba Mareko cama poo gaabe Kupro curä me ädige. ⁴⁰ Paulo Siila ne jejige, siige ten cama abyemäriige. Antiyoka ätrunga biname teebibine mime Yageyame me ime cabu acitisi teebibine ire atwime. ⁴¹ Paulo doro ta ädige, Suriya piyepu Kilikiya gawe cabu ta otnige, ätrunga inge bine kokre me jewenemige.

16

Timoti te Paulo naabi Siila cama Otnetnäjige

¹ Paulo puma cita ca ädige Derbe piba Lustra cewe me. Puga ge Lustra cewe cabu yepä ätrunga biname ngii Timoti. Teeme mage cuta ätrunga magebi gwene, piyepu Israela cabu ca gwene, yepä teeme babe lui Griik biname gyene. ² Iyeta ätrunga biname Lustra piyepu Ikoniya cewe cabu miiji taatu mene jüicusi Timoti poto cidi me. ³ Paulo singi ge Timoti ten cama otnime, tabe peei name pi Timoti me tääpe ne matikolä jüirputige Acejiyame me cewecu acitame. Tabe peei ne jwenenige, inge iyeta Israela biname lui cina icrajinige pui cewe maramara cabu, teepi umle ge egä Timoti me babe lui Griik biname gyene. ⁴ Teepi liba otnänisi cewe gaabegabe ta, Paulo naabi Siila ätrunga biname bine ecäremäsi pui cotre lui poto cidi me ätyepäneji biname piyepu ätrunga mope biname cina Yerusalema je itu jaatranepesi. Teepi biname bine jjemäsi pui cotre bine ätrungame. ⁵ Yoo, ätrunga inge cina peei ätityera name pi ätrunga kokre äbitininisi, piyepu iyeta bimü cerämu poto biname sebäcnisi peei inge yepäyepä ngalebora me.

Trooasi Cewe je Paulo Wama Ogrige

⁶ Teepi Pirugiya piyepu Galatiya gawe cabu ta aaclige, ingle naace popi Aceji Seemo teebibine lica jäätyepige Asiya Probins ngalebora Miiji Mene puma iicemame. ⁷ Teepi liba atyaramtäsi Musiyya gawemutre, Bituniya Probins liga abacitäsi, Yeesu me Seemo te gaabe äbäclige teeme otni täापume. ⁸ Peei name pi teepi gaabe ta aaclige Musiyya gawe cabu, ngälu malu cewe Trooasi ne joomläsi. ⁹ Peei ciye cabu Paulo wama ogrige, lui wama cabu yepä Makedoniya gawe biname ne jepänige. Tabe jeclajutige, teebine itinärige egä, “Tädi Makedoniya gawe cabu me cibibine ätityerame!” ¹⁰ Paulo liba peei wama ogrige, cine* piba taatu amacetrnäjinago poo gaabe otnime Makedoniya me, ingle naace popi cine mene jitransisi egä Acejiyame pui wama cabu ninjige Miiji Mene puma iicemame.

Pilipi Cewe je: Ludiya te Ätrungayame me Äbitige

¹¹ Cine Trooasi ne sebmalisi, poo gaabe conocäco naclige Samotrake curä cabu me, puma cita ca nuuja bimu naclige, ärpınago malu ligi cewe Neapoli me. ¹² Cine puma cita ca doro ta naclige Pilipi cewe me. Yoo, Makedoniya Probins me pui cube cabu Pilipi cewe lui niinäce gaabe cewe gyene. Pilipi cudecewe gyene Rooma cabu ca, yepä Rooma biname cina itu jewenüjisi peei cewe ne, piyepu cewe mopeyame cina lui Rooma ca tacluji. Siige, cine nesae bimu cama Pilipi cewe cabu ninajige. ¹³ Sabade bimu cine cewe cabu ca naclige baduge ligi me. Cine apu ningenininige egä Israela biname bime irecu ätumuta puupu pisi nyene puma. Cine puga adnatärinago, mene abaitıninago magebi cama lui cina babasecretnige baduge ligi me irecu ätumutame. ¹⁴ Teeme yepä lui te cibibine nitecijeninige Ludiya tage. Tabe Tiyatira cewe magebi gwene, lui aletname yaawademuge mage daremü cama ciriyäciriyä ududi cäbletäape bine. Ai magebi te Acejiyame ne yaawejanuge Israela biname bime mule ca. Yageyame te teebine ngene atwana tocärige Paulo me mene ätecijame piyepu ätrunga-me. ¹⁵ Tabe piyepu teeme teeme biname cina niyye ca äciseja liba ecatisi Yeesu me ngii cabu, tabe piba cibibine nisoglicninige egä, “Naclege cime mete cabu lenajame, weene liba ngene jotwa-naniniye egä cane lui Yageyame ne toraca jäätrungene.” Siige, cine teeme singi ne becatisi, teeme mete me naclige.

Pilipi je Paulo naabi Siila Krokeciye Mete cabu Aanajige

¹⁶ Yepä bimu cine pui irecu ätumuta puupu me liba naclige, cine kaakesea täापume aletnäneji ngulebägrä cama opopa oyisi, lui me cabu niyya cable puga ge. Peei cable te teebine mene iicemame jwaawenuge ciige gwidape poto cidi me. Teeme yageyame cina bucurage rarekaake jääpänemusii teeme pui mule cabu ca. ¹⁷ Siige, pui ngulebägrä te Paulo cama cibibine ingwe nicwenige, ala abayige egä, “Age tema biname lui cina Caburage Acejiyame me kaakesea jaawenusi! Teepi mene juicenemisi niyyaniyya mule cabu ca äsecerera poto cidi me!” ¹⁸ Tabe bucurage bimu pepu mule tewenäjumi, ngälu Paulo babo ngenecu mäpu äbitige teeme poto cidi me. Tabe atatröngtige, niyya cable ne jejige egä, “Yeesu Keriso me ngii cabu cane meebine naajenine egä tasati ai ngulebägrä cabu ca!” Siige, niyya cable te peirage padare cabu asatige.

¹⁹ Ngulebägrä me yageyame cina liba umle äbitininisi egä teeme rarekaake päpäna gaabe lui sabe bäbitige, teepi Paulo Siila naabibine joomlisi, ääländnisi neeneni cewe mope biname bime bau me cole puupu cabu me. ²⁰ Teepi liba teebibine aacanisi pui neeneni cewe mope biname bime cabu me, jaajisi egä, “Ai biname lui Israela biname gegi. Teepi niyya bii jewenäsi mime cewe cabu. ²¹ Teepi biname bine mule ebiberäjemäsi lui cotre gemi mime täापume. Mine lui Rooma biname gemi, mine teeme mule äblicäco acata piyepu wawena.” ²² Biname tomi cabu teebibine claabe cama joomlisi, piba cewe mope biname cina teeme cubu biname bine jjemisi Paulo Siila naabibime cäbletäape ädercame, teebibine adnaname. ²³ Teepi Paulo Siila naabibine öräre jaadna-nisi, piba krokeciye mete awamuta biname ne jejisi teebibine cängena ireme. ²⁴ Awamuta biname peei mene liba itecijige, tabe teebibine aacanige mete cole puupu me, borabora uli cabu ernge ääsinglantige, siige jäätäyige.

Paulo naabi Siila Krokeciye Mete cabu ca Asatäsi

²⁵ Ciyye duusa mameta Paulo naabi Siila irecu ätumutäsi piyepu uupera etangäsi Acejiyame bau me. Nuuja krokeciye mete biname cina jäätəcijisi teebibine. ²⁶ Piba taatu babo ocneja te krokeciye mete me kula caage bine jekocnäjemige. Puirage padare cabu iyeta grana cina iitnetnäjinisi, piyepu ayana seea cina gawe me itrametnemige iyeta krokeciye mete biname cabu ca. ²⁷ Awamuta biname te ute cabu ca arpinantige. Tabe liba jepänemige mete grana bine iitnemäneji, tabe apu jengenige egä krokeciye mete biname iyeta buucratnige. Siige, tabe teeme cubu turikä ne isatige teemämu aaglme, ingle naace popi peei krokeciye mete biname cina liba uucratna, piba teebine pa yaaglepesi. ²⁸ Yepä, Paulo babo tage ca jejige, “Gone laglute maane! Cine iyeta age tema!”

* 16:10: cine: Luuka puma Paulo cama abasutige.

²⁹ Puma cita ca pui awamuta biname te ngale täapume ala abayige, puupu cabu me wata abacitige, tääpe aloneca cama kokorare ääpednutige Paulo Siila naabibime ernge gome. ³⁰ Tabe piba teebibine taasatige, äätelligi egä, “Babo biname, cane müji ngena ne wawena căme nüya mule cabu ca asatame?”

³¹ Teepi jewecnistäsi egä, “Jitrungi Yageyame Yeesu ne, piba nüya cabu ca pa asatepi, maane piiyepu mäame mete biname cama.” ³² Teepi piba Yageyame poto cidí me mene jejanemäsi teebine piiyepu iyeta biname bine lui teeme mete cabu puga ge. ³³ Pui padare ciye cabu, krokeciye mete awamuta biname te Paulo Siila naabibine nuuja puupu cabu me aacanige teeme adnana dupe äcisejame. Siige, Paulo naabi Siila pui awamuta biname piiyepu iyeta teeme mete biname bine nüye ca jicisäjemäsi Yeesu me ngii cabu. ³⁴ Puma cita ca tabe Paulo Siila naabibine aacanige teeme mete cabu me, teebibine deedei ääcäriige loolome. Tabe teeme mete biname cama mage gege ge, ingle teepi pui ciye cabu Acejiyame ne jitrungisí. Siige, deedei kaake poto ca Paulo naabi Siila cääri abacitäsi krokeciye mete bora me.

³⁵ Nuuja krokerage pui neeneni cewe mope biname cina teeme cubu biname bine jityepemäsi krokeciye mete awamuta biname bau me mene cama egä, “Peei neeneni biname bine aasatepi!”

³⁶ Puma cita ca awamuta biname te Paulo ne jejige egä, “Cewe mope biname cina mene tityepäsi căme bau me maane Siila cama asatame. Weene müji asateye, siige poode cama laaclege.”

³⁷ Yepä, Paulo pui cubu biname bine jejemige egä, “Birice cibibine nuuja nüya cabu lica nipänumesi, yepä atrana căco cibibine sobe cabu mage nidnanesi, ngänu gyene cine Rooma ngii cama biname gegi. Teepi müji cibibine cängena ire atwi iyeta nuuja Rooma ngii cama biname bine liiyepu, yepä teepi cibibine nisinglantumesi krokeciye mete bora me. Nää, page teepi singi cibibine ogä äyepame? Eewe, äblicăo! Cewe mope biname cina müji teepirage te otni cibibine asatame.”

³⁸ Siige, cubu biname cina Paulo me mene jeitnisi cewe mope biname bime bau me. Teepi liba äätəcijige egä Paulo naabi Siila lui Rooma ngii cama biname gegi, teepi wälu ge, ingle naace gyene teeme cotre pisi nyene egä Rooma ngii cama biname ne atrana căco gone nüya jaawenuye. ³⁹ Teepi peei name pi Paulo Siila naabi bau me aaclige poode mene jajime. Teepi piba teebibine aasatäsi krokeciye mete cabu ca, teebibine äätəmliisi cewe ne gomalame. ⁴⁰ Siige, Paulo naabi Siila krokeciye mete cabu ca piba asatäsi, aaclige Ludiya me mete me. Puga teepi ätrunga biname bine edäremäsi, mene jejemäsi cängena ätrungame Yeesu ne, siige cewe ne ebmaläsi.

17

Tesalonika Cewe je

¹ Paulo naabi Siila neeneni cewe Amapipoli piiyepu Apoloniya tääsuplingtäsi, aaclige Tesalonika cewe me, luga ge Israela biname bime abasecretna mete. ² Paulo ädige pui abasecretna mete cabu me, ingle teeme mule pepu ge. Puga nesae Sabade bimu cabu tabe biname cama mene äciseräjige Oogäräneji Mene cabu ca. ³ Tabe pui mene teebibine ebiberäjemige, piiyepu pui cabu ca eboclomtige egä Keriso te müji mäpu padare piiyepu budre päpäna, piba budre cabu ca arpinenta. Paulo jejemige egä, “Ai Yeesu cane lui poto cidí me jijenininine, tabe peese nyene Keriso, biname bime nüya cabu ca äsecrerayame.” ⁴ Poto pui biname cina Paulo me mene jecatisi piiyepu Paulo naabi Siila cama abasutininiisi. Bucurage Griik biname lui cina Acejiyame bau irecu lätumutininiisi piiyepu bucurage mope magebi teepi cuta Paulo me mene jecatisi.

⁵ Yepä poto Israela biname cina ire patre jeglisi, ingle bucurage biname Paulo bau me otniniisi. Teepi jebasecretnemisi poto kaakesea umle căco nüya biname bine gaabe gome ca, tomi jewenisi. Teepi cewe biname bine giri jecitemisi, piba Yasona me mete me claabe cama eclige, ebăcnisi. Teepi singi Paulo Siila naabibine oomlaname, biname tomi cabu me acaname. ⁶ yepä lica jääpäniisi teebibine. Teepi piba Yasona piiyepu poto nuuja ätrunga biname bine oomleji ewademisi babo cewe mope biname bime bau me, piiyepu babo tage ca jüicemisi egä, “Peei biname Paulo naabi Siila, lui cina mage nüya mule jaawenemepäsi iyeta poto ta, teepi mime cewe me taaclumi. ⁷ Siige, Yasona te teebibine ire jaatwenige teeme mete cabu. Teepi iyeta cina Rooma Mopeyame me cotre bine jetropengäjemenisi, jüicemisi egä kirece mope biname pisi nyene, teeme ngii Yeesu sine.” ⁸ Siige, biname tomi piiyepu cewe mope biname ai mene liba itecijemige, teepi ngenecu nüya me äbitininiisi. ⁹ Siige, cewe mope biname cina asata rarekaake bine etomlecmisi Yasona piiyepu ten cama lui biname teeme bau ca, piba teebibine jityepemisi.

Berea Cewe je

¹⁰ Ciiye te liba tuumlige, piba taatu Tesalonika cewe ätrunga biname cina Paulo Siila naabibine jäätyepisi Berea cewe me claabeclabe biname wälu name pi. Teepi liba at-yaramtäsi Berea cewe me, Israela biname bime abasecretna mete me aaclige. ¹¹ Berea cewe cabu lui Israela biname teepi lica Tesalonika cewe cabu Israela biname pana ätecija cäco ge. Teepi babo singi Paulo me mene ätecijame, piiyepu iyeta bimu teepi Acejiyame me Oogäräneji Mene labiberäjininusi umle äbitame egä Paulo me mene liba toraca ge. ¹² Teeme bucurage cina teeme mene jitrungi-si, cuta piiyepu bucurage dogwe Griik magebi piiyepu bucurage Griik rooriye. ¹³ Yepä, Tesalonika cewe cabu lui Israela biname, teepi liba itecijemige egä Paulo Acejiyame me mene jicemuge Berea cewe cabu je, teepi piiyeme eclige, puga biname bine ngenecu jelonecmisi piiyepu tomi cabu lui biname bine claabe me jewenemisi Paulo tääpume. ¹⁴ Siige, Berea cewe ätrunga biname cina Paulo ne wata jityepisi malu me, yepä Siila naabi Timoti Berea je aanajige. ¹⁵ Lui ätrunga biname cina Paulo ne malu me jewecitisi, teepi ten cama poo gaabe eclige ngälu Atena babo cewe me atyarige. Puma cita ca teepi Berea me täcnäriige Paulo me mene cama egä Siila naabi Timoti müji wata teeme bau otnime.

Atena Babo Cewe je

¹⁶ Paulo liba jaawagriige Siila Timoti naabibine Atena cewe cabu je, tabe ngenecu mäpu äbitige, liba jepänemige ime ca wawenäneji uuje, biname cina lui bine yaawewanusi piiyepu yiiwärajemus. Tabe ngenecu mäpu gyene, ingle pui gwidape lui bucurage ge Atena cewe ngalebora je. ¹⁷ Tabe mene läciseräjuge Israela biname cama piiyepu nuuja gawe biname cama lui cina Acejiyame ne yaawewanusi, tabe liba Israela biname bime abasecretna mete cabu. Cuta piiyepu iyeta bimu gaabegabe tabe eei biname cama mene läciseräjuge cewe cole puupu cabu, lui cina piiyeme yaacluge. ¹⁸ Poto abiberäja biname lui cina Epikuro sigu cabu piiyepu poto lui cina Stowika sigu cabu, teepi Paulo cama mene äciseräjininisi. Poto cina jicisi egä, "Ai biname te ngena buduma mene singi iicaname?"

Yepä, nuuja cina jicisi egä, "Teeme mene lui nuuja gawe biname bime uuje poto cidi me." Teepi naace name pi pepu jicemisi, ingle Paulo lui Yeusu poto cidi me jicige, cuta piiyepu teeme budre cabu ca alotnenta poto cidi me. ¹⁹ Teepi puma cita ca Paulo ne ecanisi Atena cewe modamoda biname bime abasecretna cabu me Areo podo cabu me. Puga teepi Paulo ne jejisi egä, "Cine singi umle me ai kirece abiberäja maane lui jicenenemenite. ²⁰ Poto mäame mene cine lui niticijinige, mara opo gemi cime tääpume. Cine singi umle me teeme aboclomta lipu ge." ²¹ Yoo, iyeta Atena cewe biname piiyepu ten cama lui catecewe biname, teepi singi iyeta padare mene iicaname piiyepu ätecijame ciitaca kirece ngene atwanena poto cidi me.

Paulo me Mene Cewe Modamoda Biname bime Abasecretna cabu

²² Paulo jeclajutige cewe modamoda biname bime abasecretna cabu, teebibine jejemige egä, "Atena cewe biname, cane jepänemine egä weeme uuje iiwäreja mule nesae lica gemi. ²³ Cane liba totnumene weeme cewe cabu piiyepu weeme uuje iiwäreja puupu bine sengräräjumene, cane yepä iiwäreja dade tepänumene apu oogäräneji mene cama egä, MINE LUI BABO BINAME POTO CIDI ME CAMUGE UMLE ÄBITA, TEEME TÄÄPUME AI DADE. Yoo, weene lui ne yiiwärajuye, yepä lui poto cidi me weene camu gemi umle äbita, cane page umle jiweninine. ²⁴ Acejiyame lui te gawecewe ne tewenuji iyeta teeme gwidape cama, tabe peese nyene Yageyame cabucewe piiyepu gawecewe tääpume. Tabe lica yaanajuge uuje iiwäreja mete cabu, biname cina lui ne yaarangusi. ²⁵ Cuta piiyepu tabe nuuja singi lica ge gwidape tääpume biname cina lui teeme ime ca yäcärusi, ingle tabe peese nyene lui te iyeta biname bine yäcäremuge teeme ireclota, piiyepu buuwemope, piiyepu iyeta nuuja gwidape. ²⁶ Tabe yepä biname cabu ca iyeta tääpe maramara biname bine jewenemuji, siige eplidnärujisi iyeta gawe maramara cabu lenajame. Camuge biname bine wawena, tabe ngene ca egluji lui padare piiyepu lui gawe cabu teepi cirege lenaja. ²⁷ Tabe apu jewenuji naace tääpume iyeta biname cina teebine ärngime piiyepu teeme bau me awetentame, teepi piba pama teebine päpäname. Yepä, toraca gyene egä Acejiyame cudecewe lica gyene mime yepäyepä cabu ca, ²⁸ yepä biname te lipu jicuji egä: 'Mine teeme kokre cabu ninajininige, otnetnäjininago, piiyepu ireclota jepäninisi.' Yoo, poto weeme oogära biname cina ai poto cidi me jicujisi egä, 'Cuta mine teeme bägrä gemi.'

²⁹ Yoo, ingle naace popi mine Acejiyame me bägrä gemi, mine müji lica gemi apu angi egä tabe lui gol, silba, coo kula ca wawenäneji uuje pana ge, lui bine biname cina yootonutemusi, cängena jäämyeremusi. ³⁰ Yoo, lui padare cabu biname cina umle cäco Acejiyame poto cidi me, tabe piba teeme niyaniya mule bine lica yaacnemuge, yepä page tabe iyeta biname bine iyeta poto ta jejananemige teeme niya mule cabu ca atatröngärame, ³¹ ingle naace popi tabe bimu ne ngene ca itu egluji, lui cabu tabe iyeta gawecewe biname

bine cirege conocăco atrana. Tabe peei täápume teeme biname ne ituge jaji, cuta peei biname ne itu eboclomăjuji iyeta biname bime täápume, tabe liba teebine budre cabu ca erpinantuji.”

³² Siige, teepi liba Paulo me mene itecijemige biname budre cabu ca arpinenta poto cidi me, poto cina teebine jitanutansi, yepä poto cina teebine jejisi egä, “Cine singi cääri ätecijame ai poto cidi me nuuja padare cabu.” ³³ Siige, puma cita ca Paulo peei abasecretna ne sebmalige. ³⁴ Poto biname cina ten cama abasutaninini, teeme mene jitrongisi. Teeme yepä, ngii Dyonisiyus, lui peei modamoda biname bime abasecretna cabu ca, cuta nuuja lui magebi gwene, teeme ngii Damari, cuta piti nemi cerämu poto biname.

18

Korinito Babo Cewe je

¹ Peei ingwe ca Paulo Atena cewe ne sebmalige, ädige Korinito babo cewe me. ² Puga tabe jepänige yepä Israela biname ngii Akwila, lui me ärngi gawe Pontus ge. Tabe Rooma babo cewe Italiya gawe cabu ca piba taatu tädige coga ngii Prisila cama, ingle Rooma Mopeyame Klaudiyus mene itu jüicepi iyeta Israela biname cina Rooma babo cewe ne gomalame. Yoo, Paulo teebibine äädärlige, ³ siige ten cama enajanige, kaakesea ten cama jewenemige, ingle naace popi Paulo teeme rarekaake jääpänuge yepä kaakesea cabu ca Akwila naabi Prisila lui kaakesea jaawenäsi. Teepi kokre cäbletääpe bine yaaterutäjemusi watawata mete wawena täápume. ⁴ Iyeta Sabade bimu gaabegabe, Paulo ädige Israela biname bime abasecretna mete me, puga mene iciseräjemige. Tabe singi ge Israela piipeyu Griik biname cina teeme mene acatame.

⁵ Siila naabi Timoti Makedoniya gawe cabu ca liba taalige, tatyaramtäsi Korinito cewe me, Paulo pui rarekaake täápume kaakesea ne sebmalige, piba iyeta padare Miiji Mene jaajananemuge, Israela biname bine cängena yaabiberäjemuge egä Yeesu peese nyene Keriso, teepi lui ne jewagrijenisi otnime teebibine niija cabu ca äsacerame. ⁶ Israela biname cina liba teeme mene lica jecatisi piipeyu teebine jelwisi, tabe teeme cäbletääpe bine jiglubäjemige, piba teebibine kokre mene ca jejemige egä, “Weene Acejiyame hau ca liba cudecewe läbitininuye, peei lui weeme niija birige. Weene liba cäme mene täápume ätecija cäco läbitininuye, peei lui cäme ingle lica ge! Page cabu ca cane ädenine nuuja gawe biname bime hau me.” ⁷ Siige, tabe pui abasecretna mete ne ebmalige, ädige nuuja mete cabu lenajame, lui peei abasecretna mete wajwa jage. Pui mete yageyame, ngii Titiyu-Yuustus, tabe Israela biname lica ge, yepä nuuja gawe biname, lui te Acejiyame ne yaawejanuge. ⁸ Yepä Israela biname ngii Krispo, lui pui abasecretna mete mope biname ge, tabe piipeyu iyeta teeme ingle biname cina Yageyame ne jitrungisi. Cuta piipeyu bucurage nuuja Korinito cewe biname lui cina Miiji Mene itecijemige puga, teepi jitrungisi, piba niije ca äciseja ne ecatisi Yeesu me ngii cabu.

⁹ Nuuja ciije Yageyame te Paulo ne wama ca jejige egä, “Wälu gone läbitute, yepä mene jüicemepi! Gloose te gone noomluge, ¹⁰ ingle cane maane cama gäne. Nuuja biname te äblicäco ge meebine niija wawena, ingle naace gyene bucurage biname ai cewe cabu lui cäme biname gemi.” ¹¹ Peei mene name pi Paulo puga enajige yepä kämäge cebo cama, biname bine yaabiberäjemuge Acejiyame me mene poto cidi me.

¹² Rooma Babo Mope Biname te liba biname ngii Galiyo ne mopeyame me jewenige Griik biname bime Akaya gawe täápume, Israela biname cina piba Paulo ne gigrj joomlisi, ecanisi teebine atrana puupu me. ¹³ Teepi jejisi egä, “Ai biname singi biname bine atrongärame Acejiyame ne awejena mara mule ca, lui mule te Rooma cotre ne jaatropangtuge.”

¹⁴ Paulo mene me lica äbitige, Mopeyame Galiyo te piba Israela biname bine jejemige egä, “Ai biname te liga babo niija mule ne jaaweneji, coo Rooma biname bime cotre liga jaatropangteji, cane piba weene Israela biname bine cängena jitecijinejine, ¹⁵ yepä ai gwidape lui weeme papa abaja mene gemi, weeme mule, weeme ngii, piipeyu weeme cotre poto cidi me. Peei name pi weene weemämu jeweneye atraname. Cane singi lica gäne atraname pepu mule poto cidi me!” ¹⁶ Tabe puma cita ca teebibine siyebhengemige atrana puupu cabu ca. ¹⁷ Siige, teepi iyeta piba Israela biname ngii Sostene ne joomlisi. Tabe lui kirece mopeyame ge pui Israela biname bime abasecretna mete täápume. Teepi teebine eglisi atrana puupu opo gaabe je, yepä Mopeyame Galiyo tabe nuuja singi lica ge teebibine iibaname.

Paulo Babo Antiyoka Cewe me Acnenutige

¹⁸ Peei ingwe poto ca Paulo Korinito cewe cabu enajanige bucurage bimu ätrunga biname cama, teebibine piba sebmalemige, Akwila naabi Prisila cama ädige poo gaabe Suriya gawe me. Puga Kenekrea malu cewe je, teepi liba camuge babo poo cabu me acetnera, Paulo teeme edingäli jeclanemige, ingle naace popi Israela biname bime mule apu ge egä biname

te padare yaacituge, lui cabu tabe mage ngene jotwananuge Acejiyame poto cidi me. Tabe edingäli lica äläcnuta ngälu peei padare te lapiruge, siige piba edingäli jaacianimuge piiyepu gwidape Acejiyame ne yiwäräjuge. ¹⁹ Yoo siige, teepi liba atyarige Epeso cewe me, tabe Israela biname bime abasecretna mete me abacitige, mene äciseräjige Israela biname cama. ²⁰ Biname cina teebine tesoglicisi tabe leca padare ten cama lenajame, yepä tabe singi lica ge. ²¹ Pätä tabe liba sebmalemige, jejemige teebibine egä, “Liba Acejiyame singi gyene, cane cire tacnepene weeme bau me.” Siige, tabe Akwila naabi Prisila puga taabmalige, poo gaabe Epeso cewe ca abyemäriige.

²² Tabe liba atyaramtige Kesarea malu cewe me, tabe doro ta ädige Yerusalemame me, ätrunga biname bine jewablemige, piba ädige Antiyoka cewe me. ²³ Tabe poto bimu enajige Antiyoka cewe je, piba abyemäriige, otnige Galatiya piiyepu Pirugiya gawe cabu ta, puga iyeta ätrunga biname bine ngene atwana kokre jewenemige.

Apolo te Ädige Epeso piiyepu Korinito Cewe me

²⁴ Yepä Israela biname, teeme ngii Apolo, lui aplimläneji ge Aleksandriya cewe je Aikupito gawe cabu, tabe tädige Epeso cewe me. Tabe lui mopemuli biname ge piiyepu babo umle ge Acejiyame me Oogäräneji Mene poto cidi me. ²⁵ Tabe ituge abiberäja mime Yageyame me gaabe poto cidi me. Tabe mene jüucuge drämä cama, piiyepu biname bine conocäco ebiberäjemige Yeesu poto cidi me. Yepä gwidape, tabe umle Yoane me niye ca äciseja mule taatu; tabe nuuja umle lica ge egä biname cina äciseja yaacatusi Yeesu Keriso me ngii cabu. ²⁶ Yoo, Apolo giye abacitige mene wälu cäco iicemame Israela biname bime abasecretna mete cabu Epeso je. Prisila naabi Akwila liba äatecijige teeme mene, teepi piba teebine teeme mete me ecanäsi, teebine cängena pajecurage ebiberäjäsi Acejiyame me gaabe poto cidi me. ²⁷ Yoo, Apolo liba singi ge Griik biname bime Akaya gawe cabu otnime, Epeso ätrunga biname cina teebine itityärisi. Teepi teeme Griik ätrunga binamewale bime bau me mene yoogärisi egä teepi Apolo ne awacletnäjame. Siige, Apolo liba Griik biname bime gawe cabu atyaramtige, tabe babo ätityeräja biname ge teeme täapume, lui cina Acejiyame me owecu piiyepu ätityera ca Yeesu ne ituge ätrunga. ²⁸ Tabe kokre mene ca Israela biname bine epremalemige sobe cabu. Tabe eboclomtige Yeesu ne Oogäräneji Mene cabu ca egä tabe peese nyene Keriso, lui ne Israela biname cina jaawagrijusi teebibine niyya cabu ca äsecerame.

19

Paulo Epeso Cewe je

¹ Apolo liba Korinito cewe cabu enajige, Paulo doro gaabe ädige Pirugiya probins cabu ta, ngälu atyaramtige Epeso cewe cabu me. Tabe puga jepänemige poto ätrunga biname bine, ² itemlemige egä, “Nää, Aceji Seemo weeme bau itu labacitanepi, weene lui padare cabu niinäce liba jäätrungepeye?”

Teepi jejisi egä, “Cine nuuja umle lica gemi Aceji Seemo poto cidi me.”

³ Puma cita ca Paulo teebibine itemlemige egä, “Weene ngena ätrunga ne piba yaacatepeye, weene liba niye ca äciseja ne yaacatepeye?”

Teepi jejisi egä, “Pui niye ca äciseja biname Yoane, cine teeme mene yaacatepesi.”

⁴ Paulo piba jejemige egä, “Yoane me äciseja eei bime tääpu myene, lui cina teeme niyya mule cabu ca latatrongärininusi Acejiyame bau me. Tabe Israela biname bine jaajemuge ätrungame teeme bau me lui te teeme ingwe ca tädenige. Peei lui Yeesu sine.”

⁵ Epeso ätrunga biname cina liba peei mene itecijemige, teepi niye ca äciseja ne ecatisi Yageyame Yeesu me ngii cabu. ⁶ Siige, Paulo liba ime aacitanige teeme papa cabu, piba Aceji Seemo te abacitanige teeme yepäyepä trupa cabu. Teepi teeme umle cäco mene ca jüicemisi, cuta piiyepu Acejiyame me tagepogogo mene jüicemisi. ⁷ Teepi iyeta pama twelb rooriye ge.

⁸ Nesae mabye ngalebora Paulo Israela biname bime abasecretna mete me labacitanuge, mene wälu cäco jüicemuge biname cama, piiyepu teebibine mene yäaciseräjemuge, ingle tabe singi teebibine umle wawename Acejiyame te lipu biname bine yaawademuge. ⁹ Yepä, poto cina ätecija cäco ge. Teepi singi lica ge ätrungame, piiyepu niyya mene jüicemusi abasecretna cabu je mime Yageyame me gaabe poto cidi me. Paulo peei name pi teebibine ebmalemige, siige ätrunga biname bine ewademige ten cama. Puma cita ca iyeta bimu gaabegabe tabe läduge biname ngii Turanus me abiberäja mete cabu, puga biname cama mene labaitnuge. ¹⁰ Tabe peei ne jaawenuge neeneni kämäge cama. Peei name pi iyeta biname lui cina yaacrajuge Asiya probins ngalebora, Israela biname piiyepu nuuja gawe cabu ca lui biname iyeta, teepi yäatecijemuge mene Yageyame poto cidi me.

¹¹ Acejiyame te mararage ciitaca mule bine jaawenemuge Paulo me ime ca. ¹² Nuuja taje biname cina Paulo me cäbletääpe pläsu bine yaawademusi, lui bine ituge ätäya teeme mope cabu coo ibi cabu, siige pita biname bime cabu me yaarpetnemusi. Piba teeme pita cina teeme bau ca läyebhenguge, piiyepu niyya cable cina teeme trupa cabu ca läsuge. ¹³ Yoo, poto Israela biname lui cina waatne-tnäjinusi niyyaniya cable bine äyecrejame biname bime trupa cabu ca, teepi läbitininusi Yageyame Yeesu me ngii jajime pei mule wawename. Teepi jejemisi niyya cable bine egä, "Cine weebibine jijenininago Yeesu me ngii cabu, lui ne Paulo jeitnäjenige, weene äyebhingeyel!" ¹⁴ Yoo, puga ge seben naniganewale lui cina peei mule ne jaawenusi. Teepi yepä Israela iiwäreja babo biname Sekewa me bägrä gemi.

¹⁵ Teepi liba niyya cable cama biname ne Yeesu me ngii cabu pepu mene jejisi, tabe niyya cable te teebibine jejemige egä, "Cane umle gäne Yeesu, piiyepu cane umle gäne Paulo poto cidi me, yepä weene baa laati bemi?"

¹⁶ Lui biname niyya cable cama ge, tabe girigale cama ädige pui seben naniganewale cabu me, teebibine iyecräjame. Teepi iyeta teeme mete cabu ca uucratnige dupe cama, teeme cäbletääpe mage äsupleceji ge. ¹⁷ Israela biname piiyepu Griik biname Epeso cewe ngalebora, teepi liba itecijemige peei poto cidi me, iyeta mage wälu ge, siige Yageyame Yeesu me ngii te babo äbitige teeme täापume. ¹⁸ Bucurage ätrunga biname cina totninisi Paulo naabibime bau me, sobe cabu teepi teeme piiseba mule aitrnäjinisi. ¹⁹ Bucurage lui cina piiseba täापume labiberäjininusi teepi teeme oogäräneji mene piiseba mule poto cidi me sewademisi, sobe cabu juubuderäjemisi. Teepi elenglecäjemisi pui peba bime daremu iyeta, ngälu fifti tausen silba rarekaake bine joomlemisi. ²⁰ Pepu kokre mule ca Yageyame me mene te babo äbitige iyeta poto ta, cuta piiyepu cerämu kokre me äbitige.

Claabeclabe Biname Epeso je

²¹ Ai mule cina liba täbitimesi, Paulo ingwe ca piba ngenge jotwanige Griik biname bime gawe Makedoniya piiyepu Akaya cabu me otnime, puma cita ca piba Yerusalema me otni. Tabe jiiicege egä, "Peei padare ingwe ca cane miiji Rooma babo cewe ne päpäname." ²² Tabe jäätiepige Makedoniya gawe me neeneni teeme ätityera biname Timoti Erasto naabibine, yepä tabe cerämu enajige Asiya probins cabu.

²³ Yoo, puga ge Epeso cewe cabu pui padare mäpurage mule Yageyame me gaabe poto cidi me. ²⁴ Yepä biname puga ge teeme ngii Demetriyus lui te silba ca cegecege gwidape bine jaawenemuge. Tabe silba iiwäreja mete cegecege bine jaawenemuge teeme uuje magebi täापume, ngii Artemi. Demetriyus piiyepu teeme kaakesea biname cina bucurage rarekaake jääpänemusi peei mete cegecege wawena cabu ca. ²⁵ Yoo, Demetriyus tesoglecemige teeme kaakesea biname bine piiyepu poto nuuja biname lui cina yepä pana kaakesea jaawenusi, teebibine jejemige egä, "Binamewale, weene umle gemi egä mine ai kaakesea name pi dogweyame gemi. ²⁶ Page weene jepäneniye, jitecijiye ai biname Paulo te ngena jewenenige. Tabe jiiicenemige egä, 'Ime ca wawenäneji uuje lui toraca lica gemi.' Bucurage biname cina peei mene bii jitrungisi mime cewe Epeso je piiyepu Asiya probins iyeta poto ta. ²⁷ Pama mime kaakesea te niyya ngii pagege päpäna Paulo me mene name pi, cuta piiyepu pama niyya pa tädepi mime uuje magebi Artemi bau me. Biname cina pama ngenge pa jäättrimalemepi teeme iiwäreja mete poto cidi me. Puma cita ca Artemi, lui täापume iyeta Asiya biname piiyepu biname cina iyeta gawecewe cabu ta yiiwärajusi, teeme babo ngii pama pa lapesarepi."

²⁸ Biname cina liba Demetriyus me mene itecijemige, teepi claabe me äbitininisi, babo tage ca jiiicemisi egä, "Baborage gwene mime Epeso biname bime uuje magebi Artemi!" ²⁹ Biname cina teeme guugla itecijemige Epeso cewe iyeta poto ta. Tomi cabu lui biname cina neeneni Makedoniya biname bine claabe cama joomli-si, teeme ngii Gayus naabi Aristakus, lui cina Paulo cama totnumäsi. Teepi teebibine wata aacanisii Epeso cewe babo abasecretna puupu me. ³⁰ Paulo singi otnime abasecretna biname bime opo gaabe me, yepä ätrunga biname cina teebine jiiibisi. ³¹ Cuta piiyepu poto Epeso cewe modamoda ngii biname, lui cina singi gemi Paulo täापume, teepi mene jityepisi teeme bau me egä, "Gone lädute peei claabe biname bime opo gaabe!" ³² Peei padare biname cina abasecretna puupu cabu mage guugla ecisi, yepä bucurage pui biname cina nuuja umle lica gemi teepi ngena täापume babasecretnige. Poto singi gemi yepä gwidape täापume; nuuja cina singi nuuja gwidape täापume. ³³ Poto biname cina apu jengemige egä yepä Israela biname ngii Aleksanda name pi peei tomi bäbitininisi, ingle naace gyene Israela biname cina teebine jewenisi niinäce gaabe otnime. Puma cita ca Aleksanda te singi gyene biname bine ime ca bojä wawename. Tabe liga gije abacitige mene me egä peei guugla lui teeme ingle lica ge, ³⁴ biname cina teebine opo ewatnisi egä tabe lui Israela biname ge, piba lecaleca padare cabu teepi gigri jiiicanisi babo tage ca egä, "Baborage gwene mime Epeso cewe biname bime uuje magebi Artemi!" Teepi peei yepä mene jiiicanisi mage leca padare ngalebora.

³⁵ Ingwe ca yepä cewe mope biname te pui biname tomi ne bojä jewenige. Tabe biname bine walya mene jejemige egä, “Epeso ceweyame, iyeta biname umle gemi egä Epeso lui ire atwi cewe gyene Artemi me iiwäreja mete täápume piiyepu pui cudege kula täápume, lui te sitramuji dume cabu ca. ³⁶ Nuuja biname te äblicäco aina ai poto cidi me. Pipu pi weene miiji bojä agi, cängena ngene atwana cama inajipi. ³⁷ Weene ai neeneni biname bine aima bii taacaniye, yepä teepi nuuja gwidape lica ero ca isatäsi iiwäreja mete cabu ca, piiyepu lica niia mene jicemäsi mime uuje magebi poto cidi me. ³⁸ Demetriyus piiyepu ten cama lui kaakesea biname cina liba singi gemi mene ainame nuuja biname poto cidi me, atrana bimu piti nemi piiyepu cuta ablaweja biname. Teepi miiji puma teemeteme pa latranipesi. ³⁹ Yepä, weene liba cerämu nuuja gwidape täápume singi, weene miiji cewe ngii biname bime abasecretna cabu peei iicana. ⁴⁰ Page ai guugla mule te lui bäbitige, mäpu gyene mime täápume, ingle Rooma biname cina pama mibibine pa niyitnipesi ai mule poto cidi me. Mime nuuja ingle lica gyene ai guugla täápume. Mine äblicäco teebibine miiji ingle ceera ai mule poto cidi me.” ⁴¹ Yoo, teeme mene liba siige, tabe biname bine jityepäjemige.

20

Paulo Ädige Makedoniya piiyepu Akaya Gawe cabu me

¹ Siige, Epeso cewe biname liba bojä icrajige, Paulo piba ätrunga biname bine tebasecret-nemige, mene jejemige teeme ngene atwana kokre wawename, siige yewo jewenemige. Puma cita ca tabe sebmalemige teebibine, poo gaabe ädige Makedoniya gawe me. ² Tabe pui gawe cabu ta otnige, bucurage mene jejananemige ätrunga biname bine kokre ceerame. Puma cita ca tabe ädige Akaya gawe cabu me, ³ puga enajige nesae mabye cama. Tabe liga abyemerame äbitige poo gaabe Suriya gawe cabu otnime, piba umle äbitige egä poto Israela biname cina mene jitranenisi teebine gaabe cabu aglime, peei name pi tabe tacnenutige Makedoniya gawe cabu me, piba puma cita ca otni Suriya me. ⁴ Yoo, ätrunga biname ngii Sopata, lui Purus me bägrä ge Berea cewe cabu ca, tabe Paulo ne jewecitige. Cuta puga ge ten cama Aristakus naabi Sekundu, lui Tesalonika cewe biname, piiyepu Gayus lui Derbeyame, piiyepu Tukikus naabi Tropimus, lui Asiya probins cabu ca, cuta piiyepu Timoti. ⁵ Teepi iyeta niinäce eclige, cibibine niwagrijinisi Trooasi cewe je. ⁶ Israela biname bime Uutneca cäco Buluduu Trii kaake poto ca, cine poo gaabe naclige Pilipi cewe cabu ca. Siige, faib bimu ingwe ca cine ten cama abasecretninago Trooasi cewe cabu. Cine puga Trooasi je seben bimu ninajininige.

Paulo Trooasi Ätrunga Biname bine Ceräcerägäabu Edäremige

⁷ Sabade mämliteca me cine tabasecretninago deedei matikolä gigri äbitame. Paulo biname bine mene jejemige ngälu ciye duusa, ingle naace popi nuuja kroke tabe singi teebibine abmaläcemame. ⁸ Cine lui caburage puupu cabu tabasecretninago, bucurage lampa cina puma ayenininisi. ⁹ Yepä mamye rooriye, teeme ngii Yuutikus adnatäneji enajige mete traapi uli cabu. Paulo liba mene camu jicemige, Yuutikus ute me jiciranige, ngälu tabe toraca ute te jewenige, siige pui caburage puupu cabu ca puma cita ca sitramige gawe me. Biname cina liba teebine ecatisi, piba jepänisi egä tabe budre ge. ¹⁰ Yepä, Paulo äinige gawe me, budre biname papa ca ätwitige, teebine jejeclenäjige. Tabe biname bine jejemige egä, “Ngenecu mäpu gone. Tabe ireclota gyene!” ¹¹ Siige, Paulo piba jegelige, pui caburage puupu cabu me cääri abacitige, puma buluduu ne itrecige, biname cama erwäjige. Tabe piba cääri mene abaitnige lecarage padare cabu ngälu bimu te tacitige, piba abyemäriige. ¹² Teepi jewecitisi pui mamye rooriye ne ireclota cama teeme mete me, siige babo ngenecu miiji äbitininisi.

Paulo Trooasi Cewe ca Ädige Miletu Cewe me

¹³ Cine babo poo cabu me niinäce acetnärinago, abyemärinago Asos cewe me, Paulo luma singi ge poo cabu me acenutame. Tabe cibibine itu nijipi pepu gaabe wawename, ingle tabe singi ge doro ta otnime Asos cewe me. ¹⁴ Tabe liba cibibine opopa niwenininige Asos cewe je, cine teebine ecenutisi, piba naclige Mitulene curä me. ¹⁵ Cine puma cita ca naclige, nuuja bimu Kiyosa curä mameta me atyarinago, cuta nuuja bimu Samo curä me atyarinago, piba cuta nuuja bimu cabu atyarinago Miletu malu cewe me. ¹⁶ Paulo mene itu titranumi Epeso cewe ne äsuplentame, ingle naace popi tabe singi lica padare te apirame Asiya probins ngalebora, yepä tabe singi ge Yerusalemne ne wata oomlaname Pentikos bimu täápume, liba ibibi ge poo me uuwama.

Paulo Yewo Mene Jejemige Epeso Ätrunga Ingle Mope Biname bine

¹⁷ Miletu cewe ca Paulo mene jityepige Epeso me, ätrunga ingle mope biname bine jajime ten cama opopa ayime Miletu je. ¹⁸ Teepi liba atyarige, tabe teebibine jejemige egä, “Yoo, weene umle gemi egä iyeta padare cane liba weene cama itu nanajepi, pui niinäce bimu

cabu ca cane itu latyaramtepene Asiya probins cabu, ngälu cane probins ne saabmalepene, ¹⁹ cämämu aweppyeräja cäco piyepu ele cama, cane Yageyame me kaakesea jaawunene mäpu padare cabu, lui bine jääpänemune Israela biname bime cabu ca, teeme ämugetna mule name pi. ²⁰ Weene umle gemi egä cane durau äbita lica weebibine mene jajane-name lui weeme miiji täapume birige, cane liba mene jijanani-pene piyepu weebibine ibiberäji-pene biname sobe cabu cuta piyepu weeme maramara mete cabu ta. ²¹ Israela biname piyepu nuuja gawe biname bine cane kokre cama bäärmä jaagednemepene teeme niya mule cabu ca Acejiyame bau me atatrongärame piyepu mime Yageyame Yeesu ne ätrungame. ²² Siige, page cane Yerusalema me ädenine, ingle Aceji Seemo nätyepenige cebine. Cane umle lica ngena pa läbitepi puma cäme täapume. ²³ Cane pui taatu umle gäne egä iyeta cewe cabu ta Aceji Seemo cebine itu najananumi egä krokeciye mete piyepu pototo mäpu cina puma nawagri-jenisi. ²⁴ Yepä, cane ngene jotwanenine egä cäme ireclota lui babo gwidape lica gyene, cane liba taatu epirenine pui kaakesea ne Yageyame Yeesu lui itu näcärüji wawename. Peei kaakesea lui Miiji Mene ücaname Acejiyame me owecu piyepu singi pototo cidi me.

²⁵ Yoo, cane iyeta weeme bau waatnetnäjepene, biname bine mene jaajananemepene Acejiyame te lipu biname bine yaawademuge. Siige, page cane umle gäne egä weeme nuuja te lica cääri pa näpänepi cebine. ²⁶ Cane peei name pi page ai bimu cabu jijenininine weebibine egä weeme yepä te Acejiyame bau ca liba lapesaruge, peei lui cäme ingle lica ge, ²⁷ ingle naace popi cane lica durau läbitune weebibine mene jajanename, yepä cängena jijenune iyeta Acejiyame lui singi gyene wawename. ²⁸ Weene cängena ire atwipeye weeme ireclota pototo cidi me, cuta piyepu pui biname bime ireclota cängena ire jetwemepeye Aceji Seemo te lui bine weeme bau me itu yaawademepi weene ire atwime. Yoo, maamoi ire atwi biname pana, weene ätrunga ingle biname bine cängena ewademepeye, ingle naace popi Acejiyame teebibine itu jaaletne-mepi teeme bägrä Yeesu me uudi piyepu budre ca. ²⁹ Cane umle gäne egä cäme otni ingwe gaabe ca, niyaniya biname cina weeme bau me pa twaatnipesi, girigale drego pana teepi niya pa jaawenemepesi pototo biname bine weeme tomi cabu. ³⁰ Yoo, padare cire tädepi, pototo biname cina weeme tomi cabu ca piba walya mene cire jicemepesi pototo ätrunga biname bine teeme bau me äyebile-ngame. ³¹ Peei name pi ire! Cuta piyepu ngene napcepepeye cane lipu ciye bimu ele mäcu cama iyeta weebibine ibiberäji-pene nesae kämäge cama.

³² Yoo, page cane weebibine icranininine Acejiyame me ime cabu. Pisi nyene weene cama Miiji Mene Acejiyame me owecu piyepu singi pototo cidi me, lui mene ibibi gyene weeme ngene atwana kokre wawename piyepu weebibine teeme miiji cabu acraname. Peei miiji lui pisi nyene iyeta Acejiyame me biname bime täapume. ³³ Yoo, weene miiji cäme mule ingwe äcwime. Cane singi lica ituge äbita nuuja biname bime silba coo gol rarekaake, piyepu cäbletääpe täapume. ³⁴ Weene weemämu umle gemi cane lipu rarekaake kaakesea cäme ime ca itu jaawenepene iyeta gwidape päpäname, cane piyepu lui biname cane cama cime täapume. ³⁵ Iyeta cäme mule ca cane weebibine ibiberäjininune egä lui biname pisi nyene kokre cäco, mine miiji pepu kokre kaakesea cama teebine ätityerame. Mine miiji ngene jwaatwa-naninago lui mene Yageyame Yeesu teemämu itu jejuji egä, 'Lui biname te gwidape yäcärüge, teeme gege baborage gyene peei me gege cabu ca lui te saacatuge.' "

³⁶ Paulo me mene siige liba, teepi iyeta kokorare ipednemisi, Acejiyame bau me irecu ätmutinisi. ³⁷ Teepi iyeta ele enenetne-mige teebine liba yewo täapume jejecletnäjisi, jetecnisi. ³⁸ Teepi mage owecu jewenisi, ingle tabe bii jejemige egä, "Weene ingwe ca opo lica pa näpänepewe." Pipu pi teepi Paulo ne englecitisi babo poo cabu me.

21

Paulo Yerusalema me Ädige

¹ Cine ätrunga biname bine yewo jewenemisi Miletu je, piba teebibine ebmalemisi. Cine babo poo gaabe malu ne conocäco yuurisi, Kosa curä je atyarinago. Nuuja bimu cine Roos curä ne joomlisi. Puma cita ca malu cewe Patara me naclige. ² Puga cine jepänisi yepä babo poo ne lui te Poenikiya gawe me ädenige. Cine peei babo poo cabu me acetnärinago, malu cabu naclige. ³ Pototo bimu ingwe ca cine Kupro curä ne jepänisi, yepä poo te malu gaabe ta ädige Suriya gawe me. Turo malu cewe je cine ärpetnäjinago, pui padare täapume poo biname cina liba gwidape bine irpetnäjemisi. ⁴ Cine pototo ätrunga biname puga jepänemisi, seben bimu ten cama ninajininige poo trämä. Aceji Seemo me umle cabu teepi Paulo ne jejisi egä, "Gone lädute Yerusalema me!" ⁵ Yepä, cime padare ten cama liba apirige, piba cine gaabe cabu abyemärinago. Iyeta ätrunga biname teeme coga bägrä cina cine cama äsige cewe cabu ca malu me. Cine iyeta kokorare koriyo cabu ipednemisi, irecu ätmutinago.

⁶ Puma cita ca cine yewo äbitinago, siige babo poo cabu cääri acetnärinago, cuta teepi äcnärige cewe me.

⁷ Cine Turo ca poo gaabe naclige Petolemaisä cewe me. Puga cine ätrunga biname bine seboore jebenemisi, piyepu yepä bimu ten cama ninajininige. ⁸ Nuuja bimu cine teebibine sebmalemisi, Kesarea cewe me atyarinago. Puga ge yepä biname ngii Pilipo lui te Miiji Mene jicemuge. Cine teeme bau naclige teeme mete cabu lenajame. Tabu lui yepä ge pui seben* cabu ca Yerusalemä ätrunga biname lui bine jejäcremuji ätyepäneji biname bine ätityerame. ⁹ Teeme puga ge fooa ngulebägrä lui cina Acejiyame me tagepogogo mene jicemusi. ¹⁰ Cine puga liba poto bimu cama ninajininige, piba yepä mename biname te tatyaramtige Yuudea gawe cabu ca, teeme ngii Agabu. ¹¹ Tabu cime bau me tädige, Paulo me baagi ecatige, peei ca teeme ernge ime ätäyige, piba nijinige egä, "Aceji Seemo te apu jicenige: Ai baagi yageyame ne Israela biname cina Yerusalemä je apu pana pa jäätäyepesi, siige pa yaacitepesi nuuja gawe biname bime ime cabu." ¹² Ai mene liba niticijininige, cine piyepu puga lui biname, cine iyeta Paulo ne ele cama jejanansi egä, "Gone otni Yerusalemä me!" ¹³ Yepä, tabu mene niwecnistinige egä, "Weene ngena jeweneniye? Ele ingeni-tninige, cebine ngenecu mäpu me naweniye! Cane amacetnäjäneji gäne lica ätäya taatu me, yepä cuta budre äbitame Yerusalemä je Yageyame Yeesu täápume."

¹⁴ Cine liba äblicäco ge teebine mara ngene atwanena ceera, piba mene ebmalisi, jicisi egä, "Mime Yageyame me singi pa läbitepi."

¹⁵ Cine poto bimu ninajininige Kesarea cewe je, piba cime gwidape emacetnäjemisi doro ta otni Yerusalemä me, siige abyemärinago. ¹⁶ Poto Kesarea ätrunga biname cina cine cama eclige, cibibine niwadninisi mete me, cine luma pa ninajipi. Pui mete yageyame ngii Manasona, tabu Kupro curä cabu ca ge, lecarage padare ätrunga cama yaanajepi.

Paulo te Ätrunga Mope Biname Yakobu ne Edärige

¹⁷ Cine liba atyarinago Yerusalemä me, ätrunga biname cina cibibine niwacletnäjininisi gege cama. ¹⁸ Nuuja bimu Paulo cibibine niwecitinige, Yakobu ne edärisi. Iyeta modamoda ätrunga biname cine cama puga ge. ¹⁹ Paulo teebibine seboore jebenemige, iyeta cängena jeitnäjemige Acejiyame te ngena bine ituge waweneca teeme Paulo me kaakesea cabu ca nuuja gawe biname bime täápume. ²⁰ Teeme mene liba itecijemige, teepi iyeta cina Acejiyame ne ewepyeräjis, puma cita ca Paulo ne jejisi egä, "Cime biname, maane jepänenite lija tausen Israela biname cina Yeesu ne ituge ätrunga, piyepu teepi iyeta mime Israela biname bime cotre bine cängena jaawenemusi. ²¹ Teepi idre ituge ätecija mäame poto cidi me egä, iyeta Israela biname lui cina yaacrajuge nuuja biname bime gawe maramara cabu, maane teebibine yaabiberäjimute Moose me cotre mule gomalame, piyepu jaajanemute teeme imäbägrä bime matikolä tääpe lica iirputame Acejiyame me cewecu acatame, coo piyepu teebibine jaajanemute Israela biname bime mule lica waweneme. ²² Yoo, teepi pama pa yäätjecijemepi egä maane age säte cewe je. Mine ngena ne pa jaawenepesi piba? ²³ Yoo, maane miiji apu wawena cine lipu naajenisi! Piti nämi cine cama fooa biname, lui cina Acejiyame ne mene ituge jaji mime Israela biname bime mule ibibi, egä poto mabye ngalebora teepi singi gwidape wawena Acejiyame täápume. Siige pui padare cabu teepi edingäli äswi cäco yaacrajuge. ²⁴ Maane ten cama ädepi, gigri Acejiyame ne cibu ca yiwäräjepeye teepi teeme mene ibi waweneme, siige kälyä äbitame. Maane te peei cibu bine teeme täápume jeletnemepi! Siige, iiwäreja ingwe gaabe ca teepi piba miiji gämi teeme edingäli äswime. Yoo, maane liba apu jewenenite, piba iyeta biname cina pa jääpänepesi egä toraca lica gyene teepi lui mene ituge ätecija mäame poto cidi me, yepä teepi umle pa läbitipesi egä maane Moose me Cotre Mene cabu naanajuge. ²⁵ Yepä, lui biname Israela cabu ca lica gemi, lui cina Yeesu ne jäätungusi, cine teeme poto cidi me ituge atrana, piyepu mene teeme bau me itu jäätjepepesi teeme umle me egä: Gone deedei yäärwäjemuye lui cude ge, ingle uuje täápume iiwäräjeji gemi, piyepu gone cibu yäärngäjemuye lui bime mäju cabu uudi yaanajuge, piyepu uudi gone yäänäjuye, cuta piyepu sargi mule gone jaawenimuye. Siige."

²⁶ Yoo, puma cita ca nuuja bimu Paulo pui fooa biname bine ewademige, ten cama Acejiyame ne yiwäräjisi kälyä äbitame. Peei liba siige, Paulo piba Acejiyame me iiwäreja mete gomerage me ädige. Tabu puga mene jejemige lui bimu cabu pui fooa biname bime kälyä wawena padare pagege apira, piyepu jejemige egä tabu pui bimu cabu pagege cibu bine aletna teeme yepäyepä iiwäreja mule bine apirame.

Teepi Paulo ne Joomlisi Iiwäreja Mete cabu

²⁷ Seben bimu ingwe ca teeme kälyä äbita padare te liba mameta ge apira, poto Israela biname lui Asiya Probins cabu ca ge, teepi Paulo ne jepänisi Acejiyame me iiwäreja mete

* **21:8:** pui seben: Pui seben biname bime ngii täápume ire Apostolo 6:1-6.

cabu je. Teepi biname bine giri jicranemisi, siige Paulo ne joomlisi, ²⁸ babo tage ca jicemisi egä, "Israela biname, nitityärineye! Agesa biname lui te iyeta poto ta waatnetnäjuge, biname bine yaabiberäjemuge Israela biname bine äciseräjame, piyepu Moose me cotre bine, cuta piyepu ai iiwäreja mete ne. Cuta piyepu page tabe poto Griik biname bine iiwäreja mete caale bora me sewademige, siige pepu pi niya bii jevenige ai cudege puupu nel!" ²⁹ Yoo, teepi apu jicisi, ingle naace popi teepi yepä Epeso cewe biname ne, ngii Tropimus, Paulo cama jepänisi Yerusalema cewe ngalebora, piyepu teepi apu jengemige egä Paulo teebine ecanige iiwäreja mete caale bora me. ³⁰ Siige, babo cewe iyeta poto ta biname cina buduma äbitinini, yepä gome uuwametrnige iiwäreja mete caale bora me. Teepi Paulo ne joomlisi, piba eländisi pui puupu cabu ca. Piba taatu iiwäreja mete caale grana bine ermemisi, ingle teepi singi lica uudi wawenname pui puupu ne. ³¹ Claabe biname bime tomi cina liga Paulo ne budre me jevenisi, piba cubu biname lui Rooma cewe cabu ca, teeme mope biname te itecijige egä iyeta Yerusalema ngalebora teepi cubu jicenis. ³² Piba taatu peei cubu mope biname te poto cubu modamoda biname piyepu poto cubu biname bine sewademige, wata eclige pui tomi cabu me. Biname cina liba cubu mopeyame jepänisi teeme cubu biname cama, teepi ebmalisi Paulo ne aglime. ³³ Cubu mope biname te piba Paulo bau me ädige, joomlige, mene jejemige teebine ätäyame neeneneni ayana seea ca. Puma cita ca tabe biname bine itemlemige egä, "Laasi nyene ai biname; tabe ngena bii jevenige?" ³⁴ Poto biname yepä mene jicisi; nuuja cina mara mene jicisi. Mene maramara name pi, cubu mopeyame äblicäco cängena umle äbita ngena bii äbitige. Tabe peei name pi teeme biname bine jejemige Paulo ne acaname teeme cubu biname bime kokre mete cabu me. ³⁵ Paulo cama cubu biname cina mete bäbleta ne liba joomlisi, teepi piba teebine cabu ta ecanisi, ingle puga ge poto mage drowäyame biname. ³⁶ Teepi iyeta teebine ingwe icwisi, ala cama jicisi egä, "Egleye teebine budre me!"

Paulo Teeme poto cidi me Mene Jejemige

³⁷ Paulo cama lui cubu biname cina teeme kokre mete me mameta liba äbäcna, Paulo piba mene jejige cubu mopeyame ne egä, "Nää, cane mene naajene?"

Puma cita ca mopeyame te itemlige, "Baa, maane Griik mene umle gäte? ³⁸ Maane piba pui Aikupitoyame lica gäte, lui te ai padare niinäce gaabe je gije itu labacitepi Rooma gabmani cama cubu iicaname. Tabe lui fooa tausen girigale biname bine cubu turikä cama ewademige daapo taatu cewe cabu me."

³⁹ Paulo jejige egä, "Eewe lica, cane Israela biname gäne, aplimlujine Taasu cewe je Kilikiya gawe cabu. Cane ngii biname gäne pui babo cewe Taasu cabu je. Owecu, cane singi gäne mene jajime biname bine."

⁴⁰ Piba cubu mopeyame teebine mene me padare ecärige. Puma cita ca Paulo mete bäbleta cabu jeclajutige, teeme ime ca biname bine bojä jevenemige. Teepi liba bojä jegemige, Paulo teebibine jejemige Israela biname bime Heberu mene ca egä:

22

¹ "Cäme babewale, cäme binamewale, cebine nätecijeye! Cane cämämu ai jicinenine egä cäme mule niya lica gyene." ² Siige, biname cina liba itecijemige tabe Heberu mene ca teebibine jaji, teepi piba toraca bojä äbitinini. Paulo piba jejemige egä,

³ "Cane Israela biname gäne, aplimlujine Taasu cewe je Kilikiya gawe cabu, yepä aima Yerusalema me tädujine abiberäjä tääpume. Cane Gamaliya me abiberäjä bägrä gäne. Tabe cebine cängena nabiberäjuji mime kaakesaare bime cotre cabu, piyepu cane babo singi Acejijame tääpume, weene page liiyepu. ⁴ Cane cuta niya jaawenemune ngälu budre me biname bine, lui cina ai Gaabe cabu waatnininusi. Cane magebi piyepu rooriye bine ewademujine krokeciye mete cabu me. ⁵ Iiwäreja mope biname piyepu iyeta mutre biname teepi ibibi gemi ire arbime egä cäme mene toraca gyene. Cane teeme bau ca peba bine jepänemujine Damaseko je lui Israela biname bime bau me waadename, naace tääpume puma Keriso lui cina jäätrungusi, pui bine oomlemame. Cane piyeme ädujine teebibine oomlajecame, ayana seea cama Yerusalema me awecname mäpu daremu päpäname teeme mara ätrunga tääpume."

Paulo Jejemige Tabu Lipu Äbitige Ätrunga Biname me

⁶ "Yoo, cane liba gaabe cabu ädenujine, Damaseko cewe me mameta atyaramta, piba taatu bimü duusa padare cabu, babo apacyera te dume cabu ca tuungepmaluji cäme gome. ⁷ Cane natramuji gawe me, siige tagepogogo te cebine najuji egä, 'Saulo, Saulo! Maane ngenome cebine mäpu näcäranenite?' ⁸ Cane itemlujine, 'Babo biname, maane laasi näte?' Tabe najuji egä, 'Cane Yeesu Nasareta ceweyame gäne, maane lui ne mäpu näcäranenite.' ⁹ Lui biname cane cama secluji, apacyera te jepänujisi, yepä teepi lica itecijemuji peei tagepogogo lui te mene cebine najanuji. ¹⁰ Puma cita ca cane itemlujine egä, 'Babo Biname,

cane ngena jewenenine?’ Yageyame piba cebine najuji egä, ‘Arpinanti, ädi Damaseko cewe cabu me. Puma yepä biname te meebine iyeta gwidape pa naajepi Acejiyame lui ituge jaji maane te wawename.’ ¹¹ Pui babo apacyera name pi cane äblicäco ge pui padare cabu gwidape päpäna. Cane cama lui biname cina cebine ime ca nacanujisi Damaseko cewe cabu me.

¹² Yoo, puga ge Damaseko cewe je yepä biname, teeme ngii Ananiya. Tabe mime cotre bine cängenarage jaawenemuge. Tabe baborage ge Damaseko cewe Israela biname bime ngenne atwanena cabu. ¹³ Tabe cäme bau me täduji, cäme gome jeclajutuji, najuji egä, ‘Cäme biname Saulo, maane irecu ca jepäni!’ Piba taatu cane miiji ge teebine päpäname. ¹⁴ Tabe najuji egä, ‘Acejiyame lui bau me mime kaakesaare cina irecu läutumutanininsi, meebine ituge jaji teeme singi poto cidi me umle äbitame, teeme Conocäco Kaakesea Biname ne päpäname, piyepu teemerage tagepogogo mene ätecijame. ¹⁵ Maane peei name pi ire arbi biname me pa päbitepi teeme täapume iyeta biname bine jajime, maane ngena itu tepänumete piyepu näätecijumi. ¹⁶ Siige, maane ngena täapume jewagrijenite? Arpinanti, niye ca äciseja ne ecati teeme ngii cabu mäame niya mule äyebingtame, maane liba Yageyame me ngii ne yaawejanute.’”

Acejiyame Paulo ne Jejiige Nuuja Gawe Biname bime bau Otnime

¹⁷ “Yoo, cane Yerusalema me acnenujutjine, egäcäro iiwäreja mete cabu irecu ätumutujine, piba wama pana jepänujine Yageyame ne. ¹⁸ Tabe cebine najuji egä, ‘Wata Yerusalema ne page sebmali, inge naace popi ama biname cina lica pa yaacatepsi mäame aitneja mene cäme poto cidi me.’ ¹⁹ Cane teebine jejujine, ‘Yageyame, teepi umlerage gemi egä cane cime Israela biname bime abasecretna mete cabu ta waatnetnäjune, meebine lui cina näätungusi, teebibine joomläjecmune, yaaglecimune. ²⁰ Piyepu, mäame miiji aitneja biname Setepano ne liba budre me jewenujisi, cane puga ge, “yoo” mene jajime teebine budre me acitame, teeme cubuyame bime cäbletääpe bine cane ire jetwemujine.’ ²¹ Piba Yageyame cebine najuji egä, ‘Äte, ädi, cane meebine cudecewe me pa näätjepene biname bime bau me lui cina Israela biname lica gemi.’”

²² Siige, biname cina Paulo ne jitecijanisi ngälu tabe peei mene jüicige, yepä teepi piba gije abacitinisi ala cama mene me egä, “Iyebingteye! Egleye budre me! Miiji lica tabe ireclota me lenaja!” ²³ Teepi ala abayaninisi, cäbletääpe bine ewewutäjemisi, piyepu secre bine cabu me eyäremisi. ²⁴ Siige, pui cubu moyeyame te piba mene jejemige teeme biname bine Paulo ne acaname cubu biname bime kokre mete cabu me. Tabe teebibine jejemige Paulo ne adnaname teeme bau ca umle päpäname Israela biname cina ngena täapume ala abayaninisi teeme poto cidi me. ²⁵ Yepä, teepi liga teebine jetäyisi adnaname, Paulo puma cita ca jejiige yepä cubu babo biname ne, lui te teeme gome aclajuteji ge egä, “Nää, cotre lica gyene weene Rooma ngii cama biname ne adnaname, teebine liba cäro camuge atrana teeme mule täapume?”

²⁶ Cubu babo biname te liba peei mene itecijige, tabe teeme moyeyame bau me ädige, teebine itemlige egä, “Maane ngena jewenenite? Tabe lui Rooma ngii cama biname gyene!”

²⁷ Puma cita ca pui cubu moyeyame te Paulo bau me ädige, itemlige egä, “Maane naji, nää maane Rooma ngii cama biname gäte?”

Paulo jejiige egä, “Yoo!”

²⁸ Cubu moyeyame te piba jejiige, “Cane babo rarekaake itu ecärujine Rooma ngii cama biname me äbitame.”

Paulo jejiige egä, “Yepä, cane Rooma ngii cama aplimlujine.”

²⁹ Cubu biname lui cina singi Paulo ne mene me wawename, teepi piba taatu teeme bau ca äyebingige. Siige, cubu moyeyame wälu te joomlige liba umle äbitige egä Paulo Rooma ngii cama biname enajenige, piyepu tabe ayana sea ca teebine bii besigrige.

Paulo Jeclajutige Israela Mutre Biname Tomi cabu je

³⁰ Cubu moyeyame te singi toraca umle äbitame ngena niya täapume Israela biname cina Paulo ne jeitnäjisi. Tabe peei name pi nuuja bimubine cubu biname bine jejemige Paulo ne iibirame. Tabe jejemige modamoda iiwäreja biname piyepu iyeta Israela mutre biname abasecretname. Tabe piba Paulo ne ecanige teeme opo gaabe aclajutate.

23

¹ Paulo conocäco ire acitige pui Israela mutre biname bime bau me, teebibine jejemige egä, “Cäme binamewale, cane ngena ca begline egä cäme mule lui conocäco gyene, inge iyeta padare cane cängenarage watnetnäjenune Acejiyame me opo gaabe je ngälu page.”

² Siige, puma cita ca iiwäreja mope biname ngii Ananiya tabe Paulo me mameta lui biname bine jejemige teebine tage ayemeltame. ³ Siige, Paulo teebine jejiige egä, “Meebine Acejiyame pa naayemaltepiti! Maane peema adnatenite cebine cotre ibi atraname, yepä

maane määmämu peei cotre ne jetropangtite, maane mene liba jejite cebine ayemeltame! Maane epu pana gäte hulubulu atreji liiyepu, biname te lui ne yaaganuge jugijugi ne acwabame, yepä pui jugi cerämu pisi nyene sungabe je.”

⁴ Siige, Paulo gome biname cina teebine jejisi, “Maane jicnecite Acejiyame me iiwäreja mope biname ne!”

⁵ Paulo jejemige egä, “Cäme binamewale, cane umle lica ge egä tabe iiwäreja mope biname gyene. Oogäräneji Mene te jüicenige egä, ‘Gone niya mene jüicute määme biname bime mopeyame poto cidi me.’”

⁶ Yoo, Paulo liba ngene ca eglise egä pui mutre biname tomi cabu poto lui Sadukea sigu biname ge, piyepu nuuja poto lui Parisea sigu biname ge, tabe piba babo tage ca jejemige teebibine egä, “Cäme binamewale, cane Pariseayame gäne piyepu Parisea biname bime bägrä gäne. Cebine nacanisi weeme bau me atraname, ingle naace gyene cäme ngene atwanena pisi nyene egä budre biname cina cirege arpinera ireclota täapume!”

⁷ Tabe liba peei mene jüicige, piba Parisea sigu piyepu Sadukea sigu biname cina gije abacitinisi mene abajame. Pui mutre biname cina neeneni sigu äbitinisi. ⁸ Yoo, Sadukea sigu biname cina apu jüicusi egä budre biname lica cirege budre cabu ca arpinera, piyepu teepi jüicusi egä Acejiyame me mename seemo piyepu iyeta poto seemo toraca lica gemi, yepä Parisea sigu biname cina iyeta peei gwidape bine jitrungemisi. ⁹ Teeme guugla te baborage me äbitige, siige poto cotre abiberäja biname lui cina Parisea sigu biname ge, teepi abujängige, kokre cama peei mene ne jisädanemisi egä, “Cine äblicäco nuuja niya päpäna ai biname cabu. Pama toraca gyene egä mename seemo te coo nuuja seemo te mene tejumi teebine.”

¹⁰ Siige, mene äsädena te epu babo me äbitige egä cubu mopeyame wälu äbitige egä biname cina pama Paulo ne piicwapi-cwa jaawenusi. Tabe peei name pi teeme cubu biname bine pui mutre biname bime tomi cabu me jityepemige Paulo ne teeme bau ca asatame, teebine cääri acaname cubu biname bime kokre mete cabu me.

¹¹ Nuuja ciyye Yageyame te Paulo gome jeclajutige, teebine jejige egä, “Wälu gone! Maane cebine lipu ituge aitna Yerusalema je, maane müiji cuta cebine pepu aitname Rooma babo cewe je.”

Israela Biname cina Gläamu jicrajige Paulo ne Aglime

¹² Nuuja krokerage poto Israela biname cina abasecretnige, gläamu jicrajige. Teepi mene yepä gome ecitisi Acejiyame me opo gaabe je egä teepi deedei lica äbita piyepu niyye lica nänäja, ngälu liba Paulo ne pa yaaglepesi. ¹³ Teepi iyeta footi biname cuta cerämu, lui cina icrajige peei gläamu cabu. ¹⁴ Teepi piba eclige modamoda iiwäreja biname piyepu nuuja modamoda biname bime bau me, teebibine jejemisi egä, “Cine mene Acejiyame me opo gaabe jejisi egä cine deedei lica äbita, ngälu cine Paulo ne liba pa yaaglepesi. ¹⁵ Yoo, weene piyepu iyeta lui cina mutre biname tomi cabu, weene mene jityepepeye peei cubu mopeyame bau me tabe Paulo ne ätyepame weeme bau me, epu täapume egä weene singi gemi cängena umle äbitame teeme poto cidi me. Cine pa lamacetrnäjpago teebine gaabegabe aglime budre me.”

¹⁶ Yepä, Paulo me ngango bägrä te ai gläamu mene itecijige. Tabe piba ädige cubu biname bime kokre mete me, Paulo ne pui mene jejige. ¹⁷ Puma cita ca Paulo ala tesoglicige yepä cubu babo biname ne, jejige teebine egä, “Ecani mopeyame bau me ai mamye biname ne. Teeme mene pisi nyene jajime.” ¹⁸ Siige, pui yepä hanred cubu biname bime babo biname te teebine ecanige teeme mopeyame bau me, jejige egä, “Ama lui krokeciyye mete biname ngii Paulo, tabe cebine nätemlige ai mamye biname ne määme bau acaname, ingle teeme mene pisi nyene meebine jajime.”

¹⁹ Siige, cubu mope biname te teebine ime joomlige, ecanige teeme taatu puupu me, piba itemlige egä, “Maane cebine ngena mene täapu mäte singi jajime?”

²⁰ Tabe jejige egä, “Israela modamoda biname cina mene yepä cabu becitisi. Ciyyeciyye teepi meebine näätinärenisi Paulo ne cääri acaname Israela mutre biname tomi cabu me, epu täapume egä teepi singi gemi teeme poto cidi me cerämu cängena umle äbitame. ²¹ Yepä, gone jätteciemute, ingle naace popi footi biname, cerämu poto piti nemi, teepi ämletnäreji icrajenige, Paulo ne jewagrijenisi. Teepi gläamu bii jicrajige deedei lica äbita piyepu niyye lica nänäja, ngälu teepi liba Paulo ne pa yaaglepesi. Teepi amacetrnäjäneji gemi peei ne wawenama, yepä määme mene ne jewagrijenisi.”

²² Siige, cubu mope biname te piba pui mamye biname ne jejige, “Gone nuuja biname ne jaajute maane lui mene bii tiicite cäme bau.” Siige, pui mamye biname ne jityepige.

Paulo ne Jityepige Yuudea Probins Mopeyame Peliki bau me

²³ Puma cita ca cubu mope biname te ala taasoglicige teeme neeneni cubu sigu babo biname bine, teebibine jaajige egä, “Weene jejemepeye neeneni hanred cubu biname bine,

piiyepu sebenti cubu biname bine cooso cama, cuta piiyepu neeneni hanred cubu biname bine kalaku cama, teepi Kesarea cewe me otnime. Amacetrnäjineye, weene nain oklok ciye abyemerame. ²⁴ Cooso bine cuta ewadeniye Paulo me otni täápume, teebine cängena ecaneye Mope Biname Peliki bau me.” ²⁵ Cubu mope biname te piba apu mene yoogärige:

²⁶ “Sebore, Yuudea Probins Mope Biname Peliki!

Cubu mope biname Klaudiyus-Lusiyus, cane mäame bau me yoogärenine.

²⁷ Israela biname cina ai biname ne toomlumesi, piiyepu mameta ge teebine budre me agli. Cane umle täbitumene egä tabe Rooma ngii cama enajenige. Siige cane peei name pi cäme cubu biname cama tädumene, teebine teeme bau ca sewepläcitumene.

²⁸ Yoo, cane singi ge umle äbitame, teepi ngenome tiicetnumesi teebine, cane peei name pi secanumene teeme Israela mutre biname tomi cabu me. ²⁹ Cane puga umle täbitumene egä tabe nuuja niya mule lica itu jaawenepi lui täápume budre me wawename, coo krokeciye mete me acitame. Teepi teebine tiicetnumesi teemerge cotre atropengta poto cidi me. ³⁰ Siige, cane liba umle äbitine egä poto Israela biname cina singi Paulo ne ngatna wawena budre me, cane piba ngena jotwanine teebine wata mäame bau ätjepame. Cane teeme iicetna biname bine jejemine mäame opo gaabe teeme mene iicemame. Siige.”

³¹ Cubu biname cina teeme mopeyame me mene jemenisi. Teepi pui ciye cabu Paulo ne ecanisi cewe ngii Antipatiri me. ³² Nuuja bimu lui cubu biname cina ernge ta waatninusi, teepi äcnärige cubu biname bime kokre mete me. Teepi cooso cama lui cubu biname bine sebmalemisi Paulo ne piyeme acaname. ³³ Teepi teebine ecanisi Kesarea cewe me, puma pui Mopeyame ne peba ecärisi, piba Paulo ne ecitisi teeme ime cabu. ³⁴ Siige, Peei Mopeyame te peba cabu lui mene bine ecnemige, piba Paulo ne itemlige egä, “Maane ngena probins cabu ca gäte?” Tabe liba umle äbitige egä Paulo lui Kilikiya probins cabu ca ge, tabe jejige egä, ³⁵ “Cane mäame mene pa näätacijepene, mäame iicetna biname cina liba pa tatyarepi.” Tabe piba poto cubu biname bine mene jejemige Paulo ne awamutame Mopeyame Heroda me babo mete cabu.

24

Israela Biname cina Paulo ne Jeitnäjisi

¹ Faib bimu ingwe ca iiwäreja mope biname Ananiya atyaramtigit Kesarea cewe je, poto modamoda biname cama piiyepu teeme mene iicema biname, ngii Teretulus. Teepi Mopeyame Peliki me opo gaabe jeclajutemige Paulo ne aitnejame. ² Mopeyame te piba Paulo ne tesoglicige teeme bau otnime, puma cita ca Teretulus te giye abacitige Paulo ne aitnejame egä,

“Babo Biname Peliki, cine poode cama ninajininige leca padare mäame miijirage ire atwi name pi, cuta piiyepu weene poto cotre bine cängena itu yaamacetrnäjemepewe cime gawecewe miiji täápume. ³ Cine singi pepu miiji mule täápume iyeta padare cabu iyeta poto ta, peei name pi baborage eso! ⁴ Yoo, cane singi lica mäame babo padare acata, peei name pi cane näätemenine cime matikolä mene cängena ätecijame. ⁵ Cine umle äbitinago egä ai biname te niya mule jaawenuge ai gawecewe täápume. Tabe Israela biname bine claabe me jaawenemuge iyeta maramara gawe cabu ta. Tabe mopeyame gyene Nasareta sigu biname täápume, ⁶ piiyepu tabe liga tapicetrnärumi iiwäreja mete ne sabe wawename, siige cine piba teebine toomlumesi. Yoo, cine singi ge teebine atraname cimerage cotre lbibi, ⁷ yepä cubu mopeyame Lusiyus piba tädumi, babo drowä cama teebine secatumi cime bau ca. ⁸ Lusiyus puma cita ca mene tiicumä egä aitneja biname cina miiji mäame opo gaabe me otnime. Maane liba ai biname ne yääteläljute, maane teeme bau ca piba umle päbitapi iyeta gwidape poto cidi me, cine lui täápume jeitnäjenisi.” ⁹ Yoo, Teretulus me mene liba siige, pui Israela biname cina piba jejisi egä iyeta pui aitneja mene lui toraca ge.

Paulo Mene Jiicige Peliki me Opo Gaabe je

¹⁰ Probins Mopeyame Peliki puma cita ca Paulo ne ime ca jemenige mene me. Paulo piba jejige egä,

“Babo Biname Peliki, cane umle gäne egä maane ai gawe biname bine jaatranemute bucurage kämäge cama. Cane peei name pi ngenecu miiji gäne cämämu aitname mäame opo gaabe. ¹¹ Maane liba singi, maane lbibi gäte umle äbitame egä twellb bimu ingwe gaabe ca, cane piba itu lädepene Yerusalema me puma iiwäreja mete cabu irecu ätumutame. ¹² Cane liba iiwäreja mete cabu jage, Israela biname cina lica puma itu näpänepesi nuuja biname cama äcela je, piiyepu cuta lica itu näpänepesi biname bine giri acrana cabu Israela biname bime abasecretna mete cabu ta coo cewe nuuja poto ta, ¹³ piiyepu teepi äblicäco gemi teeme pui aitneja mene ne toraca me wawena. ¹⁴ Yoo, page cane mäame bau me cämämu aitnenine. Cane cime kaakesaare bime Acejiyame ne mara mule ca yaawejanune, teepi

lui mule ne yaainusi egä toraca mule lica gyene. Yepä, cane cuta iyeta Oogäräneji Mene jäätrungemune, lui pisi nyene Cotre Mene ngalebora piyepu sasa mename biname bime oogäräneji mene ngalebora. ¹⁵ Cane piyepu iyeta nuuja Parisea biname cine Acejiyame me padare ne jewagrijenisi, lui padare cabu iyeta miiji mule biname piyepu iyeta niya mule biname piba budre cabu ca cirege arpinera. ¹⁶ Cane pui name pi cängenarage nanajuge cämämu conocäco me ngene ca agli biname bime opo gaabe piyepu Acejiyame me opo gaabe je.

¹⁷ Cane nesae kämäge cama Yerusalema ca itu äyebliŋtujine. Cema cane piyeme cääri lädepene poto rarekaake cäme binamewale bime bau me waadename, cuta piyepu Acejiyame ne iiwärejame. ¹⁸ Ai neeneni mule bine liba jaawenepene, teepi cebine näpänepesi iiwäreja mete cabu. Cane niinäce kälyä läbitemene iyeta cudege gwidape cabu ca, ingwe ca piba Acejiyame me mete puupu cabu me labacitemene. Biname tomi lica ge cäme gome, cuta piyepu guugla lica ge piba. ¹⁹ Yepä, puga ge poto Israela biname Asiya probins cabu ca. Teepi teemämu mäame opo gaabe cire saacleji, teeme liba pisi nyene mene cebine aitnejame. ²⁰ Co, age temi lui biname, teepi miiji jücesi teepi ngena conocono ne cäme cabu tepänumesi, cane liba naclajutumi atrana täápume pui mutre biname tomi cabu je. ²¹ Co, pama teeme täápume conocono gyene pui yepä mene babo tage ca lui tiicumene, cane liba teeme opo gaabe naclajutumi. Agesa pui mene: ‘Cebine nacanisi weeme bau atraname, ingle naace gyene cane jitrungenine egä budre biname cirege arpinera ireclota täápume.’”

²² Siige, Peliki lui te cängena umle ge ätrunga gaabe poto cidi me, tabe piba peei atrana padare ne epirige. Tabe pui Israela modamoda biname bine jejemige egä, “Cane ingwe ca atrana pagege weeme poto cidi me, cubu mopeyame Lusiyus te liba pa tatyaramtepi.” ²³ Siige, tabe mene yepä cubu babo biname ne jejige Paulo ne awamutame, yepä Paulo miiji ge asatame abacitame pui mete cabu, piyepu teeme binamewale miiji ge teeme singi gwidape teebine ceerame.

Paulo Jeclajutige Peliki naabi Drusila Teeme Opo Gaabe je

²⁴ Poto bimu ingwe ca Peliki coga cama taaclice. Teeme coga, ngii Drusila, lui Israela magebi gwene. Mopeyame Peliki Paulo ne tesoglicige, teeme mene jiteciige Yeosu Keriso ne ätrunga poto cidi me. ²⁵ Yepä, Paulo liba teebibine mene jaajanige conocäco mule poto cidi me, piyepu tääpe singisingi abmala poto cidi me, cuta piyepu atrana bimu poto cidi me, lui te cirege otni, Peliki wälu te piba joomlice, tabe Paulo ne jejige, “Siige, page ai padare cabu maane cibibine nibmali! Cane liba miiji padare ne pa jääpänepene, cane piba cääri pa naasoglecepene.” ²⁶ Yoo, Peliki apu jengenige egä, “Paulo pama rarekaake cebine näcärenige teeme asata täápume.” Tabe peei name pi poto padare Paulo ne taasoglicuge ten cama mene abaitname.

²⁷ Neeneni kämäge ingwe ca, kirece biname teeme ngii Porokiyo-Peesto, tabe Peliki me puupu jecatige Probins Mope biname täápume. Peliki liba äyebliŋtigitige puma cita ca, tabe Paulo ne sebmaliige puga awamuta biname cama krokeciye mete cabu, ingle naace popi tabe singi Israela biname bine ngenecu miiji me waweneme teeme poto cidi me.

25

Paulo Singi Rooma Babo Mope Biname te Teebine Atraname

¹ Peesto atyaramtigitige peei probins ngalebora, piba nesae bimu ingwe ca ädige Kesarea ca Yerusalema me. ² Puga modamoda iiwäreja biname piyepu Israela mutre biname cina kirece Mopeyame Peesto bau eclige Paulo ne aitnejame. Teepi mene itu titranumesi Paulo ne gaabegabe aglmene, peei name pi teepi Peesto ne itemlisi ³ teeme singi waweneme egä Paulo ne awecnistame Yerusalema me. ⁴ Peesto jejemige egä, “Paulo ne jewamutenisi krokeciye mete bora Kesarea je. Cane mameta gäne acnenuta piyeme. ⁵ Weene miiji ge weeme poto mutre biname cane cama ätyepame Kesarea me puma Paulo ne aitnejame, tabe liba niyaniya mule ituge wawena.”

⁶ Peesto Yerusalema je enajige cerämu eit coo ten bimu cama, piba acnenutigitige Kesarea me. Nuuja bimu tabe adnatigitige atrana puupu cabu, mene jejemige Paulo ne teeme bau acaname. ⁷ Paulo liba puma atyaramtigitige, Yerusalema ca lui Israela biname cina seclumi, teepi teeme gome jeclajutemige, gije abacitinisi mäpu mene iicemame Paulo poto cidi me, yepä teepi äblicäco ge teeme mene awaba egä toraca gyene. ⁸ Siige, Paulo piba teemämu aitränjige egä, “Cane nuuja niya lica ituge wawena Israela biname bime cotre poto cidi me, cuta piyepu nuuja niya ne lica ituge wawena iiwäreja mete täápume, cuta piyepu Rooma Babo Mope Biname täápume.”

⁹ Siige, Peesto singi Israela biname cina ngenecu miiji äbitame teeme poto cidi me, peei name pi Paulo ne itemlige egä, “Nää, maane singi gäte Yerusalema me otni, puma căme opo gaabe meebine atraname ai biname bime aitneja mene poto cidi me?”

¹⁰ Paulo jejige, “Cane page naclajutenige Rooma Babo Mope Biname bime yepä atrana puupu cabu, lui cabu cebine miiji pa natranepewe. Cane nuuja niija lica ituge wawena Israela biname bine. Maane peei umlerage gäte! ¹¹ Cane liba cotre ne jaatropangtune niija mule wawename, cuta pui niija mule cabu ca cane liba ibibi ge budre daremu păpăname, cane piba singi lica uucraname. Yepä, teeme aitna mene toraca lica gyene, peei name pi nuuja biname te lica cebine pa nacitepi teeme ime cabu. Cane singi gäne Rooma Babo Mope Biname te cebine atraname.”

¹² Siige, Peesto teeme atrana ätityera biname cama mene ajanininisi, piba Paulo ne jejige egä, “Maane singi gäte Babo Mope Biname te meebine atraname, yoo siige, maane Babo Mope Biname bau pa ädepi.”

Paulo Jeclajutige Agripa naabi Berenike bime Opo Gaabe

¹³ Poto bimu ingwe ca Israela biname bime mopeyame Agripa piyepu teeme ngule Berenike teepi Kesarea me taaclige peei probins me kirece mopeyame Peesto ne ängrărame.

¹⁴ Teepi nesae bimu icrajige, piba Peesto Paulo poto cidi me mene jejanige Agripa ne egä, “Āma pisi nyene yepä biname Peliki lui ne saabmalepi awamuta biname cama, tabe liba ama cita ca läyeblyngtepi. ¹⁵ Cane liba Yerusalema me itu lädepena, Israela modamoda iiwăreja biname piyepu teeme nuuja modamoda biname cina teebine jaaitnăjepesi, nătemlepesi cane teebine măpu cabu acitame. ¹⁶ Yepä, cane teebibine jaajemepene egä cime Rooma biname bime mule lica gyene, biname ne teeme aitneja biname bime ime cabu papa acitame, yepä niinăce tabe miiji teeme aitneja biname cama opopa ayi piyepu padare păpăna teemămu aitname. ¹⁷ Yoo, teepi liba aima cane ama saaclepi, cane padare ne papa lica yaapirepene, yepä nuuja bimu cabu atrana puupu cabu ladnatepene, mene jaajemepene Paulo ne acaname. ¹⁸ Siige, teeme aitna biname cina piba jaacajutemepi mene me, yepä teepi epu niyarage mule poto cidi me lica jaaitnepesi. cane lipu nangenepi. ¹⁹ Iyeta teeme aitna lui äciserăja mene teemerage iiwăreja mule poto cidi me piyepu yepä biname ngii Yeesu poto cidi me, lui budre ge, yepä Paulo jiičenige egä tabe ireclota gyene. ²⁰ Cane liba umle lica gäne lipu umle mene păpăname peei poto cidi me, cane piba Paulo ne yăătemlepene tabe lipu gyene Yerusalema me otnime puma atraname teebine teeme aitneja poto cidi me. ²¹ Yepä, Paulo singi lica ge. Tabe cebine nătemlepi awamuta tăăpume cuta Rooma Babo Mope Biname te teebine atraname. Siige, cane peei name pi mene jaajemepene teebine awamutame ngălu gaabe ne liba păpăna teebine Babo Mope Biname bau me ätyepame.”

²² Siige, Agripa te Peesto ne jejige egä, “Cane singi gäne ätecijame ai biname me mene.”

Peesto jejige egä, “Yoo, ciyeciye maane pa năătecijepi.”

²³ Nuuja bimu Agripa naabi Berenike mage awamla cama aaclige, babo abasecretna puupu me abacităsi; cubu modamoda biname piyepu cewe modamoda biname ten cama ge. Peesto piba mene ecăremige Paulo ne äsinglentame. ²⁴ Peesto jejemige egä, “Israela biname bime mopeyame Agripa piyepu iyeta lui cina cine cama tabasecretnininiye, weene ai biname ne jepăneye. Āma iyeta Israela biname cuta piyepu Yerusalema je iyeta Israela biname, teepi aitna mene căme bau itu saawademepesi ai biname poto cidi me. Teepi cuta ala cama mene jiičanemepesi teebine budre me wawename. ²⁵ Yepä, cane jăăpănepene egä tabe nuuja niija mule lica ituge wawena lui tăăpume teebine budre me agli. Siige, tabe cebine nătemlepi Rooma Babo Mope Biname bau otnime, peei ingle pi cane ngene jotwanine piyeme ätyepame. ²⁶ Yepä, căme nuuja căngenarage mene lica gyene teeme poto cidi me Rooma Babo Mope Biname bau me oogărame. Cane peei name pi teebine secanenine weeme bau me, piyepu toraca măăme bau me, Agripa, teeme mene ätecijame, pipu pi mene pisi nyene ingwe ca oogărame, ²⁷ ingle naace gyene cane äblicăco biname ne papa ätyepa, liba peba mene lica ge teeme aitna poto cidi me.”

26

Paulo Teemămu Aitnige Agripa bau me

¹ Agripa te Paulo ne mene jejige egä, “Yoo, maane miiji măăme poto cidi me mene iicana.” Paulo piba ime uutige, gije abacitige teemămu aitnejame egä:

² “Agripa Mopeyame, page babo miijirage gyene căme tăăpume egä cane măăme opo gaabe je naclajutenige căme ngii căngena wawename Israela biname bime aitneja poto cidi me, ³ ingle naace popi maane babo umle gäte Israela biname bime mule piyepu teeme äciserăja mene poto cidi me. Peei name pi cane meebine năătemlenine căme mene căngenarage ätecijame.

⁴ Iyeta Israela biname umle gemi căme ireclota lipu ge matikolä bägrä cabu ca. Teepi umle gemi cane lipu nanajuji niinäce căme gawecewe cabu cuta piyepu ingwe ca Yerusalema je. ⁵ Teepi sasa cabu ca umle gemi cane, siige teepi liba singi gemi, teepi miiji gemi aitname egä cane lipu niinäce cabu ca yepä sigu cabu nanajuji, lui Parisea sigu biname cina Acejiyame ne yaawejanusu mäpu cotre mule ca. ⁶ Yoo, page cane naclajutenige atrana täápume, ingle cane ngena atwana ne ecitenine peei mene cabu Acejiyame cime kaakesaare bine lui mene itu jejemuji. ⁷ Yoo, cime biname lui iyeta twelb ingle cabu ca gemi, teepi liba Acejiyame ne ciye bimu yaawejanusu, teepi cuta jaawagriusii peei jajeji mule ne päpäname. Yoo, Mopeyame, căme peei ngena atwana name pi Israela biname cina cebine naitnenisi. ⁸ Nää, weene ngena name pi äblicäco gemi ätrunga egä Acejiyame te biname bine budre cabu ca cire yaarpinäremepi?

⁹ Yoo, cane cuta piyepu apu nanguji egä cane miiji iyeta gwidape wawena Yeesu Nasareta ceweyame me ngii ne äyeblyngtame. ¹⁰ Cane pepu jewananjine Yerusalema je. Cane mene ecanujine modamoda iiwäreja biname bime bau ca, bucurage Acejiyame me biname bine icranemujine krokeciye mete cabu me. Ingwe ca biname liba singi ge teebibine budre me acraname, cane cuta singi ge teepi budre me. ¹¹ Bucurage padare cane teebibine mäpu cabu yaacranune iyeta Israela biname bime abasecretna mete cabu ta. Cane pepu pi singi teebibine giri acraname teeme mara ätrunga mule ne abmalame. Yoo, cane epu mage claabe teeme täápume egä cane nuuja gawe biname bime cewe cabu ta otunjine teebibine mäpu cabu acraname.”

Paulo Jejemige Tabu Lipu Ätrungayame me Äbituji

¹² “Cane peei name pi Damaseko me ädujine modamoda iiwäreja biname bime peba mene cama. ¹³ Yoo, Mopeyame, bimu duusa gaabe cabu jage, cane apacyera ne jepänujine lui baborage ge bimu cabu ca, dume cabu tuungepmaluji căme gome piyepu teeme gome lui cina cane cama secluji. ¹⁴ Cine iyeta gawe me nitramitnimuji. Cane tagepogogo nätecijui, Heberu mene ca lui najuji egä, ‘Saulo, Saulo! Maane ngenome cebine mäpu näcäranenite? Maane määmämu niija cabu äbitenite peei mule cabu ca, ingle maane toraca gaabe ne jigyenite, nuuja gaabe cabu otnenite.’ ¹⁵ Cane puma cita ca itemlujine egä, ‘Babo Biname, maane laasi näte?’ Yageyame te najuji egä, ‘Cane Yeesu säne, maane lui ne mäpu näcäranenite. ¹⁶ Maane abujängti, ernge ca naaclajutege. Cane määme bau baboclomtine meebine jajime căme kaakesa biname me äbitame. Maane biname bine cire jejanemepi, maane ngena page bii jepänite căme poto cidi me, piyepu ciige cane ngena cire nawabepene. ¹⁷ Cane määme Israela biname bime ime cabu ca meebine cire naasatepene, piyepu nuuja gawe biname bime ime cabu ca, cane lui biname bime bau me cire näätyepene. ¹⁸ Maane teeme irecu cire jiiñnemepi, teebibine etatrongäremepi krokeciye cabu ca apacyera cabu me, cuta piyepu etatrongäremepi Satani me kokre cabu ca Acejiyame bau me. Pipu pi teeme căme bau ätrunga name pi, teepi teeme niija mule cabu ca cire läsecräripesi, teepi puupu ne piba cire jääpänepesi Acejiyame me miiji biname cama.’”

Paulo Teebibine Cuta Jejemige Teeme Kaakesa poto cidi me

¹⁹ “Yoo, Agripa Mopeyame, cane lica iwwärujine ätecijame căme Babo Biname cabucewe ca lui mene seboclomtuji. ²⁰ Yepä, cane mene jiiçemune niinäce Damaseko je, puma cita ca Yerusalema je, puma cita ca iyeta Israela biname bime gawe cabu ta, piba cuta piyepu nuuja gawe biname bime bau me. Cane apu jiiçemune egä, ‘Weeme niija mule ebmalepeye, Acejiyame bau me atatrongäripeye. Piba miiji mule jewenemepeye awabudnitame egä weene niija mule bine ituge abmala.’ ²¹ Peei mene pi Israela biname cina cebine itu noomlepesi, cane liba iiwäreja mete cabu jage, siige läbitipesi cebine aglime. ²² Yepä, iyeta padare ngälu page ai bimu Acejiyame cebine nätiyärüge. Pipu pi cane page naclajutenige toraca mene iyeta biname bine jajanename, matimati biname cuta piyepu modamoda biname. Piiyepu cane nuuja mene lica jijenininine, yepä pui mene taatu Moose piyepu mename biname cina lui poto cidi me jiiçemujiisi egä toraca me cirege äbita. ²³ Peei mene apu egä, ‘Israela biname bime niija cabu ca äsecrera biname te miiji mäpu päpäna, budre äbita, siige niinäce me cirege äbita budre cabu ca arpinenite, mene iicemame piyepu ireclota gaabe pepu apacyerame Israela biname bime täápume piyepu nuuja gawe biname bime täápume.’”

²⁴ Siige, Paulo liba pepu teemämu aitäjige, Probins Mopeyame Peesto babo tage ca jejige, “Paulo, maane buduma gäte; määme oräre abiberäja te buduma me naawenige!”

²⁵ Paulo jejige egä, “Mopeyame, cane buduma lica gäne. Cane toraca mene miiji ngena atwana cama jiiçemenine. ²⁶ Yoo, Agripa Mopeyame, cane wälu lica gäne ai mene meebine jajime, ingle maane umle gäte ai mule poto cidi me, ingle naace gyene ai mule ämlitäneji lica gyene, yepä biname bime sobe cabu wawenäneji ge. ²⁷ Agripa Mopeyame, nää maane

Acejiyame me sasa mename biname bime mene jitrungenemite? Cane umle gäne, maane peei ne jewenenite!”

²⁸ Siige, Agripa Paulo ne jejige, “Nää, maane apu naangenenige egä ai matikolä padare cabu cebine Yeesu Keriso me biname me nawenenite?”

²⁹ Paulo jejige egä, “Ngänu gyene liba matikolä padare coo leca padare, cane Acejiyame ne ewejanenine egä maane piyepu weene iyeta lui cina page cebine nätecjeniyi, weene căme pana ätrunga-yame me äbitame, yepä cane singi lica weeme täápume ai ayana seea!”

³⁰ Mene liba siige, Mopeyame Peesto, Mopeyame Agripa, Berenike, piyepu iyeta cina abujängige. ³¹ Teepi liba abyemäriige, teemeteme ajananinisi egä, “Ai biname nuuja niya lica ituge wawena lui daremu me teebine miiji budre me acita coo krokeciye mete me äsinglenta.” ³² Puma cita ca Agripa te Peesto ne jejige egä, “Ai biname cire lasateji, yepä tabe Rooma Babo Mope Biname bau me otnime meebine itu näätlempli.”

27

Paulo Poo Gaabe Ädige Rooma me

¹ Teepi mene liba jitransisi egä cine Rooma cewe Italiya gawe me poo gaabe pa naclepi, piba Paulo piyepu potu nuuja krokeciye mete biname bine yepä biname, ngii Juliyo, me ime cabu icranemisi. Yoo, Juliyo lui cubu babo biname ge yepä hanred cubu biname teeme sigu täápume, peei sigu lui ne yaainusi ‘Rooma Babo Mope Biname me Sigu’ ca. ² Siige, cine Kesarea cewe cabu ca babo poo cabu me acetnärinago, lui poo ne Adramutiya cewe cabu ca emegisi otnime potu malu cewe me Asiya probins ngalebora. Siige, cine abyemärinago. Yoo, cine cama puga ge poo cabu yepä Makedoniya gawe biname Tesalonika cewe cabu ca, teeme ngii Aristakus. ³ Siige, nuuja bimu cine Sidona cewe je atyarinago. Cubu babo biname Juliyo owecu ge Paulo täápume, teebine jejige egä tabe otnime teeme binamewale ädärame gaabegabe deedei waadename teeme bau ca. ⁴ Siige, cine puma cita ca malurage naclige, piba Kupro curä uuwa cabu naclige, inge opopo buuwe te kokrerage tipwäjige. ⁵ Cine Kupro ca malu ne yuurisi Kilikiya piyepu Pampuliya gawe mameta me, siige Muura cewe me atyarinago lui Lukiya gawe cabu je. ⁶ Puga cubu babo biname Juliyo nuuja poo ne jepänige Aleksandriya cewe cabu ca, lui poo te äbitenige Italiya me otnime. Puma cita ca tabe peei cabu cibibine nicetneräjininige.

⁷ Cine däägu naclige potu bimu cama, mage mäpu padare ne jepänisi ngälu matikolä cewe Niido mameta me atyarinago. Peei opopo buuwe te cime gaabe ne jübigi piyeme otnime, peei name pi cine Krete curä uuwa cabu ta naclige, Salamone Mubä ne sisuplingtisi. ⁸ Cine doru ligi ta naclige, cuta cääri mage mäpu padare ne jepänisi, ngälu cewe me atyarinago lui ne yaainusi ‘Miijirage Poo Lenaja Puupu’, lui cudecewe lica ge Lasea cewe ca.

⁹ Cine puga babo padare ninajininige, ngälu babo buuwe me padare te tataramtige. Yoo, pui bimu ituge otni lui cabu Israela biname cina ngene jaapecnusi teeme niyaniya cabu ca äsecrera potu cidi me. Pui bimu kaake potu ca biname cina äblicäco poo gaabe otni buuwe name pi. Yoo, peei name pi Paulo teebibine umle mene jejemige egä, ¹⁰ “Biname, cane umle bäbitine egä mine mage wälu cama pagege otni ama cita ca. Babo niya te pa tädepi mime poo piyepu gwidape täápume, cuta piyepu mime ireclota täápume.” ¹¹ Yepä, cubu babo biname Juliyo poo waapo biname piyepu poo yageyame bime mene jäättrungige, lica Paulo me mene ne. ¹² Pui poo lenaja puupu toraca miiji lica ge buuwe padare cabu puma lenajame, peei name pi bucurage pui poo biname cina singi poo ne malu ta acaname Poenika cewe ne oomlaname, buuwe liba ibibi gyene. Yoo, puga ge Poenika cewe cabu babo miijirage lenaja puupu poo täápume Krete curä cabu, inge naace gyene kokre ciye buuwe piyepu baarge buuwe cina peei puupu ne lica joomlusi. Siige, teepi puma ibibi gemi awagriyame buuwe me apira padare ne.

Malu cabu Kokre Buuwe te Tipwäjige

¹³ Lädrrage buuwe te liba gije abacitige äpwäjame uule potu ca, biname cina apu jengene-mige egä, “Ibibi gyene cime otni täápume.” Teepi peei name pi cangka ne tesweclisi, Krete curä wajwa ta eclige. ¹⁴ Matikolä padare ingwe ca, babo kokre buuwe te, lui ne yaainusi ‘Baarge Buuwe’ ca, tädige curä potu ca. ¹⁵ Pui kokrerage buuwe te poo ne liba toomlige, cine äblicäco buuwe ne äträja. Cine gloose te niglinige, siige ire ta jeitisi poo ne, buuwe te liba secwenistige. ¹⁶ Cine matikolä uuwa ne jepänisi, liba sisuplingtige uule potu ca yepä matikolä curä ne, ngii Kauda. Puga peei uuwa cabu cine baborage poo me tatakau ne cängena joomlusi, yepä mäpu ge peei wawename. ¹⁷ Teepi tatakau ne setecwantisi babo poo cabu me, piba poo ne jetäyisi seea ca kokre wawename, inge uli ca wawenäneji ge peei poo. Teepi wälu äbitinisi egä poo te pama yäätynecnuge koriyo doru cabu Libiya malu je. Teepi peei name pi äwä bine iyinetnemisi gawe me, poo ne ire ta jecitisi eewaname. ¹⁸ Kokrerage buuwe te tipwäjanie, siige nuuja bimu teepi gije abacitinisi acenetna gwidape bine niye

cabu me iisabejame, ¹⁹ cuta nuuja bimu teeme ime ca yiisabäjemisi poorage me gwidape bine. ²⁰ Bucurage bimu cama cine äblicäco bimu piiyepu wale päpäna, piiyepu buuwe te cääri tipwäjaniġe kokre cama. Siġge, cine iyeta apu ninginige eġä cine budre memi.

²¹ Biname cina liba leca padare icrajenige deedei cäco, piba Paulo teeme opo gaabe jeclajutige, jejemige eġä, “Binamewale, weene cebine cire nätecijejiye, piiyepu Krete ca lica cire naacleji. Piba mime gwidape cina lica sabe läbitinejsi. ²² Yepä, page cane weebibine jijenininine, wälu gone! Weeme nuuja me ireclota te lica sabe äbitinige, yepä poo taatu te niija äbitenige. ²³ Cane peei umle gäne, inge birice ciye cabu Acejiyame lui cäme yageyame, cane lui ne yaawejanune, teeme mename seemo te cäme bau tädumi, ²⁴ cebine najumi eġä, ‘Paulo, wälu gone! Maane miiji Rooma Babo Mope Biname me opo gaabe je aclajuta, cuta piiyepu iyeta lui cina maane cama eclenige, Acejiyame te owecu name pi teeme ireclota meebine näcärenige.’ ²⁵ Yoo, binamewale, weene peei name pi wälu gone, yepä ngenecu kokre äbitipeye! Cane ätrunga ne ecitenine Acejiyame cabu me eġä peei te pa läbitepi, tabe lipu cebine itu najumi. ²⁶ Yepä, buuwe te mibibine pa niwadipi yepä curä cabu me.” Siġge.

²⁷ Teetin ciye kaake poto ca, pui babo buuwe te cibibine cääri niwadininige Med- itarenija Malu cabu. Liba ciye duusa mameta ge, poo cabu kaakesea biname cina apu jengenemige eġä, “Cine doru mameta me naclenige.” ²⁸ Teepe peei name pi mäpu gwidape ne seea ca jemlemaltisi, niye bora me englecantisi, piba jepänisi niye lui yepä hanred twenti ngälu uugle ge. Matikolä padare ingwe ca teepi cääri tesweclisi, cabu me secenutisi, jepänisi niye lui nainti ngälu uugle ge. ²⁹ Teepe wälu äbitininisi eġä poo te latecwamtuge kula cabu, peei name pi teepi poo waapo cabu ca fooa cangka bine niye ngalebora me iynetnemisi, siġge teepi irecu ätumutininisi awala tääpume. ³⁰ Yoo, poo cabu lui kaakesea biname cina singi uucratname babo poo cabu ca. Teepe tatakua ne iynisi niye cabu me seea ca, piba sinäme jebenisi eġä teepi singi poto cangka bine äinetname cuta poo me niinäce gaabe ca. ³¹ Yepä, Paulo jejemige cubu babo biname Juliyo piiyepu teeme cubu biname bine eġä, “Poo cabu kaakesea biname cina liba poo cabu lica yaacrajuge, weene äblicäco doru ne oomlana ireclota cama.” ³² Cubu biname cina peei name pi tatakua oomlana seea bine jeclanemisi, siġge tatakua ne ire ta jecitisi eewaname.

³³ Bimu äpula mameta liba, Paulo giri jicranemige teebibine deedei äbitame. Tabe jejemige eġä, “Weene page footin bimu wälu cama inajininige, piiyepu iyeta pui padare weene deedei cäco inajipi. ³⁴ Page cane weebibine jijenininine deedei äbitame. Weene deedei äbitineye ireclota cama lenajame. Yoo, weeme nuuja te niija lica jepänenige, weeme yepä edingäli te lica apesarenige.” ³⁵ Teeme mene ingwe ca, Paulo buluduu ne ecatige, Acejiyame ne eso ecäriġe iyeta biname bime opo gaabe, peei deedei piba itremaltige, erwige. ³⁶ Peema cita ca iyeta biname cina ngenecu kokre äbitininisi, piba deedei erwäjisi. ³⁷ Yoo, cine iyeta lui neenenen hanred sebbenti siks biname ge pui babo poo cabu. ³⁸ Iyeta biname liba erwäjisi ibibi ge, teepi piba wiiti kuu bine malu me yiisabemisi poo ne plowa wawenname.

Babo Uule te Poo ne Iplegicige

³⁹ Bimu liba tädige, poo cabu kaakesea biname cina peei doru ne lica opo ewatnisi, yepä teepi miiji poo lenaja puupu ne jepänisi, niye te luma labacituge cube cabu me, cuta piiyepu koriyo puga ge. Teepe mene jitranisi poo ne acaname koriyo cabu me, liba ibibi ge peei ne wawenname. ⁴⁰ Teepe peei name pi cangka seea bine jeclanemisi, cangka bine ebmalemisi niye bora je. Pui yepä padare cabu nuuja cina pui seea bine jiiitnemisi lui cina waapo joomlisi. Teepe piba niinäce gaabe äwä ne jecitisi, inge naace popi buuwe te poo ne niinäce gaabe me ecanige, siġge cine doru me abyemärinago. ⁴¹ Yepä, poo te koriyo doru cabu me atecwamtige, ityecnige. Siġge, poo niinäce gaabe te koriyo cabu lipu batecwamtige, teepi äblicäco poo ne älädna. Poo waapo ne kokre uule kuu cina luma jidnanisi, iyeta iplegicisi poo ne, siġge.

⁴² Yoo, cubu biname cina mene jitranisi iyeta krokeciye mete biname bine aglecame, inge naace popi teepi singi lica teepi atwangetna doru oomlaname, puma cita ca uucratname. ⁴³ Yepä, cubu babo biname Juliyo tabe singi lica ge Paulo ne budre me aglime. Tabe peei name pi teebibine jiiibemige peei ne wawenname. Tabe mene jiiicemige eġä, “Laatibi atwangetna umle gemi, weene niinäce uupletnärineye doru me atwangetname. ⁴⁴ Iyeta nuuja weene teebibine ingwe icwemeye. Weene ime icranemeye uli cabu, coo poto poo cabu ca agabeceji uli bine joomläjecmeyer!” Yoo, cine iyeta pepu naclige, siġge doru ne cängena joomlisi.

¹ Cine liba cängenarage doro me atyarinago, cine umle äbitinago egä curä ngii lui Malta ge. ² Pui curä biname cina cibibine biname me niweninisi. Teepi muye ne yuungisi, piba cibibine pui gome me ala nisoglicinisi, inge ngupe te gije tabacitige atramame piyepu gäbu ge. ³ Paulo uli pargi bine ime cabu ewademige, siige muye cabu liba icranemige, niya cobyame te piba tasatige nuunu name pi. Siige, cobyame te Paulo me ime ne bii jetäyige. ⁴ Curä biname cina liba cobyame ne jepänisi Paulo me ime cabu je, teepi teemeteme ajananinisi egä, “Ai biname pama niyarage agliagli biname gyene, siige Daremu te singi lica tabe ireclota cama lenajame. Ngänu gyene tabe malu ca uucrana, budre pa jääpänege.” ⁵ Yepä, Paulo cobyame ne ijarige, muye cabu eceratige. Tabe pita ne lica jesicnantige. ⁶ Curä biname cina liga teebine ire jetwisi teeme ime ädrime coo tabe budre tama atramame, teepi liga lecaleca padare ire jetwanisi, nuuja gwidape ne lica jepänisi teeme bau äpletnutame. Teepi piba ngenecu atatröngäjininisi, jicisi egä, “Tabe pama uuje biname gyene.” ⁷ Puga ge yepä biname me calwacupi gawe, lui cudecewe lica ge pui muye puupu cabu ca. Pui gawe yageyame, ngii Publiyo, tabe cuta peei curä biname bime moyeyame ge. Tabe cibibine niwacletnäjininige, cängena niwadininige teeme cewe cabu me. Cine ten cama ninajininige nesae bimu cama. ⁸ Yoo, Publiyo me babe ute puupu cabu jage. Tabe pita cama enajige, gebale piyepu eci cama ge. Paulo abacitige teeme ute puupu cabu me, Acejiyame ne ewejanige, ime piba aacitige teeme papa cabu, siige teebine miiji me jewenige. ⁹ Peei te liba äbitige, iyeta pita biname pui curä cabu piba totninisi, siige Paulo teebibine miiji jewenemige. ¹⁰ Teepi nicärininisi bucurage owecu gwidape, cuta piyepu ingwe ca cine liba abyemärinago, teepi ecetnäremisi nuuja poo cabu cine lui gwidape gaabegabe tääpume singi ge.

Cine Malta Curä ca Naclige Rooma me

¹¹ Nesae mabye ingwe ca, cine nuuja babo poo gaabe abyemärinago. Peei poo cuta Aleksandriya cewe cabu ca ge, lui te kokre buuwe padare ne jewagriige Malta curä cabu. Poo me ngii lui ‘Uuje Päädepäde’ ge. ¹² Cine malu cabu naclige, Surakusa cewe me atyarinago, puga ninajininige nesae bimu cama. ¹³ Puma cita ca cine cääri naclige, siige Regiyo cewe me atyarinago. Nuuja bimu uule buuwe te gije tabacitige äpwäjame, siige neeneni bimu ingwe ca cine atyarinago Puteoli matikolä cewe me. ¹⁴ Puga cine potu Yeesu ne ätrunga biname bine edäremisi. Teepi cibibine niwadininisi ten cama lenajame seben bimu cama. Cine piba doro ta abyemärinago Rooma cewe me otnime. ¹⁵ Rooma ätrunga biname cina liba itecijemige cime potu cidi me, cine cama opopa ayime seclige neeneni cewe mameta me, cewe ngii Aapi Aletna Puupu piyepu Nesae Ute Mete. Paulo liba pui ätrunga biname bine jepänemige, Acejiyame ne eso ecäriige binamewale tääpume, siige ngenecu kokre me äbitige.

Babo Cewe Rooma je

¹⁶ Cine liba atyarinago Rooma cewe me, Rooma krokeciye mete ire atwi biname te jicige egä Paulo miiji ge mara mete cabu lenajame, yepä cubu biname te teebine awamutame.

¹⁷ Rooma cewe cabu lui Israela modamoda biname cina icrajige, nesae bimu ingwe gaabe ca Paulo teebibine ala tesoglecemige teeme bau abasecretname. Teepi liba abasecretige, tabe jejemige teebibine egä, “Cäme binamewale, cane nuuja niya ne lica ituge wawena mime biname tääpume, piyepu nuuja niya ne lica mime babewale bime mule potu cidi me, yepä teepi cebine noomlujisi, krokeciye mete cabu nacituji Yerusalema je, piba Rooma biname bime ime cabu nacituji. ¹⁸ Pui liba cebine nätemlepesi cäme ireclota potu cidi me, teepi singi cebine asatame, inge peei ne jääpänepesi egä cane lica ituge nuuja niya ne wawena lui tääpume cebine budre me wawename. ¹⁹ Yepä, potu Israela biname cina singi lica ge cane papa asatame. Cane peei name pi mene jaajemepene egä cane singi ge Rooma Babo Mope Biname bau otnime tabe te cebine atraname. Yepä, cäme nuuja aitna mene lica gyene cäme Israela binamewale potu cidi me. ²⁰ Cane peei name pi weebibine ala bii tisoglicinine weebibine päpäname piyepu weene cama mene me. Yoo, ai ayana seea pisi nyene cäme ime cabu pui biname name pi Israela biname cina lui ne jewagrijenisi mibibine niya cabu ca äsecerame.”

²¹ Siige, Israela biname cina teebine jejisi egä, “Cine nuuja peba ne Yuudea cabu ca lica ituge päpäna mäame potu cidi me, piyepu cime nuuja biname lica itu tädepi puma cita ca idre mene cama coo aitna mene cama mäame potu cidi me. ²² Yepä, cine singi gemi mäame ngene atwana potu cidi me umle äbitame, inge naace popi iyeta potu ta biname cina jääcelusi mäame peei sigu ne.”

²³ Siige, teepi bimu ne ecitisi Paulo cama, piyepu pui bimu liba joomlige, piba bucurage biname cina seclige Paulo luma enajige. Krokerage ca ngälu ciye tabe mene cängena jejananemige, teebibine ebiberäjemige mene Acejiyame te lipu biname bine yaawademuge. Tabe singi teebibine ätrunga abiberäjame Yeesu potu cidi me, peei name pi mene

jewabemige Moose me Cotre mene piyepu sasa mename biname bime oogäräneji mene cabu ca. ²⁴ Poto biname cina singi teeme mene acatame, yepä nuuja poto cina singi lica ätrungame. ²⁵ Teepi äblicäco yepä ngene atwana oomlana, siige gije abacitinisi Paulo ne abmalame, yepä niinäce gaabe teeme otni, Paulo cuta yepä mene jejemige egä, “Toraca gyene Aceji Seemo me mene weene kaakesaare bime bau me, mename biname Isaya me tagepogogo cabu ca, ²⁶ tabe lui jicuji egä:

‘Äte, ädi, ai biname bine jejemepi:

Weene itecijinuge cuta itecijinuge, yepä lica umle läbitininuye.

Weene ire lacitaninuye piyepu ire lacitaninuye, yepä weene lica jääpänuye.

²⁷ Ingle naace gyene ai biname bime ngene atwanena krokeciye gemi;

teepi tablame buduma gemi;

teepi irecu ätumuteji gemi.

Teepi apu liga lica cire läbitininejisi,

teepi piba irecu ca jääpänemusi,

tablame ca yäätəcijanemuge,

piyepu ngene atwanena ca opo yaawatnusi,

siige căme bau me tatatrongärininusi,

siige cane Acejiyame te teebibine miiji me jaawenemune.’ ”

²⁸ Siige, Paulo piba jejemige egä, “Page weene miiji gemi umle äbitame egä Acejiyame me Miiji Mene biname bine niija mule cabu ca äsecrera poto cidi me, peei ne ituge ätyepa gawe maramara biname bime bau me, piyepu teepi singi gemi ätecijame.”

²⁹ Paulo peei mene jejemige, piba Israela biname cina teebine sebmalisi, yepä gaabe cabu ta teemeteme jicelisi.

³⁰ Yoo, neeneni kāmäge ngalebora Paulo puga Rooma cewe cabu je enajige, rarekaake yäacäremuge teeme lenaja mete täapume. Tabe iyeta biname bine jaawablemuge lui cina teeme bau me saacluge. ³¹ Tabe mene jaajanemuge Acejiyame te lipu biname bine yaawademuge; tabe cuta piyepu biname bine yaabiberäjemuge Yageyame Yeesu Keriso poto cidi me. Tabe wälu cäco mene jaajanemuge iyeta biname bine. Nuuja te lica teebine jübige.

Siige, ai peba me mene ngälu agha.

PAULO ME LETA ROOMA ÄTRUNGA BINAME BIME BAU ME

¹ Cane Paulo, Yeesu Keriso me kaakesea bägrä gäne. Acejiyame cebine najuji teeme ätyepäneji biname me äbitame piyepu mara me nawenuji teeme Miiji Mene biname bine jajanename.

² Peei Miiji Mene tabe teeme sasa mename biname bine ituge jajanena teepi Oogäräneji Mene cabu oogärame egä cirege äbita. ³ Peei Miiji Mene lui Acejiyame me Bägrä mime Yageyame Yeesu Keriso poto cidi me. Tabe lui ai gawecewe cabu je biname me äbituji, Daawida me inge cabu liba aplimluji, ⁴ tabe cuta Acejiyame bau ca gyene. Tabe budre cabu ca liba arpinantuji, pui kokre ca biname bine jewabemuji egä tabe Acejiyame me conocäco Bägrä gyene. ⁵ Cane teeme miiji ne jepänujine, tabe liba cebine teeme ätyepäneji biname me nawenuji naace täapume cane iyeta maramara gawe biname bine gaabe awabejame teepi Yeesu Keriso me ngü poto cidi me mene ätecijame teebine ätrungame. ⁶ Weene cuta poto peei biname gemi, lui bine Acejiyame te itu tisoglicipi Yeesu Keriso me biname me äbitame.

⁷ Yoo, căme mene ageta iyeta weeme täapume lui cina babo cewe Rooma je ätrunga cama inajininige, inge Acejiyame baborage singi weeme täapume, weebibine ituge asogleca teeme biname me äbitame.

Acejiyame mime Babe piyepu mime Yageyame Yeesu Keriso, cane teebibine aawejanene teemi miiji te lenajame weeme cabu piyepu poode weebibine ceerame.

Paulo Eso Mene Jüicge

⁸ Yoo, niinäce cane căme Acejiyame ne eso ecärine Yeesu Keriso cabu ca iyeta weeme täapume, inge naace gyene iyeta ai gawecewe cabu biname cina itecijenemige weeme ätrunga poto cidi me. ⁹ Cane Acejiyame me kaakesea iyeta căme ngenecu cama jaawenemune, liba teeme Miiji Mene jaajanemune Yeesu Keriso poto cidi me. Teeme opo gaabe ai mene jüicenine egä cane Acejiyame ne ewejanenine weeme täapume, ¹⁰ iyeta padare cane liba teeme bau irecu lätumutune. Cane teebine ewejanenine egä cane gaabe päpäna ai padare cabu weeme bau otnime, tabe liba singi gyene. ¹¹ Yoo, cane baborage singi gäne weebibine päpäname kokre ceerame weeme seemo ireclota täapume. ¹² Cane ai jüjanininine, inge cane singi gäne weeme ätrunga ne kokre me waweneme cuta piyepu kokre päpäname weeme bau ca căme ätrunga täapume.

¹³ Căme ätrunga binamewale, cane singi gäne weene umle äbitame egä bucurage padare cane ngene ituge atwanena weebibine ädärame, yepä cane äbücäco ge otni ngälu page. Cane singi gäne weebibine ätityera ceerame piyepu peei ätityera cabu ca weeme miiji ätrunga mule ne päpäname, cane lipu nuuja gawecewe biname bine pepu pana ätityera ituge ceera. ¹⁴ Cane ngenecu ca asincantine egä căme kaakesea gyene iyeta biname bine toraca gaabe awabame, iyeta lui cina Griik biname bime mene piyepu mule umle gemi, cuta lui cina teeme nuuja glunubora mene taatu jüicemusi; biname lui cina umleumle cama gemi, piyepu biname lui cina umle căco gemi. ¹⁵ Yoo, cane peei name pi singi gäne Miiji Mene cuta weebibine jajanename, weene lui cina babo cewe Rooma je inajininige.

Miiji Mene Lui Kokre Gyene

¹⁶ Cane ngene jotwananine egä Miiji Mene lui babo kokre cama gyene, inge Acejiyame bau ca gyene peei mene. Peei cabu kokre pisi nyene biname bine ngenecu atatrongärame teeme niija mule cabu ca äsecrera gaabe ceerame, iyeta lui cina peei Miiji Mene jäätrungusi. Peei mene niinäce Israela biname bime bau jajeji ge, puma cita ca cuta nuuja gawe biname bime bau me. ¹⁷ Yoo, peei Miiji Mene te jüicenige Acejiyame lipu pui biname bine conocäco me jaawenemuge lui cina teebine jäätrungusi. Biname te toraca ireclota cabu me labacituge, teeme ätrunga liba Yeesu Keriso me kaakesea cabu gyene, piyepu tabe peei ireclota cabu cängena yaanajuge teeme ätrunga name pi, Oogäräneji Mene te lipu jüicenige egä,

“Pui biname me ireclota iyeteta gyene,

Acejiyame lui ne conocäco me jaawenuge teeme ätrunga cabu ca.

Iyeta Biname Conocono Gemi

¹⁸ Acejiyame te biname bine umle jaawenanemuge egä tabe teebibine mäpu daremu yääcäranemuge teeme niijaniya ngene atwanena täapume piyepu teeme niijaniya waweneca täapume, inge teeme niijaniya mule cina Acejiyame poto cidi me toraca ngene atwanena bine jüibemusi. ¹⁹ Acejiyame teebibine mäpu daremu yääcäranemuge, inge naace popi biname bime täapume pajecu gyene teepi Acejiyame poto cidi me ngena umle cire läbitejisi, inge tabe peei ne teeme täapume pajecu me ituge wawena. ²⁰ Yoo, pui padare

cabu ca Acejiyame liba gawecewe ne tewenuji ngälu page, biname cina miiji gemi umle äbita egä Acejiyame pisi nyene piiyepu teeme kokre iyeteta gyene. Ngänu gyene biname cina puu äblicäco teebine päpäna, yepä teepi miiji gemi iyeta gwidape päpäname Acejiyame lui bine ituge wawena, piba pui cabu ca teeme mule poto cidi me umle äbitame. Peei name pi teeme nuuja ingle lica gyene teeme umle cäco piiyepu niyaniya mule tääpume. ²¹ Biname umle gemi egä Acejiyame pisi nyene, yepä teepi lica teebine yaawejanusi egä, “Maane peese näte cime caburage Acejiyame, cime ire atwiyame,” piiyepu lica teebine eso yäcärusi iyeta gwidape tääpume. Peei name pi teeme ngene atwanena mage käkäco me ituge äbita, teeme mope cabu nuuja miiji ngene atwana lica gyene, yepä iyeta teeme ngene atwanena krokeciye gemi. ²² Teepi jiicenis, “Cine umle cama gemi,” yepä teepi buduma gemi. ²³ Yoo, teepi lica Acejiyame ne yaawejanusi, lui iyeteta gyene, yepä teepi biname pana ceege bine jaawenemusi pui bine awejename, lui bime ireclota lica iyeteta gyene. Nuuja cina ceege bine jaawenemusi lui gawe cabu otnetneja gwidape pana, piiyepu ele, piiyepu biicwale pana, peei bine awejename.

²⁴ Peei buduma mule name pi Acejiyame biname bine papa ire taatu jaacitemuge teepi teeme conocono singisingi mule wawenecame. Teepi ajiri cama mule bine teemeteme jaawenemusi. ²⁵ Teepi toraca ngene atwana ne Acejiyame poto cidi me yäyebingtus, piba tuwängle walya ngene atwana ne yaacatusi. Teepi yaawejanemusi piiyepu teeme tääpume yiiwärajemusui lui gwidape bine Acejiyame te itu tewenemuji, lica Acejiyamerage ne yaawejanusi. Yepä, mine miiji Acejiyame ne awepyeräjame iyeteta. Yoo, mine pepu pa jaawenepesi!

²⁶ Biname bime buduma awejena mule name pi Acejiyame teebibine ire taatu jaacitemuge teeme niyarage ajiri cama mule wawenecame. Pepu pi magebi cina singisingi läbitininusi nuuja magebi me tääpe tääpume. Peei lui babo niyarage gyene, lica magebi bime toraca mule. ²⁷ Cuta rooriye cina pepu pana niyarage mule bine jaawenemusi. Teepi lica coga tääpume singi, yepä singisingi läbitininusi nuuja rooriye me tääpe tääpume. Teepi teeme tääpe me niyarage singi bine jaawenemusi, pepu pi mäpurage daremu ne jääpänusi teeme tääpe piiyepu teeme ngene atwanena liba pui mule cina sabe jaawenemusi. Peei lui conocäco daremu gyene.

²⁸ Ingle naace popi biname cina singi lica gemi ngene atwa-nename Acejiyame poto cidi me, tabe peei name pi teebibine ire taatu jaacitemuge, piba teeme Acejiyame cäco ngene atwanena cina iyeta niyarage me läbitininusi niya singisingi bine wawename, teepi lui bine cire lica jaawenemejisi. ²⁹ Teeme niyaniya mule cina babo läbitininusi, teepi nuuja singi lica conocäco mule tääpume, iyeta teeme ngene atwanena nuuja biname poto cidi me lui claabe taatu. Teepi ire patre yaaglemusi, biname bine walya yaangletnäjemusi, larngininusi, piiyepu nuuja biname bine budre me yaaglecimusi. Teepi nuuja biname bine teeme ngenecu bora jäämugetnemusi. Teepi nuuja bine yäärmärimusi, ³⁰ cuta teeme poto cidi me niya mene jüicetnäjemusi. Teepi Acejiyame ne jäämugetnusi, piiyepu teeme-teeme jääcelusi. Teepi lasicnantinusi egä teepi baborage gemi nuuja biname bime cabu ca, piba teemämu lawepyeräjininusi. Teepi ngene jwaatwananinusi cerämu cuta poto niya mule bine wawenecame; teepi cuta mage babe bime singi bine lica yaawademusi. ³¹ Teepi geäji gemi niya mule wawenecame, peei name pi lica ngene ca agli egä, “Ai lui niya mule gyene.” Teepi lica teeme mene toraca me jaawenemusi, teepi lica asicnenta owecu nuuja biname bime tääpume, piiyepu nuuja singi lica gemi teeme binamewale tääpume. ³² Teepi iyeta umle gemi Acejiyame me cotre pisi nyene peei mule tääpume egä laati te peei mule bine jaawenemuge, tabe miiji budre päpäna, yepä teepi peei bine jaawenanemusi. Teepi cuta singi gemi nuuja cina peei bine wawenecame.

2

Acejiyame te Iyeta Biname bine Cirege Atrana

¹ Gone weene ngene jwaatwananinuye egä, “Yoo, poto biname pepu niyarage gemi,” ingle weene lica conocäco gemi, ngänu gyene weene laati bemi. Weene liba nuuja biname ne aitneja egä, “Niiyarage mule biname gyene,” piba teeme pana mule pa jewenepeye, weene weemämu laitnäjinuye. ² Mine iyeta umle gemi egä Acejiyame conocäco gyene biname bine atraname lui cina peei niyarage mule jaawenemusi. ³ Yepä, weene lui nuuja biname bine jaaitnäjemuye, cuta peei yepä niya mule jaawenemuye, weene gone ngene jwaatwaninuye egä Acejiyame te nuuja biname bine mäpu daremu pa yäcäremepi, yepä weene pagege äsecrera teeme atrana cabu ca. Eewe, weene licarage cirege äsecrera! ⁴ Gone ngene jwaatwananinuye egä Acejiyame me owecu lui papa gwidape gyene, ingle tabe owecu baborage gyene piiyepu lica watawata mäpu daremu weebibine ceera. Weene miiji umle gemi egä Acejiyame weeme bau babo owecu gyene, ai name pi tabe singi weene

niiya mule cabu ca atatrongärame teeme bau me. ⁵ Yepä, weene liba ätecija cäco gemi, piba babo mäpurage cirege weeme daremu kui Ceräcerägääbu Bimu cabu, Acejiyame te liba biname bine conocäco cire jaatranemepi mäpu daremu ceerame. ⁶ Yoo, Acejiyame piba iyeta biname bine teeme daremu cirege ceera teeme mule ibibi. ⁷ Tabe iyeteta ireclota teebibine cirege ceera lui cina miiji mule jaawenemusi gloose cäco, ingle teepi lui singi gemi teeme jamyacu apacyera, awepyeräja, piijepu ngälu cäco ireclota päpänä. ⁸ Yepä, nuuja biname cina teeme singisingi bine taatu jaawenemusi; teepi toraca gaabe ne jäägyusi teeme conocono gaabe cabu otnime, siige Acejiyame teebibine teeme mäpurage daremu cirege ceera. ⁹ Teepi babo ngenecu mäpu piijepu cewe cire loocaninipesi. Iyeta lui cina niya mule bine jaawenemusi, teepi teeme mäpu daremu cirege päpänä, Israela biname niinäce piijepu nuuja gawe biname iyeta. ¹⁰ Yepä, iyeta lui cina miiji mule bine jaawenemusi, Israela biname niinäce piijepu nuuja gawe biname iyeta, Acejiyame te jamyacu apacyera, awepyeräja, piijepu poode teebibine cirege ceera. ¹¹ Ingle naace popi iyeta biname lui yepä pana gemi Acejiyame me opo gaabe je.

¹²⁻¹⁵ Yoo, iyeta lui cina Acejiyame me singi jaatropangtusi, teepi mäpu daremu cirege päpänä. Acejiyame te mäpu daremu cirege ceera maramara gawe biname bine, teepi liba teeme singi ne jaatropangtusi niya mule wawename. Ngänu gyene teeme bau oogäräneji lica ge Acejiyame me Cotre Mene Moose lui bine soogäremuji, ingle naace gyene teeme ngenecu bora teepi umle gemi lui mule conocono gyene, lui mule conocäco. Teeme ireclota cabu ca mine opo yaawatnusi egä Acejiyame me cotre piti nemi teeme trupa ngalebora. Teepi cuta ngena ca laglinusi egä miiji mule, coo niya mule, ingle nuuja taje teepi ngenecu miiji birige teeme mule potu cidi me, cuta nuuja taje ngenecu niya birige. Acejiyame cuta Israela biname bine teeme mäpu daremu cirege ceera teeme niya mule täapume, ingle naace gyene teeme bau piti nemi oogäräneji Cotre Mene, yepä teepi peei bine lica jaawenemusi. Teepi umle gemi lui gaabe toraca gyene, yepä teepi lica conocäco peei gaabe cabu otni. Yoo, biname te lica conocäco läbituge Acejiyame me opo gaabe, tabe liba umle taatu ngena ne wawename, yepä tabe cuta miiji peei ne toraca wawena. ¹⁶ Yoo, kui bimu cirege otni, lui cabu Acejiyame te Yeesu Keriso ne cire jaajepi biname bime ogä ngena atwanena bine atraname, cane lipu Miiji Mene cabu jiceninine.

Cotre Mule Lica Gyene Äsecrera Gaabe Israela Biname bime täapume

¹⁷ Yoo, weene lui cina jicuye egä, “Cine Israela biname gemi,” weene apu jingenininige egä weeme ätityera pisi nyene Cotre Mene cabu, piijepu weeme mene nesae lica gemi egä, “Acejiyame lui cime yene.” ¹⁸ Weene iyeta umle gemi Acejiyame te ngena singi weene wawename, piijepu weene Cotre Mene cabu ca umle ituge äbita toraca gaabe luci yene. ¹⁹ Weene biname bine jäje jaajanemuye egä, “Cine age temi awecluja irecu mäasumäsu biname täapume,” piijepu egä, “Cine apacyera gemi biname täapume lui cina krokeciye cabu icrajenige.” ²⁰ “Cine age temi ablaweja biname buduma mule biname bime täapume piijepu abiberäja biname bägrä pana biname bime täapume.” Weene apu jingenininige, “Cine iyeta gwidape umle gemi, ingle Cotre Mene cime bau piti nemi, piijepu peei Cotre Mene toraca gyene.” ²¹ Yoo, weene babo singi nuuja biname bine abiberäjame, ngena name pi weene weemämu lica abiberäja? Weene bäärimi mene birige jajanena egä, “Ero gone!” Yepä, weene ero mule umle gemi. ²² Weene jiceniye egä, “Sargi mule gone!” Yepä, weene cuta umle gemi peei mule. Weene uuje bine jäägyemuye, lica peei bine yiwäräjemuye, yepä weene gwidape bine ero ca yaawademuye peei uuje bime iiwäreja mete maramara cabu ca. ²³ Weene jäje jaajanemuye egä, “Cime bau piti nemi Acejiyame me Mene,” yepä weene Acejiyame me miiji ngii sabe jaawenuye, weene liba teeme cotre bine jaatropangtemuye. ²⁴ Oogäräneji Cotre Mene te jiceninige egä, “Weene Israela biname bime mule name pi nuuja gawe biname cina niya mene jicemusi Acejiyame potu cidi me.”

²⁵ Yoo, weene Acejiyame me Cotre Mene liba cängena jaawenemuye, piba cuta miijirage birige teeme cewecu weeme tääpe cabu lenajame, yepä weene teeme Cotre Mene liba cängena lica birige wawena, piba weeme Acejiyame täapume cewecu lui papa gyene weeme tääpe cabu. ²⁶ Nuuja gawe biname, lui bime cewecu lica birige, teepi peei Cotre Mene liba jaawenemusi, Acejiyame teebibine pa yaawademepi, epu pana teepi cewecu cama gemi liijepu. ²⁷ Yoo, weene Israela biname lui cina Cotre Mene jaatropangtuye, ngänu gyene peei mene weeme bau piti nemi oogäräneji, piijepu ngänu gyene weene cewecu cama gemi, weene weeme mäpu daremu cuta cirege päpänä, ingle naace popi potu nuuja gawe maramara biname cina Cotre bine toraca jaawenemusi, ngänu gyene Acejiyame me cewecu teeme tääpe cabu lica gyene. ²⁸ Yoo, tääpe iirputa taatu te lica biname ne Israela biname me jaawenuge, ingle cewecu lui biname me tääpe papa cabu. ²⁹ Yepä, tabe Acejiyame me toraca Israela biname gyene lui te teeme trupa piijepu teeme ngenecu Acejiyame bau me ituge ceera. Siige, peei lui Aceji Seemo me kaakesea cabu ca gyene,

lica Oogäräneji Cotre Mene cabu ca. Pepu biname te lica nuuja biname bau ca awepeyeräja yaacatuge yepä teeme awepeyeräja lui Acejiyame bau ca gyene.

3

Acejiyame lui Toraca piyepu Conocäco Gyene

¹ Weeme nuuja biname te pama ngene jotwananenige egä, “Nää, Israela biname niinäce gaabe gemi nuuja gawe biname bime cabu ca?” coo egä, “Teeme täápume, nää, lipu ätityera gyene teeme tääpe cabu cewecu?” ² Yoo, teeme täápume miijirage birige. Pui lui babo gwidape gyene egä Acejiyame teeme mene Israela biname bine ecäremuji ire atwime iyeta nuuja biname bime täápume. ³ Yoo, toraca gyene egä potu Israela biname cina peei mene cängena lica ire jaawenemusi. Yepä, weene gone ngene jwaatwa-naninuye egä Acejiyame teeme mene cängena lica jaawenemuge ai ingle naace popi potu biname cina cängena lica peei mene bine jaawenemusi. ⁴ Eewe, pepu lica! Acejiyame lui toraca gyene. Ngänu gyene iyeta biname cina walya mene jaajanemusi, Acejiyame iyeta padare teeme mene toraca me jaawenemuge. Oogäräneji Mene teeme potu cidi me jüicenige egä, “Maane lui mene jüicemute, peei mene cina meebine naawabusi egä conocäco gäte.

Maane cuta conocäco yuutrutute atrana cabu ca.”

⁵ Yoo, page weeme nuuja te pama ngene jotwananenige egä, “Nää, cine Israela biname cina liba conocono mule jaawenemusi, biname piba taatu jääpänusi egä, ‘Acejiyame me mule lui mara gyene; tabe conocäco gyene!’ Ai name pi Acejiyame te miiji ngii puma cita ca jääpänuge cime niya mule cabu ca, tabe peei name pi conocono gyene cibibine mäpu daremu peei täápume ceerame.” Pepu binamerage ngene atwanena gone! ⁶ Peei lui walya gyene! Acejiyame äblicäco potu conocono mule äsuceja, ingle naace popi tabe toraca conocäco gyene. Tabe liba conocono gyene, tabe piba äblicäco ai gawecewe biname bine cängena atrana, yepä tabe miiji gyene biname bine atraname, ingle tabe conocäco gyene.

⁷ Gonerage apu ngene jwaatwananinuye egä, “Nää, cine liba walya mule bine jaawenemusi, piba Acejiyame me mara toraca mule te babo me läbituge, siige tabe puma cita ca jamyacu apacyera ne jääpänuge cime walya mule name pi. Acejiyame peei name pi miiji lica cibibine jaji egä, ‘Weene niya mule biname gemi.’ ” Yepä, weene gonerage pepu ngene atwanena! ⁸ Yoo, potu biname cina buduma ngene atwanena name pi jüicemusi egä, “Mine niya mule pa jaawenemepesi, ingle peei cabu ca Acejiyame me miiji ngii caburage pa läbitupi.” Yoo, potu biname cina cebine naitnäjusi walya mene ca egä cane te peei buduma mene jüicine. Peei walya cabu ca teepi teeme mäpu daremu cirege päpäna. Eso!

Nuuja Biname te Lica Iyeta Padare Conocäco Mule Jaawenemuge

⁹ Yoo, peei cabu ca mine umle gemi egä Acejiyame me opo gaabe mine lui Israela biname gemi, mine miiji lica gemi nuuja biname cabu ca. Cane weebibine ituge jaji egä iyeta Israela biname piyepu iyeta nuuja gawe biname yepä pana gemi. Mine iyeta niya mule me kokre cabu ninajininige. ¹⁰ Oogäräneji Mene te pepu jüicenige egä: “Nuuja biname te conocäco lica gyene Acejiyame me opo gaabe je.

¹¹ Nuuja biname te lica toraca umle cama gyene.

Nuuja biname te lica toraca singi läbituge Acejiyame gome lenajame.

¹² Iyeta biname cina Acejiyame bau ca itu latatrongäripesi.

Teepi iyeta niya me itu läbitipesi.

Nuuja biname lica gyene lui te toraca mule jaawenuge, lica yepä te wawena.

¹³ Babo walya mene te täduge teeme tage cabu ca, epu pana niya lengo te lipu tasatuge gape cabu ca, gape te liba ätrugera cäco.

Niia mene te cobyame me niya uudi pana täduge teeme tage cabu ca nuuja biname bine sabe wawename.

¹⁴ Teepi claabe name pi alwi mene jüicemusi.

¹⁵ Teepi wata nuuja biname bine niya jaawenemusi; budre me yaaglecemusi.

¹⁶ Ngänu gyene teepi cewe ne liba yaabmalusi, pita piyepu mäpu puma birige teeme niya mule name pi.

¹⁷ Teepi umle cäco gemi poode cama lenaja.

¹⁸ Teepi cuta umle cäco gemi wälu pana äbita Acejiyame me opo gaabe je.”

¹⁹ Süge, mine umle gemi egä iyeta mene Cotre Mene cabu lui eei biname täápume lui cina Cotre Mene ngalebora yaacrajimuge. Pepu aitneja mene lui iyeta ai gawecewe biname bime täápume mine bojä agime mime niya mule name pi, ingle mine iyeta cirege aclajuta Acejiyame me opo gaabe je atrana täápume. ²⁰ Nuuja biname te licarage Acejiyame me opo gaabe je conocäco läbituge teeme Cotre Mene waweneca cabu ca, yepä Cotre Mene me kaakesea agesa. Biname bine umle wawename egä teepi niya mule cuta jaawenemusi.

Acejiyame Lipu Biname bine Conocäco me Jaawenemuge

²¹ Yoo, Acejiyame gaabe ne ituge awabudnita egä biname cina lipu Acejiyame me opo gaabe je conocäco me läbitininusi, piiyepu ai gaabe lica birige cotre wawena. Cotre Mene piiyepu mename biname bime mene cina itu teitnäjujisi peei gaabe ne. ²² Biname cina Acejiyame cama conocäco läbitininusi, teepi liba Yeesu Keriso ne jäärungusi. Peese nyene yepä taatu gaabe. Nuuja mara gaabe lica gyene Israela biname bime täapume piiyepu nuuja gawe biname bime täapume, ²³ ingle naace gyene iyeta biname cina niyya mule bine jaawenemusi. Iyeta biname lui toraca ingwe gaaberage gemi Acejiyame bau ca, tabe lui conocäco piiyepu jamyacu apaclyera cama gyene. ²⁴ Yepä, Acejiyame te biname bine papa itityeräjenemige teeme babo miiji cabu ca. Tabe teebibine teeme täapume kälyä jaawenemuge Yeesu Keriso me kaakesea name pi, lui kaakesea te biname bime mäpu daremu yääyeblinge-muge. ²⁵ Acejiyame Yeesu ne jityepuji biname cabu me teeme tääpe piiyepu uudi ca Acejiyame ne iiwärejame biname bine teeme niyanyiya mule cabu ca äsecrera. Yeesu Keriso me uudi tapiruji, tabe budre jepänuji, siige biname bime äsecrera gaabe pepu jewenuji. Yoo, biname cina ai äsecrera gaabe ne jääpänusi, teepi liba Yeesu ne jäärungusi. Acejiyame peei äsecrera gaabe ne jewenuji, pepu pi jewabemuji egä teeme mule uja niinäce padare cabu lui conocäco ge, tabe lui padare cabu biname bime niyya mule bine yääsüwäjemuge, ²⁶ ingle tabe ingwe padare ne jewagrienuji Keriso liba tatyaramtepi biname bime mäpu daremu ne äyeblingtame. Tabe ai padare cabu teemämu awabudnitenige egä tabe conocäco gyene, ingle peei lui conocäco mule gyene tabe biname bine mäpu daremu cabu ca lipu conocäco me jaawenemuge, lui cina Yeesu ne jäärungusi.

²⁷ Yoo, nuuja miiji lica gyene biname teemämu awepyeräjäme, ingle naace popi puu biname cina umle gemi awepyeräjä waadename cotre waweneca täapume, yepä teepi umle cäco awepyeräjä waadename ätrunga täapume. ²⁸ Yoo, pajecu gyene egä biname te Acejiyame cama conocäco läbituge ätrunga cabu ca, lica cotre waweneca cabu ca. ²⁹⁻³⁰ Acejiyame peese nyene yepä taatu Israela biname bime täapume piiyepu nuuja gawe biname bime täapume. Tabe Israela biname bine conocäco me cire jaawenemepi teeme ätrunga name pi, cuta piiyepu nuuja gawe biname bine conocäco me cire jaawenemepi teeme ätrunga name pi. ³¹ Yoo, cane lica peei mene jicenine mime Cotre Mene äyeblingtame, ingle naace gyene mine liba Yeesu ne jäärungusi, mine piba taatu miiji gemi teeme cotre cängena wawename.

4

Abrahamo me Ätrunga cabu ca Mine Umle Äbitininago egä Ätrunga Lui Baborage Gwidape Gyene

¹ Mine ngene jwaatwananinago Abrahamo poto cidi me, tabe lui mime Israela biname bine kaakesaare gyene. ² Abrahamo Acejiyame me opo gaabe liba conocäco me läbituge teeme kaakesea ca, piba teeme ingle pisi nyene teemämu awepyeräjä, yepä pepu lica ge. Abrahamo äblicäco teeme kaakesea ne awepyeräjä, ingle naace gyene ³ Oogäräneji Mene te jicenige egä, “Abrahamo Acejiyame ne jitrungige, siige teeme ätrunga name pi Acejiyame teebine einige conocäco ca.” ⁴ Yoo, biname te liba rarekaake jääpänuge teeme kaakesea cabu ca, tabe lica teeme rarekaake poto cidi me ngene jwaatwananuge egä, “Agesa owecu gwidape cäme täapume.” Eewe, tabe ngene jwaatwananuge egä, “Agesa cäme daremu cäme kaakesea täapume.” ⁵ Yepä, biname te liba Acejiyame ne jäärunguge, Acejiyame piba peei cabu ca teebine conocäco me jaawenuge. Peei ätityera lui daremu lica gyene, ingle pui biname te lica teeme kaakesea cabu ca Acejiyame cama conocäco läbituge. Yoo, Acejiyame te conocono biname bine yaainemuge conocäco ca, eei biname lui cina teebine jäärungusi. ⁶ Ai mene lui cäme taatu lica gyene, yepä ujarage Daawida te mene jicuji pui biname me gege poto cidi me, Acejiyame lui ne conocäco me jaawenuge teeme waweneca kaake poto ca. ⁷ Daawida mene bine yoogäremuji peei poto cidi me Salamo uupera peba cabu egä:

“Babo ngenecu gege gemi pui biname lui bime conocono Acejiyame te yiisibricmuge, lui cina kälyä gemi teeme conocono mule cabu ca.

⁸ Teepi babo ngenecu gege gemi,

ingle siige, Acejiyame te lica ingwe ca acnema teeme conocono bine.”

⁹ Yoo, Daawida me mene poto cidi me mine ngene jwaatwa-naninago egä pui babo ngenecu gege laati bemi? Nää, pui biname täapume taatu peei mene, lui bime tääpe matikolä irputäneji gemi Acejiyame me cewecu acatame? Eewe, lica teeme taatu me. Peei ngenecu gege cuta teeme täapume lui cina jäärungusi, yepä teeme tääpe cabu cewecu lica gyene, ingle mine umle gemi egä Acejiyame Abrahamo ne einige conocäco ca teeme ätrunga name pi. ¹⁰ Tabe lui padare cabu peei ne jewenige, nää Abrahamo me tääpe irputa kaakesea niinäce gaabe, coo ingwe gaabe ca? Yoo, Abrahamo liba camuge teeme tääpe irputa, Acejiyame teebine einige egä, “Conocäco biname gyene.” ¹¹ Abrahamo ingwe

ca teeme tääpe matikolä ne jiiirputuji cewecu tääpume egä Acejiyame teebine ituge acata teeme ätrunga name pi. Yoo, peei name pi weene iyeta lui cina Acejiyame ne jäätrunguye piiyepu tabe lui bine conocäco me niwenininuge, Abrahamo lui weeme ätrunga kaakesaare gyene, ngänu gyene cewecu liba lica yaacatuje. ¹² Cuta mime poto cidi me lui cewecu cama gemi, Abrahamo cuta mime kaakesaare gyene, ingle mine page Acejiyame ne jäätrungusi, Abrahamo lipu teebine itu jitrunguji, tabe liba camuge cewecu ne acata.

Abrahamo Acejiyame me Miiji ne Ecatuji Teeme Ätrunga cabu ca

¹³ Ujarage Acejiyame liba Abrahamo ne jejuji egä, “Weene ai gawecewe ne cirege acata, maane piiyepu määme kaakesaare cama,” pui padare cabu Abrahamo nuuja umle lica ge Oogäräneji Cotre Mene poto cidi me, ingle pui cotre me padare camuge atyaramta. Yoo, Acejiyame Abrahamo ne peei mene jejuji lica teeme cotre wawena name pi, yepä naace name pi egä tabe Acejiyame ne jitrunguji, piba teeme bau ca mene itecijuji egä, “Maane căme tääpume conocăco biname gäte.” ¹⁴ Yepä biname te liba Acejiyame me miiji ne jääpänuge cotre wawena ca, piba nuuja ingle lica gyene ätrunga tääpume, cuta piba papa gyene Acejiyame lui mene ituge jaji. ¹⁵ Yoo, mine liba cotre ne atropengta, mime mäpu daremü pisi nyene peei tääpume, yepä cotre liba lica ge, piba cuta lica gyene cotre atropengta.

¹⁶ Yoo siige, Acejiyame ngena miiji ituge jaji ceerame, mine ätrunga ca jääpänusi, naace tääpume egä Acejiyame owecu name pi papa ceerame, piiyepu naace tääpume tabe iyeta Abrahamo me kaakesaare bine ceerame. Lica Israela biname taatu cina jääpänusi, lui cotre bine jaawenemusi, yepä cuta eei cina lui Abrahamo pana Acejiyame ne jäätrungusi. Abrahamo peese nyene lui ätrunga cabu mine iyeta bime babe, ¹⁷ Acejiyame Abrahamo ne lipu jejuji Oogäräneji Mene cabu egä, “Cane meebine babe me naawenepene bucurage gawe maramara biname bime tääpume.” Yoo, Acejiyame me opo gaabe, Abrahamo lui epu pana babe liiyepu mime tääpume. Tabe Acejiyame ne jitrunguji lui me kokre pisi nyene budre biname arpinerame, piiyepu lui te mene ca gwidape bine jaawenemuge, lui cina lica ituge lenaja. ¹⁸ Abrahamo teebine jewagrijuji teeme mene bāgrä poto cidi me toraca me waweneme, ngänu gyene tabe puu umle lica ge Acejiyame te peei ne lipu pagege wawena, tabe papa jewagrijuji. Siige, ingwe ca tabe kaakesaare ngii jepänuji maramara gawe biname bime bau ca, epu pana Acejiyame teebine lipu itu jejuji egä, “Määme kaakesaare bucurage cirege äbita.” ¹⁹ Mine Abrahamo me ätrunga poto cidi me ngena jwaatwananinago. Tabe yepä hanred kāmäge mameta joomlujü, yepä teeme ätrunga te enajuji kokre cama. Tabe ngene jotwanuji egä, “Cane moda gäne; cane budre mameta gäne, cuta piiyepu căme coga Saara tabe äblicăco bāgrä päpäna,” ²⁰ yepä tabe lica jejuji egä, “Acejiyame me mene äblicăco äbita.” Tabe teeme ätrunga cabu kokre äbituji, siige Acejiyame ne ewepyeräjuji, ²¹ jejuji egä, “Acejiyame me mene toraca me pa läbitepi. Cine bāgrä ne pagege päpäna.” ²² Peei name pi Acejiyame liba teeme ätrunga ne jepänuji, tabe jejuji egä, “Maane căme tääpume conocăco biname gäte.” ²³ Yoo, peei mene egä “Maane căme tääpume conocăco biname gäte,” lui lica oogäräneji ge Abrahamo tääpume taatu, ²⁴ yepä cuta mime tääpume oogäräneji ge, Acejiyame lui bine cirege jaji egä, “Weene căme tääpume conocăco biname gemi,” mime tääpume lui cina teebine jäätrungusi, lui te mime Yageyame Yeesu ne budre cabu ca erpinantuji. ²⁵ Yoo, mime conocono mule name pi tabe budre äbituji, piiyepu budre cabu ca arpinanteji gyene naace tääpume mine conocăco äbitame Acejiyame cama.

5

Acejiyame me Ätityera Mime tääpume

¹ Ai ingle naace gyene mine ätrunga ca conocăco me ituge äbita Acejiyame me opo gaabe je, mime poode pisi nyene Acejiyame cama mime Yageyame Yeesu Keriso me kaakesea name pi. ² Tabe mime ätrunga ca mibibine niwadininige teeme babo miiji cabu lenajame. Mime babo ngenecu gege pisi nyene, ingle mine umle gemi egä mine Acejiyame me jamyacu apacıyera cabu cirege lenaja. ³ Mine liba mäpu jääpänusi, mime ngenecu gege cuta pisi nyene, ingle naace popi mine umle gemi egä peei mäpu te mibibine niwenininuge bojăcu lenajame, ⁴ piiyepu peei bojăcu lenaja te mime ngenecu bine kokre me jaawenemuge, piiyepu ngenecu kokre cama mine jaawagrijuji Acejiyame ne tabe mibibine äsecerame. ⁵ Peei awagrija lica papa me läbituge, ingle tabe Aceji Seemo ne ituge ätyepa mime yepäyepä trupa cabu lenajame mime ngenecu bine umle wawenename egä teeme baborage singi pisi nyene mime tääpume.

⁶ Yoo, mine liba äblicăco mimämu ätityeräja, Acejiyame me miijirage padare cabu, Keriso te piba budre äbituji mibibine ätityerame, lui niija conocono biname gemi. ⁷ Yoo, mime gawe biname bime mule cabu, nuuja biname te pama lica gyene budre äbita nuuja biname ne ätityerame, ngänu gyene tabe conocăco biname coo piiyepu miiji biname birige, yepä

Acejiyame me mule mara gyene. ⁸ Teeme singi epu baborage gyene mime täápume egä pui padare mine liba conocono biname ge, tabe piba teeme Bägrä Yeesu ne tityepuji budre äbitame mibibine ätityerame. ⁹ Yoo, Yeesu liba budre äbituji, teeme uudi te tapiruji mibibine Acejiyame me opo gaabe je conocäco wawename, cuta piiyepu teeme peei ätityera ca mine cirege äsecrera mäpu daremu cabu ca, Acejiyame lui biname bine cirege ceera teeme niiya mule täápume. ¹⁰ Mine niinäce Acejiyame cama cubuyame pana ninajenäjimi, yepä teeme Bägrä me budre cabu ca Acejiyame te mibibine teeme biname me itu niwenipi. Yoo, page mine teeme biname gemi, piiyepu tabe mibibine niiya mule cabu ca toraca cire nisechräpi teeme Bägrä me ireclota name pi. ¹¹ Peei name pi mime baborage ngenecu gege pisi nyene Acejiyame täápume, lui te mime Yageyame Yeesu Keriso name pi mibibine teeme biname me itu niwenininuji.

Adamu cabu ca Biname cina Budre ne Jepänujisi; Yepä, Keriso cabu ca Teepi Ireclota ne Jepänenisi

¹² Yepä biname Adamu te conocono mule ne jewenuji, piba budre äbituji teeme niiya name pi. Pepu pi iyeta biname budre läbitininusi, ingle naace gyene teepi conocono mule cuta jaawenemusi. ¹³ Acejiyame te Cotre Mene Moose ne liba camuge ceera, biname cina piba niiya mule bine tewenemäjumesi. Yoo, peei biname cina Cotre Mene bine lica yaabiberäjemusi, ingle Cotre Mene camuge atyaramta, peei name pi Acejiyame teeme niiya mule bine lica ecnemuji Atrana Bimu täápume. ¹⁴ Biname Adamu cabu ca ngälu Moose me padare teepi niiya mule bine jaawenemusi, piba peei cabu ca budre jääpänanusi, ngänu ge teeme peei niiya mule lui cotre atropangta lica ge Adamu me liiyepu, tabe liba cude uli kuu ne erwuji.

Adamu me niiya mule te lipu joomlemige iyeta biname bine, pepu pana Keriso miji pi miji mule te totnenige iyeta biname bine ätityerame. ¹⁵ Acejiyame me owecu mule mara gyene Adamu me conocono mule cabu ca. Toraca gyene egä bucurage biname cina budre läbitininusi pui yepä biname Adamu me conocono mule name pi, yepä bucurage biname cina conocono mule täápume kälyä läbitininusi pui nuuja biname Yeesu Keriso me ätityera name pi, ingle naace gyene Acejiyame babo owecu gyene biname bime täápume. ¹⁶ Cuta piiyepu Acejiyame me owecu piiyepu ätityera mule baborage gyene Adamu me conocono mule cabu ca. Niinäce Adamu yepä conocono mule ne jewenuji, piba Acejiyame teebine jejuji egä, “Maane conocono biname gäte!” Yepä, ingwe ca bucurage biname liba conocono jaawenemusi, Acejiyame piba teebibine yäätityäremuge, jaajemuge egä, “Weeme conocono piti nemi, yepä weene kälyä gemi peei cabu ca Yeesu Keriso me miji kaakesea name pi.” ¹⁷ Cuta piiyepu Acejiyame me ätityera mule kokre gyene Adamu me conocono mule cabu ca. Toraca gyene egä pui yepä biname me conocono mule name pi budre me kokre te joomlemuge iyeta biname bine, yepä peei nuuja biname Yeesu Keriso teeme ätityera mule lui babo kokre gyene budre me kokre cabu ca. Iyeta biname lui cina Acejiyame me owecu gwidape ne yaacatusi, piiyepu teeme baborage miji cabu ca teeme täápume conocäco me läbitininusi, teepi ngälu cäco ireclota cabu yaacrajuge Yeesu Keriso me kokre cabu je.

¹⁸ Yoo, Adamu me conocono cabu ca iyeta biname conocono jaawenemusi, piba teeme mäpu daremu yaawademusi, yepä Yeesu Keriso me conocäco ireclota cabu ca tabe äsecrera gaabe ne jewenuji iyeta biname bime täápume teepi ngälu cäco ireclota ne päpäname. ¹⁹ Adamu me ätecija cäco mule cabu ca bucurage biname cina ätecija cäco läbitininusi, yepä Yeesu Keriso biname bine Acejiyame täápume conocäco cire jaawenemepi, ingle tabe Acejiyame me singi mene itecijuji, siige budre me äbituji biname bine ätityerame.

²⁰ Moose te biname bine jejananemuji Acejiyame me Cotre Mene, naace täápume Cotre Mene te teebibine awabame teeme niiya mule lipu bucurage gemi. Siige, biname cina liba umle läbitininusi teeme niiya lipu baborage gyene, teepi piba cuta umle läbitininusi Acejiyame me miji lipu baborage gyene biname bime täápume. ²¹ Niinäce, biname bime niiya mule te teebibine yaawademuge teeme budre me, yepä page Acejiyame me miji mule te biname bine yaawademuge teepi teeme opo gaabe je conocäco äbitame, piba ngälu cäco ireclota ne jääpänanusi mime Yageyame Yeesu Keriso me kaakesea name pi.

6

Mine Yepä me Läbitinago Keriso cama Lenajame

¹ Nää, weene pama apu jingeninige egä, “Nuuja niiya lica gyene mine liba conocono mule wawename, ingle piba Acejiyame me miji mule mime täápume cuta babo me läbituge.” ² Pepu ngenegone jwaatwananinuye. Mime täápume conocono mule te ituge apira, siige mine äblicäco conocono mule cabu cääri lenaja. ³ Weene miji umle gemi egä mine liba niye ca äciseja ne ituge acata Yeesu Keriso me ngii cabu, mine epu pana egä ten cama yepä me itu äbitininujago. Yoo, mine epu pana gemi ten cama gigri budre ituge. ⁴ Peei

magebi lica gwene, liba nuuja rooriye ne yaacatuge. ⁴ Yoo, căme binamewale, cotre mule poto cidi me weene peei magebi pana gemi. Cotre mule lui weeme t  pume epu pana pui magebi me niin ce rooriye liiyepu. Yep , weene Keriso me budre ituge acata cuta weeme t  pume, siige weene epu pana gemi budre biname liiyepu cotre mule poto cidi me. Peei te lica gyene weebibine waadena. Keriso lipu budre cabu ca arpinantuji, weene pepu pana ituge arpinera kirece ireclota cabu me. Page tabe epu pana kirece rooriye liiyepu weeme t  pume; weene teemi nemi. Weene miiji teeme kaakesea wawena Acejiyame t  pume. ⁵ Niin ce mime ngene atwanena lui ai gawe me mule cabu. Mine liba umle  bitininujago cotre poto cidi me mene eg , “Gone apu pana mule wawena,” piba mime singi te babo me  bituji pui niiya mule t  pume, siige mime t  pe me singisingi mine cuta jaawenemusi budre gaabe cabu abacitame. ⁶ Yep , page mine  secr reji gemi cotre mule cabu ca. Mine epu pana budre biname liiyepu cotre mule poto cidi me. Cotre mule  blic co mibibine c ari oomlana. Siige mime t  pume pui sasa mule, pui Oog r neji Cotre Mene te lica mibibine niwadininuge. Page kirece mule te mibibine niwadininige, peei lui Aceji Seemo me.

Miiji Ngene Atwanena piiyepu Niiya Ngene Atwanena Cubuyame pana Gegi Biname bime Trupa Ngalebora

⁷ Peei mene name pi pama poto biname cina pa jicemepesi eg , “Cotre lui niiya gwidape gyene,” yep  peei lui toraca lica. Cotre liba lica, mine piba umle lica lui mule gyene niiya, coo lui mule gyene miiji. Yoo, cotre mene pisi nyene eg , “Gone gwidape t  pume singisingi l bitininuye.” Peei cotre cabu ca cane umle itu  bitujine pepu singi poto cidi me. ⁸ Peei cotre mene name pi c me niiya ngene atwanena piba tasatige, piba c me baborage singi pisi nyene nuuja biname bime gwidape t  pume. Cane liba umle lica peei cotre mene, piba c me niiya ngene atwanena papa kaakesea c co yaanajuge c me ngenecu bora. ⁹ Yoo, niin ce cane miiji asicnantujine, ingle cane nuuja umle lica g ne cotre mene poto cidi me eg , “Gone peei niiya bine jaawenemute!” Yep , cane liba umle  bitujine peei cotre mene poto cidi me, cane piba baborage singi  bitujine pui niiya mule wawename. ¹⁰ Cuta piba taatu umle  bitujine eg  cane budre gaabe cabu me ituge abacita, ingle niiya mule me daremu lui budre gyene. Peei cotre Acejiyame lui ca singi cebine  tityerame ireclota gaabe cabu lenajame, peei ca cane umle  bitujine eg  cane budre gaabe cabu s ne. ¹¹ Cane liba apu nangenige eg  cotre mene wawena lui gaabe gyene iyeteta ireclota t  pume, piba c me niiya ngene atwanena te tasatenige piiyepu peei cotre ca cebine singisingi me nawenige. Piba peei te cebine nawabenige eg  cane budre gaabe cabu abacitenine.

¹² Yoo siige, cotre mene lui Acejiyame bau ca gyene, peei name pi iyeta teeme maramara cotre lui epuc co, miiji, piiyepu conoc co gemi. ¹³ Cotre te lica cebine budre gaabe cabu nactenige, yep  c me niiya ngene atwana te peei ne jewenenige. C me niiya ngene atwana te miiji cotre ne ecatenige, cebine peei ca nangletn jenige, piba nawabenige eg  cane budre gaabe cabu s ne. Niiya mule lui pepu gyene. Yoo, cotre mene cabu ca mine opo yaawatnusi lipu toraca niyarage gyene mime niiya ngene atwanena.

¹⁴ Mine umle gemi eg  Cotre Mene lui Acejiyame bau ca gyene, yep  cane binamerage g ne. Niiya mule te c me ngenecu ne joomluge. ¹⁵ C me mule poto cidi me cane toraca umle lica g ne: cane c me toraca singi bine lica jaawenemune, yep  lui mule t  pume cane singi lica g ne, peei bine jaawenemune. ¹⁶ Yoo, cane liba jaawenemune cane lui mule singi lica wawename, peei mule ca cane jewabenine c me toraca asicnenta ne eg , “Cotre mene lui miiji gyene.” ¹⁷ Siige, peei lui c me toraca singi lica gyene eg  cane niiya mule bine jaawenemune, yep  c me niiya ngene atwana te tasatige c me ngenecu cabu ca, cane puma cita ca peei niiya bine jaawenemune. ¹⁸ Cane umle g ne eg  c me trupa cabu nuuja miiji lica gyene. Cane c m mu  blic co g ne c me t  pe ne giri acita miiji mule wawename. Cane singi g ne, yep   blic co! ¹⁹ C me singi pisi nyene miiji mule wawename, yep  cane lica peei bine jaawenemune. Cane singi lica g ne niiya mule wawename, yep  cane peei bine jaawenemune. ²⁰ Cane liba peei bine jaawenemune lui t  pume cane singi lica g ne, piba lica canerage te peei bine wawena, yep  pui niiya ngene atwanena cina peei bine jaawenemusi lui cina t suge c me ngenecu bora ca.

²¹ Yoo, c me mule apu gyene: Cane liba singi miiji wawename, niiya ngene atwanena te piba tasatige, cebine nacanuge niiya cabu me. ²² Pisi nyene c me ngenecu bora baborage singi Acejiyame me Cotre wawename, ²³ yep  cane asicnantenine cuta mara kokre ngene atwanena piti nemi c me cabu. Peei cina c me miiji singi ne j al cnutusi, cebine kokre cama noomlusi c me t  pe me niiya singi mule wawename. ²⁴ Cane peei name pi babo ngenecu m pu g ne. Laati te lbibi gyene cebine asatame ai niiya mule cabu ca, lui te cebine nacanuge c me budre me? ²⁵ Peese nyene Yeesu Keriso! Tabe te  secrera gaabe ne itu jewenuji. Baborage eso Acejiyame t  pume, lui te Yeesu ne tityepuji mibibine  tityerame!

Yoo siige, mimerage kokre ca mine äblicäco Acejiyame me Cotre wawename, ngänu gyene mime singi pisi nyene, ingle mime tääpe me niya singi te mibibine niwadininuge niya gaabe cabu me.

8

Aceji Seemo me Ätityera ca Mime Ireclota Müji Gemi

¹ Yoo, ai ingle naace gyene Acejiyame mibibine nininuge, “Weene kälyä gemi,” page lui biname cina Keriso Yeesu cabu temi, teepi lica teeme niya mule me daremu cirege päpäna Acejiyame bau ca. ² Aceji Seemo mibibine ire nitwinuge, niwadininuge Yeesu Keriso me toraca ireclota gaabe cabu. Peei name pi page niya ngene atwanena teepi kokre lica gemi cebine acaname niya gaabe cabu me, piyepu cane asatäneji gäne niya mule me budre daremu cabu ca. ³ Yoo, Acejiyame me Cotre Mene te äblicäco biname bine müji gaabe cabu me waadena, ingle binamerage bime kokre ibibi lica gyene teeme niya ngene atwanena äyecrejame. Acejiyame peei name pi nuuja gaabe ne itu jewenuji, teemerage Bägrä ne itu tityepuji budre äbitame mime niya mule daremu ne äyebtingtame. Yeesu täduji biname pana, biname pana ngenecu cama, yepä teeme mara kokre puga ge niya ngene atwanena bine ägyemame. Tabe conocäco enajuji biname bime niya mule äyebhengame. ⁴ Puma cita ca mine müji gemi Acejiyame me conocäco cotre bine wawename, mine liba kokre ne acata Aceji Seemo bau ca mime niya ngene atwanena bine äyebhengame. ⁵ Biname lui cina yaacrajuge teeme tääpe me singsingi mule cabu, teepi jäje ngene jwaatwananinusi teeme tääpe me singi wawename, yepä biname lui cina yaacrajuge Aceji Seemo lipu jaajemuge teebibine, teepi jäje ngene jwaatwananinusi Aceji Seemo me singi wawename. ⁶ Biname lui cina teeme tääpe me singi jaawenusi teepi budre gaabe cabu temi. Biname lui cina Aceji Seemo me singi jaawenusi, teepi toraca ireclota gaabe cabu temi, piyepu ngenecu poode pa jääpänesi. ⁷ Yoo, biname te liba teeme singi mene yäätəcijuge, tabe cubuyame pana läbituge Acejiyame täapume, ingle naace gyene tabe Acejiyame me Cotre Mene lica yaacatuge, piyepu peei ätecija cäco gaabe cabu tabe äblicäco Cotre Mene wawena. ⁸ Yoo, teepi lui cina teemerage singi bine jaawenemusi, teepi äblicäco Acejiyame ne ngenecu müji me wawena.

⁹ Yepä, weene pepu lica gemi. Weene weemerage singi lica jaawenemuye, yepä weene Aceji Seemo me singi jaawenemuye, liba toraca pisi nyene Aceji Seemo weeme trupa cabu je. Yoo, laati bau Keriso me Seemo lica gyene, pui biname cuta lica gyene Keriso me biname. ¹⁰ Yepä, Keriso me Seemo liba pisi nyene weeme yepäyepä trupa cabu, weeme tääpe puu budre pagege niya mule name pi, yepä weeme seemo toraca ireclota cama gyene page piyepu iyeteta, ingle naace gyene Acejiyame weebibine teeme täapume conocäco me ituge wawena. ¹¹ Cuta piyepu, liba Acejiyame me Seemo pisi nyene weeme cabu, Acejiyame lui te Yeesu ne budre cabu ca itu erpinantuji, tabe cuta weeme budre tääpe arpinera cirege. Aceji Seemo lui te weeme cabu yaanajuge teeme kokre pisi nyene peei ne wawename.

¹² Yoo, cäme binamewale, ai name pi mine müji Aceji Seemo me gaabe ne yaacatusi, gone weeme tääpe me singi ne yaacatuje, ¹³ ingle weene liba peei mule ne jaawenuye, weene budre daremu cirege päpäna. Yepä, weene liba weeme tääpe me singi ne jäägyuye Aceji Seemo me kokre ca, cuta lica peei niya mule wawename, weene toraca ireclota ne cirege päpäna iyeteta. ¹⁴ Lui cina Aceji Seemo me singi yaacatusi, teepi Acejiyame me bägrä gemi. ¹⁵ Yoo, Acejiyame Aceji Seemo ne tityepuji weeme cabu lenajame lica weebibine ädretnecame piyepu cääri wälu me wawename, yepä mibibine teeme ingle cabu me waadename. Mine piba müji gemi teebine awejena egä, “Babe, cime babe.” ¹⁶ Aceji Seemo te mime yepäyepä seemo bine jaajanemuge egä, “Maane toraca Acejiyame me bägrä gäte.” ¹⁷ Mine lui Acejiyame me bägrä gemi, mine Babe me babo müji ne teeme bau ca cirege päpäna. Keriso müjirage puupu ne ituge acata teeme Babe bau ca, piyepu mine ten cama gigrä cirege lenaja. Page mine poto mäpu bine jääpänemusi mime müji kaakesea name pi, Keriso lipu mäpu ituge päpäna. Yepä, mine liba teeme täapume mäpu bine jääpänemusi ai gawecewe cabu, mine cuta teeme jamyacu apaclyera cabu cirege lenaja.

Mine Teeme Jamyacu Apaclyera cabu Cirege Lenaja

¹⁸ Cane ngene jotwananenine egä page mime mäpu lui matimatirage gemi jamyacu apaclyera cabu ca, Acejiyame lui ne cirege awabudnita mime täapume. ¹⁹ Iyeta gwidape Acejiyame lui bine itu tenenemuji, teepi cängenarage jewagrijenisi ngäluugaabe bimü ne, Acejiyame lui bimü cabu cirege awabudnita teeme jäjäcräneji bägrä bine. ²⁰ Ai ingle naace gyene pui sasa padare cabu ca biname cina liba conocono mule ne niinäce jewenujisi, iyeta gawecewe gwidape cina ocwäwäneji cabu icrajuji. Iyeta gwidape cina singi cängena lenajame, yepä biname bime conocono mule name pi Acejiyame teebibine pepu ireclota ecäremuji, ingle tabe singi gyene iyeta gwidape cina cängena awagrijaime pui bimü täapume

teepi Acejiyame me binamewale cama gigri äsecrera ne päpäname ai mäpu ireclota cabu ca. ²¹ Yoo, iyeta ai gawecewe gwidape cina cirege äsecrera teeme ocwäwäneji cabu ca, piba mine lui cina Acejiyame me bägrä gemi, teepi mine cama pui jamyacu äsecrera cabu cirege lenaja. ²² Ingle mine umle gemi egä iyeta ai gawecewe gwidape cina keke mene cama cewe loocanininusi, epu pana magebi te lipu bägrä aplimla täापume cewe loocanunge ngälu page. ²³ Lica gawecewe gwidape taatu, yepä cuta mine te cewe loocanininago, pui padare ne cängena jewagrijenisi, Acejiyame liba mibibine teeme jājācräneji bägrä me toraca wawename, mime täape tabe liba äsecrera ai gawecewe mäpu cabu ca. Aceji Seemo lui page mime cabu enajenige, tabe niinäce gwidape gyene pui jamyacu ireclota cabu ca mine lui ne cirege päpäna. ²⁴ Mine ätrunga cama teeme padare ne jewagrijenisi, cuta pei ätrunga ca mine äsecräreji ituge äbita pei jamyacu ireclota ne cirege päpäname. Yoo, mine liba gwidape ne cirege päpäna, siige mine lica ingwe ca awagrija pei gwidape täापume, ingle pisi nyene page. ²⁵ Yepä, mine liba camuge päpäna, mine piba cängena ätrunga cama jewagrijenisi.

²⁶ Yoo, mine liba kokre lica puiyepu umle lica gemi lipu mene Acejiyame bau jajime, piba Aceji Seemo te mibibine nitityärininuge. Tabe te Acejiyame ne yaaweanuge mime täापume mara pana mule ca. Teeme irecu ätumuta mule lui miijirage gyene mene cabu ca, ²⁷ piyepu Acejiyame lui te jääpänemuge biname bime singi bine teeme ngenecu bora, tabe cuta piyepu umle gyene Aceji Seemo ngena singi gyene mime täापume. Aceji Seemo te teebine yaaweanuge pui gwidape piyepu mule täापume Acejiyame lui singi gyene teeme ätrunga biname bine ceerame. ²⁸ Yoo, mine umle gemi egä iyeta lui te läbituge, pei cabu Acejiyame kaakesea jaawenuge mime miiji täापume, lui cina babo singi gemi teeme täापume, piyepu lui bine tabe piyepu me itu niwenininuji ten cama iyeteta lenajame. ²⁹ Tabe lui biname bine niinäce jejäcremuji, teebibine cuta mara me jebenemuji teeme Bägrä Yeesu pana äbitame. Yoo, teeme Bägrä naane me läbituge mime täापume, cuta mine teeme täापume igane gemi. ³⁰ Yoo, Acejiyame lui bine mara me ituge wawena, teebibine cuta ala taasogcemepi, piyepu tabe lui bine ituge ala asogleca, tabe cuta teebibine teeme täापume conocäco me jaawenemepi, piyepu lui bine conocäco me ituge wawena, tabe cuta teebibine teeme jamyacu apacljera cabu itu yaacranemepi.

Lipu Baborage Gyene Acejiyame me Owecu piyepu Singi Mime täापume

³¹ Yoo siige, mine ngena mene jüicusi iyeta pei ätityera poto cidi me? Acejiyame liba mine cama gyene, laati te piba ibibi gyene mibibine toraca niya wawename? ³² Tabe teemerage Bägrä ne lica sewecnistuji, yepä teebine owecu gaabe cabu tiyepuji budre äbitame iyeta mime täापume. Pei cabu ca mine umle gemi egä tabe singi iyeta gwidape Bägrä cama mibibine ceerame. ³³ Biname cina äblicäco Acejiyame me jājācräneji biname bine jaji egä, “Weene äblicäco Acejiyame gome lenaja, ingle weene conocono gemi.” Teepi äblicäco gemi pepu icana, ingle Acejiyame te ituge jaji egä, “Weene cäme opo gaabe je conocäco biname gemi.” ³⁴ Cuta Yeesu Keriso tabe licarage mibibine aina, yepä tabe lui budre äbituji, piba cuta arpinantuji Acejiyame me camu poto ime gome lenajame, siige tabe Acejiyame ne ewejanenige mime miiji täापume. ³⁵ Mine liba mäpu piyepu pita jääpänsi, coo ämugetna nuuja biname bau ca; mine liba loolo me cewe piyepu gwidape cäco; coo mine liba drowä biname coo piyepu budre jääpänsi, nää pui padare Keriso me singi cuta pisi nyene mime täापume? Yoo, pisi nyene. ³⁶ Oogäräneji Mene te jüicunige egä, “Määme täापume teepi singi cibibine budre me agleca iyeta padare bimü gaabegabe.

Mibibine epu niwenininusi maamoi liiyepu, lui me agleca padare mameta gyene.”

³⁷ Siige, ngänu gyene ngena te tädenige, Keriso me baborage singi pisi nyene mime bau; tabe nitityäripi mine toraca uutrutame. ³⁸⁻³⁹ Cane umle gäne egä nuuja gwidape te äblicäco mibibine äyeblena Acejiyame me singi cabu ca. Mime budre cabu piyepu mime ireclota cabu teeme singi pisi nyene. Nuuja kokreyame gwidape epu pana mename seemo coo piyepu cable coo maadubi, teepi äblicäco mibibine äyeblena Acejiyame me singi cabu ca. Piyepu page ngena cina äbitininisi cuta ciige ngena cina cire läbitipesi, piyepu ngena pisi nyene dume cabu, coo ngena pisi nyene gawe ngalebora, teepi cuta äblicäco mibibine äyeblena Acejiyame me singi cabu ca. Yoo, iyeta Acejiyame lui bine tawenemuji, pei bime nuuja te äblicäco mibibine äyeblena Acejiyame me singi cabu ca, mine lui ne jääpänsi mime Yageyame Keriso Yeesu name pi.

9

Israela Biname bime Äjācra poto cidi me

¹ Cane toraca mene jijenininine, lica walya, ingle cane lui Keriso me biname gäne. Cäme ngenecu bora Aceji Seemo te lui ire natwenige, pei cabu ca cane ngena ca eglenine egä cane walya lica gäne. ² Cäme toraca mene agha: Cane baborage ngenecu mäpu piyepu baborage owecu gäne cämorage Israela binamewale poto cidi me, ingle teepi singi lica

gemi Keriso me ätityera ne acatame. ³ Cane liba ibibi gäne teebibine ätityerame, cane singi căme puupu Keriso me biname cama teebibine ceerame cane niya puupu me äyebingtame, yepä peei äblicăco gyene. ⁴ Bucurage Israela biname cina Keriso ne jäägyusi, puu teepi lui Acejiyame me sasa cabu ca jăjăcrăneji biname gemi; cuta tabe jamyacu apacıyera teeme bau itu eboclomtuji, teebibine jăje tejanenanemumi egă, “Cane weeme Acejiyame gäne; weene căme biname gemi;” puu tabe teebibine cotre mene piyepu iiwăreja mule itu ecăremuji, cuta piyepu tabe teebibine mene jejemuji ingwe ca äsecrera biname ne ätyepame; ⁵ puu modamoda biname Abrahamo, Isacako, piyepu Yakobu teeme kaakesaare gemi, cuta piyepu Keriso liba biname me äbituji, tabe Israela biname ge, yepä teepi teeme Keriso ne jäägyusi. Yoo, Acejiyame lui te iyeta biname bine yaawademuge, miiji teeme ngii ne awepyerăjame ngălu căco. Eso!

⁶ Peei lui lica epu egă Acejiyame me jajeji mene toraca lica läbituge, yepä apu egă lica iyeta Israela biname lui Acejiyame me toraca Israela biname gemi. ⁷ Piyepu, lica iyeta Abrahamo me kaakesaare lui Acejiyame me băgră gemi. Acejiyame Abrahamo ne jejuji egă, “Măăme toraca kaakesaare eei gemi lui măăme băgră Isacako bau ca.” ⁸ Yoo, lica iyeta Abrahamo me kaakesaare lui Acejiyame me băgră gemi, yepä teepi taatu lui cina Isacako me kaakesaare gemi, inge Isacako itu aplimluji Acejiyame me jajeji mene ibibi me äbitame. ⁹ Pui mene lui egă, “Toraca padare te liba tatyaramtenige, cane piba tacnenutenine, siige Saara imăbăgră cama pa waanajepi.”

¹⁰ Cuta piyepu ingwe ca Isacako babo äbituji, coga ocatuji, siige teeme coga Rebeka me padare te liba mameta ge päädepăde imăbăgră păpăname, ¹¹⁻¹² Acejiyame piba teebine jojuji egă, “Igame te naane ne cire jaatwepi.” Tabe niinäce peei mene Rebeka ne jojuji; Rebeka ingwe ca imăbăgră bine jăpănuji. Yoo, inge naace gyene camuge teeme aplimla, peei neeneni imăbăgră lica nuuja miiji coo piyepu niya mule ituge wawena pui padare cabu Acejiyame liba teeme mage ne pui mene jojuji. Yoo, lui te äbituji, Acejiyame ngene ca itu egluji peei ne wawename, lica băgră bime mule name pi, yepä Acejiyame tabe singi ge pepu wawename. ¹³ Oogărăneji Mene pisi nyene peei poto cidi me Acejiyame lui jiicuji egă, “Cane Yakobu tăăpume singi äbitujine, yepä Esau ne jigyjune.”

¹⁴ Năă, weene ngene jotwananiniye egă Acejiyame me mule conocono gyene? Pepu gone! ¹⁵ Inge Acejiyame Moose ne itu jejuji egă, “Cane laati ne singi ätityerame, cane peei biname ne yăätityărune. Căme bau sine laati me tăăpume cane owecu läbitune.” ¹⁶ Yoo, Acejiyame liba biname ne jaajuge, coo lica jaajuge, peei lui biname me singi piyepu wawena cabu ca lica birige, yepä naace name pi egă Acejiyame singi pui biname ne owecu wawename. ¹⁷ Oogărăneji Mene cabu Acejiyame te Aikupito Mopeyame ne jejuji egă, “Cane meebine Mopeyame me naawenujine, ai inge naace popi cane singi maane căme kokre ne awabudnitame biname bime tăăpume, cuta piyepu ai inge naace popi egă iyeta biname ai gawecewe cabu umle äbitame căme ngii poto cidi me.” ¹⁸ Yoo, peei mene cabu ca mine umle läbitinago egă Acejiyame liba singi biname ne owecu wawename, tabe jaawenuge; coo piyepu tabe liba singi nuuja biname ne ätecija căco wawename, tabe cuta peei ne jaawenuge.

Acejiyame Umle Gyene Măpu Daremu Ceera Biname bine; coo Cuta Umle Gyene Owecu Wawename Biname bine

¹⁹ Căme binamewale, pama weeme yepä te singi gyene cebine ätemlame egă, “Acejiyame me mule liba pepu gyene, tabe piba äblicăco biname ne aitra teeme ätecija căco mule tăăpume, inge biname te äblicăco Acejiyame me singi äsăda.” ²⁰ Yoo, căme biname, maane laasi năte? Năă, maane ibibi găte Acejiyame ne äseblecăjame? Maane biname găte. Măăme ireclota epu pana gyene diiba liiyepu. Diiba te miiji lica teeme raranga biname ne ätemla egă, “Maane cebine apu ngenome nawenite?” ²¹ Inge naace gyene diiba raranga biname te miiji ge teeme singi gwidape ne wawena teeme laame cabu ca. Tabe miiji ge neeneni diiba raranga yepä laame tomi cabu ca, yepä diiba ne raranga miijimi kaakesea tăăpume cuta nuuja ne raranga domăji tăăpume.

²² Yoo, Acejiyame me mule pepu pana gyene. Tabe miiji gyene biname bine awabeja egă tabe singi lica gyene niya mule tăăpume, cuta teeme kokre pisi nyene niya mule biname bine äyebingtame. Yepä, tabe wata lica yăäyebingemuge. Tabe dăăgudăgu läbitanuge biname bime tăăpume lui bime niya mule name pi tabe teebibine miiji gyene äyebingtame. ²³ Tabe cuta singi gyene teeme jamyacu apacıyera ne aboclomtame mime tăăpume, tabe lui bine owecu niweninige, lui bine tabe ituge miiji me waweneca teeme apacıyera tăăpume. ²⁴ Mine peete nemi tabe lui bine itu ala nisoglicipi: lica eei taatu bine lui cina Israela biname bime cabu ca gemi, yepä cuta eei bine lui cina nuuja gawe biname bime cabu ca gemi. ²⁵ Agesa teeme mene jăjăcra poto cidi me teeme mename biname Hosea lui soogărui egă,

“Cane nuuja biname bine căme băgră me cire jaawenemepene,
lui cina lica căme ingle cabu ituge.

Cane teebibine owecu cire jaawenemepene,
lui cina căme owecu cabu lica ituge lenaja.

²⁶ Cuta lui gawe cabu biname bine ituge jaji egă,
‘Weene lica gemi căme ingle biname,’
puma cane teebibine cirege jaji egă,

‘Cane lui Iyeteta Lenajayame gāne, weene căme băgră gemi.’”

²⁷ Cuta nuuja mene pisi nyene Oogărăneji Mene cabu mename biname Isaya te jiicuji Israela biname bime poto cidi me egă, “Israela biname cina bucurage cire läbitipesi epu pana secre liiyepu, yepă mime Yageyame te teeme cabu ca nesae pana biname taatu cire yaawademepi; ²⁸ ingle tabe biname bine cirege jaatranemepi poto biname piba wata äyebenga teeme opo gaabe ca.” ²⁹ Yoo, Isaya cuta nuuja ciige mene ituge jaji egă, “Yageyame teeme kokre baborage gyene. Tabe liba owecu lica gyene mine Israela biname bime täápume, tabe mibibine iyeta cire nibyageceji, epu pana tabe Sodoma piiyepu Gomora cewe biname bine lipu itu jiiyagecemuji. Yoo, piba mime nuuja kaakesaare lica cirege.”

Acejiyame me Mijji Mene ne Israela Biname cina Lica Jäätrungusi

³⁰ Yoo, cane ngena poto cidi me jücenine agesa: Gawe maramara biname lui cina lica teemämu läbitininusi Acejiyame täápume conocăo äbitame, Acejiyame teebibine conocăo me itu jaawenemepi, ingle naace gyene teepi teebine jäätrungepsi, ³¹ yepă Israela biname teepi cotre mule ne liba jäärngusi peei cabu ca Acejiyame täápume conocăo äbitame, teepi conocăo lica jääpānusi. ³² Ingle agesa: Teepi teeme waweneca mule ne jäätru-ngusi, cuta lica Yeesu ne jäätrungusi teeme conocăo täápume. Peei toraca mene Yeesu me budre poto cidi me, teepi lui ne opo lica yaawatnepesi, epu pana gyene teeme gaabe cabu kula liiyepu, teepi lui ne lica jääpānusi, piba peei cabu ca yaatrametnemuge. ³³ Pisi nyene Oogărăneji Mene peei poto cidi me egă Yeesu lui epu pana gyene kula liiyepu Israela biname bime täápume. Mene agesa:

“Ire, cane kula ne yaacitene Yerusalema cewe cabu Siiyona podo cabu je,
lui te jaawenemuge biname bine naabe atropengāja,
eei kula lui te teebibine jaawenemuge atrametname.

Yepă, lui cina teebine jäätrungusi,
teepi lica birige ajiri me äbita,
yepă mijji lenaja ne jääpānusi.”

10

¹ Căme ätrunga binamewale, căme babo singi pisi nyene cămerage Israela biname cina conocono mule cabu ca äsecrera iyeteta ireclota ne pāpāname. Cane Acejiyame ne peei täápume ewjejanenine. ² Cane teeme mule poto cidi me weebibine umle jiweninine egă teeme toraca singi pisi nyene mijji kaakesea Acejiyame täápume waweneme, yepă teepi toraca umle lica gemi lipu gyene Acejiyame me biname ne äbitame. ³ Teepi toraca gaabe ne opo lica yaawatnusi Acejiyame te lipu biname bine teeme täápume conocăo me jaawenemuge. Teepi singi gemi teemämu gaabe waweneme cuta singi lica Acejiyame te teebibine teeme täápume conocăo waweneme teeme gaabe ca. ⁴ Yoo, Keriso te cotre wawena mule ne ngālu me ituge acita biname cina peei ca conocăo me äbitame, ai ingle naace popi iyeta biname lui cina teebine jäätrungusi, siige teepi conocăo läbitininusi Acejiyame me opo gaabe je.

Äsecrera Gaabe Pisi Nyene Iyeta Biname bime täápume

⁵ Siige, Moose te mene itu soogāremuji cotre wawena mule ca Acejiyame me opo gaabe je conocăo me äbitame apu egă, “Laati te cāngena jaawenemuge iyeta gwidape lui poto cidi me cotre mene te jücenige, tabe peei cabu ca iyeteta ireclota cirege pāpāna.” Yepă, biname cina äblicăo peei ne wawena. ⁶ Yepă, nuuja mene pisi nyene ätrunga ca conocăo äbitame apu egă: “Biname te äblicăo otni cabucewe me Keriso ne äiname, ⁷ piiyepu biname te äblicăo otni piiyemrage cupicu cabu me Keriso ne puma cita ca acaname.” ⁸ Yoo siige, teeme nuuja ingle lica gyene pepu waweneme, ingle Keriso itu täinuji biname bine ätityerame piiyepu cuta itu arpinantuji budre cabu ca. Biname lui cina cime mene Keriso poto cidi me jäätrungusi, teepi peei ca Acejiyame täápume conocăo läbitininusi. Moose te jiicuji egă, “Acejiyame me mene cudecewe lica gyene, yepă weeme ngenecu bora piiyepu weeme tage cabu pisi nyene.” ⁹ Peei name pi weene liba tage ca jücemuye egă, “Yeesu lui căme Yageyame,” piiyepu ngenecu cama jäätrunguye egă, “Acejiyame te Yeesu ne budre cabu ca erpinantuji,” weene piba äsecräreji gemi iyeteta ireclota pāpāname. ¹⁰ Ingle naace gyene mine liba ngenecu cama jäätrungusi, mine Acejiyame täápume conocăo

läbitininusi, cuta liba tage ca peei ätrunga poto cidi me jicemusi, mine äsecrera gaabe ne jääpänusi. ¹¹ Yoo, Oogäräneji Mene te jicenige Keriso poto cidi me egä, “Lui cina teebine jäätrungusi, teepi lica ajiri me äbita, yepä miiji lenaja ne jääpänusi.” ¹² Peei mene lui iyeta biname bime tääpu myene, ingle naace gyene gaabe mara lica gyene Israela biname bime tääpume piiyepu nuuja gawe biname bime tääpume. Keriso lui yepä Yageyame gyene iyeta ätrunga biname bime tääpume. Tabo babo miiji jaawenemuge iyeta lui cina teebine yaawejanusu. ¹³ Oogäräneji Mene cuta jicenige egä, “Iyeta biname lui cina Yageyame me ngii yaawejanusu, tabe teebibine niija cabu ca cire yääsecräremepi.”

¹⁴ Yepä, biname cina teebine lipulipu yaawejanusu, liba teeme ätrunga lica? Piiyepu teepi lipulipu jäätrungusi, liba peei mene lica ituge ätecija? Cuta piiyepu teepi lipulipu yäätecijemuge, teebibine liba mene lica ituge jaji? ¹⁵ Piiyepu biname cina peei mene teebibine lipulipu jaajemusi, teepi liba lica äteyepäneji gemi? Oogäräneji Mene pisi nyene egä, “Babo miijirage gyene teeme otni lui cina Miiji Mene yaacanusu.” ¹⁶ Yepä, lica iyeta biname cina peei Miiji Mene ne yaacatusi. Sasa mename biname Isaya te jicuji egä, “Yageyame, laati te cime mene jäätrungepesi?” ¹⁷ Yoo, biname cina niinäce mene yäätecijemuge, piba jäätrungusi, piiyepu biname cina miiji Keriso poto cidi me mene jajanena nuuja biname cina ätecijame.

¹⁸ Yoo, Israela biname bime poto cidi me, cane singi gäne jajime egä teepi peei mene itu itecijemuji. Oogäräneji Mene pisi nyene peei poto cidi me egä, “Mename biname cina ituge otni iyeta poto ta.

Pui Miiji Mene itu waatnetnäjepi iyeta gawecewe cabu teepi luma icrajuji.”

¹⁹ Cuta piiyepu Israela biname bime padare puga ge cängena umle äbitame. Niinäce Moose te Acejiyame me mene Israela biname bine jejemuji egä,

“Cane gawe maramara biname bine miiji cire jaawenemepene,
weene piba ngenecu bora claabe me cire äbitipeye teeme miiji poto cidi me,
biname lui bine weene yaainemuye ‘umle cäco biname’ ca.”

²⁰ Cuta Isaya Acejiyame me mene nuuja gawe biname bime umle poto cidi me wälu cäco jicemuji egä,

“Biname cina cebine ituge päpäna,
lui cina lica närngenusu.

Cane teeme bau me itu laboclomtopene,
lui cina cäme tääpume lica nätemlusi.”

²¹ Yepä, Israela biname bime poto cidi me tabe jicemuji egä,

“Iyeta bimu cane ime uutanujine ngälu mäml teebibine cäme bau awecname,
yepä teepi ätecija cäco piiyepu ägyiägyi biname gemi.”

11

Acejiyame Israela Biname bine Owecu Jaawenemuge

¹ Cane weebibine itemlininine egä Acejiyame nää teeme Israela biname bine ituge jägyi? Eewe, licarage! Cane age säne yepä Israela biname, Abrahamo me kaakesaare gäne, Benjamina me ingle cabu ca. ² Yoo, Acejiyame lui bine niinäce jejäcremuji, teebibine lica iyebngemuji. Weene umle gemi Oogäräneji Mene Eliya poto cidi me, tabe Israela biname bine lipu jeitnäjemuji, Acejiyame ne jejuji egä. ³ “Yageyame, teepi mäame mename biname bine ituge agleca piiyepu mäame iiwäreja dade bine ituge iiglicneja. Cane taatu ätrunga cama gäne, piiyepu teepi singi cuta cebine aglime.” ⁴ Agesa Acejiyame me daremu mene: “Eewe, maane taatu lica gäte. Cäme seben tausen biname piti nemi, lui cina kokorare lica ituge äpedna pui uuje ngii Baala tääpume teebine awejename.” ⁵ Page cuta pepu gyene: mine nesae pana biname piti nemi Acejiyame lui bine ituge jäjäcra teeme owecu name pi. ⁶ Tabe biname bine jäjäcremuge owecu name pi, lica pui biname bime miiji mule name pi. Yoo, Acejiyame liba yepä biname ne jaajuge miiji mule name pi, peei jaji lui daremu pana birige miiji mule tääpume, yepä pepu lica gyene. Acejiyame biname bine jäjäcremuge toraca owecu name pi.

⁷ Yoo, Israela biname cina lica jääpänusi teepi ngena tääpume jäätrungusi, yepä pui nesae pana biname Acejiyame lui bine jejäcremuji, teepi jääpänusi. Nuuja Israela biname cina ätecija cäco läbitininusi. ⁸ Peei ätecija cäco mule poto cidi me Oogäräneji Mene pisi nyene egä, “Acejiyame teebibine ngene atwanena dumä itu jewenemuji.

Teepi irecu ca lica päpäna,
tablame ca lica ätecija Keriso poto cidi me, ngälu page.”

⁹ Cuta peei poto cidi me Daawida te jicuji Oogäräneji Mene cabu nuuja poto ca egä, “Teepi dade cabu adnatäreji gemi deedei tääpume.

Teepi ngene pa jwaatwananipesi egä, ‘Poode pisi nyene Acejiyame cama,’

yepä teeme ätecija cäco mule te teebibine pa joomlemepi.

Dici abrenuteji gyene.

Teepi pa yaatrametnemepesi, teeme mäpu daremu pa jääpänepesi.

¹⁰ Teepi irecu määsumäsu pa läbitipesi,
piba teepi äblicäco päpänenä.

Teepi äcupenapena otni teeme mäpu name pi.”

¹¹ Yoo, Israela biname cina teeme ätecija cäco mule name pi yaatrametnemuge, yepä teeme atrametna iyeteta lica gyene. Israela biname bime mule name pi Acejiyame te nuuja gawe biname bine padare ecäremuji teeme biname me äbitame. Israela biname cina piba ire patre pa yaaglecemepesi nuuja gawe biname bine teeme müiji name pi, cuta teepi piba singi pui Müiji Mene ätecijame. ¹² Yoo, Israela biname bime niija mule name pi nuuja gawe biname cina babo müiji ne ituge päpäna. Peei müiji cuta baborage cire läbitepi, iyeta pui jäjäcräneji Israela biname liba ireclota biname bime tomi cabu cirege äbäcna.

Olibi Uli cabu ca Mine Acejiyame me Mule Opo Yaawatnusi

¹³ Yoo, weene gawe maramara biname, ai mene lui weeme tääpume. Cane lui Acejiyame me ätjepäneji biname gäne weene gawe maramara biname bime bau me, cuta piijepu peei kaakesea cäme tääpume babo müijirage gyene. ¹⁴ Cane yaapicetnärune cäme Israela biname bine ire patre agli me wawenama pama poto cina Acejiyame me owecu mule cabu äbäcname iyeteta ireclota ne päpäname. ¹⁵ Acejiyame Israela biname bine liba ebmalemuji teeme ätecija cäco mule name pi, tabe piba nuuja gawe biname bine teeme biname me jebenemuji. Yepä, Israela biname cina teeme ätecija cäco mule ne liba cire yaabmalepesi, Acejiyame cuta teebibine cire yaawademepi. Teepi piba epu pana budre biname liijepu lui cina täcnärepi ireclota me.

¹⁶ Calwacupi ire acita mule pisi nyene yepäyepä deedei waadename iyeta deedei aboclomäjame müiji tääpume. Yoo, pepu pana Israela biname bime tääpume cirege äbita. Abrahamo lui Acejiyame me ingle cabu ge, piijepu teeme kaakesaare Acejiyame me ingle biname cirege äbita. Yoo, Israela biname lui epu pana gemi uli liijepu: teeme braju liba Acejiyame memi, teeme ciipe cuta teemi nemi. ¹⁷ Yoo, Olibi uli cabu ca mine Acejiyame me mule ne opo ewatnenisi. Biname te poto ciipe bine yaacnapecmuge teeme ätemäneji olibi uli cabu ca, piba pui ciipe bime puupu cabu tuwängle me glunu bora olibi uli me ciipe bine jäätäyemuge puma uttaname pui calwacupi uli cabu. Weene nuuja gawe biname lui epu pana peei glunu bora olibi uli me ciipe gemi. Page weene kokre piijepu müiji bine jääpänemuye Israela biname cama, peei glunu bora olibi uli me ciipe teeme ngedo ne lipu yaacatusi ätemäneji uli me braju cabu ca. ¹⁸ Weene gone gawe me jaawenemuye Israela biname bine, lui bime puupu weene ituge waadana. Weeme nuuja ingle lica gyene weemämu awepyeräja. Weene ciipe pana gemi, lica braju pana. Weene weeme kokre yaacatuye braju cabu ca.

¹⁹ Pama weene apu ngene jotwananiniye egä, “Yoo, peei niinäce ciipe bine ituge acnapa cime tääpume puupu wawename.” ²⁰ Peei toraca gyene. Teepi acnapäneji ge, ingle naace popi teepi ätrunga cäco gemi, egäcäro weene teeme puupu cabu inajaninuge, ingle naace popi weene Keriso ne jäät runguye. Yepä, weene gone ngenecu pudupudu; weene ire cängena inajipi! ²¹ Acejiyame te lica Israela biname bime ätrunga cäco mule ne ire taatu jaacituge, yepä teebibine ituge äyeblega teeme puupu cabu ca, ngänu gyene teepi lui ätemäneji uli me ciipe pana gemi. Peei name pi tabe cuta lica weebibine papa ire taatu jicitininuge. ²² Weene müiji peei cabu ca abiberäja egä Acejiyame me owecu pisi nyene cuta piijepu teeme ablaweja. Tabe Israela biname bine kokre cama yaablawemuge lui cina ätecija cäco gemi, yepä tabe weebibine owecu jiwenininuge weene liba teebine jäät runguye. Yepä, weeme ätrunga mule weene liba abmala, weene acnapäneji ciipe pana pagege äbita. ²³ Israela biname cina liba teeme ätecija cäco mule ne yaabmalusi Yeesu ne ätrungame, Acejiyame piba teebibine teeme puupu cabu cääri pa yaacranemepi weene cama. Teeme kokre pisi nyene peei ne wawename. ²⁴ Yoo, weene nuuja gawe biname lui glunu bora olibi uli ciipe pana gemi, biname te lui ciipe bine icnapemige, ewademige, puu opopo gyene, siige teeme ätemäneji uli cabu erpecnemige. Yepä, Israela biname lui ätemäneji uli ciipe pana gemi. Acnapäneji ciipe seeji plowa gyene cääri arpetna pui yepä uli cabu.

Acejiyame te Iyeta Biname bine Owecu Jaawenemuge

²⁵ Cäme ätrunga binamewale, pisi nyene mene lui ne lica ituge awabudnita, yepä cane singi gäne weebibine umle wawename naace tääpume weene piba weemämu lica awepyeräjame. Agesa peei mene: Israela biname bime ätecija cäco mule lica gyene iyeteta, yepä peei mule me ngälu gaabe pisi nyene. Iyeta nuuja gawe biname Acejiyame lui bine ituge jäjäcra, teepi liba teeme bau cirege atyareca, ²⁶ piba iyeta jäjäcräneji Israela biname cina cire latatrongäripesi Yeesu Keriso bau me. Acejiyame cuta teebibine cire yääsecräremepi iyeteta

ireclota cabu me waadename. Teeme Oogäräneji Mene cuta pisi nyene peei poto cidi me egä,

“Äsecrera biname te cire tädepi Siiyona podo cabu ca Yerusalem ce we je.

Taba Yakobu me kaakesaare bine cire yaatrongäremepi teeme niija mule cabu ca.

²⁷ Cane ai jajeji mene cire jaawenemepene teeme täapume,

cane liba teeme niija mule bine cire yääyebengäjemepene.”

²⁸ Yoo, page bucurage Israela biname lui cubuyame pana gemi Acejiyame me Miiji Mene poto cidi me, siige weene nuuja gawe biname cina babo miiji ne peei cabu ca ituge päpäna. Yepä, Acejiyame me owecu pisi nyene Israela biname bime täapume, ingle tabe teebibine ituge jäjäcra, cuta mene itu ecäranemuji teeme sasa kaakesaare bine egä, “Weeme kaakesaare cina căme singi biname me cirege lenaja.” ²⁹ Yoo, Acejiyame me jäjäcra lui iyeteta gyene; tabe lica teeme miiji ne acwecnista, cuta lica teeme mene ne mara me wawena. ³⁰ Yoo, niinäce padare cabu weene nuuja gawe biname cina Acejiyame me singi lica jaawenuye, yepä page weene Acejiyame me owecu ne ituge päpäna, ingle Israela biname cina teeme mene lica itu jecatujisi. ³¹ Yoo, page teepi ätecija căco gemi, ingle Acejiyame me owecu pisi nyene weene nuuja gawe biname bime bau, yepä teepi teeme niija mule ne cire yaabma-lepesi cuta Acejiyame me owecu weene cama cirege päpäna. ³² Ingle naace gyene Acejiyame iyeta biname bine joomlemuge niijaniya mule cabu, naace täapume tabe teebibine iyeta owecu cama yäätityäremuge.

Mine Miiji Acejiyame ne Awepyeräja

³³ Acejiyame babo miijirage gyene biname bime täapume. Taba babo ngene atwanena cama piyepu babo umle gyene. Nuuja biname te äblicăco gyene teeme ngene atwanena aboclomäja. Nuuja biname te äblicăco gyene ingle ne päpäna teeme mule poto cidi me.

³⁴ Oogäräneji Mene pisi nyene egä,

“Laasi nyene biname lui te umle gyene Yageyame me ngene atwanena?

Laati te ibibi gyene teebine umle mene jajanename?

³⁵ Laati te teebine nuuja gwidape ituge ceera,

tabe lui täapume miiji daremu awecnistame?

Nuuja biname te äblicăco peei mule bine waweneca.”

³⁶ Yoo, iyeta gwidape cina seclenige teeme bau ca, iyeta gwidape cina teeme kokre cabu icrajinige, piyepu iyeta gwidape teeme awepyeräja täapume icrajinige. Mine miiji teebine yaawepyeräjesi ngälu căco. Siige, pepu yaanajeje!

12

Mine Lipulipu Lenaja Acejiyame täapume

¹ Yoo, căme binamewale, Acejiyame te babo owecu cama mibibine maramara ätityera nicärininuge, peei name pi cane weebibine jijenininine weeme ireclota teebine toraca ceerame. Weene liba ai ireclota cabu weeme tääpe piyepu weeme ngenecu teebine ceera teeme singi taatu wawenecame, Acejiyame piba ngenecu miiji gyene weeme täapume. Peese nyene toraca gaabe teebine awepyeräjame. ² Ai gawecewe me mule bine gone jaawenemuye! Gawecewe biname bime singi weemämu gone yaawaduye! Yepä, weeme ngene atwanena Acejiyame ne yäăcăruye tabe kirece me wawenecame. Weene piba taatu miiji gemi teeme singi poto cidi me umle äbitame egä ngena mule gyene miiji, ngena gyene toraca teeme täapume, piyepu ngena gyene conocăco.

³ Cane ai mene iyeta weebibine jijenininine, ingle naace gyene Acejiyame baborage owecu piyepu ätityera cebine ituge ceera. Gone ngene jwaatwananinuye egä weene baborage gemi, yepä weene miiji weemämu cängena atrana egä weeme Acejiyame miiji ätrunga liba babo gyene. ⁴ Yoo, biname me tääpe cabu maramara piicwa gemi. Pui piicwa maramara teeme cuta maramara kaakesea piti nemi. ⁵ Yoo, Keriso bau ätrunga biname teepi bucurage gemi, yepä mine iyeta lui epu pana gemi yepä biname me tääpe liiyepu. Yeese Keriso lui mope gyene, piyepu mine lui teeme tääpe me piicwa pana gemi. ⁶ Acejiyame mibibine kaakesea maramara ituge ceera, piyepu kokre peei kaakesea cängena wawenecame. Epu pana maramara piicwa bime kaakesea lipu maramara gemi, mine cuta pepu gemi. Mine miiji mimerage kaakesea cängena wawenecame Acejiyame te lipu kokre nicärinininige. Nuuja me kaakesea lui Acejiyame me mene jajanename, tabe miiji iyeta teeme ätrunga ca cängena jaajanemuge. ⁷ Cuta nuuja me kaakesea lui ätrunga biname bine ätityeräjame, tabe miiji teebibine cängena yäätityäremuge. Nuuja me kaakesea lui biname bine abiberäjame, tabe miiji cängena yaabiberäjemuge teebibine. ⁸ Nuuja me kaakesea lui biname bine bäärmii agedname, tabe miiji bäärmii mene cuta cängena jaajanemuge. Nuuja me kaakesea lui teeme poto gwidape ceerame, tabe miiji camlecamlu yäăcăruge. Nuuja me kaakesea lui biname bine waadename, tabe miiji teebibine cängena

yaawademuge gloose cäco. Cuta nuuja me kaakesea lui owecu cama ätityerame biname bine lui cina ngenecu mäpu cama gemi, tabe miiji gege ngene atwanena cama toraca yäätityäremuge.

Toraca Owecu Lipu Gyene

⁹ Sinäme owecu gone! Weene iyeta niiya mule jäägyemuye, yepä miiji mule bine ewademeye ireclota täápume. ¹⁰ Nanigane wäsi lipu singi gegi, weene pepu pana owecu jaawenemuye weeme ätrunga binamewale bine, piyepu nuuja ne opo gaabe me wata yaacituye. ¹¹ Weene durau gone, yepä kaakesea kokre cama jaawenemuye; iyeta weeme ngenecu piyepu seemo cama jaawenemuye Acejiyame täápume. ¹² Weene gege ngenecu cama inajininuge, inge weene umle gemi egä Acejiyame me babo miiji pisi nyene weeme täápume. Mäpu liba weeme bau me läduge, weene miiji bojäcu cama awagriame Acejiyame me ätityera täápume, piyepu iyeta padare Acejiyame ne yaawejanuye. ¹³ Weeme nuuja ätrunga biname cina liba gwidape singisingi yaacrajuge, weene teeme mäpu cabu teeme singi gwidape yäacäremuye, cuta piyepu gaabe cabu otnetneja biname bine ala taasoglecemuye teeme deedei piyepu ute puupu ceerame.

¹⁴ Nuuja biname liba weeme täápume conocono piyepu claabe, weene Acejiyame ne yaawejanuye teeme miiji täápume, gone awejena teeme niiya daremu täápume. ¹⁵ Nuuja cina liba gege gemi, weene miiji cuta gege äbita ten cama. Nuuja cina liba ele yaangenetnemuge, weene miiji ele angenetna ten cama. ¹⁶ Weeme owecu te miiji yepä pana äbita iyeta biname bime täápume. Weene apu gone ngene jwaatwananinuye egä, “Cane baborage gäne poto biname cabu ca,” yepä ajiri gone läbitininuye matikolä biname cama lenajame, piyepu durau gone weeme singi cäco kaakesea ne waweneme. Cuta weene gone apu ngene jwaatwananinuye egä, “Cane taatu säne umle cama biname.”

¹⁷ Nuuja biname te liba weebibine conocono jiwenininuge, weene gone daremu jaawenuye. Weene miiji mule taatu jaawenuye, piba biname cina äblicäco gemi weeme mule äitneja. ¹⁸ Gone nuuja biname ne claabe me wawena piyepu gone teeme claabe ne daremu wawena. Yoo, iyeta biname cama weene poode cama inajininuge. ¹⁹ Cäme ngenecurage binamewale, niiya mule daremu awecnista gone, yepä peei awecnista yaabmaluye Acejiyame bau me. Oogäräneji Mene pisi nyene egä, “Yageyame te jicenige: ‘Niiya mule daremu lui cäme ime cabu sine; cane te cirege ceera.’” ²⁰ Peei name pi weeme cubuyame te liba lolomecewe, weene teebine deedei yäacäruye. Tabe liba niye täápume singi, weene teebine niye yäacäruye nanime. Yoo, weeme miiji mule name pi tabe piba ajiri me läbituge. ²¹ Gone niiya ne padare ceera weebibine apremelame, pätä weene niiya cabu ca yuutrutuye miiji mule ca.

13

Weeme Mope Biname bime Mene Itecijinuge

¹ Iyeta mope biname lui cina biname bine ire jaatwemusi, Acejiyame te teebibine pui kaakesea cabu yaacrajemuge, peei name pi mine miiji teeme kaakesea mene äteciyame. Yoo, iyeta kokre nuuja biname bine ire atwime lui Acejiyame bau ca gyene. ² Laatibi teeme mope biname bime mene jäägyusi, teepi cuta Acejiyame me singi ne jäägyusi. Teepi teeme mäpu daremu pagege päpäna. ³ Miiji mule biname cina wälu lica gemi teeme ire atwi biname bime täápume, yepä conocono mule biname teepi wälu gemi. Weene liba singi lica ire atwi biname täápume wälu äbita, weene piba conocäco mule jaawenemuye. Teepi piba weebibine pa iwepyeräjipesi. ⁴ Acejiyame te ire atwi biname bine teeme kaakesea yäacäremuge weeme miiji täápume. Yepä, weene liba conocono jaawenemuye, weene miiji wälu, inge naace gyene teeme kokre cuta pisi nyene biname bine mäpu cabu acraname. Teepi Acejiyame me kaakesea bägrä gemi niiya mule daremu ceerame. ⁵ Peei name pi weene pui biname bime cotre bine cängena jaawenemuye, piba teeme mäpu daremu ne lica jääpänuye. Cuta nuuja inge pisi nyene cotre bine wawenecame: Weene ngene ca yaagluye egä peei mule lui toraca gyene.

⁶ Peei neeneni inge name pi weene cuta weeme täks rarekaake yaacranemuye. Peei täks rarekaake cabu ca weeme ire atwi biname cina teeme kaakesea daremu jääpänusi. Piba teepi teeme kaakesea cängena jaawenemusi, Acejiyame lui ire atwi kaakesea ne teebibine ituge ceera. ⁷ Yoo, lui cotre piti nemi rarekaake uutecrena poto cidime, weene peei cotre bine jaawenemuye, rarekaake yäacäremuye. Cuta opo gaabe yaacranemuye weeme ire atwi biname bine piyepu matimati ätityera teebibine yäacäremuye.

Biname cina Miiji Owecu cama Lenaja

⁸ Weene yaawecnemuye gwidape bine piyepu rarekaake bine teeme padare cabu, pätä weene äblicäco singi me ibi awecnista, peei name pi iyeta padare weene miiji weemeweme singi läbitaninago. Yoo, lui biname te teeme nuuja biname täápume singi läbitanuge, pui

mule cabu tabe Acejiyame me cotre mene birige wawena. ⁹ Acejiyame me cotre mene lui apu egä: “Sargi mule gone jaawenuye; gone nuuja biname ne budre me yaagluye; gone gwidape ero ca yaawaduyey; piiyepu gone gwidape täápume singisingi läbitininuye,” cuta pepu pana cotre iyeta, teepi yepä babo cotre ngalebora gemi. Agesa pui babo cotre: “Maane müji nuuja biname bime täápume epu singi äbitena, maane lipu mäame täápume singi läbitanute.” ¹⁰ Apu gyene, ingle biname te liba nuuja biname bime täápume singi läbitanuge, tabe teebibine lica nuuja müya jaawenemuge. Yoo, peei name pi liba biname te biname täápume singi läbituge, tabe iyeta cotre bine cuta jaawenemuge.

¹¹ Yoo, mine müji cängena lenaja, ingle mine umle lica luma ngänu cerämu padare pisi nyene. Padare te itu tatyaramtumi weene ute pana lenaja cabu ca arpinerame, ingle mime äsecrera ai ireclota cabu ca iyeteta ireclota cabu me lui mametarage gyene pui padare cabu ca mine liba Yeesu ne niinäce jäätrungujisi. ¹² Yoo, ciye pana padare mameta gyene awala, Yeesu me acnenuta padare te mameta gyene atyaramta. Müji mine krokeciye pana mule ne yaabmalesi, apaclyera pana mule ne yaacatesi, lui cabu kokre aclajutame. ¹³ Mine müji epu pana cängena lenaja, biname cina apaclyera cabu lipu yaacrajuge. Siige iyeta sice buduma mule; siige iyeta sargisargi mule, siige iyeta mene abaja cuta piiyepu iyeta ämugetna. ¹⁴ Yoo siige, page mine Yageyame Yeesu Keriso me mule bine ewademeye, peei name pi weene müya singisingi ngene atwanena gone padare ceera.

14

Mime Ätrunga Binamewale Gone Äingeja

¹ Lui Ätrunga biname ngenecu onyaonya pana gemi, teebibine weeme ingle cabu yääbäcnuye, piiyepu gone mene ca jäingäjinuye teeme singi mule poto cidi me. ² Poto ätrunga biname apu jicenisä egä, “Iyeta maramara cibu deedei müji mine täápume ärwäjame, ingle iyeta deedei iyeta cibu lui Acejiyame bau ca gemi.” Nuuja poto ätrunga biname apu ngene jotwananinisi egä, “Poto cibu aletna puupu cabu ca lui uuje bine iiwäräjeji gemi, peei name pi cine singi lica gemi cibu mäju ärngäjame, yepä calwacupi deedei taatu ärwäja.” ³ Yoo, ätrunga biname lui cina umle gemi cibu cama deedei ärwäja, teepi müji lica nuuja ätrunga biname ne aina egä, “Tabe onyaonya ngenecu biname gyene.” Cuta piiyepu lui cina umle cäco cibu cama deedei äbita, teepi müji lica teeme nuuja poto biname bine, lui cibu umle gemi, aitneja egä, “Conocono mule biname gemi.” Teepi müji lica nuuja biname ne pepu aitneja, ingle naace gyene pui lui Acejiyame me biname gyene. ⁴ Yoo, biname te äblicäco nuuja biname me kaakesea bägrä ne ablaweja. PEEI lui teeme yageyame me kaakesea gyene. Tabe te teebine jaatranuge egä müji gyene coo müya gyene. Yoo, yepä pana gyene: mine müji lica nuuja biname poto cidi me aitneja egä, “Tabe conocono biname gyene,” ai ingle naace gyene teeme yageyame lui Acejiyame sine. Teebine Acejiyame bau ebmalepeye! Tabe te teebine umle pa jaawenepi teeme mule liba conocono gyene. Tabe ätrunga cabu cängena pa jaaclajutepi, ingle Acejiyame te müji gyene teebine toraca gaabe awabame.

⁵ Yoo, yepä ätrunga biname te singi poto bimu bine mara me wawename teeme mule ca Acejiyame täápume, yepä nuuja ätrunga biname te singi lica gyene pepu mule wawenecame, ingle tabe apu ngene jwaatwananuge egä nuuja bimu te mara lica gyene Acejiyame täápume. Yoo bimu maramara poto cidi me, iyeta biname cina müji cängena ngene atwanena, piba ngene ca agli lui mule müji gyene teeme täápume. ⁶ Lui ätrunga biname cina singi gemi poto bimu mara me wawename, teepi pepu jaawenemusi Acejiyame ne awepyeräjame, piiyepu lui ätrunga biname cina umle gemi cibu cama deedei äbitame, teepi cuta Acejiyame ne yaawepyeräjusi, liba teebine eso yääcärusi teeme deedei täápume. Yoo, lui ätrunga biname cina umle cäco gemi poto cibu ärngäja, ingle teepi singi lica peei cabu ca uuje ne awepyeräjame, teepi cuta Acejiyame ne yaawepyeräjusi teeme mule ca, ingle naace popi teepi teebine cuta eso yääcärusi teeme deedei täápume. ⁷⁻⁸ Mine lui ätrunga biname gemi, iyeta mime ireclota cabu cuta piiyepu mime budre padare cabu mine müji Acejiyame taatu ne awepyeräjame piiyepu teeme singi wawename, lica mime singi. Mine lipu ireclota cabu ninajininige, peei ireclota lui Acejiyame täápume, cuta piiyepu mine liba budre jääpänusi, peei budre lui teeme täápume, peei name pi ireclota cabu coo budre cabu mine Yageyame tääpu memi. ⁹ Keriso budre itu äbituji piiyepu budre cabu ca arpinantuji Yageyame me äbitame iyeta teeme ätrunga binamewale täápume. Mine iyeta teeme ime cabu temi: lui cina ireclota cama page, cuta piiyepu teepi lui cina budre ituge äbita. ¹⁰ Yoo, peei name pi weene ngeno memi singi weeme ätrunga binamewale bine aitneja? Cuta weene ngeno memi singi teebibine jajime egä, “Weene camu gemi cime pana babo umle cama äbitame?” Pepu icana lui weeme kaakesea lica gyene. Mine iyeta cirege aclajuta Acejiyame

me opo gaabe je tabe te mibibine atraname. ¹¹ Yageyame te Oogäräneji Mene cabu jiićenige egä,

“Ai ingle naace gyene cane toraca ireclota cama gäne, căme mene cuta toraca gyene egä: Iyeta biname kokorare ca cire yäăpednemepesi căme opo gaabe je.

Iyeta biname cuta cire jiićenepesi egä, ‘Peese nyene Acejiyame!’ ”

¹² Yoo siige, mine yepăyepă mime ireclota cirege aitneja Acejiyame tăăpume.

Mime Poto Binamewale bime Ātrunga Gone Sabe Wawena

¹³ Yoo, peei name pi mine gone mimemime aitneja. Mine pătă kirece ngene atwanena pa yaacatesi egä, “Mine gone epu mule wawena lui te nuuja ātrunga biname ne jaawenuge atramame coo niıya mule wawename.” ¹⁴ Yoo, Yageyame Yeesu cabu ca cane toraca umle gäne egä nuuja deedei coo cibu gwıdape lica gyene cude, yepă biname te liba gwıdape poto cidi me ngene jwaatwa-nanuge egä, “Ai lui cude gyene,” siige pıba teeme tăăpume cude me läbituge. ¹⁵ Weene liba weeme poto binamewale bine weeme cibu ārngăja ca ngenecu măpu me jaawenemuye, weene pıba owecu lica gemi teeme tăăpume. Keriso cuta peei biname bime tăăpume budre ituge äbita; gone teeme Yeesu bau ātrunga ne sabe wawena weeme deedei äbita mule ca. ¹⁶ Ngănu gyene weene umle egä weeme mule conocăco gyene, yepă weene gone mara mule biname bime sobe cabu peei ne wawena! Teepeı pıba weebibine lica birige aitneja weeme mule tăăpume. ¹⁷ Yoo, Acejiyame me waadena lui lica ärwăja piıyepu äňaja cotre poto cidi me, ingle peei lui matimati gwıdape gemi. Yepă, teeme waadena lui conocăco mule poto cidi me, piıyepu poode nuuja biname cama, piıyepu ngenecu gege poto cidi me. Aceji Seemo te mibibine nitıtyärınuge ai bine wawenecame. ¹⁸ Weene liba Keriso tăăpume pepu inajininuge, pıba Acejiyame ngenecu miıji gyene weeme tăăpume, piıyepu biname cına ngenecu miıji gemi.

¹⁹ Yoo, peei name pi mine miıji apicetnera peei mule taatu wawenecame lui cına mibibine poode cabu me niwadinınusi piıyepu lui cına mimemime kokre me niwenininınusi.

²⁰ Yoo, Acejiyame me kaakesea nuuja ātrunga biname cabu gone sabe jaawenemuye weeme cibu ārngăja mule ca. Iyeta deedei piıyepu cibu miıji gemi ärwăjame, yepă conocono gyene cibu coo deedei äbita, liba peei mule te nuuja biname ne jaawenuge niıya mule wawename.

²¹ Miıji mule agesa: Gone cibu ārngăja coo waina niıye äňaja, coo nuuja gwıdape ne wawena, liba peei te weeme ātrunga biname ne atrama me jaawenusi. ²² Yoo, miıji gyene liba Acejiyame taatu umle gyene weeme ātrunga peei mule poto cidi me. Yoo, biname te liba apu ngene jwaatwananuge egä, “Cane lui mule ne jewenenine, peei miıji gyene căme tăăpume,” piıyepu tabe liba lica niıya lasıcnantuge peei poto cidi me, tabe pıba miıji taatu yaanajuge. ²³ Yepă, tabe liba neenenı ngene atwanena cama jiićuge egä, “Baa, cane yäärwăjene, coo lica?” tabe pıba conocono mule ne jaawenuge liba yäärwăjuge, ingle tabe ātrunga cabu ca lica jaawenuge. Yoo, iyeta mule lui lica ātrunga cabu ca wawenăneji, peei lui conocono mule gemi.

15

Mine Miıji Căngena Ngene Atwanena cuta Nuuja Biname bime tăăpume; Lica Mime Taatu

¹ Mine lui bime ātrunga kokre gyene Yeesu cabu, mine miıji căngena gigri lenaja ngenecu onyaonya biname cama, teepi liba ngenecu maramara läbitınınusi Acejiyame me singi mule poto cidi me. Mine gone mime miıji taatu tăăpume lenaja, ² yepă mine miıji mime nuuja binamewale poto cidi me cuta ngene atwanena teeme miıji tăăpume teeme ātrunga ne kokre ceerame. ³ Keriso cuta piıyepu, tabe teeme miıji tăăpume lica enajui, pătă Oogäräneji Mene te jiićenige egä, “Biname lui cına niıya mene jiićenusi măăme poto cidi me, teeme peei niıya mule te cuta cebine niıya nawenuge.” ⁴ Yoo, iyeta Acejiyame me Oogäräneji Mene lui mime ätıtyera tăăpume. Peei te mibibine nibiberăjıninige kokre ngene atwanena cama lenajame piıyepu căngena awagrijame Acejiyame me ätıtyera padare ne. ⁵ Mime kokre piıyepu mime ätıtyera tădenige Acejiyame cabu ca. Cane Acejiyame ne ewejanenine tabe weebibine yepă ngene atwanena ceerame Yeesu Keriso me ngene atwanena liıyepu, ⁶ naace tăăpume weeme yepă ngene atwanena cama piıyepu yepă mene ca Acejiyame ne awepyerăjame, lui gyene mime Yageyame Yeesu Keriso me Babe piıyepu teeme Acejiyame.

Acejiyame me Miıji Mene Lui Iyeta Gawe Maramara Biname bime tăăpume

⁷ Yoo, peei name pi weeme ātrunga binamewale bine toraca biname me jaawenemuye owecu cama, epu pana Keriso weebibine lipu teeme biname me ituge wawena. Nuuja biname cına peei mule ne liba pa jăăpănepesi, teepi Acejiyame ne pa yaawepyerăjepesi.

⁸ Yoo, Yeesu Keriso tăđui Israela biname bine ätıtyerame biname bine awabame egä Acejiyame teeme mene toraca me jaawenuge, tabe lui mene itu jejemuji Israela biname bime kaakesaare bine egä tabe teeme ätıtyera biname ne pa tăătıyepi. ⁹ Tabe cuta piıyepu

täduji nuuja gawe biname bine ätityerame teepi piba Acejiyame ne awepperäjame teeme owecu tääpume. Pisi nyene Oogäräneji Mene cabu Daawida te lui mene Acejiyame ne jejuji egä,

“Cane meebine eso nääcärenine nuuja gawe biname cama teeme sobe cabu.

Cane mäame ngii uupera ca naawepäntenine.”

¹⁰ Oogäräneji Mene te nuuja poto cabu jüicenige egä,

“Gawe maramara biname, weene babo gege äbitineye Acejiyame me jäjäcräneji biname cama.”

¹¹ Cuta nuuja mene te egä,

“Gawe maramara biname, weene iyeta Acejiyame ne ewepperäjeye.

Yoo, iyeta ai gawecewe biname, weene teebine eso ecäreyle!”

¹² Cuta Isaya nuuja Oogäräneji Mene cabu jüicuji egä,

“Ingwe ca yepä biname cire tädepi Yese* me ingle cabu ca.

Acejiyame teebine cire yaacitepi nuuja gawe biname bine waadename.

Teepi ätrunga cire yaacitepesi teeme cabu.”

¹³ Yoo siige, Acejiyame lui cabu mine ngene atwanena bine yaacranemusi, cane teebine ewejanenine tabe weebibine baborage gege piyepu poode ceerame weene liba teebine jitrungeniye, weene piba baborage ätrunga cama jewagrieniye teeme ätityera tääpume. Aceji Seemo teeme kokre ca pepu ngene atwanena pa icäripi.

Paulo Rooma Biname bine Jejemige Ai Leta Ngena Tääpu Myene

¹⁴ Cäme ätrunga binamewale, cane cäme ca umle gäne egä weene miiji mule biname gemi, piyepu weene umle cama gemi lui mule bine wawenecame, cuta piyepu weene miiji gemi nuuja biname bine bääarmi mene jajanename. ¹⁵ Yepä, cane weeme bau conocäcorage yoogärenine weene poto gwidape bine ngene apecna-me. Cane conocäco jijanänininine weebibine, ingle naace gyene Acejiyame te cebine ai miijirage kaakesea itu näcäruji

¹⁶ Yeesu Keriso me ätyepäneji biname me äbitame gawe maramara biname bine ätityerame. Cane epu pana gäne Acejiyame me iiwäreja biname liyepu. Cane teeme Miiji Mene gawe maramara biname bine jaajanemune teepi te owecu gwidape pana äbitame Acejiyame tääpume, lui poto cidi me tabe ngenecu miiji me pa läbitepi, Aceji Seemo liba teebibine teeme tääpume mara me jaawenemuge. ¹⁷ Yoo, cane gege gäne, ingle cane baborage kaakesea Acejiyame tääpume ituge wawena Keriso Yeesu cama. ¹⁸ Cane weebibine jijenininine egä lica cäme kokre name pi cäme kaakesea baborage gyene, yepä Keriso babo kokre cebine itu näcärepi gawe maramara biname bine waadename teepi Acejiyame tääpume ätrungame teeme gaabe cabu otnime. Peei te itu läbitepi cäme mene piyepu cäme kaakesea cabu ca, ¹⁹ kokre owowä piyepu ciitaca mule cabu ca, piyepu Aceji Seemo me kokre cabu ca. Yoo, Yerusalema cewe cabu ca ngälu Iluriku gawe ne oomlaname, cane iyeta pui gawe cabu itu totnäjumene biname bine iyeta poto ta jajanename Miiji Mene Keriso poto cidi me. ²⁰ Niinäce cabu ca cäme singi puga ge Miiji Mene jajanename cewe maramara biname bine, lui cina lica ituge ätecija Keriso poto cidi me. Cäme singi lui pui maramara cewe cabu puma kaakesea agedname, cuta lica otni nuuja biname te luma Acejiyame me mene itu jaajanemepi. ²¹ Oogäräneji Mene te ai poto cidi me jüicenige egä,

“Lui biname bime bau lica ituge jajanena teeme poto cidi me,

teepi Miiji Mene ca pa jääpänepesi teebine,

piyepu lui biname cina lica ituge ätecija,

teepi umle pa läbitipesi.”

Paulo Rooma Biname bine Jejemige Teeme Singi Teebibine Ädärame

²² Yoo, bucurage padare cane liba singi ge otni weeme bau me, cäme nuuja cewe cabu kaakesea name pi, cane pui padare äblicäco weeme bau me otni. ²³ Yepä, ai padare peei maramara cewe cabu lui kaakesea ne cane bepirine. Yoo, bucurage kämäge cama cäme singi puga ge weebibine ädärame, ²⁴ cuta piyepu ai padare cabu cane otni mäne. Cane Spaniya gawe cabu me ädenine. Cane singi gäne weebibine gaabe je päpäname, piyepu weeme bau ca ätityera päpäname cäme otni tääpume piyeme. Yepä, niinäce cane singi gäne matikolä miijirage padare cuta weene cama lenajame. ²⁵ Yepä cäro, cane niinäce ädenine Yerusalema me Acejiyame me biname bine puma ätityerame, ²⁶ ingle naace gyene maramara ätrunga ingle Makedoniya piyepu Akaya gawe cabu teepi ngenecu gege cama mene itu jaatranepesi rarekaake ootoname piyepu ätyepame owecumete biname bime bau me, lui piti nemi Yerusalema ätrunga biname bime ingle cabu. ²⁷ Teepi teeme singi cabu peei ne itu jaatranepesi, piyepu teepi miiji pepu wawename, ingle Israela biname cabu ca nuuja gawe biname cina ituge päpäna Acejiyame me miiji teeme seemo bime tääpume.

* 15:12: Yese: Yese lui Daawida me babe ge, piyepu Daawida lui Yeesu me kaakesaare ge.

Teepi peei name pi miiji cuta Israela biname bine ätityerame miijimiji gwidape ca teeme tääpe tääpume. ²⁸ Yoo, cane liba peei kaakesea ne pa yaapirepene piyepu iyeta ootona rarekaake cängena teebibine pa yääcäremepene, cane piba pa labyemärepepe Spaniya gawe me otnime piyepu weebibine gaabe cabu ädärume. ²⁹ Piiyepu cane umle gäne egä cane liba pa tädepepe, cane weeme bau me pa tatyaramtepepe iyeta Keriso me miiji cama.

³⁰ Cäme binamewale, mime Yageyame Yeosu Keriso name pi piyepu mime singi name pi, Aceji Seemo te lui mibibine itu nicäripi, cane weebibine jjenininine Acejiyame ne cane cama awejename cäme miiji tääpume. ³¹ Teebine ewejaneye egä pui Israela biname Yuudea gawe cabu lui cina lica Yeosu Keriso tääpume birige ätrunga, teepi lica cebine niya me wawena. Acejiyame ne cuta ewejaneye egä teeme biname Yerusalema cewe cabu je, teepi ngenecu miiji cama pa yaawadepesi pui rarekaake bine lui cime ätityera gyene teeme tääpume. ³² Acejiyame liba singi gyene, cane piba babo gege cama pa tädepepe weeme bau me mime ngenecu apretnemalame. ³³ Yoo, Acejiyame lui te mibibine ngenecu poode nicärininuge, cane teebine ewejanenine iyeta weeme gome lenajame. Pepu pa läbitege.

16

Paulo Sebore Jewenemige Poto Rooma Ätrunga Biname bine

¹ Mime yepä ätrunga biname ngii Poebe tabe pa twaaclepi Rooma me. Tabe miijirage magebi gwene, lui te cängenarage kaakesea jaawenemuge Kenekrea ätrunga ingle cabu je.

² Weene teebine sebore jowenepeye, piba cängena tocanepewe weeme ätru-nga ingle cabu me. Mine Acejiyame me binamewale miiji mime yepä ne pepu ire jaatwusi. Teeme singi gwidape tääpume weene utityärewe, ingle tabe bucurage biname bine ituge ätityera, cebine piyepu.

³ Sebore Akwila piyepu teeme coga Prisila tääpume. Teepi cane cama gigri kaakesea jaawenäsi Yeosu Keriso tääpume. ⁴ Teepi mameta budre jääpänäsi cebine ätityera name pi. Cane singi teebibine baborage eso ceerame, lica cane taatu, yepä ätrunga biname iyeta gawe maramara biname bime ingle cabu teepi cuta piyepu. ⁵ Cuta sebore pui ätrunga ingle biname bime tääpume, lui cina teeme mete cabu labasecretininusi irecu ätumutame.

Sebore cäme singi biname Epaenetus tääpume. Tabe niinäce biname gyene Asiya Probins cabu lui te Keriso ne itu jitrunguji. ⁶ Sebore cuta Mariya tääpume, tabe lui baborage kaakesea ituge wawena weeme tääpume. ⁷ Sebore cuta Andronikus naabi Juniya tääpume. Teepi cäme Israela biname gegi, lui cina krokeciyye mete cabu cane ama itu aanajuji mime ätrunga mule name pi. Teepi baborage ätyepäneji biname gegi, lui cina ätrunga biname me ituge äbita cäme niinäce gaabe me.

⁸ Sebore Ampliyatus tääpume. Tabe cäme singirage biname gyene mime Yageyame tääpume. ⁹ Sebore Urbanus tääpume, tabe lui mine cama kaakesea biname gyene Keriso tääpume. Piiyepu sebore cäme ngenecurage biname Stakus tääpume. ¹⁰ Sebore Apeles tääpume, lui te Keriso ne ätrunga me apicetnera cabu ca tasatuji kokre cama. Sebore iyeta biname tääpume lui cina Aristobulus me mete cabu yaacrajuge. ¹¹ Sebore Herodiyo tääpume. Tabe cuta cäme Israela biname gyene. Cuta sebore ätrunga biname bime tääpume lui cina Narkisus me mete cabu yaacrajuge.

¹² Sebore Trupaena naabi Truposa bime tääpume. Ai neeneni magebi cina mime Yageyame me kaakesea cängena jaawenäsi. Cuta sebore cäme ngenecurage biname Peris tääpume. Tabe miijirage magebi gwene, lui baborage kaakesea ituge wawena mime Yageyame tääpume. ¹³ Sebore Rupus tääpume. Tabe mime Yageyame me babo miijirage kaakeseyame gyene. Cuta sebore teeme mage tääpume, lui te cäme mage pana cebine itu ire natwepi. ¹⁴ Sebore Asunkritus, Plego, Hermes, Patrobas, piyepu Hermas tääpume, piyepu iyeta ätrunga biname lui teeme ingle cabu temi. ¹⁵ Sebore Pilologus naabi Juliya; Nereus piyepu teeme ngule; cuta Olimpas piyepu iyeta Acejiyame me biname lui teeme ätrunga ingle cabu temi.

¹⁶ Weene weemeweme ajecletrnäjinewe gege cama. Keriso me biname cina iyeta maramara ätrunga ingle cabu ca, teepi weeme tääpume sebore mene ne jityepenisi.

Paulo Leta ne Umle Mene ca Ermuji

¹⁷ Cäme binamewale, cane weebibine toraca jjenininine, cängena ire pui biname tääpume lui cina biname bine maramara me jaawenemusi. Teepi biname bine mara walya gaabe yääcäremusi Acejiyame poto cidi me, siige poto biname bime ätrunga sabe jaawenemusi. Yepä, weebibine pepu lica ituge abiberäja; weene ten cama abasuta gone! ¹⁸ Biname lui cina pepu yaabiberäjemusi, teepi lica mime Yageyame Keriso tääpume kaakesea jaawenemusi, yepä teeme kaakesea lui teeme singisingi mule tääpume. Poto ngenecu onyaonya biname bine teepi yaangletrnäjemusi teeme mitemite mene ca. ¹⁹ Yoo, iyeta biname cina cebine najanusu egä Miiji Mene te kokre cama yaanajuge weene Rooma ätrunga biname

cama. Cane peei name pi mati gege lica gäne weeme poto cidi me. Cane singi gäne weene umle cama lenajame miiji mule poto cidi me, yepä umle cäco pana lenajame niiya mule tääpume. ²⁰ Piba Acejiyame lui te mibibine poode nicärininuge, tabe Satani me kokre ne pa yaapremalepi teebine gawe me wawenname weeme tääpume. Mime Yageyame Yeesu me miiji te weene cama yaanajege.

²¹ Timoti lui te cane cama kaakesea jaawenemuge, tabe jiicenige sebore weeme tääpume. Cäme Israela binamewale Lukiyus, Yasona, piiyepu Sosipata teepi cuta sebore jiwenininisi.

²² Yoo, cane säne Tertiyus cuta piiyepu weebibine sebore jiweninine mime Yageyame me ngii cabu. Paulo lui mene jiicenige, cane te yoogärenine weeme tääpume.

²³ Gayus lui me mete cabu cime ätrunga ingle biname cina labasecretninago, tabe cuta sebore weebibine jiwenininige, cuta piiyepu Eratus, lui te rarekaake ire jaatwemuge ai babo cewe tääpume, cuta piiyepu mime biname Kwartas, teepi weebibine sebore jiwenininisi. [

²⁴ Mime Yageyame Yeesu Keriso me babo miiji te iyeta weene cama yaanajege.]

Paulo te Acejiyame ne Ewepyeräjige

²⁵ Mine miiji Acejiyame ne awepyeräja. Teeme kokre pisi nyene mibibine ätityerame mine ätrunga cabu cängena lenajame. Teeme kokre tädenige pui Miiji Mene cabu ca, cane lui jicemune Yeesu Keriso poto cidi me. Peei Miiji Mene te Acejiyame me singi ne jaawabudnituge, lui singi poto cidi me biname cina umle cäco yaacrajuge teeme niinäce kaakesaare cabu ca. ²⁶ Yepä, ai padare cabu Acejiyame me singi awabudnitäneji gyene. Teeme mename biname cina teeme singi itu jicemujisi Acejiyame me Oogäräneji Mene cabu. Acejiyame lui iyeteta gyene, tabe ätrunga biname bine ituge jaji teepi iyeta gawecewe biname bine jajanenname egä: Acejiyame singi iyeta biname bine waadename. Tabe singi iyeta biname cina teeme mene acatame teebine ätrungame.

²⁷ Yoo, Acejiyame taatu umle cama gyene iyeta gwidape poto cidi me. Jamyacu apaclyera lui teeme yene iyeteta Yeesu Keriso me kaakesea cabu ca. Pepu pa yaanajege!

Cane ngii Paulo, siige cäme mene ngälu peese.

PAULO ME NIINÄCE LETA KORINITO ÄTRUNGA BINAME BIME BAU ME

Sebore Mene

¹ Cane, Paulo, Yeesu Keriso me ätyepäneji biname gäne, Acejiyame lui ne teeme singi miji pi najuji ai kaakesea täapume. Cane piyepu mine cama yepä ätrunga biname Sostene, cine te yoogärenago ² Acejiyame me ätrunga ingle cabu me Korinito babo cewe ngalebora. Cine weebibine jiwablininago, lui bine ala ituge asogleca mara me äbitame Acejiyame täapume, lui cina teemi nemi Yeesu Keriso cama yepä me äbita miji pi. Ai leta cuta iyeta biname bime bau me iyeta poto ta, lui cina yaawejanusu mime iyeta bime Yageyame Yeesu Keriso ne.

³ Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Acejiyame te Yeesu Keriso me cabu ca Mibibine Miiji Niwenanenininige

⁴ Cane Acejiyame ne eso yäacaranune weeme täapume, ingle tabe lipu owecu ituge äbita weeme täapume Yeesu Keriso cabu ca. ⁵ Keriso cama yepä äbita miji pi weene kokre ituge äbita iyeta mule cabu, cuta piyepu iyeta iicema cabu piyepu iyeta umle cabu. ⁶ Keriso poto cidi me mene te weeme cabu braju itu jaawenepi epu kokre cama, ⁷ egä weene itu jääpänanemepewe iyeta miijimiji gwidape weeme seemo ireclota täapume, weene liba jewagrieniye Yageyame Yeesu Keriso me acnenuta ne. ⁸ Tabe te cuta weebibine kokre me cire jiwenipi ngälu ngälugaabe me, piba weeme cabu nuuja niya ne lica cirege päpäna teeme acnenuta bimu cabu. ⁹ Acejiyame lui te weebibine tisoglicipi teeme Bägrä Yeesu Keriso, mime Yageyame cama yepä me äbitame, weene toraca ätrunga ecitepeye teeme cabu, egä tabe cirege wawena tabe ngena täapume ituge jaji.

Korinito Ätrunga Biname cina Maramara Abelaninisi

¹⁰ Cäme ätrunga binamewale, cane Yageyame Yeesu Keriso me ngii cabu jinenininine weene yepä ngene atwana cama lenajame, piba weene mara me lica päbitipeye. Weene miiji gigrä yepä ngene atwana cama lenaja. ¹¹ Kloe me ingle cabu ca poto biname cina cebine najepesi, egä weene, cäme ätrunga binamewale, jiceliniye peema, egä laasi nyene babo biname. ¹² Cane naace täapume egä weeme yepä te jüicenige egä, “Cane Paulo me biname gäne,” nuuja te jüicenige egä, “Cane Apolo me biname gäne,” nuuja te egä, “Cane Peteru me biname gäne,” cuta nuuja te egä, “Cane Keriso me biname gäne.” ¹³ Yeesu me binamewale lui teeme täape gemi. Ingle teeme täape lui yepä gyene, peei name pi teepi äblicäco maramara äbita. Nää Paulo tage, lui te baarge uli cabu budre äbituji weeme täapume? Nää, Paulo me ngii cabu weebibine niye ca ituge äciseja? ¹⁴ Cane Acejiyame ne eso ecärenine, egä cane te lica weebibine niye ca jicisäjiipene, yepä Krispo naabine taatu Gayus jääcisäjepene. ¹⁵ Siige nuuja te äblicäco iicana, egä weebibine cäme abiberäja bägrä täapume ituge niye ca äciseja. ¹⁶ Yoo, cane cuta Setepano teeme ingle biname cama niye ca jääcisäjemepene. Yepä cane ngene lica jotwenine, egä cane cuta poto bine ituge niye ca äciseja coo liiyepu. ¹⁷ Keriso cebine lica nätyepuji niye ca äcisejame, yepä tabe nätyepuji Miiji Mene jajanename. Cane ai gawecewe umle biname bime pana lica jüicemimune, ingle cane singi lica gäne Keriso me budre me kokre te papa me äbitame.

Acejiyame me Kokre piyepu Umle Lui Keriso Sine

¹⁸ Mene Keriso me budre poto cidi me baarge uli cabu papa gyene eei bime täapume, budre gaabe cabu lui cina yaacluge. Yepä mine lui cina ireclota gaabe cabu naclenige, mime täapume Acejiyame me kokre pisi nyene pui mene cabu. ¹⁹ Oogäräneji mene te jüicenige apu egä,

“Cane ai gawecewe umle biname bime umle ne cire yigarecepene;

cuta laatibi bucurage mule poto cidi me labiberäjininusi,

cane teeme peei abiberäja ne papa me cire jaawenepene.”

²⁰ Siige ai gawecewe umle biname cina teepi ngena miiji gemi; piyepu laatibi labiberäjininusi bucurage mule poto cidi me, teepi cuta ngena miiji gemi; piyepu laatibi cängena jaatranimusu ai gawecewe me gwidape poto cidi me, teepi cuta ngena miiji gemi? Acejiyame te ituge aboclomta, egä ai gawecewe me umle lui buduma umle gyene.

²¹ Acejiyame teeme baborage umle ngalebora apu ngene jotwananuji, egä biname cina lica birige teemerage umle ca Acejiyame täapume umle äbita. Eewe, pätä tabe ngene jotwananuji, egä cine lui Miiji Mene jaajanemususi, gawecewe muleyame biname cina lui mene ne buduma mene ca einenisi, laatibi jäätrungusi pui mene ne, teepi te ireclota ne jääpänusi. ²² Israela biname cina singi ciitaca mule bine päpänename, Griik biname cina umle ne

jirngenisi, ²³ yepä cine te Yeesu Keriso poto cidi me mene jejanenemisi, baarge uli cabu lui te budre äbituji. Israela biname cina ai mene ne jigyenisi piyepu Griik biname bime täápume papa gyene. ²⁴ Yepä Acejiyame lui bine ala ituge asogleca teeme binamewale täápume, Israela biname coo poto biname, teepi Keriso ne jääpänusi ai mene cabu. Tabe sine Acejiyame me kokre piyepu umle. ²⁵ Acejiyame lui mule ne jaawenuge, biname cina lui mule poto cidi me jicusi egä, “Buduma mule gyene,” pui mule te yäätucärüge biname bime umle ne. Piyepu Acejiyame me ngena mule poto cidi me jicusi egä, “Kokre cäco mule gyene,” pui mule te yäätucärüge biname bime kokre ne.

²⁶ Cäme ätrunga binamewale, weene ngene jotwineye, weene lipu biname ge, Acejiyame te liba weebibine ala tisoglicipi. Weeme cabu nesae taatu ge, lui poto cidi me jicusi egä, “Umle biname, kokre cama biname, babo ngii biname.” ²⁷ Acejiyame naace täápume eei bine jejäcimuji, gawecewe muleyame cina lui bime poto cidi me ngene jwaatwananinusi, egä teepi papa gemi, ingle tabe singi ai gawecewe umle biname bine ajiri me wawename. Cuta eei bine naace täápume jejäcimuji, gawecewe muleyame cina lui bime poto cidi me ngene jwaatwananinusi, egä teepi kokre cäco gemi, ingle tabe singi ai gawecewe kokreyame biname bine ajiri me wawename. ²⁸ Tabe eei biname bine jejäcimuji, biname cina lui bine gawe me yaapremalemusi, jäägyemusi, jicusi, egä papa gemi, naace täápume eei bine iigarecawe gawecewe muleyame cina lui bime täápume ngene jwaatwananinusi, egä teepi modamoda biname gemi. ²⁹ Tabe ai ne naace popi jewenuji, egä nuuja biname te äblicäco Acejiyame me opo gaabe je teemämu awepyeräja. ³⁰ Yepä weebibine Acejiyame te yepä me itu jiwenipi Keriso cama piyepu teebine jaawenepi mime umleyame me. Tabe te niwenipi mine conocäco äbitame Acejiyame me opo gaabe je, siige mine mara me itu läbitipago Acejiyame täápume, piyepu mine kälyä gemi niija mule cabu ca. ³¹ Yoo siige, mine miiji wawena, Oogäräneji mene te lipu jiceniige egä, “Laati te singi awepyeräje, tabe miiji eei mule bine awepyeräja, Yageyame te lui mule bine ituge wawena.”

2

Cine Miiji Mene Keriso poto cidi me Jaajanemusi, Baarge Uli cabu Lui ne Jibyecrujisi

¹ Cäme ätrunga binamewale, cane liba lädepene weeme bau me jajanename, egä ngena gyene toraca Acejiyame poto cidi me, lui toraca te niinäce ämlitäneji ge biname bime bau ca, cane epu lica lädepene, egä cane baborage gäne iicema cabu piyepu umle cabu. ² Cäme ngene atwanena puga ge, egä cane nuuja gwidape poto cidi me lica iicema, yepä Yeesu Keriso poto cidi me piyepu teeme budre poto cidi me baarge uli cabu. ³ Yoo, cane liba weene cama puga ge, cane mage wälu ge, kokre cäco läbitepene, siige nalonecepi wälu miiji pi. ⁴ Piyepu cane liba mene jijanapipene, weebibine ibiberäjiipene, epu lica ai gawecewe umle biname cina lipu miijimiji tagepogogo ca jaajanemusi piyepu yaabiberäjimusi. Yepä Acejiyame te jaawabudnitepi, egä cäme jajanena piyepu abiberäja lui toraca ge, ingle Aceji Seemo me kokre puga ge. ⁵ Pipu pi biname bime umle te lica jiwenipi weene Keriso cabu me ätrunga acitame, yepä Acejiyame me kokre te jiwenipi.

Acejiyame me Umle Lipu Gyene

⁶ Cane cuta umle mene jaajanemune eei biname bine, lui cina ätrunga cabu kokre gemi. Yepä pui umle lui mara gyene ai gawecewe me umle cabu ca; cuta mara gyene pui biname bime umle cabu ca, ai gawecewe ne lui cina ecanenisi, lui bime kokre gemi mameta apira. ⁷ Cane jaajanemune Acejiyame me umle poto cidi me, lui ge ämlitäneji, teeme ämlitäneji ngene atwanena poto cidi me, tabe lui ne ecituji agedna me niinäce gaabe ca naace täápume mine teeme apacyera cabu me äbäcname. ⁸ Lui cina ai gawecewe ne ecanenisi, teepi umle lica ge Acejiyame me pui ngene atwana poto cidi me. Teepi liga umle cirege, teepi piba mime Yageyame, lui te jamyacu apacyera cama, teebine baarge uli cabu lica cire jääbyecrejisi. ⁹ Oogäräneji mene te ai poto cidi me jiceniige egä,

“Lui ne nuuja te lica ituge päpäna coo ätecija,

lui ne ngene atwana ca äblicäco oomlana,

peese nyene pui gwidape, Acejiyame lui ne ituge amacetnäja biname bime täápume,

lui cina teeme täápume singi.”

¹⁰ Yepä mime täápume Acejiyame te ituge Aceji Seemo ca teeme pui ämlitäneji ngene atwana ne aboclomta. Aceji Seemo te iyeta gwidape bine jäärngemuge, cuta eei bine lui cina ämlitäneji gemi Acejiyame me sungaberage. ¹¹ Biname me seemo tabe taatu umle gyene pui biname me sungaberage. Pepu pana gyene, Acejiyame me Seemo tabe taatu umle gyene, Acejiyame lipu gyene. ¹² Mine ai gawecewe me seemo ne lica ituge acata, päta mine pui Seemo ne ituge acata, Acejiyame te lui täätpepi naace täápume, mine piba umle iyeta Acejiyame ngena ituge ceera mibibine. ¹³ Peei name pi cine lica jicemusi mene, biname bime umle cabu ca lui ituge abiberäja, yepä cine jicemusi Aceji Seemo te ngena

nibiberäjininuge, cine liba yaaboclokläjimusi seemo ireclota gwidape bine pui biname bime bau me, laati bime cabu pisi nyene Aceji Seemo. ¹⁴ Yepä laati me cabu lica gyene Aceji Seemo, tabe äblicäco nuuja gwidape ne Acejiyame me Seemo bau ca acata. Pepu gwidape cina teeme täápume opo lica lacininusi piyepu mäpurage yaanajuge, ingle Aceji Seemo lica gyene teeme cabu pui gwidape bine aboclokläjame. ¹⁵ Yepä laati me cabu pisi nyene Aceji Seemo, tabe ibibi gyene iyeta gwidape bine atraname, yepä teebine äblicäco nuuja te atrana. ¹⁶ Oogäräneji mene te jüicenige egä,
 “Laasi nyene biname, lui te umle gyene Yageyame me ngene atwanena?
 Laati te ibibi gyene teebine umle mene jajanename?”
 Mine age tema biname, lui bime cabu pisi nyene Keriso me ngene atwanena.

3

Acejiyame me Kaakesea Biname

¹ Cäme ätrunga binamewale, cane liba weene cama puga ge, cane äblicäco ge epu mene iicema, lipu mene jaajanemusi pui biname bine, lui bime cabu Aceji Seemo pisi nyene. Cane miiji epu jijanani-pene Aceji Seemo cäco biname bine liiyepu, epu ätrunga cabu bägrä bime pana biname bine liiyepu. ² Cane weebibine deedeirage lica ingärani-pene, yepä ngame migi taatu icärani-pene, ingle weeme iguwace kokre lica ge deedeirage täápume. Cuta page piyepu weene deedeirage täápume iguwace kokre lica gemi, ³ ingle weemer- age singisingi cina camu jitruwetnäjenenemisi. Weeme cabu liba pisi nyene ämugetna mule, mene abaja mule, nää pei te lica jiwabininige, egä weeme singi cina weebibine jitruwetnäjenenemisi; weene epu inajininige ai gawecewe mule cabu lenajayame biname liiyepu. ⁴ Weeme yepä te lipu jüicenige egä, “Cane Paulo me biname gäne,” cuta nuuja te lipu jüicenige egä, “Cane Apolo me biname gäne,” egäsu pei te nata jiwabininige, egä weene ai gawecewe muleyame biname bime pana gemi?

⁵ Cije Apolo laasi nyene? Cuta Paulo laasi nyene? Cine Apolo cama Acejiyame me kaakesea bägrä gegi, lui cina weebibine itityeräji-pago weene ätrungame. Cine yepäyepä cina cime kaakesea ne jewenenisi pui umle ca, Acejiyame lui nicärepi. ⁶ Cane te gije bine itu yäätetemene, Apolo te niije ca itu jaacnanga-nemepi, yepä Acejiyame te uutaname itu jaawenemepi. ⁷ Liteta biname papa gyene, acnanga biname papa gyene, yepä Acejiyame lui baborage gyene, ingle tabe te gije bine uutaname jaawenimuge. ⁸ Liteta biname piyepu acnanga biname, teepi puu yepä kaakesea ne jewenenäsi, yepä Acejiyame teeme kaakesea ibi teeme yepäyepä bine daremu pa lääcärane-pi. ⁹ Cine Apolo cama yepä kaakesea ne jewenenago Acejiyame täápume. Weene peete nemi teeme calwa-cupi.

Cuta weene peete nemi Acejiyame me mete. ¹⁰ Acejiyame lui umle näcärepi, cane pui umle ca miijirage raranga biname bime pana ingle ne jaacnepene, siige nuuja te pui ingle cabu erangenige. Yepä iyeta raranga biname bime cabu sine ireme, egä teepi lipu erange-nisi. ¹¹ Lui ingle ne uja ituge acni, pui ingle papa cabu äblicäco nuuja ne atecwenta. Pui ingle lui Yeesu Keriso sine. ¹² Siige ai ingle cabu yepäyepä biname cina miiji gemi raranga, teepi ngena gwidape ca rarangame singi: gol ca, silba ca, modamoda daremu kula ca, uli ca, tune ca, dage ca. ¹³ Atrana bimu cabu pajecu me cirege äbita, biname yepäyepä cina lipu mete ne ituge raranga. Pui bimu cabu iyeta peei maramara mete bine uliobo ca cirege apicetnära. ¹⁴ Lui biname me mete lica cire layepi, tabe daremu ne cire yaacatepi. ¹⁵ Yepä lui biname me mete te cire layepi, tabe daremu ne lica cire yaacatepi, yepä taberage te ireclota ne cire jääpäne-pi epu pana, biname te lipu uliobo wädräji cabu ca lasatuge. ¹⁶ Egäsu nata weene umle gemi, egä weene peete nemi Acejiyame me mete. Teeme Seemo te weeme cabu enajenige. ¹⁷ Laati te liba sabe jaawenuge Acejiyame me mete ne, Acejiyame cuta teebine sabe jaawenuge. Acejiyame me mete mara me awenäneji gyene teeme täápume, piyepu pui mete lui weene peete nemi.

¹⁸ Weene gone langletnäjininuye. Weeme nuuja te liba ngene jwaatwananuge, egä tabe ai gawecewe umle biname bime pana umleyame gyene, tabe miiji niinäce pui umle ne abmalame, piba tabe toraca umle biname me äbita. ¹⁹ Ai gawecewe muleyame biname cina lui poto cidi me jüiceni, egä umle gyene, Acejiyame täápume pui lui buduma gyene. Oogäräneji mene te jüicenige egä, “Acejiyame te umle biname bine teeme pui umle ca jääbrecimuge.” ²⁰ Cuta apu jüicenige egä, “Acejiyame umle gyene, egä umle biname bime ngene atwanena lui papa gemi.” ²¹ Peei name pi weene gone apu iicana, egä weene Apolo me coo Paulo me biname gemi. Cine iyeta weeme tääpu memi, ²² cane Paulo, Apolo, Peteru, ai gawecewe, ireclota, budre, page ngena cina äbitininisi piyepu ingwe ca ngena cina cire läbitipesi, iyeta ai lui weeme tääpu memi, ²³ yepä weene lui Keriso memi piyepu Keriso lui Acejiyame myene.

4

Keriso me Ätyepäneji Biname

¹ Weene miiji cime potu cidi me apu ngene atwana, egä cine Keriso me kaakesea bägrä gemi, Acejiyame lui bine itu nijinuji mene jajanename teeme toraca mene piyepu mule potu cidi me, lui cina ämletnäreji gemi. ² Ai kaakesea ne cine miiji toraca ngenecu cama wawena. ³ Cane nuuja ngene atwana lica gäne, egä biname cina lipu cebine natranusi, coo weene lipu natranuye, cuta cane cämämu lica atraninine. ⁴ Cäme asicnenta miiji gyene, yepä cäro peei te lica nawabenige, egä cane toraca conocäco gäne. Acejiyame tabe taatu gyene, lui te cebine atrana. ⁵ Peei name pi weene gone nuuja ne atrana ngälu toraca atrana padare te cire tädepi. Atrana me padare ebä cirege, Yageyame te liba cire tacnepi. Tabe te cire yaawademepi apaclyera cabu me gwidape bine, lui cina krokeciye cabu ämletnäreji gemi, piyepu tabe te cire jaawabudnitnemepi biname bime ngene atwanena bine. Piba Acejiyame te biname bine yepäyepä cire yaawepyeräjemepi teeme mule ibi.

⁶ Cäme ätrunga binamewale, cane aga ngena bii jininine cime potu cidi me Apolo cama, ai lui cuta weeme tääpu myene. Cime cabu ca weene abiberäjame, egä ai mene iicana ngeno myene egä, "Gone uutruta lui mene oogäräneji gemi!" Peei name pi weene gone lawepyeräjininuye, egä weene cime yepä ne yaacatuwe, nuuja ne cuta yaabmaluye. ⁷ Määme nuuja conocäco lica gyene babo äbitame. Määme nuuja gwidape lica gyene, Acejiyame te lui lica ituge ceera. Peei name pi määme liba iyeta gwidape Acejiyame bau ca gemi, maane ngena name pi lawepyeräjute epu pana, egä maane te itu saawademepete?

⁸ Weeme nää iyeta seemo ireclota gwidape uja piti nemi, weene lui tääpume singi? Weene nää uja bewadimiye iyeta miijimiji mule seemo ireclota tääpume? Weene nää mope biname me bäbitininiye, ngänu gemi cine lica? Oo, weene mope biname me liga cire läbitininejiye, piba cine cuta yepä cirege weene cama mope biname me lenaja. ⁹ Cane apu ngene jotwaninine, egä Acejiyame te cine ätyepäneji biname bine ingwe gaabe me ituge acrana. Cine epu biname pana gemi, budre me lui bine ituge atrana, siige iyeta cina cime bau me ire sicrajinige, biname piyepu mename seemo cina. ¹⁰ Cine Keriso miji pi buduma gemi, weene ten cama yepä äbita miji pi umle cama gemi! Cine kokre cäco gemi, weene kokre gemi! Cibibine gawe me ire nitwenininisi, weebibine opo gaabe me icranininisi. ¹¹ Cine camu loolomecewe piyepu niyemecewe gemi; cime cäbletääpe iyeta niyarage gemi; cibibine nitemeläjininisi; cine mete cäco gemi, otnetnäjenininigo yepä cewe cabu ca nuuja cewe me. ¹² Cine cimeraige ime ca baborage kaakesea jewenanenisi cime lenaja tääpume. Biname cina liba cibibine niiya mene nijinininusi, cine teebibine jaajemusi egä, "Acejiyame te weebibine miiji mule pa jiwenipi." Cibibine liba sabe niwenininusi, cine ninyemutinuge. ¹³ Liba niiya mene nijinininusi, cine owelaamelame mene jaajemusi. Gawecewe muleyame cina cibibine domäji pana niwenininusi. Teepei cibibine epu ire nitwinininusi, egä cine singi cäco gwidape gemi.

¹⁴ Cane ai mene naace tääpume lica yoogärinine egä weebibine ajiri me wawename, cane yepä singi gäne weebibine awecetnärame cäme ngenecurage bägrä bine liiyepu. ¹⁵ Ngänu gemi, weeme bucurage awecetnära biname piti nemi, yepä weeme yepä taatu babe pisi nyene lui cane säne. Weene pui padare cabu äbitininuujie Keriso me binamewale me, cane liba Miiji Mene jijanandinujine weebibine. ¹⁶ Peei name pi cane singi gäne weene cäme pana lenajame. ¹⁷ Cane Timoti ne jityepenine weeme bau me. Tabe lui ätrunga cabu ca cäme miijirage bägrä gyene cuta teeme kaakesea ne toraca ngenecu cama jaawenuge. Tabe te pa cääri umle jiwenipi cane lui mule bine yäacwetnimune, cane liba Keriso Yeesu cama lalenglecäjune, piyepu cane lui yaabiberäjimune iyeta ätrunga ingle bine.

¹⁸ Weene potu cina mope modamoda me itu läbitipeye, ingle weene apu ituge angi, egä cane ingwe ca lica pagege weeme bau me otni. ¹⁹ Yepä cäro, mime Yageyame liba singi gyene, cane watata pa lädepene peeyeme, siige pa jääpänemepene, egä pui mope modamoda biname cina lipu piige jaangenetnemuge gwidape bine wawenecame, nää teeme kokre pisi nyene peei ibi wawename? ²⁰ Acejiyame lui bine yaawadimuge, teepi gone mene taatu iicana, teepi cuta miiji Acejiyame me kokre ne aboclotna teeme ireclota ngalebora. ²¹ Nää, weene ngena tääpu memi singi, cane liba peeyeme pa lädepene, cane cubu suru cama otnime coo owecu cama otnime?

5

Ätrunga Biname bime Sargi Mule potu cidi me

¹ Cane ituge ätecija, egä weeme sobe cabu epu sargi mule biname pisi nyene, egä Acejiyame umle cäco biname cina umle cäco pepu mule acni. Naace, cebine ituge jaji, egä weeme yepä te teeme acenuteji mage cama gigri ecijanenige. ² Weene nää ai tääpume gege gemi? Weene miiji ajiri lenaja! Lui biname te peei mule ne yaacnepi, weene miiji teebine

äyblingta weeme ätrunga ingle cabu ca. ³ Cane puu weeme bau ca cude padare gäne, yepä căme ngenecu pisi nyene weeme cabu. Yoo, cane epu pana gäne, egä cane weeme sobe cabu pisi näne, siige ngene uja itu totwa-nanumene ngena wawename pui niiya mule biname täápume. ⁴ Weene mime Yageyame Yeesu me ngii cabu liba pagege abasacre-tna peema, piyepu căme ngenecu weeme cabu liba puma pagege piyepu mime Yageyame Yeesu me kokre liba pisi nyene weeme cabu, ⁵ weene piba Satani ne pui biname ceera naace täápume tabe te teeme tääpe ne sabe wawename. Yepä tabe pui biname te liba teeme mäpu cabu Acejiyame bau me cire latatrongtepi, Acejiyame te teeme seemo ne ireclota cire yääcärepä Yageyame me acnenuta bimu cabu.

⁶ Weeme awepyeräja lui nuuja miiji lica gyene! Egäsu weene umle gemi egä, “Matikäli uutneca gwidape te iyeta buluduu ne juutnecuge.” ⁷ Weene miiji niiya mule bine abmaläcema, ingle uutneca gwidape pana gemi, iyeta buluduu ne lui te joomluge. Piba weene kirece biname gemi epu pana kirece buluduu, lui cabu nuuja uutneca gwidape lica gyene. Weene nata pepuyame gemi, weene uutneca gwidape căco buluduu pana gemi epu pana äsuplengta deedei buluduu liiyepu. Cuta toraca gyene, egä mime äsuplengta bimu uja ituge atyaramta, ingle mime äsuplengta Maamoi Keriso ne uja itu eglujisi. ⁸ Siige mine liba ngene jaape-cnusi äsuplengta bimu ne, mine gone niyarage piyepu conocono ngene atwanena cama wawena, lui cina uutneca gwidape cama wawenäjei buluduu pana gemi, pätä mine miiji toraca piyepu conocăco ngene atwanena cama wawena, lui cina epu pana uutne-ca gwidape căco buluduu liiyepu.

⁹ Căme niinäce leta cabu cane yoogärepene, egä weene gone lalenglecäjininuye biname cama, lui cina umle gemi biname ero coo piyepu sargi mule wawena. ¹⁰ Yepä cane ätrunga căco biname täápume lica jüicepene, lui cina sargi mule biname, singi ädri biname, eromaame coo uuje awejena biname, ingle weene teebibine liba ägyema, weene miiji ai gawecewe ne abmala. ¹¹ Cane naace me jüicepene, egä weene gone lalenglecäjininuye biname cama, ätrunga biname ca lui te lainuge, yepä tabe sargi mule yaacnuge, singi yäädruge, uuje bine yaawejanemuge piyepu tabe eromaame birige. Pepu biname cama weene gone lalenglecäjininuye coo deedei gone yäärwäjimuye. ¹²⁻¹³ Peei lui căme bau lica gyene ätrunga căco biname bine atraname. Acejiyame te teebibine cire jaatranemepi. Yepä weene miiji weeme ätrunga ingle ngalebora weemämu latranininuye. Oogäränejei mene te jüicenige egä, “Niiyarage mule biname ne iyeblingtepeye weeme sobe cabu ca.”

6

Ätrunga Biname ne Gone Yaacanuye Ätrunga căco Biname cina Teebine Ablawame

¹ Peei lipu gyene, egä weeme ätrunga ingle biname te liba nuuja cama jääceluge, teepi lipulipu laacluge ätrunga căco biname bime bau me ablaweja täápume. Ngena name pi ätrunga ingle biname cina lica teebibine ablaweja? ² Egäsu weene umle gemi, egä Acejiyame me binamewale cina ai gawecewe ne cirege ablaweja. Siige weene liba ai gawecewe ne cirege ablaweja, weene cuta ibibi gemi apu matimati mule bine ablawejame. ³ Egäsu nata weene umle gemi, egä mine cuta Acejiyame me mename seemo bine cirege ablaweja. Peei name pi mine cuta ibibi gemi iyeta bimu gaabegabe mule bine ablawejame. ⁴ Yepä weene liba jääceluye papa mule poto cidi me, lui cina bimu gaabegabe läbitininusi, weene siige ätrunga căco biname bime bau me naacluge ablaweja täápume, lui bime nuuja kokre lica gyene ätrunga ingle ngalebora. ⁵ Weene miiji ajiri lenaja! Egäsu nata weeme ätrunga ingle ngalebora pisi nyene umle biname, lui te ibibi gyene ätrunga biname bime äceläcela mule bine ablawejame. ⁶ Yepä weene lica teeme bau me naacluge, weene mene iiwana puupu cabu me naacluge ätrunga căco biname cina puma weebibine ablawejame.

⁷ Weene lipu weemeweme ablaweja puupu me lawadaninuye, peei te jiwabininuge, egä weene bitramitinige. Miiji gyene weene ire taatu acita nuuja ne tabe niiya mule wawename weeme täápume cuta piyepu waadename, weeme ngena gwidape piti nemi. ⁸ Pätä weene weemeweme niyarage mule yaacnemimuye piyepu weeme yepäyepä bime bau ca gwidape angletneja mule ca yaawadimuye. Weene apu läbitaninuye weeme poto ätrunga biname bime cama! ⁹ Egäsu weene umle gemi, egä Acejiyame te lica cirege niiya mule biname bine conocăco ceera teta cama biname bine waadename. Weene gone langletnäjinuye. Laatibi sargi mule bine jaaweninusi, laatibi uuje bine yaawejanemusi, laatibi mule jaawenusi nuuja biname cama lui teeme coga coo rooriye lica birige, rooriye imäbägrä laatibi teemeteme lacananinusi, magebi ngulebägrä laatibi pui yepä mule yaacnusi; ¹⁰ coo piyepu laati bemi gwidape eroyame, singi ädri biname, sice nänäja biname, iicetneja biname, eromaame, apu mule biname bine Acejiyame te lica cirege conocăco ceera teta cama biname bine waadename. ¹¹ Weeme poto cina niinäce pepu ituge. Yepä page weeme niiya mule äcisäjei gemi, weebibine mara me ituge wawena

Acejiyame täápume, mime Yageyame Yeesu Keriso piyepu mime Acejiyame me Seemo teepi te weebibine conocáco ituge wawena me opo gaabe je.

Weeme Täápe cina Miiji Acejiyame me Ngii ne Babo Wawena

¹² Weeme yepä te pama jüucuge egä, “Iyeta mule papa gemi cane waweneträjame.” Yoo, yepä iyeta mule miiji lica gemi mäáme täápume. Cane naace täápume jüicenine, egä iyeta gwidape puu papa gemi cáme täápume, yepä cane singi lica gáne nuuja mule te cebine acaname. ¹³ Cuta nuuja te pama jüucuge egä, “Deedei lui camuge täápu myene, camuge lui deedei täápu myene.” Peei toraca gyene, yepä teepi iyeta cire lapirepäsi. Täápe lica naace täápu myene ero sargi mule waweneträjame yepä Yageyame me kaakesea wawenecame, piyepu Yageyame te täápe ne ire jetwe-nige. ¹⁴ Acejiyame te Yageyame ne budre cabu ca erpinantuji, cuta tabe mibibine teeme kokre ca cire nirpinäripi.

¹⁵ Egäsu nata weene umle gemi, egä weeme täápe lui Keriso me täápe piicwa gemi. Peei name pi mine liba rarekaake yäácáranemusi magebi bine teta cama sargi mule wawename, peei lui mine Keriso me täápe piicwa bine sabe jaawenimusi. Mine licarage pepu mule wawena! ¹⁶ Coo weene pama umle lica gemi, egä lui biname te rarekaake wäácäruge magebi coo ngulebägrä ne teta cama sargi mule wawename, teepi siige yepä me läbitäsi. Oogäráneji mene te pajecurage jüicenige ai poto cidi me egä, “Laatibi magebi rooriye bime mule jaawenäsi, teepi yepä me läbitäsi.” ¹⁷ Yepä, Yageyame cama yepä äbita lui mara gyene. Laati te teta cama yepä läbituge, peei lui egä teepi seemo ireclota cabu yepä gegi.

¹⁸ Weene miiji sargi mule cabu ca cude padare äbita. Laati te liba nuuja nüya mule ne yaacnuge, teeme täápe ne sabe lica jaawenuge, yepä sargi mule ne liba yaacnuge, peei te teeme täápe ne sabe jaawenuge. ¹⁹ Weene umle gemi, egä weeme täápe lui mete gemi Aceji Seemo täápume, lui te weeme cabu yaanajuge, Acejiyame lui Seemo ituge weebibine ceera. Weene weeme lica gemi, weene Acejiyame memi, ²⁰ ingle tabe te weebibine baborage daremu ca jiletininuui. Peei name pi weene miiji epu lenaja, egä weeme täápe ireclota cabu ca weene Acejiyame me ngii ne babo wawename.

7

Ätemla Coga Rooriye bime Ireclota poto cidi me

¹ Niinäce weene lui gwidape poto cidi me leta soogärepeye cáme bau me, siige cane page pui daremu mene jiwecnistenininine. Nuuja nüya lica gyene biname te liba coga cáco lenaja. ² Yepä ero piyepu sargi mule wälu name pi biname cina miiji coga rooriye awadrecá. ³ Siige rooriye te miiji teeme coga bau me läcäruge piyepu coga te teeme rooriye bau me läcäruge. Teepi miiji yepäyepä teeme singi ngene aglime. ⁴ Coga te yageyame lica gwene teeme täápe täápume, yepä rooriye sine yageyame. Cuta pepu gyene, rooriye te yageyame lica gyene teeme täápe täápume, yepä coga tune yageyame. ⁵ Weene nuuja ingle name pi gone äbwäreca coga rooriye bime mule cabu ca, yepä ebä läbwäricuye, weene liba gigri singi yaanajuge padare acatename irecu ätumutame. Cuta weeme peei irecu ätumuta padare te liba siige, weene cuta piba gigri icijuge, siige Satani te piba weebibine lica angetneja ingle weeme singsingi name pi.

⁶ Cane ai lui naace täápume lica jüicenine, egä cane weebibine giri jicitinine coga rooriye awadrecame. Yepä weene liba singi gemi, cane lica jüibenininine. ⁷ Cane gege cirege, weene iyeta liba epu cirege cane lipu coga acata cáco. Yepä mime yepäyepä cina maramara mule täápume kokre ne jääpänusi Acejiyame bau ca. Yepä me kokre lui yepä gwidape täápume, nuuja me kokre lui nuuja gwidape täápume.

⁸ Yepä atejäclmuta cáco biname piyepu cuublacubla bime täápume cane cáme ngene atwana mene jüicenine, egä teepi miiji atejäclmuta cáco lenaja cane liiyepu. ⁹ Yepä weene liba singi idrinuge coga rooriye awadrecame, siige äblicáco weeme singi bine übaname, weene lawadricinuye. Weeme singi ädri cabu ca miiji gyene weene atejäclmuta.

¹⁰ Piyepu cuta laatibi ituge atejäclmuta, weeme täápume mene age sena. Ai cáme mene lica gyene, Yageyame miji mene gyene. Coga te gone teeme rooriye ne ägyi. ¹¹ Yepä tabe liba jäägyuge, tabe miiji taatu lenaja coo tabe miiji acenuta teeme rooriye bau me. Cuta rooriye te gone teeme coga ne ägyi.

¹² Poto bime täápume Yageyame bau ca mene lica gyene, yepä cane te jüicenine. Liba ätrunga biname me coga pitu nvene, tabe lui ätrunga cáco gwene, gone jwäägyute, tabe liba singi maane cama lenajame. ¹³ Cuta ätrunga magebi, mäáme liba rooriye ätrunga cáco, tabe liba singi maane cama lenajame, gone jäägyute. ¹⁴ Cane ai mene naace name pi jüicenine, ingle ätrunga cáco rooriye te ätrunga biname cama lalenglecäjuge teeme coga me ätrunga miji pi; cuta ätrunga cáco magebi te teeme rooriye me ätrunga miji pi lalenglecäjuge ätrunga biname cama. Liba apu lica cirege, piba teeme bägrä eei biname bime bägrä pana cirege, laatibi Acejiyame ne lica jäätrungusi. Yepä liba apu cirege, teeme bägrä cina cuta ätrunga

biname cama lalenglecäjininusi. ¹⁵ Yepä lui te ätrunga cäco birige, tabe liba singi teeme ätrunga coga ne coo rooriye ne abmalame, tabe jaawenuge. Piba ätrunga coga coo rooriye kälyä birige pui atejäclmuta cotre cabu ca, ingle Yageyame te weebibine itu tisoglicipi weene poode cama lenajame. ¹⁶ Ätrunga coga, maane toraca umle lica gäte, egä mäame mule te nää mäame rooriye ne singi me jaawenuge ireclota gaabe cabu me atatrongtame, piyepu ätrunga rooriye maane cuta toraca umle lica gäte, egä mäame mule te mäame coga ne singi me jwaawenuge ireclota gaabe cabu me atatrongtame.

Ätrunga Biname cina Miiji Acejiyame me Singi cabu Lenajame

¹⁷ Ätrunga biname cina miiji eei ireclota cabu lenajame, Yageyame te luma itu icran-muji piyepu luma cita ca tabe ituge ala asogleca teeme bägrä täapume. Cane apu yaabiberäjimune iyeta ätrunga ingle ngalebora. ¹⁸ Laati te liba tääpe cewecu cama birige, Yageyame te liba ala taasoglicuge, tabe gone läbituge pui cewecu ne äyebingtame. Cuta piyepu laati te liba tääpe cabu cewecu cäco birige, Yageyame te liba ala taasoglicuge, tabe gone läbituge pui cewecu ne acatame. ¹⁹ Nuuja gwidape lica gyene biname te liba tääpe cewecu cama coo tääpe cewecu cäco, yepä eei gyene baborage gwidape tabe Acejiyame me Mene ne ätecijame. ²⁰ Biname te lipu ireclota cabu yaanajuge, Acejiyame te liba ala taasoglicuge teeme biname täapume, tabe miiji pepu lenaja. ²¹ Maane liba aletnäneji biname gäte, Acejiyame te liba ala taasoglicuge, ngänu gyene, maane pepu naanajepi. Yepä maane liba ibibi gäte pui ireclota cabu ca kälyä äbitame, yoo maane kälyä äbitepi. ²² Yageyame te liba ala taasoglicuge aletnäneji biname ne, tabe kälyä läbituge Keriso me miji pi. Cuta pepu gyene, laati te liba lica gyene aletnäneji biname, Acejiyame te liba ala taasoglicuge, tabe Keriso me aletnäneji biname ne läbituge. ²³ Weebibine ituge babo daremu ca aletna, peei name pi ire taatu gone acrana biname cina weebibine cääri ätäyame. ²⁴ Cäme ätru-nga binamewale, weene lui ireclota cabu inajipi, Acejiyame te liba ala tisoglicipi teeme binamewale täapume, weene peema inajipi.

Ätemleja Atejäclmuta cäco Biname piyepu Cuublacubla bime potu cidi me

²⁵ Mime Yageyame te lica ituge mene iicema atejäclmuta cäco biname bime potu cidi me, yepä cane cäme ngenec atwana mene jiićenine. Ai puu cäme mene gyene, yepä weene miiji ngenecu ceera, ingle Yageyame te ngenec atwana näcäranuge cane umle cama mene iicemame.

²⁶ Ingle naace popi ai lui mäpu padare gyene, peei name pi cäme ngenec atwanena apu gyene, egä rooriye te miiji epu lenaja, tabe lipu yaanajuge. ²⁷ Mäame liba coga pitu nwene, gone waabmalute. Maane liba coga cäco gäte, gone läbituce coga ne acatame. ²⁸ Yepä maane liba coga waacatute, maane nuuja niiya mule ne lica jaawenute. Cuta ngulebägrä te liba rooriye acata je, tabe niiya mule lica jaawenuge. Yepä laatibi latejäclmutäsi, pui cabu cuta mäpu pisi nyene, cije cane singi lica gäne weene pui mäpu cabu me abacitamame.

²⁹ Cäme ätrunga binamewale, cane naace täapume jiićenine, egä babo padare lica gyene ngälugaabe oomlaname, peei name pi coga rooriye cama biname, teepi puu atejäclmuta biname gemi, yepä teepi miiji ama cita ca epu yepä ngenec atwana cama lenajame atejäclmuta cäco biname liiyepu. ³⁰ Piyepu laatibi ele yaangene-tnemuge, teeme puu ngenecu mäpu piti nemi, yepä teepi miiji epu lenaja ele cäco biname liiyepu. Piyepu laati bemi ngange, teepi puu gege gemi, yepä teepi miiji epu lenaja ngange cäco biname liiyepu. Cuta piyepu laatibi gwidape bine jaaletnanemus, teeme puu gwidape piti nemi, yepä teepi miiji epu lenaja gwidape cäco biname liiyepu. ³¹ Yoo, laatibi gawecewe ireclota mule täapume kaakesea jaawenusi, teepi ngenec atwanena oräre gone peei cabu lenajame, ingle ai gawe te lecaleca padare apu lica cirege lenaja.

³² Cäme singi apu gyene, egä weene ngenecu mäpu cäco lenajame. Ätrunga cama cusucusi me nuuja ngenec atwanena lica gyene, yepä tabe singi Yageyame ne ngenecu miiji me wawename. ³³ Yepä coga cama biname te, tabe ngenec jwaatwananuge ai gawecewe ireclota potu cidi me, ingle tabe singi teeme coga ne ngenecu miiji me wawename, ³⁴ siige tabe neenenen potu ire jaatwu-ge. Cuta piyepu rooriye cäco magebi coo ngulebägrä cina, teepi ngenec jwaatwananinusi Yageyame potu cidi me taatu, ingle teepi singi teeme täapume mara me äbita teeme seemo ireclota piyepu tääpe ireclota ngalebora. Yepä rooriye cama magebi te, tabe ngenec jwaatwananuge ai gawecewe ireclota potu cidi me, ingle tabe singi birige teeme rooriye ne ngenecu miiji me wawename.

³⁵ Cane naace täapume jiićenine egä weebibine ätityerame, lica iibaname coga rooriye awadrecä cabu ca. Cane singi gäne weene eei bine wawenetnäjame, ngena gemi miiji piyepu conocäco, piyepu yepä ngenec atwana cama äcärame Yageyame me kaakesea wawename.

³⁶ Liba ciweloooloyame wäsi piti negi, siige teepi liba niinäce apu egä, “Cine lica atejäclmuta,” yepä ingwe ca liba cusucusi te apu egä, “Ai atejäclmuta cäco mule lui miiji lica gyene ngulebägrä täápume,” coo piyepu teeme singi cina ngulebägrä täápume liba kokre yaacrajuge, tabe siige lasicnantuge egä, “Cane miiji atejäclmuta,” siige teepi latejäclmutäsi. Ai mule lui niiya mule lica gyene. ³⁷ Yepä, cusucusi me liba ciweloooloyame pitu nwene, siige nuuja te liba lica jiibuge egä, “Maane gone waacatute,” yepä tabe teemämu ngene jwaatwanuge coga cäco lenajame, siige pui ngene atwana cabu kokre yaanajuge, tabe peei lui miiji mule jaawenuge. ³⁸ Pipu pi laati te coga waacatuge, peei lui niiya lica gyene, yepä laati te lica waacatuge, peei lui miijirage gyene.

³⁹ Piyepu rooriye cama magebi te miiji teeme rooriye cama lenaja. Yepä rooriye te liba budre, tabe piba kälyä läbituge. Siige tabe liba singi nuuja rooriye ne acatame, tabe yaacatuge, yepä pui rooriye te miiji ätrunga biname. ⁴⁰ Yepä cäme ngene atwana te apu jüicenige, egä tabe liba rooriye cäco waanajuge, peei miiji gyene. Ai puu cäme mene gyene, yepä Acejiyame me Seemo cäme cabu pisi nyene.

8

Ätemleja Cibü Deedei poto cidi me, Lui ca Uuje bine Ituge Iiwäreja

¹ Cane singi cuta mene jajime weene lui soogärepeye cäme bau me cibü deedei poto cidi me, uuje bine lui ca ituge iiwäreja. Yoo mine umle gemi iyeta ai poto cidi me. Yepä pepu umle te biname ne jaawenuge mope babo me, yepä owecu te yäätityäruge nuuja biname ne. ² Laati te liba apu angü, egä teeme umle pisi nyene poto gwidape poto cidi me, tabe cäro camu ge umle äbita, tabe lipu cirege. ³ Yepä laati te liba Acejiyame täápume singi, Acejiyame te umle gyene tabe.

⁴ Yoo siige cäme mene age sena pui cibü deedei poto cidi me, lui cina iiwäräneji gemi uuje bine. Mine umle gemi, egä uuje lui toraca gwidape lica gemi, piyepu mine umle gemi, egä yepä taatu pisi nyene lui Acejiyame gyene. ⁵ Toraca gyene, egä biname cina einenisi poto gwidape bine cabu je piyepu gawe cabu uuje ca; piyepu toraca gyene, egä pepu uuje piyepu yageyame bucurage gemi. ⁶ Yepä mime täápume yepä taatu “Uuje” pisi nyene, lui sine Babe piyepu lui sine Acejiyame iyeta gwidape täápume, piyepu lui täápume mine ninajininige. Piyepu cuta yepä taatu Yageyame pisi nyene, Yeesu Keriso, lui cabu ca iyeta gwidape cina acinujisi piyepu lui cabu ca mine ninajininige.

⁷ Yepä poto ätrunga biname cina umle lica gemi, egä uuje lui toraca gwidape lica gemi. Teepi teeme sasa ireclota cabu epu geäji gemi uuje bine cibü deedei ca iiwärejame, egä cuta page teepi liba pepu cibü deedei bine yäärwäjimusi, teepi camu puga ngene jotwanininisi, egä uuje bine äcäräneji gemi ai cibü deedei. Ingle naace popi teepi cängena lica ngene ca agli, egä ngena gyene toraca, ngena gyene walya, teepi peei name pi lasicnantinusi, egä cine niiya mule jebenisi pipu cibü deedei liba yäärwäjusi. ⁸ Yepä, cibü deedei papa gyene loolo; peei te äblicäco mibibine Acejiyame gome waadena. Mine liba ärwäja cäco, mine nuuja niya ne lica jääpänsi, cuta mine liba yäärwäjusi, nuuja miiji ne lica jääpänsi.

⁹ Yoo, weene umle gemi, egä iyeta cibü deedei papa gemi, yepä weene gone ärwäja, liba umle cäco biname ne ire jaarmetnuye atramame. ¹⁰ Weene lui umle gemi, egä uuje bine iiwäräneji cibü deedei papa gemi, ingle uuje lui toraca gwidape lica gemi, siige nuuja ätrunga biname lui te ai poto cidi me cängena umle lica birige, liba jipänininige loolo cabu, nää ai te lica opo jaarmetnuge tabe cuta loolo me, ngänuge tabe teeme asicnenta ne yääcisäruge. ¹¹ Siige weeme peei umle te sabe jaawenuge weeme nuuja ätrunga biname ne, lui te umle cäco yaanajuge piyepu Keriso lui täápume budre äbituji. ¹² Weene liba apu niiya mule jaawenuye weeme ätrunga biname yepä ne, teebine lipu jaawenuye tabe teeme asicnenta ne äciserame, weene peei lui Keriso täápume niya mule ne jaawenuye. ¹³ Yoo siige, cane liba cibü deedei ärwäja ca ire jaarmetnune cäme biname ne, siige cane ingwe ca lica pui cibü deedei loolo, ingle cane singi lica gäne teebine ire armetname.

9

Paulo Ngena Ingle cabu Keriso me Ätyepäneji Biname Gyene

¹ Nuuja biname te äblicäco cebine giri acitame egä cane ngena wawename. Cane Keriso me ätyepäneji biname gäne. Cane mime Yageyame Yeesu ne irecourage ca jepänujine. Cane lui kaakesea jaawenune Yageyame täápume, weene pui kuu gemi. ² Ngänu gyene, poto cina lica nacatusi, egä cane ätyepäneji biname gäne, yepä weene te nacatuye! Weene lipu yepä me läbitipeye mime Yageyame cama, peei te jaawabudnituge, egä cane Keriso me ätyepäneji biname gäne.

³ Laatibi singi cebine ablawejame, cane cämecäme apu jüicenine ⁴ egä cäme conocäco pisi nyene biname bime bau ca deedei päpäname cäme kaakesea daremu me. ⁵ Cuta cäme

conocäco pisi nyene ätrunga magebi ne coga me acatame siige teta cama gigri otnetneja poto Keriso me ätyepäneji biname cina liiyepu, Yageyame me iganewale liiyepu coo Peteru liiyepu? ⁶ Cine nää Banaba cama taatu gegi epu ätyepäneji biname, lui cina miiji kaakesea wawena cime lenaja täápume? ⁷ Nata caami biname te daremu lica yääcärüge teeme lenaja täápume? Cuta calwacupi yageyame te tabe waina kuu loolo teeme calwacupi cabu ca. Piyyepu maamoi ire atwi biname te tabe maamoi bime ngame migi yäänäjimuge.

⁸ Binamerage bime ngene atwanena mene taatu lica gemi ai, cuta Acejiyame me cotre te pepu jiićenige. ⁹ Moose me Cotre cabu apu oogäräneji gyene egä, “Gone kau me tage jäätäyumi, tabe liba wiiti mope bine jäämungäjemuge.” Nää Acejiyame kau bime täápume taatu jiićenige, cime täápume lica gyene? ¹⁰ Ngenä pi, tabe cuta cime täápume jiićenige. Ai mene toraca cime täápume oogäräneji gyene. Laati te gawe ne yäängwädnuge piyyepu laati te gije bine yäätemuge, teepi kaakesea jaawenimusi kuu päpäna täápume. ¹¹ Siige cine seemo ireclota täápume gije bine ituge ätema weeme cabu, peei name pi bucu lica gemi cine weeme bau ca daremu ne gwidape päpäname tääpe ireclota täápume. ¹² Poto bime conocäco liba pisi nyene weeme bau ca gwidape päpäname, cime conocäco piba baborage gyene.

Yoo, cime puu conocäco pisi nyene, yepä cine apu lica ituge äbita. Cine iyeta mule cabu ituge ämyemutana naace täápume egä cine lica iibana Miiji Mene ne Keriso poto cidi me daamledamle äbitame. ¹³ Egäsu weene umle gemi, egä lui biname cina Acejiyame me mete cabu kaakesea jaawenusi, teepi puma cita ca deedei bine jääpänimusi. Piyyepu lui cina Acejiyame ne cibi ca yiwäräjusi iiwäreja dade cabu, teepi puma cita ca teemanu kupae bine yaawadimusi. ¹⁴ Cuta pepu gyene, Yageyame te ituge iicana, egä laati bi Miiji Mene jajanena kaakesea jaawenusi, teepi miiji peema cita ca daremu päpäna teeme lenaja täápume. ¹⁵ Yepä cane pepu lica ituge äbita. Cuta cane ai ne naace täápume lica bii byoogärine egä cane weeme bau ca daremu päpäname. Cane singi lica gäne weebibine ätineräjame, ngänuge cane loolomecewe budre. Nuuja te äblicäco gyene căme ai awepyeräja ingle ne acata căme bau ca. ¹⁶ Miiji Mene acenena name pi cane äblicäco awepyeräja, ingle cane căme singi ca lica jewenenine ai kaakesea ne, yepä Acejiyame te itu najuji cane wawenane. Miiji Mene cane miiji jajanena, cije cane niija ne jääpänune. ¹⁷ Cane liba căme singi ca ai kaakesea ne cire jaawenejine, piba cane miiji cirege daremu täápume ätemlame. Yepä cane Acejiyame täápume ai kaakesea ne jewenenine, ingle tabe te itu najuji. ¹⁸ Siige cane ngena daremu ne acata ai kaakesea cabu ca? Căme daremu lui eei gyene, egä cane Miiji Mene daremu căco jaajanemune. Căme puu conocäco pisi nyene daremu päpäname ai kaakesea cabu ca, yepä cane pepu lica äbitenine.

¹⁹ Cane puu nuuja biname me aletnäneji biname lica gäne, yepä cane cămămu äbitujine iyeta biname bime täápume aletnäneji biname pana lenajame naace täápume egä bucurage biname bine piba Yageyame bau me waadename. ²⁰ Cane liba Israela biname cama birige, cane teeme pana nanajuge naace täápume teebibine Yageyame bau me waadename. Cane puu Moose me Cotre cabu ca äyebliingtujine, yepä cane liba Israela biname cama kaakesea jaawenune, cane epu nanajuge, egä cane pui cotre bine icwetnenemine naace täápume teebibine Yageyame bau me waadename. ²¹ Cuta cane liba biname cama birige lui Israela biname lica, cane teeme pana nanajuge Moose me Cotre äcwetna căco naace täápume teebibine cuta waadename Yageyame bau me. Cane naace me lica jiićenine, egä cane Acejiyame me cotre cabu ca kälyä gäne; eewe, cane Keriso me cotre ngalebora sāne pätä. ²² Laati bemi ätrunga cabu kokre liba lica, cane liba ten cama birige, cane teeme pana läbitune teebibine Yageyame bau me waadename. Yoo, cane lipu biname cama nanajuge, cane teeme pana läbitune naace täápume cane lipu maramara gaabe ca teeme poto bine waadename Yageyame bau me. ²³ Cane iyeta gwidape bine Miiji Mene miiji pi jaawenimune naace täápume mine iyeta pui Mene cabu ca miiji ne päpäname.

²⁴ Weene nata umle gemi, egä puu bucurage cina luuwamitnu-ge daremu täápume, yepä teeme yepä taatu te yuutrutuge, siige tabe daremu ne yaacatuge. Peei name pi weene miiji pepu uuwamitnipeye, egä weene daremu ne cirege päpäna. ²⁵ Laati bemi singi apu bääclena cabu me äbăcname, teepi miiji eei mule bine ägyema, lui cina teeme tääpe bine kokre căco me jaawenimusi naace täápume teepi piba niinäce daremu ne acata. Teepi lui daremu ne yaacatusi iyeteta lica gyene, yepä mine lui daremu täápume uuwametnenininago, peei lui iyeteta gyene. ²⁶ Peei name pi cane conocäco uuwamenine ngălu ngălugaaabe me. Piyyepu cane eei biname pana gäne, lui te imecubu bääclena cabu kuutamarage yoororuge. ²⁷ Cane naace name pi căme tääpe ne egletnăjenine egä tabe kokre me äbitame piyyepu căme singi ibi lenajame, cije Acejiyame te cebine, lui te poto bine Miiji Mene ituge jajanena, pama äyebliingta mage.

Umle Mene Uuje bine Iiwäreja poto cidi me

¹ Cäme ätrunga binamewale, weene ngene gone jitrimalinuge, ngena te äbituji mime kaakesaare bime täapume, teepi liba Moose cama Aikupito ca secluji. Carbe te gaabe tewabimuji teepi luma otnime, piyepu teepi iyeta Ududi Malu ne cängengarage ernge ta suurujisi. ² Teepi carbe uuwa cabu lipu secluji piyepu malu ne lipu ernge ta suurujisi, teepi peei lui Moose cama yepä me äbitininujisi cotre bine äcwetname. ³⁻⁴ Teepi yepä deedei ne serwa-nenanumesi piyepu yepä niye ne senäjumesi teeme seemo ireclota täapume. Teepi ireclota kula cabu ca niye ne senäjumesi, teta cama lui kula te äduji. Pui kula lui Keriso tage. ⁵ Ngänuge apu, yepä Acejiyame te ngenecu miiji lica ge teeme iyeta bime täapume, siige teeme bucurage cina budre äbitininujisi daapo taatu cewe cabu.

⁶ Yoo siige, ai lui umle mene gyene mime täapume, egä mine gone singi ädri niyaniya mule wawename teepi liyepu. ⁷ Cuta mine gone uuje bine awejena teeme poto cina liyepu. Oogäräneji mene te ai poto cidi me jüicenige, egä teepi soriyomu eclitujisi, giire jewäjanujisi ime ca wawenäjeji uuje gwidape ne opo gaabe me acitame. ⁸ Mine cuta ero piyepu sargi gaabe cabu gone otnetneja teeme poto cina liyepu, siige yepä taatu bimu cabu twentitrii tausen biname cina budre itrametnemalemuji. ⁹ Piyepu mine gone Yageyame ne apicetnära, egä mine luma ngälu niya mule acni tabe piba daremu ceerame mibibine, teeme poto cina lipu jewenujisi, siige cobyame cina teebibine budre me eglectanemuji. ¹⁰ Piyepu mine gone Acejiyame bau me yaaratusi teeme poto cina liyepu, siige teebibine sabe wawenayame mename seemo te budre me eglectanemuji.

¹¹ Iyeta ai gwidape cina äpletnäruji teeme täapume naace täapume teepi peema cita ca ngena ca aglanename; siige oogäräneji gemi mime umle täapume, lui cina ireclota gemi page ai padare cabu, ngälugaabe liba mameta gyene atyaramta. ¹² Peei name pi laati te ngene apu jwaatwananuge, egä tabe ätrunga cabu kokre cama jeclajutenige, tabe miiji cängena ire, cije tabe yaatramuge. ¹³ Iyeta apicetnära weene lui bine jääpänanemuye, weeme taatu cabu lica, cuta iyeta biname cina peei bine jääpänanemusi. Yepä Acejiyame te teeme mene ibi jaawenuge, tabe epu taatu apicetnära bine täatyepäjemuge weeme bau me, weene lui cabu ca miiji gemi uutruta. Apicetnära te liba täduge, tabe kokre icärininuge weene ämyemutame siige äsime.

¹⁴ Peei name pi cäme miijirage binamewale, weene uucratni-peye uuje bine awejena cabu ca. ¹⁵ Weene ngene atwanena cama biname gemi, weene jitranepeye cane lui jijanenaneninine. ¹⁶ Mine liba aareto jaarwusi, siige eso yäacärusi kwäye täapume, mine liba pui kwäye cabu ca nani, mine piba gigri yepä me läbitininago Keriso cama teeme uudi nani name pi. Cuta mine liba yäatrecusi buluduu ne, siige jaarwusi, mine piba gigri yepä me läbitininago Keriso cama teeme tääpe arwi name pi. ¹⁷ Aareto buluduu lui yepä gyene. Mine puu bucurage gemi, yepä mine yepä tääpe gemi, inge mine iyeta peei yepä buluduu ne jaarwusi.

¹⁸ Weene ngene jotwananineye Israela biname bime poto cidi me. Teeme apu mule pisi nyene, egä laatibi yäärwäjimusi cibü deedei bine, lui ca Acejiyame ne yiwärüjisi, teepi iwäreja dade cabu ca gigri yäärwäjimusi, siige teepi gigri Acejiyame cama yepä me läbitininusi. ¹⁹ Cane naace täapume lica jüicenine, egä lui cibü deedei uuje bine iwäräneji gemi, mara gemi poto cibü deedei cabu ca, piyepu cane naace me lica jüicenine, egä uuje lui toraca gwidape gemi. ²⁰ Yepä cane naace me jüicenine, egä Acejiyame umle cäco biname cina liba uuje bine yiwäräjemus, teepi niya cable bine yiwäräjemus, lica Acejiyame ne. Cane singi lica gäne weene peei mule cabu ätenglecäjame niya cable bime cama yepä äbitame. ²¹ Weene äblicäco gemi Yageyame me aareto kwäye cabu ca nani piyepu cuta niya cable bime kwäye cabu ca nani. Weene cuta äblicäco gemi Yageyame me dade cabu ca loolo cuta piyepu niya cable bime dade cabu ca loolo. ²² Mine liba apu läbitininago mine peei lui Acejiyame ne yaapicetnärusi, egä lipu, tabe ire taatu nicranininige mine ai mule wawename? Mine nää apu ninge-nininuge, egä mine kokre gemi, tabe kokre cäco gyene?

Weene Jaawenimuye Iyeta Gwidape bine Acejiyame me Ngii Babo Wawename

²³ Biname cina apu jüicusi egä, "Iyeta mule lui papa gemi wawenetnäjame." Yoo toraca gyene, yepä iyeta mule lui miiji lica gemi. Cuta apu jüicusi egä, "Cine papa gemi iyeta mule bine wawenetnäjame." Yoo, yepä iyeta mule lui biname bine lica yäätityeräjimusi. ²⁴ Nuuja te gone teeme taatu miiji ne jäärnguge, yepä miiji tabe poto bime miiji ne ärngi.

²⁵ Weene miiji gemi loolo me iyeta cibü deedei bine, lui bine jaaletnimusi aletna puupu cabu. Pepu cibü deedei ärwäja cabu ca weene gone niyaniya lasicnantinuge, egä pama uuje bine iwäräneji deedei gemi. ²⁶ Oogäräneji mene te apu jüicenige egä, "Gawecewe piyepu iyeta teeme gwidape Yageyame memi."

²⁷ Piyepu ätrunga cäco biname te liba weebibine ala tisoglicininuge deedei loolo me, weene liba singi otnime, piba naaclepi, erwäjemepeye, tabe ngena icärininuge. Weeme nuuja

ingle lica birige niiya asicnentame pui cibi deedei name pi. ²⁸ Yepä pui abasecretna cabu liba nuuja te jijinuge egä, “Ai cibi lui uuje bine iiwäräneji gemi,” piba pui biname name pi gone yäärngäjuyee, lui te jijinuge pui mene. Cuta piiyepu teeme asicnenta name pi gone yäärngäjuyee, ingle tabe lasicnantuge egä niiya mule gyene. ²⁹ Yoo, cane weeme asicnenta name pi lica jiiicenine ai mene, ingle pui cibi ärngäja te äblicäco weeme asicnenta ne sabe wawena, yepä pui nuuja me asicnenta name pi cane jiiicenine.

Siige weene yepä te pama jiiicenige egä, “Nuuja biname me asicnenta te ngeno me niibenige cane gwidape wawename, lui căme tääpume papa gemi. ³⁰ Cane liba Acejiyame ne eso yääcărune deedei tääpume, siige yäärwäjune, piba ngena name pi potu cina cebine niicetnusi deedei potu cidi me, cane lui tääpume eso yääcărune Acejiyame ne?” ³¹ Agesa căme mene pui biname tääpume: weene ngena liba jaawenuye, yäärwäjuyee coo yäänäjuyee, weene iyeta jaawenimuyee Acejiyame me ngii babo wawename. ³² Weene epu inajipi, egä weene Israela biname bine atramame gone jaawenimuyee, coo piiyepu lui cina Israela biname lica gemi, coo piiyepu Keriso ne lui cina jäärungusi. ³³ Weene epu äbitininye cane liiyepu, lui te äbitinine iyeta biname bine ngenecu miiji me wawename. Cane căme miiji tääpume lica äbitinine, yepä iyeta biname bime miiji tääpume naace tääpume piba iyeta cina ireclota ne päpäname Yeesu cabu ca.

11

¹ Cebine näututeye epu, cane lipu Keriso ne jitutenine.

Magebi Roořiye cina Lipulipu Lenajame Ireçu Ätumuta Padare cabu

² Cane weebibine iwepyeräjiniine, ingle weene ngenne lica jitrimalinuge căme potu cidi me, piiyepu weene icwetnenemiye, cane lui itu ibiberäjipene weebibine. ³ Yepä cane singi gäne weene umle äbitame, egä Keriso sine mope iyeta rooriye bime tääpume, rooriye sine mope teeme coga tääpume, piiyepu Acejiyame sine mope Keriso tääpume. ⁴ Pipu pi rooriye te liba ätrunga ingle abasecretna cabu ireçu lätumutuge coo Acejiyame me tagepogogo mene jiiicemuge mope acwabäneji, tabe Keriso ne opo gaabe me lica yaacituge, lui sine teeme mope biname. ⁵ Piiyepu cuta lui magebi te mope acwaba căco ätrunga ingle abasecretna cabu ireçu lätumutuge coo Acejiyame me tagepogogo mene jiiicemuge, tabe teeme rooriye ne opo gaabe me lica yaacituge. Pui lui epu pana gyene, egä teeme mope äsweji ge. ⁶ Magebi te liba teeme mope lica yaacwabuge, tabe cuta miiji teeme edingäli alacna. Yepä, ingle ajiri mule gyene magebi tääpume edingäli alacname coo mope äsweji lenajame, tabe miiji teeme mope ne acwaba. ⁷ Yepä rooriye te gone teeme mope ne acwaba, ingle Acejiyame te ituge teebine teeme pana me wawena piiyepu teeme pana ireclota ituge ceera. Yepä magebi ne rooriye me pana ireclota ituge ceera, ⁸ ingle rooriye ne lica ituge magebi cabu ca wawena, yepä magebi ne ituge rooriye cabu ca wawena.* ⁹ Cuta piiyepu rooriye ne lica ituge wawena magebi tääpume yepä magebi ne ituge wawena rooriye tääpume. ¹⁰ Peei name pi magebi te miiji teeme mope ne cängena acwaba naace tääpume Acejiyame me mename seemo cina päpäname, egä tabe teeme rooriye ne opo gaabe me yaacituge. ¹¹ Yepä Yageyame me ätrunga ingle cabu magebi te taatu lica gwene cuta piiyepu rooriye te taatu lica gyene. Magebi me lipu singi pisi nyene rooriye me ätityera tääpume, rooriye me cuta singi pisi nyene magebi me ätityera tääpume. ¹² Magebi ne lipu ituge rooriye me cabu ca wawena, cuta pepu gyene, rooriye te magebi me cabu ca lapli-mluge, piiyepu Acejiyame agednayame gyene iyeta gwidape tääpume.

¹³ Siige weene weemämu atranipeye, egä nää miiji gyene magebi te ätrunga ingle abasecretna cabu ireçu ätumuta mope acwaba căco. ¹⁴ Acejiyame te lipu biname bine icranuji ai gawe cuta lenajame, peei te birige abiberäja, egä rooriye tääpume lecaleca edingäli lui ajiri cama birige, ¹⁵ yepä magebi ne lui miiji opo me jwaawenuye. Teebine lecaleca edingäli ituge ceera acwaba tääpume. ¹⁶ Liba biname piti nemi, laati bemi singi ai potu cidi me äcelame, căme nuuja mene lica gyene iicemame, yepä cine piiyepu iyeta ätrunga ingle cina apu läbitininusi.

Korinito Ätrunga Biname cina Aareto ne Niiyarage Yaaruwusi

¹⁷ Cane liba ai umle mene jiiananeninine, cane miiji cuta weebibine ablaweja. Weene liba labasecretnininuyee ireçu ätumutame, weene nuuja ätityera ne puma cita ca lica jääpänuyee, yepä sabe jiiwenininuge weebibine. ¹⁸ Yoo, cane ituge ätecija, egä weene liba labasecretnininuyee ireçu ätumuta tääpume, weene yepä ngenne atwanena cama lica birige. Cuta cane jitrungenine, egä ai mene lui toraca gyene, ¹⁹ ingle cane umle gäne, egä weene maramara äbita lui papa lica gyene. Peei lui weebibine apicetnärame weene piba opo awatname, egä weeme sobe cabu laati bemi toracarage ngenecu cama. ²⁰ Yoo siige, weene

* **11:8:** magebi rooriye: Ire Genesis 2:21-23

liba labasecretnininuye, weene aareto† ne cängena lica jaarwuye puma. ²¹ Ingle weene liba läbitininuye deedei loolo me, weeme yepäyepä cina jilonicininuge watawata teeme gome waadename weeme yepäyepä cina lui deedei piyepu waina niye saawadimuye. Peei name pi owecumete biname cina loolomecewe birige piyepu laatibi bucurage waina niye saawadimusi, teepi pui cabu ca buduma me läbitininusi. ²² Weeme nää weemerage mete lica gemi pepu loolo me coo nänäjame? Weeme täapume nää papa gyene Acejiyame me binamewale bime abasecretna cabu buduma mule acnetnejame? Coo piyepu weene nää singi gemi owecumete biname bine ajiri me wawename? Cane nää miiji weebibine awepyeräja? Ai poto cidi me cane licarage iwepyeräjininine!

Yageyame me Aareto

²³ Cane Yageyame bua ca ituge acata cane lui weebibine cuta itu ibiberäjpene, egä Yageyame Yeosu ne lui ciye cabu jewabudni-tujisi budre täapume, tabe piba buluduu ne ecatige, ²⁴ Acejiyame ne eso ecäriige, itrecige, jiicige egä, “Ai lui cäme tääpe gyene, lui weeme tääpu myene. Weene erweye cebine ngene apename.” ²⁵ Cuta pepu gyene, deedei ingwe gaabe ca tabe kwäye ne ecatige, jiicige egä, “Ai kwäye te klaje jecnenige Acejiyame lui kirece mene ituge jaji biname bine niya cabu ca äsecreraame, cäme uudi liba tapirenige. Weene liba yaanuye, cebine ngene napecnuye.”

²⁶ Siige iyeta padare cabu weene liba ai buluduu ne jaarwuye piyepu ai kwäye cabu ca yaanuye, weene peei lui Yageyame me budre ne jaaitnäjuye, ngälu tabe liba cire tacnenutepi. ²⁷ Peei name pi laati te liba papapapa jaarwuge Yageyame me buluduu ne cuta yaanuge teeme kwäye cabu ca, tabe teeme tääpe piyepu uudi bine sabe jaawenimuge. ²⁸ Yoo, pipu pi iyeta biname cina miiji niinäce teemämu lablawäjinuye, ingwe ca piba jaarwuye pui buluduu ne cuta yaanuye pui kwäye cabu ca. ²⁹ Laati te liba aareto cabu buluduu ne jaarwuge piyepu kwäye cabu ca yaanuge opo awatna cäco, egä Yageyame me tääpe ngena tääpu myene, peei biname te mäpu ne jääpänuge. ³⁰ Peei name pi weeme bucurage cina pita gemi piyepu bleela gemi, nesae cina budre ituge äbita. ³¹ Yepä mine liba mimämu niinäce lablawäjinago, piba Yageyame te nuuja singi lica mibibine pui mäpu daremu ceerame. ³² Yepä Yageyame te nitranininuge, niblawäjinuge naace täapume ngälugaabe je piba tabe singi lica mibibine mäpu daremu ceerame gawecewe muleyame biname cama yepä.

³³ Yoo siige, cäme ätrunga binamewale weene liba naacluge aareto loolo me, weene miiji nuuja bine awagrija, piba gigri loolo. ³⁴ Liba laasi nyene loolomecewe, tabe miiji niinäce mete cabu säärwäjuge, siige Acejiyame te piba weebibine lica ablaweja weeme niyarage mule name pi weeme abasecretna ngalebora. Yepä poto mule poto cidi me cane ebä umle pa jiwenipene, cane liba pa lädepene peeyeme.

12

Aceji Seemo te Kokre Yääcäranemuge Maramara Kaakesea Wawenecame

¹ Cäme ätrunga binamewale, cane singi gäne weene toraca umle äbitame, egä Aceji Seemo te ngena maramara kaakesea täapume kokre ceera. ² Weene umle gemi, egä weene liba camu Acejiyame umle cäco inajininuji, mene cäco uuje cina weebibine conocono gaabe cabu me iwadininujisi weene teebibine awejename. ³ Peei name pi weene miiji cängena ire lui gyene miiji seemo, cuta lui gyene niya seemo. Liba Acejiyame me Seemo te biname ne yaacenanuge, tabe äblicäco iicana egä, “Yeesu, maane nääglumege!” Cuta nuuja poto me, nuuja te äblicäco iicana egä, “Yeesu lui cäme Yageyame gyene,” liba teeme cabu Aceji Seemo te lica yaanajuge.

⁴ Maramara kokre piti nemi maramara kaakesea wawename, yepä lui Seemo te biname bine yääcäranemuge peei kokre, tabe yepä taatu gyene. ⁵ Cuta kaakesea maramara gemi, yepä Yageyame lui täapume jaawenimusi, tabe yepä taatu gyene. ⁶ Kokre mule lui maramara gemi, yepä Acejiyame lui te umle yääcäranemuge, tabe yepä taatu gyene. ⁷ Acejiyame te biname bime yepäyepä cabu maramara gaabe ca yaaboclomäjuge, egä teeme Seemo pisi nyene teeme cabu. Siige iyeta mule, lui maramara biname cabu läpletneräjuge, teepi iyeta biname bime miiji täapume. ⁸ Yoo, teeme Seemo te yepä ne umle yääcäruge tabe mäpu cabu ca asata gaabe ne päpäname; cuta nuuja ne ngene atwana yääcäruge tabe ämletnäreji gwidape coo mule poto cidi me umle äbitame. ⁹ Tabe cuta nuuja ne ätrunga yääcäruge poto gwidape poto cidi me egä pagege äbita; cuta nuuja ne kokre yääcäruge biname bine pita cabu ca miiji wawenename. ¹⁰ Piyepu nuuja ne yääcäruge kokre tabe kokre cama caitaca mule bine wawenecame; cuta nuuja ne kokre yääcäruge Acejiyame me tagepogogo mene iicemame; cuta nuuja ne kokre yääcäruge tabe ngene ca aglime, egä

† 11:20: aareto: Pui padare cabu ätrunga biname cina liba labasecretnininusi aareto loolome, teepi pui padare cabu cuta deedei läbitininusi.

nuuja biname ne lui seemo te ecanenige, nää tabe Aceji Seemo gyene coo niiyarage seemo gyene; cuta nuuja ne kokre yääcärüge tabe teeme umle cäco mene ca iicemame; cuta nuuja ne kokre yääcärüge pui mene ne aboclomtame.

¹¹ Iyeta ai mule bine yepä Seemo te jaawenimuge, lui te maramara kaakesea yääcäranemuge biname yepäyepä bine, tabe lipu tääpume singi ceerame.

Yepä Tääpe, Bucurage Piicwa

¹² Ätrunga ingle cina lui Keriso me tääpe gemi. Ätrunga biname cina lui maramara piicwa gemi, lui cina yepä tääpe ne jeweneni. ¹³ Mine puu maramara biname gemi, Israela biname coo nuuja gawe biname, aletnäneji biname coo poto biname, yepä mibibine iyeta yepä Seemo ca ituge äciseja, siige mine yepä tääpe me ituge äbita. Piiyepu Acejiyame pui yepä Seemo ne ituge acitena mime yepäyepä cabu tabe lenajame.

¹⁴ Tääpe cabu yepä taatu piicwa lica gyene, yepä bucurage piicwa gemi. ¹⁵ Ernge te liba jiiucuge egä, “Cane ime lica gäne, peei name pi cane tääpe me piicwa lica gäne,” peei te lica jiiibuge tabe tääpe me piicwa lenajame. ¹⁶ Cuta tablame te liba jiiucuge egä, “Cane irecu lica gäne, peei name pi cane tääpe me piicwa lica gäne,” peei te cuta lica jiiibuge tabe tääpe me piicwa lenajame. ¹⁷ Tääpe te liga iyeta irecu taatu cirege, tabe piba lipulipu ätecijana. Piiyepu tääpe te liga iyeta tablame taatu cirege, tabe piba lipulipu lengo ärmetjeja. ¹⁸ Yepä Acejiyame te piicwa maramara bine icranimuji tääpe cabu, tabe lipu ituge singi. ¹⁹ Liga iyeta yepä taatu piicwa cirege, piba tääpe te lica cirege. ²⁰ Yepä pepu lica gyene. Piicwa maramara gemi, tääpe lui yepä gyene.

²¹ Peei name pi irecu te äblicäco ime ne jaji egä, “Cane singi lica gäne mäame tääpume.” Cuta mope te äblicäco ernge bine jaji egä, “Cane singi lica gäne weeme tääpume.” ²² Cuta piiyepu tääpe te äblicäco eei piicwa cäco lenaja, mine lui poto cidi me ngene jwaatwananinago, egä kokre cäco gemi. ²³ Piiyepu lui piicwa poto cidi me ngene jwaatwananinago, egä papa gemi, mine cängenarage ire jwaatwemusi; cuta lui piicwa bine äblicäco awabudnita, mine cängenarage yaacwabimusi. ²⁴ Yepä lui piicwa bine biname cina miiji päpäname, teepi acwaba cäco yaacrajimuge. Acejiyame te tääpe ne epu jewenuji, egä mine lui piicwa tääpume lasicnanti-nago, egä papa gemi, tabe singi peei piicwa bine opo gaabe me acraname. ²⁵ Yoo siige, tääpe me maramara piicwa cina äblicäco teemeteme ägyi, yepä teepi teemeteme ire latwinusi. ²⁶ Yepä piicwa te liba mäpu cabu yaanajuge, teepi iyeta pui mäpu cabu yaacrajuge ten cama. Cuta yepä piicwa ne liba yaawepyeräjusi, teepi iyeta yepä gege teta cama.

²⁷ Yoo, weene peete nemi Keriso me tääpe; weene yepäyepä cina lui teeme yepäyepä piicwa gemi. ²⁸ Ätrunga ingle ngalebora Acejiyame te biname bine ituge maramara kaakesea tääpume acranetnäja. Tabe poto bine ätyepäneji biname me ituge acrana, poto bine ituge acrana Acejiyame me tagepogogo mene iicemame, poto bine abiberäjame, poto bine kokre cama ciitaca mule bine wawenecame, poto bine kokre ituge ceera pita biname bine miiji wawenename, poto bine nuuja biname bine ätityeräjame, poto bine ituge acrana mope biname me, cuta poto bine kokre ituge ceera teepi teeme umle cäco mene ca iicemame. ²⁹ Yepä iyeta ätrunga biname cina ätyepäneji biname lica gemi, coo teepi iyeta cina Acejiyame me tagepogogo mene lica jiiicemusi, iyeta cina lica yaabiberäjimusi, ciitaca mule bine lica jaawenimusi, ³⁰ coo pita biname bine miiji lica jaawenanemusi, coo teeme umle cäco mene ca lica jiiicemusi, coo teepi iyeta cina ibibi lica gemi pui mene aboclomtame. ³¹ Yoo, weene äbitinineye kokre päpäname modamoda mule bine wawenecame. Yepä, yepä taatu gwidape pisi nyene, lui gyene baborage. Peei lui singi gyene biname bime tääpume.

13

Toraca Singi Lipu Gyene

¹ Cane liba ibibi birige iicema biname bime maramara mene ca coo mename seemo bime maramara mene ca, yepä cane liba singi lica biname bime tääpume, cäme mene lui epu pana birige paate ala coo gogogo ala liiyepu. ² Ngänu gyene, cane liba ibibi birige Acejiyame me tagepogogo mene iicemame, piiyepu cuta cäme liba umle piti nemi iyeta mule poto cidi me, piiyepu cane liba umle birige iyeta ämletnäneji gwidape piiyepu mule poto cidi me, cuta cäme liba ätrunga pisi nyene podo bine äyebhengame teeme puupu cabu ca, yepä cane liba singi cäco nanajuge biname bime tääpume, iyeta peei mule lui papa birige. ³ Ngänu gyene cane puu iyeta cäme gwidape ceerana owecumete biname bine coo cäme tääpe ne ceera uubuderame, yepä cane liba singi lica biname bime tääpume, peei mule cina nuuja miiji lica birige cäme tääpume.

⁴ Toraca singi cama lui biname te mäpu cabu bojäcu yaanajuge, tabe owelaamelame gyene, ire patre lica yaagluge, lica lawepyeräjuge, mope babo me lica läbituge. ⁵ Toraca

singi cama biname te cängena yaanajuge, teeme taatu miiji ne lica jäärnguge, claabe me wata lica läbituge, biname bime niija mule bine lica yaawadimuge, yepä ngene jääntrimaluge teeme niija mule poto cidi me. ⁶ Toraca singi lui gege lica birige walya täापume, yepä tabe gege birige toraca täापume. ⁷ Biname te liba toraca singi cama, ngänuge lipulipu teebine sabe jaawenusi, tabe yäämyemutuge. Toraca singi cama biname te teeme ätrunga ne lica yaapasaruge, tabe wälu lica birige, piyepu tabe gloose lica läbituge mäpu cabu bojäcu lenajame.

⁸ Toraca singi te iyeteta gyene. Acejiyame me tagepogogo mene iicema cina cire lapiripesi, piyepu biname bime umle cäco mene iicema cire lapiripesi, cuta umle te cire lapirepi. ⁹ Mime umle lui cängena lica gyene, piyepu mine lui Acejiyame me tagepogogo mene jüicemusi, poto bine jääntrimaluge; ¹⁰ yepä eei te liba tädenige lui te epucäco gyene, piba iyeta lui cina epucäco lica teepi cire lapiripesi.

¹¹ Cane liba bägrä je, cane bägrä pana mene jüicemujine piyepu ngene jotwananujine. Cane liba babo me äbitujine, cane bägrä bime mule bine ebmalimujine. ¹² Mine page Acejiyame ne jepänaneni owowä pana, lica pajecurage, siige ingwe ca mine teebinerage cire jäänpanepesi. Page cane teebine cängena umle lica, yepä piba cirege cane cängena iyeta umle äbita teeme poto cidi me, tabe lipu umle iyeta cäme poto cidi me.

¹³ Yoo siige, ai nesae cina cire yaacrajemepi, ätrunga, ngene atwanena ca oomlana piyepu singi, yepä ai bime cabu ca singi lui baborage gyene.

14

Lipu Maramara Kaakesea täापume Aceji Seemo Kokre Ceera

¹ Weene kokre äbitipeye toraca singi cama lenajame, cuta kokre äbitipeye Aceji Seemo bau ca kokre päpaname maramara kaakesea wawename, toracarage lui Acejiyame me tagepogogo mene iicemame. ² Laati te teeme umle cäco mene ca jüicemuge, tabe biname bine lica jaajanemuge, yepä Acejiyame ne jaajanuge, ingle nuuja biname te äblicäco teeme mene ätecija. Tabe Aceji Seemo me kokre ca mene jüicemuge ogä gwidape poto cidi me. ³ Yepä laati te Acejiyame me tagepogogo mene jüicemuge, tabe biname bine yääntrimaluge, kokre yääcärimuge piyepu ngenecu plowa me jaawenimuge. ⁴ Yepä laati te liba teeme umle cäco mene ca jüicemuge, tabe teeme taatu miiji täापume jüicemuge. Yepä laati te Acejiyame me tagepogogo mene jüicemuge, tabe ätrunga ingle ne yääntrimaluge.

⁵ Cane singi gäne weene iyeta weeme umle cäco mene ca iicemame; yepä cane toraca singi gäne weene kokre ne acatame Acejiyame me tagepogogo mene biname bine jajanename. Laati te Acejiyame me tagepogogo mene biname bine jaajanemuge, tabe baborage gyene, ingle biname cina yääntrimaluge tabe ngena täापume jüicemuge. Yepä laati te teeme umle cäco mene ca jüicemuge, tabe matikäli gyene, ingle biname cina lica yääntrimaluge, tabe ngena täापume jüicemuge. Tabe ebä babo läbituge, liba biname pisi nyene peei mene ne aboclomtame naace täापume ätrunga ingle biname cina piba pui mene cabu ca ätityera ne päpaname. ⁶ Yoo, cäme ätrunga binamewale, cane cäme cabu ca etonärenine ai mule ne. Cane liba lädune peeyeme, siige mime umle cäco mene ca jüicemuge, cane piba lipulipu itityärinune weebibine? Cane licarage itityärinune, cane liba lica saawadimune Acejiyame te ngena cäme bau me saaboclomtuge cane weebibine jajanename, coo liba lica saawadimune umle mene, coo piyepu Acejiyame me tagepogogo mene, coo abiberäja mene.

⁷ Cuta pepu gyene, laati te liba jääntrimaluge dobidobi ne coo gogogo ne papapapa, biname cina umle lica birige, egä ngena uupera täापume jecnäjenige. ⁸ Piyepu laati te liba moole ne däägerage cubu täापume jääntrimaluge, biname cina lica birige amacetnäja. ⁹ Cuta pepu gyene, maane liba mäame umle cäco mene ca jüicemuge, biname cina lipulipu ätecija, maane ngena täापume jüicemuge. Mäame mene te papa me läbituge. ¹⁰ Ai gawecewe cabu lui bucurage maramara mene gemi, yepä teepi papa lica gemi, ngene atwana cama gemi. ¹¹ Yepä laati te liba cäme umle cäco mene ca cebine najananuge, pui biname te catecewe biname pana birige cäme täापume, cane cuta piyepu catecewe biname pana birige teeme täापume. ¹² Siige weene liba äbitiniye Aceji Seemo me kokre päpaname maramara kaakesea wawename, weene miiji eei kaakesea täापume oräre singi, lui cina yääntrimaluge ätrunga biname cina kokre äbitame.

¹³ Peei name pi lui biname te teeme umle cäco mene ca jüicemuge, tabe miiji irecu ätumuta Acejiyame bau me tabe teebine kokre ceerame pui mene ne cuta aboclomtame. ¹⁴ Cane liba cäme umle cäco mene ca irecu lätumutanune, cäme seemo te cäme cabu irecu lätumutanuge, yepä cäme ngene atwana te pui mene ne lica joomluge. ¹⁵ Cane siige miiji ngena wawena? Cane singi gäne cäme seemo te cäme cabu cäme umle cäco mene ca irecu ätumuta piyepu uupera atanga, yepä cane cuta singi gäne cämegerage mene ca irecu ätumuta piyepu uupera

atangame, cane lui mene täápume umle. ¹⁶ Maane liba weeme abasecretna ngalebora Acejiyame ne yaawepyeräjute mäáme umle cäco mene ca, Aceji Seemo lui mene yäácäruge mäáme seemo ne, pui mene umle cäco biname cina lipulipu “Amen” mene iicana, ingle teepi nuuja umle lica birige, maane ngena täápume jiiemute? ¹⁷ Maane puu miijirage yaawepyeräjute Acejiyame ne, yepä poto bine lica yäätityeräjimute.

¹⁸ Cane Acejiyame ne eso ecärenine, egä cane cäme umle cäco mene ca magerage jiiicananemune weeme iyeta cabu ca. ¹⁹ Cane puu miiji gäne ätrunga ingle me abasecretna ngalebora bucurage mene iicemame cäme umle cäco mene ca, yepä weene lica itecijinuge, peei name pi cane singi gäne mimerage mene ca iicema. Ngänuge cane matikäli taatu jiiemune, yepä weene lica umle, weene peei cabu ca labiberäjiminuye.

²⁰ Cäme ätrunga binamewale, weene bägrä bime pana ngene gone jwaatwananinuye. Matimati bägrä cina lipu umle cäco bucurage gwidape poto cidi me, weene miiji pepu umle cäco inajipi niija mule wawenecame, yepä weeme ngene atwanena miiji epu lenaja modamoda biname bime liiyepu. ²¹ Oogäräneji mene te apu jiičenige egä, “Yageyame te jiičenige:

cane idne mene biname bine cire jaawenemepene

cäme binamewale bine jajaneneme;

cane catecewe biname bime tage cabu ca cire jiičemepene,

yepä teepi puu singi lica ätecijame cebine.”

²² Yoo siige, biname te liba teeme umle cäco mene ca jiičemuge, peei lui cewecu gyene ätrunga cäco biname bime täápume, lica ätrunga biname bime täápume. Yepä Acejiyame me tagepogogo mene iicema lui cewecu gyene ätrunga biname bime täápume, lica ätrunga cäco biname bime täápume. ²³ Siige weeme ätrunga ingle me abasecretna ngalebora liba iyeta biname cina weeme umle cäco mene ca jiičemusi, siige lui ätrunga biname bine lica ituge abiberäja ai mule poto cidi me coo piiyepu ätrunga cäco biname, teeme poto cina liba sääbäcnusi, siige yäätēcijemuge weene iicema je, teepi apu jaangemuge, egä weene iyeta buduma gemi. ²⁴ Yepä weene iyeta liba Acejiyame me tagepogogo mene jiičemimuye, siige ätrunga cäco biname coo piiyepu ätrunga biname te, lui nuuja umle lica gyene ai mule poto cidi me, liba tabacituge, liba yäätēcijuge pui mene, tabe lasicnantuge, egä tabe niija mule ituge waweneca. Tabe lui mene yäätēcijuge teebine yaablawäjuge, ²⁵ siige teeme ngena gemi ämletnäreji, iyeta sääsemuge. Tabe piba kokorare ca lääpednutuge, Acejiyame ne opo gaabe yaacituge, siige teeme niija mule bine jaawabudnitēmuge, jiičuge egä, “Toraca, Acejiyame pisi nyene weene cama.”

Irecu Ätumuta Kaakesea Miiji Cängena Wawena

²⁶ Yoo, cäme ätrunga binamewale, mine ngena abiberäjame ai cabu ca? Weene liba labasecretnininuye irecu ätumutame, yepä te uupera ne yaacatuge, nuuja te ibiberäjiminuge, nuuja te jiičinuge Acejiyame te ngena yaaboclomtuge teeme bau me, nuuja te teeme umle cäco mene ca jiičemuge, cuta nuuja te peei mene ne yaaboclomtuge. Iyeta weene lui mule jaawenimuye, miiji weeme ätrunga ingle ne ätityera. ²⁷ Weeme abasecretna ngalebora liba pisi nyene weeme umle cäco mene ca iicema mule, neeneni coo nesae cina miiji iicema; yepä te liba lätecituge, nuuja te piba gije labacituge. Cuta nuuja te miiji aboclomläja peei mene bine. ²⁸ Yepä aboclomla biname liba lica birige, pepu biname cina miiji abasecretna ngalebora bojä agime. Teepi miiji teeme taatu täápume iicema piiyepu Acejiyame täápume. ²⁹ Neeneni coo nesae biname cina miiji Acejiyame me tagepogogo mene iicema, cuta poto cina miiji atrana, egä ngena tääpu myene peei mene. ³⁰ Biname te liba pisi nyene Acejiyame me tagepogogo mene iicema cabu, siige nuuja te liba pui padare cabu yäätēcijuge Acejiyame bau ca, niinäce lui te jiičemuge, tabe miiji ätecita padare ceerame pui nuuja ne tabe cuta iicemame. ³¹ Apu gaabe ca weene iyeta miiji gemi padare päpäname Acejiyame me tagepogogo mene iicemame, siige piba iyeta biname cina labiberäjininusi, kokre läbitininusi. ³² Acejiyame me tagepogogo mene iicema biname te teemämu lawecetnäruge, ³³ ingle Acejiyame tabe singi lica weene apu mule papapapa wawenetnäjame irecu ätumuta padare cabu, yepä cängenarage poode cama.

Iyeta poto ta ätrunga maramara ingle cabu luma biname cina labasecretnininusi irecu ätumutame, ³⁴ magebi cina miiji bojäcu lenaja. Peei lui miiji lica gyene teepi mene iicema, piiyepu teepi gone niinäce gaabe me äbita, Israela biname bime Cotre te cuta lipu jiičenige. ³⁵ Teepi liba singi ngena täápume umle äbitame, teepi miiji irecu ätumuta kaake poto cidi ca teeme rooriye bine ätemleja mete cabu, ingle niija gyene teepi irecu ätumuta padare cabu mene iicema. ³⁶ Acejiyame me mene te weeme cabu ca lica täduge, coo weeme taatu täápume lica täduge?

³⁷ Laati te liba ngene jwaatwananuge, egä tabe Acejiyame me tagepogogo mene iicema biname gyene, coo piiyepu Aceji Seemo te teebine kokre yäácäranuge poto kaakesea

wawename, tabe miiji umle, egä cane ngena yoogärenine, Acejiyame bau ca gyene. ³⁸Taba liba ai mene ne lica jäätecijuge, weene gone cuta teebine ätecija.

³⁹Yoo, căme ätrunga biname, weene kokre äbitipeye Acejiyame me tagepogogo mene iicemame. Yepä weene cuta gone jiihemuye, laatibi teeme umle căco mene ca jiiemusii.

⁴⁰Yepä weene ngena jaawenuye weeme irecu ätumuta ngalebora, miiji cängena wawena.

15

Keriso me Budre cabu ca Arpinenta

¹Căme ätrunga binamewale, cane singi gäne weene cuta căări ngene atwaname cane lui Miiji Mene itu jijanani-pene weebibine, weene lui mene ne yaacatepeye piyepu weeme ätrunga te lui mene cabu kokre jeclajutenige. ²Pui Miiji Mene cabu ca weene ireclota ne jepäniniye, weene liba kokre cama joomleniye, cane lipu jijanani-pene, cije weeme ätrunga te papa me läbituge.

³Yoo, cane lui mene niinäce itu ecatujine, lui niinäce gaabe gwidape gyene, siige cane weebibine pui mene jijanani-pene, egä Keriso te budre äbituji mime niiya mule täápume, Oogäräneji mene te lipu jiičenige. ⁴Teebine gape cabu me ecitujisi, siige nesae me lui bimii piba Acejiyame te teebine erpinantuji, Oogäräneji mene te lipu jiičenige. ⁵Taba Peteru bau me niinäce aboclomtuji, puma cita ca teeme iyeta twelb bau me. ⁶Piba taba cuta faib hanred cerämu poto cama ätrunga biname cabu me yepä gääbu taboclomtuji. Teeme bucurage cina camu ireclota gemi, puu poto cina budre gemi. ⁷Puma cita ca taba cuta aboclomtuji Yakobu bau me piyepu iyeta teeme ätyepäneji biname bime bau me.

⁸Ingwerage ca taba cuta căme bau me taboclomtuji, lui epu pana gäne, egä cane toracarage padare cabu lica aplimlujine. ⁹Cane matikáli gäne iyeta poto teeme ätyepäneji biname bime cabu ca. Cuta cane miiji lica gäne teeme ätyepäneji biname ngii ne acenename, ingle cane Acejiyame me biname bine sabe itu tewenenäjemumene. ¹⁰Yepä Acejiyame te owecu nawenuji, siige cane page age säne, cane lipu nanajinige. Taba lui owecu nawenuji papa me lica äbituji, yepä cane mage kaakesea ituge wawena poto ätyepäneji biname bime cabu ca. Puu toraca gyene, egä cane căme ca ai kaakesea ne lica ituge wawena, yepä Acejiyame me owecu ca ituge, lui te căme cabu kaakesea jewenenige. ¹¹Yoo siige, ngänu gyene laati te weebibine Miiji Mene jajanena, cane te coo poto ätyepäneji biname cina, ingle cine biname bine yepä mene jaajanemusii, siige weene peei mene ne ituge ätrunga.

Budre cabu ca Arpinenta

¹²Yoo, cine jaajanemusii, egä Keriso budre cabu ca itu erpinantuji, cije lipu pi weeme poto cina piba jiiçuye, egä budre cabu ca arpinera lica gyene. ¹³Peeli liba toraca gyene, piba Keriso budre cabu ca lica itu erpinantuji. ¹⁴Cuta taba liba lica itu erpinantuji, piba cime mene jajanena kaakesea papa gyene, weeme ätrunga cuta papa gemi. ¹⁵Pui taatu lica, cuta piba cibibine nipäninini, egä cine walya otrometneninago Acejiyame poto cidi me, ingle cine ituge iicana, egä taba Keriso ne budre cabu ca itu erpinantuji. Yepä liba toraca gyene, egä budre cabu ca arpi-menta lica gyene, taba piba Keriso ne lica itu erpinantuji. ¹⁶Ingle budre cabu ca arpinenta liba lica gyene, piba Keriso ne cuta lica ituge arpinenta. ¹⁷Piiyepu Keriso ne liba lica ituge arpinenta, piba weeme ätrunga te papa me äbitenige, siige weene camu niya mule cabu inajininige. ¹⁸Piba cuta budre biname lui cina Keriso ne itu jäätrungepesi, iyeteta ituge apeseräja. ¹⁹Mine liba Keriso cabu me ngene atwana yaacranusi ai taatu ireclota täápume ätityera päpäname, lica ciige ireclota täápume, cine piba owecumete gemi iyeta biname bime cabu ca.

²⁰Yepä toraca gyene, egä Acejiyame te Keriso ne budre cabu ca erpinantuji, siige ai te niwabininige, egä taba cuta eei bine cire yaarpinäre-mepi, lui cina budre ituge äbita. ²¹Budre te lipu biname cabu ca täduji, cuta budre cabu ca arpinenta te piyepu biname cabu ca täduji. ²²Iyeta biname cina lipu Adamu miiji pi budre läbitininusi, teepi pepu Keriso miiji pi cuta budre cabu ca cirege arpinera. ²³Yepä Acejiyame te iyeta biname bine teemerage padare cabu cire yaarpinäre-mepi: taba Keriso ne niinäce gaabe me itu erpinantuji, siige Keriso te liba cire tacnenutepi, Acejiyame Keriso me biname bine piba cire yaarpinäre-mepi. ²⁴Peeli ingwe gaabe ca ai padare me ngälugaabe te ebä cire tädepi, Keriso te liba cire yaapremale-mepi teeme cubuyame seemo bine piyepu teeme poto cubuyame kokre bine, siige iyeta gwidape Aceji Babe ne cire yääcärepi taba te waadename. ²⁵Ingle naace gyene Keriso te miiji babo biname me lenaja, ngälu Acejiyame te iyeta cubuyame bine cire yaapremale-mepi, siige cire yaacranemepi Keriso me ernge gawe me. ²⁶Budre lui ceräcerägääbu cubuyame gyene taba apremelame. ²⁷Oogäräneji mene te jiičenige egä, "Acejiyame te ituge iyeta gwidape bine acrana teeme ernge gawe me." Yepä mine umle gemi, egä ai "iyeta gwidape" ngalebora Acejiyame lica gyene, lui te iyeta gwidape bine cire yaacranemepi Keriso me ernge gawe me. ²⁸Siige Bägrä te liba mope biname me cire

yaanajepi iyeta gwidape täápume, piba tabe cire läcärepi teemämu Acejiyame te ire atwime, siige piba Acejiyame te iyeta ire cire jaatwemepi.

²⁹ Cije lipu gyene lui biname cina niye ca äciseja ne ituge acata budre biname bime puupu cabu? Teepi ngena name pi pui mule ne itu jaawenepesi, liba budre biname bine lica cirege arpinera. ³⁰ Piiyepu cuta budre cabu ca arpinera liba lica cirege, cije cine piba ngena name pi iyeta padare cabu ai kaakesea name pi mäpu cabu ninajinige. ³¹ Cäme ätrunga binamewale, peei lipu toraca gyene, egä cane mime Yageyame Yeesu Keriso me opo gaabe je babo gege gäne wemiji pi, peei cuta toraca gyene, egä cane iyeta bimu gaabegabe cabu budre mametarage cama waatnune. ³² Ngena miiji gyene cäme täápume, cane liba Epeso je larngepene biname bime cama lui cina girigale gwidape bime pana ge, cane liba lica jäärungepene, egä ireclota pisi nyene budre me ingwe gaabe ca. Liba budre cabu ca arpinera lica cirege, piba “Mine yäärwäjemesi, yäänäjemesi, ingle ciyeciye siige mine budre.”

³³ Gone langletnäjinuue. “Niiyarage abasutanayame cina biname bime miiji mule bine sabe jaawenimusi.” ³⁴ Weene miiji täcnäripeye weemerage ngene atwanena cabu me, niiyaniya mule bine ebmaläcemepeye. Cane ai lui weeme ajiri me jücenine, egä weeme poto cina Acejiyame umle cäco gemi.

Biname cina Lipulipu Budre cabu ca Arpinera

³⁵ Yoo, biname yepä te pama apu birige ätemla egä, “Budre cabu ca biname cina lipulipu larpinärüge, piiyepu lipulipu tääpe bine teepi yaawadanemusi?” ³⁶ Maane lipulipu pepu ätemla! Maane liba kuu gije ne jaacnute, tabe ebä lica agi, tabe liba budre niinäce lica läbituge. ³⁷ Maane gijerage ne lica jaacnute, yepä kuu ne jaacnute, wiiti kuu ne coo ngena nuuja kuu ne, siige pui cabu ca gije te taaguge. ³⁸ Siige Acejiyame te kuu ne jaawenuge teemerage tääpe cama gije te agime. Cuta maramara kuu bine jaawenimuge maramara tääpe cama gije cina agime.

³⁹ Gije bime tääpe lipu maramara gemi, poto gwidape bime tääpe cuta pepu maramara gemi. Biname bime tääpe mara gyene, glunubora otnetneja gwidape bime tääpe mara gyene, niye bora cibubime tääpe mara gyene, ele bime tääpe mara gyene.

⁴⁰ Piiyepu lui cina cabucewe je icrajenemige, teeme tääpe lui mara gyene, cuta gawecewe cabu lui cina icrajenemige, teeme tääpe mara gyene. Cabu tääpe me jamyacu mara gyene, gawe tääpe me jamyacu mara gyene. ⁴¹ Cuta dume cabu je lui gwidape teepi maramara gemi: bimu me apaclyera mara gyene, mabye me mara gyene, wale bime mara gyene. Cuta wale cina lica gemi yepä apaclyera cama, poto cina babo apaclyera cama, poto cina matikäli apaclyera cama gemi.

⁴² Apu cirege, biname cina liba budre cabu ca arpinera. Biname ne liba yaacitusi, teeme tääpe te locwäwuge; yepä tabe lui tääpe cama cirege arpinenta, budre cäco tääpe cirege. ⁴³ Liba yaacitusi, niiyarage piiyepu kokre cäco; liba larpinantuge, miijirage piiyepu kokre cama. ⁴⁴ Liba yaacitusi, peei lui gawe me tääpe gyene, liba larpinantuge, seemo me tääpe cirege. Gawe me tääpe lipu pisi nyene, cuta pipu ge seemo me tääpe pisi nyene. ⁴⁵ Apu oogäräneji gyene egä, “Acejiyame te niinäce Adamu ne gawe ca jewenuji, buuwemope ecaruji, siige tabe ireclota ge.” Yepä Keriso lui ingwe ca Adamu gyene, tabe seemo gyene, lui te gwidape bine ireclota yääcäranemuge. ⁴⁶ Yepä, seemo me tääpe lui niinäce tääpe lica birige, yepä ai gawe me tääpe niinäce birige, siige piba seemo me tääpe ingwe ca birige. ⁴⁷ Niinäce Adamu ne Acejiyame te gawe ca jewenuji, siige tabe gawecewe cabu ca gyene, ingwe ca Adamu lui cabucewe ca gyene. ⁴⁸ Ai gawe cabu lui biname cina icrajinige, teepi gawe ca wawänäneji biname pana gemi, yepä laatibi cirege otni cabucewe me, teepi puma pui biname pana cirege äbita, cabucewe ca lui te täduji. ⁴⁹ Yoo, page mine gawe ca awenäneneji biname pana gemi, yepä mine cire läbitipago teeme pana me, cabucewe ca lui te täduji.

⁵⁰ Cäme ätrunga binamewale, cane naace täápume jücemenine, egä page mine lui tääpe bine ewadanemenisi, teepi äblicäco otni Acejiyame me puupu cabu me; watawata gwidape äblicäco iyeteta lenaja.

⁵¹⁻⁵² Itecijinege, cane ogä mene jijenininine: mine iyeta budre lica cirege äbita, liba ceräcerägäabu moole te cire saangeneji, yepä mine watawata taaturage mara me cire läbitipago, epu pana biname te lipu teeme irecu ne watawata taaturage lätumuge. Yoo, pui moole te liba ala cire saangeneji, budre biname cina cire tarpinäripesi, siige ingwe ca budre lica cire läbitipesi. Yepä mine lui cina camu ireclota gemi, mine kirece tääpe ne cire yaacatepesi. ⁵³ Ai tääpe lui watawata piiyepu budre myene, miiji atepingta budre cäco tääpe me, lui te iyeteta gyene. ⁵⁴ Siige ai mule te liba cire läpletnutepi, watawata tääpe te liba cire lateplingtepi budre cäco tääpe me, piba ai Oogäräneji mene te ibibi cire läbitepi egä, “Budre iigareceji gyene; tabe uutrutäneneji gyene.”

⁵⁵ “Budre, mäame kokre siige bapirige;

määme biigu iyeta siige bämligel!”

⁵⁶ Yoo, lui biigu te jaawenuge biname ne budre me, pui lui niiya mule gyene; piyepu niiya mule te teeme kokre ne yaacatuge Cotre cabu ca biname bine mäpu ceerame, inge Cotre te jaawabuge, egä biname te niiya mule ne bii becnige. ⁵⁷ Yepä mine miiji Acejiyame ne eso ceera, lui te niweninunuge uutrutame mime Yageyame Yeesu Keriso me kaakesea miiji pi.

⁵⁸ Yoo, căme miijirage ätrunga binamewale, weene kokre cama jicljautipi. Weene gloose căco kaakesea jewenepeye Yageyame täápume, inge weene umle gemi, egä weene ngena kaakesea jaawenuye teeme täápume, papa me lica läbituge.

16

Rarekaake Ootona Ätrunga Biname bime täápume

¹ Yoo, cane jijenininine, weene lui soogärepeye rarekaake ootona täápume ätrunga biname bime täápume Yuudea gawe ngalebora. Weene epu jewenepeye, cane Galatiya gawe cabu lui ätrunga inge bine lipu jaajemepene. ² Iyeta Sande gaabegabe weeme yepäyepä cina miiji rarekaake äyebenga weene luma ngälu ibibi gemi ceerame, siige ingwe ca piba weene nuuja singi lica rarekaake ootona, cane liba pa lädepene peeyeme. ³ Cane liba pa latyaramtepene, cane leta cama piba pa jäätjepemepene biname bine, weene lui bine tejäcrimume, weeme owecu gwidape ne acaname Yerusalema me. ⁴ Cuta cane liba pa jääpänepene, egä miiji gyene cane teta cama otnime, cane pa lädepene.

Paulo Gläämu Jecijige

⁵ Cane apu gläämu nacijige, egä cane weebibine ebä pa pidäripene, cane liba niinäce Makedoniya probins cabu ta pa lädepene, inge cane ngena jotwananenine Makedoniya probins cabu ta otnime. ⁶ Cane weene cama pa nanajepi seeji lecaleca padare, pama iyeta gäbu padare. Siige piba weene cebine pa nätiyärepeye căme otni täápume, cane liba liiyeme pa lädepene. ⁷ Cane singi lica gäne weebibine watatarage äsuplengtame. Căme singi apu gyene, egä cane lecaleca padare weene cama lenajame, liba Yageyame singi gyene.

⁸ Cane Epeso je pa nanajepi ngälu Pentikos bimü ne oomla-name, ⁹ inge gaabe iitneji gyene cane Epeso babo cewe je miijirage kaakesea wawename, puu bucurage biname cina cuta cebine näciseräjenisi.

¹⁰ Timoti liba otni je peeyeme, weene miiji teebine awabla, cängenarage ire atwi, inge tabe Yageyame me kaakesea jenenenige cane liiyepu. ¹¹ Weene gone teebine ägyi pana jaawenuye, yepä weene teebine itityärepeye poode cama tabe otnime, siige tabe piba pa tacnenutepi căme bau me. Cane teebine jewagrijenine poto ätrunga biname cama.

¹² Cuta mime biname Apolo, cane teebine jaajananune tabe poto ätrunga biname cama weebibine ädärame, yepä căro tabe camu gyene cängena ngena atwanena, egä tabe ai padare cabu pa lädepä. Yepä tabe liba miiji padare ne pa jääpänepi, tabe piba pa lädepä.

Ceräcerägäabu Mene

¹³ Weene ireire inajipi, piyepu kokre cama imyemutipi ätrunga cabu. Weene miiji wälu căco piyepu kokre. ¹⁴ Weene iyeta mule bine owecu cama jenenemepeye.

¹⁵ Weene umle gemi Setepanus piyepu teeme inge biname; teepi lui niinäce biname gemi ätrunga acitame Yeesu Keriso cabu me Akaya probins ngalebora. Teepi teemeteme läcäripesi Acejiyame me binamewale bime täápume kaakesea wawename. Căme ätrunga binamewale, peei name pi cane jijenininine, ¹⁶ weene miiji apu biname bine ätecija, cuta laatibi teta cama kaakesea jeneninisi.

¹⁷ Cane gege gäne Setepanus, Portunatus, Akaihus, teeme otni name pi, inge teepi ituge wawena căme täápume, weene ngena ne äblicăco ge wawena. ¹⁸ Teepi cebine ngenecu plowa me ituge wawena, weebibine lipu ngenecu plowa me itu jiwenipesi, peei name pi weene miiji apu biname bine opo gaabe me acrana.

¹⁹ Asiya probins ngalebora ätrunga inge cina weebibine jiwablininisi. Piyepu Akwila naabi Prisila piyepu teeme mete cabu lui ätrunga biname cina labasecretnuge, teepi cuta weebibine jiwablininisi Yageyame me ngii cabu. ²⁰ Cuta ama lui ätrunga biname cina, teepi jiwablininisi weebibine. Weene peema weemeweme ajecletnäjiyepi ätrunga biname bime mule liiyepu.

²¹ Cane lui mene aga biiri jicemine, nuuja biname te yoogärimige căme täápume. Yepä canerage te ama yoogärinine egä: Cane Paulo te weebibine jiwablininine.

²² Laati te Yageyame täápume singi lica, tabe niiya puupu ne pa jääpänepi. “Maranata” – Mime Yageyame, maane tädi!

²³ Yageyame Yeesu me miiji te lenajame weeme cabu.

²⁴ Căme singi pisi nyene weeme täápume. Yeesu Keriso me miiji pi mine iyeta yepä gemi. Cane ngii Paulo. Căme mene ngälu peese.

PAULO ME NEENENI MANU LETA KORINITO ÄTRUNGA BINAME BIME BAU ME

Sebore Mene

¹ Cane, Paulo, Yeesu Keriso me ätyepäneji biname gäne, Acejiyame te lui ne najuji ai kaakesea täápume. Cane piyepu mine cama yepä ätrunga biname Timoti, cine te yoogärenago Korinito babo cewe ätrunga inge cabu me piyepu Akaya probins ngalebora iyeta Acejiyame me binamewale bime bau me. ² Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Paulo Acejiyame ne Eso Ecäriige

³ Mine eso yääcäresi Yageyame Yeesu Keriso me Acejiyame piyepu Babe ne. Tabe babo owecuyame Babe gyene piyepu Acejiyame, lui cabu ca iyeta ätityera cina totneninisi! ⁴ Tabe nitityeräjininuge iyeta mäpu cabu, siige pui ätityera ca, mine lui ne teeme bau ca jepäninisi, mine miiji gemi poto bine ätityera, laatibi maramara mäpu bine jääpänanemusi. ⁵ Keriso lipu mäpu cabu senajenäjumi, mine cuta pepu mäpu cabu ninajininige; Keriso ne lipu Acejiyame te itityäruji, tabe cuta mibibine Keriso cabu ca nitityeräjininige. ⁶ Cine liba mäpu cabu ninajininuge, peei lui weene Korinito biname bime miiji täápume piyepu weeme seemo ireclota ne kokre me wawename; piyepu cine liba ätityera ne jääpänusi, weene cuta peei yepä ätityera ne jääpänuye, siige weene kokre läbitininuye epu mäpu cabu ämyemutaname, cine lipu mäpu cabu ninajininige. ⁷ Peei name pi cine wälu lica gemi weeme täápume; cine umle gemi, egä weene lipu cime pana inajininige mäpu cabu, Acejiyame te weebibine pa itityeräjipi epu, tabe lipu nitityeräjininige cibibine.

⁸ Cime ätrunga binamewale, cine singi lica gemi weene umle cäco lenajame, cine lipu mäpu bine jääpänanemepesi Asiya probins ngalebora. Teepi epu babo niyara ge, egä cine apu ningipi egä, "Siige ai cime ngälugaabe gyene." ⁹ Cine lasicnanti-pago, egä cine budre cabu ca äblicäco uucratna. Yepä ai mäpu te naace täápume läbitipi cibibine abiberäjame, egä cine cime cabu gone ngene atwana yaacranimusi yepä Acejiyame taatu cabu me, lui te biname bine budre cabu ca birige arpinera. ¹⁰ Yoo, tabe cibibine pepu budre mäpu cabu ca itu nisechräripi, cuta tabe pagege äsecreta. Cine teeme cabu me cime ngene atwana ituge acrana, egä tabe cuta ciige cirege äsecreta, ¹¹ weene liba weeme irecu ätumuta ca cibibine nitityeräjininuye. Yoo siige bucurage biname cina pa irecu lätumutanipesi Acejiyame bau me cime täápume, Acejiyame te teeme irecu ätumuta daremu pa jaawecnistemepi, siige cibibine miiji pa niwenipi. Piba bucurage cina Acejiyame ne eso pa yääcäranepesi, egä cine ätityera ne ituge päpäna.

Paulo me Mene Teeme Otni Gläamu poto cidi me

¹² Cine ai täápume gege gemi, egä cine ngene ca eglenisi, egä cine iyeta padare cängenarage ninajininuge iyeta biname cama, toracarage lui weene Korinito biname cama. Cine Acejiyame miiji conocäco mule cama piyepu Acejiyame miiji yepä taatu ngene atwana cama ituge lenaja. Cimerage umle te cibibine lica ituge awecetnära, yepä Acejiyame me owecu te niwecetnärininuge cibibine. ¹³⁻¹⁴ Cine lui leta bine yoogärimusi weeme bau me, mäpu lica gemi acnename piyepu opo awatname. Yepä ai padare cabu weene cängena umle lica bäbitininiye iyeta cime poto cidi me, yepä cane ngene atwana icraninine weeme cabu me, egä weene ingwe ca cängena umle päbitipeye iyeta cime poto cidi me. Siige mime Yageyame Yeesu Keriso me acnenua bimu cabu weene epu gege cire inajipi cime täápume cine liiyepu weeme täápume.

¹⁵ Yoo, cäme toraca ätrunga puga ge ai poto cidi me, siige cane niinäce gläamu nacijepi peeyeme Korinito cewe me otnime weebibine ängrärame weene piba neeneni gäabu gege äbitame. ¹⁶ Cane naace me jiccinene, egä cane gläamu nacijepi weebibine neeneni gäabu ängrärame: niinäce ängrärame Makedoniya me liba pa pa lädepene, cuta cääri ängrärame puma cita ca liba pa tacnepene naace täápume cane piba weeme bau ca ätityera ne päpäname cäme Yuudea me otni täápume. ¹⁷ Cane acinacina biname lica ge, cane liba cäme gläamu ne mara me jaawenepene. Cane epu biname lica gäne, lui te papa gläamu jaacijuge, lui te mene taatu jicuge yepä wawename lica. ¹⁸ Acejiyame te lipu toraca mene jicuge, cäme mene cuta toraca ge, weeme bau me otni poto cidi me liba jijipene. ¹⁹ Yeesu Keriso Acejiyame me Bägrä, lui poto cidi me Siila, Timoti piyepu cane mene jijaninanigo, tabe lica gyene epu biname liiyepu, lui te jicuge, yepä lica jaawenuge. Tabe acinacina biname lica gyene. ²⁰ Teeme cabu ca Acejiyame me iyeta mene cina toraca me läbitininusi. Peei name pi mine teeme ngii cabu 'Amen' mene jicusi, mine liba Acejiyame ne yaawepyeräjusi. ²¹ Weene

Korinito cewe ätrunga biname piiyepu cine, Acejiyame te gigri niwenininuge mine kokre cama aclajutame Keriso bau. Tabe mibibine mara me itu niwenipi teeme kaakesea wawename. ²² Tabe cuta teeme cewecu ne itu yaacitanepi mime cabu me awabame, egä tabe mime Yageyame gyene, piiyepu Aceji Seemo itu nicäripi klaje wawename, egä mine cirege päpäna iyeta, teeme ngena piti nemi mime täápume.

²³ Acejiyame lui te umle gyene cane, tabe naitnenige, egä cane pui name pi otni cäco läbitepene peeyeme Korinito me, ingle cane singi lica ge weebibine ngenecu mäpu me wawename. ²⁴ Cine lica äbitininago weebibine jajanename, egä weene ngena ätrungame, ingle cine umle gemi, egä weene ätrunga cabu kokre gemi. Eewe, pätä cine singi gemi weene cama kaakesea wawename weeme miiji täápume.

2

¹ Yoo, peei name pi cane otni cäco läbitepene peeyemopo Korinito cewe me, ingle cane liga cire lädejine, cane cuta cääri ngenecu mäpu me cire jiweninejine weebibine. ² Ingle naace gyene, cane liba ngenecu mäpu me wawena je weebibine, piba laati te cebine gege me pa nawenepi, ingle weene iyeta ngenecu mäpu gemi. ³ Yoo, cane naace name pi peei leta yoogärepene, ingle cane singi lica ge weebibine ängrärame. Ingle naace popi pui padare cabu cane liga cire lädejine, cane ngenecu mäpu cire jääpänejine wemiji pi. Cuta weene peete nemi pui biname, lui cina cebine gege me nawenuye! Cuta cane toraca umle gäne, egä cane liba gege birige, weene iyeta cuta piiyepu gege birige. ⁴ Yoo, cane peei leta ne mage ngenecu mäpu piiyepu ele mäcu cama yoogärepene. Cane naace name pi lica yoogärepene, egä weebibine ngenecu mäpu me wawename, yepä weebibine umle wawename egä cäme singi lipu baborage gyene weeme täápume.

Paulo Singi Gyene Ngene Ätrimelame Yepä Biname me Niiya Mule ne

⁵ Lui biname te weeme sobe cabu niiya mule ne itu jaawenepi, tabe cebine ngenecu mäpu me lica nawenepi yepä weebibine — yoo weeme poto bine. Cane singi lica teebine lipu wawename, ⁶ naace popi ibibi gyene, weene lui teebine seblawäjumeyi piiyepu daremu secärumeye. ⁷ Page weene siige ngene jitrimalinege teeme niiya mule, ngenecu kokre me jeweneye, cije tabe ngenecu mäpu name pi niiya ne jääpänuge. ⁸ Peei name pi cane jijenininine weene teebine umle wawename, egä weene singi gemi teeme täápume. ⁹ Cane peei leta ne naace täápume yoogärepene weebibine apicetnärame. Cane singi umle äbitame, egä weene iyeta mule cabu cäme mene ibi naaclenige coo lica. ¹⁰ Weene liba ngene jitrimalinuge biname me niiya mule, cane cuta pipu ngene nätrimaluge. Ingle cane singi gäne weeme täápume, peei name pi cane Keriso me opo gaabe je ngene ituge ätrimela niiya mule poto cidi me, liba toraca gyene egä niiya mule pisi nyene, cane lui poto cidi me miiji ngene ätrimelame. ¹¹ Cane ai ne naace täápume jaawenune, egä Satani te piba äblicäco mibibine oomlana, ingle mine umle gemi, teeme gläamu lipu gemi.

Paulo Mage Ngenecu Mäpu Yaanajepi Trooasi je

¹² Cane liba Trooasi me latyaramtepene Keriso poto cidi me Miiji Mene jajanename, cane jääpänepene, egä Yageyame te gaabe ne ituge iitnana cane puma kaakesea wawename. ¹³ Yepä cäme babo ngenecu mäpu puga ge, ingle cane mime biname Taitus ne lica jääpänepene puma. Peei name pi cane pui cewe ne yaabma-lepene, siige Makedoniya me lädepene.

Keriso te Niwenininige Mine Uutrutame

¹⁴ Yepä mine miiji Acejiyame ne eso ceerame! Ingle naace gyene, mine liba Keriso cama yepä gemi, Acejiyame te lipu jewenuji Keriso ne uutrutame teeme cubuyame bime cabu ca, tabe cuta cine ätyepäneji biname bine niwenininuge Keriso cama gigri uutrutame. Acejiyame te niwenininuge cine iyeta poto ta biname bine mene jajanename Keriso poto cidi me. Pui mene lui miiji lengo pana gyene, lui te cewe ne iyeta yaacwabuge. ¹⁵ Cine miiji lengo gwidape pana gemi, Keriso lui ne juubudärüge Acejiyame ne iiwärejame, ingle cime cabu ca Miiji Mene te Keriso poto cidi me otnenige iyeta biname bime cabu me; eei bime cabu me, lui cina cirege iyeteta ireclota ne päpäna, cuta eei bime cabu me, lui cina cirege iyeteta budre ne päpäna. ¹⁶ Apesareji biname bime täápume Keriso poto cidi me mene lui budre lengo cama birige, yepä lui bine niiya cabu ca ituge äsecrera, teeme täápume ireclota lengo cama birige. Nää, baa laasi nyene ibibi ai kaakesea wawename? ¹⁷ Cine eei bucurage biname bime pana lica gemi, lui cina toraca ngenecu cama ai kaakesea ne lica jaawenusi. Teepi Miiji Mene yaacenanusi rarekaake päpäna taatu name pi. Yepä cine toraca gemi, toraca ngenecu cama ai kaakesea ne jewenenisi; cine Miiji Mene jaajanemus i Acejiyame me awecetnära ngalebora. Tabe te cibibine nityepipi, siige cine Keriso me kaakesea bägrä gemi.

3

Acejiyame Lui Kirece Jajeji Mene ne Secituji

¹ Cane ngena bii byoogärine, naace täápume lica gyene, egä cine cääri cimämu awepey-eräjininago, poto cina lipu lican mage. Cine poto biname bime pana lica gemi; cine nuuja singi lica gemi leta täápume cibibine weeme bau me awabudnitame, egä cine toraca Keriso me mename biname gemi. Cine cuta nuuja singi lica gemi weene te leta oogärane cibibine aitname nuuja biname bime bau me. ² Weene peete nemi leta cibibine aitejame, lui cime ngenecu cabu oogäräneji gemi iyeta biname cina acnemame, umle äbitame. ³ Weene lui leta pana gemi, Keriso lui soogärumi cime kaakesea ca. Ai lui epu pana leta lica gyene, lui bine yoogärimusi ingki ca peba cabu, yepä epu pana gyene, egä Keriso te yoogäremepi biname bime ngenecu cabu me Ireclota Acejiyame me Seemo ca.

⁴ Cine apu jicenisä, ingle cime ätrunga pisi nyene Acejiyame cabu weeme poto cidi me, Keriso lui ätrunga ituge ceera cibibine. ⁵ Cime cabu nuuja gwidape lica gyene cibibine lui te niweninunuge jajime, egä cine ibibi gemi ai kaakesea wawename. Eewe, cime lui umle pisi nyene, Acejiyame bau ca gyene. ⁶ Pui lui tabe sine, lui te ibibi niwenimi cine kirece jajeji mene ne acenename, Acejiyame te lui mene ituge ceera biname bine nüya cabu ca äsecrerame. Ai kirece gaabe me ingle lui oogäräneji cotre lica gyene yepä Aceji Seemo gyene, ingle oogäräneji cotre lui budre ne saacanuge, yepä Aceji Seemo te ireclota ne saacanuge.

⁷ Cotre lui kula cabu oogäräneji gyene, piyepu lui padare cabu ceereji ge, Acejiyame me babo apacyera te puga taboclomtuji. Pui apacyera te Moose me opo cabu ca sepaclyäruji. Tabe pui äyebtingtenuji, yepä epu kokre ge, egä Israela biname cina äblicäco Moose bau me ire acita. Siige cotre lui te budre ne saacanuge, apu apacyera cama liba taboclomtuji, ⁸ piba lipu baborage apacyera cama birige, Aceji Seemo te liba kaakesea jaawenuge biname bime cabu. ⁹ Cotre mene, lui te biname bine jaatranimuge teeme nüya mule cabu, liba apacyera cama ge, piba lipu baborage apacyera cama gyene pui Mijji Mene, lui te ireclota ne saacanuge. ¹⁰ Page padare me baborage apacyera te itucärenige pui sasa padare me apacyera ne. ¹¹ Acejiyame te lui sasa mene ecäruji watata mene gyene, yepä apacyera cama ge, piba lipu baborage apacyera cama gyene, tabe lui kirece mene ne ecituji, lui te iyeteta mene gyene.

¹² Ingle ai kirece mene me apacyera lui baborage gyene, peei name pi cine wälu cäco gemi. ¹³ Cine Moose pana lica gemi, lui te teeme opo ne icwabuji naace täápume Israela biname cina piba lica päpäna pui apacyera te äyebtingta teeme cabu ca. ¹⁴ Pui padare cabu Israela biname bime mopemuli armeji ge; cuta ai taje pepu gyene, teeme mopemuli acwabäneji gemi, teepi liba yaacne-musi sasa cotre bine. Yepä Keriso te miiji gyene peei acwabäneji ne äyebtingtame. ¹⁵ Cuta page teepi liba yaacnemusi Moose me cotre bine, teeme mopemuli acwabäneji gemi; ¹⁶ yepä ebä läyebtingtuge biname te liba latatrongtuge Yageyame bau me. ¹⁷ Yoo, Yageyame lui Seemo gyene. Siige laati cabu pisi nyene Yageyame me Seemo, tabe kälyä gyene sasa cotre cabu ca, nüya mule cabu ca piyepu budre cabu ca. ¹⁸ Mime opo lui acwabäneji lica gemi, peei name pi mine Acejiyame me apacyera ne jääpänusi. Siige mine iyeta Yageyame me apacyera ne opo acwaba cäco epaclyärenisi; cuta pui yepä apacyera lui te tädenige Yageyame bau ca lui te Seemo gyene, tabe te niweninunuge teeme pana me, siige mime cabu baborage me äbitenige teeme apacyera te.

4

Biname Lui Kokre cäco, Acejiyame Lui Kokre

¹ Peei name pi cine ngenecu onya lica äbitininago, ingle cine umle gemi, egä Acejiyame te teeme miiji name pi nicärininuji ai kaakesea cine wawename. ² Lui ajiri mule bine ogä jaawenimusi, cine peei mule kaake ca ituge äcelyera; siige cine biname bine lica yaangletnäjemusä, piyepu cine Acejiyame me Mene ne mara me lica jaawenusi. Acejiyame me opo gaabe je cine pajecurage piyepu toracarage jicemusä Mijji Mene. Cine ai ne naace name pi jaawenusi, cine singi gemi biname cina miijirage asicnentame cime poto cidi me. ³ Cine lui mene jicemusä poto biname bime täápume mäpurage umle äbitame, yepä eei biname bime täápume taatu mäpurage ge, lui cina apesareji gemi. ⁴ Teepi Mijji Mene ne lica jäätrungusi, ingle Satani lui te ai gawecewe ne ecanenige, tabe te teeme irecu bine itu yaacwabemepi. Teepi äblicäco päpäna, lui apacyera te sepaclyärenige cime mene cabu ca, lui mene te jicenisä Keriso me apacyera poto cidi me. Pui apacyera lui Acejiyame me apacyera pana gyene. ⁵ Cine cime poto cidi me lica jijanenininago, yepä cine jijanenininago, egä Keriso Yeesu lui Yageyame sine piyepu cine weeme täápume kaakesea jewenenisi temiji pi. ⁶ Acejiyame lui te jücuji egä, “Krokeciye cabu me apacyera te saapaclyärege,” tabe cuta jewenenige teeme apacyera ne mime cabu me apacyera te.

Ai apaclyera te Keriso cabu ca sepaclyärenige, siige umle niwenininige, egä Acejiyame te lipu miijirage gyene piyepu kokrerage gyene.

⁷ Cine lui bime cabu ai baborage seemo ireclota gwidape te yaanajuge, cine papa gemi, epu gemi gawe ca wawenäneji disi liiyepu naace täapume awabame, egä iyeta kokre lui Acejiyame myene, cime lica gyene. ⁸ Cine mäpu cama opopa yaayanusi, yepä teepi äblicäco cibibine ämungeja. Cine poto padare cabu toracarage umle lica gemi egä ngena wawename, yepä cine ngenecu onya lica läbitininago. ⁹ Biname cina cibibine sabe niwenininusi, yepä Acejiyame te lica nibmalininuge. Cibibine gawe me niyärininusi, yepä budre tama lica niglecininusi. ¹⁰ Iyeta padare cabu cine wälu birige budre päpäname Yeesu liiyepu, yepä cine lipu camu ireclota gemi, peei te jewabudnitenige, egä Yeesu cuta ireclota gyene. ¹¹ Yoo, iyeta padare cime ireclota ngalebora cine wälu birige budre päpäname Yeesu name pi, yepä cime ai gawe ireclota täape cina lipu camu ireclota cama gemi, peei te jewabudnitenige, egä Yeesu cuta ireclota gyene. ¹² Pipu pi cine ätyepäneji biname cina iyeta padare cabu birige budre mäpu päpänena, siige peei name pi Acejiyame me ireclota te weeme seemo cabu kaakesea jaawenuge.

¹³ Oogäräneji mene te jiicenige egä, “Cane Acejiyame ne jitru-ngenine, peei name pi cane mene jüicemune.” Cine cuta peei yepä ätrunga cama Acejiyame ne jättrungusi, siige peei name pi miiji Mene jüicemusi. ¹⁴ Cine umle gemi, egä Acejiyame te Yageyame Yeesu ne budre cabu ca itu erpinantuji, cine cuta umle gemi, egä tabe mibibine pipu cirege budre cabu ca cuta arpinera. Siige tabe te cine piyepu weene yepä cire niwadipi Yeesu bau me. ¹⁵ Yoo, iyeta ai cina weeme miiji täapume läbitininusi. Piyepu Acejiyame liba teeme owecu name pi bucurage biname bine yääsecreräjimuge niya cabu ca, siige bucurage cina teebine eso yääcärusi teeme jamyacu apaclyera ne awepyeräjame.

Keriso me Binamewale cina Ätrunga cama Icrainige

¹⁶ Peei name pi cine ngenecu onya lica äbita. Cine puu kokre te nigletnäjenige, yepä cime seemo cina kirece kokre jepänanenisi bimu gaabegabe. ¹⁷ Cine lui mäpu cabu ninajininuge, pui lui baborage padare lica birige, piyepu pui mäpu lui matikolä gwene. Tabe cire saacanepi baborage gwidape ne cime täapume, lui te iyeteta gyene. Pui lui Acejiyame me jamyacu apaclyera gyene. ¹⁸ Cine eei täapume ire lica gemi, lui bine jääpänimusi, yepä päpäna cäco täapu memi cine ire, ingle lui bine jääpänimusi, watawata gemi, lui cina päpäna cäco, iyeteta gemi.

5

¹ Yoo, mine umle gemi, egä mime ai gawetäape, mine lui cama page ninajininige, liba cire lapesarepi, Acejiyame te kirece täape cire nicäripi cabucewe je mine pui cama lenajame. Tabe pui täape ne teemämu ituge amacetnäja piyepu pui täape lui iyeteta gyene. ² Mine liba ai gawetäape cama ninajininige, mine gege lica gemi, ingle mine babo singi gemi cabutäape ne acatame. ³ Mine singi pui kirece täape ne acatame, siige piba mine täape cäco lica cirege budre biname liiyepu. ⁴ Mine liba ai gawetäape cama ninajininige, mine ngenecu mäpu cama piyepu ala cama. Ai lui naace name pi lica gyene, egä mine singi gemi gawetäape ne abmalame, yepä mine singi gemi watawatarage cabutäape mime cabu me acitame, piba mine budre lica cirege, yepä iyeteta ireclota te mime ai gawetäape ne mara me cire jaawenepi. ⁵ Acejiyame te apu mule täapume mibibine ituge amacetnäja. Tabe nicäripi teeme Seemo cewecu täapume, egä tabe pipu cirege mibibine wawena.

⁶ Siige peei name pi cine ngenecu onya lica äbitininago piyepu cine umle gemi, egä ai ireclota cabu mime mete lui ai gawetäape gemi; nuuja ireclota cabu mime mete lui Yeesu Keriso cama cirege. ⁷ Mine ai ireclota cabu ätrunga ca joomlemusi Acejiyame ngena täapume ituge jaji wawename, ngänu gyene mine päpäna lica. ⁸ Mine siige wälu lica gemi, piyepu mime singi pisi nyene ai gawetäape ne abmalame piba otnime Yageyame cama lenajame. ⁹ Yepä mime toracarage singi naace gyene teebine ngenecu miiji me wawename, ngänu gyene mine ama ai gawetäape cama ninajininuge, coo ten cama kirece ireclota cabu je. ¹⁰ Ingle naace gyene, mine miiji iyeta cirege mine atrana biname Yeesu Keriso me opo gaabe je aclajuta. Tabe te cire nitranipi, siige miiji coo niya daremu cire nicäranipi eei mule ibi, mine lui ituge waweneca ai gawe ireclota ngalebora.

Poode Mene

¹¹ Cine wälu gemi, ingle cine umle gemi, egä Keriso te mibibine iyeta cirege atrana. Peei name pi cine biname bine owe yääswe musi teepi ätrungame, egä cine toraca piyepu yepä ngene atwana cama biname gemi. Acejiyame te umle gyene iyeta cäme poto cidid me, cuta piyepu cane ngene atwana icranininine weeme cabu me, egä weene cuta pepu umle äbitame iyeta cäme poto cidid me. ¹² Weene apu gone jinginuge, egä cine cääri äbitininago cimämu aitnejame, egä cine miiji biname gemi. Eewe, cine pätä pui name pi jüicenisid, ingle

cine singi gemi weebibine ingle ceerame weene gege äbitame cimiji pi. Siige weene piba umle birige, lipu mene awecnistame pui biname bine, lui cina gege me läbitininusi biname bime papa aweppyeräja mule name pi lica teeme ngenecu borarage mule name pi. ¹³ Nää cane toraca buduma gäne, biname cina lipu jicenis? Yoo, cane liba buduma gäne, peei lui Acejiyame name pi. Yepä toraca gyene, egä cane miiji ngene atwana cama gäne, siige peei lui weeme miiji täápume. ¹⁴ Cine apu läbitininago, ingle Keriso me singi te cibibine niwadininuge. Tabe iyeta biname bime täápume budre äbituji, siige cine toraca jitrungenisi, egä ai yepä biname lipu budre iyeta biname bime täápume, peei te jewabudnitenige, egä teepi iyeta teta cama budre ituge äbita teeme sasa ireclota cabu ca. ¹⁵ Keriso te iyeta biname bime täápume budre äbituji naace täápume, egä laati te kirece ireclota cama yaanajuge, tabe gone teeme miiji ne jäärnguge, yepä tabe miiji Keriso täápume lenaja. Ingle naace gyene, Keriso temiji pi budre äbituji, siige arpinantuji.

¹⁶ Cine liba ätrunga biname me äbitininujago, cine biname bine lica jaatranimusai ai gawe mule cabu. Toraca gyene, egä padare puga ge, cine liba Keriso ne jitrantuji ai gawe mule biname cina lipu jaatranusi, yepä page cine siige lica jewenenisi peei ne. ¹⁷ Laati te liba Keriso cama yepä me läbituge, tabe siige kirece biname gyene. Teeme sasa ireclota ne yaabmaluge, siige kirece ne yaacätuge. ¹⁸ Ai mule lui Acejiyame bau ca gyene, lui te Yeesu Keriso miiji pi gäbu äbituji mime täápume, tabe lui bime täápume claabe ge niinäce. Siige tabe kaakesea mibibine ituge ceera mine iyeta biname bine teeme binamewale me wawenane. ¹⁹ Cane naace me jicenine, egä Keriso me kaakesea name pi Acejiyame te äbitenige iyeta biname bine teeme binamewale täápume wawenane. Tabe teeme niija mule bine lica yaawadimuge, cuta tabe cine ätyepäneji biname bine mene ituge ceera cine iyeta biname bine jajanenane, egä tabe singi teebibine teeme binamewale me wawenane.

²⁰ Cine siige Keriso me mename biname gemi. Cine te puu jicemusi, yepä Acejiyame te cime cabu ca jijanininuge. Cine Keriso me puupu ne becatisi, weebibine jijenininago, egä weene Acejiyame ne padare ecäreye tabe weebibine wawenane teeme bau me. ²¹ Keriso lui conocäco gyene, yepä mime name pi Acejiyame te teebine epu pana jewenuji, egä tabe lui niija mule biname gyene. Siige mine liba Yeesu cama yepä läbitininago, mine conocäco läbitininago Acejiyame me opo gaabe je.

6

¹ Cine Acejiyame cama gigri kaakesea jaawenanusi, siige cine jijenininago, egä Acejiyame lui owecu ne itu yaaboclomtepi weeme bau me, papa gone yaasacluye. ² Naace, Acejiyame te ituge iicana egä,

“Cane jitecijipene weebibine,

padare liba tädepi cane weebibine ätityerame.

Cane itityäripene,

padare liba tädepi cane weebibine niija cabu ca äsecerame.”

Itecijinege, page padare gyene Acejiyame te weebibine ätityerame! Page padare gyene Acejiyame te weebibine niija cabu ca äsecerame!

³ Cine singi lica gemi nuuja biname ne niiyarage asicnentame wawenane cime potocidi me, cije teepi cime kaakesea ne jäängäjusi. ⁴ Eewe, cine ngena bine jaawenimusai, peei cina niwabudnitininusi, egä cine Acejiyame me kaakesea bägrä gemi. Age tema pui gwidape: cine mäpu cabu bojäcu cewe loocaninago, nimyemutanininuge mäpu biijabija cabu. ⁵ Cibibine ituge adnana, krokeciije mete cabu äbäcna, biname sange cina cubu gije ituge abacita cime mene name pi, cine gloose cama ituge kaakesea wawena, ute cäco piiyepu deedei cäco. ⁶ Cine ituge awabudnita, egä cine Acejiyame me kaakesea bägrä gemi, ingle cine conocäco ninajininuge, piiyepu cine umle gemi, egä toraca ngena gyene: cine mäpu cabu bojäcu ninajininuge piiyepu cine miijirage muleyame biname gemi; Aceji Seemo te cibibine niwecetnärininuge; cime singi biname bime täápume lui toracarage gyene. ⁷ Cine lui mene ne yaacenanusai, toraca gyene; Acejiyame te teeme kokre ne cime cabu yaaboclomtanuge; cime conocäco ireclota lui cubu gwidape pana gyene, cine lui ca laglinago piiyepu lälyenganinago. ⁸ Poto cina lui cibibine opo gaabe me nicranininusi, poto cina lui niicetnininusi. Poto cina lui sabe niwenininusi, poto cina lui niwepyeräjininusi. Poto cina cuta apu jicusi, egä cine walya biname gemi, yepä cime mene lui toraca gyene. ⁹ Poto cina puu apu jicusi egä, cine papa biname gemi, yepä iyeta poto ta biname cina umle gemi cine. Cine puu puga ge budre me, yepä weene jepäneniye, egä cine ireclota gemi; cibibine niija me niwenininusi, niglecininusi, yepä cine budre lica gemi. ¹⁰ Cine puu ngenecu mäpu cama, yepä cine gege gemi. Cime puu nuuja gwidape lica gemi, yepä cime cabu ca seemo ireclota täápume bucurage miijimiji gwidape jääpänimusi. Cine puu owecumete biname gemi, yepä cime iyeta gwidape piti nemi.

¹¹ Cime binamewale Korinito cewe ngalebora! Cine conocăcorage aga biiri jijanininago. Cine cime ngene atwanena bine aga biiri jepatnimisi weeme bau me. ¹² Peei lui cine te lica ge, lui cina ngenecu yaarmemusi weeme bau ca, yepä weene te ngenecu saarmemuye cime bau me. ¹³ Babe te lipu teeme bāgrā bine jaajanemuge, cane cuta pepu jijenininine weebibine: cime lipu singi pisi nyene weeme täápume, weene cuta miiji pepu singi lenaja cime täápume. Weene weeme ngenecu bine jepatnemepeye cime täápume!

Cine Ireclota Acejiyame me Mete Gemi

¹⁴ Weene gone alenglecāja ätrunga cāco biname cama ireclota poto cidi me kaakesea wawename. Conocăco piyepu conocono äblicăco yepä me äbita, piyepu apacıyera te äblicăco krokeciye cama alenglăcita. ¹⁵ Keriso naabi Satani, teepi lui yepä ngene atwana cama lica gegi. Ätrunga biname piyepu ätrunga cāco biname, teepi cuta äblicăco yepä me äbita. ¹⁶ Acejiyame me awejena mete piyepu uuje bime awejena mete äblicăco gıgri äbita. Mine temi Acejiyame me mete. Tabe apu ituge iicana egä,

“Cane cāme binamewale bime cabu nanajinige,
ten cama otnenine.

Cane teeme Acejiyame gāne,
teepi cāme binamewale gemi.”

¹⁷ Peei name pi Yageyame te teeme binamewale bine cuta apu jejenemige egä,

“Weene miiji teebibine ebmalăcemepeye,
cude padare äbitipeye teeme bau ca.

Conocono mule cabu gone lalenglecăjininuye,
cane piba weebibine piwadipene.”

¹⁸ Piba cane weeme Babe gāne,
weene cāme bāgrāwale gemi.

Babo kokre Yageyame te jiičenige ai mene.”

7

¹ Cāme miijirage binamewale, Acejiyame te ituge mibibine pepu mene ceera, peei name pi mine miiji abmalăcema, lui mule cina jaawenimusi mime täāpe piyepu seemo bine jugi me. Mine miiji wālu cama lenaja piyepu mara me äbita Acejiyame täápume.

Paulo Gege Gyene Korinito Biname bime täápume

² Weeme ngenecu bine jepatnemepeye cime täápume. Cine nuuja biname ne lica ituge niya wawena. Cine nuuja biname me ätrunga ne lica ituge sabe wawena, piyepu cine nuuja ne lica ituge giri acita kaakesea wawename cime miiji täápume. ³ Cane ai mene naace täápume lica jiičenine egä weebibine ängejame. Eewe, pätä cane uja ituge weebibine jaji, egä cine epu babo singi gemi weeme täápume, egä nuuja te mibibine mara me äblicăco wawena, budre te coo ireclota cabu nuuja gwidape te. ⁴ Cane toraca ätrunga gāne weeme täápume piyepu babo gege gāne. Iyeta mäpu biijabija cabu cine lipu ituge otni, teepi cebine ngenecu onya me lica nawenumsi. Eewe, cane iyeta padare cabu baborage gege gāne.

⁵ Cine liba Makedoniya gawe cabu me latyaripago, cine cāngena lica ninajipi puma. Cine bucirage mäpu bine jăăpānemesesi. Iyeta poto ta cime cubuyame puga ge, siige cine mage wālu ge. ⁶ Yepä Acejiyame lui te kokre säăcāranemuge lui cina ngenecu onya me läbitininusi, tabe ngenecu kokre me niwenipi, Taitus ne lipu täätyeepi. ⁷ Teeme otni taatu te cibibine ngenecu kokre me lica niwenipi, yepä cuta tabe lipu weebibine tiyitnipi, egä weene lipu teebine ngenecu kokre me jaawenepeye. Tabe cuta nijipi, egä weene baborage singi gemi cebine pāpāname, piyepu weene babo ngenecu mäpu gemi, ngena te läbitepi puma, cuta piyepu weene singi gemi cebine ätityerame. Iyeta peei cina cebine cerāmu gege me nawenepesi.

⁸ Cane lui leta ne yoogārepene weeme bau me, puu ngenecu mäpu me jiwenipi, yepä cane apu egä, “Ngānu gyene, weeme miiji me.” Cane puu puga ge ngenecu mäpu me äbita, liba jăăpānepene, egä weebibine matikolă ngenecu mäpu me jiwenipi pui leta te, ⁹ yepä page cane siige gege gāne. Naace name pi lica, egä cane weebibine ngenecu mäpu me jiwenipene, yepä weeme ngenecu mäpu cina itatrongăripesi miiji mule cabu me. Weeme pui ngenecu mäpu lui Acejiyame me singi miji pi, siige peei name pi cine ngena itu jaawenepesi weeme täápume, sabe lica jiwenipi weebibine. ¹⁰ Ingle naace gyene, lui ngenecu mäpu Acejiyame me singi birige, peei ngenecu mäpu te yaatatrongtuge biname ne Acejiyame bau me, siige ireclota ne saacanuge. Siige peei ne lica yaaratusi. Yepä lui mäpu te lica birige Acejiyame me singi, yepä binamerage bime mäpu, peei te seemo ireclota ne jaawenuge budre me. ¹¹ Yoo, weeme peei ngenecu mäpu lui Acejiyame me singi ge weeme täápume, siige weene jepāneye tabe ngena jaawenepi weeme täápume. Tabe jiwenipi weene aclajutame piyepu awabudnitame, egä weene nuuja conocono lica ituge wawena. Weene

claabe me läbitipeye, ngena te itu läbitepi; wälu me läbitipeye, ciige ngena te läbituge. Peei te cuta jiwenipi egä weene singi cebine päpäname piyepu cebine äwärimtame piyepu cuta pui biname ne daremu wawename, lui te niya mule jaawenepi weeme sobe cabu. Siige weene ai lui ituge awabudnita, egä weeme niya lica ge, ngena te itu läbitepi.

¹² Cane liba peei leta ne yoogärepene, pui biname name pi lica, lui te niya mule yaacnepi, coo lui täapume jaawenepi, yepä cane naace name pi yoogärepene egä weene Acejiyame me opo gaabe je opo awatname, egä weene toracarage singi gemi cime täapume. ¹³ Siige peei name pi cine ngenecu gege gemi. Cuta peei taatu lica, yepä Taitus me gege te magerage gege me niwenipi, tabe liba nijipi weene lipu teebine ngenecu plowa me itu jaawenepeye. ¹⁴ Cane weebibine iwepyeräjiipene Taitus bau me, cuta cane ajiri ne lica ituge päpäna wemiji pi. Cine walya mene lica ituge otroma weeme bau me, cuta cine Taitus ne ngena ituge jajanena weeme poto cidi me, walya lica gyene. ¹⁵ Taitus weebibine ngene jipeccininunge, egä weene lipu wälu cama teebine yaacatepeye piyepu weene lipu singi ge teeme mene äteciyame, siige teeme singi te weeme täapume babo me äbitenige. ¹⁶ Siige cane mage gege gäne weeme täapume. Cane nuuja ngenecu lica gäne, ingle căme ätrunga pisi nyene, egä weene cebine näteciyuje.

8

Rarekaake Ootona Owecumete Biname bime täapume

¹ Cime ätrunga binamewale, cine singi weene umle äbitame, Acejiyame me owecu te ngena ituge wawena Makedoniya gawe ngalebora maramara ätrunga ingle bime täapume.

² Mäpu bijjabija cina puu ituge otni teeme bau me teebibine apicetnärame, yepä teeme gege ne äblicäco sabe wawena. Teepi cuta babo owecumete gemi, yepä teepi ceera căco lica gemi. ³ Cane toraca jijenininine, teepi rarekaake yaacranemepesi teepi luma ngälu acraname, piyepu cuta teepi cerämu poto yaacranemepesi. Teepi ai ne teeme singi ca jaawenepesi, ⁴ siige nitemläjipesi cibibine, egä teepi lipu ge cuta ätiyrame Acejiyame me binamewale bine Yuudea probins ngalebora. ⁵ Teepi yäätücaremepesi, cine lui täapume jaawagrijemepesi: teepi niinäce Acejiyame bau me ireclota yaacranepesi, ingwe ca cuta cime bau me Acejiyame me singi miji pi. ⁶ Taitus te gije jaabacitepi baborage rarekaake ne owecu gwidape täapume ootoname weeme bau ca, siige cine teebine jaajepesi peei kaakesea ne ämlitejame. ⁷ Iyeta mule cabu weene niinäce gaabe gemi poto ätrunga biname bime bau ca: weeme ätrunga cabu piyepu Miji Mene acenena cabu weene niinäce gaabe gemi, piyepu weeme umle lui baborage gyene toraca mene poto cidi me, weene gloose lica gemi ätiyrame, cuta weeme singi cime täapume lui baborage gyene. Peei name pi cane singi gäne weene cuta niinäce gaabe me äbitame ai owecu mule wawename rarekaake ootoname.

⁸ Cane ai lui weebibine lica idretnininine. Yepä cane naace name pi jeitnäjenine, Makedoniya biname cina lipu babo singi ge rarekaake ceerame, ingle cane singi päpäname egä weene nää cuta toraca singi gemi ceerame. ⁹ Weene umle gemi, mime Yageyame Yeeso Keriso lipu baborage singi ge mime täapume. Tabe liba Acejiyame cama cabucewe je, tabe dogweyame ge, yepä tabe mime name pi täduji gawecewe cabu me, owecumete biname pana äbituji. Tabe ai ne naace täapume jewenuji mine piba seemo ireclota ngalebora dogwe äbitame.

¹⁰ Căme ngene atwanena apu gyene, egä pui lui weeme miji täapu myene weene page ämlitejame, niinäce kămäge weene lui rarekaake ootona ne gije ituge abacita. Weene magerage singi puga ge, cuta kaakesea jaawenepeye pui täapume, ¹¹ siige jimlitepeye pui kaakesea ne. Weene lipu baborage singi cama taagednepeye, cuta pipu singi cama jimlitepeye. Weeme ibi ecärepeye. ¹² Weeme liba singi pisi nyene ceerame, Acejiyame ne ngenecu miji me jaawenuye, weene liba yäacäruye, weeme ngena piti nemi ceerame. Tabe lica jiwagrijenininine, weeme liba ngena lica gyene, pui ne ceerame. ¹³ Cane naace täapume lica jücenine egä weebibine mäpu cabu acraname siige poto cina piba kälyä äbitame. ¹⁴ Eewe, pätä cane naace me jücenine, egä ai padare cabu weeme lipu iyeta gwidape bucurage gemi, weene miji pui bine ceera, laati bemi owecumete page. Siige nuuja taje weene liba owecumete lenaja je, teeme liba bucurage birige, teepi piba pa pitiyärisesi. Apu mule ca weene neeneni yepä ibi inajuge. ¹⁵ Oogäräneji mene te ai poto cidi me jücenige egä,

“Laati te magerage deedei yaatomleceempi,
teeme bucurage lica ge.
Laati te nesae deedei bine yaatomleceempi,
tabe ngene jaaglepi.”

Taitus piyepu Ten cama Lui Biname

¹⁶ Cine Acejiyame ne eso ecärenisi, egä Taitus ne ngene atwana sääcärepi tabe weebibine ätityerame cine liiyepu. ¹⁷ Tabe yaacatepi cane lui jaajepene tabe weeme bau me otnime. Yoo, tabe epu baborage singi ge otnime, egä tabe te niinäce otni mene tiicepi, cane ingwe ca jaajepene otnime. ¹⁸ Cine teta cama jityepenisi mime yepä ätrunga biname ne, ätrunga ingle cina lui ne yaawepyeräjusi teeme Miiji Mene jajanena name pi. ¹⁹ Peei taatu lica, yepä teebine ätrunga ingle cina cuta itu jaajepesi cine cama otnime, cine liba ai owecu gwidape täápume yootoninisi, lui owecu gwidape name pi bucurage biname cina Yageyame Yeesu Keriso ne pagege awepyeräja piyepu cuta lui owecu gwidape te pagege awabudnita, egä cine toraca singi gemi cime owecumete ätrunga biname bine ätityerame.

²⁰ Cine singi lica nuuja mule wawename, lui te biname bine jaawenimuge cibibine äingejame, egä cine ai baborage owecu gwidape ne lipulipu yootoninisi piyepu ceera pagege. ²¹ Cine singi gemi iyeta gwidape conoçaco wawenetnäjame, lica Acejiyame me taatu opo gaabe je piyepu cuta biname bime opo gaabe je.

²² Cine siige ai neeneni biname cama cuta cime nuuja ätrunga biname ne jityepinisi. Cine teebine itu yaapicetnärepesi, siige jääpänepesi, egä tabe babo singi gyene ätityerame. Teeme baborage ätrunga pisi nyene weeme täápume, siige tabe singi gyene weebibine ätityerame. ²³ Yoo, weene umle Taitus. Tabe cane cama kaakesea biname gyene weeme müji täápume. Cuta peei neeneni biname, ten cama lui aaclenige, ätrunga ingle cina lui bine jaajepesi, teeme kaakesea te Keriso me ngii ne babo jaawenuge. ²⁴ Weeme singi ne jewabudnitepeye teeme täápume. Lui ätrunga ingle cina teebibine pa jäätyepemepesi, teepi liba pa yäätəcijemepi weeme singi poto cidi me, siige peei te pa jaawabudnitepi teeme bau me, egä cime awepyeräja lui weeme poto cidi me papa lica gyene.

9

Ätrunga Biname bine Müji Ätityera

¹ Nuuja singi lica gyene cane cuta cääri weeme bau me oogärame rarekaake otona poto cidi me Acejiyame me binamewale bine ceerame, Yuudea probinsu cabu je lui cina icrajenige. ² Cane umle gäne, egä weene singi gemi ätityerame, siige cane ituge weebibine awepyeräja Makedoniya biname bime cabu. Cane jaajemepene teebibine egä, “Akaya gawe cabu lui ätrunga biname, teepi niinäce kämäge cabu ca amacetnäjäneji gemi ätityerame.” Siige weeme baborage singi ätityerame ituge poto bine cuta singi me wawena ätityerame. ³ Siige page cane jäätyepenänine cime ai nesae ätrunga biname bine naace täápume egä cime awepyeräja te papa me lica äbita weeme poto cidi me, yepä cane lipu Makedoniya biname bine ituge jajanena, weene pepu amacetnäjäneji gemi ätityerame. ⁴ Cije cane liba pa lädepene peeyeme, cuta poto Makedoniya ätrunga biname cina liba cane cama otni je, cane singi lica teepi päpäname, egä weene amacetnäjäneji lica gemi. Ai te liba äbita je, cane lipu ajiri pa nanajepi cäme awepyeräja name pi weeme poto cidi me! Piyepu cane nuuja singi lica gäne iicaname, egä weene te cuta babo ajiri ne pecatepeye. ⁵ Siige peei name pi cane jääjäpene ai biname bine teepi cäme niinäce gaabe otnime amacetnäjame, weene lui owecu gwidape täápume ituge iicana. Apu mule ca pui owecu gwidape amacetnäjäneji pagege, cane liba pa latyaramtepene peeyeme. Piyepu weene weeme singi ca pecäremepye, lica ädretneca name pi.

⁶ Weene gone ngene ätrimela, egä laati te nesae gije jääcnänuge, tabe cuta nesae kuu bine jääpänimuge. Cuta laati te bucurage yäätemuge, tabe cuta bucurage jääpänimuge. ⁷ Biname cina, teepi müji teemämu ngene atwanena, egä teepi luma ngälu ceerame; yepä teepi ngena yäacärusi, gege cama müji ceera, ingle lui biname te gege cama birige ceera, Acejiyame te singi gyene teeme täápume. ⁸ Acejiyame te müji gyene weeme singi ibi ceera cuta poto ceera, siige piba weeme iyeta piti nemi weene lui täápume singi. Piyepu peei taatu lica, cuta weene müji gemi nuuja biname bine bucurage ceerame ätityera täápume. ⁹ Oogäräneji mene te jicenige ai poto cidi me egä,

“Tabe owecumete biname bine papa yäacäranemuge,
teeme owecu lui ngälu cäco gyene.”

¹⁰ Acejiyame te gije yäacäruge liteta biname ne, siige pui biname te deedei jääpänimuge teeme loolo me. Tabe cuta weebibine gije icäraninuge weene ätemame siige teepi uutaname. Yepä pana gyene, weeme ceera mule cabu ca weene bucurage kuu bine jääpänimuye.

¹¹ Tabe iyeta padare cabu dogwe me jiwenininuge piba weene ceera biname lenajame, siige bucurage biname cina Acejiyame ne eso pagege ceera wemiji ootonäneji owecu gwidape täápume, cine lui ne pa yaacanepesi teeme bau me. ¹² Ingle naace gyene, ai kaakesea weene lui jaawenuye, eei taatu me lica gyene owecumete biname bine ätityerame, piyepu cuta jaawenimuge bucurage biname bine Acejiyame ne awepyeräjame piyepu eso ceeraname. ¹³ Weeme ai kaakesea te jaawabudnituge, egä weene lui Müji Mene ne

secatujiye, weene weeme ireclota ngalebora pui ibi inajininuge, siige lui cina weeme owecu gwidape ne pa jääpänepesi, teepi weeme Miiji Mene äcwetna name pi Acejiyame ne pa yaawepyeräjepesi cuta piiyepu weeme owecu gwidape name pi teeme tääpume piiyepu poto ätrunga biname bime tääpume. ¹⁴ Siige teepi baborage ngenecu miiji cama irecu pa lätumutepesi weeme tääpume, ingle Acejiyame te lipu baborage singi ne itu saaboclomtepi weeme tääpume. ¹⁵ Mine Acejiyame ne eso yääcäresi teeme owecu mule tääpume, lui epu baborage gyene, egä äblicäco mene iicana.

10

Paulo me Conocäco Keriso me Ätyepäneji Biname me Lenajame

¹ Cane Paulo singi gäne weebibine mene jajime. Weene apu jüicuye, egä cane liba weene cama cane owelaamelame birige, yepä cane liba weene cama lica, cane drämä cama jiwenininune. Cane singi epu owelaamelame piiyepu cängena cama lenajame Keriso liiyepu, ² siige cane itemlininine, egä weene gone giri nawenuye drämä tääpume, cane liba pa lädepene peeyeme, ingle cane umle gäne, egä cane miiji gäne eei bine drämä cama wawename, lui cina walya naitnäjusi, egä cane gawe ireclota mule bine yääcwetni-mune. ³ Puu toraca gyene, egä cine gawe cabu ninajininuge, yepä cine ai gawecewe biname bime pana cubu lica jüicusi. ⁴ Cine lui gwidape ca cubu jüicusi, ai gawe ireclota me cubu gwidape lica gemi, yepä Acejiyame me kokre cubu gwidape gemi, cine lui ca sabe jaawenimusi Satani ne teeme cubuyame cama. ⁵ Cine yääyebhengemusi iyeta walya mene bine; cine jüibemusi iyeta mule bine, mope modamoda biname cina lipu yääciseräjusi toraca umle ne Acejiyame poto cidi me; cine biname bine yaatrongärimusi teepi Keriso me singi ibi ngene atwaname. ⁶ Weene liba lawabudnäjininuye, egä cibibine nitecijeninye, siige cine piba taatu eei bine mäpu daremu pa yääcäranemepesi, lui cina lica nitecijinusi cibibine.

⁷ Weene ngene atwana ngalebora me lica gemi. Biname peeci yene lui te jüicenige, egä tabe sine biname lui te Keriso bau ca mene saawadäjemuge. Pui biname te miiji cääri ngene atwana, siige tabe ngene ca pa laglepi, egä tabe lipu mene saawadimuge Keriso bau ca, cane cuta piiyepu. ⁸ Mime Yageyame Yeesu Keriso te cebine conocäco näcärepi weebibine waadename, lica weebibine gawe me wawename yepä cabu me wawename. Ngänu gyene, cane lipu baborage lawepyeräjune cäme conocäco poto cidi me, yepä cäme nuuja ingle lica gyene pui poto cidi me ajiri lenajame. ⁹ Cane singi lica gäne weene ngene atwaname, egä cane lui leta bine weeme bau me itu jäätjepäjemepene naace me weebibine wälu me wawename. ¹⁰ Poto cina jüicusi egä, "Paulo me leta mene lui trängäli piiyepu kokre cama gemi, yepä tabe liba mine cama yaanajuge, tabe bleelabela birige piiyepu kokre cäco mene jüicemuge." ¹¹ Pui biname cina miiji umle, egä cane ngena yoogärune cudecewe ca, cane jaawenune, cane liba peema birige.

¹² Cane lica ajenine epu biname ca, lui cina teemämu leta bine yoogärimusi teeme miiji mule awabudnitame. Cane singi lica gäne pepu biname cama atonerame. Teepi teemämu jaawenimusi atonera gwidape bine teeme singi ibi, siige pui ca latoneräjininusi. Teepi buduma biname gemi! ¹³ Cane liba lawepyeräjune, cane äblicäco piiyeme papa iüetneja, yepä cane eei kaakesea ibi lawepyeräjune Acejiyame lui cebine näcäruji, cuta weene peei kaakesea ngalebora gemi. ¹⁴ Weene pui gawe ngalebora ina-jininuge, Acejiyame lui najuji, siige cane gawe ngälu ne lica jaatropangtepeni, liba peeyeme Korinito me lädepene Miiji Mene jajanename Keriso poto cidi me. ¹⁵ Siige cane lica lawepyeräjune nuuja biname bime kaakesea tääpume, teepi lui ne ituge wawena cäme caale kaake poto ca, Acejiyame lui näcäruji. Weeme ätrunga cina liba babo läbitininusi, cäme singi pisi nyene cuta cäme kaakesea te babo äbitame, yepä cane singi gäne pui gawe cabu taatu wawena Acejiyame lui itu najuji. ¹⁶ Acejiyame te liba cäme ai singi ne toraca me jaawenuge, cane miiji gäne otni Korinito cewe nuuja poto cidi me puma cuta Miiji Mene jajanename. Cane singi lica nuuja biname me kaakesea ne acatame, tabe lui cewe cabu ituge wawena, Acejiyame lui teeme tääpume ituge jaji.

¹⁷ Oogäräneji mene te apu jüicenige egä, "Laati te singi awepyeräjame, tabe miiji eei tääpume awepyeräja, Yageyame lui bine ituge waweneca." ¹⁸ Ingle naace gyene, Yageyame eei biname ne lica yaacatuge, lui te teemämu lawepyeräjuge; yepä eei ne yaacatuge, tabe lui ne yaawepyeräjuge.

11

Paulo piiyepu Keriso me Walya Mename Biname

¹ Cane singi gäne weene ire taatu acitame cane matikäli buduma mene iicemame. Yoo ngenä popi, weene ire taatu naitiniye cane buduma mene iicemame. ² Cane ngenecu gäne weeme poto cidi me; epu asicnantenine weeme poto cidi me Acejiyame liiyepu. Cane

weebibine simacetnäjimene weene Keriso cama atejäclmutame. Cane singi gäne weene epucäco lenajame, siige atejäclmuta bimu cabu piba picäripene teeme bau me epu pana, camu ngulebägrä lipu yäacärusi ciweloooloyame ne. ³Yepä cane wälu pisi näne, egä Satani te lipu ongletnäjui Eeba ne teeme walya mene ca, weene ngene atwanena cina cuta pepu conocono me pama läbitininusi, siige weene piba toraca singi lica birige Keriso täápume. ⁴Cane naace name pi wälu gäne, ingle cane jepänenine, weene lipulipu watatarage biname bine yaawadimuye, lui cina weeme bau me saacluge. Weene jäätrunguye teepi lui mene Keriso poto cidi me jiiicemusi, ngänu gyene teeme mene mara cäme mene cabu ca. Cuta teepi lui seemo poto cidi me jiiicemusi, weene yaacatuye, ngänu gyene tabe Aceji Seemo lica, weene lui ne yaacatuye cäme bau ca. Cuta teepi lui miiji mene yaacenanusi weene yaacatuye, ngänu gyene pui mene mara, cane lui Miiji Mene itu jijananiipene weebibine. ⁵Cane apu ngene jotwananenine, egä cane yepä ibi gäne pui biname cama, weene lui täápume jinge-nininige, egä teepi modamoda ätyepäneji biname gemi. ⁶Cane pama miijirage mene iicema biname lica gäne, yepä cäme umle baborage gyene, siige cane maramara gaabe ca peei ne ituge aboclomäja weeme bau me.

⁷Cane jijananiipene Acejiyame me Miijirage Mene, piyepu cane daremu täápume weebibine lica itinäripene. Cane cämämu matikäli läbitepene naace täápume weene piba baborage me äbitame. Nää, cane peei lui nüya mule jaawenepene? ⁸Cane poto ätrunga biname bime bau ca rarekaake jääpänanemune weeme täápume kaakesea waweneme. Ai lui egä cane teebibine juutecrimune weebibine ätityerame. ⁹Cane liba weene cama jage, cäme rarekaake cina lämlipesi, yepä cane lica itinäripene weebibine rarekaake ceerame. Yepä Makedoniya ca lui ätrunga biname cina saaclepi, teepi te näcärepsi iyeta cane lui täápume singi. Cane umle cäco gäne weebibine nuuja gwidape täápume ätinerä, cuta lica pa itinäripene. Eewe, licarage! ¹⁰Keriso iyeta padare cabu lipu toraca mene jiiicemimuge, cane cuta piyepu cane liba jiiicene, egä Akaya gawe cabu nuuja te äblicäco cebine iibana apu awepyeräjame. ¹¹Cane ai ne naace name pi lica jiiicene, egä cane singi lica gäne weeme täápume? Acejiyame umle gyene, egä cane singi gäne.

¹²Yoo, cane lipu weebibine lica ituge rarekaake täápume ätineräja ngälu page, cane cuta pepu pagege äbita, naace name pi egä lui cina Keriso me ätyepäneji biname ca lainininusi, teepi piba äblicäco teemämu awepyeräja piyepu iicana egä teepi cane cama yepä opo kaakesea jewenenisi. ¹³Teepi walya kaakesea biname gemi, Keriso te teebibine lica ituge ätyepa. Teepi walya laininusi Keriso me ätyepäneji biname ca, siige weebibine ingletnäjimus. ¹⁴Cane cälu te lica äti. Pui lui ciitaca mule lica gyene. Satani te cuta lateplingtuge, läbituge epu pana Acejiyame me mename seemo liyepu. ¹⁵Peei name pi ciitaca lica gyene, egä teeme kaakesea bägrä cina cuta läbitininusi Acejiyame, lui conocäco gyene, teeme kaakesea bägrä bime pana me. Yepä ngälu gaabe je teepi teeme mule ibi daremu ne cire jääpänepesi.

Paulo Awepyeräjeninge Teeme Mäpu cabu Lenaja poto cidi me

¹⁶Cane cuta cääri jiiicene, egä nuuja te apu gone ang, egä cane toraca buduma gäne. Yepä weene liba pepu jaawenuye, weene piba gone yaacatuye cane liba buduma biname pana matikäli awepyeräjeninge. ¹⁷Cane liba apu awepyeräjeninge, cane mime Yageyame Yeesu Keriso me mene lica icwetnenine; cane mage buduma mule jewenenine. ¹⁸Yepä ingle bucurage biname piti nemi, laatibi lawepyeräjininusi biname bime pana, lui cina gawe ireclota mule cabu yaacrajuge, cane cuta teeme pana äbitenine. ¹⁹Weene peete nemi umle biname, peei name pi gege cama ire taatu jaacranimuye buduma biname bine. ²⁰Weene ire taatu jaacranimuye biname cina weebibine aletnäneji biname pana me waweneme; piyepu weene ire taatu gemi teepi weebibine giri acraname teeme kaakesea wawenetnäjame; piyepu weene ire taatu gemi teepi weebibine angletnejame, ängejame, niyaniya tagepogogo iicemame. ²¹Cane ajiri gäne, egä cane toraca drowä lica ge pepu äbitame weeme täápume.

Cane buduma pana jiiicenenemine poto buduma cina liyepu, awepyeräjininge eei täápume, teepi lui täápume lawepyeräjininusi. ²²Teepi jiiicusi egä, "Cine Heberu biname gemi." Yoo, cane cuta piyepu. Teepi apu egä, "Cine Israela biname gemi." Yoo, cane cuta piyepu. ²³Teepi jiiicusi egä, "Cine Keriso me kaakesea biname gemi." Cane buduma pana awepyeräjininge, yepä cane age säne teeme bau ca miijirage Keriso me kaakesea biname. Teepi puu kaakesea jaawenusi, yepä cane te magerage kaakesea ituge wawena. Cane teeme bau ca magerage ituge lenaja krokeciye mete cabu, cebine magerage ituge adnana, cuta cane magerage teeme bau ca puga ge cuta budre päpäname. ²⁴Israela biname cina cebine teetinain gääbu ituge adnana faib maramara padare cabu. ²⁵Cuta nesae maramara padare cabu Rooma biname cina nadnanepesi. Yepä gääbu cuta kula ca nacnepesi. Cane liba malu cabu waatnetnäjepene, nesae gääbu buto cina sabe läbitanipesi, cuta yepä gääbu

cane yepä bimu cebocebo padare cama niye papa cabu nanajepi malu cabu. ²⁶ Cäme otnetneja cabu iyeta poto ta mäpu puga ge. Cane igi cabu labumäjüne, cane wälu puga ge ero biname bime name pi, cuta cane wälu cämerage Israela biname bime name pi piyepu nuuja gawe biname bime name pi. Mäpu puga ge modamoda cewe cabu ta, glunubora ta, malu cabu ta piyepu eei biname bime bau ca, lui cina ätrunga biname ca lainininusi, yepä teepi lica gemi ätrunga biname. ²⁷ Cane magerage kaakesea ituge wawena gloose cäco, ute cäco. Cane umle gäne loolomecewe piyepu niyemecewe lenaja. Cäme otnetneja ngalebora cäme deedei ibibi lica ge, cäme mete lica ge, cane niyirage cäbletääpe cama ge. ²⁸ Ai taatu lica, cuta cäme ngenecu mäpu pisi nyene iyeta padare, egä ätrunga biname cina lipu icrajinige. ²⁹ Laati te liba ätrunga cabu onya yaanajuge, cane cuta pepu lasicnantune; laati te liba niya mule jaawenuge, cäme ngenecu mäpu me läbituge.

³⁰ Ingle weene cebine giri nacitiye cane awepyeräjame, cane ai mule poto cidi me bawepyeräjine, lui cina nawabudnitusi, egä cane matikolä gäne. ³¹ Acejiyame, mime Yageyame Yeesu Keriso me Babe, mine lui ne yaawepyeräjesi, tabe umle gyene, egä cane walya lica ostrominine. ³² Cane liba Damaseko babo cewe jage, mope biname Areta me ingwe gaabe biname, lui te pui cewe ne ire jaatwuge, tabe yaacranemepi teeme awamuta biname bine pui cewe caale grana gome cebine oomlaname. ³³ Yepä pui caale atreji cabu traapi puga ge, siige ätrunga biname cina cebine diiba bora näsinglantepesi, pui traapi cabu ca nänepesi caale kaake poto cidi me, siige cane luucrepene.

12

Paulo Gwidape bine Jepänimige Cabucewe je

¹ Ai awepyeräja mule puu nuuja miiji lica gyene, yepä cane miiji cerämu awepyeräja. Siige cane page jicemenine mime Yageyame te lipu taboclomtuji piyepu teeme singi ne lipu seboclomtuji cäme bau me. ² Cane umle gäne yepä ätrunga biname, Acejiyame te lui ne cabucewe me caburage me ecanuji, footin kämäge liba ituge apira. Yoo, cane age säne pui biname. Yepä cane toraca umle lica gäne, egä cane toraca cabucewe me caburage jage, coo cane wama pana jepänimujine. Acejiyame tabe taatu umle gyene. ³ Cane cääri jiceninine, egä cebine Acejiyame me lenaja puupu cabu me nacanujisi – yoo siige cane umle lica gäne, egä cane toraca puga ge, coo wama pana jepänimujine. Acejiyame taatu umle gyene. ⁴ Cane puga nätecijui maramara gwidape poto cidi me, lui täapume mene lica gyene piyepu lui poto cidi me cudege iicana. ⁵ Siige cane ai cabucewe miijirage mule täapume awepyeräjinine, cuta iyeta poto mule cabu ca lui cina ituge äpletnera cäme täापume, cane eei taatu mule täapume awepyeräjinine lui cina cebine nawabudnitusi, egä cane matikolä gäne. ⁶ Cane liba awepyeräja je, cane buduma lica cirege, ingle cane toraca mene cire jicemejine. Yepä cane siige ingwe ca lica awepyeräjine pui cabucewe mule poto cidi me, ingle cane singi lica gäne biname cina cebine owo gaabe me acitame pui mule name pi, yepä eei taatu name pi teepi ngena jääpänusi cane wawena je piyepu ngena yäätəcijemuge cane iicema je.

⁷ Acejiyame lui gwidape bine seboclomäjimuji cäme bau me cabucewe je, ingle babo miijirage gwidape gemi, peei name pi cane cije awepyeräja mage; yepä tabe mäpu ne cäme täape cabu itu secitui, lui te gaale pana cebine nagadäjenige. Ai lui Satani me kaakesea gwidape gyene cebine aglime, siige niibenige cane mope babo me äbitame. ⁸ Cane nesae gääbu Acejiyame bau me irecu ätumutanujine ai mäpu ne äyeblyngtame, yepä tabe singi lica ge. ⁹ Tabe apu najuji egä, “Cäme baborage owecu mäme täapume ibibi gyene iyeta maane lui täapume singi gäte, ingle cäme kokre te babo läbituge mäme cabu, maane liba kokre cäco gäte.” Siige peei name pi cane gege gäne, egä cane kokre cäco gäne naace täapume piba cäme cabu Keriso me kokre te lenajame. ¹⁰ Peei name pi cane gege gäne Keriso miiji pi mäpu cabu lenajame, ngänu gyene cane lipu kokre cäco, niyaniya nawenusi, coo gwidape cäco; ngänu gyene lipu sabe nawenanusi coo lipu mäpu bine jääpänemune. Ingle naace gyene, cäme kokre cina liba lämluge, Keriso me kokre te piba yaanajuge cäme cabu.

Paulo Ngenecu Mäpu Gyene Korinito Ätrunga Ingle name pi

¹¹ Cane buduma pana bäbitine cämämu awepyeräjame, yepä weene te giri naweniye. Weene te cebine cire nawepyeräjejiye. Cane puu papa gäne, yepä weeme pui mararage ätyepäneji biname bime cabu ca cane gawe me lica gäne. ¹² Acejiyame te bucurage owowä piyepu cälu täti gwidape piyepu ciitaca mule bine weeme sobe cabu yaaboclomäjane mepi cäme bau ca, cane liba gloose cäco cäme kaakesea jaawenepene peema. Peei ciitaca mule cina cebine pajecu me nawenepesi, egä cane Keriso me ätyepäneji biname gäne. ¹³ Cane lipulipu weebibine niyaniya ire jitwipene poto ätrunga ingle bime bau ca? Nää peei ge niya, cane lipu weeme bau ca rarekaake lica yaawadanemepene? Siige ngänu gyene, gone yaacatuje peei poto cidi me.

¹⁴ Siige cane ai lui nesae me otnime äbitinine peeyeme Korinito cewe me. Cane singi lica gâne nuuja rarekaake tääpume weeme bau ca, yepä cane singi weeme tääpu mäne. Mule lica gyene bägrä cina teeme mage babe bine ire atwemame, yepä mage babe cina miiji bägrä bine ire atwemame. ¹⁵ Cane gege gâne, căme ngena piti nemi weebibine ceerame, cuta căme ireclota piyepu ceerame weebibine ätityerame. Weene nää pui name pi matokolä singi gemi căme tääpume, ingle cane baborage singi gâne weeme tääpume?

¹⁶ Siige ai lui pama mime gigri ngene atwana gyene, egä cane weebibine mäpu me lica jiwenipene, cane liba puma Korinito jage. Yepä poto cina pama jicenis, egä cane weebibine ingletnäjpene piyepu walya waatromepene. ¹⁷ Peei lipu gyene? Cane lui biname bine jäätyepemepene weeme bau me, teepi nää weebibine jiwenipesi căme miiji tääpume kaakesea wawename? ¹⁸ Cane jaajepene Taitus ne peeyeme otnime weeme bau me, cuta jäätyepene nuuja ätrunga biname ne teta cama. Taitus nää nuuja gwidape ne yaacatepi weeme bau ca? Ewee, licarage! Cine Taitus cama yepä ngene atwanena cama kaakesea jaawenenago piyepu cime mule yepä ibi ge.

¹⁹ Weene gone apu angi, egä cane weeme cabu ca cămecăme aga bāwāricine. Acejiyame me opo gaabe je cane jijenininine, egä cane Keriso me kaakesea liba jaawenune, cane toraca mene jicemune. Piyepu căme biname, iyeta cane lui bine jaawenimune, peei lui weeme ätityera tääpu memi. ²⁰ Căme wālu pisi nyene, egä cane peeyeme liba pa lădepene, cane pama epu pa pidāripene weebibine, cane lipu tääpume singi lica gâne. Cuta weene pama epu pa nāpānepeye cebine, weene lipu tääpume singi lica gemi. Cane wālu gâne, egä cane weebibine pidāripene mene abaja cabu, ire patre agli cabu, watata claabe cabu, weemāmu ngene atwanena cabu, niyaniya mene cabu, iicetneja cabu, weemāmu awepyerāja cabu, ätecja căco mule cabu. ²¹ Cane wālu gâne, egä nuuja taje cane peeyeme liba pa lădepene, Acejiyame te cebine cuta căāri ajiri me pa nawenepi weeme name pi. Siige cane ele pa nangenepi eei biname bime name pi, lui cina niyaniya mule itu yaacnemepesi niināce gaabe me, yepä lica itu tatatrongāripesi teeme sargi mule cabu ca, magebi rooriye cina teeme sargi ero mule cabu ca, ngulebāgrā imābāgrā cina teeme sargi ero mule cabu ca piyepu poto ajiri mule cabu ca.

13

Cerăcerăgāabu Umlē Mene piyepu Yewo Mene

¹ Cane ai lui nesae me otnime äbitenine weeme bau me. Oogārāneji mene te jicenis egä, “Weene miiji neeneni coo cerāmu poto bime aitneja mene ätecja biname me niya mule poto cidi me, piba weene miiji gemi teebine ablawejame.” ² Cane lui padare cabu neeneni me lădepene peeyeme, cane piba umle mene jijipene weebibine. Cuta page cane liba cude padare gâne weeme bau ca, cane căāri pui yepä mene jijenininine, egä ingwe ca cane liba pa lădepene peeyeme, lui biname cina niya mule niināce gaabe me itu tevenimumesi piyepu iyeta poto cina, teepi lica pa luucratni-pesi daremu pāpāna căco pi. ³ Siige weene piba pagege umle äbita, egä toraca gyene, Keriso te căme bau ca mene jicemuge. Tabe weeme opo gaabe je riiberibe lica pagege, pātā tabe teemerage kokre page yaaboclomtepi weeme bau me. ⁴ Biname cina puu teebine baarge uli cabu jibyecrujisi, tabe liba kokre căco enajuji, yepä tabe Acejiyame me kokre miiji pi page siige ireclota enajenige. Tabe lipu kokre căco enajuji, cine teeme ätyepāneji biname cuta pepu kokre căco gemi. Yepä cine liba peeyeme Korinito me pa naclep, ingle cine ireclota Keriso cama yepä gemi, siige cine Acejiyame me kokre cama pa naclepiti pi weeme opo gaabe je.

⁵ Weene weemāmu apicetnāripēye pāpāname, egä weene nää toraca Yeesu Keriso ne jitrungeniye. Weene liba birige äsecrera peei apicetnera cabu ca, weene piba umle gemi, egä tabe pisi nyene weeme cabu. ⁶ Căme ätrunga pisi nyene, egä weene umle itu lăbitipeye, egä cebine pepu ituge apicetnera, siige jääpānepesi, egä cane toraca Keriso me ätyepāneji biname gâne. ⁷ Cane Acejiyame bau me irecu lātumutanune, egä weene nuuja niya ne lica pagege wawena. Cane naace name pi weeme tääpume lica irecu lātumutanune, egä biname cina piba pāpāname egä cane toraca ätyepāneji biname gâne. Yepä cane pui name pi weeme tääpume irecu lātumutanune egä weene miiji mule bine wawenetnājame, ngānu gyene biname cina liba apu jicusi, egä cane toraca ätyepāneji biname lica gâne. ⁸ Cine eei taatu mule bine jaawenimusi, lui gemi toraca, lica eei bine toraca gwidape bine lui cina sabe jaawenimusi. ⁹ Cine gege gemi, cine liba kokre căco gemi, yepä weene kokre gemi. Siige cine irecu ätumutanināgo egä weene epucăco me äbitame. ¹⁰ Cane ama cita ca naace tääpume yoogārenine, egä cane liba pa lădepene peeyeme, cane piba lica pagege drāmā cama weebibine wawena, lui tääpume căme conocăco pisi nyene, Acejiyame lui conocăco itu năcājuji cane weebibine ablawejame. Pui conocăco lui eei tääpu myene weebibine cabu me wawename, lica gawe me wawename.

¹¹ Yoo, căme ätrunga binamewale, yewo! Weerne mule bine eblawäjemepeye; căme mene ibi jwenemepeye, yepä ngene atwa-na cama inajipi, poode cama. Siige Acejiyame lui te owecu niwenininuge piyepu poode nicäraninuge, tabe weene cama pagege lenaja.

¹² Weene miji weemeweme ajecletnäjipeye ätrunga biname bime mule liyepu!

¹³ Iyeta Acejiyame me binamewale cina ama cita ca jiwablininisi weebibine.

¹⁴ Yageyame Yeesu Keriso me miji piyepu Acejiyame me singi teepi weeme cabu lenajame. Piyepu Aceji Seemo te weebibine wawename weene yepä äbitame!

Cane ngii Paulo. Căme mene ngälu peese.

PAULO ME LETA GALATIYA PROBINS ÄTRUNGA BINAME BIME BAU ME

¹ Cane säne Paulo, Yeesu Keriso me ätyepäneji biname gäne. Biname cina cebine lica nätyepepesi, cuta piyepu cane lica biname bime singi cabu otni, yepä cane Yeesu Keriso bau ca ätyepäneji gäne piyepu mime Aceji Babe bau ca, lui te Keriso ne erpinantuji budre cabu ca. ² Iyeta cine lui ama abasecretnäneji gemi, cine gigri jücepesi egä, “Sebore iyeta ätrunga ingle cewe maramara cabu ta Galatiya Probins ngalebora.”

³ Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

⁴ Yoo, Aceji Babe me singi cabu Keriso te budre äbituji mibibine mime niija mule cabu ca äsecerame, naace tääpume mine piba niijaniya mule bine abmaläcemame, piyepu lica ai gawecewe me gwidape tääpume singisingi äbitename. ⁵ Mine miiji Acejiyame ne awepyeräja iyeteta ngälu cäco. Pepu pa yaanajeje!

Pisi Nyene Yepä Taatu Miiji Mene

⁶ Cane cälu te nätige mene ätecijame weeme poto cidi me. Matikolä padare te liba apirige, weene piba Acejiyame ne ebmaleniye, lui te weebibine itu ala tisoglicipi Keriso me miijirage owecu mule ca. Page weene nuuja mene itecijenininige lui ne yaainusi “miiji mene” ca, ⁷ yepä pei lui miiji mene lica gyene. Cane ai mene jicene, ingle naace gyene poto biname piti nemi weene cama lui cina weebibine maramara ngene atwanename jiweninini. Teepi singi Keriso me Miiji Mene mara me wawename. ⁸ Yepä, ngänu gyene liba cine coo cabucewe ca mename seemo te weebibine mene birige jajanena, lui mara gyene Miiji Mene cabu ca, weene lui ituge ätecija cime bau ca, tabe miiji teeme mäpu daremu päpäna muye puupu cabu iyeteta. ⁹ Cine pepu itu jijipago, cuta page cane weebibine cääri jijenininine egä, liba nuuja te weebibine mene jijanininuge lui mara gyene Miiji Mene cabu ca, weene lui ne itu yaacatepeye, tabe miiji mäpu daremu päpäna muye puupu cabu iyeteta.

¹⁰ Nää, weene page apu jingenininige egä cane äbitenine biname cina singi cäme tääpume lenajame? Licarage! Yepä, cane singi Acejiyame te cäme tääpume singi lenajame. Weene pama apu jingenininige egä cane singi gäne biname cina cebine awepyeräjame? Ewee, cane liba pei tääpume singi gäne, cane piba Keriso me toraca kaakesea biname lica birige.

Yeesu Keriso Lipu Eboclomtige Miiji Mene ne Paulo bau me

¹¹ Cäme ätrunga binamewale, cane singi weebibine umle wawename egä, lui Miiji Mene cane jaanemune, biname bau ca lica gyene, ¹² ingle cane lica secatujine nuuja biname bau ca; coo piyepu nuuja biname te lica nabiberäjuji, yepä Yeesu Keriso te seboclomtuji pui Miiji Mene ne cäme tääpume. ¹³ Yoo, weene mene ituge ätecijana cäme ireclota poto cidi me pui padare cabu, cane liba Acejiyame tääpume nanajuji Israela biname bime irecu ätumuta mule cabu. Cane Yeesu me ätrunga ingle biname bine niija me owecu cäco jaawenimune, cuta piyepu singi ge pei biname bine budre me äyebengame. ¹⁴ Pui padare cabu cane iyeta cäme kokre ca cängena tewenäjumene cime saarewale bime mule; cane niinäce gaabe biname ge cäme poto ceege cabu ca Israela biname bime mule waweneca cabu je.

¹⁵ Yepä, Acejiyame te babo owecu gyene cäme tääpume, tabe cebine itu najuji, cane camuge piba aplimla, piyepu ala nasogluji naace me teeme biname me äbitame. ¹⁶ Ingwe ca tabe liba ngene jotwananuji teeme Bägrä Yeesu ne aboclomtame cäme tääpume cane gawe maramara biname bine teeme poto cidi me jajanename, yoo pui padare cabu cane piba nuuja biname bau me lica ädujine abiberäja tääpume, ¹⁷ cuta Yerusalema me lica ädujine cäme niinäce gaabe ätyepäneji biname cama mene abaitname. Yepä, cane conocäco ädujine Arabiija gawe cabu me, piyepu puma cita ca acnenutujine Damaseko cewe me. ¹⁸ Nesae kämäge ingwe ca, cane piba Yerusalema me ädujine Peteru ne ädärame, piyepu fiftin bimu taatu ten cama nanajuji. ¹⁹ Cane puga lica jepänujine nuuja ätyepäneji biname ne, yepä Yakobu ne jepänujine, lui mime Yageyame me igane gyene.

²⁰ Acejiyame me opo gaabe je cane jijenininine egä ai mene, cane lui weeme bau yoogärenine, toraca gyene.

²¹ Pui Yerusalema me otni ingwe ca, cane otnujine poto cewe me Suriya piyepu Kilikiya gawe cabu. ²² Pui padare Keriso bau ätrunga ingle biname Yuudea gawe cabu, teepi cäme tääpume cängena umle lica ge. ²³ Teepi ai taatu umle, poto cina lui naitnäjujisi cebine egä, “Lui biname te cibibine niija cabu nicranininuge, page tabe biname bine jejanenemige Yeesu ne ätrugname. Yepä, niinäce padare cabu tabe singi ge biname bine pui ätrunga cabu

ca äyebhengäjamel!"²⁴ Yoo, teepi Acejiyame me ngii ewepäntujisi tabe lipu căme ireclota mara me nawenuji.

2

Paulo piyepu Nuuja Ätyepäneji Biname

¹ Footin kāmäge kaake poto ca, cane piba Banaba cama lacnenutepene Yerusalema me, piyepu Taitus piba cine cama ge. ² Cane naace name pi lacnenutepene, inge Acejiyame te cebine umle itu nawenepi piyeme otnime. Puga ätrunga mope biname bime abasecretna cabu cane teeme täápume cāngena yaaboclomtepene pui Miiji Mene, cane lui nuuja gawe biname bine jaajanemune. Cane peei ne jaawenepene, inge naace gyene lui kaakesea cane ituge wawena piyepu lui kaakesea cane page jewenenine, cane singi lica gāne peei te papa me äbitame. ³ Taitus lui cine cama ge tabe Israela biname lica, yepä Griik biname gyene. Ätrunga mope biname cina cotre ne lica yaacitepesi teeme tääpe ne matikolä iirputame cewecu acatame Israela biname liiyepu, ⁴ yepä poto puga ge, lui cina singi ge tabe peei ne waweneme. Teepi walya mene jüicemepesi egä teepi cime biname gemi. Teepi ogä pana itu yäábäcnepesi ätrunga inge cabu me cime mule ireme. Teepi singi ge umle äbitame egä Israela biname bime cotre cabu ca cine lipu äsecräreji gemi cime Yeesu Keriso cabu lenaja name pi, inge naace gyene teepi singi cine Israela biname bime cotre ngalebora cääri cuta äbäcname. ⁵ Yepä, cine lica teeme singi ne itu yaacatepesi, licarage matikolä padare cabu acata, inge naace name pi cine singi ge Miiji Mene ne cāngena ire atwime weeme täápume egä peei toracarage mene te lica mara me äbitame.

⁶ Yepä, teepi lui cina epu pana mope biname ge, yoo cane pepu jüicenine, inge nuuja mara lica gyene căme täápume teepi ngena ngii cama ge. Acejiyame täápume modamoda biname lica mara gemi nuuja biname cabu ca. Yoo, pui mope biname cina cebine lica najepesi Miiji Mene ne mara me waweneme. ⁷ Yepä, teepi umle läbitipesi egä Acejiyame te cebine epu pana kaakesea itu näcäruji Miiji Mene jajaneneme nuuja gawe biname bine, lui cina Israela biname lica gemi, tabe lipu kaakesea Peteru ne itu ecäruji Miiji Mene jajaneneme Israela biname bine. ⁸ Yoo, Acejiyame lui me kokre puga ge Peteru me kaakesea cabu, tabe lui ätyepäneji biname gyene Israela biname bime täápume, teeme kokre cuta puga ge căme kaakesea cabu, cane lui ätyepäneji gāne nuuja gawe biname bime täápume. ⁹ Yakobu, Peteru, cuta Yoane lui cina epu pana egä teepi ätrunga mope biname gemi, teepi liba opo yaawatnäpesi egä Acejiyame te singi gyene cane peei kaakesea ne waweneme, teepi Banaba piyepu cane cama ime lacranäpogo, awabame egä cine iyeta yepä kaakesea ne jewenenisi. Cine mene jaatranepesi egä Banaba piyepu cane gawe maramara biname bine Miiji Mene jajaneneme, piyepu teepi Israela biname bine jajaneneme. ¹⁰ Puga ge teeme yepä singi taatu egä cine miiji owecumete biname bine ätityerame, siige pepu ätityera ne cane babo singi ge ceerame.

Paulo Peteru ne Jicnecige Antiyoka je

¹¹ Peteru liba Antiyoka ätrunga biname bine yäädäremepi, cane teebine mene jaajepene ätrunga biname bime opo gaabe egä tabe conocono ne jewenige, inge teeme conocono mule lui pajecurage ge. ¹² Puma cita ca poto Israela biname cina tataripesi piyeme Yakobu bau ca Yerusalema ca. Yoo, teeme atyara niinäce gaabe ca, Peteru gıgri deedei itu läbitanepi ätrunga biname cama lui Israela biname lica gemi, yepä teeme atyara ingwe ca, tabe gije labacitepi teeme bau ca äyebllingtame piyepu nuuja gawe ätrunga biname cama lica deedei loolo, inge tabe wālu ge pui biname bime täápume, lui cina jüicepesi egä: "Cuta nuuja gawe ätrunga biname cina miiji teeme tääpe matikolä iirputame Israela biname pana äbitame." ¹³ Siige, poto ätrunga biname lui cina Israela biname ge, teepi cuta Peteru cama yepä pana walya mule jaawenepesi, siige teeme pui walya mule te Banaba ne cuta joomlepi, walya gaabe cabu me yaacanepi. ¹⁴ Cane liba teebibine jääpänemepene egä teepi lica Miiji Mene me toraca mule cabu yaacrajuge, cane piba Peteru ne jaajepene iyeta biname bime opo gaabe je egä, "Toraca, maane Israela biname gāte, yepä maane nuuja gawe ätrunga biname bime mule cabu naanajenige, lica Israela biname bime mule cabu. Yoo, maane gone läyebllingtute deedei äbitame nuuja gawe ätrunga biname cama, lui määme Israela biname lica gemi. Gone teebibine pepu giri jaacranimute Israela biname bime mule cabu lenajame!"

Biname, cina Conocăco Äbitena Yeesu ne Ätrunga name pi

¹⁵ Yoo, cine lui Israela biname gemi aplimla cabu ca, piyepu lica nuuja gawe cabu ca niiya mule biname liiyepu, ¹⁶ cine umle gemi egä biname te conocăco läbituge Acejiyame me opo gaabe je lica cotre wawena cabu ca, yepä tabe liba Yeesu Keriso ne jäätrunguge. Cine cuta piyepu Keriso Yeesu cabu itu jäätrungujisi naace täápume cine conocăco äbitame

Acejiyame me opo gaabe je ätrunga name pi, lica cotre wawena name pi. Ingle naace gyene nuuja te äblicäco birige Acejiyame me opo gaabe je conocäco äbita cotre wawena cabu ca. ¹⁷ Yoo siige, cine gaabe ne jepänujisi Acejiyame me opo gaabe je conocäco äbitame Yeesu Keriso cabu ätrunga miji pi lica cotre wawena name pi. Piba peei gaabe cabu cine liba jääpänusi egä cine conocono gemi Israela biname bime cotre mule poto cidi me, cine nää piba miiji ge iicana egä, “Cime Yeesu ne ätrunga name pi cine conocono gemi?” Licarage! ¹⁸ Yepä, cane liba cääri labacitune pui cotre wawena gaabe cabu me, cane lui ne itu sebmajine, cane piba lawabudnitune egä cane conocono biname gäne pui cotre mule tääpume. ¹⁹ Ingle naace gyene cotre mene te cebine nawabudnituge egä cotre wawena ca cane äblicäco Acejiyame me opo gaabe je conocäco äbita iyeteta ireclota päpäname. Siige, cane cotre miji pi budre gäne, cuta peei budre cabu ca ireclota gäne Acejiyame tääpume lenajame. ²⁰ Keriso liba baarge uli cabu budre äbituji, peei lui epu gyene egä cebine ten cama ituge budre wawena. Siige, page peei lui cane säne lica lui te ireclota, yepä Keriso te ireclota gyene cäme cabu. Piiyepu ai kirece ireclota cabu cane lica cäme kokre cama nanajenige, yepä Keriso me kokre pisi nyene cäme trupa cabu. Page cane Acejiyame me Bägrä Keriso ne jitrungenine cebine ätiyera ai gawecewe ireclota cabu, lui te cebine epu singi ge egä tabe teeme ireclota ecäruji cäme tääpume. ²¹ Yoo, cane Acejiyame me owecu mule ne papa me lica jaawenune cotre mule äcwetna ca, ingle biname te liba ibibi gyene conocäco äbitame Acejiyame me opo gaabe je cotre wawena cabu ca, piba Keriso me budre lui ingle cäco gyene.

3

Cotre Mule piyepu Ätrunga Mule

¹ Galatiya gawe biname weene buduma gemi! Luma cita ca gemi weeme buduma ngenen atwanena? Cane weebibine cängena itu jijananiyene Yeesu Keriso me budre poto cidi me baarge uli cabu. Weene peei ne itu joomlepeye, irecu ca päpäna pana weene itu jääpänepeye, siige pajecu ge weeme tääpume. ² Yoo, page cebine najepeye yepä gwidape poto cidi me. Ngena name pi Aceji Seemo te weeme yepäyepä trupa cabu labacitanepi? Nää, naace name pi labacitanepi, ingle weene cängena jaawenanepeye iyeta Israela biname bime cotre mene? Licarage! Yepä, tabe naace name pi labacitanepi weeme yepäyepä trupa cabu, ingle weene Miiji Mene itecijipi piyepu jäätrungepeye. ³ Weene lipulipu pepu buduma gemi? Aceji Seemo te weebibine icranipi kirece ireclota cabu me; page nää weene ngenen jotwananenininiye egä weene ibibi gemi weemerage kaakesea ca peei ireclota cabu cängena lenajame ngälugaabe oomlaname? Weene äblicäco gemi! ⁴ Weene ngenen jitrimalenige egä Aceji Seemo te ituge ätiyera weebibine iyeta weeme mäpu cabu ca. Nää, papa gyene peei ätiyera? Weene nää page singi gemi ätrunga gaabe ne abmalame? ⁵ Nää, Acejiyame te Aceji Seemo ne weeme cabu me täätiepäjepi piyepu ciitaca mule bine weeme tääpume saboclomäjemepi, ingle naace popi weene Israela biname bime cotre bine jaawenemuye, coo ingle weene Miiji Mene itecijinuge piyepu jäätrunguye?

⁶ Abrahamo poto cidi me ngenen jotwananineye, tabe lipu mule uja jewenemuji. Oogäränejä Mene te jiičenige egä, “Abrahamo Acejiyame ne jitrungige, siige teeme ätrunga name pi Acejiyame teebine einige conocäco ca.” ⁷ Weene miiji opo awatna egä lui cina Acejiyame ne jäätrungusi, teepi Abrahamo me toraca kaakesaare gemi. ⁸ Oogäränejä Mene cabu ciige poto cidi me mene pisi nyene egä Acejiyame te gawe maramara biname bine ten cama cire conocäco jaawenemepi teeme ätrunga name pi. Yoo, pepu pana Miiji Mene pisi nyene Oogäränejä Mene cabu, Acejiyame luma Abrahamo ne niinäce gaabe me jejuji egä, “Mämiji pi cane cire miiji jaawenemepene iyeta gawe maramara biname bine.” ⁹ Siige, Abrahamo Acejiyame ne jitrunguji, jepänuji miiji ne teeme bau ca. Pepu pana Acejiyame cuta miiji jaawenemuge iyeta biname bine lui cina teebine jäätrungusi, tabe Abrahamo ne lipu miiji jewenanuji.

¹⁰ Yoo, Oogäränejä Mene te jiičenige egä, “Laati te iyeta Israela biname bime cotre cängena lica jaawenemuge iyeta padare, Moose lui cotre bine soogäremuji, tabe niija daremu cirege päpäna Acejiyame bau ca!” PEEI name pi laati te walya jiiçuge egä, “Cane iyeta cotre bine cängena jaawenemune, Acejiyame ngenecu miiji wawenane cäme tääpume,” pui biname te mäpu daremu cabu ca lica birige asata, ingle biname te äblicäco iyeta cotre bine cängena wawenetnäja. ¹¹ Yoo, pajecu gyene egä nuuja te lica Acejiyame me opo gaabe je conocäco läbituge cotre wawena ca, ingle naace gyene Oogäränejä Mene te cuta jiičenige egä, “Pui biname me ireclota iyeteta gyene, Acejiyame lui ne conocäco me jaawenuge teeme ätruna cabu ca.” ¹² Yepä, cotre wawena lui mara ge ätrunga cabu ca; teepi gigri lica gegi, ingle Oogäränejä Mene te cotre poto cidi me apu jiičenige egä, “Laati te cängena jaawenemuge

iyeta gwidape lui poto cidi me cotre mene te jüicenige, tabe peei cabu ca iyeteta ireclota cirege päpäna.” Yepä, biname cina äblicäco ge peei ne wawena.

¹³ Yoo, Oogäräneji Mene cuta nuuja poto ca jüicenige egä, “Lui biname ne uli cabu yaatecwamtusi budre me, tabe niyarage daremu jääpänuge Acejiyame bau ca.” Siige, Keriso pepu pana mäpu daremu itu jepänuji mime täápume mibibine äsecrera daremu cabu ca lui te tädenige inge naace gyene mine äblicäco cotre mene cängena wawena. ¹⁴ Keriso mibibine nisechräpi naace täápume egä lui miiji Acejiyame Abrahamo ne ecäruji, peei miiji ne cuta nuuja gawe biname lui Israela biname lica gemi, teepi te päpäname Keriso Yeesu cabu ca, cuta naace täápume Aceji Seemo mime yepäyepä trupa cabu abacitaname, Acejiyame lipu ituge jaji ceerame mime ätrunga cabu ca.

Lui Mene Acejiyame Ituge Jaji, Cotre Mene te Äblicäco Mara me Wawena

¹⁵ Cäme ätrunga binamewale, cane etonärenine cäme mene ne nuuja mule cabu: Neeneni biname liba mene ne conocäco yaacitäsi, siige peei mule lui klaje pana gyene, piyepu nuuja biname te äblicäco peei jajeji mene ne mara me wawena coo piyepu äyebingta. ¹⁶ Yoo, Acejiyame te mene jejanuji Abrahamo ne cuta teeme yepä kaakesaare ne ciige miiji poto cidi me. PEEI mene pisi nyene Oogäräneji Mene cabu apu egä, “yepä teeme kaakesaare,” lica gyene epu egä, “teeme kaakesaare iyeta,” piyepu peei yepä kaakesaare lui Yeesu Keriso sine. ¹⁷ Cane naace me jüicenine egä Acejiyame Abrahamo ne mene jejuji, piba cuta jejuji egä, “Cane te ingwe ca conocäco cirege wawena.” Siige, foom hanred teeti kämäge ingwe ca tabe biname bine Cotre Mene ecäremuji, Moose lui bine soogäremuji, yepä peei mene te äblicäco teeme niinäce jajeji mene ne mara me wawena. Siige, cotre mene te äblicäco pui mene ciige miiji poto cidi me äyebingta. ¹⁸ Yoo, biname te liba Acejiyame me ciige miiji ne jääpänuge cotre wawena name pi, tabe piba peei miiji ne lica jääpänuge Acejiyame me jajeji mene name pi. Yepä, Acejiyame peei ciige miiji Abrahamo ne ecäruji naace täápume tabe teebine mene ituge jaji pepu wawename.

¹⁹ Yoo, piba ngena tääpu myene peei Cotre Mene? Abrahamo me padare ingwe ca Acejiyame Cotre Mene Israela biname bine ecäremuji teebibine umle wawename egä teeme niija mule lui toraca conoco gemi. Acejiyame cuta ngälugaabe ne ecituji Israela biname cina Cotre Mene cabu lenajame, siige peei ngälugaabe lui Abrahamo me yepä kaakesaare Keriso te liba atyaramta, lui ne tabe peei mene jejuji ciige miiji poto cidi me. Yoo, Acejiyame Cotre Mene lica conocäco gaabe ca ecäremuji biname bine, yepä teeme mename seemo bine ecäremuji, piba mename seemo cina Moose ne ecärujisi, piyepu Moose lui menameyame ge, tabe iyeta Israela biname bine ecäremuji. ²⁰ Yoo, menameyame biname me kaakesea pisi nyene liba neeneni poto biname cina singi ätityera täápume, yepä jajeji mene poto cidi me, Acejiyame taatu ge, tabe singi lica ätityera biname, yepä tabe mene Abrahamo ne conocäco jejuji.

Acejiyame me Cotre Mene Ngeno Myene

²¹ Cotre Mene te nää jisädenige Acejiyame me jajeji mene bine? Eewe, licarage ge, inge cotre mene liba ibibi gyene iyeteta ireclota ceerame, piba cotre gaabe ca biname cina conocäco läbitininusi Acejiyame me opo gaabe je, ²² yepä cotre mene te jüicenige egä, “Niija mule me kokre te joomlenemige iyeta ai gawecewe biname bine,” peei name pi Acejiyame Abrahamo ne mene jejuji teeme ätityera ceerame pui biname bine lui cina Acejiyame ne jäätrungusi. Page lui cina Yeesu Keriso ne jitrungenisi, tabe teebibine itityärenemige, inge Acejiyame te singi gyene toraca ireclota ceerame biname bine teeme ätrunga name pi.

²³ Acejiyame me Cotre Mene, Moose lui soogäruji, peei te äbituji awamuta biname pana me, lui te biname bine joomlemuge ngälu ätrunga padare te tatyaramtepi. Siige, biname cina piba Acejiyame bau ca umle läbitipesi Yeesu Keriso poto cidi me teebine ätrungame. ²⁴ Yoo, Cotre Mene te epu pana gyene ire atwi biname liyepu mime täápume mibibine conocäco gaabe cabu waadename ngälu Keriso te tatyaramtepi, naace täápume mine teebine ätrungame mibibine conocäco me wawename Acejiyame me opo gaabe je. ²⁵ Siige, ai padare cabu biname cina miiji Yeesu ne ätrungame, inge itu lapirepi Cotre Mene me ire atwi padare te.

²⁶ Weene Keriso Yeesu ne jäätrunguye, peei name pi weene iyeta Acejiyame me bägräwale gemi. ²⁷ Weebibine niije ca itu jicisäjipesi Yeesu me ngii cabu teta cama yepä äbitame piyepu teeme pana miiji mule bine waadename. ²⁸ Yoo, mime Yeesu cama yepä äbita name pi Israela biname piyepu nuuja gawe biname teepi mara lica gemi; cuta lui bine jaaletnemusi kaakesea cabu lenajame piyepu lui cina äsecräreji teeme singi gaabe cabu otnetnejame, teepi mara lica gemi; cuta rooriye piyepu magebi teepi mara lica gemi, inge mine iyeta yepä gemi Keriso Yeesu cama yepä äbita miiji pi. ²⁹ Mine liba Keriso me binamewale gemi, mine piba cuta Abrahamo me kaakesaare gemi, siige mine cirege päpäna Acejiyame ngena täápume mene ituge jaji ceerame.

4

¹ Cane cerämu jüicenenemine mine lui cina Acejiyame me bägrä gemi mime poto cidi me. Agesa ngene ca agli mene. Imäbägrä lui te teeme babe me gawe piyepu gwidape bine cirege waadena, tabe liba bägrä yaanajuge tabe papa kaakesea biname pana birige, äblicäco tabe mene iicana biname bime abasecretna cabu je; ngänu gyene tabe yageyame gwidape täapume, yepä tabe mene äblicäco iicana, ingle tabe lui bägrä gyene. ² Cuta piyepu tabe liba bägrä gyene, nuuja biname cina piba ire jaatwusi teebine, piyepu teeme gawe piyepu gwidape cina nuuja biname bime ime cabu yaacrajuge ngälu babe te lui padare ne ituge acita, peei te atyaramtige. ³ Mine peei bägrä pana ituge lenaja nuuja biname bime singi wawename, ingle naace gyene cotre pana mule cina mibibine noomlinuji. Mime poto cina lui Israela biname bime cotre mule cabu ninajininuge; cuta piyepu mime nuuja poto cina lui uuje bime mule cabu ninajininuge. ⁴ Yepä, Acejiyame me padare te liba tatyaramtuji, tabe teemerage Bägrä ne tityepuji gawecewe me. Tabe magebi cabu ca eplimluji, Israela biname bime cotre ngalebora senajenäjumi. ⁵ Yeesu Keriso täduji äsecrera gaabe ne wawename biname bime täapume, lui bine cotre mule te tewamutemäjemumi, naace täapume mine Acejiyame me jājäcräneji bägrä me läbitipago.

⁶ Yoo, Acejiyame teeme Bägrä me Seemo ne ituge ätepa mime yepäyepä trupa cabu, mibibine umle wawename egä mine teeme bägrä gemi. Siige, Aceji Seemo te mibibine niwenininige Acejiyame ne awejename egä, “Cime Babe.” ⁷ Yoo siige, page cotre mene te weebibine lica iwadininige. Page weene lui Acejiyame me bägräwale gemi. Acejiyame te weebibine iyeta gwidape cirege ceera, tabe lui poto cidi me Abrahamo ne jejuji, ingle weene iyeta lui Acejiyame me bägräwale gemi.

Paulo Ngenecu Mäpu Ge Galatiya Ätrunga Biname bime täapume

⁸ Uja weene liba camuge Acejiyame poto cidi me umle äbita, weene piba uuje bime singi bine jaawenenamepeye, lui cina toraca ire atwi biname lica gemi. ⁹ Yepä, page weene umle gemi Acejiyame. Yoo cäro, cane miiji iicana aipu egä, page Acejiyame te umle gyene weene. Siige, weene ngeno memi singi atatröngärame cuta pui uuje bime singi cääri wawenecame, lui cina kokre cäco piyepu äblicäco weebibine toraca ireclota ceera? Weene ngeno memi singi cääri cuta teeme ire atwi cabu me äbäcname teeme singi piyepu cotre bine wawenecame? ¹⁰ Cuta page weene poto bimu bine yaacranemuye weeme iiwäreja mule wawenecame conocäco äbitame, cuta piyepu poto trii mule teeme mabye coo kämäge padare cabu jaawenemuye. Weene cuta poto kämäge cabu pui mule bine babo jaawenemuye. ¹¹ Cäme ngene atwanena lui baborage mäpu gyene weeme täapume! Ingle naace gyene cane singi licarage gäne cäme kaakesea te weeme cabu papa me äbitame.

¹² Yoo, cäme ätrunga binamewale, cane kokre cama weebibine jijanininine egä weene mene jitranepeye iyeta maramara cotre mule bine abmaläcemame, cane lipu Israela biname bime cotre mule ituge abmala weeme täapume, ingle weene äblicäco cotre wawena ca conocäco me äbita. Yoo, weene nuuja niija ne lica cäme täapume itu jaawenepeye, niinäce padare cabu ca ngälu page. ¹³ Weene umle gemi, peei lui cäme pita name pi cane uja weene cama nanajepi, puga Miiji Mene weebibine jijaninipene. ¹⁴ Cäme pita te weebibine mäpu icäripi, yepä weene lica cebine kaake ca näcelyärepeye cäme pita bleela cabu; weene lica cäme mene nägyepeye. Yepä, weene cebine cängenarage ire natwepeye, epu pana weene cabucewe mename seemo ne liiyepu miijirage ire atwi; coo epu pana Yeesu Keriso ne lipu ire atwi, tabe liba weeme bau me otni je. ¹⁵ Pui padare cabu weene gege ge cäme mene ätecijame. Nää, ngena te täbitumi weeme ireclota ne mara me wawename? Cane weeme owecu poto cidi me jüicene egä, pui padare cabu weene lica nuuja gwidape ne jaainuye lui cäme miiji täapume. Weene cuta weeme irecu cebine näcäruye, weene liba ibibi ge ceerame. ¹⁶ Yepä, page weeme ngene atwanena cäme täapume pama mara gyene. Cane nää pama cubuyame pana täbitumene weeme täapume, ingle cane Acejiyame me toraca mene weebibine conocäco itu jijaninipene?

¹⁷ Pui biname lui cina singi gemi toraca mene mara me wawename, teepi cuta babo singi gemi weebibine teeme biname täapume wawename, yepä teeme mara ingle pisi nyene lui lica weeme miiji täapume. Teepi weebibine opire mara cewe me jiweninini cäme bau ca, ingle teepi singi gemi weene cebine abmalame puma cita ca weene babo singi äbitame teeme mene ätecijame. ¹⁸ Yoo, weeme babo singi poto cidi me, peei mule cabu nuuja niija lica gyene, liba miiji ingle pisi nyene peei singi täapume. Pepu singi miiji ge iyeteta lenajame, peei name pi gone abmala cane liba weene cama lica ge. ¹⁹ Cämerage bägräwale, mage te bägrä aplimla pita ne lipu jäpäpänuge, pepu pana pita cama cane cääri asicnantenine weeme täapume, ngälu weeme mule te toraca conocäco Keriso pana läbituge. ²⁰ Cäme toraca singi gyene page weene cama lenajame; cane pama pita umle gäne lipulipu mene weebibine jajime, ingle cane ngenecu mäpu gäne weeme poto cidi me.

Mine Hagara Saara naabibime Ireclota cabu ca Etonärenisi Toraca Mene ne

²¹ Cäme ätemla pisi nyene weeme täápume lui cina singi gemi Israela biname bime cotre mule cabu lenajame: Nää, Acejiyame me Cotre Mene Moose lui bine soogäremuji, weene pama umle gemi peei te lipu jijenininige? ²² Ai Cotre Mene ngalebora mine mene ecnenenemisi Abrahamo piyepu teeme neenenimäbägrä poto cidi me. Teeme yepä imäbägrä aplimläneji ge ngulebägrä cabu ca. Pui ngulebägrä ngii Hagara ne teepi ituge aletna Abrahamo me coga me kaakesea wawename. Nuuja imäbägrä lui igane ge, tabe Abrahamo me coga Saara cabu ca aplimläneji ge. ²³ Yoo, Abrahamo me yepä imäbägrä ngii Ismaela, lui pui aletnäneji ngulebägrä cabu ca eplimluji, teeme aplimla lui mara lica ge poto bägrä bime aplimla cabu ca, yepä Abrahamo Isacako ne jepänige teeme bägrä cäco coga Saara cabu ca, ingle Acejiyame uja mene itu jejuji bägrä teebine ceerame. ²⁴ Lipu itu äbituji Abrahamo me neenenimäbägrä bime täápume, peei mule cabu ca mine neenenimäbägrä jajeji mene bine opo aawatnenisi. Cotre mene piyepu lui mene Acejiyame Abrahamo ne jejuji lui epu pana gegi pui neenenimäbägrä bime mage liiyepu. Yepä mage, Hagara tage, aletnäneji ge kaakesea cabu iyeteta lenajame, peei name pi biname bime cotre te teebine teeme bägrä cama joomluge. Hagara piyepu teeme bägrä bime ireclota cabu ca mine opo ewatnenisi pui cotre mene Acejiyame te Sinai podo cabu je secäruji Moose ne, biname bine waadename. ²⁵ Yoo, Hagara piyepu teeme bägrä cabu ca mine opo ewatnenisi mule lui te täbituji Sinai podo cabu je, Sinai podo lui Arabiya gawe cabu sine. Piyepu mine cuta opo ewatnenisi Yerusalema ne piyepu lui cina page icrajinige pui babo cewe cabu. Page Yerusalema cewe biname lui epu pana gemi Hagara me bägrä liiyepu, ingle cotre mene te teebibine joomluge. ²⁶ Yepä, Acejiyame Abrahamo ne lui mene jejuji, tabe peei mene cuta jejuji biname bime täápume lui cina cabucewe je kirece Yerusalema cabu cirege lenaja. Biname cina puma lica icrajenige maramara cotre mene ngalebora, piyepu teepi äsecräreji icrajinige iyeta niiyaniya mule cabu ca. Cabucewe Yerusalema lui mime täápume mage pana gwene, mine iyeta lui cina Yeesu ne jitrungenisi. ²⁷ Pisi nyene mene Oogäräneji Mene cabu pui neenenimäbägrä poto cidi me egä teepi lui neenenimäbägrä magebi pana gegi. Yepä magebi lui Cabucewe Yerusalema pana gwene, lui te ätrunga biname bime mage. Niinäce tabe bägrä cäco onajige, yepä ingwe ca teeme bägrä bucurage gemi pui nuuja magebi cabu ca, lui te ai gawecewe Yerusalema pana gwene. Agesa peei Oogäräneji Mene:

“Bägrä cäco magebi, lui te lica bägrä aplimla pita itu jepänuji,
maane miiji gege, uupera cama naanajuge!

Ingle maane lui ne abmaläneji gäte,

määme bägrä bucurage cirege äbita pui nuuja magebi cabu ca,
lui ne teeme rooriye te lica twaabmaluge.”

²⁸ Yoo, cäme ätrunga binamewale, mine Acejiyame me bägrä gemi, ingle Acejiyame mene itu jejuji pepu cirege äbita. Mine epu pana Isacako liiyepu, ingle naace gyene Acejiyame Abrahamo ne mene itu jejuji egä pui bägrä te pageji äbita. ²⁹ Yoo, pui sasa padare cabu Abrahamo me bägrä lui Hagara cabu ca aplimluji, teeme ngii Ismaela, tabe niija jaawenuge Isacako ne lui me aplimla poto cidi me Aceji Seemo mene ituge jaji. Cuta page piyepu, Israela cotre cabu lui biname cina, teepi niija jaawenemusi biname bine lui cina Acejiyame me mene ne jäätrungusi piyepu lica Israela biname bime cotre mene cabu icrajenige. ³⁰ Yepä, Oogäräneji Mene te lipu jicenige? Peei te jicenige apu egä: “Pui aletnäneji kaakesea magebi ne jutypei teeme bägrä cama, ingle naace gyene aletnäneji magebi me bägrä tabe lica teeme babe me miijimiji gwidape pa yaawademepi; yepä pui bägrä lui babe me cogarage cabu ca ge, tabe te iyeta pa yaawademepi.” ³¹ Yoo, cäme ätrunga binamewale, mine lica epu pana gemi aletnäneji kaakesea magebi me bägrä liiyepu, ingle cotre mene te mibibine lica noomlenininige, yepä mine Saara me bägrä pana gemi, ingle mine Acejiyame me jajeji mene jäätrungusi mibibine äsecrerame.

5

Keriso te Mibibine Itu Nisecräripi

¹ Keriso te mibibine itu nisecräripi, siige tabe singi mine äsecräreji lenajame. Weene kokre cama jiclajutipi! Gone cotre mule ne cuta cääri yaacatupe peei cabu lenajame!

² Ai mene itecijinege! Cane Paulo te weebibine jijenininine egä weene liba Israela biname bime cewecu yaawademuyee tääpe iirputa ca, ingle naace popi weene pepu singi gemi conocäco äbitame Acejiyame me opo gaabe je, weene peei mule ca Keriso me ätiyera ne jäägyuye. ³ Yoo, cane cuta cääri jijenininine egä nuuja biname te liba Israela biname bime cewecu yaacatupe tääpe iirputa ca, tabe pepu pi Israela biname bime cotre mule cabu labacituge, siige tabe piba miiji iyeta cotre bine cängena jaawenemuge. ⁴ Weene liba singi Acejiyame me opo gaabe je conocäco äbitame weeme cotre waweneca cabu ca, weene piba

weemämu läyebblinguye Keriso bau ca cuta piyepu Acejiyame me miiji cabu ca. ⁵ Yepä, cine ätrunga ca Acejiyame ne jewagrijenisi teeme Seemo ca cibibine teeme opo gaabe je conocäco me cire wawename, lui täápume cine ngene atwanena bine icranenemisi. ⁶ Ingle mine liba Yeesu Keriso cama yepä me läbitinago, piba biname lui me tääpe pui cewecu cama ge piyepu biname lui me tääpe pui cewecu cäco, teepi nuuja mara lica gemi, yepä Yeesu ne ätrunga lui teeme täápume babo gwidape gyene, piyepu ai ätrunga te laboclomtuge nuuja biname ne owecu wawena cabu ca.

⁷ Pui niinäce padare cabu weeme ireclota miijirage ge, weene Yeesu ne cängena jäätrungepeye. Weebibine laati te tiibinige toraca gaabe cabu otnime? Tabe lipulipu ngene atwanena bine biyebhengemige toraca gaabe cabu ca? ⁸ Licarage Acejiyame pa jiihipi, ingle tabe te weebibine ituge ala asogleca teeme biname me äbitame. ⁹ Yoo, mene pisi nyene egä: "Matikolä uutneca gwidape taatu te baborage buluduu ne juutnecuge." Walya mene pepu pana gyene. Matikali conocono te wata baborage me läbituge. ¹⁰ Yepä, mine yepä me ituge äbita mime Yageyame Yeesu Keriso cama, peei name pi cane umle gäme egä weene lica mara ngene atwanena ne pa pecatepeye. Acejiyame mäpu daremu pagege ceera pui biname ne lui te weebibine walya ngene atwanena itu nicäripi, ngänu gyene tabe laasi nyene.

¹¹ Cäme ätrunga binamewale, cäme poto cidi me poto cina walya jiićenisi egä, "Paulo te biname bine yaabiberäjemuge Israela biname bime cewecu ne teeme tääpe iirputa ca acatename." Peei mene toraca lica gyene. Liba toraca ge, ngena täápume biname cina singi gemi cebine jäje niija cabu acitename? Yepä, poto Israela biname cina cebine niija nawenusi, ingle teepi singi lica ai mene ätecijame egä Keriso te budre äbituji baarge uli cabu mibibine Acejiyame me opo gaabe je conocäco wawename tääpe cewecu cäco. ¹² Pui biname lui cina weeme ngene atwanena maramara jiweninini, cane singi gäme teepi teeme tääpe ne ablitame!

¹³ Cäme ätrunga binamewale, Acejiyame weebibine tisoglicipi niija cabu ca äsime, siige weene äsecräreji gemi. Yepä, gone weene äsecrera name pi apu jiićinuge egä miiji gyene weeme tääpe me singisingi cina weebibine waadena. Pätä Acejiyame me singi cabu ca weeme nuuja bine itityeräjemeyel! ¹⁴ Yoo, Moose lui cotre bine soogäremuji, iyeta peei cotre piti nemi yepä taatu cotre ngalebora. Agesa peei cotre: "Maane miiji biname bime täápume singi lenaja, maane lipu mäame täápume singi birige." ¹⁵ Yepä, weene liba weemeweme jääceluye piyepu labajininuye, piba ire! Weene weeme binamewale cama piba pagege iyeta weene papiripeye.

Aceji Seemo cama Ireclota

¹⁶ Cane ngena täápume jiićenine age sena: Aceji Seemo te weebibine iwecetnärininige; teeme singi ne weene jeweneye, piyepu gone weeme tääpe me singisingi bine jaawenemuyel! ¹⁷ Ingle naace gyene biname bime tääpe me singisingi te jäsäduge Aceji Seemo me singi ne, piyepu Aceji Seemo me singi te biname bime tääpe me singisingi bine jäsädemuge. Peei neeneni singi cina cubuyame pana gegi, peei name pi mine äblicäco mime singi waweneca. ¹⁸ Yoo, Aceji Seemo liba weebibine iwecetnäjininuge, piba cotre mule te weebibine lica birige waadena.

¹⁹ Yoo, mine tääpe me singisingi bine opo yaawatnemusi apu mule ca: Biname cina sargi ero mule bine jaawenemusi; biname cina jugijugi ngene atwanena piyepu mene cama yaacrajuge; teemeteme singi laglanininusi. ²⁰ Biname cina uuje bine yiiwäräjemus, cuta piyepu maramara angodnera piyepu mowä mule bine jaawenemusi. Biname cina cubuyame me läbitininusi, labajininusi; teepi nuuja biname bime gwidape täápume ire patre yaaglusi, piyepu claaberge te teebibine joomlemuge. Teepi nuuja biname bime täápume lica laatadrongäjininusi, yepä teeme miiji taatu ne jäärngusi. Teepi maramara tomi läbitininusi, piba läingäjinusi. ²¹ Nuuja biname te liba miiji jääpänuge, peei te teebibine claabe me jaawenemuge. Teepi sice buduma yaacrajuge, piba lui niija mule täápume singi, teepi peei bine oräre jaawenemusi. Teepi iyeta ai bine jaawenemusi cuta poto cerämu. Cane page weebibine umle jiwenininine, cane lipu niinäce itu jijipene egä: Lui cina ai mule bine jaawenemusi, Acejiyame te lica teebibine cire yaawademepi.

²² Yepä, Aceji Seemo te biname bine jaawenemuge teepi singi cama, gege cama, piyepu poode cama lenajame. Tabe biname bine jaawenemuge mäpu cabu bojäcu lenajame, teeme nuuja biname ne owecu cama ätityerame, piyepu conocäco piyepu toraca mule cama lenajame. ²³ Tabe cuta biname bine jaawenemuge teeme nuuja ne niinäce gaabe me acraname; cuta piyepu teemämu awesongärame. Yoo, biname lui cina pepu jaawenemusi, nuuja cotre te lica teebibine joomlemuge. ²⁴ Laati bemi Yeesu Keriso me biname, teepi teeme tääpe me niijarage singisingi piyepu niijarage ngene atwanena bine Keriso me baarge uli cabu ituge abmaleca. ²⁵ Yoo, Aceji Seemo mibibine toraca ireclota nicärininuji, peei name pi mine miiji mime ai ireclota ne teeme ime cabu acitame iyeta teeme singi

wawenname. ²⁶ Mine gone mimämu lawepyeräjinago, gone mime nuuja ne claabe me jaawenusi, piyepu gone mime nuuja biname ne ire patre yaaglusi, tabe liba miiji ne jääpänuge.

6

Ätrunga Biname bime Miiji Mule

¹ Cäme ätrunga binamewale, lui bime trupa cabu Aceji Seemo te enajenige, weene nuuja biname ne conocono mule cabu liba jääpänuge, teebine owecu cama umle mene jaajanuye. Piyepu weene ire! Weene liba cängena lica gemi, weene cuta singi ne pa jepänepeye conocono mule ne wawenname. ² Weeme nuuja te liba mäpu jääpänuge, teebine yäätityäruye, piyepu weene pepu jaawenuye Keriso me cotre ne. ³ Yoo, liba biname te apu jaangenuge egä tabe baborage gyene, yepä tabe lica, tabe teemämu langletnäjuge. ⁴ Iyeta yepäyepä biname cina miiji teemämu ireclota mule bine jaatranemusi egä miiji gemi, coo niya gemi. Liba miiji gemi, tabe piba ngenecu miiji läbituge. Yepä, tabe miiji lica gyene nuuja biname me ireclota mule poto cidi me iicana egä: “Teeme niya gyene, cäme miiji gyene.” ⁵ Ingle naace gyene iyeta biname bime ireclota cabu poto mäpu piti nemi.

⁶ Weene miiji deedei ecäremepeye piyepu nuuja miijimiji gwidape pui biname bine lui cina weebibine ibiberäjininusi Acejiyame me Mene poto cidi me.

⁷ Buduma ngene atwana gone, ingle weene äblicäco Acejiyame ne angletneja. Biname te lipu gije bine yäätémuge, tabe pepu kuu täápume ire yaacituge. ⁸ Biname me ireclota lui epu pana ge calwacupi gweeti liyepu. Tabe teeme tääpe me singisingi bine gije pana liba yäätémuge, tabe peei cabu ca kuu cirege päpäna, lui teeme budre gyene. Nuuja calwacupi biname te teeme miiji mule bine gije pana yäätémuge Aceji Seemo me ätityera ca. Tabe cuta kuu cirege päpäna Aceji Seemo bau ca. Peei lui iyeteta ireclota gyene. ⁹ Yoo, mine gone gloose me läbitinago miiji mule wawenname, ingle naace gyene padare te cire tädepi mine pui cabu ca miiji kuu päpäname, mine liba wata lica birige äyeb Benga. ¹⁰ Peei name pi iyeta mime padare liba piti nemi, mine iyeta biname bine miiji jaawenemusi, cuta toraca teebibine lui mime ätrunga binamewale gemi.

Paulo Teeme Leta ne Umlé Mene ca Ermuji

¹¹ Weene ire cäme oogära lipu baborage gyene, cane lui bine cämérange ime ca yoogärenine. ¹² Yoo, pui biname lui cina weebibine giri jicranininisi tääpe cabu cewecu ne acatename, teepi singi gemi biname bine ngenecu miiji me wawenname teeme täápume, ingle teepi wälu gemi egä pama mäpu ne jääpänusi poto biname bime bau ca, liba Israela biname bime mule yaabmalusi piyepu mene jaajanemusi egä cewecu ngänu gyene, ingle Keriso te budre äbituji baarge uli cabu mime niya mule bine äyeb Benga. ¹³ Lui cina puu cewecu itu ewademujisi tääpe iirputa ca, teepi lica Cotre Mene bine jaawenemusi. Teepi singi gemi weene pui yepä mule taatu wawenname, piba teepi miiji gemi teemämu awepyeräja egä, “Cine te Israela biname pana me tewenimumesi teebibine.” ¹⁴ Yepä, cane te singi lica pepu awepyeräja täápume. Cane singi gäne mime Yageyame Yeesu Keriso me ngii awepentame, tabe lipu budre äbituji baarge uli cabu mime täápume. Iyeta cäme ngene atwanena lui teeme cabu, peei name pi ai gawecewe me mule piyepu gwidape cäme täápume papa gemi. Epu pana budre biname liyepu lui nuuja singi lica birige gawecewe gwidape täápume, peei mule piyepu gwidape baborage lica gemi cäme täápume. ¹⁵ Yoo, lui biname cina tääpe cabu cewecu ne ituge acata, coo lui cina lica ituge acata, teepi nuuja mara lica gemi, ingle peei cewecu lui babo gwidape lica birige. Agesa babo gwidape: Biname te kirece ireclota ne ätrunga ca yaacatuge Acejiyame bau ca. ¹⁶ Laati te yäacwetnuge ai gaabe ne teeme ireclota cabu, poode piyepu owecu teeme cabu lenaja. Cane pepu ewejanenine iyeta Acejiyame me biname bime täápume. Teepi temi Acejiyame me toraca Israela biname.

¹⁷ Yoo siige, epu pana aletnäneji kaakesea biname teeme yageyame me cewecu lipu pisi nyene teeme tääpe cabu, cuta cäme tääpe cabu dupe ngabu piti nemi, ingle biname cina cebine naglumesi, cane liba Miiji Mene cäme Yageyame Yeesu poto cidi me jaajanemune. Peei name pi ingwe ca gone nuuja biname te cebine cääri mäpu näcäruge!

¹⁸ Cäme ätrunga binamewale, mime Yageyame Yeesu Keriso me miiji te weeme seemo bime cabu lenajame. Yoo siige, pepu yaanajepi!

Cane ngii Paulo. Siige cäme mene ngälu peese.

PAULO ME LETA EPESO ÄTRUNGA BINAME BIME BAU ME

¹ Cane, Paulo, Yeesu Keriso me ätyepäneji biname gäne Acejiyame me singi miji pi. Cane yoogärenine Acejiyame me binamewale bime bau me Epeso cewe je, lui cina toraca ngenecu cama iyeta padare cabu Keriso Yeesu cabu inajininuge. ² Acejiyame mime Babe piyepu Yageyame Yeesu Keriso, teeme miiji te lenajame weeme cabu piyepu teepi poode ceerame weebibine.

Keriso Mime Seemo bine Miiji Jewenenemige

³ Mine eso yääcäranesi Acejiyame ne, lui gyene mime Yageyame Yeesu Keriso me Acejiyame piyepu Babe. Ingle naace popi mine Keriso cama yepä gemi, tabe ituge mibibine miiji wawena mime seemo ireclota cabu iyeta maramara mule ca cabucewe ca lui cina totneninisi. ⁴ Keriso cama yepä äbita miji pi Acejiyame te agedna me niinäce gaabe ca uja itu ngene ca niglinuji mibibine teeme bāgrā tāapume lenajame ingle Yeesu Keriso me kaakesea miji pi. Ai lui teeme singi ge, teebine ngenecu miiji me jewenuji. ⁶ Siige mine Acejiyame ne yaawepyeräjesi teeme babo owecu name pi, tabe lipu teeme ngenecurage Bāgrā papa itu nicärininuji, daremu cāco. ⁷ Keriso me uudi te lipu itu tapiruji, mime niyya mule daremu ne ecatuji, siige Acejiyame te mime niyya mule niisibrecājimuge. Lipu baborage gyene Acejiyame me owecu, ⁸ tabe lui ne ituge aboclomāja mime tāapume.

Ingle Acejiyame babo umle gyene iyeta mule poto cidi me, ⁹ tabe jewenuji tabe ngena tāapume ngene itu jotwanuji waweneme. Tabe teeme ogā ngene atwana ne seboclomtuji cime tāapume, tabe lui poto cidi me ngene uja jotwanuji toraca me waweneme Keriso cabu ca. ¹⁰ Acejiyame me pui ogā ngene atwana, tabe lui ne toraca me cire jaawenepi toracarage padare cabu, apu gyene egā tabe lui gwidape bine ituge wawenetnäja cabucewe piyepu gawecewe je, tabe pui bine iyeta cire jaawenemepi yepä me äbitame piyepu Keriso teeme mope biname me lenajame.

¹¹ Acejiyame lui te iyeta gwidape bine teeme ngene atwanena piyepu singi ibi jaawenimuge, tabe te mibibine nijärininuji teeme binamewale tāapume lenajame ingle Keriso cama yepä äbita name pi. Tabe ujarage ngene jotwanuji apu waweneme, ingle ai lui teeme singi ge. ¹² Peei name pi cine lui cina niinäce biname gemi ngene atwanena singi Keriso cabu me acraname, cine Acejiyame ne yaawepyeräjesi, egā tabe lipu miijirage gyene.

¹³ Cuta weene piyepu liba itecijinuji toraca mene, peei Miiji Mene lui te ireclota ne secanuji weeme bau me, weene piba ätrunga ne ecitujiye Keriso bau me. Piba Acejiyame ecituji Aceji Seemo ne weeme cabu me cewecu tāapume, egā weene teemi nemi, tabe lipu ituge jaji waweneme. ¹⁴ Ingle Aceji Seemo pisi nyene mime cabu, peei name pi mine umle gemi egā mine cirege päpäna, Acejiyame ngena ituge jaji teeme bāgrāwale bine ceerame. Ai te niwabininige, egā Acejiyame te iyeta mäpu cabu ca kālyä cirege wawena pui biname bine, lui cina teemi nemi. Mine teebine yaawepyeräjesi teeme miiji name pi!

Irecu Ätumuta Mene Acnema Biname bime tāapume

¹⁵ Cane liba nätecijepi, egā weene Yageyame Yeesu ne jitrunge-nyie, cuta piyepu weene singi gemi iyeta Acejiyame me binamewale bime tāapume, ¹⁶ cane lica ituge ätecita Acejiyame ne eso ceeraname weeme poto cidi me. Cāme irecu ätumuta ngalebora cane weeme poto cidi me jaajanane mune, ¹⁷ cane yäätinärune mime Yageyame Yeesu Keriso me Acejiyame, jamyacu apacyera cama Babe ne tabe weebibine eei Seemo ceerame, lui Seemo te weebibine umle biname me jiwenininuge piyepu Acejiyame ne weeme bau me yaaboclomtuge, siige weene piba umle läbitininuye tabe. ¹⁸ Cane irecu lätumutanune, egā Acejiyame te weeme mopemuli apatname teeme apacyera ne päpäna tāapume, piba weene umle läbitininuye, egā ngena cabu me tabe weebibine ituge ala asogleca weene weeme ngene atwanena singi bine acraname; piyepu cuta lipu bucurage miijimiji mule poto cidi me tabe ituge teeme bāgrāwale bine jaji teepi teeme bau ca päpäname; ¹⁹ piyepu cuta lipu baborage gyene teeme kokre, lui te kaakesea äbitenige mine ätrunga biname bime cabu. Ai lui pui yepä baborage kokre gyene, ²⁰ lui ca Acejiyame te Keriso ne itu erpinantuji budre cabu ca, siige ecanuji cabucewe me, ecituji teeme camu poto cidi me. ²¹ Tabe caburage gyene iyeta seemo bime bau ca, cabu je lui cina mopeyame gemi piyepu kokreyame gemi. Teeme ngii baborage gyene iyeta ngii cabu ca ai gawecewe cabu je. Cuta ciige padare cabu teeme ngii te baborage cire saanajepi. ²² Acejiyame te iyeta gwidape bine teeme

ernge gawe me ituge acrana, piiyepu tabe ätrunga biname bine Keriso itu yääcärempi tabe teeme mope biname me lenajame. ²³ Ätrunga biname lui Yeesu Keriso me tääpe gemi. Teepi te Keriso ne camlecamle me jewenenisi. Cuta tabe te iyeta gwidape bine iyeta poto ta camlecamle me jewenenemige.

2

Budre cabu ca Ireclota me

¹ Padare puga ge, weene liba seemo ireclota cabu budre ge ingle weeme niyaniya mule piiyepu ätecija cäco mule name pi. ² Pui padare cabu weene icwetnimujiye ai gawecewe me niyaniya mule bine; weene jitecijujiye laasi nyene mopeyame niyaniya seemo bime täापume, lui cina buuwemope cabu otnenininisi. Tabe eei seemo gyene, page lui te ewadenemige Acejiyame ne lui biname cina lica birige ätecija. ³ Niinäce mine iyeta pepu ituge lenaja, ätecija cäco. Mine biname bime singsingi mule bine icwetnimujisi. Mine jewenimujisi mime tääpe cina piiyepu ngena atwanena cina ngena täापume singi. Peei name pi Acejiyame me claabe te pui padare cabu piba enajuji mime täापume, eei biname bime täापume lipu page enajenige, lui cina camu binamerage bime singsingi mule bine icwetnenemisi.

⁴ Yepä Acejiyame epu baborage owecu ge piiyepu singi ge mime täापume, ⁵ egä mibibine, lui cina mime niya mule cabu budre ge, tabe ireclota me niweninuji Keriso me cabu ca. Peei lui teeme owecu name pi egä Acejiyame te weebibine ituge äsecerera niya cabu ca. ⁶ Ingle mine Keriso Yeesu cama yepä gemi, pui name pi Acejiyame te mibibine ituge ten cama budre cabu ca arpineräja naace täापume mine ten cama iyeta gwidape bine waadename cabucewe je. ⁷ Acejiyame ai ne naace täापume ituge wawena iyeta biname cina iyeta padare cabu päpäname teeme babo miiirage ätityera ne, tabe lipu teeme singi ne seboclomtuji mime täापume Keriso Yeesu cabu ca. ⁸ Ingle Acejiyame babo singi gyene ätityerame, tabe weebibine niya cabu ca itu isecrärinuji ingle weeme ätrunga name pi. Ai lui wemiji wawenäjeji lica gyene, yepä Acejiyame me owecu gyene weeme täापume. ⁹ Ai lui weeme kaakesea daremu lica gyene, peei name pi nuuja te äblicäco teemämu awepeyeräja. ¹⁰ Acejiyame te niwenininuji page mine lipu gemi. Tabe itu niwenininuji mine Keriso Yeesu cama lenajame siige miiirage kaakesea wawename, tabe lui kaakesea ituge amactnäja mime täापume.

Keriso me Binamewale Ten cama Yepä Gemi

¹¹ Weene Israela biname bime cabu ca ärngecäneji lica gemi, piiyepu Israela biname, lui cina laininunisi tääpe iirputäneji biname ca,* teepi weebibine iyininunisi tääpe iirputa cäco biname ca. Weene gone ngena jitrimalinuge, weene lipu biname ge niinäce. ¹² Weene cude padare ge Keriso bau ca, piiyepu weene cude padare ge Israela biname bime bau ca, Acejiyame lui bine jejäcimuji teeme biname me. Jajeji mene Acejiyame lui ecäremuji Israela biname bine, pui lui weeme täापume lica ge. Weene Acejiyame umle cäco inajininuji, piiyepu weene nuuja ngena atwana lica ge, egä weene lipulipu miji ne päpäname. ¹³ Pui padare cabu weene cude padare ge Acejiyame bau ca, yepä page weene lipu Keriso Yeesu cama yepä gemi, weebibine Acejiyame bau me ituge waadena, ingle barge uli cabu Keriso me uudi te tapiruji Acejiyame ne iiwärejame weeme niya mule äciseja täापume.

¹⁴⁻¹⁵ Siige Keriso taberage te poode ne secituji mime täापume, cine Israela biname piiyepu weene nuuja biname, tabe lipu niwenininuji mine yepä me äbitame. Mine niinäce claabeclabe ninajininuji, ingle weene lica icwetnimujiye cime Israela biname bime cotre bine, lui cotre cina birige jaji biname cina ngena wawename. Pui Cotre lui atreji pana ge, mibibine maramara me niwenininuji. Yepä Keriso me budre te pui Cotre ne iyehlingtuji naace täापume cine Israela biname piiyepu weene nuuja biname mine yepä äbitame ten cama kirece ingle wawename. Ai mule ca tabe poode ne secituji mine neeneni maramara sigu biname bime täापume. ¹⁶ Tabe lipu budre äbituji barge uli cabu, siige mime claabe mule bine peega epremalemuji. Tabe teeme budre ca niwenininuji yepä me, siige niwecnininuji Acejiyame bau me. ¹⁷ Pipu pi Keriso täduji, poode mene secanuji iyeta biname bime täापume: cine Israela biname täापume, lui cina Acejiyame gome jage piiyepu weene nuuja biname täापume, lui cina niinäce cude padare ge teeme bau ca. ¹⁸ Keriso me kaakesea miji pi cine Israela biname, weene nuuja biname, mine iyeta ibibi gemi yepä Seemo me ätityera ca Babe bau me otnime.

* **2:11:** tääpe iirputäneji biname: Israela biname bime mule apu egä imäbägrä te liba laplimluge, eit bimu ingwe gaabe ca teeme imäbägrä bime gwidape cabu ca matikäli tääpe jiiirputusi. Ai tääpe iirputa lui cewecu gyene, Acejiyame lui ecärimuji Israela biname bine, egä teepi teeme biname gemi.

¹⁹ Siige page weene catecewe biname coo idne cewe biname lica gemi, yepä weene Acejiyame me binamewale cama yepä gemi, teeme ingle cabu inajininige. ²⁰ Weene uli gemi Acejiyame me mete raranga täápume. Caage lui Keriso me ätyepäneji biname piyepu sasa menameyame biname gemi. Cunäcäpu caage lui Keriso sine. ²¹ Tabe te iyeta ai caage piyepu uli bine jitwetnecäjenemige naace täápume mete me äbitame, Acejiyame täápume lui mete te mara me äbitenige. ²² Weene liba Keriso cabu inajininuge, Aceji Seemo te cuta weebibine jitwetnecäjininuge poto biname cama mete ne awejengtame, Acejiyame te luma enajenige.

3

Keriso me Ätyepäneji Biname me Kaakesea

¹ Acejiyame te lipu Israela biname piyepu nuuja gawe biname bine yepä me ituge wawena, cane Paulo te pui name pi irecu ätumutenine weeme täápume, lui Israela biname lica gemi. Cane krokeciye mete cabu säne, ingle cane Keriso Yeesu me kaakesea ne jaawenune weeme miiji täápume. ² Weene ituge ätecija Acejiyame lipu miiji ge căme täápume, siige ai kaakesea năcäruji cane te wawename weeme miiji täápume. ³ Acejiyame te sebo-clomtuji teeme ogä ngene atwanena ne, siige cebine umle nawenuji. Cane ai leta cabu matikäli uja bii byoogärine pui poto cidi me. ⁴ Weene liba pecnepeye, weene umle päbitipeye, egä cane toraca umle gäne Acejiyame me ogä ngene atwanena Keriso poto cidi me. ⁵ Niinäce padare cabu biname bine umle lica ituge wawena pui poto cidi me, yepä page siige Aceji Seemo te umle itu jaawenemepi Keriso me ätyepäneji biname piyepu Acejiyame me mename biname bine, lui cina teeme ireclota yaacranepesi Acejiyame me kaakesea wawename. ⁶ Pui ogä ngene atwanena lui naace gyene, egä laati bemi Israela biname lica, teepi liba yaacatusi Miiji Mene ne Yeesu Keriso poto cidi me, teepi piba yaawadimusi cine Israela biname cama yepä Acejiyame ngena ceera teeme bägräwale bine. Teepi Israela biname cama yepä birige, siige gigrä yaawadimusi Acejiyame ngena ituge jaji Keriso Yeesu cabu ca ceerame.

⁷ Acejiyame te cebine nawenuji Miiji Mene acenename, siige teeme kokre ne secituji căme cabu kaakesea wawename piyepu cebine umle ceerame ai kaakesea täápume. ⁸ Cane puu matikolärage gäne iyeta Acejiyame me binamewale bau ca, yepä tabe miiji mule nawenuji, năcäruji ai kaakesea cane Miiji Mene Keriso me ngälu căco dogwe poto cidi me jajanename biname bine, lui Israela biname lica gemi. ⁹ Căme kaakesea gyene iyeta biname bine umle wawename, egä Acejiyame me ogä ngene atwana te toraca me lipu cirege äbita. Acejiyame lui iyeta gwidape bine itu jewenimuji, tabe ai ne niinäce lui padare cabu imlituji. ¹⁰ Tabe naace täápume imlituji, mope mename seemo cina piyepu cabu je lui teeme pana kokreyame gemi, teepi ai padare cabu ätrunga ingle biname bime cabu ca umle äbitame, egä Acejiyame me umle lipu baborage gyene. ¹¹ Acejiyame te ai ne jewenuji teeme ngene atwana ibi, teeme lui puga ge padare me niinäce gaabe me, tabe lui ne toraca me jewenuji mime Yageyame Yeesu Keriso cabu ca. ¹² Mine liba Keriso cama yepä gemi, piyepu teebine jitrungenisi, mine siige temiji pi ajiri wälu căco nacluge Acejiyame bau me. ¹³ Peei name pi cane jjenininine, weene ngenecu mäpu gone, egä cane weeme täápume aga mäpu cabu nanajinige. Căme ai mäpu te weeme miiji täápume äbitenige.

Paulo Irecu Ätumutenige Epeso Biname bime täápume

¹⁴ Cane liba ngene jotwananenine Aceji Babe te lipulipu biname bine awecna teeme bau me, cane kokorare ca ääpednutenine teeme opo gaabe je. ¹⁵ Tabe lui toraca Babe gyene. Tabe lui iyeta ingle bime Acejiyame gyene lui cabucewe je coo piyepu gawecewe cabu je. ¹⁶ Cane irecu ätumutenine Acejiyame bau me, egä teeme bucurage mijimiji mule cabu ca Aceji Seemo te weebibine kokre ceerame naace täápume weene piba ngenecu kokre cama lenajame. ¹⁷ Piyepu cane irecu ätumutenine, egä weeme ätrunga ca Keriso te lenajame weeme cabu. Piyepu cuta cane irecu ätumutenine, egä weene iyeta gwidape naace popi wawename, ingle weeme singi pisi nyene Acejiyame piyepu biname bime täápume. ¹⁸ Piba weene Acejiyame me binamewale cama ibibi birige cängena umle äbitame, Yeesu me singi luma ngälu leca gyene, luma ngälu daamle gyene, luma ngälu caburage gyene, lipu uugle gyene; ¹⁹ cuta weene teeme peei singi cabu lenajame, ngänu gyene weeme ngene atwana tuube gemi iyeta teeme peei singi ne oomlaname, siige weene piba cängena Acejiyame pana läbitininuye iyeta weeme ireclota cabu.

²⁰ Acejiyame me kokre lui te mime cabu kaakesea jaawenuge, tabe pui kokre ca miiji gyene baborage wawena, mine lui täápume yäätinärusi coo ngene jwaatwananinusi ätinerame. ²¹ Mine lui cina ätrunga ingle biname gemi piyepu Keriso Yeesu cama yepä gemi, mine teebine yaawepyeräjesi, yepä padare me biname cina cuta nuuja padare me biname cina, iyeteta. Ai mene toraca gyene.

4

Ätrunga Biname Miiji Yepä

¹ Cane lui te krokeciye mete cabu nanajinige, ingle cane Yageyame me kaakesea jaawenune, cane jijenininine weene epu lenajame, Acejiyame lipu ituge jaji, tabe liba weebibine ala tisoglicinuji. ² Mope modamoda me gone läbitininuye, miiji owelaamelame piiyepu cängena lenaja. Worämu te gone iglinuge weeme poto biname bime mule name pi, yepä weene miiji weemämu singi äbitanipeye. ³ Acejiyame me Seemo te icäraninuge poode. Peei poode te jiwenininuge yepä äbitame, siige weene kokre äbitapeye yepä lenajame. ⁴ Tääpe yepä gyene, Seemo yepä gyene epu pana, yepä taatu gwidape lipu pisi nyene Acejiyame lui cabu ituge ala asogleca weene ngene atwana singi acraname. ⁵ Yepä taatu Yageyame gyene, yepä taatu ätrunga gyene, yepä taatu biname gyene lui me ngii cabu biname bine niie ca jääcisäjemus. ⁶ Yepä taatu Acejiyame gyene, lui sine iyeta biname bime Babe. Tabe iyeta biname bine yaawadimuge, teeme cabu kaakesea jaawenuge piiyepu teeme cabu yaanajuge.

⁷ Keriso mine yepäyepä bine kokre itu nicäranipi maramara kaakesea wawenetnäjame. Mine teeme baborage kokre cabu ca maramara pargi bine ituge waadenena. ⁸ Oogäräneji mene te ai poto cidi me jiccenige egä,

“Tabe äduji caburage me,

teeme cubuyame bine ätäyäneji ewadimuji ten cama.

Tabe biname bine owecu gwidape ecäranemuji.”

⁹ Ai mene egä “Tabe caburage me äduji” jewabenige, egä tabe niinäce ituge gawe cabu me äina. ¹⁰ Siige lui te täinuji gawe me, tabe peese nyene, lui te äduji cabu me, iyeta caburage puupu bime cabu me naace tääpume tabe piba iyeta poto ta lenajame iyeta gwidape cabu. ¹¹ Peei lui tabe sine, lui te “biname bine owecu gwidape ecäranemuji.” Pui owecu gwidape lui naace myene, egä tabe kokre ecäranemuji teepi maramara kaakesea wawenecame. Tabe poto bine jewenimuji teeme ätjepäneji biname me, poto bine jewenimuji Acejiyame me tagepogogo mene iicemame, poto bine Miiji Mene acenename iyeta poto ta, poto bine ätrunga ingle mope biname me lenajame piiyepu teebibine abiberäjäme. ¹² Tabe ai ne naace name pi jewenuji Acejiyame me binamewale bine amacetnäjame teepi kaakesea wawename naace tääpume ätrunga biname, lui Keriso me tääpe gemi, teebibine kokre wawename. ¹³ Ciige mine iyeta piba yepä me läbitininago yepä ätrunga cabu ca piiyepu eei cabu ca, egä mine umle gemi Acejiyame me Bägrä. Mine modamoda biname bime ngene atwanena cama ninajininuge, epu pana Yeesu lipu enajuji. ¹⁴ Ingwe ca piba mine bägrä bime pana lica gemi, lui bine angletneja biname bime maramara abiberäjä cina yaawedanemus buuwe pana coo malu pana. Pui angletneja biname cina lui teeme walya mene ca poto bine yaangletnäjemusi conocono gaabe cabu otnime. ¹⁵ Mine pätä miiji biname bine jajanena ngena gyene toraca piiyepu mine miiji mimemime singi lenaja, piba mine läbitininago iyeta mule cabu Keriso cama yepä äbitame, lui sine ätrunga biname bime mopeyame. ¹⁶ Tabe liba mope yaanajuge, tääpe me maramara piicwa teemerage puupu cabu lacranuge, piiyepu piicwa maramara cina yepä mage ne jaawenusi, umeli cina liba teebibine yaatengecäjimus. Siige iyeta maramara piicwa liba teeme kaakesea jaawenusi, teepi lipu miiji birige wawena, piba tääpe te cängenarage luutuge, kokre me läbituge, piicwa bime singi te liba teemeteme babo läbituge.

Yeesu cabu Lui Kirece Ireclota Gyene

¹⁷ Mime Yageyame me ngii cabu cane jijenininine weebibine umle wawename, egä ingwe ca gone cääri lenaja Acejiyame umle cäco biname pana, lui cina papa gwidape poto cidi me ngene jwaatwananinusi, ¹⁸ piiyepu lui bime momemuli cabu krokeciye birige. Teepi cude padare gemi ireclota cabu ca, Acejiyame te lui ireclota ceera, ingle teepi umle cäco piiyepu ätecija cäco gemi. ¹⁹ Nuuja gwidape te äblicäco teebibine ajiri me wawena. Teepi nuuja gwidape wawena tääpume singi lica yepä sice buduma äbitename piiyepu sargi ero mule wawenecame. Teepi ätecita cäco iyeta jugijugi mule bine jaawenimus. ²⁰ Yepä weene Keriso bau ca pepu mule lica itu labiberäjipeye. ²¹ Egäsu weene itu itecijipi teeme poto cidi me, piiyepu ingle weene teeme ingwe äcwi biname gemi, peei name pi weebibine ituge abiberäjä toraca mene poto cidi me, Yeesu cabu lui pisi nyene. ²² Peei name pi weene miiji weeme sasa ngene atwanena bine abmaläcemame, lui cina jiweninujisi epu lenajame, weene lipu niinäce ituge. Pui sasa ngene atwanena bine teemerage angletneja singisingi cina sabe jaawenimus. ²³ Weene pätä miiji kirece singi piiyepu kirece ngene atwana cama lenaja. ²⁴ Weene miiji kirece muleyame biname me äbitame, Acejiyame lui bine ituge wawena teeme pana me naace tääpume weene toraca conocäco lenajame piiyepu Acejiyame tääpume mara me äbitame.

²⁵ Peei name pi ingwe ca walya mene gone otrometrnäja, yepä toraca mene ajanipeye weemämu, ingle naace popi mine iyeta piicwa gemi Keriso me tääpe cabu. ²⁶ Weene liba claabe läbitininuye, peei claabe te gone iwadininuge niia mule wawename. Weene niinäce claabe cabu ca etecrutepeye, ingwe ca bimute piba läpulepi. ²⁷ Gone Satani ne padare yääcärüye tabe weebibine angletnejame niia mule wawename. ²⁸ Laati te läbituge gwidape ero me, tabe miiji peei mule ne abmala, gije abacita kaakesa wawename teeme lenaja täapume piyepu owecumete biname bine ätityerame. ²⁹ Gone niia mene iicana, yepä epu mene jicemuye, lui te miiji gyene biname bine ätityerame teeme ngena singi pisi nyene, siige piba weeme mene te ngenecu miiji me jaawenimuge laatibi yäätecijemuge. ³⁰ Piyepu gone Aceji Seemo ne ngenecu mäpu me jaawenuye, ingle tabe lui cewecu gyene, egä weene Acejiyame memi. Tabe klaje jiwenininuge weebibine naace täapume Acejiyame te weebibine kälyä wawename iyeta mäpu cabu ca, peei bimute liba cire tädepi. ³¹ Gone niianiya ngena jwaatwananinuye poto biname bime poto cidi me. Gone claabe te weebibine ätucera, ämugetna gone. Drämä gone piyepu niia mene gone biname bine jaji, coo poto claabeclabe mule gone. ³² Weene pätä miiji weemeweme owelaamelame lenaja piyepu owecu cama. Piyepu weene miiji weemeweme niia mule ngena ätrimela, Acejiyame te lipu weeme niia mule bine itu yäyebhengemepi Keriso name pi.

5

Apaclyera cabu Miiji Lenaja

¹ Ingle weene Acejiyame me ngenecurage bägrä gemi, weene miiji äbitipeye teeme pana lenajame. ² Weene weemämu singi äbitanipeye, epu pana Keriso lipu singi mime täapume, siige teeme ireclota ne iyemaluji mime täapume. Teeme ireclota epu pana ge owecu gwidape Acejiyame ne ceerame coo piyepu miijirage gwidape lui ca yiiwärajusi Acejiyame ne teebine ngenecu miiji me wawename. ³ Weene gone nuuja biname täapume singi äbita liba määme coga coo rooriye lica teta cama sargi mule wawename; cuta iyeta jugijugi mule wawena gone. Piyepu weene gone singi ädri nuuja gwidape coo mule poto cidi me. Ai mule bine gone waweneca, cuta apu mule poto cidi me gone iicema, ingle weene Acejiyame me binamewale gemi. ⁴ Gone iicetneja ajiri mule poto cidi me, niyarage ceepe gone coo nuuja budubuduma mene gone iicetneja, yepä weene pätä miiji Acejiyame ne awepyeräja. ⁵ Weene miiji umle äbita, egä lui te sargi mule jaawenuge coo lui te nuuja jugijugi mule jaawenuge, tabe lica läbituge biname me Keriso piyepu Acejiyame lui ne yaacanäsi. Singi ädri biname te cuta äblicäco pepu biname me äbita, ingle tabe lui täapume singi yäädruge, pui te yaacatuge Acejiyame me puupu ne teeme ireclota ngalebora.

⁶ Gone ire taatu jaacituye nuuja biname te weebibine budubuduma mene ca angletnejame, ingle apurage mule name pi Acejiyame te pagege claabe me äbita, lui cina teebine lica jäätecijusi. ⁷ Peei name pi pipu biname cama gone abasuta. ⁸ Niinäce weene krokeciye cabu jage, yepä page weene siige apaclyera cabu temi, ingle weene mime Yageyame memi. Weene miiji epu lenaja, apaclyera cabu biname cina lipu yaacrajuge, ⁹ ingle apaclyera luma, puma miijimiji mule, conocäco mule piyepu toraca mule piti nemi. ¹⁰ Weene miiji äbitipeye abiberäjame, egä ngena te Yageyame ne ngenecu miiji me jaawenuge. ¹¹ Weene gone krokeciye mule cabu abasutana, lui cabu ca nuuja miiji ne lica päpäna, weene pätä apaclyera cabu me pepu mule bine isemepeye. ¹² Teepe lui mule bine jaawenimusi krokeciye cabu, babo ajiri cama mule gemi, lica wawena taatu cuta iicema piyepu ajiri cama gyene. ¹³ Yepä iyeta mule bine liba apaclyera cabu me yaawadimusi, siige apaclyera te jaawabudne-muge, lipu mule gemi; piyepu apaclyera te liba krokeciye ne yaapaclyäruge, siige apaclyera me läbituge. ¹⁴ Peei name pi apu ituge iicana egä,

“Arpinanti ute cabu ca,
alotnanti budre cabu ca,
piba Keriso te meebine naapaclyäruge.”

¹⁵ Pipu pi weene miiji ire, egä weene lipulipu inajininuge. Weene miiji cängena lenaja lica budubuduma. ¹⁶ Weene liba padare ne jääpänyue miiji mule wawename, weene jewenepeye, ingle ai bimute cina niiyarage gemi. ¹⁷ Peei name pi weene buduma gone lenaja, yepä umle äbitipeye, Acejiyame me singi ngena gyene.

¹⁸ Weene sice buduma gone läbitininuye, ingle weeme ireclota ne sabe jaawenuge, Aceji Seemo te pätä miiji weeme cabu babo äbitame. ¹⁹ Weene weemeweme etangemepeye salamo uupera bine, poto irecu ätumuta uupera bine piyepu Aceji Seemo te ngena uupera icärininuge. Weene weeme iyeta ngenecu cama uupera bine piyepu salamo bine etangemepeye Yageyame täapume teebine awepyeräjame. ²⁰ Weene miiji eso ceeraname Aceji Babe ne iyeta padare cabu iyeta gwidape poto cidi me mime Yageyame Yeesu Keriso me ngii cabu.

Mene Coga Rooriye bime tääpume

²¹ Weene miiji weemeweme ätecijana, ingle Keriso lui weeme Yageyame gyene. ²² Coga cina miiji rooriye bine ätecija, teepi lipu Yageyame ne jäätecijusi, ²³ ingle rooriye sine mope biname coga tääpume epu pana, Keriso lipu mope biname ge ätrunga ingle biname bime tääpume. Tabe peese nyene, lui te niyya cabu ca ituge äsecrera ätrunga ingle biname bime, lui gemi teeme tääpe. ²⁴ Peei name pi ätrunga ingle biname cina lipu Keriso ne jäätecijusi, coga te miiji teeme rooriye ne iyeta mule cabu pepu ätecija.

²⁵ Piiyepu rooriye cina miiji teeme coga bime tääpume singi epu pana, Keriso lipu singi ätrunga ingle biname bime tääpume, siige teeme ireclota ne iyemaluji teeme tääpume. ²⁶ Tabe ai ne naace tääpume jewenuji teebibine mara me wawename Acejiyame tääpume Miiji Mene abiberäja ca, niyye ca liba teebibine niinäce jugi cäco ituge äciseja. ²⁷ Tabe singi ge ätrunga ingle biname cina teeme tääpume lenaja teeme Keriso me miijirage jamyacu cama, jugi cäco, epucäco. Teeme cabu nuuja pläpu coo acalomla lica gyene, coo nuuja pepuyame.

²⁸ Yoo, rooriye cina miiji singi teeme coga bime tääpume, teepi lipu singi teemerage tääpe tääpume. Rooriye te liba singi teeme coga tääpume, pui lui tabe cuta singi birige teeme tääpume, ingle teepi yepä gegi. ²⁹ Nata nuuja te lica teeme tääpe ne ägyi, yepä cängenarage deedei yääcارانuge, ire jaatwuge, Keriso lipu ätru-nga ingle biname bime cängena ire jaatwemuge. ³⁰ Mine umle gemi ai potu cidi me, ingle mine teeme tääpe me piicwa gemi. ³¹ Oogäräneji mene te jüicenige egä, “Yoo, rooriye te miiji teeme mage babe bine abmala coga cama atejäclmutame, siige teepi yepä me läbitäsi.” ³² Ai mene te baborage gwidape ne eboclomtenige. Cane ngene ca begline, egä ai mene lui Keriso piiyepu ätrunga ingle biname bime potu cidi me. ³³ Yepä ai mene cuta weeme tääpu myene. Rooriye cina, weene miiji singi weeme coga bime tääpume, weene lipu singi weeme tääpume. Coga cina, weene cuta miiji weeme rooriye bine ätecija.

6

Mene Bägrä piiyepu Mage Babe bime tääpume

¹ Bägrä, weene miiji weeme mage babe bine ätecija, ingle ai lui conocäco mule gyene. ² “Weene miiji mage babe bine opo gaabe me acrana.” Ai lui niinäcerage cotre gyene ten cotre cabu ca, Acejiyame te lui cama mene ecituji egä, ³ “Piba iyeta gwidape cina miijirage yaacluge weene cama, piiyepu weene lecaleca ireclota ne jääpänuye ai gawecewe cabu.”

⁴ Mage babe, weene gone bägrä bine epu mule ca ire atwi, lui te teebibine claabe me jaawenimuge. Yepä weene teebibine yaabiberäjimuye teepi cängena lenajame piiyepu yaablawäjemuye Yageyame me singi ibi.

Mene Aletnäneji Biname piiyepu Teeme Modamoda Biname bime tääpume

⁵ Aletnäneji biname, weene miiji weeme modamoda biname bine toraca ngenecu cama, wälu cama ätecija. Weene peei ne yepä ngene atwana cama jeweneye, epu pana Keriso ne lipu jäätecijuye yepä ngene atwana cama. ⁶ Weene teeme irewale taatu cabu gone apu äbitena naace name pi teepi piba ngenecu miiji cama lenajame weeme tääpume. Yepä weene miiji iyeta weeme ngenecu ca wawena, Acejiyame ngena tääpume singi, ingle weene Keriso me aletnäneji biname gemi. ⁷ Weene gege cama weeme kaakesea jaawenuye, epu pana egä weene biname bime tääpume taatu lica jaawenuye, yepä weene cuta Yageyame tääpume jaawenuye. ⁸ Gone ngene ätrimela, egä biname bime miijirage kaakesea name pi Yageyame te daremu yääcارانemuge, ngänu gyene teepi aletnäneji biname coo nuuja biname.

⁹ Modamoda biname, weene cuta pepu miiji weeme aletnäneji biname bine cängena ire atwime. Weene cerämu opo cabu gone yäärmäjimuye. Weene gone ngene ätrimela, egä weene piiyepu weeme kaakesea bägrä weeme yepä Yageyame gyene cabucewe je, lui te iyeta biname bine yepä ibi cire jitraniipi.

Ngena Gwidape ca Cubu Iicaname Niiyaniya Cable cama

¹⁰ Yoo siige, weene kokre äbitipeye Yageyame miiji ba-borage kokre ca piiyepu ten cama lenaja name pi! ¹¹ Cubu gwidape iyeta asi-gräripeye Acejiyame te lui icärininuge, piba weene lica itrametninuge Satani me angletneja cabu. ¹² Mine bi-namerage cama cubu lica jüicenisi, yepä mine cubu jii-cenisi niiyaniya cable cama, lui cina mopeyame gemi, pii-yepu lui cina kokreyame gemi, cuta lui cina ai gawe-cewe ne ecanenisi ai krokeciyye padare cabu piiyepu cuta buuwemope cabu lui cina otneninisi. ¹³ Peei name pi cubu gwidape asigräripeye, Acejiyame lui icärininuge. Niyya padare te liba täduge, weene piba ibibi birige weeme cubuyame bine daremu wawename, piiyepu cubu liba siige, weene piba camu ämyemuteji inajininuge.

¹⁴ Weene miiji iyeta padare cabu amacetnäjäneji lenajame. Acejiyame potu cidi me lui toraca mene, weene peei ne ecatepeye baagi tääpume weeme ibi cabu asigrame. Conocäco

mule ne ecateye weeme moobe tääpume dare älyengame. ¹⁵ Cuta weeme singi Miiji Mene jajaneneme poode poto cidi me lui weeme ernge gwidape gemi. ¹⁶ Weene iyeta padare cabu ätrunga ne ecateye, ime cabu lipu älyenga gwidape ne yaacenanute, siige weene peei ca yäätumimuye Satani me muye cama biigu bine. ¹⁷ Acejiyame lipu weebibine niiya cabu ca ituge äsecrera, pui lui mope älyenga gwidape gyene weeme tääpume. Acejiyame me Mene ecatepeye, Aceji Seemo lui Mene icärininuge. Peei lui weeme cubuturikä gyene. ¹⁸ Weene iyeta ai mule bine irecu ätumuta cama jaawenimuye, Acejiyame ne yaawejanuye tabe weebibine ätityerame. Iyeta padare cabu irecu lätumutanininuye, Aceji Seemo te lipu opo jiwenaninuge. Peei name pi weene gone lätecitinuye, ngänu gyene ngena te läbituge, yepä irecu lätumutanininuye iyeta padare cabu Acejiyame me iyeta binamewale bime tääpume. ¹⁹ Cäme tääpume cuta irecu ätumutanipeye, egä mene iicana padare cabu Acejiyame te ngena atwana ceerame cane piba wälu cäco biname bine umle waweneme teepi lui poto cidi me niinäce umle lica ge, egä Miiji Mene cabu pisi nyene. ²⁰ Ai Miiji Mene ne acanename Keriso te cebine nätyepuji, siige cane page age säne krokeciye mete cabu. Weene irecu ätumutanipeye, egä cane wälu cäco jajaneneme Miiji Mene, cane lipu miiji jajanena.

Paulo me Yewo Mene Epeso Biname bime tääpume

²¹ Tukikus, mime miijirage ätrunga biname gyene, mime Yageyame me kaakesea lui te toraca jewenenige, tabe pa lädepi peeyeme weeme bau me. Weene teeme cabu ca piteciijiipi iyeta, egä cane ama lipu nanajinige piiyepu ngena jewenenine. ²² Yoo, cane teebine naace tääpume jityepenine weene teeme bau ca ätecijame, egä cine iyeta lipu gemi ama piiyepu cuta tabe weebibine kokre ceerame.

²³ Acejiyame mime Babe piiyepu Yageyame Yeesu Keriso teepi iyeta ätrunga biname bine poode piiyepu singi ceerame ätrunga cama. ²⁴ Acejiyame me miiji te lenajame iyeta eei biname bime cabu je, lui cina singi mime Yageyame Yeesu Keriso tääpume apira cäco singi cama.

Cane ngii Paulo. Siige cäme mene ngälu peese.

PAULO ME LETA PILIPI ÄTRUNGA BINAME BIME BAU ME

¹ Cane Paulo säne lui te yoogärenine ai leta ne. Timoti aghesa cane cama; cine lui Yeesu Keriso me kaakesea bägrä gegi.

Aghesa căme mene iyeta Pilipi cewe ätrunga ingle biname bime bau me, weene lui cina Keriso Yeesu cabu inajininige, piyepu ai mene cuta ätrunga ingle mope biname piyepu nuuja ätityera biname bime bau me.

² Acejiyame mime Babe piyepu Yageyame Yeesu Keriso, teeme miiji te weeme cabu lenajame piyepu teepi weebibine poode ceerame.

Paulo Ireçu Ätumutige Pilipi Cewe Ätrunga Ingle Biname bime täápume

³ Iyeta padare cane liba weeme täápume ngenen jwaatwananune, cane Acejiyame ne eso yääcärune weeme täápume. ⁴ Cuta piyepu iyeta padare cane liba iyeta weeme täápume ireçu lätumutanune, cane ngenecu gege cama jaawenune, ⁵ ingle weene cebine lipu nätityäruye Miiji Mene cängena jajanenane pui bimucabu ca weene liba niinäce itu jitrungujiye ngälu page. Eso! ⁶ Yoo, cane toraca umle gäne egä Acejiyame lui te jegednuji ai miiji kaakesea ne weeme cabu, tabe cuta jewenenige ngälu teeme apira Yeesu Keriso me acnenuta bimucabu. ⁷ Weene căme ngenecurage binamewale gemi, cuta cane miiji gyene pepu asicnentame weene iyeta potocidi me, ingle weene ai miijirage kaakesea ne cane cama gigri jaawenanuye, Acejiyame lui kaakesea cebine ituge ceera page wawenane krokeciye mete cabu, cuta piyepu niinäce padare cabu, cane liba waatnetnäjepene Miiji Mene ne toraca me awabu-dnitame biname cina cängena ätrungame. ⁸ Acejiyame umle ai mene lui toraca gyene egä căme singi iyeta weeme täápume lui Yeesu Keriso me singi pana gyene.

⁹ Cane weeme täápume ireçu lätumutanune egä weeme owecu te baborage äbitame, piyepu umleumle cama egä lui mule gemi toraca conocäco, ¹⁰ naace täápume weene piba ibibi läbitinuye mule bine cängena atraname. Weene piba conocäco cirege aclajuta Keriso me acnenuta bimucabu padare cabu, ¹¹ cuta piba weeme cabu piti nemi toraca miijirage mule Yeesu Keriso taatu lui bine weeme ireclota cabu yaacranemuge, naace täápume biname cina Acejiyame ne awepyeräjame piyepu teeme jamyacu apacyera peei mule cabu päpäname.

Toraca Ireclota Aghesa Keriso me Kaakesea Wawenane

¹² Căme ätrunga binamewale, cane singi gäne weene umle äbitame egä iyeta gwidape lui cina căme bau ituge äbita, Miiji Mene te peei cabu ca babo itu läbitepi. ¹³ Siige, peei name pi iyeta awamuta biname piyepu iyeta nuuja biname lui ama, teepi umle gemi egä cane krokeciye mete cabu säne, ingle cane Keriso täápume kaakesea jewenenine. ¹⁴ Yoo, căme krokeciye mete lenaja cabu ca mime bucurage binamewale cina Yageyame cabu ngenecu kokre itu läbitipesi, siige teepi wälu căco äbitininisi Acejiyame me mene iicaname.

¹⁵ Yoo toraca, potocina mene jaajanemus Keriso potocidi me teeme niijirage asicnenta cabu ca, ingle teepi gege lica căme kaakesea lipu baborage itu läbitepi, piyepu teepi mene ca läsädaninusi. Yepä, nuuja cina asicnenta miiji cabu ca teeme mene jaajanemus. ¹⁶ Teepi miijirage singi cabu ca jaajanemus, ingle teepi umle gemi egä Acejiyame te cebine ama itu nacitepi Miiji Mene ne toraca me awabudnitame. ¹⁷ Yoo, pui asicnenta niija biname potocidi me, teepi Keriso potocidi me mene jaajanemus conocono ngenen atwanena cama. Teepi singi lica nuuja biname te awepyeräja ne päpäname, yepä teepi taatu. Teepi apu jaangemuge egä teeme peei mule cabu ca, cebine ngenecu mäpu me pa nawenepi, cane liba ama krokeciye mete cabu säne.

¹⁸ Yepä, pepu lica gyene. Cane gege gäne teeme kaakesea potocidi me, ingle cane singi gäne bucurage biname cina mene jajanena Keriso potocidi me, ngänu gyene conocono liba pisi nyene teeme mule cabu. Yoo, cane gege cama pa nanajepene, ¹⁹ ingle cane umle gäne weeme ireçu ätumuta name pi, cuta piyepu pui ätityera name pi lui tädenige Yeesu Keriso me Seemo cabu ca, cane pa lasatepene. ²⁰ Yoo, căme toraca singi aghesa căme kaakesea cängena wawenane, piyepu airage padare piyepu iyeta padare cane kokre cama wälu căco lenajame, naace täápume iyeta căme mule name pi biname cina Keriso ne awepyeräjame, căme ireclota cabu ca, coo căme budre cabu ca. ²¹ Yoo, ireclota ngena gyene? Căme täápume toraca ireclota lui Keriso gome lenajame, cuta căme budre lui abacita gaabe ten cama iyeteta lenajame. ²² Yepä, cane liba ireclota cama nanajenige căme cerämu padare piba pisi nyene teeme miiji kaakesea wawenane. Yoo, cane ngena täápume singi gäne? ²³ Căme singi neeneni gegi. Cane baborage singi ai ireclota cabu ca asatame Keriso cama iyeteta lenajame, ingle peei lui căme täápume babo miijirage gyene. ²⁴ Yepä, cane cuta singi gäne weebibine ätityerame, peei name pi căme singi gyene ireclota cama lenajame. ²⁵ Yoo,

câme ätityera pisi nyene weeme täápume, peei name pi cane umle gäne egä cane ireclota cama pa nanajepi. Cane weene cama nanajenige weebibine ätityerame weeme ätrunga babo äbitame piiyepu peei ätrunga cabu ca weene ngenecu gege äbitame. ²⁶ Yoo, cane liba weene cama pa nanajepi, weeme cuta nuuja ingle piba pagege Yeesu Keriso ne awepyeräjame teeme ätityera täápume căme bau me.

²⁷ Agha babo gwidape, weene cąngena inajininige Keriso poto cidi me Miiji Mene te lipu jiićenige. Weene piba cąngena ätrunga cama jicljutenininige, weeme ngene atwanena yepä egä iyeta weeme kokre cama weene Miiji Mene cabu cąngena ätrungame. Cane singi pepu pana mule weeme poto cidi me ätecijame, ngānu gyene cane otni weeme bau me, coo otni lica. ²⁸ Wālu gone pui biname bime täápume lui cina weebibine māpu cabu icranininusi, yepä weene miiji ngenecu kokre cama inajipi. Pepu cabu ca pui biname cina ngene ca pa yaaglepesi egä teepi te cirege apesera, yepä weene te weeme māpu cabu ca cirege äseçera, ingle Acejiyame weene cama gyene. ²⁹ Pepu cirege äbita, ingle Keriso name pi tabe weebibine miijirage padare ne ituge ceera, lica teebine ätrunga taatu me, yepä cuta teeme täápume māpu cabu lenajame. ³⁰ Yoo, weene piiyepu cane, cine yepä māpu cabu cewe oocananenago, weene lui cabu cebine ituge pāpāna, piiyepu lui cabu cane cuta page nanajenige, weene lipu itecijenininige.

2

Iyeta Biname cina Keriso ne Cire Yaawepyeräjepesi

¹ Weeme ngenecu kokre liba pisi nyene, ingle weene Keriso me singi yaacatanuye weeme ireclota mule cabu; cuta weeme ngenecu miiji liba pisi nyene, ingle weene umle gemi teeme owecu pāpāname; Aceji Seemo te weeme cabu liba enajenige; cuta piiyepu weene liba weeme nuuja bine owecu jaawenemuye; ² piba page căme gege ne babo jeweneye. Weene yepä ngene atwanena piiyepu yepä owecu cama inajinege. Yoo, weeme singi piiyepu ngenecu yepä me äbitineye. ³ Nuuja mule ne gone jaawenuye weeme taatu miiji täápume, coo weemāmu babo me äbita täápume. Nuuja biname bine niināce gaabe me icranemeye, piba weemāmu teeme ingwe gaabe me äbitineye. ⁴ Weeme nuuja biname bime miiji täápume ire cąngena, gone singi weeme taatu miiji täápume. ⁵ Weene Keriso Yeesu pana mule ne ecateye egä:

⁶ Niināce cabu ca tabe Acejiyame cama yepä ge,

yepä tabe pui Acejiyame cama ibibi ne lica noomluji.

⁷ Pui name pi tabe teeme caburage puupu ne teeme singi ca ebmaluji,

ätityera biname me äbitame biname bime täápume.

Tabe ai gawecewe biname pana äbituji, biname pana täāpe cama lenajame.

⁸ Tabe teemāmu gawe me äbituji,

Acejiyame me singi gaabe cabu otnuji,

teeme ireclota piba ecāruji baarge uli cabu me budre äbitame.

⁹ Peei name pi Acejiyame teebine ewepāntuji caburage puupu cabu me, cuta piiyepu teebine babo ngii ecāruji.

Teeme peei ngii lui baborage gyene iyeta poto ngii cabu ca.

¹⁰ Piba iyeta lui cina cabucewe je, lui cina ai gawecewe cabu je, piiyepu lui cina gawe ngalebora je,

teepi kokorare cire yāāpednāremepesi Yeesu me ngii ne awepyeräjame,

¹¹ piiyepu iyeta cina cire jiićepesi egä Yeesu Keriso lui Yageyame gyene.

Aceji Babe siige jamyacu apacıyera ne cire jāāpānepi peei cabu ca.

Weene Ngale pana Gemi Ai Gawecewe Biname bime täápume

¹² Căme ngenecurage binamewale, weene căme singi lipu itu nacatepeye, cane liba weene cama ge, yoo, cuta page căme singi mene ne weene ecateye, cane liba weene cama lica gäne. Acejiyame lui caburage gyene, peei name pi weene cąngena teeme täápume inajipi, pui mule taatu jaawenemuye lui cina iyeteta ireclota gaabe cabu weebibine iwadininusi. ¹³ Ingle naace gyene Acejiyame me kaakesea pisi nyene weeme cabu, weebibine singi piiyepu kokre ceerame teeme singi ne cąngenarage wawename.

¹⁴ Weene weeme kaakesea ngenecu miiji cama jeweneye, ācela piiyepu āciserāja căco. ¹⁵ Weene pepu Acejiyame me jamyacu bāgrā me pa äbitipeye, lui cina ibibi gemi ai gawecewe niya conocono mule biname gome epucāco conocāco lenajame. Weene miiji teeme täápume wale pana uungepmelāja teeme krokeciye ne äyeblyngtame, ¹⁶ weene liba teebibine mene jaajananemuye ireclota gaabe poto cidi me. Weene liba pepu jaawenuye, Keriso me acnenuta bimū cabu, cane piba ngenecu gege cama cire nanajepi weeme poto cidi me, ingle piba awabudnita cirege egä căme kaakesea papa me lica ituge äbita.

¹⁷ Cane gege gäne, ngänu gyene cebine liba pama budre me naglumi, siige căme uudi te tapiruge kau bime liiyepu Acejiyame ne iiwärejame. Căme uudi te piba weeme átrunga cama yepă lăduge Acejiyame bau me teebine iiwärejame. Yoo, apu liba wawena je, cane gege birige ábita, cane iyeta weene cama gege birige. ¹⁸ Piba weene cuta miiji gege lăbitininuye, weene cane cama gege lăbitininuye.

Cane Epaproditus naabi Timoti Pa Jăătyepene Weeme bau me

¹⁹ Cane căme ngene atwanena Yageyame Yesu cabu me itu yaacitepene egă cane ibibi pa lăbitepene Timoti ne weeme bau me wata átyepame, naace tăápume cane piba teeme bau ca mene păpăname weeme poto cidi me cebine ngenecu plowa me wawename. ²⁰ Căme nuuja biname lica gyene lui te cane cama yepă ngene atwanena cama gyene, piiyepu lui te toraca singi weebibine átiyterame. ²¹ Iyeta nuuja biname cina singi gemi teeme taatu miiji tăápume, lica Yesu Keriso me kaakesea tăápume. ²² Yepă, Timoti me miiji mule poto cidi me weene umle gemi. Tabe cane cama kaakesea jaawenuge, epu pana băgră te teeme babe ne lipu yăătityăruge, ingle cine singi bucurage biname cina Miiji Mene ne átrungame. ²³ Peei name pi cane singi gäne teebine weeme bau me átyepame, yepă tabe căme trămă pa yaanajepi ngălu cine umle pa lăbitipago căme tăápume lipu pa lăbitepi. ²⁴ Cane umle gäne egă Acejiyame liba singi gyene, cane cămămu mameta gäne weeme bau me otni.

²⁵ Page cane jitrănutenine mime átrunga biname Epaproditus ne weeme bau me átyepame. Tabe cane cama kaakesea cāngena jewenenige cuta cubu jiičenige Miiji Mene tăápume. Tabe weeme bau ca átyepăneji gyene cebine átiyterame. ²⁶ Tabe baborage singi gyene iyeta weebibine căări păpăname, piiyepu tabe ngenecu măpu cama gyene, ingle mene weeme bau me itu lădepi egă tabe pita cama ge. ²⁷ Toraca gyene egă tabe pita cama ge, budre mameta, yepă Acejiyame te owecu ge teeme tăápume, piiyepu owecu ge căme tăápume, peei name pi teebine miiji itu jaawenepi, peei ngenecu măpu ne căme bau ca áyeblyngtame. ²⁸ Cane peei name pi babo singi gäne teebine weeme bau me átyepame egă weene piba ngenecu gege căări pa ábitipeye, teebine liba pa jepănepeye, cuta piiyepu căme ngenecu măpu te teeme poto cidi me piba pa lăyeblyngtepi. ²⁹ Miiji weene teebine babo gege cama pa ecatepeye mime Yageyame me ngii cabu, piiyepu opo gaabe me icraneye iyeta biname bine lui cina teeme pana mule bine jaawenemusi, ³⁰ ingle tabe teeme ireclota taatu me lica ngene jotwananige, yepă mameta ge budre păpăna Keriso me kaakesea name pi. Tabe apu lăbitepi, weeme puupu ne liba yaacatepi cebine átiyterame, ingle weene pui ne áblicăco ge wawename.

3

Acejiyame Mibibine Teeme tăápume Conocăco Niwenininuge

¹ Căme átrunga binamewale, cane singi cerămu mene jajime egă weene Yageyame cabu gege inajininege. Cane gloose lica gäne gwidape poto cidi me oogărame, cane lui bime poto cidi me ituge oogăra, weene piba cāngenarage lenajame cane liba ai mene căări jijenininine. ² Cāngena ire biname bime poto cidi me lui cina niuya mule bine jaawenemusi, peei drego bime tăápume lui cina singi gemi nuuja átrunga biname bime tăape matikolă iirputame Acejiyame me cewecu acatame. Teepi walya jiičusi egă lui biname me tăape cabu cewecu lica birige, tabe áblicăco Acejiyame me biname me ábita. ³ Yepă, mine lui cina Acejiyame ne ngene jepecnăjenisi Aceji Seemo me átiytera ca, piiyepu babo gege cama Keriso Yesu ne jitrungenisi mibibine waadename, mine age temi Acejiyame me toraca binamewale. Tăape cabu lui cewecu ngănu gyene, ingle peei cabu ca mine áblicăco Acejiyame me binamewale me ábita, ingle mine áblicăco mime tăape mule bine átrunga mibibine Acejiyame bau me waadename. ⁴ Yoo, niinăce cane liba Yesu ne lica jitrungujine, pui padare cabu cane căme tăape mule cabu me átrunga ecitujine. Pui sasa padare cabu cane pepu mule bine baborage jitrungemujine nuuja biname bime cabu ca, ⁵ ingle naace popi cane liba aplimlujine seben bimu liba nanajuji, căme tăape matikolă nirputuji cewecu wawename. Cuta căme mage babe Israela biname ge Benjamina me ingle cabu ca, piiyepu căme kaakesaare iyeta lui Heberu mene jiičemusi. Cuta piiyepu cotre bine cane Parisea biname bime măpu gaabe ca jewenemujine. ⁶ Căme singi baborage ge Acejiyame me kaakesea wawename, siige cane Yesu me átrunga biname bine măpu me jaawenemune. Yoo, cane iyeta mule cotre mene ibibi ituge wawena, naace tăápume cane peei gaabe ca conocăco ábitame Acejiyame me opo gaabe je. ⁷ Yepă, iyeta peei mule bine cane lui poto cidi me apu nangenuji egă miijirage gemi căme tăápume, page cane opo ewatnenine egă teepi nuuja miiji lica gemi, Keriso me átiytera name pi. ⁸ Toraca cane opo ewatnenine egă iyeta papa ge, yepă taatu gwidape baborage gyene. Peei babo gwidape lui naace gyene cane umle gäne Yesu Keriso căme Yageyame. Yoo, Yesu Keriso name pi iyeta căme sasa mule bine domăji pana cane itu ebmalemujine Keriso me ingle cabu me abacitame, ⁹ ten cabu lenajame. Page cane licarage căme miiji mule piiyepu cotre waweneca bine

jitrungenemine Acejiyame täapume conocäco äbitame, yepä cane Keriso ne jitrungenine cebine Acejiyame täapume conocäco wawename. Peei ätrunga gaabe Acejiyame cama conocäco äbitame lui teeme bau ca gyene, piyepu biname cina peei ne jääpänusi, Keriso ne liba jäätrungusi. ¹⁰ Page căme nuuja singi lica gyene, yepä Keriso täapume toraca umle äbitame, piyepu lui babo kokre te teebine budre cabu ca itu erpintanuji, peei te căme ireclota cabu lenajame. Cane singi gāne teeme pana ngene cewe oocanena pāpāname ireclota cabu piyepu teeme pana äbitame tabe lipu teeme budre padare cabu ge, ¹¹ ingle cane singi gāne Acejiyame te piba cuta cebine budre cabu ca arpinentame iyeteta ireclota me.

Acejiyame te Mibibine Ituge Asogleca Yeesu pana Mule Wawename

¹² Cane lica jūcenine egā cane uja conocäco me ituge äbita; camu gyene căme ireclota mule toraca miiji me äbita. Yepä, cane cāngena apicetnārenine conocäco ireclota mule ne oomlaname, ingle Yeesu Keriso te cebine teeme täapume ituge oomlana. ¹³ Yoo, căme ätrunga binamewale, cane apu lica nangeninige egā cane conocäco ireclota cama gāne, yepä cane apu jēwenenine: iyeta poto cidi me lui ituge niināce äpletnera, cane singi ngene ätrimela, pui ne oomlaname lui te niināce gaabe gyene. ¹⁴ Cane uuwama bāāclena biname pana gāne. Cane niināce gaabe me ire nacijinige ngālu gaabe ne oomlaname, naace täapume căme miiji daremu ne acatame. Peei daremu lui iyeteta ireclota gyene cabucewe je, Acejiyame lui täapume cebine ituge ala asogleca cane Yeesu Keriso bau ca pāpāname. ¹⁵ Yoo, mine iyeta lui cina Seemo ireclota cabu ninajininige, mine miiji pepu pana ngene atwana cama lenajame, piyepu weene liba mara ngene atwana cama gemi yepä gwidape poto cidi me, Acejiyame cuta peei ne pajecu me pa jaawenepi weeme täapume. ¹⁶ Yoo siige, mine niināce gaabe me naclege pui umle cabu lui pisi nyene page.

¹⁷ Căme ätrunga binamewale, căme pana mule weene gigri jēwenemeye. Teeme mule abiberājineye lui cina toraca gaabe cabu otni, cine lui gaabe weeme täapume ituge awabudnita. ¹⁸ Cane lui täapume weebibine bucurage padare ituge jajanena, cuta page ele măcu cama cāāri jijenininine egā bucurage biname piti nemi lui cina cubuyame gemi Keriso me budre täapume baarge uli cabu teeme conocono ireclota name pi. ¹⁹ Teepi niya puupu me cirege otni, ingle teeme yepä taatu ngene atwanena pisi nyene, teeme täāpe me singi bine wawenecame. Teepi gege gemi mule poto cidi me, teepi lui poto cidi me ajiri cire läbitinejisi. Iyeta teeme ngene atwanena lui singi taatu ai gawecewe me gwidape täapume. ²⁰ Yepä, mime täāpume ireclota mara gyene. Mime toraca cewe lui cabu sine. Mine mime niya cabu ca äsecrera biname ne cāngena jewagrijenisi cabucewe ca mime bau otnime, peei lui Yageyame Yeesu Keriso sine. ²¹ Tabe te mime gawecewe täāpe bine cirege atepłengāja teeme jamyacu apaclyera cama täāpe pana äbitame, pui kokre ca tabe lui ca ibibi gyene iyeta gwidape bine teeme ime cabu acraname.

4

Paulo te Bäärmi Mene Jegednemige

¹ Căme ngenecurage binamewale, cane baborage singi weeme täapume weene cama lenajame. Weene cebine ngenecu gege me naweneniye, piyepu cane awepyerāja ne jepānenine weeme name pi. Yoo, căme ätrunga binamewale, weene miiji kokre aclajutame Yageyame cabu.

² Yoo, neeneni magebi Ewodiya piyepu Suntukeye, owecu, căme singi weene ecatēye yepä ngene atwanena cama Yageyame cabu lenajame. ³ Yoo, piyepu Sujugu, lui cane cama miijirage kaakesea ituge wawena, cane singi gāne maane ai neeneni magebi bine ätityerame teeme miise mule ne abmalame, teepi lui cina cane cama baborage kaakesea ituge wawena biname bine Miiji Mene jajanename. Teepi gigri kaakeseyame gegi Klemente cama piyepu iyeta nuuja biname cama lui cina cane cama kaakesea ituge jaawenemepesi, lui bime ngi Acejiyame bau oogārāneji gemi teeme peba cabu, iyeta lui cina kirece ireclota Keriso bau ca cire jääpānepesi.

⁴ Ngenecu gege äbitineye weeme Yageyame cabu ireclota täapume. Cane cāāri jijenine, weene ngenecu gege!

⁵ Weene miiji owelaamelame lenaja iyeta biname bime täapume. Yageyame me acnenua lui mameta gyene. ⁶ Gone ngenecu māpu läbitininuye nuuja gwidape täapume, yepä weene liba Acejiyame ne yaawejanuye, teebine yāātinārūye iyeta weeme singi gwidape täapume, piyepu ngenecubora ca teebine eso yāācārūye. ⁷ Piyepu weene liba ngenecu poode Acejiyame bau ca jääpānūye, piba weeme ngene atwanena piyepu weeme singi Yeesu Keriso cabu cāngenarage birige. Yoo, biname cina äblicāco gemi cāngena umle äbita pepu ngenecu poode ne.

⁸ Ceräcerägääbu bääirmi mene age sena. Cäme ätrunga binamewale, weene ai gwidape poto cidi me ngene jwaatwa-naninuye: iyeta lui toraca gemi, lui bine opo gaabe me yaacranemusi, lui gwidape conocäco gemi, lui bine jugi cäco ngene atwana cama gemi, lui jamyacu gemi, lui bine jääpänemusi egä miijirage gemi, lui epucäco gemi, piyepu lui bine ibibi gemi awepyeräja täápume. ⁹ Cane lui abiberäja weebibine ituge ceera cäme mene piyepu cäme mule cabu ca, weene pepu jaawenemuye. Piba Acejiyame, lui te mibibine ngenecu miiji niwenininige, mine cama pa yaanajeji.

Paulo te Pilipi Ätrunga Ingle Biname bine Eso Jejemige Teeme Ätityera täápume

¹⁰ Cane ngenecu gege gäne piyepu cane Yageyame ne ewepyeräjenine egä padare te tatyaramtumi weene cebine cääri ätityerame. Weeme puu singi puga ge pui ne wawename, yepä leca padare cabu weeme gaabe ätityerame lica ge. ¹¹ Cane ai mene naace name pi lica jijenininine ingle cane gwidape täápume singi gäne. Pepu lica ge, ingle cane umle ituge äbita ngenecu gege cama lenajame, ngänu gyene cäme gwidape liba nesae. ¹² Cane umle gäne owecumete pana lenajame piyepu cane cuta nuuja taje umle gäne bucurage gwidape cama lenaja. Cane umle gäne iyeta padare iyeta poto ta ngenecu gege cama lenajame. Ngänu gyene cäme deedei liba bucurage, coo cäme deedei liba nesae; cäme gwidape liba bucurage, coo cäme singi gwidape liba lica gemi, cäme ngenecu gege cuta pisi nyene. ¹³ Keriso te cebine kokre me nawenenige iyeta gwidape täápume.

¹⁴ Yepä, weeme mule babo miijirage gyene cebine cäme mäpu cabu ätityerame. ¹⁵ Yoo, weene Pilipi biname umle gemi egä lui padare cabu cine giye jebacitujisi Miiji Mene jajanename, cane pui padare cabu liba Makedoniya probins ne sebmalujine pui Miiji Mene nuuja poto jajanename, weeme ätrunga ingle te taatu nätityäruji cebine, weene liba rarekaake näcärujiye. ¹⁶ Cane liba Tesalonika cewe cabu je, weene cuta piba cebine nätityärujiye lica yepä gääbu taatu, yepä cuta nuuja taje weene nätityärujiye. ¹⁷ Yoo, cäme singi lui lica gyene owecu gwidape päpäna taatu me, yepä cane singi gäne weene pepu mule wawenecame, piba miiji daremu peei cabu ca päpäname. ¹⁸ Yoo, cane age eso mene ne yoogärenine iyeta weeme ätityera täápume. Peei ätityera lui ibibi gyene. Cäme singi gwidape ibi piti nemi page, ingle Epaproditus te bii sewadenemige wemiji gwidape bine. Weeme ätityera gwidape lui epu pana iiwäreja mule liyepu Acejiyame täápume. Tabe baborage singi gyene pepu ätityera mule päpäname. ¹⁹ Yoo, Yeesu Keriso me kaakesea name pi mime täápume, Acejiyame te iyeta weeme singi gwidape bine icärininuge teeme jamyacu dogwe cabu ca. ²⁰ Mine miiji Acejiyame mime Babe ne awepyeräja iyeteta ngälu cäco teeme jamyacu apacyera täápume. Pepu pa yaanajeje!

Ai Peba me Apira Mene

²¹ Cane sebore jiwenininine iyeta Acejiyame me biname bine lui cina Yeesu Keriso memi. Mime ätrunga binamewale lui cina age temi cane cama, teepi te weebibine sebore jiwenininisi. ²² Iyeta Acejiyame me biname cina weebibine sebore jiwenininisi, yepä toraca teepi lui gemi Rooma Babo Mopeyame me mete cabu kaakesea jewenenisi.

²³ Yageyame Yeesu Keriso me miiji te weeme seemo bime cabu lenajame. Cane ngii Paulo; cäme mene ngälu peese.

PAULO ME LETA KOLOSE ÄTRUNGA BINAME BIME BAU ME

¹ Cane Paulo säne. Acejjyame te cebine Yeesu Keriso me ätyepäneji biname me itu nawenuji. Mime biname Timoti lui cane cama gyene. ² Cine weeme bau yoogärenago, lui cina Acejjyame me biname gemi Kolose cewe cabu je piijepu cime ätrunga binamewale Keriso cabu.

Acejjyame mime Babe me miiji te weeme cabu lenajame piijepu tabe weebibine poode ceerame.

Paulo naabi Ireçu Ätmutinisi Kolose Ätrunga Ingle täápume

³ Iyeta padare cine liba weeme täápume ireçu lätumutinago, cine cuta Acejjyame ne eso yääcärsu. Tabe lui Babe gyene mime Yageyame Yeesu Keriso täápume. ⁴ Yoo, cine mene niticijinininige egä weene Yeesu Keriso ne lipu jitrungeniye, cuta piijepu niticijinininige egä weeme singi lipu baborage gyene iyeta Acejjyame me biname bime täápume. ⁵ Pepu ätrunga piijepu singi cina taacluge weeme miiji ngene atwanena cabu ca, inge weene cängena umle gemi egä ingwe ca babo miiji pisi nyene weeme täápume cabucewe je. Pei umle weene ituge oomlana Acejjyame me Miiji Mene niinäce liba itu itecijipi. ⁶ Page pei toraca mene te otnenige iyeta poto ta, biname bime ireclota bine eboclomäjemenige miiji me, epu pana weeme ireclota lipu laboclomtepi pui niinäce bimu, weene liba itecijipi piijepu ngene ca yaaglepeye egä Acejjyame te biname bine babo owecu cama yäätityäreumuge. ⁷ Yoo, Epapas te weebibine itu jiji Acejjyame me owecu cama ätityera poto cidi me. Tabe cime ngeneurage biname gyene, lui te Keriso me kaakesea weeme gome cängena jewenenige cime täápume. ⁸ Yoo, tabe cibibine bii nijinige weeme miijirage singi poto cidi me, Aceji Seemo te lui itu icäripi.

⁹ Yoo, pei name pi pui padare cabu ca, cine niinäce weeme poto cidi me mene liba niticijipi, ngälu page, cine weeme täápume ireçu lätumutinago. Cine Acejjyame ne ewejanenisi weebibine tora-ca umle ceerame teeme singi poto cidi me teeme Seemo te weeme gaabe ne cängena awa-bame. ¹⁰ Weene pei cabu ca ibibi äbitinininiye mime Yageyame me gaabe cabu otnime iyeta teeme singi wawenecame. Piba weeme ireclota cabu ca miijimiji mule cina twaatni-nusi. Cuta piba weeme umle Acejjyame poto cidi me babo pa läbitepi. ¹¹ Cine teebine cuta ewejanenisi weebibine kokre ceerame teeme mararage kokre cabu ca, weene mäpu cabu cäng-ena ngeneu miiji cama lenajame, ¹² piijepu weene mime Aceji Babe ne gege cama eso ceerame, tabe mibibine lipu ibibi itu niwenipi iyeta päpäname, tabe lui ne ituge jaji teeme biname bine ceerame, lui bine teeme apacyera cabu yaawademuge. ¹³ Tabe mibibine ituge äsecrera krokeciye me kokre cabu ca, piijepu itu niwadipi teeme ngeneurage Bägrä te luma mibibine cängena niwadininuge, ¹⁴ lui me kaakesea ca mine äsecrereji gemi, egä mine kälyä gemi mime niyya mule cabu ca.

Yeesu Keriso me Kaakesea poto cidi me

¹⁵ Keriso cabu biname cina Acejjyame me opo ituge päpäna, lui cina Acejjyame ne äblicäco päpäna. Keriso lui Acejjyame me uuge Bägrä gyene; tabe sine caburage iyeta wawenäneji gwidape cabu ca. ¹⁶ Bägrä cama Acejjyame iyeta gwidape itu jewenemujäsi, cabucewe je lui gwidape piijepu gawecewe cabu lui gwidape gemi; iyeta gwidape mine lui bine ibibi gemi päpäname piijepu lui bine mine äblicäco päpäna, cuta pei ngalebora iyeta cable, iyeta kokre, iyeta mope biname, piijepu iyeta ire atwi puupu bine. Yoo, Acejjyame iyetarage Keriso cama ituge wawena, cuta iyeta cina teeme täápume icrajenige. ¹⁷ Yoo, agedna cabu Acejjyame gwidape bine liba camuge waweneca, Keriso piba puga ge, cuta page temiji pi iyeta gwidape cina puupu cabu cängena icrajenige. ¹⁸ Tabe moyepame gyene iyeta ätrunga inge biname bime täápume. Yoo, epu pana biname bime piicwa maramara cina teeme ireclota ne lipu mope cabu ca yaacatusi, ätrunga biname cina teeme ireclota Keriso bau ca pepu pana yaacatusi. Tabe Acejjyame me uuge Bägrä gyene; Acejjyame te teebine itu erpinantuji budre cabu ca niinäce me äbitame iyeta gwidape täápume. ¹⁹ Yoo, Acejjyame me singi name pi Aceji Bägrä lui toraca teeme pana Acejjyame gyene. ²⁰ Teeme Bägrä me kaakesea ca tabe gaabe ne itu jewenuji teeme bau me awecname iyeta lui cabucewe je yaacrajemuge piijepu gawecewe cabu lui biname piijepu gwidape yaacrajemuge. Keriso me budre baarge uli cabu, teeme uudi liba tapiruji, pei te mibibine poode itu nicärininiji Acejjyame cama.

²¹ Yoo, weene cuta piijepu, weene liba camuge Keriso ne ätrunga, piijepu weene liba cudecewerage ge Acejjyame bau ca, pui padare cabu weene cubuyame pana ge Acejjyame täápume weeme niyaniya ngene atwanena piijepu waweneca name pi. ²² Yepä, page

tabe weebibine teeme biname me itu jiwenipi teeme Bägrä Keriso liba biname pana tääpe cama budre äbituji, naace tääpume weene teeme opo gaabe je aclajutame epucäco, jugi cäco, piyepu conocäco. ²³ Weene apu läbitininuye liba ätrunga cabu cängena umle cama inajininige. Yoo, weene niinäce liba itecjijnuji Mijji Mene Yeesu me ätityera poto cidi me, weene puma cita ca weene ngene atwanena ecitujiye pui ingwe ca mijji ireclota cabu je. Peei mule gone yaabmaluye! Yoo, Mijji Mene weene lui ituge ätecija, page jajanäneji gyene iyeta biname bine ai gawecewe cabu. Cane Paulo cäme kaakesea cuta pisi nyene Mijji Mene jajanename.

Paulo me Kaakesea Ätrunga Ingle Biname bime tääpume

²⁴ Yoo, cane ngenecu gege gäne cäme mäpu ireclota poto cidi me weeme tääpume, ingle cäme ireclota cabu lui cewe oocanena piti nemi, peei lui cerämu mäpu Keriso lipu ituge päpäna teeme tääpe cabu, cuta peei tääpe lui teeme ätrunga ingle gyene. ²⁵ Yoo, Acejiyame te cebine ai mijji kaakesea näcäruji teeme ätrunga ingle biname bine ätityerame, iyeta teeme mene cängena iicetnejame, cuta weeme bau jajanename. ²⁶ Ai mene tabe sasa padare cabu ca iyeta biname bime bau ca imlituji, ngälu ai padare teeme biname bime tääpume seboclomtenige. ²⁷ Page tabe singi gyene teeme biname bine iyeta gawe cabu umle wawenama ai toraca mijjirage mene poto cidi me. Agesa peei mene: Ingle naace popi Keriso lui weene cabu enajenige, peei name pi weene teeme jamyacu apaclyera cabu cirege lenaja. ²⁸ Yoo, ai umle name pi cine iyeta biname bine mene jejananenemisi Keriso poto cidi me, piyepu iyeta cime umle cama teebibine eblawäjenemisi conocono mule abmalame, piyepu ebiberäjenemisi toraca mule poto cidi me. Cine singi iyeta biname cina conocäco me äbitame Acejiyame me opo gaabe je, teepi liba Yeesu Keriso me kaakesea teeme tääpume yaacatusi. ²⁹ Yoo, peei tääpume cane kaakesea jaawenune Keriso miji babo kokre ca, tabe lui ne cäme cabu yaacituge.

2

¹ Cane singi weebibine umle wawenama cane lipu babo kaakesea jaawenune weebibine ätityerame, cuta piyepu weeme ätrunga binamewale bine lui Laodikea cewe cabu je, cuta piyepu iyeta ätrunga biname bine lui cina camu gemi cebine päpäna. ² Cane pui lui irecu ätumuta kaakesea jaawenune weene piyepu teepi ngenecu kokre äbitame, piyepu weene iyeta yepä me äbitame weene liba weemeweme singi läbitaninuye, piyepu iyeta weeme ngene atwanena bine weene toraca umle cabu acraname. Piba pepu pana ireclota cabu weene cängena umle päbitipeye lui ngene atwanena ne Acejiyame te eboclomtenige, lui Keriso sine. ³ Yoo, iyeta toraca umle piyepu toraca ngene atwanena lui Keriso me ireclota cabu yaaboclomtuge.

⁴ Peei name pi gone nuuja biname ne ire taatu jaacituye walya mene ca weebibine ängletneja. ⁵ Yoo, ngänu gyene cane cudecewe gäne weeme bau ca, cäme ngene atwanena pisi nyene weeme cabu. Cane ngenecu gege cama umle äbitine weeme ätrunga te lipu kokre gyene, cuta piyepu weene lipu yepä pana jäätrunguye Keriso ne.

Weeme Keriso cama Ireclota te Lipu Pagege Lenaja

⁶ Yoo, weene Yeesu Keriso weeme Yageyame tääpume ituge acata, siige ten cama cängena inajininige! ⁷ Epu pana apineca cäco uli me braju te lipu gawe ngaleborage me labacituge, weeme ätrunga mijji pepu pana Keriso cabu lenaja! Epu pana biname te mete ne mijjirage caage cabu lipu yaaranguge, weeme ireclota Keriso cabu pepu icranemeye teeme bau ca iyeta bimü gaabegabe weeme gaabe ne päpänenama. Piba weeme Keriso cabu ätrunga te kokre pä läbitepi pui mene cabu, weebibine lui mene ituge abiberäja. Piba Acejiyame ne ngenecu cabu ca eso yääcäranuye.

⁸ Yoo, weene cängena ire egä nuuja biname te lica weebibine waadena teeme ängletneja mene ca. Pepu walya umle lui piti nemi, lica gemi Keriso bau ca, yepä biname bime sasa mule cabu ca saacluge. Cuta piyepu niya cable lui cina ai gawecewe ne ire jetwenisi, teepi biname bine mara walya ngene atwanena ecäranenemisi. ⁹ Yepä, Keriso cabu piti nemi iyeta toraca umle piyepu iyeta kokre, ingle tabe lui Acejiyame gyene binamerage me trupa cabu sine. ¹⁰ Yoo, toraca umle piyepu toraca ireclota cuta weeme bau piti nemi, ingle Keriso lui weeme cabu sine. Tabe caburage gyene iyeta ire atwi seemo piyepu kokre cabu ca.

¹¹ Mine liba Keriso ne ituge ätrunga, tabe te mime ngenecu me niyaniya singi bine ituge äyebenga mime trupa cabu ca. Tabe lica Israela biname bime cewecu mule ca yääyebhengemuge, teepi imäbägrä bime matikolä tääpe ne liba iirputa, ingle Keriso me mule mara gyene. ¹² Yoo, mine liba niye ca äciseja ne ituge acatena Keriso me ngüi cabu, peei cabu ca mine teeme budre piyepu arpinenta cuta mime tääpume ituge acata. Mime niya mule ireclota ne budre pana me ituge wawena, piyepu kirece ireclota te teeme arpinenta pana

ituge gije abacita, mine liba Acejiyame ne itu jitrungujisi mibibine pepu pana ätityerame, tabe lui te Keriso ne budre cabu ca itu erpinantuji.

¹³ Niinäce weene epu pana ge budre biname liiyepu weeme niiyaniya mule name pi, piyepu weeme tääpe me niiyaniya singi bine camuge äyeblena. Yepä, page Acejiyame weebibine ituge arpinera kirece ireclota cabu me Keriso cama lenajame. Tabe iyeta mime niya mule bine ituge äyeblena. ¹⁴ Tabe pui cotre mene ne yisibrecmuji, lui te mibibine noomlinuge, ingle peei te singi daremu mime niya mule tääpume. Yepä, Acejiyame pui mene ne iyebingtuji mime tääpume, ingle naace popi Keriso me budre baarge uli cabu peei te mime daremu ituge apira. Mime tääpume cotre mene siige kokre lica gyene. ¹⁵ Yoo, Keriso lui budre äbituji baarge uli cabu, tabe peei cabu ca ai gawecewe me niyarage ire atwi seemo bine piyepu kokre bine itu epremalemuji. Biname bime opo gaabe je tabe peei iyeta cabu ca yuutrutuji, egä teeme kokre ibibi lica ge.

¹⁶ Yoo, peei name pi weene gone nuuja biname ne padare yäcäruye jajime egä weene ngena loolome piyepu nänäjame, coo weene lui bimu bine baborage me wawename kämäge gaabegabe irecu ätumuta tääpume, piyepu kirece mabye me bimu ne babo me wawename, coo weene lipulipu mule wawename Sabade bimu cabu. ¹⁷ Iyeta pepu mule lui owowä pana gemi Keriso me toraca mule tääpume. Peei name pi gone pepu mule bine cotre me wawena. Babo gwidape lui eei gyene egä weene Keriso ne cängena jitrungeniye. ¹⁸ Yoo, nuuja taje biname te jiiucuge egä tabe baborage gyene Acejiyame me opo gaabe je, ingle tabe mule bine wama pana jääpänemuge. Pepu biname me mene gone jääteciyuye, tabe liba biname bine yaabiberäjemuge egä teepi miiji teemämu gawe me äbita peei cabu ca awepyeräja ne päpäname. Coo, tabe liba biname bine yaabiberäjemuge mename seemo bine awejename, teeme mene gone jääteciyuye. Pepu biname te apu jaangenuge egä tabe babo umle cama gyene, yepä teeme ngena atwanena lui papa gemi, biname bime ngena atwanena gemi, peei name pi gone yaawademuye. ¹⁹ Pepu biname te teeme ngena atwana ne lica Keriso cabu ca yaacatuge. Yoo, Keriso lui mopeyame gyene iyeta ätrunga ingle bime tääpume, epu pana biname me mope te liiyepu iyeta teeme tääpe piicwa bine ire jaatwemuge. Ätrunga biname cina miiji teeme kokre, teeme ireclota, piyepu teeme mule Keriso bau ca yaawadanemusi. Mine piba yepä tääpe pana gigri luutinago, yepä pana läbitinago Acejiyame te lipu mibibine niwadininige.

Keriso me Budre piyepu Arpinenta Lipu Gemi Mime tääpume

²⁰ Keriso liba budre äbituji, weeme sasa ireclota ten cama budre ge, siige weene äsecrera gemi ai gawecewe me mule cabu ca. Cije piba weene ngena tääpume cerämu inajininige ai gawecewe me ireclota mule cabu? Weene ngena tääpume gawecewe me cotre bine singi gemi wawename apu egä, ²¹ “Gone ai gwidape ne ime ca oomlana,” coo piyepu, “Gone ai deedei äbita”, coo, “Gone sui acata”. ²² Iyeta pepu cotre lui deedei piyepu gwidape potu cidi me, lui bime lenaja leca lica gyene, yepä watata lapirininusi, biname cina liba yäärwäjusi. Binamerage cina pui cotre bine jaawenemusi piyepu yaabiberäjemusi. ²³ Yoo, potu biname cina apu jengenemige egä pepu cotre pama miiji gemi, ingle peei cina biname bine yaabiberäjemuge teeme bucurage irecu ätumuta mule wawenecame, piyepu yaabiberäjemuge sinäme teemämu matikolä me äbitame, cuta piyepu yaabiberäjemuge teeme tääpe bine niya me wawename. Yepä, pepu cotre cina äblicäco biname bine ätityera teeme tääpe me niya singi bine ägyemame.

3

¹ Yoo, Acejiyame liba Keriso ne budre cabu ca itu erpinantuji, tabe ten cama weebibine cuta irpinäripi weeme sasa ireclota cabu ca kirece ireclota ne päpäname. Peei name pi weeme ngena atwanena icranemeye pui gwidape cabu me lui piti nemi cabucewe je. Keriso te adnatäneji enajenige puma Acejiyame me camu potu ime ca iyeta gwidape bine waadename. ² Yoo, weene cabucewe gwidape potu cidi me ngena jotwananineye, gone ai gawecewe gwidape potu cidi me ngena atwanena, ³ ingle weeme sasa gawecewe ireclota te budre gyene. Siige, weeme toraca ireclota lui cabucewe sine, Acejiyame cabu ämlitäneji gyene Keriso cama. ⁴ Yoo, tabe lui weeme toraca ireclota gyene, piyepu tabe liba gawecewe me cire tacnenuitepi, weene piba teeme jamyacu apacyera cabu cirege lenaja.

Sasa Ireclota piyepu Kirece Ireclota potu cidi me

⁵ Ai gawecewe me niyarage singsingi bine iyecräjemeye weeme ireclota cabu ca. Cane naace me jiccenine egä sargi mule gone, jugijugi mule gone, niya singsingi gone äbitena, gone conocono mule tääpume singi, piyepu gone baborage singi äbita ai gawecewe me gwidape tääpume egä weene Acejiyame tääpume singi cäco äbitame. ⁶ Acejiyame te singi lica gyene iyeta peei mule tääpume. Teeme mäpu daremu pisi nyene teeme tääpume lui cina singi lica teeme mene wawename. ⁷ Yoo, niinäce padare cabu weene pepu mule

tewenenäjenimume, cuta peei niiyarage ngene atwanena cina piba weeme ireclota bine ewademujisi.

⁸ Yepä, page iyeta ai mule bine iyebhengemeye. Gone claabe cama lenaja, piyepu gone wata drowä me läbitininuye, cuta piyepu gone nuuja biname bine ämugetna. Äcela piyepu jugijugi mene weeme tage cabu ca yääyebhengemeye. ⁹ Walya mene gone jajanena, ingle weene weeme sasa ireclota mule bine ituge abmaläcema, ¹⁰ kirece ireclota mule ne ituge acata. Yoo, Acejiyame lui te weebibine kirece me itu jiwenipi, tabe weebibine cuta teeme pana me imacetnäjininige weene teebine cängena umle äbitame. ¹¹ Apu ireclota cabu nuuja gawe biname cina mara lica gemi Israela biname bime cabu ca, piyepu lui biname cina ituge acata Acejiyame me cewecu teeme tääpe cabu, teepi mara lica gemi biname cabu ca lui cina cewecu cäco gemi. Maramara mene biname cuta piyepu glunubororage biname Acejiyame me opo gaabe je teepi mara lica gemi. Cuta epu biname mara lica gemi lui cina aletnäneji gemi kaakesea daremu cäco wawename piyepu biname lui teemämu ire latwinusi. Teepi iyeta lui yepä gemi Acejiyame me opo gaabe je. Keriso taatu baborage gyene, piyepu tabe iyeta teeme biname cabu enajenige.

¹² Yoo, weene Acejiyame me biname gemi. Tabe baborage singi ge weeme täápume, weebibine itu jijaäcristininuji teeme biname me äbitame. Peei name pi weene miiji weeme nuuja bine owecu jaawenemuye, teebibine yäätityäremuye. Weene weemämu matikolä me läbitinuye, gaawida me läbitininuye, cuta piyepu wata durau me gone äbita. ¹³ Nuuja biname te liba matikolä conocono jaawenuge weeme yepä ne, gone peei ne babo me wawena. Nuuja biname te liba meebine niiya mule naawenuge, peei täápume gone niya ngene jwaatwananute, yepä ngene jaape-cnute Keriso lipu mäame niya mule bine teeme cabu ca itu iyebhengemuji, piba cuta pui biname poto cidi me niya ngene atwanena ne yääyebhngtute. ¹⁴ Piyepu iyeta peei mule cabu weene biname bime täápume singi läbitininuye, ingle singi te iyeta gwidape bine toraca yepä me jaawenemuge. ¹⁵ Keriso hau ca lui poode ne weene padare yääcäruye weeme ngenecu cabu cängena lenaja weebibine waadename, ingle Acejiyame te weebibine ituge ala asogleca weene peei poode cabu yepä tääpe pana gigri lenajame. Yoo, Acejiyame ne eso yääcäruye. ¹⁶ Miiji Mene ne Keriso me miiji ätityera poto cidi me, weeme ngenecu cabu yaacituye puma lenajame. Piba umle cama weeme yepäyepä bine yaabiberäjemuye piyepu toraca gaabe jaawabäjemuye. Uupera bine yaatangemuye: poto Salamo peba cabu ca, poto irecu ätumuta uupera, piyepu Aceji Seemo te ngena uupera icäristininuge. Weene uupera bine yaatangemuye iyeta weeme ngenecu cama Acejiyame ne eso ceerame. ¹⁷ Piba weene ngena jicuye, coo ngena jaawenuye, iyeta Yageyame Yeesu me ngii cabu jaawenemuye, piyepu teeme ätityera cama weene eso yääcäruye Acejiyame mime Babe ne.

Poto Miiji Mule

¹⁸ Magebi, maane mäame rooriye ne yääticijuge teeme singi wawename, ingle naace popi Keriso me biname cina miiji pepu pana lenaja.

¹⁹ Rooriye, maane coga ne owecu jwaawenute, cuta teeme täápume gaawida pana naanajuge.

²⁰ Bägrä, iyeta padare weene weeme mage babe bime mene cängena jääticijemuye, ingle naace popi Acejiyame singi gyene teeme biname cina pepu lenajame.

²¹ Mage babe, gone weeme bägrä bine ngenecu niya me jaawenemuye, ingle miiji lica teepi ocinyerame äbita.

²² Aletnäneji biname, weeme ai gawecewe yageyame me mene jääticijuye iyeta padare cabu, lica eei taatu padare teepi liba weebibine jipänininusi, teebibine ngenecu miiji me wawena täápume, yepä iyeta padare weeme kaakesea iyeta ngenecu cama jaawenuye mime cabucewe Yageyame ne pepu opo gaabe me acitame. ²³ Yoo, iyeta weeme kaakesea weene miiji cängena jaawenemuye, ingle weene mime cabucewe Yageyame täápume jaawenemuye, lica gawecewe biname täápume taatu jaawenemuye. ²⁴ Weene ngene jwaatwinuye egä mime Yageyame me miijirage daremu pisi nyene, tabe lui teeme biname bine cirege ceera. Yoo, weeme toraca Yageyame lui Keriso peese nyene. ²⁵ Piyepu lui biname te conocono jaawenuge, tabe cuta teeme mäpu daremu cirege acata, ingle Acejiyame iyeta biname bine yepä pana cire jaatanemepi.

4

¹ Yoo, aletnäneji biname bime yageyame, weene miiji conocäco piyepu toraca mule cama ire jaatwemuye weeme aletnäneji kaakesea me biname bine, ingle weene umle gemi egä cuta weeme Yageyame pisi nyene cabucewe je.

Poto Umleumle Mene

² Weeme irecu ätumuta mule ne gone yaabmaluye, yepä Acejiyame ne mene cängena jajaanunuye, piyepu teebine eso mene yääcäranuye. ³ Weene liba irecu lätumutinuye, Acejiyame cuta cime täापume ewejanineye egä tabe cibibine miijirage gaabe ceerame teeme mene Keriso poto cidi me cängena biname bine jajanename, lui mene ai padare cabu aboclomteji gyene jajanena täापume, piyepu lui mene jajanena name pi cane krokeciye mete cabu nanajenige. ⁴ Yoo, Acejiyame ne yaawejanusi cane peei mene cängena, pajecurage iicaname, cane lipu miiji cirege iicana.

⁵ Umleumle inajipi biname gome lui cina ätrunga biname lica gemi, piyepu cängena ire padare täापume teebibine umle mene jajanename Keriso poto cidi me. ⁶ Weeme mene cabu ca teebibine miiji ngene atwanena piyepu ngenecu miiji yääcäremuye; weene liba teeme yepäyepä bine toraca ätityera cama mene jaawecniste-muye.

Sebore Mene Poto Biname bime täापume

⁷ Cime ngenecurage biname Tukikus te weebibine iyeta mene pa jijananepe cime lenaja poto cidi me. Tabe te kaakesea cine cama cängenarage jaawenuge mime Yageyame täापume. ⁸ Cane naace name pi teebine weeme bau me jityepenine weebibine ngenecu miiji wawename cime poto cidi me. ⁹ Onesimus ten cama ädenige weeme bau me. Tabe mime cängena piyepu ngenecurage biname gyene; lui gyene weeme ätrunga ingle cabu ca. Teepi mene pa jijanepäsi iyeta gwidape poto cidi me ama lui cina äbitininisi.

¹⁰ Aristakus lui cane cama krokeciye mete cabu sine, tabe weebibine sebore jiwenininige. Mareko cuta piyepu sebore jiwenininige. Ai Mareko lui Banaba me ingle cabu ca gyene. Yoo, weene mene ituge ätecija Mareko ne cängena ire atwime, tabe liba weeme bau me läduge. ¹¹ Yosuwä, teeme nuuja ngii lui Yuustus, tabe cuta weebibine sebore jiwenininige. Peei nesae taatu Israela cabu ca biname cina cane cama kaakesea jewenenänisi naace täापume egä Acejiyame te biname bine ama waadename. Teepi cebine baborage nätityeränisi.

¹² Epapras te weebibine sebore jiwenininige. Tabe sine weeme ätrunga ingle cabu ca, piyepu Yeesu Keriso täापume kaakesea jewenenige. Tabe Acejiyame ne iyeta ngenecu cama yaawejanuge weeme täापume egä tabe weebibine itityärinininige weene cängena aclajutame ätrunga cama. Tabe singi lica gyene nuuja te weebibine waadename weeme ätrunga cabu ca, yepä weene te conocäco Keriso me singi cabu lenajame. ¹³ Cane cämämu itu tepänumene, tabe cängena kaakesea lipu jewenenige weeme täापume piyepu weeme binamewale täापume, lui cina Laodikea piyepu Hirapoli cewe mameta cabu gemi. ¹⁴ Yoo, Luuka cime miijirage dokta piyepu Deemas teepi cuta weebibine sebore jiwenininäsi.

¹⁵ Weene mime ätrunga binamewale bine Laodikea cewe cabu jejemepeye egä cine miiji gemi teeme täापume, cuta piyepu mime ätrunga ingle binamewale lui cina Numpa me mete cabu tabasecretnige irecu ätumutame, pepu cuta teebibine jejemepeye. ¹⁶ Weene liba ai mene ne weeme ätrunga ingle cabu niinäce pagege acnema, piba Laodikea cewe ätrunga ingle cabu me ecanepeye teepi puma cuta acnename. Cuta pepu weene pui mene weeme ätrunga ingle cabu ecnemepeye, Laodikea cewe binamewale cina lui ne weeme bau me tityepumesi. ¹⁷ Cuta Arkipus ne jejepeye egä, “Maane miiji mäame kaakesea mime Yageyame täापume cängena apirame.”

¹⁸ Cane cämerage ime ca ai mene ne yoogärenine egä cane PAULO te weebibine jiw-ablininine. Gone ngene jitrimalinuge egä cane krokeciye mete cabu nanajenige, yepä Acejiyame ne cäme täापume ewejaneye weene.

Acejiyame me miiji te weeme cabu lenajame.

Cane ngii Paulo, siige cäme mene ngälu peese nyene.

PAULO ME NIINÄCE LETA TESALONIKA ÄTRUNGA BINAME BIME BAU ME

¹ Cane Paulo, Siila piyepu Timoti cama, yoogärenänogo weeme bau me lui cina inajininige Keriso me ätrunga biname bime ingle cabu Tesalonika babo cewe je. Weene mime Aceji Babe me biname gemi, cuta piyepu Yeesu Keriso weeme Yageyame gyene.

Acejiyame me miiji te weeme cabu lenajame piyepu tabe weebibine poode ceerame.

Tesalonika Cewe Ätrunga Biname bime Ireclota Apu Gyene

² Iyeta padare cine liba Acejiyame bau irecu lätumutänogo, cine cuta weeme täापume yaawejänogo, piyepu teebine eso mene yäacäränogo weeme täापume. ³ Cine weebibine ngene jipecni-ninago Acejiyame mime Babe me opo gaabe je, weeme ätrunga te lipu laboclomtuge miiji mule cama. Cine ngene jipecnininago weeme singi lipu gyene Yeesu Keriso täापume, ingle weene baborage kaakesea ituge wawena teeme täापume, piyepu teeme acnenuta ne cängena jewagrieniye. ⁴ Cime binamewale, cine umle gemi egä Acejiyame te singi gyene weeme täापume, piyepu weebibine itu jijäcripi teeme binamewale me äbitame. ⁵ Cine Miiji Mene Yeesu Keriso poto cidi me weeme bau me saacanepesi, lica mene taatu ca, yepä cuta kokre cama piyepu Aceji Seemo cama. Pepu pi cine pui mene ne yaaboclomtusi weeme bau me egä toraca gyene. Weene umle gemi cime ireclota lipu ge cine liba weene cama ituge lenaja, peei lui weeme miiji täापume. ⁶ Weene cime mule piyepu Yageyame me mule bine itu jäätutanemepeye. Weene Miiji Mene ne Aceji Seemo miiji gege cama itu yaacatepeye, ngänuge weene mäpu bine peei cabu ca jäापänemepeye. ⁷ Weeme miijirage ireclota cabu ca weene toraca ireclota gaabe ne yaaboclomtuye iyeta Makedoniya piyepu Akaya gawe ätrunga biname bime bau me. ⁸ Yoo, lica Makedoniya piyepu Akaya probins cabu taatu, yepä iyeta poto ta biname cina umle läbitininusi Miiji Mene Yageyame poto cidi me weeme miijirage mule name pi. Biname cina mene ituge ätecija weeme Acejiyame bau me ätrunga poto cidi me, peei name pi cime nuuja mene lica gyene peei täापume. ⁹ Iyeta pui biname cina mene jaajananusu weene lipu cibibine itu niwablipeye, siige weeme uuje cabu ca latatrongäripeye Acejiyame bau me, naace täापume weene Acejiyame ne awejename, lui gyene toraca piyepu ireclota cama, ¹⁰ piyepu teeme Bägrä ne awagriame cabucewe ca äiname. Peei lui Yeesu Keriso sine, tabe lui ne erpinantuji budre cabu ca. Yoo, Keriso te mibibine nisecrärenininige mäpu cabu ca lui te cire tädepi, Acejiyame liba niija mule biname bine cirege ablaweja.

2

Paulo me Kaakesea poto cidi me Tesalonika Cewe cabu je

¹ Cime binamewale, weene weemämu umle gemi egä cime otni weeme bau me papa me lica läbitepi. ² Weene umle gemi cime mäpu ireclota piyepu äcneca lipu itu jäापänepesi Pilipi babo cewe cabu je. Cine puma cita ca weeme bau me naclepi. Yoo, puma poto biname cina singi ge cime mene iibaname, yepä mime Acejiyame te cibibine kokre itu nicäripi Miiji Mene weebibine jajanename. ³ Yoo, cine liba biname bine jaajananusu Miiji Mene ne acatame, cine walya mene lica jüicemusi. Cime ngenecu muge lica piyepu toraca birige, piyepu cine lica äbitenänogo nuuja biname ne angletnejame. ⁴ Iyeta padare cine jüicemusi Acejiyame lui mene täापume singi, ingle tabe cibibine ituge apicetnera, piyepu cime toraca ngene atwana itu jepänuji, piba ai kaakesea nicärininuji Miiji Mene Yeesu Keriso poto cidi me jajanename. Cine mene lica jaajananusu biname cina singi äbitame cime täापume, yepä Acejiyame te singi äbitame, lui te cime ngenecu nipicnantinuge. ⁵ Yoo, weene umle gemi egä cine weebibine lica itu owe iswipago, piyepu Acejiyame umle gyene egä cine lica Miiji Mene jaajananusu gwidape päpänename weeme bau ca. ⁶ Cine nuuja singi lica ge awepyeräja päpäname weeme bau ca, coo nuuja biname bime bau ca. ⁷ Cine Keriso me ätyepäneji biname gämi, peei name pi cine miiji ge weebibine jaji cime singi gwidape ceerame, yepä cine pepu ätinera lica birige. Cine weebibine owelaamelame itu itityäripago, epu pana mage te lipu teeme bägrä ne cängena ire jaatwuge. ⁸ Peei weeme täापume baborage singi name pi, cine gege ge weebibine lica Acejiyame me Miiji Mene jajanename taatu, yepä iyeta cime ireclota cama jajanename. Cine pepu baborage singi ge weeme täापume. ⁹ Cime binamewale, weene ngene nipecnininige cine lipu ime ca kaakesea ne itu jaawenepesi kokre cama. Ciye bimu cine kaakesea bine cängena jaawenemusi cime lenaja täापume, ingle cine singi lica ge weeme nuuja ne mäpu ceerame peei poto cidi me, pui padare cine liba Acejiyame me Miiji Mene weebibine jijananusu.

¹⁰ Weene weemämu umle ituge piyepu Acejiyame umle gyene egä cime mule weeme bau me lui conocäo ge. Weene lui cina Acejiyame ne jäätrunguye, cime mule weeme täapume toraca piyepu cängena ge. ¹¹ Weene umle gemi egä epu pana babe te teeme bägrä bine lipu yäätityäremuge, cine weebibine iyeta pepu itu itityäripago. ¹² Cine weebibine ngenecu kokre itu jiwenipago piyepu nuuja taje ngenecu plowa me jiwenipago. Cine jijananipago weene epu cängena lenajame Acejiyame lipu ireclota täapume singi, tabe lui weebibine ituge jājäcra teeme jamyacu apaclyera cabu lenajame piyepu tabe te weebibine waadename.

¹³ Yoo, cine liba Acejiyame me mene weebibine jijanipago, weene cängena piba itecijipi, siige yaacatepeye. Cine peei täapume Acejiyame ne eso yäacärusi. Weene peei mene ne itu yaacatepeye egä Acejiyame me toraca mene gyene, lica biname bime mene. Peei te kaakesea weeme cabu jaawenanuge, lui cina ätrunga biname gemi. ¹⁴ Cime binamewale, ngena te itu läbitepi Acejiyame me ätrunga ingle biname bime täapume Yuudea gawe cabu, peei te cuta weeme täapume ituge äbita, ingle weene iyeta lui Yeesu Keriso me biname gemi. Poto weemerage biname cina weebibine mäpu ituge ceera, epu pana Israela biname cina lipu Yuudea gawe ätrunga biname bine mäpu padare ituge ceera. ¹⁵ Yoo, sasarage poto Israela biname cina Acejiyame me mename biname bine eglecimujisi; ingwe ca nuuja cina Yageyame Yeesu ne agli me jewenujisi; piyepu page poto cina cibibine mage mäpu nicäraninusi. Teepi Acejiyame me singi cäco mule bime binawenemusi, cuta piyepu cubuyame me läbitininusi iyeta biname bime täapume. ¹⁶ Teepi cuta cibibine iibaname läbitininusi, cine liba gawe maramara biname bine jaajanemusi teepi lipulipu teeme niija cabu ca äsecrerame. Pepu pi teepi teeme niija mule bine babo jaawenemusi, siige page teeme mäpu daremu te tädenige Acejiyame bau ca.

Paulo Singi Ge Teebibine Ängrärame

¹⁷ Yoo binamewale, cine liba weebibine itu ibmalipago matikolä padare poto drowä biname name pi, cine mage ngeni jipecnipago, piyepu bucurage padare cine lapicnantipago weebibine ängrärame, yepä äblicäo ge. Ngänuge cine cudecewe weeme bau ca, cime ngeni atwana lui weeme cabu sine. ¹⁸ Cine baborage singi puga ge weebibine ängrärame. Bucurage gäabu cane Paulo te lapicnantune weeme bau otnime, yepä Satani te cime gaabe cabu larmenutanuge. ¹⁹ Yoo, weeme bau ca cine ngenecu gege jääpänusi. Weene peete nemi lui poto cidi me cine mene cire jiicepesi mime Yageyame Yeesu me opo gaabe je, tabe liba cire tacnenutepi, egä, "Cime kaakesea cabu ca biname age temi." Weene peei abasecretna cabu cirege. ²⁰ Toraca, weene peete nemi cibibine ngenecu gege me lui cina niweninininuye. Weeme ätrunga cabu ca cime kaakesea te miiji me läbitume.

3

¹ Yoo, cime singi te baborage itu läbitepi mene ätecijame weeme poto cidi me. Peei name pi cine mene jaatranepesi cine neeneni cina ama lenajame Atena cewe cabu je, ² piba Timoti ne ätyepame peeyeme weeme bau me. Timoti mime biname gyene. Tabe lui Acejiyame me kaakesea cine cama jaawenuge Miiji Mene Keriso poto cidi me jajanename. Yoo siige, cine teebine itu jäätyepesi weebibine ätityerame weeme ätrunga kokre wawename, ³ piba weeme nuuja te ätrunga gaabe ne lica abmala, mäpu ne liba jääpänuge. Yoo, weene umle gemi egä Acejiyame te singi mine mäpu cabu matikolä lenajame mime ätrunga ne kokre wawename. ⁴ Cine liba weene cama ituge lenaja, cine niinäce gaabe itu jijipago egä mine mäpu padare ne pagege päpäna. Siige, weene page umle gemi egä pepu pana ituge äbita. ⁵ Peei name pi cane Timoti ne itu jäätyepene, ingle cane baborage singi ge mene ätecijame weeme ätrunga poto cidi me. Cane ngenecu mäpu ge egä pui angletneja biname Satani te pama weebibine itu ingletnäjiipi iyeta cime kaakesea weeme cabu sabe wawename.

⁶ Yoo siige, Timoti bii tacnenutige gege mene cama, egä weene Acejiyame ne camu jitrungeniye, cuta piyepu weemeweme owecu läbitaniniye. Tabe cuta nijinige egä weene cibibine gege cama ngeni nipecnininuye. Tabe nijinige egä weeme singi cibibine opo päpäname lui epu gyene cine lipu singi opo päpäname weebibine. ⁷ Binamewale, iyeta cime mäpu piyepu ngeni cewe ocanena cabu, page cine ngenecu plowa bii jepänisi weeme poto cidi me, ingle weeme Keriso bau ätrunga miiji pi. ⁸ Yoo, page cime ireclota toraca miijirage gyene, weene liba Yageyame cabu kokre cama imyemutenininige. ⁹ Yoo, cine lipulipu Acejiyame ne ibibirage eso ceerame, ingle page cime ngenecu gege baborage gyene teeme opo gaabe weeme name pi! ¹⁰ Ciye bimu cabu cine Acejiyame ne ewejanenisi egä cine weebibine päpäname piyepu ceerame weene lui täapume singi weeme ätrunga kokre me wawename.

¹¹ Mime Aceji Babe piyepu mime Yageyame Yeesu, cine teebibine aawejanenisi gaabe amacetnäjame cine weeme bau otni-me. ¹² Cine singi gemi Yageyame te weeme singi ne baborage wawename weeme yepäyepä bime täapume cuta piyepu iyeta nuuja biname

bime täápume. Weeme singi nuuja biname bime täápume piba yepä pana pa läbitepi cime singi te lipu baborage gyene weeme täápume. ¹³ Tabe ngenecu kokre pa icäripi, piba mime Yageyame Yeesu te liba cire tacnenutepi iyeta teerne conocäco biname cama, weene piba epu cäco piyepu conocäco cirege, weene liba mime Aceji Babe me opo gaabe je cire niclajutipi.

4

Acejiyame Apu Ireclota Tääpu Myene Singi

¹ Cime binamewale, cine weebibine ituge jaji Acejiyame te lipu ireclota mule täápume singi, piyepu cine umle gämi egä weene pepu mule ne ituge acata. Page cine weebibine cängena itemli-ninago piyepu jijaninago Yageyame Keriso me ngii cabu, weene pui ireclota mule ne cerämu babo me wawename. ² Ingle weene umle gemi lui mene cine weebibine ituge jaji ireclota mule poto cidi me, egä peei mene lui Yageyame Yeesu bau ca gyene. ³ Agesa Acejiyame me singi weeme täápume: Tabe singi gyene weene weeme ireclota iyeta teeme cabu acraname, piyepu iyeta sargi mule bine ägyemame. ⁴ Weene yepäyepä cina müiji umle äbitineye lipu gyene coga awadrece conocäco piyepu ajiri cäco mule ca, ⁵ piba weene niya singisingi lica läbitininuye, epu pana biname liiyepu lui cina Acejiyame umle lica gemi. ⁶ Weeme nuuja te gonerage teeme ätrunga biname ne niya jaawenute teeme coga awepläcita ca, ingle Yageyame te mäpu daremu cirege ceera biname ne lui te pepu mule ne jaawenuge, cine lipu weebibine ituge umle cama jaji. ⁷ Yoo, Acejiyame mibibine lica ituge äjäcra sargi mule wawename, yepä teeme conocäco biname lenajame. ⁸ Peei name pi lui te ai mene jäägyuge, tabe lica biname ne ägyi, yepä Acejiyame ne jäägyuge, lui te weebibine Aceji Seemo icärinininuge.

⁹ Yoo, cine lica mene yoogärenago owecu poto cidi me weeme ätrunga binamewale bime täápume, ingle weene peei abiberäja ituge acata Acejiyame bau ca. ¹⁰ Piyepu toraca gyene egä weene owecu cama jaawenemuye iyeta weeme ätrunga binamewale bine ai Make-doniya probins cabu je. Page cine singi gemi weene weeme owecu mule ne cerämu babo me wawename. ¹¹ Weene müiji ngene atwanena bojäcu lenajame, poto bime mule cabu gone papa labrabcinuinuye, cuta piyepu weeme singi gwidape bine weemämu kaakesea cabu ca jääpänemuye, cine lipu weebibine ituge jaji. ¹² Piba weene lica nuuja biname bine ätineräja, cuta piba nuuja biname lui ätrunga biname lica gemi, teepi weebibine opo gaabe me icranininsi.

Mime Yageyame me Acnenuta poto cidi me

¹³ Cime binamewale, cine singi weebibine toraca umle wawename biname poto cidi me, lui cina ai ireclota cabu ca ituge apira. Piba weene ngenecu mäpu lica birige, epu biname liiyepu lui cina lica jawagrijenisi ingwe ca ireclota ne. ¹⁴ Mine jäärungusi egä Yeesu tabe budre ge, piyepu budre cabu ca itu arpinantuji, peei name pi mine cuta jäärungusi egä lui biname cina ätrunga cama ituge budre äbita, Acejiyame teebibine Yeesu cama gigri cire yaawadamepi teeme acnenuta padare cabu.

¹⁵ Ai lui Yageyame me abiberäja mene gyene cine lui jijenininago. Mine lui cina ireclota cabu ninajininige Yageyame me acnenuta bimu cabu, lica niinäce gaabe me äbita mime ätrunga binamewale cabu ca lui cina ai ireclota cabu ca ituge apira. ¹⁶ Yoo, pui bimu cabu Yageyame te babo tage ca mene cirege jaji, cuta piyepu babo mename seemo me tagepogogo puma cirege, piyepu Acejiyame me moole pana gwidape te cirege angä, piba Yageyame te teemämu cire täinepi cabucewe ca gawe mameta me. Piba Keriso ne ätrunga biname lui cina ai ireclota cabu ca ituge apira, teepi budre cabu ca cire tarpinäripesi. ¹⁷ Piba mine lui cina ireclota cama cirege, Acejiyame te mibibine piyepu teebibine iyeta cire niwadipi carbe cabu me mime Yageyame cama opopa äyime puma lamlecu je buuwemope cabu. Siige, mine Yageyame cama piba gigri ninajininuge iyeteta ngälu cäco. ¹⁸ Yoo, weene peei mene lajananinuye ngenecu müiji me äbitame.

5

Weene Müiji Amacetnäjäneji Lenaja Mime Yageyame me Acnenuta täápume

¹ Binamewale, cine bucurage mene lica yoogärenisi mime Yageyame me acnenuta bimu piyepu padare poto cidi me, ² ingle weene umle ituge äbita egä mime Yageyame liba cire tacnenutepi biname cina cälu te cirege äti, epu pana teepi cälu te lipu jäätemuge ero biname te liba krokeciye cabu tatyaramtuge. ³ Yoo, biname cina liba cire jücepesi egä, “Cewe bojäcu gyene, mine cängena gemi,” piba taatu teepi baborage mäpu ne cirege päpäna. Pui mäpu te cire tatyaramtepi, epu pana pita te lipu tatyaramtuge magebi te iigyärame liba läbituge. Biname cina licarage uucratna peei mäpu cabu ca. ⁴ Yepä, cime binamewale, weene lica krokeciye cabu inajininige, peei name pi pui bimu te weebibine lica epu pana

cälu te jitinuge ero biname te liiyepu. ⁵ Yoo, mine lica gemi epu biname pana lui cina ciye me krokeciye cabu yaacrajuge, yepä mine iyeta lui epu pana gemi bimu me apacyera cabu lui cina ninajininige. ⁶ Peei name pi mine miiji cängena ireclota lenaja conocäco ngene atwana cama, piyepu lica nuuja biname pana liiyepu lui cina ute pana lenaja. ⁷ Yoo, ciye cabu biname cina ute waagraruge, cuta piyepu ciye cabu nuuja cina sice buduma pana waatinusi. ⁸ Yepä, mine bimu me apacyera cabu waatinago, peei name pi mine miiji cängenarage lenaja. Mine mime singi yaacranusi Acejiyame bau me piyepu teebine cängena jäätrungu-si. Peei lui mime seemo täápume epu pana älyenga gwidape birige mime tääpe täápume. Mine cängena jewagrijenisi pui padare ne Acejiyame liba mibibine cirege waadena. Peei awagrija lui mime täápume epu pana älyenga gwidape birige mope täápume. ⁹ Acejiyame te mibibine nijäcrininuji lica mäpu daremu päpäname, yepä iyeteta ireclota päpäname mime Yageyame Yeesu Keriso me ätityera name pi. ¹⁰ Tabe te budre ituge päpäna piba arpinantuji ai ingle name pi mine ten cama ngälu cäco lenajame. Mara pana lica gyene mine liba ireclota cama, coo, mine liba ireclota ituge apira teeme acnenua padare. ¹¹ Yoo, peei name pi weene yepäyepä bine itityäremeye piyepu ngenecu kokre ecäremeye, page lipu jeweneneniye.

Paulo Teeme Leta ne Umleumle Mene ca Ermuji

¹² Cime binamewale, cine cängena jijinago weene teebibine niinäce gaabe me wawename lui cina Acejiyame me kaakesea weeme ätrunga ingle cabu cängena jaawenusi, lui cina weebibine iwadininusi piyepu ibiberäjininusi Keriso me ireclota gaabe cabu lenajame. ¹³ Yoo, teebibine opo gaabe me yaacranemuye piyepu baborage singi läbitininuye teeme täápume, teeme kaakesea name pi. Weene iyeta poode cama inajininuge.

¹⁴ Cime binamewale, cine weebibine cängena jijinago egä ai mule bine wawenecame: Bina-bine bine yaablawäjemuye lui cina singi lica kaakesea wawename; wäluwälu mule biname bine kokre me jaawenuye; laatiabi ätrunga cabu bleela birige, teebibine yäätityäremuye; piyepu iyeta biname bine owelaamelame jaawenemuye. ¹⁵ Weene ire egä nuuja te gone niija ne jaawenute daremu awecnistame, teebine liba niija mule jaawenusi, yepä iyeta padare weene lapicnantinuye weeme yepäyepä bine miiji mule wawenecame cuta piyepu iyeta biname bine pepu miiji wawenecame.

¹⁶ Ngenecu gege inajininuge iyeta padare cabu; ¹⁷ piyepu iyeta padare weene miiji Acejiyame bau me mene iicemame; ¹⁸ cuta piyepu ngänuge weene lipu ireclota cabu inajininuge, weene eso yäacäruye Acejiyame ne. Yoo, Acejiyame te singi gyene weene peei mule bine weeme ireclota cabu wawenecame, ingle weene Yeesu Keriso me binamewale gemi.

¹⁹ Aceji Seemo lui kaakesea ne weeme cabu jaawenuge, gone iibana teebine. ²⁰ Biname te liba Acejiyame me tagepogogo mene jicemuge, gone teeme mene wata ägyi, yepä jäätecijuye, ²¹ jaatranuye egä nää toraca Acejiyame bau ca gyene, coo lica. Lui miiji gyene, weene peei ne joomluye, ²² yepä iyeta lui niija gyene, peei bine jäägyemuye.

²³ Acejiyame lui te mibibine poode nicärininuge, cine teebine ewejanenisi tabe weebibine teeme täápume mara me wawename iyeta weeme ireclota ngalebora, piyepu tabe weeme seemo, trupa, piyepu tääpe bine cängena ire atwime weene epu cäco äbitame mime Yageyame Yeesu Keriso me acnenua padare cabu. ²⁴ Yoo, Acejiyame lui te weebibine ala tisogleceninuge, tabe ai mule bine pa jaawenemepi, ingle iyeta teeme mene tabe toraca jaawenemuge.

²⁵ Ätrunga binamewale, cine singi weene Acejiyame ne awejena cuta cime täápume.

²⁶ Iyeta cime binamewale peema sebore mene cama jajecletränjineye.

²⁷ Cane Paulo weebibine jijenininine Yageyame me ngii cabu ai leta ne acnemame iyeta ätrunga binamewale bime bau me.

²⁸ Mime Yageyame Yeesu Keriso me miiji te weeme cabu lenajame.

Cane ngii Paulo, cäme mene ngälu peese.

PAULO ME NEENENI MANU LETA TESALONIKA ÄTRUNGA BINAME BIME BAU ME

¹ Cane Paulo, Siila piiyepu Timoti cama cane yoogärenänogo weeme bau me, lui cina inajininige Keriso me ätrunga biname bime ingle cabu Tesalonika babo cewe je. Weene mime Aceji Babe me biname gemi cuta piiyepu Yeesu Keriso weeme Yageyame gyene.

² Acejiyame mime Babe piiyepu Yageyame Yeesu Keriso, teeme miiji te weeme cabu lenajame piiyepu teepi weebibine poode ceerame.

Acejiyame te Biname bine Toraca Cirege Atrana

³ Cime ätrunga binamewale, iyeta padare cine miiji Acejiyame ne eso ceera weeme poto cidi me. Conocäco gyene cine peei ne wawename, ingle weeme ätrunga baborage me äbitenige piiyepu weeme singi weeme yepäyepä täápume cuta äbitenige baborage me. ⁴ Peei name pi cine liba Acejiyame me ätrunga ingle maramara cabu wäätänäno, cine biname bine jejananemisi weeme poto cidi me egä weene lipu ngenecu kokre cama inajininige weeme ätrunga cabu. Biname cina liba weebibine niija jiwenininusi piiyepu weene liba mäpu padare jääpänuye, peei te weeme ätrunga ne licarage yääyebingtuge.

⁵ Peei iyeta cina jaawabusi egä Acejiyame me atrana lui conocäco gyene, ingle peei cabu ca weene miiji me pa läbitipeye teeme waadena cabu äbäcnane, lui täápume weene mäpu cabu page ngenec oocaniniye. ⁶ Yoo, Acejiyame iyeta gwidape conocäco cire jaawenemepi. Lui biname cina weebibine mäpu jiwenininisi, tabe teebibine mäpu cabu cire yaacrane-mepi. ⁷ Piiyepu tabe weebibine weeme mäpu cabu ca cire isecräripi, cuta cibibine cime mäpu cabu ca cire nisecräripi, Yageyame Yeesu liba cire tabo-clomtepi cabucewe ca teeme kokre mename seemo cama. ⁸ Muye wädräji ca tabe biname bine mäpu daremu cire yäacäremepi lui cina umle lica gemi Acejiyame, piiyepu Miiji Mene ne mime Yageyame Yeesu poto cidi me lica yaacatusi. ⁹ Pui mäpu daremu lui egä teepi Yageyame bau ca cirege äyebengäja niija puupu cabu lenajame iyeteta. Teepi piba äblicäco Yageyame gome lenajame, coo piiyepu teeme jamyacu kokre päpäname, ¹⁰ tabe liba cire tacnenutepi ai gawecewe me ceräcerägäabu bimü cabu, teeme apaclyera te aboclomtame iyeta teeme binamewale cabu ca, piiyepu iyeta lui cina teebine jäätrungusi teepi teebine awepyeräjame. Weene cuta piiyepu pui biname cama cirege, ingle weene jäätrunguye cine lui mene weebibine ituge jaji.

¹¹ Peei name pi cine Acejiyame ne weeme täápume yaawejanusu tabe te weebibine peei ireclota täápume miiji me wawename lui täápume weebibine ituge jäjäcra. Cine teebine ewejanenisi tabe teeme kokre ca iyeta weeme singi bine miiji mule täápume wawenecame, piiyepu weeme ätrunga mule ne babo me wawename. ¹² Pepu pi mime Yageyame Yeesu me ngii te jamyacu apaclyera cama laboclomtuge weeme cabu ca, cuta piiyepu weene jamyacu apaclyera ne cirege päpäna teeme cabu ca. Peei te cire läbitepi mime Acejiyame piiyepu Yageyame Yeesu Keriso bime owecu cabu ca.

2

Ai Mene Lui Babo Niiyarage Biname poto cidi me

¹ Yoo, cane singi mene jajime mime Yageyame Yeesu Keriso me acnenuta poto cidi me, piiyepu tabe mibibine lipu waadena ten cama lenajame peei poto cidi me. Cäme binamewale, owecu, cane weebibine jijenininine egä ² gonerage ai walya mene ne padare yäacäruye weeme ngenec atwana ne atatrongärame piiyepu weebibine ngenecu mäpu me wawename, lui mene egä, "Mime Yageyame me acnenuta bimü te ituge atyaramta." Biname te liba Acejiyame me tagepogogo mene iicema cabu pepu jiiucuge, coo bäärmi mene cabu liba jiiucuge, coo liba jiiucuge egä cine te pepu mene ituge oogära weeme bau me, gone jäätrunguye. ³ Nuuja biname bime walya mene weene papa gone yaacatuwe, yepä page umle äbitineye egä mime Yageyame me acnenuta bimü te lica atyaramta ngälu bucurage biname cina liba niinäce cire latatrongäripesi Acejiyame bau ca, piiyepu babo niiyarage biname te cire taboclomtepi. Peei ingwe ca Acejiyame teebine mäpu daremu cirege ceera tabe muye puupu cabu iyeteta lenajame. ⁴ Peei babo niiyarage biname te iyeta uuje bine cire yäaciseräjemepi piiyepu iyeta lui bine acejiyame ca yaainemusi, iyeta biname cina lui bine yaawejanemusi. Tabe cire jiiucepi egä tabe baborage gyene iyeta peei cabu ca. Tabe cuta Acejiyame me iiwäreja mete me cire labacitepi puma adnatame walya mene cama egä, "Cane age säne Acejiyame."

⁵ Nää, weene ngenec lica jotwiniye egä cane weebibine ituge jaji peei poto cidi me, cane liba puga ge weene cama. ⁶ Yepä, peei mule te camuge äbita, ingle weene umle gemi ngena

pisi nyene peei niiya mule ne iibaname ai padare cabu. Pui babo niyarage biname te cirege aboclomta Acejiyame me singi padare cabu, piba taatu. ⁷ Yoo, pui niiya mule te uja ituge gije abacita ogä pana, yepä peei mule te lica babo cire läbitepi ngälu Acejiyame teeme biname ne cire yääyeblingtepi lui te peei babo niiya mule ne page jiiibenige. ⁸ Piba taatu pui babo niyarage biname te cire taboclomtepi, piyepu Yageyame Yeesu teebine budre me cire yaaglepi. Yoo, Yeesu me buuwemope piyepu teeme jamyacu apacyera cama opo cina teebine cire yiisibrecepi. ⁹ Pui babo niyarage biname teeme kokre ne Satani bau ca cire jääpänepi maramara ciitaca mule, piyepu walya owowä, piyepu cälu täti gwidape bine wawenecame. ¹⁰ Tabe babo niyarage mule bine cire jaawenemepi egä biname bine baborage cire yaangletnäjemepi, lui cina niiya puupu me cirege otni. Teepi niiya puupu cabu me otni, ai ingle naace popi teepi singi lica ge acatame pui toraca mene Yageyame Yeesu poto cidi me Acejiyame teebibine piba waadename. ¹¹ Naace name pi teepi singi lica toraca mene tääpume, ingle Acejiyame te teebibine kokre singi yääcäremuge walya tääpume teepi piba walya mene ätrungame. ¹² Piba iyeta lui cina babo singi ituge äbita niyaniya mule tääpume, piyepu toraca mene ne Yeesu poto cidi me lica jäätrungusi, Acejiyame te teebibine cirege jaji egä, “Weene niiya conocono biname gemi, siige äyeblinginey!”

Acejiyame te Weebibine Ituge Jäjäcra Toraca Ireclota Päpäname

¹³ Binamewale, cine miiji Acejiyame ne eso ceera weeme tääpume, tabe lui bime tääpume singi, ingle agedna cabu ca tabe weebibine itu jijinuji toraca ireclota päpäname. Tabe weebibine teeme miiji binamewale me ituge wawena Aceji Seemo me ätityera ca, weene liba toraca mene ne jitrungujiye. ¹⁴ Cine liba Miiji Mene Yeesu Keriso poto cidi me weebibine itu jijananinujago, Acejiyame te peei cabu ca weebibine ala tisoglicinuji mime Yageyame Yeesu Keriso me jamyacu apacyera cabu lenajame. ¹⁵ Peei name pi, cime binamewale, peei ätrunga cabu weene kokre cama jiclajutepi, piyepu cängena joomlemepeye cine lui poto cidi me weebibine ituge abiberäja cime bäärmi cabu piyepu cime oogära mene cabu.

¹⁶⁻¹⁷ Mime Aceji Babe te mibibine baborage owecu cama ituge ätityera. Tabe mibibine iyeteta ngenecu kokre itu nicärininuji ciige poto cidi me, piyepu ngenecu kokre pui padare ne cängena awagrijame. Cine teebine ewejanenisi, piyepu mime Yageyame Yeesu Keriso taberage ne ewejanenisi, teepi weeme ngenecu kokre me waweneme piyepu weebibine kokre ceerame iyeta miijimiji mene piyepu mule wawenecame.

3

Paulo Singi Gyene Teepi Ireclu Ätumutame Teeme tääpume

¹ Yoo, cime ätrunga binamewale, Acejiyame ne ewejaneye cime tääpume egä Yageyame me Miiji Mene wata babo me äbitame iyeta poto ta piyepu biname cina peei mene opo acitame, weeme gome lipu ituge äbita. ² Cuta ewejaneye tabe cibibine ätityerame niiya conocono biname bime cabu ca äsecerame, ingle naace gyene poto biname cina singi lica gemi ätrungame.

³ Yepä, Yageyame toraca gyene. Tabe weeme ngenecu kokre icärininige piyepu weebibine iwärintininige Satani cabu ca. ⁴ Yoo, Yageyame me ätityera name pi cine umle gemi egä weene page piyepu ingwe padare cabu jeweneneniye cine ngena jijenininisi weene waweneme.

⁵ Cine Yageyame ne ewejanenisi tabe weeme ngenecu bine waadename Acejiyame me singi cabu me piyepu Keriso me ngenecu kokre cabu me lenajame.

Iyeta Biname cina Miiji Kaakesea Waweneca

⁶ Cime binamewale, cine weebibine jijeninago Yageyame Yeesu Keriso me ngii cabu weene cudecewe padare lenajame iyeta weeme ätrunga biname cabu ca lui cina singi lica kaakesea waweneme piyepu singi lica cime abiberäja ngalebora lenajame. ⁷ Weene cängena umle gemi egä weene miiji cime pana mule wawena. Cine liba weene cama ninajininuji, cine durau lica birige kaakesea me. ⁸ Cine nuuja biname bau ca daremu cäco deedei piyepu gwidape lica ewademujago, pätä cine mage kaakesea ituge wawena. Ciye bimu cine kaakesea jewenujago ngälu ciye duusa, ingle cine singi lica ge weeme nuuja ne mäpu ceera. ⁹ Cime conocäco pisi nyene weebibine ätinerame cime deedei piyepu ute puupu tääpume cime abiberäja kaakesea daremu tääpume, yepä cine pepu lica jewenujisi, ingle cine singi ge weene cibibine ingwe äcwime. ¹⁰ Yoo, cine liba weene cama ninajininuji, cine piba weebibine jijananinujago egä, ‘Lui te liba singi lica kaakesea waweneme, tabe cuta gone deedei äbita.’

¹¹ Cine ai mene weebibine jijeninago, ingle mene ituge ätecija egä weeme poto biname cina durau gemi kaakesea tääpume. Teeme nuuja kaakesea lica gyene, yepä teepi nuuja biname bime kaakesea tääpume labrabicininusi. ¹² Pui biname tääpume cine weebibine

kokre jjenininago Yageyame Yeesu Keriso me ngii cabu teepi cängena lenajame piiyepu teeme singi deedei piiyepu gwidape bine kaakesea gaabe cabu päpäname.

¹³ Yoo, cime binamewale, gloose me gone äbita müijimiji mule wawenecame. ¹⁴ Liba biname pisi nyene weene cama lui te singi lica gyene ai oogära mene acatame, weene teebine opo ewatneniye, piba ten cama gone abasuta teebine ajiri me wawename egä teeme mule conocono gyene. ¹⁵ Yepä, gone pui biname ne cubuyame pana jaawenuye, pätä teebine cängena umle jewenepeye teeme cono-cono mule abmalame.

Paulo Teeme Leta ne Ai Mene ca Ermuji

¹⁶ Mime poode te tädenige Yageyame bau ca, peei name pi cine teebine ewejanenago weebibine poode ceerame iyeta padare piiyepu iyeta mule cabu. Yoo, Yageyame te weeme iyeta bime cabu lenajame.

¹⁷ Cane cämorage ime ca ai mene ne yoogärenine egä cane PAULO te weebibine jiwablinitine. Iyeta cäme leta cabu cane apu cäme ngii yoogärune; cäme oogära apu gyene.

¹⁸ Yoo, cane mime Yageyame Yeesu Keriso ne ewejanenine weebibine owecu cama ätityerame.

Cane ngii Paulo. Cäme mene ngälu peese.

PAULO ME NIINÄCE LETA TIMOTI BAU ME

Paulo Timoti ne Jewablenige

¹ Cane, Paulo, Keriso Yeesu me ätjepäneji biname gäne. Acejiyame, lui te mibibine niija cabu ca nisechränuge, piijepu Yeesu Keriso, mine lui cabu me ngene atwana singi yaacranimusi, teepi te najujäsi cane ai kaakesea wawename. ² Timoti, ätrunga cabu ca lui căme bägrä gäte, cane määme bau me yoogärenine. Acejiyame mime Babe piijepu Keriso Yeesu mime Yageyame, teeme miiji te määme cabu lenajame, teepi owecu äbitame määme täápume piijepu poode ceerame meebine.

Ire Cängena Walya Abiberäja täápume

³ Cane cääri naajenine maane Epeso babo cewe je lenajame, cane lipu uja naajepene, Makedoniya probins me liba lädepene. Poto biname cina peema Epeso je walya abiberäja ne eceenanenisi, maane miiji jübbemepi teebibine. ⁴ Jejemepi teepi abmaläcemame teeme singi gidä mene täápume piijepu uuje saare bime ngii täápume, ingle naace popi teepi biname bine jaawenimusi pui poto cidí me mene atraname. Teepi puma cita ca lica jääpänusi Acejiyame me singi ne mime täápume, mine lui ne ätrunga taatu ca jääpänusi. ⁵ Cane ai mene naace name pi jiićenine, egä mine miiji mimämu singi äbitename epu singi cama, lui te täduge jugi căco ngene atwana cabu ca, ngenecu poode cabu ca piijepu toraca ätrunga cabu ca. ⁶ Poto biname cina kaake ca itu sicelyäremumesi ai mule bine, siige kuu căco mene bine jitrannenisi. ⁷ Teepi puu singi abiberäja biname me äbitame Acejiyame me cotre ngalebora, nuuja gwidape teepi umle lica gemi, teepi ngena täápume jücemusi. Teepi supra căco jücemusi, yepä teepi mene me ingle umle căco.

⁸ Mine umle gemi, egä Moose me Cotre lui miiji gyene liba cängena yäăcwetnusi. ⁹ Mine gone ngene ätrimela, egä cotre cina lui miiji mule biname bime täápume lica gemi, yepä eei bime täápume lui cina cotre bine jaatropengäjimusi, ätecija căco biname bime täápume, Acejiyame umle căco piijepu niijaniya muleyame biname bime täápume, cuta eei bime täápume lui cina Acejiyame ne piijepu teeme gwidape opo gaabe me lica yaacitusi, cuta eei bime täápume teeme mage babe bine lui cina budre me yaaglecimusi coo poto biname bine lui cina yaaglecimusi budre me, ¹⁰ cuta eei bime täápume lui cina magebi rooriye bime mule yaacnusi nuuja biname cama lui teeme coga coo rooriye lica birige. Cotre cina cuta rooriye imäbägrä bime täápume lui cina teemeteme lacanäninusi, piijepu magebi ngulebägrä bime täápume lui cina peei yepä mule jaawenusi, cuta eei bime täápume lui cina biname bine aletname yaawadimusi, cuta lui cina walya waatrominusi, lui cina walya aitneja ne jüicusi, piijepu iyeta lui cina poto mule jaawenimusi, lui mara gemi toraca abiberäja cabu ca. ¹¹ Weene toracarage abiberäja ne Miiji Mene cabu ca jääpänuye, Acejiyame lui Mene näcäruji cane jajanemame. Miiji Mene lui babo jamyacu gyene, epucăco Acejiyame bau ca tädenige.

Acejiyame ne Eso Yäăcäresi Teeme Owecu name pi

¹² Cane eso ecärenine Keriso Yeesu mime Yageyame ne, lui te kokre ituge ceera cane ai kaakesea wawename. Tabe nacatuji, egä cane toraca biname gäne, siige najuji teeme kaakesea wawename. ¹³ Cane puu niinäcerage niija mene tiicemäjemumene teeme poto cidí me, teeme binamewale bine saube tewenenanemumene piijepu seglecananemumene, yepä Acejiyame te cebine owecu nawenuji, niija daremu lica näcäruji, ingle pui padare cabu căme ätrunga lica ge, peei name pi cane umle lica ge, cane ngena ne jewenujine. ¹⁴ Mime Yageyame babo owecu ge căme täápume, siige teeme pui owecu cabu ca cane kokre äbitujine Keriso ne ätrungame piijepu singi äbitame iyeta ätrunga biname täápume. Ätrunga piijepu singi lui eei biname bime tääpu myene, Keriso Yeesu cama lui cina yepä gemi. ¹⁵ Ai lui toraca mene gyene, biname cina miiji acata, egä Keriso Yeesu lui täduji ai gawecewe cabu me niija mule biname bine äsecrerame teeme mäpu cabu ca. Cane age säne baborage iyeta niija mule biname bime cabu ca. ¹⁶ Yepä Acejiyame te owecu nawenuji cebine, lui tage babo niijarage biname, naace täápume Yeesu Keriso te căme cabu ca aboclomtame, egä teeme owecu lipu baborage gyene. Yoo, lui biname cina pagege ätrunga acita Yeesu cabu siige iyeteta ireclota ne päpäna, teepi căme cabu ca pa jääpänepesi Yeesu me owecu ne. ¹⁷ Tabe lui te iyeteta enajenige mope biname me, lui gyene yepä taatu Acejiyame, budre căco piijepu päpäna căco, mine miiji teebine opo gaabe me acita piijepu awepyeräja iyeta padare cabu. Ai mene lui toraca gyene.

¹⁸ Timoti, căme bägrä, määme kaakesea gyene biname bine abiberäjame, cane ai leta cabu ngena yoogärinine. Maane liba ai ne jewenenite, piba toraca me äbitenige, biname cina

lui Acejiyame me tagepogogo mene niinäce gaabe me jicemepesi mäame poto cidi me. Maane miiji teeme pui mene kokre cama oomlaname, siige piba maane miiji gäte cängena cubu iicaname walya abiberäja biname bine apremelame. ¹⁹ Kokre cama joomlepi ätrunga ne piyepu niija mule gone jaawenute mäame ngenecu poode ne sabe wawename. Poto biname cina teeme ngenecu niija me ingle bine lica jäärngemusi ngene ca aglime, egä cine ngena niija ne ituge wawena, siige teepi teeme ätrunga bine yaabmalimusi. ²⁰ Ai mule te itu läbitepi Humenus piyepu Aleksanda täapume. Cane teebibine itu lääyeblingtepe ätrunga ingle cabu ca, Satani me ime cabu laacitepene teepi piba abiberäjame, egä teepi niyaniya mene gone icema Acejiyame poto cidi me.

2

Irecu Ätumutipeye Iyeta Biname bime täapume

¹ Yoo siige, cane baborage singi gäne weene Acejiyame bau me irecu ätumutame, teebine awejename cuta eso ceerame iyeta biname bime täapume. ² Weene miiji irecu ätumuta gawe mope biname bime täapume piyepu poto modamoda biname bime täapume mine piba bojäcu lenajame piyepu poode cama. Mine piba miiji Acejiyame ne cabu me wawena piyepu biname bine opo gaabe me acrana. ³ Apu irecu ätumuta lui miiji gyene, piyepu Acejiyame mime Äsecrerayame ne ngenecu miiji me jaawenuge. ⁴ Tabe singi gyene iyeta biname bine niija cabu ca äsecrerame piyepu teepi umle äbitame, egä ngena gyene toraca. ⁵ Yepä taatu Acejiyame pisi nyene, piyepu yepä taatu gyene, lui te biname bine teeme bau me ewadenemige. Pui lui biname gyene, Keriso Yeesu. ⁶ Tabe teeme ireclota ne iyemaluji iyeta biname bine kälyä wawename teeme niija mule cabu ca. Siige ai mule ca tabe toraca padare cabu jewabudnituji, egä Acejiyame singi gyene iyeta biname bine niija cabu ca äsecrerame. ⁷ Peei name pi Acejiyame te cebine najuji ätyepäneji biname täapume cane Miiji Mene ne acaname biname bime bau me, lui Israela biname lica gemi, piyepu teebibine abiberäjame, egä toraca ätrunga lipu gyene. Cane toraca mene jijenininine, walya lica otrominine.

⁸ Cane singi gäne rooriye cina iyeta ätrunga maramara ingle cabu irecu ätumutame Acejiyame bau me; cane singi teepi ime awepengäjame toraca ngenecu cama irecu ätumutame, claabe cäco piyepu niiyarage ngene atwanena cäco. ⁹ Cuta piyepu ätrunga magebi cina gone oräre abasogära. Teepi miiji cängena cäbletäape asigrera. Teepi gone abasogära bucurage kusa piyepu oplacmeläja gwidape ca, poto edingäli abasogära gwidape ca coo babo daremu cäbletäape ca. ¹⁰ Pätä ätrunga magebi cina miiji miijimiji mule waweneca, siige peei te teebibine jamyacu me jaawenimuge piyepu peei lui conocäco gyene magebi bime täapume, lui cina Acejiyame täapume mara me ituge äbita. ¹¹ Magebi cina miiji bojäcu lenaja abiberäja padare cabu piyepu teepi miiji ätrunga ingle modamoda biname bine ätecija. ¹² Cane singi lica magebi te irecu ätumuta ngalebora abiberäjame coo mope biname me äbitame rooriye bime täapume, yepä tabe miiji bojäcu lenaja. ¹³ Ingle naace popi Acejiyame te Adamu ne niinäce jewenuji, Eeba ne ingwe ca jowenuji, peei name pi rooriye te miiji mope biname me lenaja. ¹⁴ Cuta Adamu ne lica engletnäjuji Satani te, yepä Eeba ne ongletnäjuji, siige tabe te Acejiyame me cotre ne jetropangtuji. ¹⁵ Yepä, biname lui te ai gawecewe me niija ne ecatuji, tabe magebi me cabu ca gyene, peei name pi magebi cina teeme cabu ca ireclota ne birige päpäna, teepi liba ätrunga cama, owecu cama, epucäco piyepu cängena ngene atwana cama.

3

Mene Ätrunga Ingle Mope Biname täapume

¹ Ai icana lui toraca gyene egä, “Laati te liba singi ätrunga ingle mope biname me äbitame, tabe singi miijirage kaakesea täapume.” ² Teeme cabu gone nuuja niija ne päpäna. Tabe miiji yepä taatu coga cama biname, tabe miiji teemämu awesongära piyepu miijirage ngene atwanena cama lenaja, tabe miiji miijirage muleyame biname, tabe miiji biname bine mogobi waweneca piyepu tabe miiji miijirage abiberäja biname. ³ Tabe gone bucurage sice nänäja biname piyepu arngi biname coo trängäli cama biname, yepä tabe miiji owecu cama piyepu poode cama. Tabe rarekaake singisingi gone. ⁴ Tabe miiji teeme mete biname bine cängena ire atwi, cuta teeme bägrä bine wawena teebine ätecijame piyepu opo gaabe me acitame. ⁵ Rooriye te liba äblicäco teeme mete biname bine ire atwi, tabe piba lipulipu Acejiyame me ätrunga ingle ne ire atwi. ⁶ Tabe gone kirece ätrunga biname, ingle naace popi pepu biname te liba läbituge ätrunga ingle mope biname me, tabe mope babo läbituge, siige teebine Acejiyame te jaatranuge, Satani ne lipu jitranuji, tabe liba mope babo me äbituji. ⁷ Cuta tabe miiji epu lenaja, egä ätrunga cäco biname cina teebine opo

gaabe me yaacitusi. Tabe liba cängena lica lenaja, piba niyya mene jicemusi teeme potu cidi me, siige Satani me dici te joomluge.

Mene Ätrunga Ingle Ätityera Biname bime täápume

⁸ Ätrunga ingle ätityera biname cina miiji miijirage muleyame lenaja ätrunga ingle mope biname te liiyepu. Teepi miiji toraca ngenecu cama biname. Teepi gone bucurage sice nänäja, gone rarekaake singisingi. ⁹ Teepi miiji yepä taatu ngene atwana cama oomlana toraca mene ne, Acejiyame te lui ne tewabudnituji ätrunga potu cidi me. ¹⁰ Teebibine miiji niinäce apicetnära. Teepi liba äsi pui cabu ca, siige teepi piba miiji birige pei kaakesea ne wawename. ¹¹ Teeme cogawale cina cuta miiji miijirage muleyame cängena biname, conocäco taatu iyeta mule cabu. Teepi gone iicetna mule wawena. ¹² Ätrunga ingle ätityera biname cina miiji yepä taatu coga cama. Teepi miiji cängena ire atwi teeme bägrä bine piyepu iyeta mete biname bine. ¹³ Lui ätityera biname cina teeme kaakesea cängena jaawenusi, biname cina teebibine opo gaabe me yaacranimusi, teepi siige piba wälu cäco birige mene iicema Yeesu Keriso ne ätrungame.

Toraca Mene Ätrunga potu cidi me

¹⁴ Cane ai mene liba yoogärenine, cäme ngene atwana singi pisi nyene määme bau me watawata otnime. ¹⁵ Yepä cäme otni liba däägudägu gyene, ai leta te piba meebine umle naawenenige egä mine Keriso me binamewale lipu lenajame. Mine ireclota Acejiyame me binamewale gemi, teeme ätrunga ingle gyene, lui te jibyetnininige piyepu ewärimtenige toraca mene ne Acejiyame potu cidi me. ¹⁶ Mine iyeta umle gemi, lipu baborage gyene ai toraca mene Acejiyame lui ne seboclomtuji mime ätrunga potu cidi me egä,

Keriso biname me tääpe ne ecatuji,
teeme budre cabu ca arpinenta te jewabudnituji,
egä tabe Yageyame gyene.

Acejiyame me mename seemo cina teebine jepänanujisi.

Teeme potu cidi me mene jejananemujiisi iyeta potu ta.

Bucurage biname cina teebine jitrungujisi

iyeta potu ta ai gawecewe cabu.

Acejiyame te teebine ecatuji cabu me.

4

Walya Abiberäja Biname

¹ Aceji Seemo te pajecurage jicenige, egä ceräcerägäabu padare cabu potu biname cina teeme ätrunga bine cire yaabmalecmepesi, siige gije cire labacitipesi walya seemo bine ätecijaname piyepu niyya cable bime abiberäja ne ingwe äcwime. ² Apu abiberäja ne cire yaacenanesi walya angletnejayame biname, lui cina ngene ca lica yaaglusi, egä teepi niyya mule biname gemi. ³ Teepi biname bine cire jibbananemepesi coga rooriye awadrecame cuta cire jaawenemepesi potu deedei cibi cude me. Yepä Acejiyame te iyeta deedei cibi bine ituge wawena loolo piyepu cibi täápume. Mine lui cina ätrunga biname gemi piyepu umle ituge äbita toraca mene potu cidi me, mine eso cama ärngäjame piyepu ärwäjame, ⁴ ingle iyeta, Acejiyame lui bine ituge wawenetnäja, miiji gemi. Nuuja ne gone ägyi, yepä miiji eso cama iyeta waadena. ⁵ Acejiyame te lipu ituge cude cäco me wawena iyeta cibi deedei bine piyepu mine liba eso yäacärusi, ai neeneni ingle name pi iyeta cibi deedei miiji gemi cibi me piyepu loolo me.

Umle Mene Timoti bau me

⁶ Timoti, maane liba umleumle jaawenimute ai walya abiberäja potu cidi me ätrunga biname bine peema, piba maane Keriso Yeesu me miijirage kaakesea bägrä gäte. Maane miiji cängena abiberäjepi Keriso bau ätrunga lipu gyene piyepu kokre joomlepi, maane lui toraca abiberäja ne ituge äcwetna, siige piba maane seemo ireclota cabu miiji naanajepi. ⁷ Maane gone emä, gidä mene luma jicemimusi, ingle Acejiyame cäco papa mene gemi. Yepä maane miiji eei mule bine waweneca, lui cina määme ätrunga ne babo jaawenusi. ⁸ Biname te teeme tääpe ne liba jaapnicuge, pei lui miiji birige ai ireclota täápume. Yepä tabe liba eei mule bine waweneca, lui cina teeme ätrunga ne babo me jaawenusi, pui lui iyeteta miiji gyene, ingle pei te ireclota yäacärüge page padare täápume piyepu ciige padare täápume. ⁹ Ai mene lui toraca gyene, miiji acata. ¹⁰ Mine lagletnäjinago, mage kaakesea jaawenusi, ingle mine ituge mime ngene atwanana singi bine acrana ireclota Acejiyame bau me, lui te iyeta biname bine birige äsecrena niyya cabu ca, yepä toraca eei bine lui cina ätrunga cama gemi.

¹¹ Jejananemepi, ebiberäjemepi ai potu cidi me. ¹² Nuuja te gone meebine mamye biname name pi äsädena. Pätä maane määme ireclota cabu ca eboclomtepi teepi ngena

iicaname piiyepu wawename, teepi lipu owecu äbitame, ätrungame piiyepu epucäco lenajame. ¹³Maane mäame kaakesea cabu ngenecu ecitepi, Oogäräneji mene ecnemepi ätrunga biname bime cabu me, bäärmi mene jegednemepi, ebiberäjemepi, ngälu cane pa lädepene peeyeme. ¹⁴Gone ai kaakesea ne yaabmalute, Aceji Seemo lui täápume umle piiyepu kokre nääcärepä, niinäce gaabe ätrunga biname cina liba ime yaacranepesi mäame papa cabu me piiyepu Acejiyame me tagepogogo mene iicana biname cina liba jüicemepesi ai potocidi me. ¹⁵Maane gone durau läbitute iyeta ai kaakesea wawename, yepä maane toraca ngenecu cama jewenepi, piba biname cina päpäname egä maane babo äbitenite. ¹⁶Maane ire, egä maane cängena naanajenige piiyepu toraca mene ebiberäjenemite biname bine. Maane liba ai ne jaawenute iyeta padare cabu, maane ngälu cäco ireclota ne cire jepänepi piiyepu lui cina mäame mene yäätəcijemuge, teepi cuta ngälu cäco ireclota ne ire jääpänepesi.

5

Timoti Lipu Lenajame Ätrunga Biname cama

¹Moda ne gone drämä cama ablawa, yepä cängenarage eblawepi, epu mäame babe ne lipu yaablawute. Mamyee rooriye bine epu jewenemepi mäame naane igane bine liiyepu, ²molyege bine mäame mage ne liiyepu, mamyee magebi bine mäame ngulewale bine liiyepu, epucäco.

³Maane itityäremepi cuublacubla bine, lui bime binamewale lica gemi. ⁴Yepä liba cuubla me bägräwale coo daadewale piti nemi, teepi miiji abiberäja teeme inglewale bine ire atwime, Acejiyame te lipu ituge jaji. Mage babe cina lipu bägrä bine ire jaatwemusi, teepi cuta miiji peei ne daremu wawena teebibine ire atwime, ingle ai lui Acejiyame me singi gyene. ⁵Lui cuubla me binamewale lica gemi teebine ire atwime, tabe teeme ngene atwanena Acejiyame bau me yaacituge, siige iyeta padare, ciye bim, irecu lämutanuge Acejiyame bau me ätityera ne päpäname. ⁶Yepä lui cuubla teeme singisingi täápume waanajuge, tabe puu ireclota onajenige, yepä seemo ireclota ngalebora tabe budre gwene. ⁷Maane ai mene jejananemepi teebibine, piba nuuja te äblicäco niiya mene iicana teeme potocidi me. ⁸Laati te liba lica ire atwime teeme inglewale bine, toraca eei bine teeme mete cabu lui cina icrajenige, tabe teeme ätrunga ne jäägyuge, siige teeme mule niiyarage gyene ätrunga cäco biname bime mule cabu ca.

⁹Maane epu cuubla bine ngii acranecame ätityera päpäname, lui cina siksti kämäge cama piiyepu yepä taatu rooriye cama ituge. ¹⁰Teepi miiji epu magebi, lui bime potocidi me jüicusi, egä teepi miijirage mule bine ituge waweneca, teeme bägrä bine cängena ituge waadena, cuta miijirage mogobiyame, gloose cäco owecu mule ituge waweneca potocidi me. ¹¹Maane ai mene jejananemepi teebibine, piba nuuja te äblicäco niiya mene iicana teeme potocidi me. ¹²Laati te liba lica ire atwime teeme inglewale bine, toraca eei bine teeme mete cabu lui cina icrajenige, tabe teeme ätrunga ne jäägyuge, siige teeme mule niiyarage gyene ätrunga cäco biname bime mule cabu ca.

⁹Maane epu cuubla bine ngii acranecame ätityera päpäname, lui cina siksti kämäge cama piiyepu yepä taatu rooriye cama ituge. ¹⁰Teepi miiji epu magebi, lui bime potocidi me jüicusi, egä teepi miijirage mule bine ituge waweneca, teeme bägrä bine cängena ituge waadena, cuta miijirage mogobiyame, gloose cäco owecu mule ituge waweneca potocidi me. ¹¹Maane ai mene jejananemepi teebibine, piba nuuja te äblicäco niiya mene iicana teeme potocidi me. ¹²Laati te liba lica ire atwime teeme inglewale bine, toraca eei bine teeme mete cabu lui cina icrajenige, tabe teeme ätrunga ne jäägyuge, siige teeme mule niiyarage gyene ätrunga cäco biname bime mule cabu ca.

¹¹Yepä gone mamyee cuubla bine ngii yaacranimute ätrunga ingle cabu ca ätityera ne päpäname, ingle singisingi ngene atwa-nena te liba joomlemuge, teepi Keriso ne kaake ca yääcelyärusi, siige latejcläjininusi. ¹²Teepi apu kaake me jaawenusi teeme niinäce mene Keriso me kaakesea wawenecame piiyepu rooriye cäco lenajame, siige teebibine cirege ablaweja. ¹³Teepi cuta mete bine yaacnemusi, papa lenaja ca padare ne yaapirusi. Cuta peei taatu lica, teepi icetna mule yaacnusi, potocidi me biname bime mule cabu labrabicininusi. Piiyepu teepi mene jüicemusi, lui bime teepi lica cirege icema. ¹⁴Peei name pi cane singi gäne mamyee cuubla cina cääri rooriye awadrecame, bägrä ärngecame piiyepu mete gwidape bine ire atwime, piba mime äciseräjayame biname cina äblicäco mibibine aitneja. ¹⁵Cane ai naace name pi bii jüicine, ingle potocidi me cuubla cina uja ituge teeme ätrunga bine abmaläcema, siige Satani ne icwetnenisi. ¹⁶Liba ätrunga magebi yepä me coo ätrunga rooriye yepä me cuublacubla piti nemi teeme ingle cabu, teepi miiji teebibine ire atwime. Ai mäpu gone ätrunga ingle biname bine ceera, piba teepi kälyä gemi ire atwemame lui cuublacubla taatu gemi.

¹⁷Niinäce gaabe ätrunga biname lui cina miijirage mope biname me yaacrajuge, teepi ibibi gemi neeneni gääbu daremu acata, toracarage eei biname lui cina bäärmi jaagednane-musi piiyepu yaabiberäjimusi. ¹⁸Oogäräneji mene te nata jüicenige egä, "Lui kau te wiiti kuu bine jäämungäjemuge, gone tage jäätäyuye tabe loolo cäco kaakesea wawename," piiyepu cuta jüicenige egä, "Kaakesea biname te miiji ge teeme daremu ne päpäna."

¹⁹Lui biname te ätrunga ingle babo biname ne jaaitnäjuge, gone teebine ätecija, liba neeneni coo nesae biname lica gemi aitnejame, egä toraca gyene. ²⁰Lui biname cina niiya mule jaawenimusi, biname bime sobe cabu yaablawimute, piba potocidi me cina wälu läbitininusi.

²¹Acejiyame piiyepu Keriso Yeesu piiyepu äjäcräneji mename seemo, teeme opo gaabe cane naajenine maane cäme mene ibi wawename. Gone nuuja ne owelale jaawenute, yepä

maane miiji iyeta ätrunga biname bine yepä ibi yaablawäjemute. ²² Gone naalocnicuge ime acitame biname cabu me teebine babo biname me wawename. Gone lalenglecäjute nuuja biname bime niija mule cama, yepä maane epucäco naanajepi.

²³ Niije taatu gone yäänäjumute, waina niije cuta mati yaanute mäame came niija name pi piyepu pitapita name pi.

²⁴ Bucurage biname cina pajecurage niija mule yaacnemusi, siige teeme niija mule bine niinäce gaabe me jaatranimusi. Lui cina niija mule ogä yaacnemusi, ingwe ca pajecu me läbitininusi atrana täापume. ²⁵ Cuta pepu gyene, poto biname bime miiji mule bine pajecurage jääpänumusi, cuta lui cina päpäna cäco gemi page, teepi äblicäco ämlitäneji lenaja.

6

Mene Aletnäneji Biname bime poto cidi me

¹ Ätrunga biname lui cina aletnäneji biname gemi, teepi miiji teeme modamoda biname bine opo gaabe me acrana, piba nuuja te äblicäco niija mene iicana Acejiyame poto cidi me piyepu mime abiberäja poto cidi me. ² Laati bime modamoda biname ätrunga biname, teepi gone ätecija cäco äbita teeme täापume, inge teepi yepä ätrunga cama gemi. Päta teepi miiji teeme kaakesea cängena wawena, inge teeme modamoda biname teeme kaakesea cabu ca lui daremu jääpänumusi, teepi teeme miijirage ätrunga binamewale gemi.

Maane miiji biname bine apu ebiberäjemepe, kokre ecäremepi teepi wawenetnäjame.

Walya Abiberäja piyepu Toraca Dogwe

³ Laati te liba yaabiberäjimuge mara abiberäja, lui yepä lica gyene mime Yageyame Yeesu Keriso me toraca mene cama cuta mime abiberäja cama ätrunga poto cidi me, ⁴ tabe mope babo me läbituge piyepu tabe umle cäco biname birige. Teeme niiyarage singi pisi nyene mene poto cidi me äcelame piyepu mene abajame. Ai te biname bine jaawenimuge ire patre aglime, arngi me, niijaniya mene nuuja biname ne jajime, niiyarage ngene atwaname, ⁵ äcelename. Apu muleyame biname cina mopemuli cäco gemi; teepi toraca mule ne ituge abmala. Teepi apu angige, egä ätrunga lui gaabe gyene dogwe päpäna täापume.

⁶ Yoo, ätrunga gaabe te biname ne toraca dogwe me jaawenuge, tabe liba ngene ca jaagluge, teeme ngena pisi nyene. ⁷ Mine liba aplimla, mine nuuja gwidape cama lica otni; mine liba budre pagege, mine nuuja gwidape ne lica acana, ⁸ peei name pi mime liba deedei piyepu cäbletäape piti nemi, mine miiji bojä agi. ⁹ Yepä lui cina singi bucurage gwidape täापume, teebibine birige angle-tneja piyepu Satani me dici te jaabaletnecimuge. Budubuduma piyepu niiyarage singi cina teebibine joomlemimusi, ngälu siige iyeta niija cabu yaacranuge. ¹⁰ Rarekaake arngema cabu bucurage cina ituge teeme ätrunga bine apesera, siige bucurage mäpu cina teeme ngenecu bine jaagadäjemusi.

Ätrunga Biname me Ireclota

¹¹ Timoti, maane lui Acejiyame me biname gäte, cude padare naanajepi apu mule cabu ca. Maane ecrinäjemepi conocäco lenajame, Acejiyame ne opo gaabe me acitame, Keriso ne ätrunga-me, owecu me, ämyemutaname cewe oocana cabu, owelaamelame biname me lenajame. ¹² Maane ätrunga gaabe cabu cängena uuwamepi, siige iyeteta ireclota ne ecatepi, lui ireclota täापume meebine ituge ala asogleca, maane liba biname bime sobe cabu mäame ätrunga ne cängena eboclomtujite. ¹³ Acejiyame lui te iyeta gwidape bine ireclota ecäranenenemige, piyepu Yeesu Keriso lui te Pontio Pilato me opo gaabe ätrunga ne jewabudnitujite, cane teeme opo gaabe naajenine ¹⁴ egä maane ätecijame, meebine ngena ituge jaji. Gone naatramuge ai cängena wawenecame ngälu mime Yageyame Yeesu Keriso te cire tacenutepi. ¹⁵ Acejiyame lui te miiji gyene, lui yepä taatu gyene biname bine waadename, iyeta mope biname bime Mopeyame gyene, iyeta yageyame bime Yageyame gyene, tabe lui padare ne ecituji, tabe piba cirege teebine cääri ätyepa. ¹⁶ Acejiyame, tabe taatu gyene budre cäco. Tabe epu apaclyera cabu enajenige, egä nuuja te äblicäco teeme gome otni. Nuuja biname te lica ituge teebine päpäna cuta äblicäco päpäna. Mine miiji teebine opo gaabe me acitename, piyepu tabe kokre cama lenajame iyeteta. Ai lui toraca mene gyene.

¹⁷ Jejemepi ätrunga inge cabu lui gwidape dogweyame gemi, teepi gone mope modamoda me äbita piyepu gone ngene atwa-nena acrana watawata dogwe cabu me. Päta teepi miiji teeme ngene atwana acrana Acejiyame cabu me, lui te nicäraninuge iyeta, mine lui täापume singi mine gege lenajame. ¹⁸ Maane jejemepi teepi miijimiji mule wawenecame, siige piba pui miijimiji mule lui teeme dogwe gemi. Teepi miiji ceera biname lenaja, temiji kupae wawena poto biname bine. ¹⁹ Teeme apu mule lui dogwe pana gemi teeme ciige lenaja täापume, siige teepi toraca ireclota ne jääpänumusi.

²⁰ Timoti, maane kokre joomlepi meebine ngena ituge ceera maane ire atwime. Maane cude padare lenajame budubuduma mene cabu ca piiyepu cuta walya abiberäja cabu ca, lui tääpume biname cina jaangemuge, egä umle mene gemi. ²¹ Poto cina ituge iicana, egä teeme pui umle puga ge, yepä teepi siige teeme ätrunga bine ituge apesera. Acejiyame me müji te weeme cabu lenajame.

Cane ngii Paulo. Siige cäme mene ngälu peese.

PAULO ME NEENENI MANU LETA TIMOTI BAU ME

Paulo Jewablenige Timoti ne

¹ Cane, Paulo, Keriso Yeesu me ätyepäneji biname gäne Acejiyame me singi miji pi. Cane ätyepäneji gäne ireclota poto cidi me mene jajanenane, lui ireclota Acejiyame te ituge jaji ceerame piyepu lui ireclota mime yene, mine liba Keriso Yeesu cama yepä gemi. ² Timoti, ätrunga cabu ca lui căme miijirage bāgrā gāte, cane määme bau me yoogärenine. Acejiyame mime Babe piyepu Keriso Yeesu mime Yageyame, teeme miiji te määme cabu lenajame, teepi owecu äbitame määme täápume piyepu poode ceerame meebine.

Paulo me Eso Mene piyepu Kokre Ceera Mene

³ Cane Acejiyame ne eso yääcārune, cane lui täápume kaakesea jewenenine toraca ngenecu piyepu miijirage asicnenta cama epu pana căme saarewale cina liiyepu. Cane teebine eso yääcārune iyeta padare, ciye bimü, căme irecu ätumuta ngalebora liba meebine ngii naajanane. ⁴ Cane ngene jotwine määme ele mäcu poto cidi me, siige cane baborage singi gäne meebinerage päpāname, piba cane baborage gege lenajame. ⁵ Cane cuta ngene jotwine määme toraca ätrunga poto cidi me, epu ätrunga määme daade Loisi me piyepu määme mage Yuunis me ätrunga liiyepu. Cane umle gäne, egä määme cuta pepu ätrunga pisi nyene. ⁶ Peei name pi cane naajenine, maane gone yaabmalute pui kaakesea ne, Acejiyame lui näacärepi meebine, cane liba ime laacitepene määme papa cabu me. ⁷ Ingle Acejiyame te lui Seemo itu nicärininuji mibibine, lica niwenininuge wälu me, pätä kokre nicärininuge, niwenininuge singi äbitaneme poto biname bime täápume piyepu cāngena lenajame.

⁸ Peei name pi wälu ajiri gone läbitumi mime Yageyame ne aitnejame, cuta căme täápume ajiri gone, lui te krokeciye mete cabu nanajinige ingle teeme kaakesea name pi. Eewe, pätä maane cane cama mäpu cabu näämyemutepi Miiji Mene name pi. Acejiyame te kokre näacärenige maane peei ne wawename. ⁹ Tabe niya cabu ca nisechränuji mibibine, siige nisoglicininuji teeme binamewale täápume, lica mime kaakesea name pi yepä teeme singi piyepu owecu name pi. Agedna me niinäce gaabe me tabe uja ngene jotwananuji mibibine owecu wawename Yeesu Keriso me cabu ca. ¹⁰ Siige page ai padare cabu mine teeme pui owecu ne ituge päpäna, Keriso Yeesu mime ireclota ceera biname te lipu täduji. Miiji Mene cabu ca mine umle gemi, egä Keriso ituge budre me kokre ne agli piyepu ngälu căco ireclota ne aboclomta mime täápume.

¹¹ Acejiyame te cebine itu najuji Keriso me ätyepäneji biname me lenajame cuta Miiji Mene ne acenename cuta piyepu abiberäjame, ¹² peei name pi cane cewe oocaninine ai mäpu cabu. Yepä cane ajiri wälu lica gäne, ingle cane umle gäne, cane laati cabu me ätrunga ne ituge acita; siige cane umle gäne, egä tabe lui Miiji Mene näcäruji, teeme kokre pisi nyene pui mene ne ire atwime ngälu ngälugaabe me. ¹³ Cane lipu naabiberäjepene maane bäärmii agedname piyepu biname bine abiberäjame, maane pepu jewenepi. Kokre joomlepi ätrunga piyepu singi bine, lui mimi negi, mine liba Keriso Yeesu cama yepä gemi. ¹⁴ Aceji Seemo lui te mime cabu enajenige, maane teeme kokre ca Miiji Mene ne joomlepi, meebine lui mene ituge ceera jajanenane.

¹⁵ Maane umle gāte, egä iyeta ätrunga biname cina Asiya probins ngalebora cebine ituge abmala, cuta Pugelus Hermogenes. ¹⁶ Yageyame te Onesiporus ne teeme ingle cama owecu jaawenepi, ingle tabe cebine bucurage gääbu ngenecu miiji me itu naawenanepi. Ngānu gyene, cane krokeciye mete cabu nanajenige, tabe ajiri lica ge, ¹⁷ yepä tabe liba tatyaramtepi Rooma babo cewe me, tabe nārngepi, ngälu näpänepi. ¹⁸ Yageyame te teebine owecu jaawenepi atrana bimü cabu! Maane iyeta umle gāte, tabe Epeso babo cewe je cebine lipu bucurage mule ca nätityärepi.

2

Mäpu cabu Lipu Lenajame Wälu căco

¹ Timoti, ätrunga cabu lui căme bāgrā gāte, maane kokre äbitepi Acejiyame me baborage miiji cabu ca, lui mime yene, mine liba Keriso Yeesu cabu ninajininuge. ² Maane lui abiberāja ne ituge ätecija căme bau ca biname bime irewale, ecärempi toraca biname bine, lui cina miiji gemi poto bine abiberäjame.

³ Miijirage cubu biname te mäpu cabu lipu yäämyemutuge, maane cuta miiji mäpu cabu pepu näämyemutepi Keriso Yeesu miji pi. ⁴ Cubu biname te eei taatu ne jaawenuge, teeme cubu mope biname te lui täápume jaajuge. Tabe lica cewe kaakesea cabu labrubicuge, ingle tabe singi gyene teeme mope biname ne ngenecu miiji me wawename. ⁵ Coo piyepu lui biname te luuwamuge daremu acatame, tabe äblicăco päpäna, liba bääclena me toracarage

mule bine lica yäacwetnimuge. ⁶ Piipyepu lui calwacupi biname te baborage kaakesea birige wawena, tabe miiji niinäce kuu bine ärucna. ⁷ Maane miiji ngene jotwananepi ai poto cidi me, siige mime Yageyame te page naawenepi maane umle äbitame iyeta gwidape poto cidi me.

⁸ Yeesu Keriso, Acejiyame te lui ne erpinantuji budre cabu ca, lui tage Daawida me kaakesaare, cane lipu ituge abiberäja Miiji Mene cabu ca, tabe miiji puma mäame ngenecu cabu. ⁹ Ingle naace popi cane Miiji Mene jaajanemune, peei name pi cane cewe oocanenine, ätäyäneji gäne niyaniya mule biname bime pana. Yepä Acejiyame me Mene ätäyäneji lica gyene, ¹⁰ peei name pi cane nämyemutenige iyeta cewe oocanena cabu je Acejiyame me äjäcräneji biname bime name pi naace täापume Keriso Yeesu teebibine niya cabu ca äsecrerame siige iyeteta ireclota ceerame. ¹¹ Ai lui toraca iicana gyene egä,

“Mine liba Keriso cama budre,

mine cuta teta cama ireclota lenaja.

¹² Mine liba mäpu cabu ämyemutana,
mine cuta teta cama biname bine waadena.

Mine liba teebine aina,
tabe cuta mibibine aina.

¹³ Ngänu gyene, mine liba toraca ngenecu cama lica teeme täापume,
yepä tabe toracarage mime täापume,
ingle tabe pipuyame gyene.”

Keriso me Toraca Kaakesea Bägrä

¹⁴ Mäame ätrunga inge biname bine cääri jejemepi ai poto cidi me. Acejiyame me opo gaabe je jejemepi teepi abmalame äcela mule ne mene poto cidi me. Teepi pui mule cabu ca nuuja miiji ne lica jääpänsi, yepä sabe jaawenimusi, lui biname cina yäätcejemuge. ¹⁵ Kokre äbitepi maane Acejiyame me opo gaabe je toracarage kaakesea bägrä lenajame, lui te ajiri lica birige teeme kaakesea täापume, yepä conocäco yaabiberäjimuge toraca mene Keriso poto cidi me. ¹⁶ Gone emä lenaja, luma Acejiyame cäco budubuduma mene jaatranimusi, inge biname bine cude padare jaawenimusi Acejiyame bau ca pui mene cina. ¹⁷ Pepu mene lui babo droobo pana gyene, täape ne lui te jaarwenuge. Pipu muleyame biname gegi lui Humenus piipyepu Piletus. ¹⁸ Teepi toraca gaabe ne yaabmalepäsi, jüicemenäsi, egä mine uja budre cabu ca ituge arpinera, siige nuuja biname bime ätrunga ne sabe jewenenäsi. ¹⁹ Yepä lui caage inge bine Acejiyame te ituge äteera, akocneja lica. Pui cabu apu oogäräneji gyene egä, “Yageyame umle gyene, teeme binamewale laati bemi,” cuta apu oogäräneji gyene egä, “Laati te liba jüicuge, egä tabe Yageyame me biname gyene, tabe miiji ätecita niya mule wawena cabu ca.”

²⁰ Baborage mete cabu silba piipyepu gol disi taatu lica gemi, yepä uli ca piipyepu gawe ca wawenäneji disi cuta piti nemi. Poto lui modamoda mule täापu memi, poto lui papa mule täापu memi. ²¹ Lui biname te luucranuge walya abiberäja cabu ca, cane lui täापume bii jüicine, tabe ibibi birige toraca mule täापume epu silba, gol disi liipyepu. Tabe ituge mara me äbita teeme Yageyame täापume. Tabe miiji birige teeme täापume, ireire yaanajuge iyeta miijimiji mule bine wawenetnäjame. ²² Jigyemepi mamye biname bime singisingi mule bine, ericnemepi conocäco lenajame, ätrungame, singi lenajame ätrunga biname täापume piipyepu teta cama lenajame poode cama. Maane ai mule bine gigri jewenemepi biname cama, ätrunga cabu lui toraca gemi. ²³ Yepä emä gone, luma biname cina budubuduma piipyepu ngene atwanena cäco mene jaatranimusi. Maane umle gäte, egä teepi mene abaja cabu me latyaruge. ²⁴ Yageyame me kaakesea biname te gone mene abaja, päta tabe miiji owelamelame lenaja iyeta biname bime täापume. Tabe miiji miijirage piipyepu cängena abiberäja biname lenaja, ²⁵ cängena lui te yaablawäjemuge teeme äciseräjayame bine. Acejiyame te pama teebibine pagege atatrongära teepi umle äbitame, ngena gyene toraca. ²⁶ Piba teepi täcnärininusi teeme mopemuli cabu me, luucratnininusi Satani bau ca, lui te teebibine itu jaabaletnecemepi teeme dici ca, siige itu jaawenemepi teeme singi ibi otnime.

3

Mene Ceräcerägäabu Padare poto cidi me

¹ Timoti, maane ngene gone ätrimela, egä ceräcerägäabu padare cabu mage mäpu cirege. ² Piba biname cina teeme täापume taatu singi cirege, piipyepu rarekaake singisingi, mope modamoda, teemämu awepyeräja. Teepi niya mene ca nuuja biname bine sabe jaawenimusi, mage babe bime täापume ätecija cäco, eso mene umle cäco, ätrunga cäco, ³ asicnenta cäco, owecu cäco. Teepi niya mene jüicemusi nuuja biname bime poto cidi me, cängena lenaja umle cäco, asabla cäco. Teepi jäägyemusi iyeta ngena gemi miiji. ⁴ Teepi angletnejayame birige, mage aglecayame, teepi teemämu babo läbitininusi. Teepi täape

gwidape täápume magerage singi, lica Acejjiyame täápume. ⁵ Teepi puu jiiкуси, egä teepi ätrunga biname gemi, yepä teeme ireclota cabu ca jääpänusi, egä pui toraca lica gyene. Maane pepu muleyame biname bime cabu ca cude padare äbitepi.

⁶ Teeme poto cina biname bime mete cabu me yääbäcnusi opo ire awenname ngenecu onyanya magebi bine, lui cina niyya mule sigu cama, teeme singsingi cina lui bine ewadanemenisi. ⁷ Teepi pui magebi cina puu itecijanememige abiberäja mene, yepä gwidape teepi äblicäco gemi umle äbita toraca mene piiyepu mule poto cidi me. ⁸ Yanes Yambres naabi Moose ne lipu iciseräjüjasi, pui rooriye cina pepu iciseräjinisi toraca mene ne. Teepi mopemuli cäco gemi, ätrunga bine ituge abmaläcema. ⁹ Yepä teepi äblicäco lecaleca padare pepu mule acnetneja, ingle nata iyeta biname cina teeme buduma ne jääpänusi, epu pana Yanes Yambres naabime buduma te lipu pajecu me äbituji.

Paulo me Ceräcerägäabu Umlle Mene Timoti täápume

¹⁰ Timoti, maane cäme abiberäja ne piiyepu ireclota mule ne ituge äcwetna. Cane liiyeme ericnenine, maane cuta piiyeme. Maane cebine ingwe ituge äcwi ätrunga mule cabu, cängena lenaja cabu, owecu mule cabu, mäpu cabu ämyemutana cabu, ¹¹ cewe oocanena cabu. Cebine lipu ituge sabe wawena meebine cuta piiyepu. Maane umle gäte, ngena mule cina läbitipesi cäme täápume Antiyoka je, Ikoniya je, Lustra je, biname cina lipu mage sabe nawenanepesi puma, yepä Acejjiyame te cebine nasatanepi iyeta cabu ca. ¹² Yoo iyeta laati bemi singi Acejjiyame me singi ibi lenajame Keriso Yeesu cama alenglecäjame, teebibine pepu sabe wawena birige. ¹³ Yepä conocono biname piiyepu walya angletnejayame, teepi niyya cabu ca iyeta niyyarage me läbitininusi. Teepi poto biname bine yaangletnäjemusi piiyepu teemämu langletnäjinusi. ¹⁴ Yepä maane te gone toraca mene ne yaabma-lute, meebine lui mene ituge abiberäja, piiyepu maane lui mene ne jäärungepete. Maane umle gäte mäame abiberäja biname laati bage. ¹⁵ Maane ngene gone ätrimela, egä bägrä matikäli cabu ca maane umle äbitujite Oogäräneji mene. Teepi ibibi gemi meebine abiberäjame ireclota poto cidi me, lui ireclota ne biname cina jääpänusi, ätrunga ne liba yaacitusi Keriso Yeesu cabu me. ¹⁶ Iyeta Oogäräneji mene lui täápume Acejjiyame te ituge ngene atwanena ceera, miiji gemi abiberäjame, niyya mule awabudnitame, ablawejame, gaabe awabame conocäco ireclota cabu me. ¹⁷ Siige lui biname te Acejjiyame me kaakesea jaawenuge, tabe mage umle cama piiyepu cängena amacetnäjäneji birige miijimiji mule bine wawenetnäjame.

4

¹ Acejjiyame piiyepu Keriso Yeesu, lui te cirege budre biname piiyepu ireclota biname bine atrana, cane teeme opo gaabe je ai umle mene naajenine! Ingle Keriso Yeesu te cire tacnenutepi biname bine waadename, cane peei name pi naajenine ² maane bäärmii aged-name, mene jajanename, ngänu gyene miiji padare coo lica. Maane biname bine ätrunga me jewenemepi, egä mäame mene lui toraca gyene; maane teebibine eblawäjemepi, kokre ecäremepi, cängena ebiberäjemepi. ³ Padare te tädenige, biname cina liba singi lica ätecijame toraca mene ne Keriso poto cidi me, yepä teepi teeme singi bine pa yääcwetnemepesi, pa jäärngemepesi abiberäja biname bine, teeme singi ibi lui cina yaabiberäjimusi. ⁴ Teepi toraca mene ne kaake ca pa yääcelyärepesi, pa latatrongäripesi gidä mene ätecijame. ⁵ Yepä maane te ireire lenajame iyeta padare cabu; näämyemutepi cewe oocanena cabu, mäame bäärmii kaakesea jewenepi, piiyepu Acejjiyame me kaakesea bägrä te ngena bine wawenname, maane iyeta peei bine jewenemepi.

⁶ Padare te bii tatyaramtige cane uudi apirame, epu pana Acejjiyame ne lipu gwidape ca yiwäräjusi. Siige padare age sena cane ai ireclota ne abmalame. ⁷ Cane miijirage cubu itu tiicumene, cäme uuwama ne itu timlitumene, ätrunga ne lica itu sebma-lumene. ⁸ Siige Acejjiyame te cäme daremu ne itu secitumi, siige joomlenige. Pui lui niinäce manu daremu gyene, tabe lui yääcäranemuge iyeta biname bine, lui cina conocäco gemi Acejjiyame me opo gaabe je Keriso me kaakesea name pi. Yageyame Yeesu Keriso lui te conocäco atrana biname gyene, tabe te cäme daremu cire näcärepi atrana bimu cabu piiyepu cuta cire yääcäranemepi pui yepä daremu iyeta eei bine, lui cina baborage singi gemi tabe acnenutame.

Mene Timotirage bau me

⁹ Ngena ne gone taawenumi, watata tädepi cebine päpäname. ¹⁰ Deemas singi läbitepi gawecewe mule täápume, siige nabmalepi cebine, lädepi Tesalonika me. Kreskes lädepi Galatiya me, piiyepu Taitus lädepi Dalmatiya me. ¹¹ Yepä Luuka taatu sine cane cama. Toomlepi Mareko ne, secanepi aima, ingle tabe miijirage gyene cebine ätityerame. ¹² Yepä Tukikus ne cane ituge ätyepa Epeso me. ¹³ Maane liba tädepi, cäme gäbu gwidape nacanepi,

Trooasi je lui saabmalepene Karpus cama. Cäme peba cuta nawademepi, cuta maamoi tääpe cabu lui oogäräneji nawademepi.

¹⁴ Aleksanda, laati te gwidape bine jaawenimuge kopa ayana ca, cebine mage niyarage nawenumi. Yageyame te pagege ceera teeme peei niya daremu. ¹⁵ Maane cängena ire teeme tääpume, ingle tabe magerage mime mene niciseräjipi.

¹⁶ Cebine liba ciitacarage atrana puupu me nacanepesi, nuuja te lica nätityärepi, yepä teepe iyeta nabmalepesi cebine. Cane irecu ätumutenine, egä Acejiyame te gone daremu jaawenimuge. ¹⁷ Yepä Acejiyame cane cama puga ge, kokre näcärepi cane Mijji Mene iyeta jajanename iyeta Acejiyame umle cäco biname bine, lui puga ge mene iiwana puupu cabu; siige Acejiyame te nasatepi budre cabu ca. ¹⁸ Piiyepu Yageyame te pa nasatepi iyeta niyaniya gwidape cabu ca, siige cängenarage cire nacanepi cabu me, tabe luma mope biname me enajenige. Teebine yaawepyeräjesi iyeteta, iyeteta. Ai mene toraca gyene.

Paulo me Yewo Mene Timoti bau me

¹⁹ Prisila teeme rooriye Akwila naabine jaawablepi. Cuta jewablepi Onesiporus ne teeme ingle cama. ²⁰ Eratus Korinito jage, yepä Tropimus ne cane saabmalepene Miletu je, ingle tabe pita cama ge. ²¹ Ngena ne gone taawenumi, watata tädepi aima, ingwe ca gäbu padare te page tädepi.

Ebulus naawablenige meebine, Pudenus, Linus, Klaudiya piiyepu iyeta potu ätrunga biname lui cina ama, teepe naawablenisi meebine.

²² Yageyame yaanajepi mäame seemo cama. Acejiyame me mijji te weeme iyeta bime cabu lenajame.

Cane ngii Paulo. Siige cäme mene ngälu peese.

PAULO ME LETA TAITUS BAU ME

Paulo Taitus ne Jewablenige

¹ Cane Paulo Acejiyame me kaakesea bāgrā gāne, piiyepu Yeesu Keriso me ätyepāneji biname gāne. Cāme kaakesea lui teeme jājäcrāneji biname bine ätiityerame Yeesu ne cāngena ätrungame, piiyepu toraca mene poto cidi me teebibine cāngena umle wawenname peei cabu teepi otnime, ² cuta piiyepu teeme ngene atwanena bine Yeesu cabu acraname iyeteta ireclota täápume. Yoo, Acejiyame me mene iyeta lui toraca gyene; tabe lui agedna cabu ca mene jejuji peei ireclota mibibine ceerame. ³ Piba teeme singi padare cabu ca tabe peei ne jewabudnituji Miiji Mene ca. Yoo, Acejiyame mime niya cabu ca Äsecerayame tabe te cebine ituge jaji egā Miiji Mene biname bine jajanenname.

⁴ Taitus, cane yoogārenine määme bau me. Maane cāme toracarage bāgrā pana gāte, ingle mime ätrunga yepā gyene Acejiyame bau. Acejiyame mime Babe piiyepu Keriso Yeesu mime niya cabu ca Äsecerayame, teeme miiji te määme cabu lenajame piiyepu teepi poode meebine ceerame.

Taitus me Kaakesea poto cidi me Krete Curā cabu

⁵ Yoo, cane peema meebine itu naabmalepene Krete Curā cabu mime kaakesea ne cāngena apirame. Maane mope biname bine jejācremepi iyeta ätrunga ingle täápume lui cewe maramara cabu ta teepi te ätrunga biname bine opo wawenname. Pui mene cane meebine itu naajepene, pepu pana jewenepi. ⁶ Epu biname bine jejācremepi ätrunga ingle mope biname me lenajame lui cina conocāco mule taatu jaawenemusi; biname lui te yepā taatu coga cama cāngena yaanajuge, piiyepu lui me bāgrā ätrunga cama gemi, piiyepu mage babe bime mene cāngena jāätcejemusi. ⁷ Yoo, ai ingle naace gyene pepu opo wawena biname te Acejiyame täápume teeme kaakesea jaawenuge, tabe miiji conocāco lenaja, nuuja biname cina piba äblicāco teebine aitneja. Tabe miiji nuuja biname bime mene ätecija, lica teeme singi taatu wawena. Tabe miiji lica watata claabe me äbita, coo sice buduma lenaja, coo biname bine papa agleca. Tabe miiji lica conocono singi cama lenaja rarekaake täápume. ⁸ Yepā, tabe miiji catecewe biname bine cāngena ire jaatwemuge, piiyepu iyeta nuuja miiji mule täápume singi. Tabe miiji cāngena ngene atwanena cama piiyepu conocāco mule cama yaanajuge. Tabe miiji teeme ngenecu Acejiyame bau yaacituge teeme singi taatu ngenecu kokre cama wawenname. ⁹ Tabe miiji toraca mene ne cāngenarage jāättrunguge, pui mene ne lipu ituge abiberāja. Peei ätrunga cabu ca tabe ibibi pa läbitepi poto bine kokre ceerame toraca abiberāja ca, cuta piiyepu eei biname bime mule bine awabudnitame egā conocono, lui cina toraca mene ne jiciserājiniisi.

¹⁰ Bucurage äciserāja biname piti nemi puma, maane lui bine miiji cāngena ablawēja. Teepi mene papapapa jicemusi, nuuja biname bine angletnejame. Bucurage pui angletneja biname lui Israela biname bime sasa cotre mule cabu itu yaacrajepi, piiyepu teeme täápume Acejiyame me tääpe cabu cewecu lui baborage gwidape gyene. ¹¹ Maane teebibine bojā jewenemepi, ingle teepi biname yepāyepā teeme bāgrāwale cama ngenecu mäpu me jaawenemusi teeme abiberāja ca. Teepi ai ne naace name pi jaawenusi, ingle teepi singisingi gemi rarekaake päpāname. ¹² Yoo, yepā Krete curā babo biname te toraca mene itu jicemuji teeme binamewale poto cidi me egā, “Krete biname lui babo walya biname gemi. Teepi niya girigale biname gemi. Ngānu gyene teepi kaakesea täápume durau gemi, yepā teepi baborage singi deedei täápume.” ¹³ Yoo, peei mene toraca gyene, peei name pi Krete biname bine kokre cama eblawājemepi teeme ätrunga cāngena me wawenname. ¹⁴ Teepi miiji Israela biname bime itemene bine abmala toraca mene taatu oomlaname, cuta piiyepu pui biname bime cotre mene abmala, lui cina toraca gaabe ne ituge ägyi. ¹⁵ Yoo, biname lui te epucāco ngenecu cama birige, tabe miiji ne jāäpānuge iyeta gwidape cabu, yepā lui biname me ngenecu niya piiyepu ätrunga cāco birige, tabe niya ne jāäpānuge iyeta gwidape cabu, ingle naace popi teeme niya ngene atwanena piiyepu asicnenta cabu ca, tabe äblicāco miiji ne päpāna. ¹⁶ Pepu biname cina jicusi egā, “Cine umle gemi Acejiyame,” yepā teeme niya ireclota cabu ca biname cina opo yaawatnusi egā teepi toraca umle lica gemi. Teepi niyarage piiyepu ätecija cāco biname gemi, äblicāco nuuja miiji mule ne wawena.

2

Toraca Abiberāja Agesa

¹ Yoo, maane teebibine umle jewenemepi lui mule miiji gyene ätrunga biname bime täápume. ² Modamoda rooriye bine maane ebiberājemepi teepi sice buduma gone äbitame,

yepä cängena ngene atwanena piiyepu ngenecu kokre cama lenajame. Teebibine jejemepi egä toraca ätrunga cama cängena lenajame, biname bine owecu wawename, piiyepu lica ätrunga gaabe ne abmala mäpu te liba teeme bau me täduge. ³ Pepu pana maane molyege bine jejemepi teepi Acejiyame me jäjäcräneji biname pana lenajame, lica niya mene licemame nuuja biname poto cidi me, piiyepu lica sice täapume singi lenajame, yepä miijirage abiberäja biname täapume lenajame. Teepi miiji mamye magebi bine abiberäjäme ⁴ teeme rooriye piiyepu bāgrā bine teeme ngenecu cabu acraname, ⁵ piiyepu cängena ngene atwanena cama lenajame. Teepi miiji teeme mene piiyepu teeme mule ire atwemame ngenecu epucāco lenajame, teeme mete kaakesea cängenarage wawename, piiyepu teeme bāgrā bine cuta teeme nuuja binamewale bine cängena owecu cama ätityerame. Teepi miiji teeme rooriye bime singi ne jaawenusi. Piba nuuja biname te äblicāco niya mene licema Acejiyame me mene poto cidi me.

⁶ Cuta pepu pana maane mamye rooriye bine jejemepi cängena ngene atwanena cama lenajame. ⁷ Yoo, teeme täapume miiji gaabe ne maane mäame ireclota cabu ca eboclomtepi. Maane singi äbitepi toraca ngene atwanena täapume, piiyepu mäame abiberäja kaakesea ne cängenarage jewenepi. ⁸ Maane toraca umle cama mene jicemepi, siige nuuja biname te piba mäame mene äblicāco äsäda, piiyepu lui te singi mäame kaakesea äseblecäjame, tabe opo yaanajuge inge teeme nuuja aitna mene lica gyene mime poto cidi me.

⁹ Biname lui cina aletnäneji gemi daremü cāco kaakesea wawename, maane pui biname bine jejemepi ai gawecewe yageyame bime mene äteciyame, teebibine ngenecu miiji me wawename. Teepi miiji lica teeme mene äciseräja, ¹⁰ piiyepu miiji lica teeme poto gwidape ero ca waadena, päta teepi miiji teemāmu awabudnita egä teepi miijirage gemi, piiyepu toraca ngenecu cama kaakesea jaawenusi. Piba teepi Acejiyame mime niya cabu ca Äsecerayame me mule babo me jaawenusi iyeta teeme ireclota cabu ca.

¹¹ Acejiyame teeme miiji mule ne itu jewabudnituji Yeesu Keriso me kaakesea cabu ca, iyeta biname bine äsecerame niya mule cabu ca kirece ireclota ne päpāname. ¹² Peei miiji mule te mibibine nibiberäjininuge Acejiyame cāco lenaja ne piiyepu niya singi bine ägyemame, piiyepu nibiberäjininuge ai gawecewe me ireclota cabu toraca ngene atwanena cama conocāco lenajame Acejiyame täapume. ¹³ Mine cuta pepu jewagrijenisi pui miijirage bimu ne, Yeesu Keriso mime caburage Acejiyame piiyepu niya cabu ca Äsecerayame te liba cire tacnenutepi jamyacu apacyera cama. ¹⁴ Tabe teemāmu mime täapume äyemaluji naace täapume mibibine iyeta conocono mule cabu ca äsecerame, piiyepu ngenecu epucāco me wawename mine teeme täapume lenajame, piiyepu singi äbitame miiji mule bine wawename.

¹⁵ Yoo, maane biname bine cängena ebiberäjemepi peei mule poto cidi me, piiyepu jejemepi pepu wawename. Wälu gone biname bine ablawejame piiyepu nuuja bine ngenecu kokre ceerame, inge Acejiyame te meebine ai kaakesea itu nääcärepä, peei name pi biname cina miiji umle äbitame egä mäame kaakesea poto cidi me mene lui conocāco gyene.

3

Keriso me Biname cina Miiji Apu Mule Acata

¹ Yoo, maane biname bine puma cääri umle jewenemepi teepi mope biname piiyepu teeme ätityera biname bime mene äteciyame piiyepu wawename. Mope biname ngena miijimiji kaakesea täapume singi, biname cina miiji peei ne ngenecu poode cama wawename. ² Teebibine jejemepi egä äingeja mene gone, nuuja biname ne uudunyera gone, yepä miiji owelamelame lenajame, piiyepu nuuja biname ne niinäce gaabe me acitame. ³ Yoo, ujarage mine cuta piiyepu buduma, äteciya cāco, toraca gaabe umle cāco ge. Bucurage niya singi cina mibibine itu niwadininusi. Mine ngenecu niya cama cuta ninajininuge mime nuuja biname poto cidi me, piiyepu teebine ire patre yaaglusi. Nuuja biname cina mibibine nimugetninusi piiyepu mine teebibine cuta jäämugetne-musi. ⁴ Yepä, Acejiyame mime niya cabu ca Äsecerayame me padare te liba tatyaramtuji mine teeme owecu piiyepu ätityera cama lenajame, ⁵ tabe piba mibibine nisechränuuji pui niya ireclota cabu ca. Yoo, lica ge mime miiji waweneca name pi tabe mibibine nitityäriinuji, yepä tabe owecu ge mime täapume. Tabe mime niya mule nicisäjinuui, mine piba kirece ireclota cabu me ebäcnujisi. Peei lui Aceji Seemo me kaakesea mime yepäyepä cabu. ⁶ Acejiyame te teebine mime bau me ituge ätyepa Yeesu Keriso mime Äsecerayame me miiji kaakesea name pi, ⁷ naace täapume egä mine teeme owecu mule ca conocāco äbitame Acejiyame me opo gaabe je, piiyepu iyeteta ireclota ne päpāname, lui ireclota täapume mine mime ngene atwanena teeme cabu ituge acrana. ⁸ Mine umle gemi egä peei mene toraca gyene.

Yoo, Taitus, cane singi maane mene cängena jajanename iyeta peei gwidape poto cidi me. Piba lui cina Acejiyame ne jäätrungusi teepi teeme ireclota teebine yääcärusi miiji mule teeme tääpume wawename. Piba teerne ai gawecewe ireclota lica papa me äbita, yepä peei cabu ca miiji te tädenige iyeta biname bime cabu me. ⁹ Papa äciseräja cabu gone abacita, piyepu bucurage mene gone ätecija Israela biname bime kaakesaare poto cidi me. Drowä mene piyepu äciseräja Israela biname bime cotre poto cidi me jigymepi, ingle naace gyene nuuja miiji te lica tädenige pepu mule cabu ca. ¹⁰ Biname lui te weeme ingle biname bine yääplegicmuge, maane teebine umle mene jejepi teeme peei mule ne abmalame. Yoo, tabe liba mäame mene lica pa näätacijepi, teebine cääri jejepi, siige tabe liba cerämu ätecija cäco yaanajuge, piba ingwe ca ten cama gone abasuta. ¹¹ Weene umle gemi egä pepu biname me mule baborage conocono gyene. Teeme niija mule te teebine jaawabudnituge egä conocono biname gyene tabe.

Ai Peba me Apira Mene

¹² Yoo, cane liba mime biname Artema, coo pama Tukikus ne, mäame bau me pa jäätyepene, maane piba wata tädepi cäme bau me Nikopoli cewe me. Cane ngene bii jotwananine ai kämäge me buuwe padare puma lenajame. ¹³ Jenas, pui cotre abiberäja biname, cuta piyepu Apolo weene teebibine cängena äätityärepi teeme kaakesea gaabe cabu otnime, piyepu teeme singi gwidape cängena ääcärepeye. ¹⁴ Yoo, mime ätrunga binamewale miiji amacetnäjäneji lenaja iyeta miiji mule wawenecame, biname lui cina singi cama icrajnige teebibine cängena ätityerame, ingle miiji lica gyene teepi kaakesea cäco lenaja.

¹⁵ Yoo, cane cama lui biname teepi iyeta meebine sebore naawenisi. Cuta piyepu cime ätrunga binamewale puma, maane cime tääpume sebore jowenemepi.

Acejiyame me miiji te weeme iyeta bime cabu lenajame.

Cane ngii Paulo, siige cäme mene.

PAULO ME LETA PILIMON BAU ME

Sebore Mene

¹ Cane Paulo, lui te nanajinige krokeciije mete cabu Keriso Yeesu me name pi, piijepu mime yepä ätrunga biname Timoti, cine te yoogärenago ai mene ne cime biname Pilimon bau me, cine cama yepä kaakesea ne lui te jewenenige. ² Yoo Pilimon, ai mene cuta ätrunga ingle biname bime bau me, lui cina labasecretnuge mäame mete cabu piijepu cime yepä ätrunga magebi Apiya bau me cuta piijepu Arkipus bau me, lui te cine cama yepä cubu jiccenige Keriso täapume.

³ Acejiyame mime Babe piijepu Yageyame Yeesu Keriso, teeme miiji te weeme cabu lenajame piijepu teepi meebine poode ceerame.

Pilimon me Singi piijepu Ätrunga

⁴ Pilimon, cane liba irecu lätumutanune, cane meebine ngii naajanane piijepu cäme Acejiyame ne eso yäacäranune mäame täapume, ⁵ ingle cane itu näteccijumi, maane lipu baborage singi gäte Acejiyame me binamewale bime täapume piijepu maane lipu Yageyame Yeesu ne jitrungenite. ⁶ Cane irecu ätumutenine, egä weene lipu alenglecäjininiye cine cama yepä ätrunga cabu, peei te pa niwenipi mine cängengarage umle äbitame iyeta miiji mule pototo cidi me, lui cina saacluge Acejiyame bau ca, mine liba Keriso cabu ninajininige. ⁷ Cäme ätrunga biname, maane lipu singi gäte ätru-nga biname bime täapume, peei te cebine babo gege me piijepu ngenecu kokre me nawenenige. Maane te iyeta Acejiyame me binamewale bine ngenecu miiji me itu jaawenemepete.

Paulo Pilimon ne Jejenige Tabo Onesimus ne Cängena Acatame

⁸ Maane lipu singi gäte ätrunga biname bime täapume, peei name pi cane lui te weene cama yepä ätrunga biname gäne, cane miiji gäne meebine giri acita maane ngena wawename, yepä cane giri lica nacitenine. ⁹ Cäme puu conocäco pisi nyene meebine giri acitame maane ngena wawename, ingle cane Keriso me mename biname gäne piijepu page cane age säne krokeciije mete cabu teeme name pi, yepä cane giri lica naacitenine pätä cängena naajenine, ingle cane mäame täapume singi gäne. ¹⁰ Yoo, cane meebine naajenine Onesimus pototo cidi me, lui te ätrunga cabu cäme bägrä gyene. Cane ama krokeciije mete cabu teeme täapume epu pana läbitepene babe liijepu. ¹¹ Niinäce padare cabu tabe nuuja miiji lica ge mäame täapume, yepä page tabe miiji gyene mäame täapume piijepu cäme täapume. ¹² Cane teebine mäame bau me jityepenine piijepu tabe cäme ngenecu nacanenige. ¹³ Cäme singi pisi nyene tabe ama lenajame mäame puupu ne acatame cebine ätityerame, cane liba taatu nanajenige krokeciije mete cabu Miiji Mene name pi. ¹⁴ Yepä cane singi lica gäne meebine giri acitame cebine ätityerame, pätä cäme singi pisi nyene maane mäame singi ca ätityerame. Yoo, cane mäame singi cäco je nuuja gwidape ne lica jewenenine Onesimus täapume.

¹⁵ Pama Onesimus naace name pi matikäli padare taatu cabu mara me läbitepi mäame bau ca, egä tabe piba maane cama iyeteta lenajame. ¹⁶ Siige page tabe papa aletnäneji biname lica gyene, yepä tabe baborage gyene aletnäneji biname cabu ca: tabe page mäame ngenecurage biname gyene ätrunga cabu. Tabe puu babo miijirage gyene cäme täapume, yepä tabe mäame täapume cerämu miijirage gyene, ingle tabe mäame aletnäneji biname gyene cuta tabe maane cama yepä Yageyame ne jitrungenige.

¹⁷ Peei name pi maane liba cebine nacatenite, egä cane maane cama yepä kaakesea jewenenine Yageyame täapume, maane Onesimus ne epu jewablepi, maane lipu cebine nawablute. ¹⁸ Tabe liba ngena niija itu naawenepi coo mäame bau ca nuuja gwidape itu yaacatepi, maane cebine piba najepi, cane pa naawecnistepene. ¹⁹ Cane ama cämäge ime ca yoogärenine egä: Cane Paulo te meebine pa naawecnistepene, Onesimus liba ngena ne itu yaacatepi mäame bau ca. (Yoo, nata cane nuuja singi lica gäne meebine jajime, egä maane cäme bau ca yaacatepete Keriso cabu kirece ireclota ne.) ²⁰ Peei name pi cäme yepä ätrunga biname, maane owecu nawenepi apu cabu cebine ätityerame ätrunga biname bime mule liijepu. Maane lipu cane cama yepä ätrunga biname gäte, maane cebine gege me nawenepi.

²¹ Cane liba ai ne yoogärenine, cane umle gäne, egä cane ngena täapume naajenine, maane jewenenite. Cuta cane umle gäne, egä maane itucärenite cane lui wawena täapume naajenine. ²² Cane cuta nuuja gwidape täapume meebine näätinärenine: maane puupu emacetnäjepi cäme täapume, ingle cane cäme ngenec atwana ne Acejiyame bau me becitine, egä tabe weeme irecu ätumuta daremu jiwecnistenininige, siige cebine weeme bau me pa nawecnistepi.

²³ Epapras lui te cane cama krokeciye mete cabu enajenige Keriso Yeesu name pi, tabe weebibine jiwablininige. ²⁴ Cuta Mareko, Aristakus, Deemas piyepu Luuka, lui cine cama gigri kaakesea ne jewenenisi, teepi weebibine jiwablininisi.

²⁵ Yageyame Yeesu Keriso me miiji te määme seemo cabu lenajame.
Cane ngii Paulo. Cäme mene ngälu peese nyene.

LETA ÄTRUNGA BINAME BIME BAU ME LUI CINA HEBERU MENE JIICEMUSI

Acejiyame me Mene Aboclomteji Gyene Teeme Bägrä me Ireclota cabu ca

¹ Sasa cabu ca Acejiyame te bucurage padare piyepu bucurage maramara gaabe ca mime kaakesaare bine mene jaajanemuge teeme mename biname bime cabu ca. ² Yepä, ai ceräcerägäabu padare cabu tabe mibibine mene nijananinige teeme Bägrä cabu ca. Teeme Bägrä peese nyene lui me kaakesea ca tabe ai gawecewe piyepu iyeta cabucewe apacyera gwidape bine itu tewenemuji. Piiyepu teeme Bägrä peese nyene lui ne Acejiyame itu jejuji yageyame äbitame iyeta gwidape täápume ceräcerägäabu padare cabu. ³ Tabe saapacyäruge Acejiyame me jamyacu apacyera cama; cuta tabe Acejiyame cama yepä pana opo gyene. Tabe teeme kokrorage mene cama iyeta gawecewe piyepu cabucewe gwidape bine teeme maramara gaabe cabu ire jetwenenemuge. Tabe biname bine kälyä jebenemuji teeme niyaniyu mule cabu ca, piba cabucewe je adnatuji iyeta Kokre cama Acejiyame me camu poto je.

Aceji Bägrä Lui Baborage Gyene Mename Seemo cabu ca

⁴ Aceji Bägrä pui name pi baborage äbituji iyeta mename seemo cabu ca, epu pana pui ngii Acejiyame lui teebine ecäruji lipu baborage gyene mename seemo bime ngii cabu ca. ⁵ Yoo, Acejiyame licarage nuuja mename seemo ne jejuji, yepä Bägrä ne taatu jejuji egä, “Maane căme Bägrä gäte; cane page määme Babe me häbitine.”

Cuta piyepu tabe lica nuuja mename seemo poto cidi me jejuji, yepä Bägrä poto cidi me egä,

“Cane teeme Babe me pagege äbita; piyepu tabe căme Bägrä me pagege lenaja.”

⁶ Yoo, padare liba mameta ge Acejiyame teeme uge Bägrä ne ätyepame ai gawecewe cabu me, tabe piba jejuji egä,

“Iyeta Acejiyame me mename seemo cina miiji Bägrä ne awepyeräja.”

⁷ Siige, agesa Acejiyame me mene teeme mename seemo poto cidi me, “Cane căme mename seemo bine buuwemope pana me jaawenemune;

Yoo, teepi lui căme kaakeseyame gemi, cane teebibine muye wädräji pana me jaawenemune.”

⁸ Yepä, teeme Bägrä poto cidi me tabe jiicenige egä,

“Maane lui Acejiyame gäte, lui puupu ne jepänenite biname bine peema cita ca waadename, peei puupu lui määme yene iyeteta ngälu căco.

Maane biname bine conocăco yaawadanemute.

⁹ Maane toracarage singi conocăco mule täápume, yepä niya mule bine jäägyemute.

Peei name pi cane, määme Acejiyame, meebine itu naajujine, piyepu ngenecu gege nääcärujine,

cane liba caburage naawenujine iyeta weeme nuuja bime cabu ca.” Siige.

¹⁰ Acejiyame te Bägrä poto cidi me cuta nuuja taje jejuji egä,

“Maane lui Yageyame gäte, maane ai gawecewe ne itu jewenujite niinäce padare cabu.

Maane cuta cabucewe ne jewenujite määmerage ime ca.

¹¹ Teepi iyeta cirege apesera, yepä maane taatu cire naanajepi.

Teepi iyeta sasa cire läbitipesi căbletääpe pana.

¹² Maane teebibine cire iyebngemepi tuwängle täápume,

epu pana biname te căbletääpe ne lipu yiiremutuge, yääclubicuge.

Yepä, maane iyeteta gäte; lica cirege sasa me äbita.”

¹³ Yoo, Acejiyame apu mene licarage jaajuge teeme nuuja mename seemo ne egä,

“Adnati căme camu poto cidi ca,

ngälu cane määme cubuyame bine

määme ernge gawe me cire yaacranemepene.”

¹⁴ Yoo, mename seemo teepi ngena pana gemi? Teepi iyeta seemo gemi lui cina Acejiyame täápume kaakesea jewenenemisi. Tabe teebibine jäätyepemuge pui biname bine ätityeräjame lui cina niya cabu ca cirege äscrera iyeteta ireclota teeme cabu ca cirege päpäname.

¹ Yoo, mine miiji mime ngene atwanena cängena acrana peei toraca mene cabu mine lui ituge ätecija, naace täápume mine piba lica mime gaabe ne pagege abmala. ² Yoo, sasa mene cotre poto cidi me, mename seemo cina lui bine ituge waadena piyepu Moose lui soogäremuji, biname lui cina peei cotre mene lica itecijemuji wawename, teepi teeme mäpu daremu jepänemujisi. ³ Cuta page Acejiyame me nuuja mene pisi nyene tabe lipu owecu gyene biname bime täápume, teebibine äsecrera gaabe ituge wawena peei mäpu daremu cabu ca. Mine miiji peei mene ne ätrunga. Yepä, mine liba apu ningeninige egä peei mene lui papa gyene, piyepu lica yaacatusi, mine piba lipulipu äsecrera mime mäpurage daremu cabu ca, ingle mime nuuja äsecrera gaabe lica ge. Yoo, peei Miiji Mene Acejiyame me owecu poto cidi me, mime Yageyame Yeesu te biname bine niinäce jejemuji. Puga lui cina itecijemuji, teepi mibibine umle niweninujisi egä peei mene lui toraca ge. ⁴ Cuta Acejiyame peei mene toraca me jewabemuji liba kokre ecäremuji pui ire arbi biname bine teepi maramara kokre, ciitaca, piyepu owowä mule bine wawenecäjame, cuta piyepu Aceji Seemo me maramara kokre liba biname yepäyepä bine ecäranemuji, tabe laati bime täápume singi ceerame.

Yeesu Taatu Miiji Gyene Mibibine Äsecrera Gaabe Ceerame

⁵ Ai mene lui ciige gawecewe poto cidi me. Acejiyame teeme mename seemo bine lica icranemige ciige gawecewe ne acaname. ⁶ Yepä, mene pisi nyene Oogäräneji Mene cabu gawecewe ne acana biname poto cidi me egä,

“Acejiyame, maane caburage gäte. Maane ngenome biname bime täápume ngene jwaat-wananenute?

Ngenome papa biname bine yäängräremute?

⁷ Maane teebine jewenujite matikolä gawe me mename seemo bime cabu ca.

Maane piba jamyacu apacyera cabu teebine itu ecitujite miiji ngii päpäname.

⁸ Maane teebine mope biname me jewenujite iyeta gwidape täápume.”

Yoo, ai name pi peei mene te jiicenige egä Acejiyame biname ne mope biname me jewenuji iyeta ai gawecewe gwidape waadename, piba biname, gwidape, piyepu iyeta lui teeme ime cabu temi. Yepä, camu gyene page pui padare, biname te liba iyeta gwidape cirege waadena. ⁹ Yepä, peese nyene Yeesu lui te biname me äbituji. Tabe matikolä gawe me äbituji mename seemo cabu ca, pui matikolä padare liba ai gawecewe cabu enajuji, yepä page tabe jamyacu apacyera cabu enajenige piyepu teeme ngii caburage gyene, ai ingle naace popi tabe cewe itu oocananuji piyepu budre itu jepänuji. Yoo, peei cabu ca mine umle gemi lipu baborage gyene Acejiyame me owecu biname bime täápume, ingle Yeesu me budre lui iyeta biname bime niiya mule äyebengame.

¹⁰ Iyeta gwidape lui Acejiyame tääpu memi, piyepu teeme bau ca wawenäneji gemi. Peei name pi miiji gyene egä tabe cuta Yeesu ne mäpu cabu ecituji, ingle Yeesu liba conočäo asatuji peei mäpu cabu ca, tabe piba ibibi ge nuuja biname bine ätityerame teeme mäpu cabu ca äsecrera täápume. Tabe bucurage Acejiyame me bägräwale saawadanemuge teeme jamyacu apacyera cabu lenajame. ¹¹ Yoo, Yeesu lui te biname bine conočäo jaawenemuge, piyepu teepi lui cina conočäo pepu läbitininusi, teepi iyeta yepä ingle cabu temi. Peei name pi Yeesu ajiri lica gyene mibibine ainame egä, “cäme binamewale gemi.”

¹² Tabe Oogäräneji Mene cabu Acejiyame ne jejige egä,

“Cane mäame ngii poto cidi me cäme binamewale bine pa jaajanamemepene.

Biname bime abasecretna cabu uupera bine pa yaatangemepene meebine awepyeräjame.”

¹³ Tabe cuta jiicenige egä,

“Cane Acejiyame ne pa jäätrungene.”

Tabe cuta nuuja mene jiicige egä,

“Cane age säne igane bägrä cama Acejiyame te lui cebine itu näcärepä.”

¹⁴ Yoo, ingle naace popi peei bägrä lui binamerage tääpe cama ge, peei name pi Yeesu teeme pana tääpe ecatuji biname me äbituji, naace täápume egä biname pana tääpe cama tabe miiji ge budre päpäname. Peei budre ca tabe Satani ne epremalaji, Satani lui ingle gyene budre täápume, ¹⁵ piyepu biname bine isemuji lui cina wälu cama yaacrajanemuge budre poto cidi me. ¹⁶ Yoo, pajecu gyene egä teepi mename seemo lica gemi, tabe lui bine yäätityäremuge, yepä Oogäräneji Mene apu jiicenige egä, “Tabe Abrahamo me kaakesaare bine yäätityäremuge.” ¹⁷ Yeesu peese nyene ätityerayame teeme iganewale täápume, peei name pi tabe miiji ge teeme binamewale pana äbitame iyeta gwidape cabu, naace täápume tabe teebibine owecu cama waawename, ingle tabe cuta teeme mäpu ireclota cabu itu enajuji. Tabe epu pana gyene iiwäreja babo biname Israela biname bime irecu ätumuta mule ngalebora, lui teeme kaakesea cängenarage jaawenanuge Acejiyame tääpume biname bine kälyä wawenecame teeme niiya mule cabu ca. ¹⁸ Yoo, Yeesu umle ge biname bime

mäpu ireclota cabu lenaja. Tabe miiji gyene biname bine ätityerame, Satani liba teebibine giri jaacitemuge niya mule wawename, ingle Satani cuta teebine itu giri jecituji, yepä tabe kokre ge.

3

Yeesu Baborage Gyene Moose cabu ca

¹ Yoo, căme ätrunga binamewale lui Acejiyame miiji jäjäcräneji gemi, weeme ngene atwanena ecitepeye Yeesu bau me! Acejiyame teebine jityepuji iiwäreja mope biname pana äbitame mime ätru-nga mule cabu. ² Tabe teeme kaakesea cängenarage jewenuji Acejiyame täápume, lui te teebine itu jejuji peei kaakesea wawename. Moose cuta piyepu teeme kaakesea cängena jewenuji, tabe liba iyeta Acejiyame me biname bine ewadumuji. ³ Yoo, mete raranga biname me ngii ne lipu baborage yaawepyeräjujisi mete cabu ca, pepu pana Yeesu me ngii baborage gyene Moose me ngii cabu ca. ⁴ Iyeta mete lui biname cabu ca wawenäneji ge, yepä Acejiyame te iyeta gwidape bine jewenemuji. ⁵ Yoo, Moose teeme kaakesea cängenarage jewenemuji Acejiyame me binamewale täápume, lui cina epu pana Acejiyame me mete gemi, piyepu Moose lui epu pana kaakesea bägrä gyene pui mete täápume. Cuta lui gwidape poto cidi me tabe jiiicemuji, Acejiyame ingwe padare cabu babo mene peei poto cidi me jiiicemuji. ⁶ Yepä, Acejiyame me miijirage Bägrä, mime Keriso, tabe epu pana gyene mete yageyame liyepu, mime täápume lui gemi Acejiyame me mete. Yeesu mime yepäyepä cabu enajenige, mine liba ngenecu kokre cama mime ätrunga cabu cängena ninajininige piyepu ngenecu miiji cama jewagrijenisi teeme padare täápume.

Weene Gone Gloose Läbitininuye Acejiyame me Mene täápume

⁷ Aceji Seemo te Oogäräneji Mene cabu jiiicenige egä,
 “Page weene liba Acejiyame me tagepogogo itecijnuge,
⁸⁻⁹ ätecija căco gone läbitininuye,
 epu pana weeme kaakesaare lipu singi căco äbitininujisi Acejiyame poto cidi me.
 Puga ge pui daapo taatu cewe cabu je weeme kaakesaare cina căme ngenecu miiji teeme täápume napicetnärujisi.
 Ngänu ge teepi căme miijirage kaakesea teeme täápume tepänäjumesi footi kämäge ngalebora,
 yepä cuta pui padare cabu napicetnärujisi.
¹⁰ Peei name pi cane claabe me äbitujine, jiiicujine egä,
 ‘Iyeta padare teepi ätecija căco gemi;
 teepi singi lica căme mene acatame!’

¹¹ Pui padare cane claabe me äbitujine, puma cita ca teebibine căme kokre ngii ca jejemujiine egä,

“Weene licarage ai miiji gawe cabu me ebäcniniye cane cama lenajame!”

¹² Yoo, căme binamewale, weene cängena ire egä weeme yepä me ngene atwanena te lica niijarage me läbituge, siige tabe piba ätrunga căco me läbituge, puma cita ca lapesaruge mime Ireclota Acejiyame bau ca. ¹³ Miiji lica weeme nuuja me niya mule te teebine yaangletnäjuge, tabe piba ätecija căco läbituge, peei name pi weene miiji weemeweme ätityeräjipeye iyeta bimu gaabegabe, ingle pui mene egä “page” Oogäräneji Mene cabu lui cuta mime tääpu myene ai padare cabu. ¹⁴ Mine liba kokre cama jäätrungusi ngälu gaabe oomlaname, epu ätrunga cama mime lui niinäce padare cabu puga ge Acejiyame täápume, mine piba Acejiyame me miiji ne Keriso cama jääpänusi.

¹⁵ Weene ai Oogäräneji Mene gone ngene jitrimalinuge egä,
 “Page weene liba Acejiyame me tagepogogo itecijnuge,

ätecija căco gone läbitininuye,

epu pana weeme kaakesaare lipu singi căco äbitininujisi Acejiyame poto cidi me.”

¹⁶ Nää, laatibi Acejiyame me tagepogogo yäätjecijemuge, piba teeme täápume singi căco äbitininujisi? Teepi peete nemi iyeta pui biname Moose lui bine ewadumuji Aikupito gawe cabu ca. ¹⁷ Acejiyame nää laati bime täápume ngenecu niya me täbitenäjumi footi kämäge ngalebora? Teepi peete nemi pui biname lui cina niya mule cabu icrajuji. Siige, teepi pui daapo taatu cewe cabu puga budre äbitininujisi. ¹⁸ Cuta laati bime poto cidi me Acejiyame te kokre cama jiiicuji egä, “Weene licarage ai miiji gawe cabu me ebäcniniye cane cama lenajame?” Tabe eei bime poto cidi me jiiicuji lui cina ätecija căco ge. ¹⁹ Yoo, pajecu gyene egä teepi äblicăco ge peei miiji gawe cabu äbăcna, ingle teepi ätrunga căco gemi.

4

¹ Yoo, Acejiyame umle mene itu ecituji mine lipu ten cama miiji lenaja cirege. Pisi nyene pui mene. Mine miiji peei mene poto cidi me cängena ngene jwaatwananinago, piba

Acejiyame te lica mime yepä ne cire jaajepi egä, “Maane lica căme miiji lenaja cewe me abacitame.” ² Mine ituge ätecija peei Miiji Mene, sasa Israela biname liiyepu teeme padare cabu, yepä teeme täápume nuuja miiji lica ge, ingle lui cina itecijemuji, teepi lica ätrunga cama ecatujisi. ³ Yepä, mine ätrunga cama peei mene ne ituge acata Acejiyame bau me äbäcname miijirage lenaja täápume, ingle mine umle teeme mene pui ätrunga căco biname mine poto cidi me egä,

“Cane claabe me äbitujine, puma cita ca teebibine jejemujiine egä,

“Weene licarage ai miiji gawe cabu me ebäcniniye cane cama lenajame!”

Yoo, tabe pepu jiicuji, ngänu ge pui lenaja gawe puu puga wawenäneji ge ai gawecewe agedna padare cabu ca. ⁴ Oogäräneji Mene pisi nyene peei poto cidi me egä, “Acejiyame seben me lui bimu cabu ngene ocuji, ingle siige teeme iyeta pui kaakesea.” ⁵ Yepä, ngänu ge iyeta gwidape amacetränjäneji icrajemuji, pui Israela biname cina licarage äbäcnujisi pui gawe cabu lenajame, ingle Acejiyame peei mene itu jiicuji egä, “Weene licarage ai miiji gawe cabu me ebäcniniye cane cama lenajame.” ⁶ Acejiyame me Miiji Mene cuta page pisi nyene biname cina ätrungame, äbäcname Acejiyame me miijirage lenaja cewe cabucewe me. Yoo, pui biname lui cina Miiji Mene ne niinäce gaabe je ituge ätecija, teepi puma lica ebäcnujisi teeme ätecija căco mule name pi. ⁷ Yoo, Acejiyame peei name pi nuuja padare ecituji biname cina äbäcname, piyepu agesa peei padare. Pui biname lui cina äbäcäco äbäcna, teeme ingwe ca Acejiyame biname bine umle jewenemuji Mopeyame Daawida me tagepogogo ca kirece padare poto cidi me. Cane uja bii jiicine teeme mene egä,

“Page, weene liba Acejiyame me tagepogogo itecijinuge,

ätecija căco gone läbitininuye!”

⁸ Yoo, pui miiji lenaja cewe Acejiyame cama lica gyene Israela gawe cabu, ingle ujarage Yosuwä biname bine ewademuji pui gawe cabu me, yepä Yosuwä me padare ingwe ca Acejiyame me mene cuta pisi nyene pui äbäcna padare poto cidi me pui miiji lenaja cewe täápume. ⁹⁻¹⁰ Yoo, miiji lenaja cewe Acejiyame cama cuta page pisi nyene teeme binamewale täápume. Mine pui ne cirege päpäna, cuta puma ngene cirege oocana ai gawecewe me kaakesea poto cidi me, epu pana Acejiyame te lipu ngene itu oocuji pui seben me lui bimu cabu, tabe liba iyeta teeme pui kaakesea epiremuji. ¹¹ Yoo siige, mine miiji kokre ngenecu cama teeme mene toracarage ätrungame, naace täápume mine pui miiji lenaja cewe cirege äbäcna Acejiyame cama lenajame. Mine gonerage mime yepä te ätecija căco läbituge pui sasa biname liiyepu, lui cina lica ebäcnujisi.

¹² Yoo, weene cängena inajipi! Acejiyame me mene lui ireclota cama piyepu kokre gyene. Äsweji turikä lipu girirage gyene, teeme mene pepu gyene. Turikä te lipu mäju jääläcnutuge kaake umeli oomlaname, Acejiyame me kokre mene pepu jääläcnutuge biname bime trupa piyepu seemo maramara wawename. Teeme mene te biname bime singi piyepu ngene atwanena bine jaatranemuge. ¹³ Biname te äbäcäco nuuja gwidape coo piyepu nuuja ngene atwanena ämlita Acejiyame bau ca. Iyeta lui acwaba căco, pajecu taatu gemi Acejiyame me opo gaabe je, lui bau me biname cina teemämu cire laitnäjipesi.

Yeesu Lui Mime täápume Iiwäreja Babo Mope Biname Gyene

¹⁴ Yepä, mime täápume pisi nyene ätityerayame. Yeesu Acejiyame me Bägrä itu acenutuji cabucewe me, Babe ne awejename mime kälyä täápume. Peese nyene teeme iiwäreja mope biname pana kaakesea mime täápume. Peei name pi mine miiji ai ätrunga cabu cängena lenaja. ¹⁵ Yeesu mime kälyä wawena biname te umle gyene mine lipu ngenecu onyaonya gemi, Satani te liba mibibine ningletnäjinuge. Teeme owecu pisi nyene, ingle Satani cuta singi ge teebine angletnejame iyeta mule cabu, mibibine liiyepu, tabe ai gawecewe cabu liba enajuji, yepä tabe lica Satani me singi bine jewenemuji; tabe conocäcorage enajuji. ¹⁶ Yoo, mine miiji wälu căco Acejiyame bau me otni teeme babo owecu päpäname cuta piyepu teeme ätityera, mine liba mäpu cabu ninajininuge.

5

¹ Yoo, Israela biname bime iiwäreja mope biname tabe lui yepä ge teeme binamewale cabu ca. Teeme kaakesea lui Acejiyame ne mene jajanena teeme binamewale täápume. Tabe owecu gwidape Acejiyame ne yäacäruge cuta piyepu cibi gwidape ca Acejiyame ne yiiwärajuge biname bine kälyä wawename teeme niija mule cabu ca. ² Ai ingle naace popi tabe lui binamerage gyene, nuuja taje tabe ngenecu onya birige. Peei name pi tabe teeme binamewale bine liba jääpänemuge buduma piyepu niija mule cabu, tabe teebibine owecu cama jaasicnantemuge, ngene jwaatwanuge egä, “Nuuja taje cane pepu ngenecu onya cama birige.” ³ Cuta peei name pi tabe liba cibi ca Acejiyame ne yiiwärajuge biname bime niija mule äyebलगame, tabe cuta teeme niija mule äyebलगame yiiwärajuge. ⁴ Cuta piyepu nuuja biname te äbäcäco peei miiji kaakesea ngii ne teemämu acata, yepä Acejiyame te

biname ne jaajuge iiwäreja mope biname me äbitame, Aarona ne lipu ituge jaji iiwäreja mope biname me kaakesea acatame.

⁵ Cuta pepu gyene, Keriso iiwäreja mope biname me miiji ngii ne lica teemämu ecatuji, yepä Acejiyame teebine itu jejuji acatame. Tabe apu jejuji egä,

“Maane căme Băgră gäte;

 cane page määme Babe me bābitine.”

⁶ Cuta nuuja gome Acejiyame teebine jejuji egä,

“Maane iiwäreja biname gäte epu pana Melkasideke liiyepu,

 piiyepu määme kaakesea lui ngālu căco gyene.”

⁷ Yoo, pui padare Keriso liba biname ge ai gawecewe cabu, tabe Acejiyame ne yaawejanuge nuuja taje ele cama. Nuuja taje babo tagepogogo cama ala labayanuge teeme bau me lui te ibibi gyene teebine asatame budre cabu ca. Acejiyame teebine jitecijuji, ingle iyeta padare Keriso singi ge teeme Babe me singi ne acatame. ⁸ Yeesu Acejiyame me Băgră ngānu ge, ai gawecewe cabu tabe umle äbituji Acejiyame me singi wawename teeme māpu ireclota cewe oocanena cabu ca. ⁹ Peei māpu lenaja cabu ca tabe liba tasatuji conocăcorage, lui biname cina teebine jăatecijusi, teepi teeme cabu ca iyeteta ireclota ne jăăpānusi. ¹⁰ Acejiyame teebine iiwäreja mope biname ngii ecāruji, epu pana tabe Melkasideke ne yepä kaakesea ngii lipu ituge ceera.

Acejiyame me Mene Gone Abmala

¹¹ Mime mene cerāmu pisi nyene peei poto cidi me, yepä mǎpurage gyene weeme tǎăpume aboclomājame, ingle weeme umle dǎăgurage gyene. ¹² Weeme padare bucurage ituge Acejiyame me Mene ätecijame, weene umle cire lābitinejiye, weene nuuja bine cire yaabiberājemejiye, yepä weene cuta cāngena umle lica gemi. Biname te miiji weebibine cǎāri abiberāja peei niināce mene Acejiyame poto cidi me. Weene epu pana bǎgră matimati gemi lui cina ngame miği yǎānājimusi, camu gemi teeme deedeirage padare. ¹³ Yoo, lui cina ngame miği yǎānājimusi, teepi matimati bǎgră gemi. Camu gemi teepi umle äbitena conocăco mule poto cidi me. ¹⁴ Yepä, deedeirage lui modamoda biname bime tǎăpume. Peei lui epu pana māpu cama abiberāja liiyepu biname bime tǎăpume lui cina geāji gemi Acejiyame me singi wawename. Teepi ibibi gemi opo awatname lui mule gyene miiji, lui gyene niia.

6

¹ Yoo, peei name pi mine gone leca padare lenaja mime niināce abiberāja cabu taatu, yepä mine miiji cuta māpu cama abiberāja ne acata. Miiji lica mine jǎje abiberāja ai niināce gwidape poto cidi me egä: miiji Acejiyame ne taatu ātrunga, cuta miiji atatrōngāra niia mule cabu ca, piiyepu lica mime kaakesea cabu ātrunga mule äsecrera tǎăpume. ² Mime miiji lica jǎje abiberāja maramara niie ca äciseja mule poto cidi me, coo ime acita poto cidi me biname bime papa cabu Aceji Seemo teeme trupa cabu piba abacitaname. Uja ge mime abiberāja budre biname bime arpinera poto cidi me, piiyepu cerăcerăgǎabu bimu me atrana poto cidi me. ³ Acejiyame liba singi gyene, mine cuta māpu cama mene pa yaabiberājemepeşi.

⁴ Yoo, mine äblicăco peei niināce abiberāja cabu lenaja iyeta padare peei cabu ca biname bine ätityerame lui cina teemāmu ituge äyebłenga Acejiyame bau ca. Teepi licarage cǎāri latatrōngăruge pui niināce mene lipu yaabiberājemuge. Pui biname cina umle ituge pui Miiji Mene Yeesu me ätityera poto cidi me. Teepi Acejiyame me miiji cabu ituge lenaja, piiyepu Aceji Seemo teeme trupa yepäyepä cabu ituge abacitena. ⁵ Teepi ituge umle äbitena Acejiyame me mene poto cidi me egä peei lui babo miijirage gyene, teepi piiyepu Acejiyame me kokre ne teeme biname bine waadena mule cabu ituge pǎpāna. ⁶ Yoo, biname te pepu umle cama liba teemāmu läyebłingtuge Acejiyame bau ca, tabe äblicăco cǎāri atatrōngāra. Teeme äyebłingta lui epu pana niiyarage gyene tabe liba Aceji Băgră ne baarge uli cabu cǎāri acita liiyepu, piiyepu teebine jǎăgyuge biname bime opo gaabe.

⁷ Yoo, mine biname bime mule opo pa yaawatnipesi ai gawe poto cidi me mene cabu ca. Poto gawe te ngupe niie ne yaanuge, piba miijirage giye bine uutaname jaawenemuge teeme giye liteta biname tǎăpume. Siige, Acejiyame peei gawe ne miiji jaawenuge. ⁸ Yepä, nuuja gawe lui gaalegale seeasea bine uutaname jaawenemuge, siige giye liteta biname te peei gawe ne yaainuge niiyarage gawe ca, cuta pagege uubudera. Yoo, pepu pana cirege äbita miiji mule biname piiyepu niia mule biname bime tǎăpume.

⁹ Cime miiji binamewale, cine peei mene jijenininago weebibine umle ceerame, yepä cine umle gemi egä Acejiyame weene cama gyene. Cine weeme miijirage mule pagege pǎpāna, epu pana mule biname te jaawenemuge lui äsecrăreji ge niia mule cabu ca. ¹⁰ Yoo, Acejiyame lui cāngenarage gyene. Tabe lica pagege ngene ätrimela weeme kaakesea piiyepu

weene singi poto cidi me teeme täápume, weene liba teeme binamewale bine ituge ätityera cuta piyepu page itityeräjenemiye. ¹¹ Peei ätityera mule miiji gyene, piyepu cine babo singi weene yepäyepä pepu cängenarage lenajame ngälu pui miiji gwidape weene lui täápume jewagrieniye liba weene täápume cirege äbita. ¹² Weene durau gone, yepä niinäce ätrunga biname bime mule jituteme. Teeme ätrunga baborage birige piyepu teepi cängena umle cama jaawagriyeniye Acejiyame lui täápume ituge jaji teebibine ceerame, siige teepi peei name pi Acejiyame me Mene teeme täápume toraca jääpänusi.

Acejiyame me Toraca Mene name pi Mine Gone Umle cäco Lenaja

¹³ Niinäce gaabe ätrunga biname Abrahamo lui teeme yepä ge. Acejiyame liba umle mene Abrahamo ne jejuji, tabe teemerage ngii cama jejuji peei mene ne kokre me wawename. Ai ingle naace popi nuuja te lica birige caburage Acejiyame cabu ca, tabe peei name pi teemerage ngii cama peei mene jejuji. ¹⁴ Tabe Abrahamo ne jejuji egä, “Cane meebine umle mene nääcärenine. Cane meebine baborage miiji cire naawenepene, cuta piyepu mäame kaakesaare bucurage cirege äbita.” ¹⁵ Yoo, Abrahamo ngenecu kokre cama tewagriäjumi, siige Acejiyame me mene teeme bau me ibibi äbituji. ¹⁶ Yoo, biname te liba singi teeme mene kokre wawename, tabe babo biname me ngii cabu jaajuge, piba äcela mene ingwe ca äblicäco. ¹⁷ Acejiyame teeme caburage ngii cama pui mene jejuji, peei name pi tabe lui biname bine pui miiji mene jejemuji, teepi toraca umle ge egä tabe licarage teeme mene mara me wawena. ¹⁸ Peete negi neeneni baborage gwidape: Acejiyame me jajeji mene piyepu teeme caburage ngii, cuta peei neeneni tabe äblicäco mara me wawena piyepu peei poto cidi me tabe äblicäco walya mene iicana. Peei gwidape cabu ca mine umle gemi egä cuta mime täápume Acejiyame me Mene toraca gyene iyeteta. Mine lui teeme bau otni äsecra täápume, mine umle egä tabe mibibine lica abmala ätityera cäco, yepä ciige cire nisecripi. Peei name pi mime ätrunga teeme bau lui kokre gyene. ¹⁹⁻²⁰ Peei umle lui epu pana cangka ne liyepu yaajarusi mime ngene atwanena cabu. Mine äblicäco apu iicana egä, “Teeme mene pama toraca gyene mime täápume,” yepä mine umle gemi egä peei mene lui toraca gyene. Mine umle egä Yeesu pisi nyene cabucewe je Babe ne awejename mime miiji täápume. Yeesu me Aceji Babe bau me otni lui epu gyene iiwäreja mope biname te iiwäreja mete lui cabucewe je pui me cuderage puupu cabu me lipu abacita Acejiyame ne awejename biname bime miiji täápume. Yoo, Yeesu mime niinäce gaabe me Babe bau äduji, pui cabucewe iiwäreja mete cabu peei babo cäbletäape ne cuderage puupu gome tabe itu iyebingtuji, peei name pi mine ibibi gemi teeme ingwe ca Babe bau otnime. Yoo, Yeesu iiwäreja mope biname me ituge äbita mime täápume piyepu teeme kaakesea iyeteta gyene, Melkasideke me liyepu.

7

Mene Iiwäreja Biname Melkasideke poto cidi me

¹ Melkasideke lui Mopeyame ge babo cewe Salema täápume. Tabe cuta iiwäreja biname ge mime Caburage Acejiyame täápume. Ujarage, Abrahamo cubu cabu ca liba tacnenutuji, lui cubu cabu je tabe fooa gawe maramara mopeyame cabu ca yuutrutuji, Melkasideke teebine gaabe cabu piba opopa jewenuji, jejuji egä, “Acejiyame te meebine baborage miiji pa naawenepi.” ² Abrahamo piba cubu cabu ca gwidape bine setomlecmuji ten kupae jewenuji, siige yepä kupae Melkasideke ne ecäruji. Yoo, Melkasideke me ngii poto cidi me, aboclomta lui “Conocäco Mopeyame” ge. Biname cina teebine nuuja taje yaainusi “Poode me Mopeyame” ca, ingle tabe Mopeyame ge Salema cewe täápume, piyepu Salema me aboclomta lui “poode”. ³ Mime nuuja mene lica teeme mage babe poto cidi me, cuta mene lica ge teeme niinäce kaakesaare poto cidi me. Peei name pi mine umle lica gemi teeme aplimla, teeme budre. Epu pana Aceji Bäger liyepu, tabe Acejiyame me iiwäreja biname gyene iyeteta.

⁴ Mine ngene jwaatwananinago Melkasideke lipu baborage ge. Tabe baborage ge Abrahamo cabu ca, lui Israela biname bime ingle kaakesaare ge, peei name pi Abrahamo te yepä kupae teebine ecäruji, lui gwidape bine sewademuji cubu cabu ca. ⁵ Yoo, Abrahamo me kaakesaare bäger Leebi me kaakesaare bäger lui cina iiwäreja biname ge Acejiyame täápume, sasa cotre mene te jiičenige egä teepi owecu gwidape bine miiji waadena teeme Israela binamewale cabu ca. Mule apu ge: iyeta Israela biname lui cina gwidape piyepu deedei jääpänemusi teeme kaakesea cabu ca, teepi miiji iyeta ten gwidape cabu ca yepä ceera. Iiwäreja biname cina miiji pui gwidape waadena, ngänuge teepi piyepu teeme binamewale iyeta lui Abrahamo me kaakesaare gemi. ⁶ Yoo, Melkasideke lica Leebi me ingle cabu ca, yepä Abrahamo teebine yepä kupae ecäruji. Melkasideke piba Abrahamo ne mene jejuji teeme miiji täápume, Acejiyame lui ne temiji jajeji mene ituge ceera. ⁷ Yoo, Melkasideke lui baborage ge Abrahamo cabu ca, ingle mine umle gemi egä lui te ibibi

birige Acejiyame me miiji ne ceera, tabe baborage gyene teeme cabu ca lui te peei miiji ne yaacatuge. ⁸ Age nuuja mene Melkasideke poto cidi me. Israela biname bime iiwäreja biname lui cina kupae yaawadanemusi teeme binamewale cabu ca, teepi binamerage gemi; teeme lenaja lica iyeteta. Yepä, Melkasideke poto cidi me, Abrahamo lui ne teeme kupae ecäruji, Oogäräneji Mene te jiicenige egä teeme cuta pisi nyene ireclota. ⁹ Yoo, apu pana gyene: Leebi, lui me kaakesaare bägrä cina kupae yaawadanemusi Acejiyame täapume, tabe te kupae ecäruji Melkasideke ne pui yepä padare Abrahamo liba kupae teebine ecäruji, ¹⁰ ingle ngänu ge puu pui padare Leebi lui camuge aplimla, yepä tabe puga ge teeme kaakesaare Abrahamo me täape cabu. Yepä, Melkasideke taatu tabe lica nuuja biname ne kupae yäacärüge. Yoo, peei name pi Melkasideke cuta baborage gyene iyeta nuuja iiwäreja biname cabu ca.

¹¹ Acejiyame teeme cotre mene Israela biname bine ecäremuji, peei cabu biname cina iiwäreja biname bime ätiyera cabu ca conocäco me äbitame, yepä Israela iiwäreja biname cina äblicäco biname bine toraca conocäco me wawena. Peei name pi Acejiyame Keriso ne tityepuji biname bine toraca ätiyerame, ingle mime iiwäreja mope biname Keriso lica peei nuuja iiwäreja biname pana gyene, lui cina Leebi piyepu teeme kaakesaare bägrä Aarona me ingle cabu ca ge. Keriso baborage gyene iyeta teeme cabu ca Melkasideke liiyepu. ¹² Yoo, Keriso lui mara iiwäreja biname gyene, peei name pi Acejiyame cuta cotre mene mara me jewenuji iiwäreja poto cidi me. ¹³⁻¹⁴ Yoo, pajecu gyene egä mime Yageyame Keriso tabe lica Leebi me ingle cabu ca ge. Mine iyeta umle gemi egä tabe Yuuda me ingle cabu ca ge, piyepu Yuuda me inglewale cina iiwäreja kaakesea lica ituge wawena, ingle nuuja mene lica ge Acejiyame bau ca Moose bau me peei kaakesea teebibine ceerame.

Yeesu me Kaakesea Lui Melkasideke pana Gyene

¹⁵ Yoo, pajecurage gyene egä Acejiyame te kirece mara iiwäreja biname ne ituge acata. Page Yeesu pisi nyene mime iiwärejayame. Tabe lui Melkasideke pana gyene, ¹⁶ lica Leebi me inglewale cabu ca sasa mule liiyepu. Tabe teeme iiwäreja biname me ngii piyepu teeme kokre lica yaacatuge pui sasa cotre mule cabu ca, lui gyene biname bime ingle poto cidi me, yepä teeme kokre pisi nyene teeme ngälu cäco ireclota cabu ca. ¹⁷ Oogäräneji Mene te teeme poto cidi me jiicenige egä,

“Maane iiwäreja biname gäte epu pana Melkasideke liiyepu, piyepu mäame kaakesea lui ngälu cäco gyene.”

¹⁸ Yoo, siige gyene pui sasa cotre mene iiwäreja poto cidi me, ingle kokre cäco ¹⁹ piyepu ibibi lica gyene biname bine toraca conocäco wawename Acejiyame me opo gaabe je. Page mime ätrunga pisi nyene Yeesu me kaakesea cabu, lui te ibibi gyene mibibine cängena waadana Acejiyame bau me.

²⁰ Yoo, Acejiyame teeme iiwäreja kaakesea lica papa ecäruji Yeesu ne, yepä pui padare tabe cuta teeme caburage ngii jiicuji teeme mene kokre me wawename. Pui nuuja iiwäreja biname cina lica pepu kokre mene cabu ca yaawadanemusi teeme kaakesea bine. ²¹ Yeesu taatu iiwäreja biname me äbituji pepu ngii cama mene cabu ca, Acejiyame liba teebine jejuji egä,

“Cane lui Yageyame gäne, cane cäme ngii cama ai mene pa näacärene, piba ai mene licarage mara me wawena.

‘Maane iiwäreja biname gäte iyeteta ngälu cäco.’”

²² Siige, ai Acejiyame me ngii cama mene name pi, Yeesu ibibi gyene iiwäreja kaakesea wawename, peei name pi tabe cuta ibibi gyene kirece jajeji mene toraca me wawename niya mule cabu ca äsecrera poto cidi me.

²³ Yoo, nuuja iiwäreja biname teepi bucurage ge pui sasa mule cabu, ingle teeme ireclota ngälu cama ge. Nuuja cina teeme niinäce me puupu ne jaacatanusi. ²⁴ Yepä, Yeesu me ireclota lui ngälu cäco gyene, piyepu teeme iiwäreja kaakesea nuuja te lica cire juutecrepi.

²⁵ Yeesu peei name pi ibibi gyene biname bine iyeta cängena äsecrera teeme niya mule daremu cabu ca, lui cina Yeesu me kaakesea miiji pi Acejiyame bau me otni, ingle tabe puma enajenige iyeteta Acejiyame ne awejename teeme miiji täapume.

²⁶ Yeesu peese nyene miijirage iiwäreja babo biname lui mime singi ibibi nityärininuge. Tabe conocäco gyene, epucäco, piyepu mara gyene iyeta biname cabu ca, lui cina niya mule jaawenemusi. Page tabe pisi nyene cabucewe je, cuta teeme ngii cabu me awepänteji gyene. ²⁷ Tabe lica gyene nuuja iiwäreja biname liiyepu lui cina miiji iyeta bimü gaabegabe cibu gwidape ca yiwäräjemusiniinäce teeme niya mule täapume, piba cuta iyeta biname bime niya mule täapume. Tabe yepä gäabu taatu yiwäräruji, tabe liba teeme täape ecäruji budre täapume. Siige, peei lui ibibi gyene biname bine kälyä wawename iyeteta. ²⁸ Yoo, Acejiyame me cotre mene Moose lui bine sewademuji, peei te iiwäreja kaakesea poto biname bine yäacäremuge, lui cina iyeta binamerage gemi, piyepu kokrecäco gemi, yepä

pui cotre mene ingwe gaabe ca Acejiyame te kirece mene jejuji, piba teeme ngii cama pui mene ne babo kokre me jewenuji. Tabe peei mene cabu teeme Bägrä ne iiwäreja kaakesea ecäruji, tabe lui epucäco piiyepu ibibi gyene ai kaakesea wawenname iyeteta.

8

Yeesu me Iiwäreja Kaakesea Mime täápume Apu Gyene

¹ Yoo, iyeta mene cabu ca cine weebibine bii jijinago, ai ngene atwanena baborage gyene egä mime täápume pisi nyene cabucewe je iiwäreja babo biname lui te adnatäneji enajenige Acejiyame me camu poto teeme miiji puupu cabu. ² Tabe iiwäreja biname gyene Acejiyame ne awejename mime täápume pui cabucewe puupu cabu. Peei lui Acejiyame me toraca iiwäreja puupu, ingle peema pisi nyene Acejiyame me toraca mete, lica biname bime ime ca wawenäneji, yepä Acejiyame miiji wawenäneji gyene peei mete.

³ Yoo, iyeta iiwäreja babo biname teeme kaakesea lui cibu mäju ca Acejiyame ne yiiwärajusi piiyepu nuuja owecu gwidape teebine yäacärsi. Pui name pi cuta Yeesu mime Iiwäreja Babo Biname te miiji Acejiyame täápume owecu gwidape ceera, siige tabe teeme tääpe ne ecäruji. ⁴ Yoo, Yeesu liba ai gawecewe cabu enajuji, tabe iiwäreja biname lica ge, ingle ama ibibi iiwäreja biname piti nemi, lui cina Israela biname bime cotre mene cabu ca yiiwärajemus. ⁵ Pui iiwäreja biname bime kaakesea lui owowä pana gyene Yeesu me toraca iiwäreja kaakesea täápume lui gyene cabucewe je. Teeme iiwäreja mete cuta piiyepu owowä pana gyene toracage mete cabu ca lui cabucewe je. Pui name pi Moose liba gwidape jebasecnetnemuji mete wawenname Acejiyame täápume, lui mete cibu tääpe ca wawenäneji ge, Acejiyame piba teebine jejuji egä, “Maane iyeta gwidape pui ootonuta pana cängena jewenemepi, cane lipu meebine itu naawabepene Sinai Podo cabu.” Yoo, peei mene cabu ca mine umle egä pui mete lui owowä pana ge cabucewe mete täápume. ⁶ Yepä, Yeesu me kaakesea lui baborage gyene Israela iiwäreja biname bime kaakesea cabu ca, piiyepu kirece jajeji mene Yeesu lui ne mime täápume toraca me jaawenuji, baborage gyene sasa mene cabu ca, ingle pui mene toraca ibibi gyene egä Yeesu te mibibine niija mule cabu ca niseärinuge ten cama iyeteta lenajame.

⁷ Sasa jajeji mene, cotre waweneca piiyepu jäje iiwäreja poto cidi me, ibibi lica ge biname bine kälyä wawenecame. Peei liba ibibi gyene, Acejiyame piba singi lica kirece jajeji mene ceerame. ⁸ Yepä, sasa mene ibibi lica ge, ingle biname bime niija mule cuta piti nemi. Acejiyame peei poto cidi me jiicuji Oogäräneji Mene cabu egä,

“Cane lui Yageyame gäne, cane jijenininine egä, ‘Padare te pa tädepi,

cane piba kirece jajeji mene cire jaawenepene

Israela biname bime kaakesaare täápume,

cuta piiyepu Yuuda me ingle biname täápume.

⁹ Ai kirece jajeji mene mara gyene sasa jajeji mene cabu ca, cane lui ne jewenujine teeme niinäce kaakesaare täápume, cane liba teebibine ime ca sewecnemujine Aikupito gawe cabu ca.

Yepä, teepi cäme jajeji mene lica cängena acata wawenecame.

Cane peei name pi teebibine kaake me jewenemujine.’”

¹⁰ Mime Yageyame cuta jiicenige egä,

“Yoo, agha kirece jajeji mene cane ingwe ca cire jaawenepene Israela biname bime täápume.

Cäme cotre bine cane cire yögäremepene teeme ngenecu bora; teeme ngene atwanena cabu cire yaacitepene.

Cane teeme täápume Acejiyame cirege äbita,

cuta teepi cäme biname cirege lenaja.

¹¹ Pui padare cabu piba nuuja te lica teeme binamewale bine,

coo teeme naniganewale bine cire yaabiberäjemepesi egä,

‘Acejiyame täápume umle äbitepeye.’

ingle matimati cabu ca modamoda biname me

teepi iyeta cäme täápume umle cama cire yaacrajemepi.

¹² Yoo, cane teebibine kälyä cire jaawenemepene;

cane ingwe ca lica teeme niija mule bine ngene jaapcnetnemepene.”

¹³ Siige, peei mene cabu Acejiyame jiicenige egä teeme kirece jajeji mene tuwängle gyene sasa jajeji mene täápume. Page pui sasa mene te mameta ge ämlita.

9

Sasa Iiwäreja Mule Mara Gyene Yeesu me Iiwäreja Mule cabu ca

¹ Niinäce jajeji mene cabu puga ge cotre mene irecu ätumuta mule täápume. Cuta piiyepu puga ge cäbletääpe ca wawenäneji mete teeme maramara irecu ätumuta piiyepu iiwäreja mule täápume. ² Pui iiwäreja mete ngalebora neeneni puupu puga ge. Pui niinäce puupu lui ne yaainusi Cude Puupu ca, peei ngalebora nesae gwidape puga ge: ngale me atecwamta puupu, piiyepu dade, cuta piiyepu buluduu pui dade papa cabu. Peei buluduu ceerajäneji ge Acejiyame ne. ³ Pui mete cole je jeclänutujisi baborage cäbletääpe ca atri täápume. Pui cäbletääpe nuuja poto ca lui puupu ne yaainusi Cuderage Puupu ca. ⁴ Cuderage Puupu ngalebora puga ge dade lui gol ca acwabäneji ge. Pui cabu iiwäreja babo biname te miiji lengo gwidape bine juubudäremuge Acejiyame täápume. Cuta puga ge gwidape niinäce jajeji mene täápume jamyacurage uli boks ngalebora. Peei boks lui gol ca acwabäneji ge. Boks ngalebora me laacitusi neeneni kula lui papa cabu Acejiyame me ten cotre mene oogäräneji ge. Jajeji mene täápume boks ngalebora cuta puga ge gol karpu. Peei karpu bora je buluduu pana gwidape ge teepi yaainusi “maana” ca, lui deedei ca Acejiyame biname bine engäremuji deedei cäco gawe cabu. Peei boks ngalebora cuta puga ge Aarona me otnetnega suru lui te laame bine itu sisemuji awabejame egä Aarona lui Acejiyame me singi biname ge iiwäreja babo biname täápume. ⁵ Peei boks papa cabu puga ge neeneni owowä pana gwidape lui mename seemo pana opo cama, cuta taame cama ge. Teepi boks ne cängena jaawabäsi egä agesa Acejiyame me lenaja puupu. Iiwäreja babo biname te peei puupu ne cibi uudi ca yää-trupicuge Acejiyame ne awejename biname bime niija mule äcise-jame. Yoo siige, page lui miiji padare lica gyene peei gwidape poto cidi me cängena-cängena aboclomäjame.

⁶ Iyeta gwidape pepu ge pui sasa mete cabu, teepi luma irecu lätu-mutinusi Acejiyame ne awejename. Iiwäreja biname cina peei nii-näce puupu cabu me yäbäcnusi cuta täsuge iyeta bimu gaabegabe teeme kaakesea wawename. ⁷ Yepä, iiwäreja babo biname te taatu labacituge pui ngaleboraage puupu me. Tabe yepä taatu padare cabu kämäge gaabegabe labacitanuge. Tabe miiji cibi uudi acana ten cama, pui ca niinäce teeme niija mule äcisejame, piba cuta iyeta biname bime niija äcisejame. ⁸ Yoo, pajecu gyene Aceji Seemo me abiberäja cabu ca egä gaabe camuge iitnana toraca mete me toraca Cuderage Puupu cabu me abacitame teeme täápume lui cina pui sasa gawecewe iiwäreja mete cabu cuta yiwäräjusi. ⁹ Mine piba peei cabu ca umle läbitinago egä owecu gwidape piiyepu cibi mäju Acejiyame täápume acrejetame, peei cina äblicäco biname bime ngenecu conocäco piiyepu plowa me wawename. ¹⁰ Peei iiwäreja mule lui deedei äbita piiyepu niye nänäja poto cidi me taatu, cuta piiyepu maramara äciseja mule lui deedei täápume. Iyeta peei mule lui tääpe poto cidi me, cuta lica ngenecu poto cidi me. Mime saarewale cina miiji peei mule bine waweneca kälyä me äbitame Acejiyame me opo gaabe je. Teeme ngälu lui Acejiyame liba kirece ireclota pa yääcäremepi.

¹¹ Siige, Yeesu itu täduji, iiwäreja babo biname me itu äbituji miijirage kirece mule ne aboclotame. Yepä, page tabe kaakesea lica jewenenige ai gawecewe mete cabu, lui ne biname cina erangujisi, piiyepu lui ge gawecewe gwidape ca wawenäneji. Page tabe kaakesea jewenenige toraca miijirage puupu cabu, lui gyene cabucewe je. ¹² Yeesu Acejiyame me Cuderage Puupu cabu me yepä gääbu abacituji, lica gouti piiyepu kau plongo bime uudi cama, yepä teemerage uudi ca Acejiyame ne yiwäräjuji miibibine kälyä me wawename niija mule daremu cabu ca iyeteta ireclota cabu äbäcname. ¹³ Sasa mule cabu biname liba traci lica ge, piba iiwäreja biname te teebine yäätropicuge gouti piiyepu rooriye kau bime uudi ca, cuta piiyepu tabe kau plongo ne juubudärage. Cuta pui me tuuwe mriibe ca piba jääsicaluge. Peei ca biname te miiji me läbituge Acejiyame me binamewale cama abasutame piiyepu Acejiyame bau me irecu ätumutame. ¹⁴ Peei mule te biname me tääpe ne taatu jugi cäco me jaawenuge, yepä Keriso me uudi ibibi gyene mime trupa ngalebora ne äcisejame. Piba mime ngene atwanena lica mime niija mule daremu cabu, yepä mime ngene atwanena iyeta lui Acejiyame cabu gyene teeme singi wawename. Yoo, Aceji Seemo lui iyeteta gyene, teeme ätityera ca Keriso teemämu owecu gwidape pana ituge ceera Acejiyame ne. Tabe budre me äbituji mime niija mule bine äyebengäjame, tabe lui epucäco gyene piiyepu teeme nuuja niija mule lica ge.

¹⁵ Yoo, Keriso gaabe jittnuji kirece jajeji mene täápume, ai ingle naace popi lui biname cina ala asogläcneji gemi, teepi piba ibibi gemi miijirage iyeteta ireclota cabu lenajame, Acejiyame te lipu itu jicuji, ingle Keriso me budre pisi nyene teeme niija mule bime daremu äyebengame, lui wawenäneji gemi sasa jajeji mene padare cabu.

¹⁶⁻¹⁷ Yoo, iyeta modamoda biname cina teeme budre niinäce gaabe, teepi mene jaajemusi teeme gwidape poto cidi me egä lui te pagege waadena. Peei budracame me mene ibibi läbituge teeme budre ingwe gaabe ca taatu. ¹⁸ Peei name pi cuta Acejiyame me niinäce jajeji mene poto cidi me teepi miiji cibi eglujisi, piba cibi uudi ca peei mene ne ibibi me wawename. ¹⁹ Cuta peei name pi Moose liba iyeta Acejiyame me cotre mene biname

bine jejananemuji, peei ingwe gaabe ca tabe kau plongo me uudi piyepu gouti me uudi niye cama elenglecäjemuji, piba maamoi ngäli bine uli ciipe cabu jesoplecäjemuji. Pui ududi ngäli ca Oogäräneji Cotre Mene bine uudi ca itrupecmuji, piba iyeta biname bine cuta itrupecmuji. ²⁰ Tabe jejemuji egä, “Ai uudi te Acejiyame me jajeji mene toraca kokre me jewenenige, peei name pi weene miiji ai mene ne wawename.” ²¹ Yepä pana mule ca Moose te iiwäreja mete ne, iyeta iiwäreja kwäye piyepu nuuja gwidape cama, uudi ca cuta itrupecmuji. ²² Yoo, sasa cotre mene cabu, pama iyeta gwidape uudi ca äcisäjeji ge kälyä me wawename. Niija mule cuta pepu gyene, miiji uudi asata peei cabu ca kälyä päpaname.

Yeesu Keriso me Budre Ibibi Gyene Mime Niija Mule Äyebhengame

²³ Lui gwidape owowä gemi toraca cabucewe gwidape täापume, miiji peei bine kälyä me wawena sasa iiwäreja mule ca, yepä pepu gawecewe iiwäreja mule ibibi lica gemi cabucewera gwidape täापume. Mara jamyacu iiwäreja mule taatu ibibi gyene cabucewe gwidape täापume. ²⁴ Peei name pi Keriso lica gawecewe Cuderage Puupu cabu abacituji, inge peei biname biji rarangäneji mete lui owowä taatu ge Acejiyame me toraca puupu täापume. Yepä, Keriso cabucewe puupu me abacituji. Tabe puma enajenige Acejiyame me opo gaabe teebine awejename mimä täापume. ²⁵ Tabe cabucewe puupu me licarage jäje abacitanuge teeme täape bucurage gäabu ceerame, epu pana Israela iiwäreja babo biname te gawecewe mete Cuderage Puupu cabu me lipu kämäge gaabegabe labacitanuge uudi cama, lui teeme uudi lica ge. ²⁶ Eewe, inge pepu liga cirege äbita, Keriso pita piyepu budre cire läbitaneji bucurage gäabu ai gawecewe me aqedna cabu ca, yepä pepu lica gyene. Ai gawecewe liba mameta ge apira, piba tabe yepä gäabu taatu äduji iyeta niija mule bine äyebhengame, teeme täape liba budre me äbituji. ²⁷ Yoo, biname cina lipu yepä gäabu taatu budre äbita, siige Acejiyame peei ingwe gaabe ca teebibine cirege atrana, ²⁸ Keriso cuta piyepu yepä gäabu taatu budre äbituji daremu ceerame iyeta biname bime niija mule täापume, siige tabe cire tacnenutepi, yepä tabe lica cääri biname bime niija mule bine äyebhengame. Tabe cire tacnenutepi biname bine waadename iyeteta ten cama lenajame, lui cina teebine jewagrijenisi teeme äsecrera täापume.

10

¹ Yoo, Israela biname bime cotre mene lui cuta owowä pana ge. Peei te läbitanuge aboclomtame Keriso te lui miiji mibibine cire nicäripi. Sasa mule cabu iiwäreja bucurage ge iyeta kämäge gaabegabe, yepä peei iyeta ibibi lica ge biname bine kälyä wawename lui cina singi Acejiyame bau otnime. ² Teeme iiwäreja liga ibibi cirege teeme niija mule poto cidi me kälyä ceerame, biname cina piba lica ingwe ca asicnenta teeme niija ne; cuta siige piba iyeta iiwäreja. ³ Yepä, teeme ngenecu bora asicnenta lui miiji lica ge, peei name pi teeme iiwäreja iyeta kämäge gaabegabe lui teeme täापume ngene apecna pana ge teeme niija mule poto cidi me, ⁴ inge naace gyene uudi rooriye kau piyepu gouti cabu ca äblicäco niija mule toraca äyebhengame.

⁵ Peei name pi Keriso me gawecewe cabu me otni padare liba mameta ge, tabe Acejiyame ne mene jejuji egä,

“Maane singi lica gäte cibi mäju, cibi uudi, piyepu nuuja iiwäreja gwidape täापume,
yepä maane singi gäte cane cäme binamerage täape ne ceera budre me.

⁶ Maane ngenecu miiji lica gäte teepi liba camlecample cibi bine kula dade cabu jubudäremusi teeme niija mule daremu täापume.

⁷ Cane peei name pi meebine naajenine egä,

‘Cane age säne otnime mäame singi wawename;
cäme poto cidi me lipu oogäräneji ge.’”

⁸ Siige, peei mene cabu Keriso niinäce jejuji egä, “Maane singi lica gäte maramara iiwäreja mule täापume; maane gege lica gäte iingäja cibi täापume coo piyepu iyeta nuuja mule niija mule bine äyebhengame täापume.” Tabe pepu jejuji, ngänu gyene puu cotre mene te jüicenige peei bine wawenecame. ⁹ Keriso piba jejuji egä, “Cane age säne otnime mäame singi wawename.” Siige, Acejiyame iyeta sasa iiwäreja mule bine iyebhengemuji, piba Keriso ne tuwängle ecituji teeme puupu cabu. ¹⁰ Ai inge naace popi Yeesu Keriso itu jewenuji Acejiyame me singi bine, mine iyeta kälyä gemi mime niija mule cabu ca. Tabe liba teemämu iiwäreja pana ecäruji budre täापume pui yepä padare, peei lui ibibi gyene iyeteta ngälu cäco.

¹¹ Israela iiwäreja biname cina yepä pana iiwäreja birige waweneca iyeta bimu gaabegabe, yepä pui iiwäreja äblicäco niija mule bine toraca äyebhengame. ¹² Keriso yepä taatu padare yepä gwidape, teeme täape ne, ecäruji. Siige, peei lui ibibi gyene niija mule äyebhengame ngälu cäco. Tabe piba adnatuji Acejiyame me camu poto ime cabu. ¹³ Page tabe puma jewagrijenige Acejiyame te teeme cubuyame bine teeme ernge gawe me acraname.

14 Peei yepä wawena ca tabe biname bine epucäco me jewenemuji iyeteta, tabe lui bine mara me jewenenemige teeme pana äbitame.

15 Mine umle gemi egä peei mene toraca gyene, ingle Aceji Seemo te Oogäräneji Mene cabu itu jiiucuji egä,

16 “Yageyame te apu jiičenige, ‘Cane ai jajeji mene căme biname täápume cire jaawenepene. Căme cotre bine cane cire yoogäremepene teeme ngenecu bora, cuta teeme ngene atwanena cabu cire yaacitanepene.’”

17 Tabe cuta jiiucuji egä, “Cane lica teeme niya conocono mule bine cire ngene jaapecnepene.” 18 Pui name pi page siige, nuuja ingle lica gyene gwidape căări cuta iiwärejame niya mule äyebllengame.

Mine Miiji Acejiyame bau Otni Peei Kälyä Acatename

19 Căme ätrunga binamewale, mine miiji gemi wălu căco Acejiyame me Cuderage Puupu cabu äbăcname teeme opo gaabe aclajutame, ingle Yeosu teeme uudi ituge apira mine Acejiyame me biname me äbitame. 20 Teeme tääpe liba budre, peei te Acejiyame me Cuderage Puupu ne jiiutnuji mime täápume. Teeme budre padare cabu pui babo căbletääpe, lui te iiwäreja mete cabu Cuderage Puupu ne jăälyenguge, peei te cole je äderäruji. Siige, mime kirece Acejiyame bau me otni gaabe peese nyene Yeosu, lui te page ireclota cama enajenige cabucewe je. 21 Tabe mime täápume iiwäreja babo biname gyene Acejiyame me mete ne ire atwime. 22 Peei name pi mine miiji wălu căco otni Acejiyame bau yepä taatu ngene atwanena cama, teebine toraca ätrunga cama, plowa ngenecu cama lui niya mule cabu ca äcisäjeji gemi, piyepu jugi căco tääpe cama lui miijirage niye ca äcisäjeji gemi. 23 Mine ätrunga cama cängena ninajininuge, ingle mine umle gemi iyeta Acejiyame me mene toraca me läbituge. 24 Mine mime nuuja bime poto cidi me ngene pa jwaatwananinago lipu teebibine ätityera ceerame teepi owecu cama lenajame piyepu miiji taatu mule wawename. 25 Mine gonerage yaabmalusi mime abasecretna mule ne, poto cina liiyepu, yepä mine mimemime cerămu kokre läcărăninago, ingle mine umle gemi egä Acejiyame me cerăcerăgăabu bimu cudeceworage lica gyene.

26 Yoo, biname te liba Acejiyame me Miiji Mene äsecrera poto cidi me yăätēcijuge, piba ingwe ca teeme niya singisingi mule căări jaawenemuge, teeme täápume nuuja mara ätityera coo piyepu iiwäreja lica gyene teeme niya mule daremu äyebllengame. 27 Yepä, pepu biname lui cina Acejiyame ne jăägysu, teepi miiji wălu cama lenaja, ingle teeme täápume pisi nyene atrana piba muye puupu cabu otnime puma iyeteta lenajame. 28 Yoo, sasa mule cabu apu gyene: Cotre bine Moose lui sogäremuji, lui biname te jaatropangtuge, tabe budre jepănuji owecu căco, liba piti negi neeneni coo nesae ire arbi biname teebine aitnejame. 29 Peei cabu ca baborage gyene măpu daremu biname täápume lui te Aceji Seemo me ätityera ne jăägysuge, lui te gawe me yaacituge Aceji Băgră ne, piyepu papa me jaawenuge Yeosu me uudi ne, lui uudi te teeme niya mule bine ituge äyebllenga Acejiyame me jajeji mene name pi. Pepu biname täápume măpurage daremu pisi nyene. 30 Mine umle gemi Acejiyame lui te jiiucuji egä, “Niya mule daremu lui căme ime cabu sine; cane te cirege ceera,” tabe cuta jiiucuji egä, “Yageyame te biname bine cirege atrana.” 31 Yoo, magerage măpu teeme täápume lui cina niya mule daremu cirege păpăna mime Ireclota Acejiyame bau ca.

32 Siige, weene ngene jepecneye pui niinäce padare, weene Acejiyame me Miiji Mene liba ngale pana ecatujiye. Weeme ireclota măpu ge pui padare, yepä weene lica weeme ätrunga ne ebma-lujiye. 33 Nuuja taje weeme binamewale bine liba jăäpănemuye pepu măpu cabu, weene wălu lica birige ten cama peei măpu cabu gigri lenajame. 34 Weene owecu jaawenemuye lui bine yaacranemusi krokeciye mete bora. Weeme gwidape liba weeme bau ca yăäyebllingusi, weene cuta ngenecu miiji birige, ingle weene umle gemi teepi äbălicăco weeme bau ca äyebllenga weeme toraca miiji cabucewe je puupu ne, peei lui weemi nemı iyeteta. 35 Yoo, cuta ai padare cabu weene wălu gone! Weene miiji cängena kokre cama inajininuge weeme ätrunga cabu, piba weeme babo miiji daremu cirege păpăna. 36 Weene miiji ngenecu kokre cama lenajame, naace täápume Acejiyame me singi ne wawename, piba teeme mene weeme täápume toraca me cire läbitepi. 37 Oogäräneji Mene te jiičenige egä,

“Matikolă taatu padare piyeme,
piba lui te otnime äbitenige, tabe pa tädepi,
lica dăägudăgu äbita otnime.

38 Căme conocăco biname cina teepi pa jăätrungepesi, piba peei cabu icrajenige iyeteta.

Yepä, liba nuuja te latatrongăruge, cane lica ngenecu miiji teeme täápume.”

39 Siige, mine lica gemi pui biname lui cina gaabe cabu ca täcnăruge cuta lapesarinusi, yepä mine jăätrungusi, piba miiji ireclota ne ten cama cirege păpăna iyeteta.

11

Mime Niinäce Kaakesaare cina Miiji Ireclota ne Cire Jääpänepesi Teeme Ätrunga cabu ca

¹ Ngena gyene ätrunga? Yoo, ätrunga lui apu pana gyene: Mine jaawagrijusi toraca umle cama egä mine lui gwidape täápume singi, peei te pagege äbita. Mine toraca umle gemi egä mime singi gwidape pisi nyene niinäce gaabe je, mine pagege oomlana, ngänuge puu ai padare cabu mime cudcewe name pi mine äblicäco päpäna. ² Yoo, Acejiyame te sasa ätrunga biname bine ewepyeräjemuji teeme ätrunga täápume.

³ Ätrunga ca mine umle läbitinago egä ai gawecewe piiyepu cabu je wale bine, iyeta Acejiyame te mene ca jebenemuji, yepä lui cabu ca tabe jebenemuji, mine pui bine äblicäco gemi päpäna.

⁴ Ujarage Abela me iiwäreja Acejiyame täápume lui miiji ge teeme naane Kaino me iiwäreja cabu ca teeme ätrunga name pi. Acejiyame Abela me iiwäreja gwidape bine ewademuji awabejame egä Abela me ätrunga mule miiji ge. Yoo, Abela uja ge budre, yepä mine teeme bau ca pa labiberäjipesi.

⁵ Eenoka Acejiyame ne jitrunguji, peei name pi Acejiyame teebine cabu me ecituji budre cäco; tabe papa apesaruji. Biname cina liga teebine jirnganujisi, teepi äblicäco ingwe ca päpäna, ingle Acejiyame itu ecatuji teebine. Acejiyame me Oogäräneji Mene te jicenige egä, Eenoka me acatäneji niinäce gaabe me tabe Acejiyame ne ngenecu miiji me jewenuji.

⁶ Yoo, biname te äblicäco Acejiyame ne ngenecu miiji me wawena ätrunga cäco. Ingle naace gyene lui cina singi Acejiyame bau otnime, teepi miiji jäätrungusi egä pisi nyene Acejiyame piiyepu tabe babo miiji daremu teebibine yääcäremuge, lui cina toraca jäärngusi teebine.

⁷ Nooa peese nyene nuuja biname lui te Acejiyame ne jäätru-nguge. Acejiyame teebine umle mene jejuji ingwe gwidape poto cidi me. Nooa teeme mene jecatuji. Ngänuge tabe lica igi niye ne jepänuji, tabe babo poo ne eranguji, teeme coga bägrä cama peei ca isecräremuji babo niye cabu ca. Nooa me ätrunga mule mara ge nuuja teeme binamewale bime ätecija cäco mule cabu ca. Acejiyame teebine teeme biname me jewenuji teeme ätrunga name pi.

⁸ Abrahamo Acejiyame ne jäätrunguge. Acejiyame teebine jejuji cewe ne abmalame cudcewe gawe cabu otnime, tabe lui gawe teebine cirege ceera. Abrahamo peei mene jecatuji otnime. Tabe gaabe cabu äduji, yepä umle lica ge liiyeme ädenige. ⁹ Tabe lui gawe cabu enajuji catecewe biname pana, Acejiyame me mene peei poto cidi me jäätrunguge egä tabe pui gawe teebine cirege ceera. Tabe cäbletäape ca wawenäneji mete bine sewademäjemumi, peei cabu senajenäjumi tabe, piba Isacako, cuta ingwe ca Yakobu. Teepi iyeta yepä mene ne ecatanujisi Acejiyame bau ca. ¹⁰ Abrahamo lica babo cewe cabu yaanajuge, yepä tabe ngene jwaatwananuge iyeteta lenaja cewe poto cidi me, lica ai gawecewe cabu, yepä Acejiyame lui cewe ne yootonutuji piiyepu eranguji cabucewe je.

¹¹ Abrahamo babe me äbituji tabe liba sasara ge, cuta piiyepu teeme coga Saara te bägrä ne jepänuji, lui te ngälu pui padare äblicäco ge bägrä päpäna. Abrahamo Acejiyame ne jitrunguji teeme mene bägrä poto cidi me toraca me äbitame, siige teeme kokre te tacnenutuji, tabe imäbägrä ne jepänuji. ¹² Peei name pi Abrahamo, lui te mameta ge bägrä cäco budre, teeme bau ca secluji bucurage kaakesaare, epu pana bucurage cabu je wale lipu gemi. Secre pana bucurage gemi teepi, biname te äblicäco acnema.

¹³ Iyeta peei biname cina teeme ätrunga cama budre. Acejiyame me mene camuge toraca me äbita teeme täápume, yepä teepi umle ge egä miiji pisi nyene ingwe ca, peei name pi ngenecu miiji cama budre. Teepi jicujisi egä, "Cime toraca cewe ama lica gyene; cine catecewe biname pana ninajinige ai gawecewe cabu." ¹⁴ Peei mene cabu ca mine umle gemi egä teepi singi toraca cewe täápume lui gyene cabu je. ¹⁵ Teeme ngene atwanena lica teeme sasa cewe cabu je, lui ne ituge abmala. Teepi liba singi cirege peei täápume, teeme padare puga ge äcnärame, ¹⁶ yepä teepi singi lica. Iyeta teeme singi lui cabucewe täápume, lui miijirage gyene iyeta nuuja cewe cabu ca. Peei ätrunga name pi Acejiyame ajiri lica gyene teeme täápume, yepä tabe singi egä ätrunga biname cina teebine yaainusi teeme Acejiyame ca, ingle naace gyene tabe miijirage cewe ne itu emacetrnäjuji teeme täápume.

¹⁷ Acejiyame liba Abrahamo me ätrunga epicnantuji, Abrahamo teeme mene cuta jitrunguji, teeme yepä taatu bägrä Isacako ne kula dade cabu etecwamtuji Acejiyame ne ceerame. ¹⁸ Tabe ngene jotwananuji Acejiyame me mene poto cidi me egä, "Määme toraca kaakesaare eei gemi lui määme bägrä Isacako bau ca," ¹⁹ piba ngene ca egluji egä Acejiyame ibibi ge Isacako ne budre cabu ca aweecnistame. Pepu pana äbituji. Acejiyame Isacako ne Abrahamo bau me secwenistuji, Isacako liba mameta ge budre päpäna.

²⁰ Ingwe ca Isacako ätrunga cama teeme bägrä Yakobu piiyepu Esau naabibine jaajuji teeme miiji poto cidi me ciige padare cabu.

²¹ Cuta Yakobu teeme budre mameta, tabe mene jaajuji teeme neeneni saare bine, Yoosepa me bāgrā. Tabe ātrunga ca jaajuji teeme miiji poto cidi me ciige padare cabu. Tabe suru cama arpinantuji, irecu ātmutuaji Acejiyame ne awepyerājame.

²² Yoosepa cuta piyepu teeme budre mameta mene jiicuji egā Acejiyame te Israela biname bine cire yaawademepi Aikupito gawe cabu ca. Teeme ātrunga baborage ge, peei name pi mene jejemuji egā, “Ingwe ca căme kaake bine ama cita ca cire ewecnemepeye piyeme mime Kanana gawe cabu me.”

²³ Yoo, Moose me mage babe Acejiyame ne cuta jitrungujāsi. Teepei jamyacu opo bāgrā ne jepānujāsi, piba ātrunga ecitujāsi Acejiyame bau me teeme bāgrā asatame Aikupito gawe Mope Biname me cotre cabu ca, lui cotre imābāgrā agleca tääpume. Teepei wālu lica ge Moose ne āmlitame nesae mabye cama.

²⁴ Moose liba uutige, tabe singi lica ge Aikupito gawe Mope Biname me ingle cabu lenajame, ²⁵ pātā tabe singi ge Acejiyame me biname cama abasutame teeme māpu ireclota cabu lenajame, lica ge pui niya mule biname cama matikolā padare otnetneja teeme miiji ireclota cabu. ²⁶ Tabe ngene ca egluji egā miijirage cirege, tabe liba iicetna pāpāna teeme āsecrera biname Keriso name pi. Peei name pi tabe Aikupito gawe biname bime miijimiji gwidape iyeta jigyemuji, ātrunga cama jewagrijuji miiji daremu ne pāpāname ciige.

²⁷ Tabe Acejiyame ne jitrunguji ātityerame teebine. Aikupito gawe ne liba sebmaluji, tabe wālu lica Mope Biname me claabe tääpume. Tabe licarage tacnenutuaji, yepā Acejiyame cama āduji epu pana tabe teebine opo awatna ten cama lui ne biname cina āblicāco pāpāna. ²⁸ Moose Acejiyame ne jāātrunguige teeme binamewale āsecrera teeme māpu ireclota cabu ca Aikupito gawe je. Tabe peei name pi biname bine jejemuji maamoi plongo ne agli Āsuplengta deedei wawename, piba pui me uudi ca mete grana bine apyacame. Piba Acejiyame me agleca mename seemo te teeme mete bine isuplengemuji, uuge bāgrā bine lica eglecimuji peei mete cabu, yepā Aikupito gawe biname bime mete cabu taatu.

²⁹ Israela biname cina Acejiyame me ātityera cabu jitrungujisi, teepi conocāco yuurujisi malu lui ne yaainusi Ududi Malu ca. Peei lui epu pana teepi doro gawe cabu ecluji. Yepā, Aikupito gawe biname cina liga yuurujisi Israela biname bine ācwetname, teepi iyeta abumitnuji, siige.

³⁰ Israela biname bime ātrunga name pi babo cewe Yeriko me kula caale te itramuji. Camuge atrama, Israela biname cina peei caale ne piba jewaclomājenujisi iyeta seben bimu cama, Acejiyame lipu teebibine itu jejemuji. ³¹ Yepā ero magebi teeme ngii Rahaba, tabe lica budre ne jepānuji nuuja Yeriko cewe biname cama. Teepei te singi lica ge Acejiyame me mene āteccijame, yepā Rahaba jitrunguji Acejiyame ne. Israela biname cabu ca neeneni ire tääpume biname bine tabe te jaawabuji piyepu ātityāruji.

³² Yoo siige, cerāmu biname piti nemi pepu pana, yepā padare ibibi lica gyene mene jaajanenama Gideona, Baraka, Samson, Yepeta, Daawida, Samwela, piyepu iyeta sasa mename biname poto cidi me. ³³ Peei biname iyeta Acejiyame ne jāātrungusi tabe te teebibine ātityerame. Teepei yuutrutujisi nuuja gawe cubuyame biname cabu ca, teeme biname bine cāngena ire jetwemuji, piyepu pui miiji bine jepānanemuji, Acejiyame lui poto cidi me ituge jaji. Layani cina āblicāco teebibine agleca, ³⁴ muye wādrāji āblicāco oomlana teebibine, cuta piyepu teepi cubu turikā budre cabu ca āsecrāruji. Poto cina teeme tääpe liba bleela, teepi cuta cāari kokre jāāpānusi. Poto cina cubu me kokre cama yaacluge, piba nuuja gawe cabu ca biname cina temiji pi luucratnuge. ³⁵ Poto magebi ātrunga name pi teeme budre biname ewademujisi ireclota cama.

Nuuja pui biname cina mage pita piyepu budre jepānujisi, ingle teepi singi lica ge Acejiyame bau ca āyeb lengame peei pita piyepu budre cabu ca āsecrera, yepā teepi Acejiyame ne jāātrungusi tabe te teebibine cirege arpinera miijirage cabucewe ireclota tääpume. ³⁶ Teeme poto bine niyarage bāāclena me jaawenemusi, jidnanininusi, nuuja bine jaamlemelājemuji, siige krokeciye mete bora me yaacranimusi. ³⁷ Poto bine kula ca eglecimujisi, poto bine cole je jeclanimujisi, cubu turikā ca teepi budre jepānujisi. Poto cina cābletāape cāco, maamoi piyepu gouti tääpe bine asigrārinujisi. Teeme deedei piyepu gwidape lica ge; poto cina pita piyepu māpurage ireclota jepānujisi nuuja biname cabu ca. ³⁸ Teepei uucratnujisi daapo taatu cewe cabu me piyepu podo cabu me, kula waja piyepu cupicu bora je āmlenārinujisi. Pui biname iyeta Acejiyame ne jāātrungusi, yepā ai gawecewe me ireclota lui miiji lica ge teeme tääpume.

³⁹ Acejiyame teebibine iyeta ewepyerājemuji teeme ātrunga tääpume, yepā teepi camuge pāpāna iyeta pui miiji ne Acejiyame lui ituge jaji teebibine ceerame, ⁴⁰ ingle Acejiyame singi gyene teepi mime ireclota padare ne awagrijame, piba teepi mine cama gigri cirege pāpāna pui iyeteta epucāco ireclota ne.

12

Acejiyame Iyeta Teeme Bāgrā bine Yaablawājemuge

¹ Yoo siige, bucurage ātrunga biname cina ituge uutruta. Mine epu pana uuwamena biname gemi liiyepu teeme sobe cabu. Mijji mine iyeta mime māpu āyebenga piyepu poto niya mule lui cina mibibine cuta noomlenininisi. Mine piba gaabe cabu cāngena uuwametna. ² Mine irecu yaacranemesi Yeesu bau me. Tabe mibibine niwadananininige mime ātrunga cabu, ngālu peei te epucāco me cire lābitepi cabucewe je. Tabe teeme gaabe ne lica ebmaluji baarge uli cabu budre ābita name pi, yepā tabe baarge uli ne ecatuji, ajiri ngānuge tabe budre ābituji mime tāāpume, inge tabe budre gaabe cabu ngene jotwananuji egā teeme niināce gaabe me babo gege pisi nyene. Siige, tabe budre cabu ca arpinan-tuji, page tabe pisi nyene adnatāneji Acejiyame me camu poto ime cabu je.

³ Mine gaabe liba māpu, liba worāmu me lābitinago, mine piba ngene pa jwaatwananinago Yeesu me māpurage ireclota poto cidi me. Niiya mule biname liba teebine jimugetnujisi, tabe cāngena enajuji. Mine cuta gone worāmu name pi toraca gaabe ne yaabma-lusi. ⁴ Toraca, weene niya mule cama lāciserājininuye, yepā peei cabu ca weene lica budre ne ituge pāpāna. ⁵ Nāā, weene pama ngene jitrimalinininige Acejiyame me mijji mene weeme tāāpume egā,

“Cāme bāgrāwale, imyemutinege weeme Yageyame me ablaweja mene ātecijame.

Cane liba weeme niya mule yaaboclomājimune, gone māpu ngene atwanena yaacatuye.

⁶ Ingle naace gyene cāme singi biname bine cane yaablawājemune.

Cane bāgrāwale bine poto māpu cabu yāābācnimune, cuta yāāsecrāremune.”

⁷ Weene ablaweja yaacatuye Acejiyame bau ca, inge tabe epu pana weebibine jiwenininuge bāgrā bine liiyepu. Yoo, iyeta bāgrā yepāyepā teeme babe te yaablawājuge. ⁸ Acejiyame liba weebibine lica iblawājimininuge, teeme nuuja bāgrā bine lipu yaablawājemuge, piba weene lica gemi teeme toraca inge biname. ⁹ Mime uudi babe cina mibibine niblawājinusi, piyepu mine teebibine opo gaabe me yaacranimusi. Piba mine mijji cuta mime Aceji Babe me ablaweja ne ngenecu mijji cama acata cuta peei cabu ca mijjirage ireclota ne pāpāname. ¹⁰ Mine liba bāgrā je, mime babe cina piba nibiberājininujisi teepi lipu ngene jwaatwanimusi egā mijji ge, yepā Acejiyame me ablaweja lui iyeta padare conocāco gyene piyepu mime mijji tāāpume. Tabe singi mine teeme pana mara conocāco me ābitame. ¹¹ Ablaweja padare cabu mine gege lica birige, yepā ngenecu māpu, yepā ingwe ca mine ngenecu poode birige piyepu mijji mule cabu ninajininuge.

Gone Acejiyame me Mene Āgyi

¹² Yoo, kaakesea biname te liba gloose me lābituge, tabe mijji teeme kaakesea gwidape teeme ime ca cāngena oomlana, piyepu teeme ernge liba diibe lābituge, tabe piba mijji cāngena aclajuta, pepu pana mine mijji cāngena lenaja gloose cāco. ¹³ Weene conocāco gaabe cabu pa naaclepi, piba lui kokre cāco biname cina weeme ingwe ca onni, teepi lica weeme conocono gaabe name pi atrametna niya pāpāname, yepā conocāco gaabe cabu teepi mijji me lābitininusi.

¹⁴ Weene singi lābitininuye iyeta biname cama poode lenajame. Weene conocāco ireclota yaabiberājimuye, inge laati te conocāco ireclota ne jāāgyuge, tabe lica mime Yageyame ne cirege pāpāna. ¹⁵ Weene iyeta weemeweme cāngena ire atwipewe, piba weeme nuuja te lica pagege atatrōngāra Acejiyame me mijji cabu ca. Weene cuta cāngena ire egā gonerage ngenecu niya me ābita. Gonerage weeme yepā te peei mule ne gije jaabacituge, inge peei mule te wata birige babo ābita. Ngenecu niya te mime nuuja biname bime ātrunga mule ne sabe jaawenuge. ¹⁶ Cuta cāngena ire sargi mule poto cidi me. Gonerage acata peei mule ne. Piyepu gone Acejiyame ne kaake me wawena, Esau liiyepu. Yoo, teeme yene Acejiyame me babo mijjirage mene uuge bāgrā tāāpume, yepā tabe liba loolomecewe te joomlujji, piba teeme singi deedei tāāpume lui baborage ge, yepā teeme singi Acejiyame me mijji tāāpume matikolā ge. Tabe Acejiyame me babo mijji uuge bāgrā tāāpume igane ne ecārige yepā deedei pāpāname. ¹⁷ Weene umle gemi egā ingwe ca tabe lipu baborage singi ābituji uuge bāgrā me babo mijji ne pāpāname, yepā lica jepānuji, inge tabe āblicāco teeme niināce singi cāco mule ne mara me wawena. Tabe dābume ele engenuji.

Sasa Jajaji Mene Lui Sinai Podo cabu ca piyepu Kirece Jajaji Mene Lui Siyona Podo cabu ca

¹⁸ Yoo, sasa Israela biname poto cidi me weene ngene jotwa-nanineye. Teepi liba Sinai podo wajwa jeclajutemuji Acejiyame me cotre mene baborage wālu cama ātecijame, puga muye kloka te wādrāji cama tasatuji. Piba krokeciye me ābituji; babo buuwe te tipwājuji. ¹⁹ Baborage ala sengenuji moole pana gwidape cabu ca. Puma cita ca babo tagepogogo

tasatuji epu mage mäpu mene cama egä lui cina itecijemuji, teepi jejujisi ätecitame. ²⁰ Teepi baborage wälu ge Acejiyame me mene täápume egä, “Laati te podo ne joomluge, ngänu gyene biname coo cibi gwidape, peei ne miiji kula ca budre me agli.” ²¹ Peei iyeta epu babo wälu cama ge Moose te jiiucuji egä, “Cane naclonecnige piiyepu babo wälu gäne.”

²² Yoo, weene lica Sinai podo gome wälu cama naaclige, yepä weene wälu cäco ituge otni Acejiyame me puupu mameta me, lui puupu epu pana gyene Siiyona podo liiyepu. Weene naaclige Ireclota Acejiyame me cewe mameta me, lui Cabucewe Yerusalema. Puma teeme toraca bucurage mename seemo babo gege cama abasecretnige. ²³ Weene ituge otni Acejiyame me ätru-nga ingle cabu abasecretname, luma iyeta biname uuge bägrä pana gemi, lui bime ngii oogäräneji gemi cabucewe je. Weene Acejiyame bau ituge otni, lui te jaatranemuge iyeta biname bine. Peema weene abasecretnige conocäco biname bime seemo cama, Acejiyame lui bine epucäco me ituge wawena. ²⁴ Peema Yeesu pisi nyene, lui te gaabe ne jiiitnuji kirece jajeji mene täápume, teeme uudi ne liba yiiwärajui weeme niyya mule bine äcisejame. Yoo, Yeesu me uudi lica ge epu pana Abela me uudi liiyepu. Abela me uudi te singi ge budre daremu täápume, yepä Yeesu me uudi te biname bime budre daremu ne yääyeblingtuge.

²⁵ Äi ätityera name pi, weene cängena ire inajipi. Acejiyame me mene täápume gone ätecija cäco läbitininuwe. Yoo, pui sasa Israela biname lui cina singi lica ge Acejiyame me cotre mene ätecijame gawecewe podo cabu ca, teeme täápume äsecrera gaabe lica ge. Mine piiyepu, mime äsecrera gaabe lica gyene, mine liba Acejiyame me mene ne kaake me wawena, lui mene te twaatnuge cabucewe cabu ca. ²⁶ Yoo, Acejiyame liba mene jejemuji Sinai podo cabu ca, teeme tagepogogo te ai gawe ne jekocnäjuji, yepä page ai ingwe ca padare cabu tabe jiiucuji egä, “Cäro, cane nuuja taje ai gawecewe cuta piiyepu cabucewe cääri cire jaakocnäjepene.” ²⁷ Teeme “nuuja taje” mene me aboclomta agesa: Lui gwidape Acejiyame jebenemuji, nuuja taje tabe peei bine cire yääyebenge-mepi akocneja ca, piba lui gwidape äblicäco akocneja, peei cina cire yaacrajepi.

²⁸⁻²⁹ Yoo, mime cabucewe puupu, Acejiyame luma mibibine cirege waadena ten cama lenajame, peei ne äblicäco akocneja coo äyebingta, peei name pi mine miiji Acejiyame ne baborage eso yäacäresi. Yoo, Acejiyame me kokre baborage gyene, epu pana budni me kokre te biname bine lipu yaabemuge. Peei name pi mine miiji teebine wälu piiyepu cängena cama awepyeräja teeme singi mule ca.

13

Acejiyame te Singi Ai Mule täápume

¹ Mimemime singi läbitininago Keriso me toraca nanigane pana. ² Mine cuta miiji ngene jaapecnimusi catecewe biname bine awablame cuta deedei piiyepu ngene oocana puupu ceerame. Yoo, poto cina pepu ituge wawena Acejiyame me mename seemo täápume, yepä teepi pui bine cängena opo lica awatnujisi. ³ Krokeciye mete biname mine gone ngene nitrimalinuge teebibine ire atwemame. Mime owecu teeme täápume miiji epu baborage äbita mine lui owecu ne singi birige päpäna, mine liba ten cama krokeciye mete cabu ninajininuge. Nuuja biname lui cina niyya jääpänusi biname bau ca, mine miiji teebibine owecu jaawenemusi, epu pana mine pui mäpu cabu cewe loocaninusi teepi liiyepu, ingle mine iyeta yepä tääpe gemi.

⁴ Magebi rooriye me gigri ireclota müjirage gyene Acejiyame me opo gaabe je. Peei gigri lenaja ne gone sabe wawena. Acejiyame te mäpu daremu cirege ceera biname lui te ero jaawenuge nuuja magebi coo rooriye cama, coo lui cina nuuja sargi mule bine jaawenemusi.

⁵ Mime ireclota cabu gone singi äbita baborage rarekaake täápume, yepä mime ibibi gwidape cama ngenecu gege cama ninajininige, ingle Acejiyame mibibine itu nijinujisi egä, “Cane licarage weebibine abmala; cane age säne weebibine ätityerame.” ⁶ Peei name pi mine wälu cäco jiiicemusi, “Yageyame lui cäme ätityerayame gyene.

Cane lica wälu pa läbitepene biname bime täápume.”

⁷ Mine niinäce gaabe mope biname bime täápume ngene jaape-cnemusi, lui cina Acejiyame me mene mime täápume seboclomtujisi. Teepi ätrunga cama icrajemuji piiyepu ätrunga cama budre. Mine miiji teeme pana ätrunga ne yaacatesi. ⁸ Yoo, Yeesu Keriso lica mara me läbituge; teeme mule yepä pana cema, page, piiyepu iyeteta. ⁹ Gone maramara kirece abiberäja cina padare ceera weebibine mara gaabe cabu waadename. Mine miiji mime ngenecu kokre päpäna Acejiyame me miiji cabu ca, piiyepu miiji lica gyene apicetnera mime ngenecu kokre päpäname maramara deedei mule cabu ca. Lui cina peei mule bine jaawenemusi, teepi lica miiji päpäna peei cabu ca.

¹⁰ Yeesu me baarge uli lui mime täápume epu pana iiwäreja dade liiyepu, yepä lui cina Israela biname bime cäbletääpe mete cabu yiwäräjusi, teeme conocäco lica gyene mime dade cabu ca teeme kälyä päpäname. ¹¹ Pui Israela biname bime mule ca, iiwäreja babo biname te cibi uudi yaacanuge iiwäreja mete Cuderage Puupu ngalebora me iiwärejame niya mule bine äyebhengame, yepä peei cibi kaake bine juubudäremusi cewe cidecärä je. ¹² Peei name pi Yeesu budre äbituji cewe kaake poto ca biname bime niya mule teeme uudi ca puma äcisejame. ¹³ Yoo, mine miiji mime sasa iiwäreja mule abmala teeme bau otnime, ingle tabe lui Israela biname bime iiwäreja mule kaake poto ca gyene. Tabe mage äcneca mene ituge ätecija teeme mara mule name pi. Mine cuta piyepu teeme pana äcneca mene nitacijinuge. ¹⁴ Peei ngänu gyene, ingle mime iyeteta lenaja cewe lica gyene ai gawecewe cabu je, yepä mine ama jewagrijenisi lui cewe ne mine cabu je cirege päpäna. ¹⁵ Peei name pi mine miiji iyeta padare cabu Acejiyame ne awepyeräjame Yeesu me ätityera cabu ca. Pepu pana awepyeräja mime tagepogogo cina liba Yeesu me ngii jajanena, peei lui Acejiyame me singirage iiwäreja mule gyene. ¹⁶ Mine gone yaabmalusi miiji mule wawenecame piyepu ätityera ceerame mime yepäyepä, ingle naace popi cuta peei mule lui Acejiyame me singi iiwäreja gemi.

¹⁷ Weeme ätrunga mope biname bime mene itecijipi teeme singi wawename, ingle weeme seemo ireclota lui teeme ire atwi cabu gemi. Teepi miiji Acejiyame bau me teeme kaakesea poto cidi me aboclomtame. Teeme mene weene liba yaacatuwe, teepi piba ngenecu gege cama teeme kaakesea jaawenemusi, yepä weene liba ätecija cäco läbitininuye, teepi piba ngenecu mäpu cama teeme kaakesea jaawenemusi. Pepu cabu ca weene lica ätityera ne jääpänuye.

¹⁸ Cuta weene irecu lätumutinuye cime täápume. Cine ngene ca eglenisi egä cime ngenecu pajecu gemi, ingle cine toraca singi gemi miiji mule taatu wawenecame. ¹⁹ Cane baborage singi gäne weene apu irecu ätumutame egä cane wata acnenutame weeme bau me.

²⁰ Acejiyame mime Yageyame Yeesu ne budre cabu ca serpinan-tuji. Teeme budre cabu ca tabe itu asatuji mime miijirage Ire Atwi Biname täápume, mine lui epu pana teeme maamoi gemi. Teeme uudi liba tapiruji peei te jajeji mene ne ngälu cäco ibibi me jewenuji. ²¹ Mime Poode cama Acejiyame cane teebine ewejanenine iyeta weeme singi gwidape ceerame teeme singi cängena wawename. Cane teebine cuta ewejanenine tabe teeme singi ne acitename weeme yepäyepä trupa cabu. Tabe Yeesu Keriso me kaakesea ca peei ne jaawenuge. Yoo, jamyacu apacljera lui teeme yene iyeteta ngälu cäco. Eso!

Ceräcerägäabu Mene

²² Cäme binamewale, weene iyeta cäme umle mene cängena itecijipi weeme ngenecu kokre wawename, ingle cäme bucurage mene lica gemi. ²³ Cane weebibine umle jiweninine egä mime biname Timoti basatige krokeciye mete cabu ca. Tabe liba wata atyaramta aima, piba yepä pa niclege weeme bau me.

²⁴ Cane sebore jiweninine iyeta weeme mope biname cuta piyepu iyeta Acejiyame me binamewale. Italiya gawe cabu ca ätrunga binamewale cina weebibine cuta sebore jiweninini.

²⁵ Yoo, Acejiyame me miiji te weeme iyeta bime cabu lenajame. Siige cäme mene.

YAKOBU ME LETA

¹ Cane Yakubu sāne, Acejiyame piiyepu mime Yageyame Yeesu Keriso teeme kaakesea bāgrā gāne.

Sebore iyeta Acejiyame me binamewale! Weene lui weeme gawe ne ituge abmala, page gawe maramara cabu inajininige, agesa căme mene weeme tǎapume.

Weene Apicetnera ne Ngenecu Miiji cama Jǎapǎnuyē

² Căme ătrunga binamewale, maramara apicetnera bine liba jǎapǎnemuyē, piba ngenecu gege lăbitininuyē, ³ ingle weene umle gemi egă weene liba pui mǎpu cabu ca lăsecrărinuyē, weeme ătrunga te peei cabu ca kokre me lăbituge mǎpu cabu ămyemutaname. ⁴ Peei name pi ngenecu kokre cama imyemutepi ngălu pui mǎpu cabu ca ăsecrera. Weene piba amacetnǎjǎneji inajininuge, piiyepu kokre ătrunga cama weene miiji gemi nuuja apicetnera cabu ca cuta ăsecrera. ⁵ Weeme yepă te liba singi umle ăbitame Acejiyame me singi poto cidi me, tabe miiji Acejiyame ne ătemla, lui te baborage singi gyene iyeta biname bine umle ceerame. Tabe peei umle ne owecu cama papa yǎăcăruge. ⁶ Apu gone ngene jwaatwananinuyē egă, “Acejiyame pama singi lica gyene cebine ătityerame,” yepă Acejiyame ne toraca jǎătrunguyē, piba taatu yǎătemluyē teebine. Lui te liba ătrunga căco, teeme ngene atwanena piba epu pana yaanajuge malu cabu uule baawe liiyepu. Gobe te yaacenange puma cita ca cuta saawecnistuge. ⁷⁻⁸ Pui biname me ngene atwanena ăblicăco cāngenarage ăbita. Tabe ngene jwaatwananuge egă, “Pama toraca gyene, coo piiyepu pama walya gyene.” Pepu ngenecu onya biname te ăblicăco Acejiyame bau ca teeme singi ne pǎpăna.

⁹ Yoo, ătrunga biname lui cina babo lica gemi ai gawecewe biname bime ngene atwanena cabu, teepi miiji ngenecu gege cama yaacrajuge, ingle naace popi teepi matimati lica gemi Acejiyame me opo gaabe je. ¹⁰ Cuta piiyepu ătrunga biname lui cina dogwe yaacrajuge gwidape tǎapume, teepi miiji umle cama lenajame egă teeme bucurage rarekaake piiyepu gwidape iyeta lui papa gemi Acejiyame me opo gaabe. Peei ngene atwana te miiji teebibine ngenecu gege me wawena. Dogwe biname bime lenaja lui epu pana tuube birige baace popo me liiyepu. ¹¹ Yoo, liba bimū te nuunu cama tuungenutuge, gije ne jaadaromtuge, popo cina tamyange, piba teeme miijirage opo lica birige, siige. Dogwe biname cuta pepu gemi; teeme ai gawecewe cabu ireclota lui lecarage lica gyene. Teepi budre pa lăbitipesi teeme kaakesea gaabe cabu liba waatni-nusi rarekaake pǎpăname.

¹² Baborage ngenecu miiji pisi nyene pui biname bime tǎapume, lui cina toraca gaabe ne lica yaabmalusi niiya mule wawename, teepi liba apicetnera cabu je. Teepi iyeteta ireclota ne cirege pǎpăna, Acejiyame lipu ituge jaji eei bine ceerame, lui cina babo singi gemi teeme tǎapume.

¹³ Apicetnera cabu ca, liba biname te angletneja jǎapǎnuge niiya mule wawename, tabe ăblicăco piba apu iicana egă, “Ai angletneja lui Acejiyame bau ca gyene.” Acejiyame pepu muleyame lica gyene. Niiya mule te ăblicăco teebine angletneja, cuta piiyepu tabe licarage nuuja biname ne yaangletnǎjuge. ¹⁴ Yepă, angletneja te tăduge biname me ngene atwanena cabu ca, biname me niyarage singi te liba teebine toraca gaabe cabu ca yǎăyeblingtuge. ¹⁵ Peei niyarage ngene atwana cama biname te puma cita ca niiya mule bine jaawenemuge. Pui niiya mule bime daremu lui budre gyene, cuta peei ingwe ca pui biname te niiya puupu cabu me lăduge.

¹⁶ Yoo, căme ngenecurage ătrunga binamewale, gone weemămu langletnǎjinuyē egă, “Acejiyame bau ca gyene ai niiya.” Eewe, mine iyeta umle gemi egă Acejiyame pepu muleyame lica gyene. ¹⁷ Lui gwidape gemi miiji piiyepu epucăco, peei cina saacluge cabu ca Acejiyame bau ca. Tabe lui te iyeta cabucewe apacliyera gwidape bine itu tewenemuji, tabe ăblicăco mara pana ăbita. Tabe cuta ăblicăco mibibine kaake ca ăcelyerame. ¹⁸ Teeme singi cabu tabe mibibine teeme bǎgrăwale tǎapume ituge wawena, mine liba teeme toraca mene nitecjinininuji. Mine lui niinǎe gaabe temi iyeta teeme nuuja waweneca gwidape cabu ca teeme singi pana ăbitame.

¹⁹ Yoo, căme ngenecurage ătrunga binamewale, weene ai mule ne ecateye egă, iyeta biname cina miiji mene wata ătəcijame, yepă gone mene wata jiicemusi, cuta piiyepu gone claabe me wata lăbitininusi, ²⁰ ingle naace popi claabe biname te ăblicăco Acejiyame me singi ne conocăco wawena. ²¹ Peei name pi iyeta jugijugi mule piiyepu iyeta niiya mule weene iyebngemeye. Ngenecu plowa cama teeme mene yaacatuyē, tabe lui mene singi gyene weeme ngenecu cabu acitame, ingle pui mene te piba weebibine niiya cabu ca ăsecrera gaabe jiwabininuge.

²² Mine umle gemi egä mine miiji pui mene ibi jaawenesi, lica ätecija taatu. Gone weemämu langletnäjinuye egä ätecija taatu lui ibibi gyene. ²³ Pui biname lui te ätecija taatu läbituge, yepä lica jaawenuge, tabe epu pana biname te opo lipu määlä cabu läpänuge. ²⁴ Tabe liba nuuja gome me läduge, piba wata ngene jäätrimaluge teeme opo lipu gyene. Yoo, biname lui te mene yäätcejuge, yepä tabe singi lica wawename, tabe piba peei opo pana pui mene ne wata ngene jäätrimaluge. ²⁵ Yepä, lui biname te conocäco cotre cabu cängenarage läwecetnäruge lui cotre te biname bine yäasecräremuge, piijepu tabe pui mene jäje labiberäjemuge, tabe piba lica ingwe ca ngene jäätrimaluge, yepä peei mene pa jaawenepi. Acejiyame teebine pa yäätityärepi iyeta teeme miiji waweneca cabu.

²⁶ Lui te jüicuge egä, “Cane Acejiyame me biname gäne,” yepä lica teeme tage mene cängena ire, tabe teemämu langletnäjuge; teeme mule toraca lica gyene. ²⁷ Mime Aceji Babe me opo gaabe lui mule toraca gyene piijepu conocäco agha: emlame bägrä piijepu cuublacubla bine teeme mäpu cabu ca ätityerame, cuta piijepu ai gawecewe lenaja cabu ngenecu iyeta Acejiyame bau me acitame.

2

Iyeta Biname bine Yepä pana Ire Jaatwemuye

¹ Cäme ätrunga binamewale, lui cina mime jamyacu apaclyera cama Yageyame Yeesu Keriso ne jitrungeniye, weene iyeta biname bine yepä pana ire jaatwemuye. ² Apu mule gone. Dogwe biname te weeme abasecretna mete cabu me liba labacituge, miijimiji cäbletääpe cama piijepu oplacmeläja gwidape cama teeme ime kukluta cabu; piijepu nuuja biname te liba ränderände cäbletääpe cama labacituge, ³ weene liba dogwe biname ne cängena ire jaatwuye, teebine jaajuye egä, “Agha miiji puupu adnatame,” yepä pui gwidape cäco biname ne jaajuye egä, “Miiji adnata puupu ibibi lica gyene, maane nää äblicäco peema aclajuteji lenajame, coo gawe cabu adnatame cäme ernge gome?” ⁴ Weene liba pepu mule jaawenuye, weene biname bine piba maramara tomi me jaabelanemuye. Pepu mule lui miiji lica gyene. Weene gone biname bine jaatranimuye teeme gwidape poto cidi me. Pepu ngene atwanena lui conocono gyene.

⁵ Cäme ätrunga binamewale, cäme mene nätecijeye. Lui biname cina ai gawecewe poto cidi me dogweyame lica gemi, Acejiyame teebibine ituge jājäcra ätrunga cabu dogwe ne pa jääpänepesi. Teepi miiji puupu cabu Acejiyame cama cirege lenaja, tabe lipu ituge jaji ceerame iyeta lui cina teeme tääpume singi. ⁶ Yepä, weene poto biname bine gawe me ituge acrana, inge teepi gwidape cäco gemi. Pepu mule lui conocono gyene. Yoo, weene babo singi gemi dogwe biname tääpume, yepä teepi laati bemi, lui cina weeme ireclota ne mäpu me jaawenusi? Cuta teepi laati bemi, lui cina weebibine atraname iwadininusi rarekaake awecna poto cidi me? Teepi lui dogwe biname gemi! ⁷ Teepi peete nemi lui cina niya mene jüicemusi weeme Yageyame me miiji ngii poto cidi me.

⁸ Yoo, toraca mule pisi nyene Oogäräneji Mene cabu egä, “Maane miiji biname bime tääpume singi lenaja, maane lipu määme tääpume singi birige.” Weene peei cotre mene cängena liba jaawenuye, peei lui miijirage gyene, ⁹ yepä weene biname bine liba jaabelanemuye miijimiji cäbletääpe poto cidi me, weene peei cotre mene ne jaatropangtuye. Pui lui niya mule gyene. ¹⁰ Pui yepä matikolä cotre atopangta name pi, weene epu pana gemi egä weene iyeta cotre bine jaatropangtemuye, ¹¹ inge Acejiyame lui te itu jüicuji egä, “Sargi mule gone,” tabe cuta jüicuji egä, “Gone biname ne budre me yaagluye.” Weeme nuuja lui te licarage sargi mule jaawenuge, yepä tabe liba nuuja biname ne yaagluge, tabe peei lui cotre ne jaatropangtuge. ¹² Yoo, weeme atrana cirege pui cotre cabu me lui te biname bine yäasecräremuge. Peei name pi cängena ire weene ngena ne jaawenuye piijepu ngena jüicuye. ¹³ Ingle naace popi laati te biname ne owecu liba lica jaawenuge, pui te owecu ne lica cirege päpäna atrana padare cabu. Yepä, lui cina nuuja biname bine owecu jaawenemusi, Acejiyame me owecu cuta pisi nyene teeme tääpume.

Ätrunga Aboclomtäneji Gyene Miiji Waweneca cabu ca

¹⁴ Cäme ätrunga binamewale, ngena miiji gyene biname te iicaname egä, “Cane ätrunga biname gäne,” teeme waweneca liba miiji lica gemi? Ätrunga liba mene taatu, pepu ätrunga ibibi lica gyene biname ne niya cabu ca asatame. ¹⁵ Yoo, mime ätrunga watewale piijepu ngulewale liba piti nemi deedei piijepu cäbletääpe cäco, ¹⁶ ngenome weeme yepä te teebibine jaajemuge egä, “Yewo! Acejiyame weene cama gyene. Weene deedei cängena läbitininuye, cängena inajininuge,” yepä tabe te lica yäacäremuge cäbletääpe piijepu deedei? Peei nuuja miiji lica gyene. ¹⁷ Yoo, lui biname te Acejiyame poto cidi me jaatruguge, yepä teeme mene lica jaawenuge, teeme peei ätrunga papa gyene, toraca lica gyene.

¹⁸ Gone apu jüicemuye egä, “Yepä biname teeme miiji ätrunga pisi nyene, yepä nuuja teeme miijirage wawena pisi nyene.” Eewe, weene äblicäco ätrunga ne aboclomta

waweneca cāco ca. Siige, cane cāme ātrunga ne weeme tāāpume eboclomtenine cāme miiijirage waweneca cabu ca. ¹⁹Weene jāātrunguye egā, “Yepā taatu Acejiyame pisi nyene.” Yoo, peei miiiji gyene. Niiyaniya cable cina cuta peei umle cama icrajnige, siige teepi wālu gemi, yepā nuuja singi lica gemi Acejiyame me singi waweneme. ²⁰Weene buduma gone! Nāā, pajecu lica gyene egā wawena cāco ātrunga lui papa gyene? ²¹Weene mime kaakesaare Abrahamo poto cidi me ngene jotwananineye, tabe lipu Acejiyame me singi ne jewenuji, siige piba conocāco me ābituji Acejiyame me opo gaabe je. Tabe teeme bāgrā Isacako Acejiyame ne ecāruji, kula dade papa cabu ecituji. ²²Abrahamo Acejiyame ne toraca jitrunguji, peei name pi Acejiyame me mene ne ecatuji teeme singi waweneme. Teeme ātrunga epucāco me ābituji teeme wawena cabu ca. ²³Pipu pi toraca me ābituji Oogārāneji Mene lui jicēnige egā, “Abrahamo Acejiyame ne jitrunngige, siige teeme ātrunga name pi Acejiyame teebine einige conocāco ca.” Yoo, biname cina teebine yaainusi “Acejiyame me biname” ca. ²⁴Piba mine umle egā biname cina Acejiyame tāāpume kālyā lābitininusi teeme waweneca cabu ca. Mine āblicāco waweneca mime ātrunga cabu ca āyēblengta.

²⁵Cuta pepu ābituji ero magebi Rahaba tāāpume. Tabe Acejiyame me opo gaabe conocāco ābituji teeme wawena cabu ca, tabe liba Israela biname bime neeneni cubu ire biname bime teeme mete cabu me aacanuji āmlitame, piba teebibine teeme cubuyame bau ca aasatuji, jāātyepuji nuuja gaabe cabu.

²⁶Yoo, biname me tāāpe liba seemo cāco gyene, pui biname te budre. Cuta pui biname me ātrunga liba miiiji waweneca cāco gyene, peei ātrunga te budre.

3

Mage Māpu Gyene Wātā ne Cāngena Ire Atwime

¹Cāme ātrunga binamewale, miiiji weeme nesae biname taatu abiberāja kaakesea pa yaacatepesi, ingle cine lui abiberāja biname gemi, cine toraca mule umle cire lābitinijago. Peei name pi cine liba nuuja mule wawena, cime māpu daremu baborage cirege nuuja biname bime daremu cabu ca. ²Yoo, mine iyeta conocono jaawenemusi. Biname lui te conocono mene lica jicemuge, tabe conocāco gyene, piiyepu ibibi gyene teeme tāāpe iyeta cāngena ire atwime. ³Yoo, mine matikolā ayana gwidape ne cooso me tage cabu yaacitusi, amlemanteji nee-neni seea ca. Mine peei seea bine joomlemusi cooso ne pui ca yaablawājusi. Cooso te piba mime singi gaabe ne yaacatuge otnime. ⁴Cuta poo poto cidi me ngene jwaatwananinago. Poo lui babo-rage gwidape gyene, cuta babo buuwe te poo ne yaacananuge, yepā pisi nyene waapo wārega. Peei matikolā gwidape ca waapo biname te baborage poo ne yaablawājuge teeme singi gaabe cabu otnime. ⁵Biname me wātā pepu pana gyene. Ngānuge matikolā gwidape, teeme kaakesea lui baborage gyene.

Yoo, muye wiiryere cuta matikolārage gwidape gyene, yepā ibibi gyene babo glunu ne uubuderame. ⁶Nuuja taje mime wātā lui muye wādrāji pana gyene. Mime wātā cabu ca tasatanuge bucurage niiyaniya mene. Yoo, epu pana muye wādrāji lipu pisi nyene muye ngalebora, mime wātā cuta pisi nyene mime trupa ngalebora. Mine āblicāco uucratna teeme niiyaniya mene cabu ca. Niiya mene te iyeta mime ireclota ne sabe jaawenuge, epu pana budni te iyeta gwidape bine lipu teeme gaabe cabu yaabemuge. Satani mage umle gyene biname bime wātā oomlaname teeme niiya kaakesea waweneme. ⁷Iyeta maramara opoyame cibu piiyepu ele, piiyepu biicwale, biname cina umle peei bine oomlājeca teeme singi waweneme, ⁸yepā biname te licarage teeme wātā ne cāngena ire atwi. Mine ibibi lica gemi mime wātā mene bine iibaname. Mime niiya mene te mime nuuja biname bine ngenecu māpu me jaawenemuge. ⁹Nuuja taje mine wātā mene ca mime Yageyame Babe ne eso yāācārusi. Piba nuuja taje mine peei yepā wātā ca mime binamewale cama jāācelusi, Acejiyame lui bine teeme pana me itu jewenemuji. ¹⁰Miijimiji mene niiyaniya mene yepā tage cabu ca tāsuge. Cāme binamewale, peei mule miiiji lica gyene. ¹¹Mite niye piiyepu cārmecārme niye licarage yepā waja cabu ca tasatāsi. ¹²Mine āblicāco neeneni maramara opo kuu bine yepā uli cabu ca pāpāna. Mine āblicāco uli kuu ne seasea cabu ca āwācuta. Piiyepu mine āblicāco mite niye ne iitana malu cabu ca caapereniye luma. Yoo, miiiji lica gyene miiiji mene piiyepu niiya mene yepā tage cabu ca āsecrera.

Toraca Umle Lui Apu Gyene

¹³Weene liba toraca umle cama gemi, cāngena inajipi miiiji mule taatu waweneme. Cuta piiyepu weene liba lica nuuja biname bine jaajanemuyee weeme miiiji waweneca poto cidi me, weene piba toraca umleumle biname gemi. ¹⁴Yepā, weene liba claabe lābitininuye nuuja biname me miiiji tāāpume, coo weene liba jāje ngene jwaatwananinuye weeme taatu miiiji tāāpume, piba weene gone apu jicūye egā, “Cine temi umlerage biname.” Peei lui walya gyene. ¹⁵Pepu umle te lica tāduge cabucewe ca, yepā peei lui ai gawecewe

me ngene atwanena gyene. Pepu umle lica gyene Aceji Seemo bau ca, yepä Satani bau ca gyene. ¹⁶ Yoo, pui cewe cabu luma biname cina claabe piyepu ämugetna läbitininusi teeme nuuja biname te liba miiji jääpänuge, piyepu iyeta biname bime ngene atwanena luma teeme poto cidi me yaacrajuge, äcela puma birige piyepu iyeta nuuja niyaniya mule. ¹⁷ Yepä, pui umle lui Acejiyame bau ca conocäco gyene. Peei umle te singi gyene biname cina pooda cama lenajame, peei name pi teepi singi gyene nuuja biname bime täapuma, cuta peei umle te nuuja biname bime mene yäätəcijemuge, nuuja biname ne owecu cama yäätityäruge, müjimiji mule jaawenemuge. Peei toraca umle te lica biname bine maramara ire jaatwemuge teeme täape liba mara coo teeme gwidape liba nesae. Peei toraca umle te lica mara ngene atwanena yaacwabuge mene mitemite ca. ¹⁸ Biname lui cina singi pooda cama lenajame teepi nuuja biname bine owecu jaawenimusi, piba pui biname bime bau ca miiji mule ne jääpänusi.

4

Gone Ai Gawecewe ne Biname me Jaawenuye

¹ Ngena gyene inge weene claabeclabe lenajame piyepu mene abajame? Peei mule cina saacluge weeme ngene atwanena cabu ca, iyeta lui gemi weeme singi cabu je. Cuta peei cina laglinusi weeme cabu. ² Weeme poto biname cina singi gemi gwidape täapume, yepä äblicäco waadena, peei name pi teepi singi nuuja biname ne aglime. Poto biname cina gwidape täapume baborage singi läbitininusi, yepä teeme täapume gaabe lica birige päpäname. Teepi piba claabe cama yaacrajuge, nuuja cama jääcelusi. Yoo, teepi teeme singi gwidape ne lica jääpänusi, inge teepi peei täapume Acejiyame ne lica yäätineräjus. ³ Nuuja taje teepi Acejiyame ne yäätineräjus, yepä cuta lica jääpänusi, inge teeme ngene atwanena lui conoconorage gemi, teeme taatu singi cabu yaacrajuge. ⁴ Weene liba pepu mule bine jaawenemuye, weene piba epu pana gemi ätecija cäco magebi liyepu lui te baborage singi gwene teeme rooriye ne abmalame nuuja ne acatame. Nää, weene umle lica gemi egä lui biname te ai gawecewe ne biname me jaawenuge, tabe cuta pui padare cabu Acejiyame ne cubuyame me jaawenuge. Inge lui te baborage singi gyene ai gawecewe me mule täapume, tabe äblicäco cuta Acejiyame me biname me lenaja. ⁵ Coö, weene pama apu jingenige egä Oogäräneji Mene te papa jüicenige egä, “Lui seemo ne Acejiyame mime trupa ngalebora itu secituji, pui te kokre singisingi cama gyene.” ⁶ Yepä, teeme babo miiji, lui nicärininige, kokre gyene cuta peei cabu ca. Oogäräneji Mene apu jüicenige egä, “Lui biname te singi teemämu babo me äbitame, Acejiyame teebine jäägyuge, yepä lui biname te Acejiyame ne opo gaabe me yaacituge, Acejiyame teebine yäätityäruge.”

⁷ Yoo, peei name pi weene Acejiyame ne weeme trupa ecärewe teeme singi wawename. Satani ne kaake ca icelyärewe, tabe piba weeme bau ca pa luucrupi. Weene Acejiyame gome me naaclege, Acejiyame piba weeme bau pa yaanajege. ⁸ Yoo, niya mule biname, weene weemämu äcisäjiipeye! Lui cina neeneni ngene atwanena cama gemi, weeme ngenecu emacätinjemeye Acejiyame täapume singi äbitame. ⁹ Weeme niya mule name pi weene miiji ngenecu mäpu äbitipeye, ele ingenitninege. Weeme papa ngange äwäcna ebmaleye, mäpu ngene atwanena täapume ngene jotwanineye. Weeme gege siige, inge babo mäpu pisi nyene. ¹⁰ Weene umle äbitineye egä Yageyame me opo gaabe je weene miiji lica gemi, tabe puma cita ca weebibine toraca ngenecu miiji me pa jiwenipi, toraca gege piba picäripi.

Mime Binamewale bine Iicetna Gone

¹¹ Cäme ätrunga binamewale, gone niya mene jaji weeme nuuja poto cidi me. Lui te teeme biname ne jüicetnuge, tabe cuta Acejiyame me cotre mene conocono me jaawenuge, inge cotre mene te jüicenige egä weene miiji biname bine owecu wawena, yepä iicetna lui owecu lica gyene. Peei lui weeme kaakesea lica gyene cotre ne atraname egä miiji gyene acatame, coo niya gyene peei name pi miiji abmalame. Yepä, weene miiji cotre ne cängena jaawenuye. ¹² Pisi nyene yepä taatu cotre oogära biname, lui te ibibi gyene biname bine toraca atraname, piba poto biname bine niya cabu ca äsecreraame waadename, cuta nuuja poto bine äyebblengame. Peei name pi maane, baa laasi näte lui te mäme biname ne jaatranute?

Gone Mene Papa Iicema Weeme Miiji Kaakesea poto cidi me

¹³ Yoo, cäme mene matikolä pisi nyene teeme täapume lui cina Acejiyame cäco teeme kaakesea poto cidi me jaatranusi, piba jüicemusi egä, “Page coo pama ciyeciye, cine piyemopo pui babo cewe me naclenige. Cine yepä kämäge puma pa ninajipi aletnale-tna kaakesea wawena täapume. Cine bucurage rarekaake pa jääpänemepesi.” ¹⁴ Agesa cäme mene pepu biname täapume; weene umle lica gemi ciyeciye ngena te äbitenige! Weeme ireclota leca lui kroke glääsi pana gyene, lui pisi nyene matikolä padare piba läyebllingtuge. ¹⁵ Weene apu cire jüicejiye egä, “Mime Yageyame te liba singi gyene, cine piba ninajininige,

ai kaakesea ne jewenenisi, peei ne piyepu cuta.”¹⁶ Weeme kaakesea piyepu weeme ireclota lui Acejiyame me ime cabu temi. Gone weeme kaakesea täápume papa iicetneja, epu pana egä weeme ireclota lui weeme ime cabu sine. Acejiyame singi lica gyene pepu mule täápume.

¹⁷Yoo, lui biname te liba umle gyene egä, “Cane miiji gäne peei gaabe cabu otnime,” yepä tabe lica läduge, tabe peei lui niiya mule ne jaawenuge.

5

Cuta Dogwe Biname cina Teeme Daremu Cirege Pápána

¹Cäme mene cuta pisi nyene gwidape dogwe biname bime täápume. Weene ele ingentnige ajiij mene cama, inge mäpurage daremu pisi nyene weeme täápume. ²Weeme gwidapegwidape sabe läbitininusi, weeme miijimiji cäbletääpe potäte cina jaatecimusi. ³Weeme rarekaake juju läbitininusi. Peei juju te weebibine opo iwatnininuge egä weene ceera cäco biname gemi. Muje te gwidape ne lipu yaataclomuge, peei rarekaake te waniba pana weebibine sabe cire jiwenipi. Gwidape rarekaake weene tomitomi jaawenemuye ai ceräcerägäabu poto bimu täápume. ⁴Weene lica toraca daremu yäcäremuye pui biname lui cina weeme calwacupi cabu kaakesea jaawenemusi. Teeme aitna mene itecijinege! Acejiyame mime Kokrerage Yageyame ituge ätecija teeme ala. ⁵Ai gawecewe cabu weene iyeta weeme singi deedei piyepu gwidape ituge aletna. Weene weemämu ngeerangera cibi pana ire latwinuye. Yoo, agli täápume bimu te bii tatyaramtige. ⁶Weene biname bine ablaweja biname bau me papa yaawademuye, teeme gaabe liba lica gyene asatame. Poto cina cuta budre weeme bau ca itu jääpänepesi, siige.

Mene Awagrija piyepu Irecu Ätumuta poto cidi me

⁷Yoo, cäme ätrunga binamewale, agha mene weeme täápume lui cina mime Yageyame me acnenuta täápume jawagrijenisi. Teeme trämä cängena inajipi, epu pana gije liteta biname liyepu, lui te calwacupi kuu ne jaawagrijuje. Niinäce ngupe te täduge, gije ne uutaname jaawenuge. Ingwe ca ngupe te liba täduge, gije cepa ne piba yoororuge, siige kuu jaawenuge. ⁸Weene pepu pana jawagrijeniyee, umle cama egä mime Yageyame me acnenuta bimu lui cudecewe lica gyene.

⁹Cäme ätrunga binamewale, gone weeme nuuja bine jääingäjemuye, piba Acejiyame te weebibine lica birige atrana. Weene umle egä mime atrana biname cudecewerage lica gyene. ¹⁰Cäme ätrunga binamewale, sasa mename biname poto cidi me ngene jwaatwananinago, lui cina mime Yageyame me ngii cabu mene jiiemus. Teeme pana mule ecateye lipu cewe oocana cabu änyemutaname. Teepi lica nuuja biname ne jääingäjusi, yepä cängena jaawagrijuji teeme äsecrera täápume. ¹¹Page teepi babo miijirage gemi, inge teeme ireclota cabu teepi ätrunga gaabe ne lica ebmalujisi, mäpu ne liba jääpänsi. Yoobu lui pepu biname ge. Maramara mäpu cina teeme bau me secluji, yepä tabe Acejiyame ne jitrunguji teebine asatame. Teeme ireclota cabu ca mine opo yaawatnusi Yageyame ne, tabe lipu babo miiji ireclota ingwe ca Yoobu ne ecäruji. Mime Yageyame me waadena mule pepu pana gyene babo owecu cama.

¹²Cäme ätrunga binamewale, agha baborage gwidape: Weene liba toraca mene singi iicaname, gone nuuja ngii cama awejena weeme mene toraca me äbitame, gone gawecewe ngii cama iicana, piyepu gone cabucewe ngii cama iicana, coo cuta nuuja ngii cama gone iicana. Weene miiji iicana egä, “yoo,” coo “lica.” Peei mene taatu jiiucuye, piba weebibine lica atrana birige egä “niiya mule biname gemi.”

¹³Weeme yepä te liba mäpu cabu yaanajuge, tabe miiji Acejiyame bau irecu ätumutame. Weeme yepä te liba gege cama, tabe miiji Acejiyame ne awepperäja uupera cama. ¹⁴Weeme yepä te liba pita cama yaanajuge, tabe miiji ätrunga inge modamoda biname bine ala asogleca teeme gome irecu ätumutame. Teepi te migi ca yaaganusi mime Yageyame me ngii cabu. ¹⁵Teeme irecu ätumuta te pita biname ne miiji me pa jaawenepi, teepi liba ätrunga cama jaawenusi. Mime Yageyame te piba pita biname ne pa yaarpinantepi, piyepu teeme niiya mule bine yääyebhengemepi teeme cabu ca. ¹⁶Peei name pi weeme niiya mule weemeweme ajanipeye piyepu weemeweme täápume irecu ätumutanipeye weene miiji me äbitame. Baborage kokre te täduge Acejiyame bau ca, biname te teeme ngenecu bora liba lamacetnäjuje, piba cängena irecu lätumutuge tabe. ¹⁷Eliya me irecu ätumuta lui pepu kokre cama ge. Tabe binamerage ge mine liyepu, yepä tabe liba Acejiyame bau irecu ätumutuji ngupe ne iibaname, piba ngupe te lica pui gawe cabu seciruji nesae kämäge cebo ngalebora. ¹⁸Pui padare te liba apiruji, tabe cuta irecu ätumutuji. Ngupe te dume cabu ca piba sitramuji, piba pui gawe cabu gije cina cängenarage uutinujsi.

¹⁹Cäme ätrunga binamewale, weeme yepä te liba läyebhingtuge Acejiyame me toraca gaabe cabu ca, weeme nuuja te liba teebine yaawecnistuge toraca gaabe cabu me, peei lui babo

miijirage gyene. ²⁰ Ai poto cidi me ngene ca egleye egä biname lui te nuuja ne teeme niiya gaabe cabu ca saawecnistuge, pui biname me seemo ne cuta saasatuge niiya puupu cabu me otrime, cuta piyepu teeme bucurage niiya mule bine yiisibrecmuge.

Yoo siige, cane ngii Yakobu, căme mene ngălu peecwi yene.

PETERU ME NIINÄCE LETA

¹ Cane Peteru säne; Yeesu Keriso me ätyepäneji biname gäne. Cane weeme bau me yoogärenine lui gemi Acejiyame me jājācrāneji biname, weene lui cina tuocratnininuuije ai maramara probins cabu lenajame: naace Pontus me, Galatiya me, Kapadokiya me, Asiya me, cuta piyyepu Bituniya me. ² Ujarage, Aceji Babe te weebibine itu jījācrininuui teeme biname me äbitame. Aceji Seemo peei kaakesea weeme yepäyepä trupa cabu ituge wawena, weene Yeesu Keriso me mene äcwetname piyyepu teeme uudi ca kälyä päpāname, ingle tabe budre äbituui, siige teeme uudi te tapiruiji weeme niia mule äcisejame.

Acejiyame me miiji te weeme cabu lenajame piyyepu tabe weebibine baborage poode ceerame.

Toraca Ireclota Cabucewe je Pisi Nyene Mime täapume

³ Mine Acejiyame ne eso pa yääcäresi, lui mime Yageyame Yeesu Keriso me Babe piyyepu Acejiyame gyene. Tabe baborage owecu gyene mime täapume, mibibine kirece ireclota itu nicärininuui, tabe liba Yeesu Keriso ne budre cabu ca erpinantuui. Yeesu me arpinenta cabu ca mine umle gemi egä tabe cuta mibibine cirege arpinera ten cama iyeteta lenajame. ⁴ Mine cuta umle egä miijimiji gwidape piti nemi cabucewe je mime täapume, ingle mine Acejiyame me bägrāwale gemi. Peei gwidape lica gawecewe gwidape pana gemi, yepä ngälu cāco gemi, piyyepu ocwāwa cāco, piyyepu peei cina äblicāco sabe me äbita. ⁵ Acejiyame me kokre pisi nyene mibibine cāngena waadename peei toraca ireclota cabu me iyeteta ten cama lenajame, ingle mine teebine jäärungusi. Mime puupu pisi nyene cabucewe je amacetnājāneji, piyyepu peei äsecrera puupu ne cirege aboclomta ceräcerägäabu padare cabu.

⁶ Peei name pi mine ngenecu gege cama ninajininige, ingle mine toraca gege puma cirege lenaja. Ngānu gyene mine page puu ngenecu māpu cama matikolä padare ninajininige, ingle maramara apicetnera cina mime bau me seclenige. ⁷ Mine naace popi peei apicetnera bine jääpānemusi egä peei cina mime Acejiyame cabu ätrunga ne toraca kokre me wawename. Yoo, mime ätrunga me apicetnera bine mine ngene ca eglemisi kula pana gwidape cabu ca, ngii gol. Nuuja taje biname cina gol kula bine baborage nuunu jaawenemusi daglamete äyebhengame. Piba miijirage gol taatu tasatuge muye cabu ca. Ngānu gyene puu gol me lenaja lica iyeteta gyene, yepä muye ca miijirage jaawenemusi, piba cuta mime ätrunga bine lui baborage gemi gol cabu ca, miiji apicetnera kokre lenajame. Piba ceräcerägäabu bimucaba Yeesu Keriso teemāmu liba cire laboclomtepi, baborage miiji pisi nyene mime täapume lui cina pepu ätrunga cama gemi. Acejiyame bau ca mine piba awepyerāja, jamyacu apaclyera, piyyepu miijirage ngii cire jääpānemepesi. ⁸ Mine puu Acejiyame ne lica ituge päpāna, yepä mime baborage singi pisi nyene teeme täapume; cuta page mine puu äblicāco teebine päpāna, yepä mine teebine cāngena jäärungusi. Peei name pi mime ngenecu gege epu baborage gyene, siige mine peei poto cidi me mene äblicāco. ⁹ Peei gege eei name pi gyene, Acejiyame mibibine niia cabu ca nisecrärenininige, niwadininige cabucewe me ten cama iyeteta lenajame. Peese nyene ingle mine teebine ätrungame.

¹⁰ Mime äsecrera niia cabu ca iyeteta ireclota cabu me, Acejiyame me sasa mename biname cina baborage singi peei poto cidi me umle äbitame. Teepi biname bine ingwerage padare täapume mene jejemujsi Acejiyame me owecu piyyepu ätiyera mule poto cidi me mime täapume, yepä teepi umle äbitame liga läbitininisi, pajecu lica ge teeme täapume. ¹¹ Keriso me Seemo teebibine mene jejananemuui egä, “Ciige Acejiyame me jajeji biname Keriso te mage māpu padare ne cire jääpānepi, peei cabu ca cire lasatepi, siige jamyacu apaclyera ne cire jääpānepi.” Teepi peei mene poto cidi me mage ngene jotwanininujsi, ingle teepi babo singi ge umle äbitame egä lipulipu piyyepu lui padare cabu peei mule te cirege äbita. ¹² Acejiyame piba teebibine umle jewanemuuji egä pui mule te licarage teeme ireclota padare cabu cirege äbita, yepä ingwerage padare mime ireclota cabu mime täapume. Yoo, page Miiji Mene pajecurage jajanāneji gyene iyeta mime cabu me. Lui biname cina ai mene weebibine ituge jajanena, teepi cabucewe ca Aceji Seemo bau ca teeme umle itu jepānujsi. Peei mule pepu miijirage gyene egä Acejiyame me mename seemo cina cuta singi gemi cerāmu umle äbitame peei täapume.

Weene Cāngenarage Conocāco Inajipi!

¹³ Yoo, mine Acejiyame me miiji mule poto cidi me umle gemi, peei name pi mine ngene atwanena bine pa yaamacetnājemepesi, cāngenarage lenajame. Mime ngene atwanena bine pa yaacranemepesi Acejiyame me owecu piyyepu miiji cabu me, mine lui bine teeme bau ca cirege päpāna Yeesu Keriso me acnenuta bimucaba. ¹⁴ Page mine Acejiyame me bägrä

gemi, peei name pi mine teeme singi pa jaawenepesi. Gonerage weeme sasa singi bine waadena, epu pana pui padare cabu lipu yaawadimuye, weene toraca gaabe poto cidi me liba umle căco inajininu. ¹⁵ Acejiyame lui te mibibine ituge jăăcra, tabe conocăcorage gyene, peei name pi cuta mine miiji conocăco mule taatu jaawenemepesi. ¹⁶ Yoo, Oogărăneji Mene te apu jiićenige egă, “Weene cāngena epucăco inajipi, ingle cane epucăco gāne.”

¹⁷ Acejiyame te iyeta biname bine yepă ibi cirege atrana teeme waweneca poto cidi me, nuuja te lica cirege asata atrana cabu ca. Peei name pi mine lui cina teebine yaainusi Babe ca, mine miiji cuta teebine cāngenarage opo gaabe me acita iyeta mime lenaja cabu ai gawecewe cabu je. ¹⁸ Acejiyame weebibine ituge āsecrera weeme kaakesaarewale bime krokeciye mule cabu ca. Mine umle memi egă tabe lica rarekaake ecāruji mime āsecrera tăăpume. Rarekaake me daremu lui nuuja taje gawe me lăbituge. ¹⁹ Yepă, tabe teeme ngenecurage băgră Keriso ne ecāruji. Keriso budre ābituji, teeme uudi tapiruji mibibine āsecrera. Yoo, Israela biname bime sasa mule cabu teepi miijirage maamoi plongo ca yiiwārusi teeme niija mule bine āyebļengame. Peei plongo lui jamyacurage yaanajuge, teeme nuuja dupe lica birige. Yoo, Keriso pepu maamoi pana conocăco gyene. Tabe teemāmu itu iiwārājuji mime niija mule āyebļengame. ²⁰ Acejiyame camuge ai gawecewe ne wawena tabe liba Keriso ne jejuji mime niija cabu ca āsecrera biname me ābitame, siige ai padare cabu teebine ituge aboclomta mime tăăpume. ²¹ Yoo, Keriso me miiji kaakesea name pi mime ngenecurage atwanena cina Acejiyame cabu yaacrajuge. Tabe te teebine budre cabu ca erpinantuji, piba cabucewe me ecanuji jamyacu apaclyera cabu lenajame. Peei name pi mine Acejiyame ne jăătru-ngusi piijepu mime ngenecurage atwana teeme cabu yaacranusi.

²² Mine Acejiyame me toraca mene ne ituge ātecija mime trupa bine amacetnājame, ngālu siige page mine toraca singi me ituge ābita mime ātrunga binamewale bime tăăpume. Yoo, mine mime biname bime tăăpume baborage singi pa lăbitipago iyeta mime ngenecurage cama.

²³ Page mime kirece ireclota pisi nyene. Peei ireclota lica ge mime mage babe bime cabu ca, ingle teeme bau ca ireclota lui ngālu cama gyene. Yoo, Acejiyame lui ngālu căco gyene; tabe te ai kirece ngālu căco ireclota mibibine itu nicārininuji pui padare cabu mine liba teeme mene jitrunguji, ingle teeme iyeteta mene cabu kokre pisi nyene iyeteta ireclota ceerame.

²⁴ Oogărăneji mene te ai poto cidi me jiićenige egă,

“Iyeta biname bime ireclota lui baace pana gemi;
iyeta teeme miiji lui epu pana gyene baace popo me liijepu.

Yoo, baace te budre lăbituge,

cuta teeme popo cina saatrametnemuge,

²⁵ yepă Yageyame me mene lui iyeteta ngālu căco gyene.”

Yoo, peei Miiji Mene ituge weebibine jajanena.

2

Mine Ājărcrăneji Gemi Acejiyame bau ca

¹ Yoo, Acejiyame mibibine kirece ireclota nicārininuji, peei name pi mine miiji iyeta niija mule bine abmala. Walya mene licana gone, piijepu walya mule gone wawena, āneca gone, cuta piijepu gone nuuja biname me gwidape ire patre agli. ² Epu pana matimatati băgră liijepu iyeta padare singi ngame migi nănājame, weene miiji Acejiyame me mene tăăpume pepu pana baborage singi ābitame, naace tăăpume weeme ātrunga te uutaname ngālu weene iyeteta ireclota ne păpāname. ³ Yoo, mine ituge păpāna egă Yageyame lui miijirage, owecu cama biname gyene.

⁴ Mine Yageyame bau me pa naclege, ingle mime ireclota teeme cabu ca gyene. Tabe epu pana gyene kula caage liijepu, poto biname cina lui ne jăăgyusi egă raranga tăăpume miiji lica gyene, yepă Acejiyame te lui ne jejuji egă babo miijirage teeme tăăpume. ⁵ Tabe lui bine iyeteta ireclota nicārininige, mine lui mete kula pana gemi teeme tăăpume. Epu pana mete raranga biname te liijepu kula bine yaawademuge teeme kula mete rarangame, Acejiyame mibibine niwadininige teeme ātrunga ingle bine wawenecurage. Acejiyame singi gyene mine teeme kirece muleyame iiwāreja biname me ābitame teeme singi mule Yeesu Keriso me ātiyera cabu ca wawenecurage. ⁶ Oogărăneji Mene pisi nyene pui kula poto cidi me, lui Keriso sine, egă,

“Ire, cane babo miijirage kula jitrānutenine,

sipe caage tăăpume jecnenine Yerusalemacewe cabu Siijona podo cabu je.

Lui cina teebine jăătrungusi,

teepi lica birige ajiri me ābita, yepă miiji lenaja ne jăăpānusi.”

⁷ Siige, Keriso lui babo miijirage gyene mime tăăpume lui cina teebine jăătrungusi. Yepă, lui cina singi lica teebine ātrungame, teepi cuta umle cirege tabe lipu baborage gyene! Oogărăneji Mene te peei poto cidi me jiićenige egă,

“Lui kula ne raranga biname cina jigyisi,
baborage bābitige iyeta nuuja cabu ca.”

⁸ Oogārāneji Mene nuuja gome cuta jiicenige egā,

“Ai kula te jaawenemuge biname bine naabe atropengāja,
eei kula lui te teebibine jaawenemuge atrametname.”

Yoo, teepi naace name pi yaatrametnemuge, ingle teepi lica Acejiyame me mene jāātrungusi peei kula poto cidi me, lui Keriso sine. Pepu ge Acejiyame me singi teeme tāāpume.

⁹ Yepā, mine teeme pana lica gemi, mine Acejiyame me jāācrāneji biname gemi, lui miiji kaakesea biname gemi mime Mope Biname Keriso tāāpume irecu ātumuta kaakesea wawename. Mine mara tomi cabu temi nuuja biname cabu ca, ingle mine Acejiyame tāāpume mara me ituge ābita. Mine Acejiyame me inglewale gemi, mine jāācrāneji gemi mene jajanename iyeta teeme miijimiji mule poto cidi me. Toraca, teeme mule mime tāāpume babo miijirage gyene. Tabē mibibine krokeciye cabu ca ala nisoglicipi teeme miijirage apaclyera cabu lenajame. ¹⁰ Niināce mine Acejiyame me ingle cabu lica ge, yepā page mine pui cabu temi. Niināce mine nuuja umle lica ge Acejiyame me owecu poto cidi me, yepā page mine teeme owecu ne ituge pāpāna.

Acejiyame me Kaakesea Mine Jaawenusi Toraca Ngenecu cama

¹¹ Cāme binamewale, mine catecewe biname pana gemi ai gawecewe cabu. Peei name pi mine miiji mime tāāpe me niija singi bine āgyema, ingle peei cina mime toraca singi ne Acejiyame tāāpume sabe jaawenusi. ¹² Mine miiji iyeta padare cabu epu cāngena lenajame teeme gome lui cina Acejiyame umle cāco gemi, egā teepi liba apu jaangemuge egā, “Teeme mule mara gyene peei name pi conocono,” pui biname cina mime miiji taatu waweneca pa jāāpānepesi. Teepi piba Acejiyame ne cire yaawepyerājepesi teeme acnenuta bimu cabu.

¹³ Yageyame me singi name pi, iyeta ai gawecewe mope biname bime cotre mine miiji jaawenemusi, egā miiji mime gawecewe babo mopeyame me mene cāngena āteccijame. ¹⁴ Cuta piyepu teeme ingwe gaabe ca mope biname bime mene mine miiji āteccija, ingle babo mope biname te teebibine jāātyepājemuge niija mule biname bine teeme daremu ceerame piyepu miiji mule biname bine awepyerājame. ¹⁵ Acejiyame singi gyene mine cāngena lenajame naace tāāpume pui biname lui cina buduma gemi Acejiyame me mule poto cidi me, teepi mime miiji taatu ireclota ne liba jāāpānusi, piba teepi iicetneja mene āblicāco. ¹⁶ Yoo, mime toraca Mopeyame lui cabucewe je yaanajuge, piyepu mine āsecrāreji gemi ai gawecewe mule cabu ca. Yepā, mine āblicāco apu angī egā, “Cane asatāneji gāne gawecewe biname bime cotre cabu ca, siige miiji gāne ai niija mule wawename.” Eewe, pepu gone! Mine miiji iyeta mime ireclota cabu ca aboclomāja egā mine Acejiyame me biname gemi teeme singi bine wawenecame. ¹⁷ Mine iyeta biname bine cāngena opo gaabe me yaacranemusi, iyeta ātrunga biname bine owecu jaawenemusi, mime gawecewe mopeyame me mene cāngena jāāteccijusi, piyepu lui mule tāāpume Acejiyame singi lica gyene, mine miiji wālu peei ne wawename.

Keriso pana Mule Mine Miiji Jaawenemepesi

¹⁸ Weeme poto lui cina nuuja biname bime kaakesea jaawenemusi, teepi miiji teeme babo biname me mene cāngenarage āteccija; lica eei taatu me lui owecu cama teeme kaakesea bāgrā bine ire jaatwemuge, yepā cuta owecu cāco babo biname me mene miiji āteccija. ¹⁹ Yoo, miiji gyene weeme nuuja tāāpume tabe liba poode ngene atwanena cama māpu cabu cewe loocananuge, liba peei māpu lica toraca daremu teeme niija mule tāāpume, piyepu tabe liba ngene jwaatwananuge apu egā, “Acejiyame singi gyene cane apu lenajame liba māpu cabu.” ²⁰ Siige, ngena miiji gyene weeme tāāpume, weene liba cmecme ne bojācu jāāpānuye weeme niija wawena tāāpume? Yepā, weene liba miiji mule taatu jaawenemuye, puma cita ca cewe oocana bojācu jāāpānuye, piba Acejiyame weebibine miiji pa jiwenipi. ²¹ Yoo, peei tāāpume Acejiyame te mibibine ituge ala asogleca, ingle Keriso māpu cabu itu cewe oocananuji mime niija mule āyēblengame. Tabē mibibine niwabininuji lipulipu teebine ingwe ācwime. ²² Teeme nuuja niija mule lica ge, piyepu nuuja walya mene teeme tage cabu ca lica ituge asata. ²³ Teepi liba teebine jāācnecusi, tabe lica teeme mene jewecnistemuji. Teepi liba teebine niija me jaawenusi, tabe lica jaajemuge egā, “Cane ai ne pa yaawecnistepene.” Eewe, tabe iyeta teeme ngene atwanena Acejiyame me ime cabu icranemuji, lui te biname bine conocāco jaatranemuge. ²⁴ Keriso mime niija mule bine teeme tāāpe cabu ewademuji baarge uli cabu me, naace tāāpume mine iyeta niija mule abmalame, piyepu conocāco mule cina mime ireclota cabu lenajame. Tabē dupe bine jepānemuji mibibine miiji me wawename. ²⁵ Yoo, mine lui epu pana gemi maamoi liyepu, lui te gaabe cabu ca lapesaruge, yepā Acejiyame mibibine gaabe cabu me cuta niwecnininuji mime seemo me Ire Atwiyame piyepu Yageyame ne ingwe ācwime.

3

Ai Mene Lui Coga Rooriye täápume

¹ Cuta agesa căme mene magebi täápume. Weeme rooriye bine yäätacijemuye piyepu teeme singi weene cāngena jaawenemuye. Yoo, poto weeme rooriye liba Acejiyame me mene lica jäätrungusi, teepi weeme miijimiji mule liba jääpānemusi, puma cita ca Acejiyame täápume cuta singi läbitinini. ² Mene ngānu gyene, ingle teepi pa jääpānepesi weeme jugi căco mule bine, piyepu weene teebibine lipu opo gaabe me yaacranemusi. ³ Yoo, weene liba singi gemi jamyacurage lenajame, edingāli amacetnājame, miijimiji căbletāāpe piyepu oplacmelāja gwidape asigrerame peei lui babo gwidape lica gyene. ⁴ Pātā, weeme ngenecu bine yaamacetnājemuye ngenecu bojācu piyepu owelaamelame lenajame. Pepu jamyacu te sasa me lica läbituge. Peei lui baborage gwidape gyene Acejiyame me opo gaabe je. ⁵ Sasa cabu ca magebi lui cina Acejiyame täápume mara me läbitinini piyepu Acejiyame cabu teeme ngene atwanena bine yaacranemusi, teepi ngenecu cabu ca jamyacu ge, piyepu teeme rooriye me singi cāngena sewademujisi. ⁶ Saara pepu magebi ge. Tabe Abrahamo me mene jäätecijuge piyepu teebine yageyame ca yaainuge. Weene miiji gemi Saara ne ingwe äcwime, weene liba conocāco mule jaawenemuye piyepu lica wālu ne padare ceera weeme jamyacu ngenecu ne sabe wawename.

⁷ Age căme mene rooriye täápume. Weeme coga bime kokre lica gyene weeme pana baborage, peei name pi teebibine owecu cama opo gaabe me yaacranemuye. Weene umle gemi egā weene iyeteta ireclota ne ten cama cirege pāpāna Acejiyame me owecu name pi. Weene pepu cāngena inajininuge naace täápume nuuja gwidape te lica weeme irecu ātumuta mene bine iibecla.

Lipu Mule Gyene Miiji Biname Liba Māpu cabu Yaanajuge

⁸ Age căme mene weeme iyeta täápume. Weene yepā ngene atwanena cama inajipi, weemāmu owecu piyepu singi läbitininuye, ingle mine iyeta Acejiyame me inglewale gemi. Peei name pi weeme nuuja bine owecu cama yäätityāremuye, piyepu niinäce gaabe me jaawenemuye. ⁹ Yoo, nuuja biname te liba weeme yepā ne niija jaawenuge, gone teeme daremu ne awecnista. Nuuja te liba niija mene teebine jaajuge, gone niija mene ne jaawecnis-tute, pātā weene Acejiyame bau irecu lātumutinuye pui me miiji täápume, ingle Acejiyame weebibine ituge ala asogleca pepu lenajame teeme bau ca miiji pāpāname. ¹⁰ Oogārāneji Mene te jicenge egā,

“Lui te singi gyene gege

piyepu miijirage ireclota täápume,

tabe miiji teeme wātā ne cāngena ire jaatwuge

niija mene iicema cabu ca,

piyepu walya mene te gone teeme tage cabu ca asata.

¹¹ Tabe miiji niija mule cabu ca latatrongāruge miiji taatu mule wawename.

Tabe miiji poode täápume singi piyepu peei cabu lenajame.

¹² Ingle mime Yageyame te conocāco mule biname bine cāngena ire jaatwemuge,

piyepu teeme irecu ātumuta mene cāngenarage yäätacijuge.

Yepā, biname lui cina niija mule jaawenemusi,

tabe teebibine kaake ca yäēcelyāremuge.”

¹³ Siige, pama nuuja te lica weebibine niija pa jiwenipi, weene liba singi gemi miiji mule taatu wawename. ¹⁴ Yepā, liba biname te weebibine niija pa jiwenipi weeme miiji mule name pi, weene miiji taatu peei cabu ca pagege pāpāna. Wālu gone biname täápume, cuta piyepu māpu ngene atwanena gone yaacatuye. ¹⁵ Yepā, weene miiji Keriso ne niinäce pu-upu ecārepeye weeme ngenecu cabu, piyepu teebine Yageyame me jaawenepeye weeme täápume. Yoo, biname te liba weeme yepā ne yäätengluge aboclom-tame tabe ngena ne ngene atwana ca joomluge, tabe miiji amacetnājāneji lenajame miijirage daremu mene awecnistame. ¹⁶ Weene owecu cama weeme ātrunga ne cāngena eboclomtaye nuuja biname bime täápume. Weene cāngena inajininuge, piba weeme ngenecu te lica māpu läbituge niija mule name pi, yepā weeme mule ne weene ngene ca yaagluye egā miiji taatu gyene. Piba biname lui cina niija mene jicemusi weeme Keriso cabu miiji mule poto cidi me, teepi ajiri me pa läbitipesi teeme mene poto cidi me. ¹⁷ Yoo, weene liba māpu jääpānuye weeme niija mule name pi, peei weeme yene ingle. Yepā, weene liba māpu jääpānuye weeme miiji mule name pi, peei liba Acejiyame me singi birige, piba peei cabu pisi nyene miiji weeme täápume. ¹⁸ Yoo, Keriso cuta māpu jepānuji, tabe liba budre äbituji weeme niija mule äyebile-ngine. Tabe lui conocāco biname ge, tabe yepā gāābu budre äbituji, iyeta conocono biname bime niija mule daremu ne peega ecatuji, gaabe mime täápume jewenuji Acejiyame bau otnime. Tabe binamerage täāpe cama budre, yepā cabucewe täāpe cama arpinantuji. ¹⁹ Tabe piba gawecewe ne ebmaluji, piyeyeme äduji Miiji Mene jajime pui sasa budre biname

bime seemo bine, lui cina awamuta puupu cabu yaacrajuge atrana trämä. ²⁰ Peei lui eei bime seemo gemi, lui cina ujarage Nooa me padare cabu singi lica Acejiyame me mene ätecijame. Yoo, Acejiyame leca padare teebibine jewagriemuji teeme mene ätecijame, Nooa liba pui poo ne eranguji. Yepä, eit biname taatu cina teeme mene jitecijujisi, pui poo bora me ebäcnujisi, pepu äsecräruji babo igi niije cabu ca. ²¹ Yoo, mime niije ca äciseja Yeesu me ngii cabu lui seeji pepu pana gyene. Mine niije ca äciseja ne ituge acata Yeesu me ngii cabu niija mule daremu cabu ca äsecrerame, ingle mine Yeesu Keriso ne jitrungujisi lui te budre cabu ca itu arpinantuji. Peei äciseja tääpe jugi ne lica birige äyebingta, yepä peei ca mine Acejiyame bau me latatrongärinago, teebine yaawejanusii mime ngenecu amacetnäja tääpume. ²² Yeesu Keriso ituge otni cabu me; tabe puma cabucewe je Acejiyame me camu poto cidi me enajenige. Tabe iyeta mename seemo bine ire jetwenemige piiyepu iyeta nuuja kokre gwidape piiyepu maramara mopeyame bine.

4

Acejiyame tääpume Inajipi

¹ Naace name pi Keriso cewe oocananuji teeme ai gawecewe tääpe cabu, mine miiji teeme pana ngenecu kokre äbita, ingle lui te teeme tääpe cabu cewe loocanuge, teeme tääpume siige gyene niija mule me kokre. ² Peei name pi ai gawecewe lenaja cabu weeme niija singisingi mule gone jaawenemuye, yepä Acejiyame me singi taatu jaawenuye. ³ Uja baborage padare cabu weene epu biname bime niija singisingi mule bine jebenemujiye lui cina lica Acejiyame ne jäätrungusi. Naace ge weeme poto bime ireclota cabu peega ge jugijugi mule piiyepu singisingi niija mule tääpume. Nesae padare lica ge weene liba umle ge sice buduma äbita, piba buduma piiyepu niijarage mule bine jaawenemuye. Weene uuje bine ituge ätrunga piiyepu teeme tääpume gogecupi itu jaawenemepeye. ⁴ Yoo, page weeme ceegewale câlu te jitenenemige, weene liba singi lica gemi ten cama abasutame pui mule cerämu wawename. Teepei peei name pi weebibine jisädininusi. ⁵ Peei ngänu gyene, teepi Acejiyame me opo gaabe cire laitnipesi iyeta peei mule tääpume. Tabe amacetnäjäneji gyene iyeta biname bine atraneme, teebibine lui cina ireclota gemi piiyepu lui cina ituge budre äbita. ⁶ Yoo, ngena tääpume pui toraca mene Keriso poto cidi me ituge jaji sasa budre biname bime seemo bine? Agesa ingle: Teepei ituge budre päpäna, ingle budre lui Acejiyame me daremu gyene iyeta biname bime niija mule tääpume. Yoo, teeme tääpe ituge budre, yepä Acejiyame te singi ge pui seemo bine cuta padare ceera Miiji Mene ätecijame teepi piba teeme pana ireclota cabu lenajame.

Acejiyame te Mibibine Miijimiji Kaakesea Nicärininuge

⁷ Ai gawecewe me ngälugaabe cudecewe lica gyene. Peei name pi weemämu cängena bojäcu ire latwinuye, weeme ngene atwa-nena bine amacetnäjäneji irecu ätumuta tääpume. ⁸ Ai lui baborage gwidape gyene egä weene miiji weemeweme singi lenaja, ingle singi liba pisi nyene, weene miiji gemi biname bime bucurage conocono mule bine ngene ätrimelame. ⁹ Weemeweme awabläjiipeye mete cabu äsinglentame, piiyepu mogobi weemeweme awenäjiipeye gege cama. ¹⁰ Yoo, Acejiyame iyeta mibibine maramara kaakesea ituge ceera. Mine peei kaakesea cängena jaawenemusi mime yepäyepä bine ätityerame. ¹¹ Acejiyame bääirmi kaakesea lui ne yääcärüge, miiji tabe Acejiyame me mene ne cängena yaaboclomtuge. Acejiyame ätityera kaakesea lui ne yääcärüge, tabe miiji Acejiyame me kokre cama nuuja biname bine ätityerame, naace tääpume iyeta mime kaakesea cabu Acejiyame me ngii awepänteji lenajame. Piba pajecu gyene egä mine Yeesu Keriso me biname gemi. Yoo, jamyacu apacyera piiyepu kokre lui teeme yene iyeteta ngälu cäco. Eso.

Mäpu cabu Cängena Lenaja

¹² Cäme ngenecurage binamewale, mäpu apicetnära liba mime bau täduge, câlu te äti gone, piiyepu ngenecu niija gone läbitininago. Pepu mäpu lui mime bau taatu lica gemi. ¹³ Peei name pi mine ngenecu gege äbitininago, ingle mime mäpu lui epu pana gemi Keriso lipu mäpu bine jepänemuji. Ceräcerägäabu bimute liba cire tädepi, piiyepu iyeta biname cina Keriso me jamyacu apacyera ne liba cire jääpänepesi, mine piba baborage gege cama cire ninajipi. ¹⁴ Yoo, mine liba äcneca nitecijinuge, ingle mine Keriso me binamewale gemi, mine ngenecu gege pa läbitipago, ingle naace popi Acejiyame me Seemo piba mime trupa cabu jamyacu apacyera cama yaanajuge. ¹⁵ Miiji lica gyene egä mine mäpu bine jääpänemusi ingle naace name pi mine biname ne budre me yaaglusi, gwidape ne ero ca yaacatusi, coo nuuja niija mule bine jaawenemusi, coo piiyepu nuuja biname bime kaakesea jääsädusi. Pepu mule cabu ca mäpu liba jääpänusi, yoo mime ingle gyene. ¹⁶ Yepä, mine liba mäpu jääpänusi ingle mine Keriso me biname gemi, piba ajiri gone, yepä Acejiyame ne baborage eso yääcärusi egä mine Keriso me ngii cama gemi.

¹⁷ Acejiyame me atrana padare mameta gyene. Tabe teeme biname bine niinäce gaabe pa jaatranemepi. Yoo, tabe liba teeme atrana kaakesea ne gije pa labacitepi mime bau, piba mage mäpu teeme täapume lui cina Acejiyame me mene lica jäätrungusi, ¹⁸ Oogäräneji Mene te jüicenige egä,

“Miiji mule biname cina mäpu bine pa jääpänemepesi,
piba pa läsecrärepi Acejiyame cama lenajame.

Yoo, piba lipu gyene teeme täapume,
lui cina Acejiyame me biname lica gemi,
piiyepu niija mule bine jäje jaawenemusi?”

¹⁹ Peei name pi mine lui cina mäpu jääpänusi ingle peei lui Acejiyame me singi gyene mime täapume, mine miiji mule ne gone yaabmalusi. Yepä, mimämu Acejiyame me ime cabu lacraninago mime miiji täapume. Tabe lui te iyeta biname bine itu jewenemuji, tabe lica mibibine ätityera cäco pa nibmalipi.

5

Acejiyame me Ätrunga Biname Lui Yepä Ingle Biname Gemi

¹ Cäme mene pisi nyene ätrunga ingle bime mope biname täapume. Cane cuta piiyepu mope biname gäne. Yoo, cane Keriso ne itu jepänujine teeme cewe oocana cabu, piiyepu tabe teeme jamyacu apaclyera ne liba cire saaboclomtepi, cane cuta peei cabu cire nana-jepi. Yoo, agha cäme mene weeme täapume. ² Weene biname bine cängenarage ewademusi, Acejiyame lui weeme waadena täapume itu icäripi. Teepe epu pana gemi maamoi liiyepu, piiyepu weene epu pana gemi teeme ire atwi biname liiyepu. Weene weeme kaakesea cängena jaawenemuye, lica epu pana egä biname te weebibine giri jicranininuge, yepä ngenecu gege cama jaawenemuye, ingle Acejiyame pepu mule täapu myene singi. Gone rarekaake singi name pi ai kaakesea ne wawena, yepä toraca ngenecu cama jaawenuye, ingle weene singi gemi Acejiyame me ätrunga biname bine ätityerame. ³ Weene babo me gone läbitininuge weeme bucurage mene ca. Weene miiji umle gemi egä biname lui maamoi pana gemi, teepi teeme ire atwi biname bine ingwe pa yäacwemepesi. Peei name pi weene cängenarage inajipi, piba weeme ireclota miiji gyene nuuja biname cina ingwe äcwime. ⁴ Piba mime Ire Atwi Mopeyame Keriso liba cire tacnenutepi, mine miijirage daremu ne cire jääpänepesi. Mine teeme jamyacu apaclyera cabu cirege lenaja iyeteta.

⁵ Yoo, mamye biname, agha mene weeme täapume, weeme mope biname bime mene yaacatuwe. Weene iyeta weeme nuuja bine yäätityäremuye, teebibine niinäce me jaawenemuye, ingle Oogäräneji Mene te apu jüicenige egä, “Lui biname te liba singi teemämu babo äbitame, Acejiyame teebine jäägyuge, yepä lui biname te Acejiyame ne opo gaabe me yaacituge, Acejiyame teebine miiji jaawenuge.” ⁶ Yoo, mine miiji matikolä me äbita Acejiyame me opo gaabe, tabe piba mibibine cabu me wawena pagege, teeme miijirage padare cabu. ⁷ Iyeta mime ngenecu mäpu miiji Acejiyame ne yäacärusi; tabe babo owecu cama mibibine nitityäringe.

⁸ Yoo, weene ire cama cängena inajininuge! Weeme cubuyame Satani tabe drowä glunubora gwidape pana gyene, layani pana waatnetnäjuge. Tabe jäärngemuge biname bine sabe wawename. ⁹ Weene Acejiyame ne jäätrunguye, teeme kokre cama imyemutinuge, Satani me singi ne yääyecräjuye, ingle weene umle gemi egä weeme ätrunga binamewale iyeta gawecewe cabu teepi yepä pana mäpu bine jääpänanemusi. ¹⁰ Mine liba mäpu cabu matikolä padare ninajininuge, Acejiyame lui te iyeta owecu piiyepu ätityera cama gyene, tabe te mibibine peei cabu ca pa nisecräripi, kokre piiyepu apineca cäco me niwenipi, piiyepu mime ngenecu atwana Keriso cabu yaacranemepi. Tabe mibibine ituge asogleca teeme jamyacu apaclyera cabu Keriso cama cirege lenajame. ¹¹ Teeme yene kokre iyeteta ngälu cäco. Eso.

Peteru me Sebore Mene

¹² Yoo, Siila te cebine nätityärenige ai matikolä mene oogärame. Tabe cäme täapume Acejiyame me miijirage ätrunga biname gyene. Cane singi gäne egä ai mene cabu ca weene ätityera ne pa jepänepewe Acejiyame ne cängenarage ätrungame. Ai mene cabu cane weebibine umle jiwenininine Acejiyame me toraca owecu piiyepu ätityera mule poto cidi me. Peei cabu weene cängena imyemutipi!

¹³ Lui cina ama Rooma babo cewe cabu labasecretnuge Acejiyame bau irecu ätumutame, teepi weebibine sebore jiwenininisi. Teepe weeme pana Acejiyame bau ca jäjäcräneji gemi teeme biname me äbitame. Cäme bägrä Mareko cuta piiyepu weebibine sebore jiwenininige. ¹⁴ Weene weemeweme ajecleträjipeye sebore mene cama, ätrunga biname bime singi mule liiyepu.

Poode weeme iyeta bime cabu lenajame lui Keriso me biname gemi.

Cane ngii Peteru; căme mene ngälu peese.

PETERU ME NEENENI MANU LETA

¹ Cane sâne Simona Peteru, Yeesu Keriso me ätyepäneji biname gäne teeme Miiji Mene kaakesea wawename.

Cane ai mene weeme bau yoogärenine lui cina miijirage ätru-nga ne ituge pöpána cine liiyepu. Yeesu Keriso lui mime Acejiyame piyepu mime niya cabu ca Äsecrerayame gyene, tabe cuta conocácorage gyene, peei name pi tabe yepá pana miijirage ätrunga ne ituge ceera iyeta mibibine.

² Acejiyame me miiji te weeme cabu lenajame piyepu tabe weebibine baborage poode ceeram weeme umle cabu ca Acejiyame poto cidi me piyepu Yeesu mime Yageyame poto cidi me.

Acejiyame Mibibine Itu Nisoglicipi Teeme pana Mule Acatame

³ Acejiyame mibibine ituge jājāra teeme jamyacu apaclýera piyepu teeme miiji cabu lenajame. Mine liba teeme täápume umle läbitininago, tabe mibibine teeme kokre piba nicärininuge toraca miijirage ireclota cabu lenajame. ⁴ Tabe mibibine babo miijirage mene itu nicäripi mine teeme pana miijirage mule acatame piyepu ai gawecewe me niya singsingimule cabu ca uocratname. ⁵ Pepu pi mine lui cina teebine jäätrungusi mine kokre läbitininago miiji mule wawename. Piba mine singi Acejiyame poto cidi me cerämu umle äbitame teeme singi bine wawename. ⁶ Mine cuta lapicetnärinago mimerage singi bine gawe me acraname, piba mine liba mäpu cabu ninajininuge, mine imyemutinuge, piyepu cängena teeme pana mule jaawenemusi. ⁷ Mine piba nuuja biname bine yäätityäremusi teebibine mime binamewale me jaawenemusi, siige mine toraca singi labitininago teeme täápume. ⁸ Mine peei mule bine liba jaawenemusi, piba mime ireclota cabu ca biname cina umle pa läbitipesi mime Yageyame Yeesu Keriso me mule poto cidi me. Yoo, lui biname cina teeme täápume cängena umle gemi, teepi teebine jaawabudnitusi teeme ireclota cabu. ⁹ Yepä, lui biname te peei mule bine lica jaawenemuge, tabe irecu määsümüsu biname pana äblicäco ingwe gaabe me ire. Tabe itu ngene jäätrimaläpi Keriso lipu teeme sasa niya mule bine itu iyebenge-muji.

¹⁰ Yoo, cäme ätrunga binamewale, mine peei mule bine jaawenemusi lui cina jaawabudnitusi egä Acejiyame te mibibine ituge ala asogleca teeme binamewale me äbitame. Mine peei bine liba jaawenemusi piba lica nuuja gwidape te mibibine Acejiyame bau ca äyebenga. ¹¹ Mime niya cabu ca Äsecrera Biname piyepu Yageyame Yeesu Keriso te mibibine piba cire nisoglicipi teeme ngälu cäco waadena cabu lenajame.

¹² Peei mene cane bii yogärine, ngänuge weene puu umle gemi piyepu weeme ätrunga kokre gyene peei toraca mene cabu, yepä cane singi weebibine jāje ngene apecname peei poto cidi me. ¹³⁻¹⁴ Yoo, cane umle gäne cäme budre cudecewe lica gyene, ingle mime Yageyame Yeesu Keriso cebine itu conocäco umle nawenumi, peei name pi cane weebibine jāje ngene jipecnininune peei gwidape poto cidi me ngälu cäme budre. ¹⁵ Cane peei ne cängena yoogärenine, ingle cane singi lica gäne weene ngene ätrimelame cäme budre ingwe gaabe ca.

Cine Keriso ne Itu Jepänujisi Teeme Jamyacu Apaclýera cabu je

¹⁶ Yoo, itemene lica gyene peei mene cine lui weebibine ituge jajanena mime Yageyame Yeesu Keriso me babo kokre piyepu acenuta poto cidi me. Cine cime irecu ca jepänujago teeme jamyacu apaclýera ne. ¹⁷⁻¹⁸ Cine ten cama puga ge pui podo cabu Acejiyame liba teebine jamyacu apaclýera ecäruji, tabe teebine piba ewepyeräruji egä, “Ägesa cäme ngeneccurage bägrä. Tabe iyeta cäme singi conocäco jaawenemu-ge; cane baborage singi gäne tee-me täápume.” Yoo, cine cimämu itu nitecijinuji peei tagepogogo lui cabucewe ca täduji mime Aceji Babe me jamyacu apaclýera cabu ca.

¹⁹ Mime nuuja toracarage mene pisi nyene Keriso poto cidi me. Peei lui Oogäräneji Mene Acejiyame me sasa mename biname bime bau ca. Iyeta teeme mene mine miiji cängena abiberäja, ingle peei lui epu pana gyene ngale te liiyepu krokeciye cabu ca saapaclyäruge. Teeme mene te mibibine pepu pana umle nicärininuge bucurage gwidape poto cidi me, lui ge niinäce mine umle lica. Yepä, mine liba teeme mene poto cidi me ngene jwaatwananinago, piba apaclýera te mime bau tuungepmaluge, ingle Keriso Guji Wale pana tuungepmaluge mime ngenecu bora je. ²⁰ Yoo, ägesa baborage mene: Biname te äblicäco teemämu Aceji Seemo me ätityera cäco umle äbita peei gwidape poto cidi me, Acejiyame lui jiccenige teeme Oogäräneji Mene cabu, ²¹ ingle Acejiyame me mename biname cina teemerge singi mene lica jiccemujisi, yepä Acejiyame me mene jejanemujisi Aceji Seemo teebibine lipu ecäremuji.

2

Walya Abiberäja Biname

¹ Yoo, niinäce Israela biname bime padare cabu puga ge potu walya biname, lui cina teemämu lainininusi Acejiyame me mename biname ca, yepä teeme mene lica ge Acejiyame bau ca. Page cuta piyepu potu walya biname piti nemi, lui cina teemämu lainininusi abiberäja biname ca Acejiyame potu cidi me, yepä teeme abiberäja lui walya piyepu conocono gemi. Teeme mene te ätrunga ne sabe jaawenuge. Mime Yageyame lui te iyeta biname bine itu isecräremuji teeme niyya mule daremu cabu ca, teepi teebine lica jäärungusi, yepä jaainusi. Peei name pi teepi teeme mäpu daremu ne wata pa jääpänepesi. ² Bucurage biname cina teebibine ingwe pa yääcwemepesi teeme niyya singisingi mule cabu me. Teeme niyya mule name pi biname cina niyya mene pa jücemepesi toraca mule potu cidi me. ³ Pui walya biname cina singi rarekaake weeme bau ca päpäname teeme sinäme abiberäja mule cabu ca. Yoo, Acejiyame teeme mule bine jäägyemuge, tabe amacetrnäjäneji enajenige teebibine iisibrecame.

⁴ Mine Acejiyame me mule potu cidi me ngeni pa jwaatwa-naninago. Ujarage pui mename seemo lui cina niyya mule jewenujisi, Acejiyame te teebibine padare lica ecäremuji, yepä teebibine yiisabemuji niyya puupu me. Teepi tuna krokeciye cabu icrajenige, siige äblicäco äsecrera ngälu atrana bimü te liba cirege atyaramta. ⁵ Cuta Acejiyame te lica padare ecäremuji pui biname bine lui cina ai gawecewe cabu niinäce icrajuji, yepä babo igi niye ne tityepuji pui niyya mule biname bine aglecame. Yoo, Nooa piyepu ten cama lui seben biname taatu tabe teebibine isecräremuji. Nooa tabe biname bine mene jejananemuji Acejiyame me singi wawenecame, yepä biname cina singi lica ge äteciyame. ⁶ Acejiyame te cuta Sodoma piyepu Gomora cewe biname bine jigyemuji, pei neeneni cewe bine muye ca juubudäruji ngälu tuuwe mriibe taatu ebmalemuji, ingle tabe singi ingwe ca biname cina Sodoma piyepu Gomora cewe potu cidi me ngeni apename, piba wälu äbitame niyya mule wawenecame. ⁷ Yepä, tabe Loota ne isatuji. Loota lui müji mule biname ge, tabe mage ngenecu mäpu cama yaanajuge teeme cotre umle cäco ceweyame bime sargi mule name pi. ⁸ Yoo, Loota ten cama senajenäjumi bimü gaabegabe. Tabe singi lica ge teeme niyya mene äteciyame piyepu teeme niyya mule päpäname, pei name pi mage ngenecu mäpu ge. Acejiyame teebine isatuji, yepä teeme cewe biname bine teeme mäpu daremu ecäremuji. ⁹ Peei cabu ca mine umle läbitininago egä Acejiyame te ibibi gyene teeme biname bine äsecrera teeme mäpu cabu ca, lui cina teebine jäärungusi. Tabe cuta müji gyene niyya mule biname bime daremu bine oomlana ngälu atrana bimü te liba cire tatyaramtepi; teepi piba teeme mäpu daremu cirege päpäna. ¹⁰ Yoo, mäpu daremu pisi nyene teeme täapume lui cina teeme täape me jugijugi singi bine jaawenemusi piyepu Acejiyame me singi ne jäägyusi.

Pui walya abiberäja biname lui pepu gemi. Teepi teemämu lasicnantinusi egä baborage gemi; teepi ajangotna cäco gemi. Teepi wälu lica cabucewe jamyacu apaclyera cama seemo bime potu cidi me, yepä teebibine jääcneemusisi. ¹¹ Yoo, Acejiyame me mename seemo puu baborage kokrerage gemi ai walya abiberäja biname cabu ca, yepä teepi lica pepu äcneca mene jücemusi teepi liba teebibine jaaitnäjemusi Acejiyame me opo gaabe. ¹² Yepä, pei walya biname cina ngeni atwanena cäco gemi. Girigale drego pana teepi teeme singi papa jaawenemusi. Teeme lui budre mule gyene. Teepi wälu lica niyya mene iicaname pui potu cidi me teepi lui umle cäco gemi. Yoo, biname cina girigale drego bine joomlemusi, yaaglecimusi, siige teeme ireclota lapiruge. Cuta pui walya abiberäja biname bine pepu pana pagege cuta iisibreca. ¹³ Teepi biname bine ngenecu mäpu me jaawenemusi, pei name pi mäpu daremu ne cirege päpäna. Ngänuge bimü padare, teepi ajiri lica gemi teeme singisingi mule wawenecame, piba gigri deedei weene cama läbitininusi. Teepi weeme ätrunga ingle bine jugi me jaawenemusi, weebibine ingletnäjinusi. ¹⁴ Magebi ne liba jwääpänumi, teepi singisingi läbitininusi teeme täapume. Teeme niyya jugijugi mule bucurage gemi, yepä lica gyene teeme täapume ibibi. Ngenecu onya biname bine teepi teeme angletneja gaabe cabu yaawadanemusi. Teepi babo umle gemi lipu teeme niyya singisingi bine päpäname. Yoo, teepi teeme mäpu daremu cirege päpäna. ¹⁵ Teepi toraca gaabe ituge abmala, conocono gaabe ne ituge acata. Teepi Balam Bosoro me bägrä ne ingwe yääcwusi lui te niyya gaabe ne ecatuji ai name pi tabe baborage singi rarekaake pei gaabe cabu ca päpäname. ¹⁶ Yoo, dongki te Balam ne eblawājuji biname pana tagepogogo ca, siige teeme buduma conocono mule ne jübuji.

¹⁷ Pui walya abiberäja biname teeme nuuja müji lica gemi. Teepi epu pana gemi niye cupicu liyepu lui niye cäco läbituge. Teepi epu pana carbe liyepu weene liba niye täapume singi birige, yepä buuwe te pui carbe ne yääyebingtuge. Pepu carbe me müji ätityera lica ge. Yoo, Acejiyame pui biname bime täapume krokeciyerage puupu

ituge amacetnāja. ¹⁸ Teepi mope babo läbitininusi piiyepu buduma mene jaajanemusi. Teepi biname bine yaangletnäjemusii lui cina gije jaabacitusi niija buduma mule bine abmaläcemame, teebibine walya mene yaabiberäjemusii egä, “Weeme tääpe me singisingi mule bine jaawenemuye.” ¹⁹ Teepi teebibine walya jaajanemusi egä, “Weene kälyä gemi iyeta cotre cabu ca; weene miiji gemi weeme singi wawena.” Yepä, pui walya abiberäja biname teeme singisingi mule te teebibine joomlemuge. Teepi äblicäco gemi peei cabu ca uucratna, lui te teebibine sabe jaawenemuge. Yoo, ngena te biname me singi ne joomluge, biname ne peei te jaawabuge ngena wawename. ²⁰ Yoo, biname lui te mime niija cabu ca Äsecrerayame piiyepu Yageyame Yeesu Keriso ne jäätrunguge, tabe lasatuge ai gawecewe me niija mule cabu ca. Tabe liba ngenecu onya piba läbituge, tacnenutuge ingwe gaabe me, siige pui niinäce mule cuta jaawenemuge, peei lui babo niyarage gyene teeme täápume. Tabe liba niinäce cabu ca Yeesu Keriso poto cidi me mene lica birige ätecija, teeme täápume peei lui mäpu gyene, yepä tabe liba Yeesu Keriso poto cidi me yäätəcijuge, piba ingwe ca jäägyuge, teeme täápume peei lui baborage mäpu gyene. ²¹ Pui biname täápume miiji cirege tabe liba conocäco gaabe poto cidi me umle lica cire läbiteji, ingle peei umle cama tabe liba Acejiyame me singi ne teeme täápume kaake me jaawenuge, tabe babo mäpu daremu ne cirege acata. ²² Yoo, teeme poto cidi me toraca gyene sasa biname bime mene egä, “Drego te tacnenutuge teeme aake luma yaacuge,” cuta nuuja mene egä, “Blome ne liba jääcisäjusi, tabe tacnenutuge teeme paamuli cabu me cuta lenajame.” Pepu pana gyene biname lui te cääri teeme niija cabu me tacnenutuge.

3

Mene Mime Yageyame me Acnenuta poto cidi me

¹ Cäme ngenecurage biname, cane weeme bau me mene itu yoogärepepe. Cuta agesa cäme nuuja oogära mene, ingle cane singi gäne egä weene toraca mule poto cidi me cääri cuta ngene jotwananipeye. ² Weene ngene jotwananipeye pui mene poto cidi me, Acejiyame me sasa mename biname cina lui mene ituge oogära. Cuta cääri ngene jotwananipeye pui mene poto cidi me mime Yageyame piiyepu niija cabu ca Äsecrerayame te itu jejuji wawename. Peei mene cine lui Keriso me ätyepäneji biname cina weebibine ituge ceera. ³ Niinäce, weene miiji cängena umle äbitineye apu egä ai gawecewe liba mameta gyene apira, piba poto biname pa saaclepi lui cina teeme niyarage singi bine pa jaawenemepesi. Teepi weebibine niyarage bääclena me jiwenipesi egä, ⁴ “Nää, weeme Yageyame te itu jijnuji egä tabe pa tacne-nutepi? Tabe cije baa, lese nyene? Cime saarewale cabu ca biname cina ireclota cama yaacrajuge ai gawecewe cabu, piba budre läbitininusi. Nuuja mara mule lica ituge äpletnuta ai gawecewe te liba tacuji ngälu page.” Teepi piba walya mene pa jicemepesi egä, “Weeme Yageyame te lica pa tacnenutepi; ai gawecewe te lica mara me pa läbitepi.” ⁵ Yoo, pui biname cina singi lica opo awatname egä sasa ujarage Acejiyame te mene jejemuji piba taatu cabucewe dume cama piiyepu gawecewe cina tacujäsi. Gawe te tegeluji niije cabu ca. ⁶ Piba Nooa me padare cabu, Acejiyame mene jejuji, niije te tegeluji, siige gawecewe biname bine iyeta irmemuji. ⁷ Yoo, ai gawecewe piiyepu cabucewe Acejiyame me mene miiji pi aanajenige, ngälu tabe peei bine muye ca cire juubudärempi. Atrana bimu liba cire tädepi, piba biname lui cina singi lica gemi Acejiyame me mene ätecijame, tabe teebibine cire yiisabemepi muye puupu cabu me iyeteta lenajame. ⁸ Cäme binamewale, gone ngene jitrimalinuge egä mime Yageyame me ngene atwanena mara gyene mime cabu ca. Yoo, yepä bimu coo tausen kämäge, peei lui mara lica gyene; mime Yageyame täápume teepi lui yepä pana gegi. ⁹ Yoo, poto biname cina apu jaangemuge egä mime Yageyame te lica teeme mene ibibi jaawenuge ai gawecewe iibyagecame, yepä peei toraca lica gyene. Tabe teeme mene toraca me cire jaawenemepi. Yepä, tabe biname bine jewagrijenenemige teeme niija mule cabu ca atatröngärame teeme bau me, ingle tabe singi lica gyene nuuja biname ne ajarama.

¹⁰ Mime Yageyame cire tädepi. Biname cina piba cälu te cire jäätemepi, ingle naace popi teeme otni lui ero biname pana ogä cirege. Peei ceräcerägäabu bimu cabu cabucewe te babo muwämu cama cire lapesarepi. Wale bine muye te cire yaabemepi. Ai gawecewe iyeta gwidape cama cire lapesarepi. ¹¹ Yoo, ai name pi iyeta gwidape cina pepu cire labyagicipesi, mine miiji cängena ire cama ninajininige. Mine Acejiyame me singi piiyepu conocäco mule bine jewenenemisi. ¹² Mine Acejiyame me acnenuta bimu ne jewagrijenisi, cuta kaakesea jewenenisi peei bimu te watata otnime. Toraca gyene egä pui bimu cabu muye te cabucewe ne cire jiiyagecepi, piiyepu peei baborage nuunu cabu iyeta wale cina pa juudräjemepi, piba cire lapiripesi. ¹³ Yepä, mine Acejiyame me mene jitrungenisi egä tabe kirece cabucewe piiyepu gawecewe bine cire jaawenemepi. Puma ätrunga biname cina conocäco taatu cire yaacrajepi.

¹⁴ Yoo, căme binamewale, mine peei bimu ne jewagrijenisi, peei name pi mine lapicetnärinago iyeta padare conocăco piiyepu epu căco lenajame Acejiyame me opo gaabe je, teeme singi taatu wawename, piiyepu poode cama lenajame. ¹⁵ Mine umle gemi ngena name pi Acejiyame me acnenua lui däägurage gyene. Tabe biname bine padare ecärenemige teebine ätrungame, siige tabe teebibine mäpu daremu cabu ca äsecerame. Yoo, peei umle mene mime ngenecurage biname Paulo te ituge oogära weeme bau me. Acejiyame te peei umle teebine ecäruji. ¹⁶ Tabe yepä mene iyeta teeme leta cabu jiiucuge mime Yageyame me acnenua poto cidi me. Yoo, poto teeme mene lui mäpurage gemi umle äbitame, cuta poto umle căco biname lui cina lica cängena ngene jwaatwananinusi, teepi Paulo me mene walya pana yaaboclomäjusi. Teepi cuta Acejiyame me poto nuuja Oogäräneji Mene pepu conocono jaawenemusi. Teeme yene mäpu daremu peei tääpume.

¹⁷ Căme binamewale, weene umle gemi pepu biname poto cidi me. Peei tääpume cängena ire, piba pui niiya mule biname cina weebibine lica toraca gaabe cabu ca äyebenga teeme walya abiberäja ca. Gone weeme toraca ätrunga gaabe ne abmala! ¹⁸ Yepä, cerämu labiberäjininuye mime Yageyame piiyepu niiya cabu ca Äsecerayame Yeesu Keriso poto cidi me, teeme müji piiyepu umle cina babo me äbitame weeme cabu. Yoo, jamyacu apaclyera lui teeme yene page piiyepu iyeteta ngälu căco. Eso!

Cane ngii Peteru, siige căme mene.

YOANE ME NIINÄCE LETA

Ireclota Mene poto cidi me

¹ Lui tage agedna cabu ca, cine lui ne titecijanananumesi, lui ne tepänenanumesi irecu ca, lui cabu me ire nicijananimi, cuta lui ne toomlananumesi ime ca, cine teeme poto cidi me yoogärenisi. Tabe lui Ireclota Mene gyene. ² Ai ireclota te liba taboclomtuji, cine tepäne-nanumesi, cine siige page jewabudnitenisi, egä tabe laasi nyene. Lui te iyeteta gyene, lui te Babe cama ge, siige cime bau me taboclomtuji, cine teeme poto cidi me weebibine jijananeninago. ³ Cine ngena ituge päpäna, ngena poto cidi me cine ituge ätecija, cine peei poto cidi me jijananeninago weebibine naace täápume egä weene piba cine cama yepä me äbitame epu pana cine lipu yepä gemi Babe piiyepu teeme Bägrä Yeesu Keriso cama. ⁴ Cine ai ne naace täápume yoogärenisi egä mime gege te baborage äbitame.

Acejiyame Lui Apaclyera Gyene

⁵ Cine lui mene ituge ätecija Acejiyame me Bägrä bau ca, cine lui mene cuta weebibine jijananeninago, pui mene apu gyene egä Acejiyame lui apaclyera gyene, teeme cabu nuuja krokeciye lica gyene. ⁶ Peei name pi mine liba jiiкуси, egä mine Acejiyame cama yepä gemi, yepä mine krokeciye cabu waatninago, mine peei lui walya waatrominago, conocäco mule bine lica jaawenimusi. ⁷ Yepä mine liba apaclyera cabu ninajininuge Acejiyame liiyepu, mine piba yepä ngena atwana cama ninajininuge, siige teeme Bägrä Yeesu Keriso me uudi te jugi cäco me niwenininuge iyeta niiya mule cabu ca. ⁸ Mine liba jiiкуси egä mine conocäco biname gemi, mine mimämu langletnäjinago, siige mime cabu nuuja toraca mene lica gyene. ⁹ Yepä mine liba mime niiya mule bine jaawabudnemusi, Acejiyame toraca piiyepu conocäco gyene, siige mime niiya mule lica yaawadimuge, jugi cäco me niwenininuge iyeta conocono mule cabu ca. ¹⁰ Mine liba jiiкуси, egä mine conocono mule lica ituge wawenetnäja, mine siige Acejiyame ne walya me jaawenusi, teeme mene mime cabu lica gyene.

2

Keriso Lui Mime Ätityera Biname Gyene

¹ Cäme binamewale, weene ätrunga cabu ca lui cäme bägrä gemi, cane ai ne yoogärinine weeme bau me naace täápume egä weene niiya mule lica wawenecame. Yepä laati te liba niiya mule bine jaawenimuge, mime pisi nyene conocäco biname Yeesu Keriso, lui te Babe me opo gaabe je niwärimintuge. ² Tabe peese nyene biname lui te mime niiya mule daremu ne egluji. Yoo, tabe mime taatu niiya mule daremu ne lica egluji, iyeta biname bime. ³ Mine liba Acejiyame me mene yäácwetnusi, mine siige umle gemi apu egä mine umle gemi tabe. ⁴ Laati te liba jiiçuge, egä tabe umle gyene Acejiyame, yepä teeme mene lica yäácwetnuge, tabe walya biname gyene, teeme cabu lica gyene toraca mene. ⁵ Yepä laati te liba Acejiyame me mene jäätecijuge, tabe toracarage singi birige teeme täápume. Peei cabu ca mine umle gemi, egä mine Acejiyame cabu ninajininuge. ⁶ Laati te liba jiiçuge, egä tabe Acejiyame cabu yaanajuge, tabe miiji epu lenaja Yeesu Keriso liiyepu.

Kirece Mene Ätecija täápume

⁷ Cäme miijirage binamewale, cane lui mene yoogärinine weeme bau me, kirece mene lica gyene, pätä pui sasa mene gyene, weene lui ituge ätecijana, weene liba weeme ätrunga ne yaacitepeye Yeesu Keriso cabu me. Ai lui pui sasa mene gyene, weene lui niinäce itu itecijipi. ⁸ Yepä nuuja poto ta kirece mene gyene, cane lui yoogärinine, siige Keriso cabu ca cuta piiyepu weeme cabu ca ituge päpäna, egä ai lui toraca mene gyene, ingle krokeciye te äyebtingtenige weeme cabu ca, toraca apaclyera te tuungepmalenige. ⁹ Laati te liba jiiçuge, egä tabe apaclyera cabu enajenige, yepä tabe nuuja ätrunga biname ne jäämugetnuge, tabe camu krokeciye cabu yaanajuge. ¹⁰ Yepä laati te liba nuuja ätrunga biname täápume singi läbitanuge, tabe apaclyera cabu yaanajuge, siige teeme cabu nuuja mule lica gyene, lui te nuuja biname bine jaawenimuge conocono mule wawenecame. ¹¹ Yepä laati te nuuja ätrunga biname ne jäämugetnuge, tabe krokeciye cabu yaanajuge piiyepu waatnuge. Tabe umle lica gyene liiyeme läduge, ingle krokeciye te teeme irecu yaacwabuge.

¹² Cäme binamewale, ätrunga cabu lui kirece gemi, cane yoogärinine weeme bau me, ingle naace popi weeme niiya mule äcisäjeji gemi Keriso me ngii name pi. ¹³ Cane yoogärinine weeme bau me lui niinäce gaabe biname gemi ätrunga cabu, ingle naace popi weene umle gemi Keriso, lui te agedna cabu ca gyene. Piiyepu lamlecu ätrunga biname, cane weeme bau me yoogärinine, ingle naace popi weene iyeta niiyaniya mule bime yageyame ne ituge

apremela. ¹⁴ Căme binamewale, ätrunga cabu lui kirece gemi, cane ai lui bii byoogärine weeme bau me, ingle naace popi weene umle gemi Babe. Cuta niinäce gaabe biname gemi lui ätrunga cabu, cane ai lui bii byoogärine, ingle naace popi weene umle gemi Keriso, lui te agedna cabu ca gyene. Cuta lamlecu ätrunga biname, cane ai lui bii byoogärine weeme bau me, ingle naace popi weene kokre gemi piyepu Acejiyame me mene te weeme cabu yaanajuge piyepu weene ituge apremela iyeta niyaniya mule bime yageyame ne.

¹⁵ Gone singi äbita ai gawecewe mule poto cidi me piyepu ai gawecewe gwidape täapume. Weene liba gawecewe mule täapume singi inajininuge, weene piba äblicäco Babe täapume singi lenaja, ¹⁶ ingle naace popi ai gawecewe me mule lui Acejiyame bau ca lica gemi. Niiya singisingi lui cina biname bine yaawadäjemusi, piyepu biname cina ngena jääpänamemusi siige singisingi läbitininusi, cuta piyepu iyeta ai gawecewe muleyame biname cina lui täapume mage gege, ai mule lui Acejiyame bau ca lica gemi, yepä teepi ai gawecewe cabu ca gemi. ¹⁷ Gawecewe piyepu teeme iyeta gwidape, biname cina lui täapume mage singi yaacrajuge, teepi apirininisi, yepä laati te Acejiyame me singi ne jaawenuge, tabe ngälu cäco yaanajuge.

Keriso me Äciseräjayame

¹⁸ Căme binamewale, ätrunga cabu ca lui căme bägrä gemi, ngälugaabe mameta gyene. Weebibine ituge jaji, egä Keriso me Äciseräjayame te cirege otni, siige page bucurage piti nemi, peei name pi mine umle gemi, egä ngälugaabe mameta gyene. ¹⁹ Teepi puu mime sobe cabu ca itu läsipesi, yepä teepi mine cama yepä lica gemi. Teepi liga mine cama yepä cirege, teepi mine cama cire yaacrajeji. Yepä teepi lipu ituge äyebhengäja mime cabu ca, peei te niwabininige, egä teepi mine cama yepä lica gemi.

²⁰ Yepä Keriso te weebibine Aceji Seemo ca ituge äciseja, siige weene iyeta umle gemi, ngena gyene toraca mene. ²¹ Cane naace name pi lica yoogärenine weeme bau me, egä weene umle cäco gemi toraca mene. Pätä cane naace name pi yoogärenine, egä weene umle gemi toraca mene, piyepu weene umle gemi, egä toraca mene cabu ca äblicäco nuuja walya te otni.

²² Siige laasi nyene walya biname? Tabe peese nyene, lui te jüicuge, egä Yeesu lica gyene Keriso. Tabe Yeesu me Äciseräjayame gyene, siige jäägyuge Babe Bägrä wäsi bine. ²³ Laati te liba jäägyuge Bägrä ne, tabe Babe ne cuta jäägyuge; laati te liba yaacatuge Bägrä ne, teeme cuta Babe pisi nyene. ²⁴ Peei name pi weene lui mene itecijanipi, weene liba ätrunga biname me läbitipeye, kokre joomlepeye. Pui mene te liba weeme cabu yaanajuge, siige weene piba yepä gemi Babe Bägrä cama. ²⁵ Piiyepu Yeesu Keriso lui gwidape ceerame itu ninujuji, iyeteta ireclota gyene.

²⁶ Cane weeme bau me ai mene yoogärenine eei biname bime poto cidi me, lui cina weebibine angletnerame äbitininisi. ²⁷ Yepä weene pepu lica gemi, Keriso te Aceji Seemo ca weebibine ituge äciseja, siige tabe weeme cabu yaanajuge, peei name pi weene singi lica gemi nuuja te weebibine abiberäjame, ingle tabe te ibiberäjininuge iyeta gwidape poto cidi me. Piiyepu tabe ngena ibiberäjininuge, toraca gyene, walya lica, peei name pi teeme abiberäja ne icwetnepeye, piyepu Yeesu Keriso cama yepä inajipi.

²⁸ Yoo căme binamewale, weene ätrunga cabu ca lui căme bägrä gemi, gone Yeesu Keriso ne yaabmaluye! Piba tabe liba cire taboclomtepi, mine wälu lica cirege äbita teeme täapume, piyepu teeme acnenuta bimu liba cirege, mine piba nuuja singi lica ajiri name pi ämletnerame teeme bau ca. ²⁹ Weene umle gemi, egä Keriso lui conocäco biname gyene. Piba weene cuta miiji umle, egä iyeta lui cina conocäco mule bine jaawenimusi, teepi lui Acejiyame me bägräwale gemi.

3

Acejiyame me Bägräwale

¹ Weene jepäneye, Aceji Babe te lipu babo singi ituge mime täapume! Teeme singi epu baborage gyene egä mibibine niyinininusi Acejiyame me bägrä ca, siige mine peei gemi. Gawecewe muleyame biname cina umle lica gemi mine, ingle teepi umle lica gemi Acejiyame. ² Căme miijirage binamewale, page mine Acejiyame me bägrä gemi, cuta camu gyene cängena pajecu me äbita, egä mine lipu äbitame. Yepä mine umle gemi, egä Keriso te liba cire taboclomtepi, mine teeme pana cire läbitipago, ingle mine teebine cire jääpänesi epurage tabe liiyepu. ³ Siige laati te apu ngena atwana singi yaacituge Yeesu cabu me, tabe teeme ngenecu jugi cäco me jaawenuge, Yeesu me ngenecu lipu jugi cäco gyene.

⁴ Laati te liba niiya mule jaawenuge, tabe Acejiyame me cotre ne jaatropangtuge, ingle niiya mule lui cotre ibi mule lica gyene. ⁵ Weene umle gemi, egä Yeesu täduji niiya mule bine äyebhengäjame, cuta weene umle gemi, egä teeme cabu nuuja niiya lica gyene. ⁶ Peei name pi laati te liba Keriso cabu yaanajuge, tabe niiya mule bine lica jaawenimuge. Yepä

laati te niiya mule bine jaawenimuge, tabe lica ituge teebine päpäna cuta umle lica ituge tabe.

⁷ Cäme binamewale, ätrunga cabu ca lui cäme bägrä gemi, weene gone nuuja ne ire taatu jaacituye weebibine angletnejame. Laati te liba conocäco mule bine jaawenimuge, tabe lui conocäco biname gyene Yeesu Keriso liiyepu. ⁸ Yepä lui biname te niiya mule bine jaawenanemuge, teeme ingle Satani bau ca gyene, ingle Satani lui niiya mule wawenecayame gyene agedna cabu ca. Acejiyame me Bägrä te naace tääpume täduji Satani me kaakesea ne aglime.

⁹ Laasi nyene Acejiyame me bägrä, tabe niiya mule bine lica jaawenanemuge, ingle Acejiyame me ireclota pisi nyene teeme cabu. Tabe äblicäco niiya mule wawenena, ingle Acejiyame teeme Babe gyene. ¹⁰ Mine eei cabu ca umle läbitininago, egä Acejiyame me bägrä lui gemi, Satani me bägrä lui gemi, ingle laati te liba conocäco mule bine lica jaawenanemuge piyepu ätrunga biname bime tääpume singi lica yaanajuge, tabe lui Acejiyame me bägrä lica gyene.

Weene Miiji Weemämu Singi Äbitanipeye

¹¹ Weene lui mene itecijanipi, weene liba läbitipeye ätrunga biname me, age sena pui mene: mine miiji mimämu singi lenaja. ¹² Mine gone Adamu me bägrä Kaino pana äbita, Satani te lui ne ecanuji, siige tabe teeme igane ne egluji. Tabe eei name pi igane ne egluji, ingle tabe conocono mule jaawenemuge, igane te conocäco mule jaawenemuge.

¹³ Cäme ätrunga binamewale, weene cälu te gone jitinuge, liba gawecewe muleyame biname cina jimugitninusi weebibine. ¹⁴ Ingle naace popi mine singi gemi ätrunga biname bime tääpume, peei name pi mine umle gemi, egä mine budre gaabe ne itu yaabmalepesi, ireclota gaabe ne itu yaacatepesi. Laati te liba singi lica ätrunga biname bime tääpume, tabe budre gaabe cabu camu yaanajuge. ¹⁵ Laati te liba jäämugetnuge nuuja ätrunga biname ne, tabe teeme budre me wawena biname gyene. Piiyepu weene umle gemi, egä lui te nuuja biname ne budre me jaawenuge, teeme cabu iyeteta ireclota lica gyene. ¹⁶ Yeesu lipu teeme ireclota ne iyemaluji budre tääpume cimiji pi, mine peei cabu ca umle, egä toraca singi lipu gyene. Mine miiji cuta teeme pana mime ireclota äyemela poto ätrunga biname bime tääpume. ¹⁷ Liba ätrunga biname yepä me iyeta gwidape piti nemi, siige tabe jääpänuge, teeme ceege me gwidape lica gyene, yepä tabe lica yäacäruge, tabe piba äblicäco iicana, egä Acejiyame me singi pisi nyene teeme cabu. ¹⁸ Cäme binamewale, ätrunga cabu lui cäme bägrä gemi, mine gone mime singi bine aboclomta biname bime bau me mene taatu ca, yepä mine miiji teebibine owecu waweneca.

Acejiyame me Bägrä Wälu Lica Gemi

¹⁹ Liba mime singi te lawabudnituge poto ätrunga biname bine ätityera ca, mine piba umle gemi egä mine toraca mule cabu ninajininuge, siige mine wälu lica cirege äbita Acejiyame me opo gaabe je. ²⁰ Mine liba ngene ca laglinago, egä mime niiya mule piti nemi, mine umle gemi egä Acejiyame baborage gyene mime ngene ca agli cabu ca, tabe umle iyeta gwidape. ²¹ Cäme miijirage binamewale, mine liba lica ngene ca laglinago, egä mime niiya mule piti nemi, piba mine wälu lica gemi Acejiyame me opo gaabe je acaljutame. ²² Piiyepu mine teebine liba ngena tääpume yäätinärusi, mine jääpänusi, ingle mine teeme mene jäätrungusi piyepu jaawenusi, teebine lui te ngenecu miiji me jaawenuge.

²³ Age sena Acejiyame mibibine lui tääpume nijananinuge: mine miiji ätrunga acita teeme Bägrä Yeesu Keriso cabu me piyepu mine miiji mimemime singi lenaja, Yeesu lipu mibibine ituge jaji. ²⁴ Laati te liba Acejiyame me mene jäätrunguge piyepu yäacwetrnuge, tabe Acejiyame cabu pisi nyene, Acejiyame cuta teeme cabu pisi nyene. Mine eei cabu ca umle gemi, egä Acejiyame mine cama pisi nyene, ingle tabe lui Aceji Seemo ne ituge acita mime cabu lenajame.

4

Toraca piyepu Walya Seemo

¹ Cäme miijirage binamewale, weene gone jäätrungimuye iyeta eei bine, lui cina jiiicusi, egä Aceji Seemo pisi nyene teeme cabu. Yepä weene teebibine epicetnäremepeye umle äbitame, egä lui seemo te enajenige teeme cabu, nää Acejiyame bau ca gyene coo lica. Weene apu wawename, ingle bucurage biname cina itu yaatengläjepesi, lui cina jiiicusi, egä teepi Acejiyame me tagepogogo mene jiiicemusi, yepä teepi walya gemi. ² Weene ai cabu ca opo yaawatnuye Acejiyame me Seemo ne, egä laati te liba jiiicuge, egä Yeesu Keriso lui biname me äbituji, pui biname cabu lui Seemo tabe Acejiyame bau ca gyene. ³ Yepä laati te pepu lica jiiicuge Yeesu poto cidi me, teeme cabu lui seemo te enajenige, tabe Acejiyame bau ca

lica gyene, yepä tabe Keriso me Äciseräjayame me seemo gyene. Weene ituge ätecija, egä pui seemo te cirege otni, siige tabe page pisi nyene ai gawecewe cabu.

⁴Yepä căme miijirage binamewale, ätrunga cabu ca lui căme bägrä gemi, weene Acejiyame memi, siige weene ituge apremela lui cina jicusi, egä teepi Acejiyame me tagepogogo mene jicemusi, yepä teepi walya gemi. Weene teebibine naace name pi ituge apremela, ingle weeme cabu lui Seemo tabe mage kokreyame gyene, yepä ai gawecewe mule cabu lenajayame biname bime cabu lui seemo, teeme toraca kokre lica gyene. ⁵Teepi ai gawecewe memi, peei name pi teepi ngena jicemimusi, ai gawecewe cabu ca gemi, siige gawecewe muleyame biname cina jäätacijemusi. ⁶Yepä mine Acejiyame memi. Laasi nyene umle Acejiyame, tabe mime mene yäätacijuge. Yepä laati te liba Acejiyame me biname lica gyene, tabe mime mene lica yäätacijuge. Peei cabu ca mine umle läbitininago, egä laasi nyene toraca Seemo cama, laasi nyene walya seemo cama.

Acejiyame Lui Ingle Gyene Toraca Singi täápume

⁷Căme miijirage binamewale, mine miiji mimămu singi lenaja, ingle Acejiyame lui ingle gyene singi täápume. Laati te biname bime täápume singi yaanajuge, tabe lui Acejiyame me bägrä gyene piiyepu tabe umle gyene Acejiyame. ⁸Laati te liba singi lica gyene biname bime täápume, tabe Acejiyame umle căco, ingle Acejiyame lui ingle gyene singi täápume. ⁹Acejiyame te teeme singi ne seboclomtuji mime täápume, tabe lipu teeme japurage Bägrä ne tityepuji ai gawecewe cabu me naace täápume mine ireclota ne teeme cabu ca päpäname. ¹⁰Singi lui epu lica gyene, egä mine te Acejiyame täápume singi ituge, yepä tabe te niinäce singi itu niglinuji mibibine, siige teeme Bägrä ne tityepuji mime niia mule daremu täápume. ¹¹Căme miijirage binamewale, Acejiyame te liba pepu babo singi ituge mime täápume, mine cuta miiji mimemime singi lenaja. ¹²Nuuja biname te lica ituge Acejiyame ne päpäna, yepä mine liba mimămu singi ninajininuge, tabe pisi nyene mine cama, siige teeme singi te babo läbituge mime cabu.

¹³Mine naace name pi umle läbitininago, egä tabe pisi nyene mime cabu mine teeme cabu, ingle tabe teeme Seemo itu nicäripi mibibine. ¹⁴Babe te tityepuji teeme Bägrä ne ai gawecewe cabu me biname bine niia cabu ca kälyä waweneme. Mine ituge ai mule ne päpäna siige poto biname bine jejananemenisi ai poto cidi me. ¹⁵Piiyepu cuta laati te liba jaaitnuge, egä Yeesu lui Acejiyame me Bägrä gyene, Acejiyame pisi nyene teeme cabu piiyepu tabe lui Acejiyame cabu pisi nyene. ¹⁶Mine umle gemi Acejiyame lipu singi gyene mime täápume, piiyepu mine ituge ätrunga acita teeme peei singi cabu me.

Acejiyame lui ingle gyene singi täápume. Lui te singi yaanajuge Acejiyame piiyepu ätrunga biname bime täápume, tabe Acejiyame cabu pisi nyene piiyepu Acejiyame teeme cabu pisi nyene. ¹⁷Singi te naace täápume miiji babo äbitame mime cabu, egä mine piba wälu lica cirege äbita atrana bimü cabu, ingle mime ireclota ai gawecewe cabu epu pana Keriso me liiyepu. ¹⁸Singi luma, wälu lica birige puma, ingle babo singi te wälu ne yääyecräjuge. Siige lui biname cabu singi te căro camuge babo äbita, tabe wälu birige, ingle niia mule daremu awagrija luma, wälu cuta puma.

¹⁹Mime singi pisi nyene Acejiyame täápume piiyepu ätrunga biname bime täápume, ingle Acejiyame te niinäce singi ituge äbita mime täápume. ²⁰Laati te liba jicuge, egä tabe singi Acejiyame täápume, yepä nuuja ätrunga biname ne jäämugetnuge, tabe walya biname birige. Laati te liba singi lica nuuja ätrunga biname täápume, tabe lui ne jääpänuge, tabe äblicăco cuta Acejiyame täápume singi, tabe lui ne lica ituge päpäna. ²¹Pui name pi Keriso te mibibine ituge jaji egä, laati te Acejiyame täápume singi birige, tabe cuta miiji ätrunga biname bime täápume singi.

5

Ätrunga te Gawecewe Mule bine Yäätucäremuge

¹Laati te liba jättrunguge, egä Yeesu lui Keriso sine, tabe Acejiyame me bägrä gyene. Piiyepu lui biname te singi yaanajuge babe täápume, tabe cuta singi yaanajuge teeme bägrä täápume. ²Mine liba Acejiyame täápume singi, piiyepu jaawenanemusi tabe ngena täápume ituge mibibine jaji, piba mine umle gemi, egä mine cuta singi teeme bägräwale bime täápume. ³Mine liba jaawenanemusi Acejiyame ngena täápume nijanininuge, peei te jaawabudnituge, egä mime singi pisi nyene teeme täápume. Acejiyame ngena täápume nijanininuge, mäpu lica gyene aweneme, ⁴ingle laasi nyene teeme bägrä, tabe ibibi gyene ai gawecewe mule bine apremelame. Peei lui mime ätrunga lui te gawecewe mule bine yaapremalemuge. ⁵Eei taatu biname te gawecewe mule bine yaapremalemuge, lui te jättrunguge, egä Yeesu lui Acejiyame me Bägrä gyene.

Acejiyame te Yeesu Keriso ne Jeitnäjenige

⁶ Yeesu Keriso täduji ai gawecewe cabu me ai neeneni cewecu cama: teebine niije ca ituge äciseja piyepu teeme uudi te ituge apira. Teebine niije taatu ca lica ituge äciseja, yepä teeme uudi te cuta tapiruji. Aceji Seemo te ai neeneni cewecu bine jaaitnäjenige, siige toraca gegi, ingle tabe lui toraca mene jiičenige. ⁷ Yoo siige, teepi nesae gämi lui cina Yeesu ne jeitnäjenisi: ⁸ yepä lui Aceji Seemo, yepä lui niije, yepä lui uudi. Teeme aitneja mene lui yepä gyene. ⁹ Mine biname bime aitneja ne yaacatusi, yepä Acejiyame me aitneja lui baborage gyene, siige ai lui Acejiyame me aitneja gyene, tabe lui ituge jaji teeme Bägrä poto cidi me. ¹⁰ Laati te ätrunga yaacituge Acejiyame me Bägrä cabu me, Acejiyame pui biname me ngenecu cabu teeme Bägrä ne jeitnäjenige. Yepä laati te ätrunga lica gyene Acejiyame täápume, tabe teebine walya me jaawenuge, ingle tabe lica jäätrunguge, Acejiyame lipu teeme Bägrä ne ituge aitneja. ¹¹ Pui aitneja lui eei gyene, egä Acejiyame te iyeteta ireclota ituge ceera mibibine, mine lui ireclota ne jepäninisi teeme Bägrä cabu ca. ¹² Laati te liba teeme Bägrä cama yepä birige, tabe ireclota cama yaanajuge. Yepä laati te liba yepä lica birige teeme Bägrä cama, tabe lica ireclota cama yaanajuge.

Mene Ngälu cäco Ireclota poto cidi me

¹³ Cane ai ne naace täápume bii byoogärine weeme bau me, lui cina ätrunga ne yaacituge Acejiyame me Bägrä me ngii cabu, egä weene umle äbitame egä weeme ngälu cäco ireclota pisi nyene. ¹⁴ Mine wälu cäco gemi Acejiyame me opo gaabe je, ingle mine umle gemi, egä tabe nitacijinuge mine ngena täápume yaawejanusu teeme singi ibi. ¹⁵ Siige mine liba umle gemi, egä Acejiyame te nitacijinuge mine ngena täápume yaawejanusu, mine cuta piba umle gemi, egä tabe nicärininuge, mine ngena täápume ituge awejena teebine.

¹⁶ Laati te liba jääpänuge, egä nuuja ätrunga biname te niija mule jaawenuge, lui mule te teebine budre me lica yaacanuge, tabe miiji pui biname täápume irecu ätumuta, siige Acejiyame te teebine ireclota gaabe cabu me birige awecnista. Ai lui eei biname bime täápume lui bime niija mule cina teebibine lica yaawadimusi budre me. Yepä piti nemi niija mule lui cina biname ne yaacanusu budre me, cane peei täápume lica jiičenine irecu ätumutame. ¹⁷ Iyeta conocono mule lui niija mule gemi, yepä iyeta niija mule cina lica biname ne yaacanusu budre me.

¹⁸ Mine umle gemi, egä Acejiyame me bägräwale cina niija mule lica jaawenanemusi, ingle Acejiyame me Bägrä te teebibine jäälyenganemuge, siige Satani te äblicäco oomlana. ¹⁹ Mine umle gemi egä mine Acejiyame memi, piyepu mine umle gemi egä Satani te iyeta ai gawecewe ne ecanenige.

²⁰ Cuta mine umle gemi, egä Acejiyame me Bägrä te ituge otni mibibine umle ceerame piba mine umle äbitame tabe, lui sine toracarage Acejiyame. Mine toracarage Acejiyame cabu ninajininige, piyepu mine ninajininige teeme Bägrä Yeesu Keriso cabu. Tabe lui toraca Acejiyame gyene piyepu ngälu cäco ireclota gyene.

²¹ Cäme binamewale, ätrunga cabu ca lui cäme bägrä gemi, weene cängena weemämu ire, egä uuje cina gone Acejiyame me puupu ne yaacatusi.

Mene ngälu peese.

YOANE ME NEENENI MANU LETA

Sebore Mene Oogära Biname bau ca

¹ Cane niinäce gaabe ätrunga biname te yoogärenine weeme ätrunga ingle cabu me, Acejiyame te lui bine itu jijäcripi piyepu lui bime bau me căme singi baborage gyene. Lica cane taatu singi gäne weeme täápume, yepä iyeta piyepu lui cina umle gemi toraca mene. ² Cine singi gemi weeme täápume, ingle toraca mene pisi nyene mime cabu piyepu iyeteta cire yaanajepi.

³ Acejiyame mime Babe piyepu teeme Bägrä Yeesu Keriso, teeme miiji te mime cabu lenajame, teepi mibibine owecu wawename piyepu poode ceerame. Mine miiji toraca ätrunga piyepu singi cama teeme miiji ne, owecu ne, piyepu poode ne waadename.

Toraca Mule piyepu Owecu Mule

⁴ Cane baborage gege ge päpäname, egä weeme poto ätrunga biname cina inajininige toraca mene ibi, mime Babe te lipu ituge mibibine jaji. ⁵ Yoo, căme ngenecurage ätrunga binamewale, cane weebibine jijenininine, egä mine miiji mimemime singi lenaja. Cane ai lui kirece mene ne lica yoogärinine weeme bau me, yepä ai lui pui sasa mene gyene, mine lui itu nitecijanipi, mine liba ätrunga biname me läbitipago. ⁶ Singi lui eei gyene, egä mine jaawenimusi Acejiyame ngena täápume nijananinuge. Weene liba läbitipeye ätrunga biname me, pui padare cabu ca weebibine ituge jajanena, siige weene itu itecijanipi, egä weene miiji singi lenaja nuuja biname bime täápume.

⁷ Siige bucurage angletneja biname cina itu yaatengläjepesi iyeta poto ta. Teepi eei gemi, lui cina jiiicenis, egä Yeesu Keriso binamerage me lica äbituji. Apu lui cina jiiicenis, babo angletneja biname gemi piyepu Keriso me äciseräja biname gemi. ⁸ Weene miiji cängena ire atwipeye teeme täápume, piba cime kaakesea te papa me lica läbituge, yepä weene cime kaakesea cabu ca camle-camle daremu ne cirege päpäna.

⁹ Laati te liba lica yaanajuge Keriso me abiberäja cabu, yepä nuuja gaabe ne yaacatuge, teeme Acejiyame lica gyene. Yepä laati te liba cängena yaanajuge Keriso me abiberäja cabu, teeme piti negi Babe piyepu Bägrä. ¹⁰ Laati te liba läduge weeme bau me lica ai abiberäja cama, gone jaawabluye, weeme mete me gone yääsinglantuye. ¹¹ Laati te liba pipu biname ne jaawabluge, tabe lalenglecäjuge teta cama peei niiyarage mule wawename.

Yewo Mene

¹² Căme piti nemi bucurage mene iicaname weeme täápume, yepä cane singi lica gäne peba cabu oogärame, ingle căme ngene atwana singi pisi nyene peeyeme otnime. Mine liba opo pa läpänipago, mine piba page jaatranepesi, siige mime gege te piba babo pa läbitepi. ¹³ Ama lui ätrunga ingle te jiwablininige weebibine.

Mene ngälu peese.

YOANE ME NESAE MANU LETA

Sebore Mene

¹ Cane niinäce gaabe ätrunga biname te yoogärenine căme miijirage biname Gayus bau me, cane lui täápume baborage singi.

² Oo, căme miijirage biname Gayus, cane irecu ätumutenine, egä iyeta gwidape miijirage lenajame mäáme cabu piyepu mäáme tääpe te miijirage lenajame epu pana, mäáme seemo te lipu miijirage gyene. ³ Cane baborage gege ge, liba poto ätrunga biname peema cita ca saaclepi, cebine najepesi, maane lipu toraca ngenecu cama joomlenite toraca mene ne piyepu naanajinige peei toraca mene ibi. ⁴ Cane liba nätecijuge, egä căme binamewale, lui cina căme täápume epu pana băgrä liiyepu, toraca mene ibi icrajinige, cane baborage gege gäne. Nuuja gwidape te lica cebine pepu baborage gege me birige wawena.

Eso Mene Gayus bau me

⁵ Oo, căme miijirage biname, maane toraca ngenecu cama nuuja ätrunga biname bine yäätityeräjimute, ngänu gemi teepi maramara ätrunga ingle cabu ca. ⁶ Teepi te naaitnepesi mäáme owecu mule poto cidi me ai ätrunga ingle bau me. Maane miiji mule ne jaawenute, maane liba yäätityeräjimute teepi ngena täápume singi gaabegabe täápume, teepi liba mäáme cewe ne saabmalusi. Ai lui baborage gwidape gyene Acejiyame me opo gaabe je. ⁷ Teepi Keriso me kaakesea name pi teeme cewe bine itu saabmalemepesi, siige otnenininisi. Teepi nuuja gwidape bine lica yaawadimusi ätrunga căco biname bime bau ca, ⁸ peei name pi mime cabu sine teebibine ätityerame, siige piba mine teta cama lalenglecäjiniinago toraca mene ne acenename.

Mene Diyotrepes piyepu Demetriyus poto cidi me

⁹ Cane puu matikäli leta ne itu yoogärepenne ätrunga biname bime bau me peeyeme, yepä Diyotrepes lui te baborage singi weeme mope biname me lenajame, tabe singi lica căme mene acatame. ¹⁰ Peei name pi cane liba peeyeme pagege otni, cane teeme mule bine page jaaboclomäjemepene weeme opo gaabe je, tabe lipu walya idre yaacenanuge cime poto cidi me cibibine sabe wawename. Tabe ai taatu ne lica jaawenuge, tabe cuta läbwäricuge ätityerame lui ätrunga biname cina otnenininisi Keriso me kaakesea gaabe cabu. Cuta peei taatu lica, tabe cuta jilbemuge poto ätrunga biname cina teebibine ätityerame, siige lui cina teeme mene lica jäätecijemuge, tabe yääyebhengäjimuge ätrunga ingle cabu ca.

¹¹ Căme miijirage biname, maane gone nuuja niiyarage mule ne jätütute, yepä miijirage mule bine jitungemepi. Laati te miiji mule bine jaawenimuge, tabe lui Acejiyame me biname gyene. Laati te niya mule bine jaawenimuge, tabe umle lica gyene Acejiyame.

¹² Weene Demetriyus ne itityärepeye, ingle iyeta biname cina teeme poto cidi me jicemusi, egä tabe miijirage muleyame gyene, piyepu tabe iyeta gwidape jaawenimuge toraca mene ibi. Cine cuta peei yepä mene jicenis, piyepu maane umle gäte, egä cine ngena jicenis, toraca gyene.

Yewo, Gayus

¹³ Căme bucurage mene piti nemi meebine jajime, yepä cane singi lica gäne peba cabu oogärame. ¹⁴ Pätä căme ngene atwanena singi pisi nyene peeyeme watawata otnime, siige mine liba opo pa pa läpänapago, mine piba pa jaatranepago. ¹⁵ Poode mäáme cabu lenajame. Ama lui ätrunga biname cina meebine naawablenisi. Yepäyepä jewabläjemepi mime ätrunga binamewale bine peema.

Mene ngälu peese.

YUUDA ME LETA

¹ Cane sâne Yuuda, Yakobu me igane, Yeesu Keriso me kaakesea bāgrā gāne. Agesa mene weeme bau me Acejiyame te lui bine ituge asogleca, weene Aceji Babe me singi cabu piyepu Yeesu Keriso me ire atwana cabu inajininuge.

² Acejiyame me baborage owecu, poode, piyepu singi weeme cabu lenajame.

Ai Mene Lui Walya Abiberāja Biname bime potu cidi me

³ Cāme ngenecurage binamewale, cane liga weeme bau oogārame tābitumene eei potu cidi me egā Keriso lipu mibibine niya cabu ca nisechrāninige, piba nuuja mule te tādumi, siige canē miiji peei tādūme oogāra niināce. Cane singi gāne weebibine jajime aclajutame kokre cama. Gone mara ātrunga ne yaacatuwe pui cabu ca Acejiyame lui ātrunga ituge ceera mine lui teeme biname gemi. Peei ātrunga lui yepā gyene iyeteta. ⁴ Yoo, potu biname lui Acejiyame me biname lica gemi, teepi āmletnāreji pana mime ātrunga ingle maramara cabu ituge ābācna. Teepi angletneja mene jiičemusi egā Acejiyame me owecu mule name pi teepi conoçaco gaabe cabu ca āsecrāreji gemi teeme conocono singisingi mule wawenecame. Peei conocono gyene. Sasa cabu ca Acejiyame me Oogārāneji Mene te jiičenige egā pui cina māpu daremu ne cirege pāpāna, ingle teepi mime Yageyame Yeesu Keriso me waadena ne jāāgyusi.

⁵ Yoo, Acejiyame me mule daremu awecnista potu cidi me, weene umle ituge, yepā cane singi weene cāāri ngene jotwa-nanineye mime Yageyame te sasa Israela biname bine lipu isecrāremuji Aikupito cabu ca, piba ingwe ca potu bine iyeblenge-muji lui cina lica ge ātrunga cama. ⁶ Pui niya mename seemo potu cidi me cuta ngene jotwananineye. Teepi lui cina teeme ire atwi kaakesea cabu cāngena lica icrajuji, yepā teeme toraca puupu ne sebmaluji cabu je. Teepi iyeteta oomleji yaacrajuge krokeciye puupu cabu ngālu teeme atrana padare cerācerāgāābu bimu cabu. ⁷ Weene cuta Sodoma Gomora potu cidi me ngene jotwananineye piyepu potu matimati cewe pui neeneni cewe mameta. Iyeta pui cewe cabu biname cina yepā pana niya mule tewenenājemumesi pui niya mename seemo cina liyepu. Teepi sargi mule jaawenemusi piyepu rooriye cina teemeteme lawadaninusi. Teepi teeme daremu ne jāāpānusi muye puupu cabu lenajame ngālu cāco. Mine peei cabu ca umle gemi egā pui mule tādūme māpu daremu pisi nyene.

⁸ Yepā pana mule cabu pui walya abiberāja biname cina niya wama yaapicetnerājimusi, piba teeme tādūpe sabe jaawenemusi jugijugi mule ca. Teepi Acejiyame me cotre bine jāāgyemusi, piyepu niya mene jiičemusi jamyacu apaclyera cama mename seemo potu cidi me. ⁹ Yoo, cuta Maikol, mope mename seemo tabe lica pepu supra cāco mene jiičemuge. Ujarage, tabe liba Satani cama mene abajujāsi Moose me budre kaake potu cidi me Maikol lica claabe mene Satani ne jejuji, yepā daremu mene jejuji egā, “Acejiyame te meebine māpu daremu na nāācārepi!” Peei mene taatu. ¹⁰ Yepā, ai walya abiberāja biname cina seemo pana gwidape bine yāāciserājemusi teepi lui umle lica gemi. Yepā, gwidape teepi lui potu cidi me umle gemi, glunubora girigale gwidape lipu umle, peei cina teebibine yaawademusi teeme budre tādūme. ¹¹ Babo māpurage gyene teeme daremu. Kaino ne teepi ingwe yāācwusi. Balam pana teepi singi rarekaake pāpāna niya mule waweneca ca. Teepi Acejiyame me waadena ne jāāgyusi epu pana sasa biname Koorā te Moose me waadena ne lipu itu jiguyi. Teepi Koorā pana māpu daremu pa jāāpānepesi niya puupu cabu me āyēblengame. ¹² Epu pana wāmyā cina lipu cābletāāpe me miiji opo ne sabe jaawenemusi, pui walya abiberāja biname cina weeme abasecretna piyepu deedei ābita sabe jaawenemusi. Teepi ajiri lica gemi bucurage deedei bine teemāmu ātrungecājame. Teepi epu pana gemi carbe liyepu buuwe te lui bine yaawadanemuge, yepā ngupe cāco watninusi. Teepi epu pana uli gije liyepu lui cina kuu cāco birige teeme yāi padare cabu, peei name pi braju cama birige āpācuta, siige kuu cāco piyepu budre. ¹³ Epu pana weene niyarage baawe ne cudecewe ca liyepu opo awatna, tabe giri liba tātnanuge, pepu pana weene pui niya biname bine opo yaawatne-muye teeme ajiri mule cabu ca. Teepi epu pana wale liyepu lui cina dume cabu waatnetnājinininusi, weene āblicāco weeme gaabe ne teeme bau ca acata. Yoo, Acejiyame te krokeciyerage puupu ne ituge amacetrnāja puma teepi iyeteta lenajame.

¹⁴ Yoo, Enoka lui Adamu me siks manu kaakesaare ge, ujarage tabe mene tiicuji pepu biname bime potu cidi me egā, “Mime Yageyame te cire tādēpi teeme bucurage mename seemo cama ¹⁵ iyeta biname bine atraname, lui cina lica gemi Acejiyame me binamewale, teebibine awabudnājame iyeta teeme niyaniya mule cabu ca, piyepu iyeta teeme babo niyarage mene cabu ca Acejiyame potu cidi me, cuta peei name pi teebibine cirege atraname egā babo niyarage gemi.”

¹⁶ Yoo, pui biname cina ämugetna mule cama gemi, järe nuuja biname cama labajininusi. Teeme niija singi cina teebibine yaawadanemusi. Supra cäco teepi babo tage ca mene jicemusi piiyepu teemämu lawepyeräjininusi. Teepi cuta umle gemi nuuja biname bine papa awepyeräja teeme singi pepu päpäname.

Ai Bäärmu Mene Lui Cängena Lenaja poto cidi me

¹⁷ Yoo, cäme binamewale, gone ngene jitrimalinuge pui mene mime Yageyame Yeesu Keriso me ätyepäneji biname cina lui mene weebibine itu jijinanipesi ingwe ca padare poto cidi me. ¹⁸ Teepi apu jijananipesi egä, “Ceräcerägäabu padare cabu, puma cirege biname lui cina weeme miiji mule bine bääclename me jaawenemusi, cuta teeme niija singi cina teebibine ewa-danememisi.” ¹⁹ Pepu mule biname cina biname bine maramara me jaawenemusi, ingle teeme singisingi cina teebibine yaawadanemusi, piiyepu Aceji Seemo lica gyene ten cama. ²⁰ Yepä, cäme binamewale, weeme conocäco ätrunga pisi nyene; weeme ireclota peei cabu yaanajuge, piiyepu weene Aceji Seemo me kokre ca Acejiyame ne yaawejanuye. ²¹ Weene Acejiyame me singi cabu cängenarage inajipi, mime Yageyame Yeesu Keriso me padare ne jewagrijeje tabe owecu cama weebibine iyeteta ireclota cabu me waadename.

²² Weene owecu cama yäätityäremuye teebibine lui bime ätru-nga neenenineneni pana gemi. ²³ Poto biname lui mameta gemi muye puupu me otni, teebibine itityäremeye Acejiyame me gaabe cabu otnime. Weene nuuja poto biname bine owecu cama yäätityäremuye teepi ireclota gaabe päpäname, yepä cängena ire, gone teeme niija mule ne yaacatuye. Teeme jugijugi cäbletääpe piiyepu singisingi mule bine iyeta jäägyemuye.

Awepyeräja Acejiyame tääpume

²⁴ Acejiyame tabe lbibi gyene weebibine gaabe cabu cängena waadename atrama cäco, weene piba teeme jamyacu apacyera cabu teeme opo gaabe cirege atyara conocäco piiyepu gege cama. ²⁵ Tabe taatu Acejiyame gyene, lui te mibibine niija cabu ca isecräremuji, mime Yageyame Yeesu Keriso me kaakesea name pi. Yoo, jamyacu apacyera, awepyeräja, kokre, piiyepu conocäco lui teemi nemi agedna cabu ca, page, piiyepu iyeteta ngälu cäco. Pepu yaanajeje!

Cane ngii Yuuda, siije cäme mene.

APOKALUPO

Ai Peba Ngena Tääpu Myene

¹ Ai mene lui eei gwidape poto cidi me Acejjyame lui bine eboclomäjimuji Yeesu Keriso bau me. Tabe naace name pi eboclomäjimuji, egä Keriso te piba teeme kaakesea bägrä bime bau me aboclomäjame ngena cina mameta gemi äpletnera. Siige Keriso te tityepuji teeme mename seemo ne ai gwidape bine aboclomäjame teeme kaakesea bägrä Yoane bau me. ² Yoane ituge jajanena iyeta, tabe lui ituge päpäna. Pui lui Acejjyame ngena ituge iicema piiyepu Yeesu Keriso ngena ituge aitneja. ³ Gege gyene laati te yaacnuge ai peba ne ciige mule poto cidi me; cuta gege gemi laatibi yäätcejemuge, siige yäcwetnusi, ingle padare mameta gyene ai gwidape cina äpletnerame.

Yoane Jewablenemige Seben Ätrunga Ingle bine

⁴ Cane Yoane ai mene ne yoogärenine seben ätrunga ingle cabu me Asiya probins ngalebora. Miiji piiyepu poode weeme bau me Acejjyame bau ca, lui tage niinäce gaabe je, lui sine page, cuta lui te iyeteta cire yaanajepi, piiyepu seben seemo bime bau ca, teeme babo adnata puupu opo gaabe je lui cina icrajenemige; ⁵ cuta piiyepu Yeesu Keriso bau ca, lui te cängenarage teitnejanumi toraca mene ne, lui te niinäce gaabe biname gyene budre cabu ca arpinentame, piiyepu lui te niinäce gaabe biname gyene iyeta gawe maramara mope biname bime tääpume ai gawecewe cabu ta.

Yeesu Keriso singi gyene mime tääpume, tabe teeme uudi ca mibibine kälyä ituge wawena mime niia mule cabu ca. ⁶ Tabe niwenininuji iiwäreja biname me lenajame, lui cina ten cama pagege biname bine waadena, piiyepu Acejjyame teeme Babe tääpume pagege kaakesea wawena. Tabe baborage apacyera piiyepu kokre cama iyeteta lenajame. Ai mene toraca gyene.

⁷ Itecijinegi! Tabe carbe cabu cire tädepi! Iyeta biname cina cirege teebine päpäna, cuta eei cina lui teebine jigadujisi kalaku ca. Iyeta biname cina ele cire yaangenetnemepi teeme tääpume. Ai lui toraca mene gyene.

⁸ Yageyame, babo kokre Acejjyame, lui sine page, lui tage niinäce gaabe je, cuta cire yaanajepi iyeteta, tabe apu jiicenige egä, “Nuuja gwidape camu ge, cane lui uja ge; cuta liba cire lapiripesi, cane cire nanajepi.”

Keriso Aboclomtige Yoane bau me

⁹ Cane Yoane weene cama yepä ätrunga biname gäne. Mine iyeta Keriso me binamewale gemi. Cane epu mäpu cabu nanajinige weene liiyepu. Iyeta mibibine Yeesu Keriso te niwadininige, cuta mine iyeta miiji mäpu cabu bojäcu lenaja. Ingle cane Acejjyame me Mene ne secanenäjumene, biname bine tejanenäjumene Yeesu poto cidi me, peei name pi noomlujisi, nacitujisi curä cabu me ngii Patmos. ¹⁰ Yageyame me bimü* cabu Aceji Seemo te puga nacenauji, siige cane nätecijuji căme kaake poto cidi ca baborage tagepogogo, moole ala liiyepu. ¹¹ Tabe najuji egä, “Maane ngena bine jepänanenemite, peba cabu yoogäremepi, jityepemepi ätrunga ingle bime cabu me seben maramara cewe cabu me, Epeso me, Mirina me, Pergamo me, Tiyatira me, Sardi me, Piladelpiya me, Laodikea me.”

¹² Cane atatrongtujine, egä laati te mene najaninige, siige cane jepänimujine seben lampa dade bine, lui gol ca wawenäneji ge. ¹³ Pui gome cane jepänujine lui te biname pana ge. Tabe lecaleca căbletääpe asigräneji ge, gol seea ca amlmalteji ge dare gome. ¹⁴ Teeme mope piiyepu edingäli bulu taatu ge, epu pana egimope carbe coo sääwiye me ngäli liiyepu. Teeme irecu cina uliobo pana avenuäsi. ¹⁵ Teeme ernge toplacmujäsi ayiayi braasi ayana liiyepu. Teeme tagepogogo epu pana ge, niuye te lipu podo cabu ca täcwäjcuge babo ala cama. ¹⁶ Teeme camu poto ime cabu puga ge seben wale. Tage cabu ca cubuturikä te tasatuji, neeneni poto äsweji ge, girirage. Teeme opo lui epu pana, bimü apacyera te lipu baborage yaanajuge bimü duusa je.

¹⁷ Cane liba jepänujine teebine, teeme ernge gawe me natramuji budre pana. Tabe puma cita ca teeme camu poto ime ne secituji căme papa cabu, najuji egä, “Wälu gone! Cane niinäcerage gäne, cuta ceräcerägääburage gäne. ¹⁸ Cane ireclotayame gäne. Cane budre äbitujine, cuta arpinantujine, siige cane iyeteta, iyeteta gäne. Cane budre ne ituge apremela piiyepu cane te joomlenine aadiri tääpume kii ne. ¹⁹ Peei name pi maane yoogäremepi, maane lui gwidape bine jepänanenemite page, cuta lui cina ingwe ca cire läbitipesi. ²⁰ Cane naaboclomtinene, căme ime cabu lui seben wale ngeno memi, cuta seben

* **1:10:** Yageyame me bimü: Ama Yageyame me bimü lui Sande bimü gyene.

gol ca wawenāneji lampa dade ngeno memi. Seben wale lui seben ātrunga ingle bime seben mename seemo gemi, piyepu seben lampa dade lui pui seben ātrunga ingle gemi.”

2

Mene Epeso Ātrunga Ingle bau me

¹ “Yoogārepi Epeso ātrunga ingle me mename seemo bau me egā,

‘Lui te joomlemenige seben wale bine camu poto ime ca piyepu lui te otnenige seben gol ca wawenāneji lampa dade gome, tabe apu jiicenige egā: ² Cane umle gāne iyeta weeme poto cidi me. Cane umle gāne weene lipu kokre cama kaakesea itu jaawenemepeye, cuta weene lipu bojācu ituge lenaja māpu cabu. Cane umle gāne, egā weene ire taatu lica jaacranimuye niya mule biname bine; cuta weene itu yaapicetnāremepeye lui cina jiicusi egā teepi Keriso me ātyepāneji biname gemi, yepā teepi lica. Weene ituge pāpāna, egā teepi walya biname gemi. ³ Weene bojācu inajininige māpu cabu; weene bucurage māpu bine itu jāpānemepeye cāme name pi, yepā weene lica luucratnipeye. ⁴ Yepā age sena cane lui tāāpume singi lica, egā weene lipu niināce singi cāme tāāpume, weene pipu singi ne ituge abmala. ⁵ Weene ngene jotwipeye, egā niināce weene lipu ituge lenaja, siige tatatrongāripeye, jewenepeye weene niināce lipu ituge wawena. Weene liba atatrōngāra cāco, cane ādenine, iyeblingtenine weeme lampa dade ne teeme puupu cabu ca.

⁶ Yepā weeme pisi nyene cane lui mule tāāpume singi: weene jāāgyemuye Nikolayame biname* bime mule bine, cane lipu jāāgyemune.

⁷ Weeme liba tablame piti nemi ātecijame, itecijinege, Aceji Seemo te ngena jejenenemige ātrunga maramara ingle bine. Laati te cire yuutrutepi, cane cire jaajepene tabe kuu loolo me ireclota uli cabu ca, Acejiyame me calwacupi cabu lui te uturene.’”

Mene Mirina Ātrunga Ingle bau me

⁸ “Yoogārepi Mirina ātrunga ingle me mename seemo bau me egā,

‘Lui te niinācerage gyene, cuta cerācerāgāāburage gyene, lui te budre ābituji, cuta arpinantuji, tabe te jiicenige egā: ⁹ Cane umle gāne weeme māpu; cane umle gāne egā weene gwidape cāco gemi, yepā toraca weene dogwe biname gemi. Cane umle gāne lipu niyaniya mene jiicemusi weeme poto cidi me, lui cina lainininusi Israela biname ca, yepā teepi lica. Teepi Satani me ingle biname gemi. ¹⁰ Weene wālu gone lābitininuye, weene lui māpu ne mameta gemi pāpāna. Itecijinege! Satani te singi gyene weeme poto bine krokeciyi mete cabu me acraname weebibine apicetnārame. Weene pagege peei māpu cabu ten bimu cama lenaja. Ngānu gyene, teepi budre me piglecipesi, yepā weene gone nabmaluye cebine, cane piba iyeteta ireclota cire icāripene.

¹¹ Weeme liba tablame piti nemi ātecijame, weene itecijinege, Aceji Seemo te ngena jejenenemige ātrunga maramara ingle bine. Laati te cire yuutrutepi, teebine neeneni me budre† te lica sabe cire jaawenepi.’”

Mene Pergamo Ātrunga Ingle bau me

¹² “Yoogārepi Pergamo ātrunga ingle me mename seemo bau me egā,

‘Lui me cubuturikā pisi nyene, neeneni poto āsweji ge, tabe jiicenige egā: ¹³ Cane umle gāne egā weene luma inajininige, Satani te puma biname bine ewadenemige, yepā weene toraca gemi cāme tāāpume. Antipa lui te toraca naitnājuji cebine, teebine liba budre me eglujisi puma Satani te luma enajenige, cuta pui padare cabu weene ātrunga ne lica ebmalujiye. ¹⁴ Yepā weeme piti nemi nesae cāme singi cāco mule. Weeme poto cina Balam me abiberāja ne ingwe icwetniniye. Tabe peese nyene, lui te jejuji Balaki ne tabe Israela biname bine opo ire wawename cibi ārngājame, lui cibi ca uuje bine ituge iiwāreja, cuta piyepu sargi mule wawename. ¹⁵ Piyepu weene poto piti nemi, lui cina ingwe icwetniniye Nikolayame biname bime abiberāja ne. ¹⁶ Peei name pi weene tatatrongāripeye weeme niya mule cabu ca, cije cane lādune pui biname bime cama cubu iicaname cubuturikā ca, cāme tage cabu ca lui te tasatenige.

¹⁷ Weeme liba tablame piti nemi ātecijame, itecijinege, Aceji Seemo te ngena jejenenemige ātrunga maramara ingle bine. Laati te cire yuutrutepi, cane teebine cirege āmlitāneji deedei ngii maana ceera piyepu bulubulu kula ceera kirece ngii cama. Nuuja te umle lica birige, nuuja me kula cabu ngena ngii, yepā lui te yaacatuge, tabe taatu umle birige.’”

Mene Tiyatira Ātrunga Ingle bau me

¹⁸ “Yoogārepi Tiyatira ātrunga ingle me mename seemo bau me egā,

* **2:6:** Nikolayame biname: Nikolayame biname lui eei gemi lui cina uuje bine iiwārejeji deedei bine yāārājimusi piyepu sargi mule jaawenimusi. † **2:11:** neeneni me budre: Neeneni me budre poto cidi me mene cuta pisi nyene Apokalupo 20:14 cabu piyepu Apokalupo 21:8 cabu.

‘Acejiyame me Bägära lui me irecu cina ayenäsi uliobo pana piyepu lui me ernge oplacmeläja braasi ayana pana gegi, tabe jüicenige egä: ¹⁹ Cane umle gäne iyeta weeme poto cidi me. Cane umle gäne, weene lipu singi gemi biname bime täápume, lipu toraca gemi, lipu kaakesea jewenenemiye piyepu mäpu cabu lipu kokre inajininige. Cane cuta umle gäne, egä weene page magerage kaakesea jewenenemiye niinäce kaakesea cabu ca. ²⁰ Yepä weeme pisi nyene cäme singi cäco mule. Weene ire taatu jociteniye magebi ngii Isabela ne, lui te lainuge Acejiyame me mename biname ca. Tabe cäme kaakesea bägära bine ebiberäjenemige, opo jewenenemige conocono gaabe cabu otnime sargi mule wawename piyepu cibi ärngäjame, lui ca yiwäräjemusii uuje bine. ²¹ Cane padare tocärumene tabe atatröngtame teeme niyya mule cabu ca, yepä tabe singi lica teeme sargi mule ne abmalame. ²² Peei name pi cane teebine pita mäpu pa wääcärepene, cuta eei bine lui cina sargi mule jewenenisi ten cama. Teepi baborage mäpu ne pa jääpänepesi cäme bau ca, teepi liba lica pagegi abmala niyya mule bine pui magebi cama cäme bau me atatröngärame. ²³ Cane cuta budre me pa yaaglecemepene pui magebi me ingwe äcwiyame biname bine iyeta ätrunga ingle cina piba päpäname, egä cane age säne lui te umle iyeta biname bime yepäyepä ngene atwanena piyepu singi. Cane cirege weeme mule ibi weeme yepäyepä bine daremu ceera. ²⁴ Yepä weene poto cina piti nemi Tiyatira je, lui cina lica yaacatepeye peei niyyarage abiberäja ne. Weene lica ituge abiberäja lui ne yainusi Satani me sungaberage ogä mule ca. Peei name pi cane lica nuuja gwidape täápume jijenininine, ²⁵ yepä kokre cama joomlepeye weeme ngena pisi nyene, ngälu cane cire lacnenutepene. ²⁶⁻²⁷ Laati te cire yuutrutepi piyepu cäme singi ne cire jaawenepi ngälu ngälugaabe me, cane pui biname ne yepä kokre cirege ceera, cane lui kokre ne ituge acata Babe bau ca. Cane ayana suru pana kokre ne cire yääcärepene tabe gawe maramara biname bine waadename piyepu sabe wawename cäme cubuyame bine, epu pana gawe ca wawenäneji disi ne lipu yaatebicusi. ²⁸ Cane cuta teebine Guji Wale cirege ceera.

²⁹ Weeme liba tablame piti nemi äteciyame, itecijinege, Aceji Seemo te ngena jejenenemige ätrunga maramara ingle bine.’”

3

Mene Sardi Ätrunga Ingle bau me

¹ “Yoogärepi Sardi ätrunga ingle me mename seemo bau me egä,

‘Lui me piti nemi Acejiyame me seben seemo, cuta lui me piti nemi seben wale, tabe jüicenige egä: Cane umle gäne iyeta weeme poto cidi me. Biname cina apu jengenemige, egä weene ireclota gemi, yepä weene budre gemi. ² Peei name pi weene arpinäripeye, weeme ngena camu pisi nyene, kokre joomlepeye, cije iyeteta lapesaruge. Cane jepäninine egä weene lui mule bine jewenenemiye, cäme Acejiyame me opo gaabe conocäco lica gemi. ³ Peei name pi weene ngena jotwipeye weene ngena ituge abiberäja piyepu äteciya. Pui ne kokre joomlepeye, tataatröngäripeye weeme niyya mule cabu ca. Weene liba arpinera cäco, cane peeyame eromaame pana cire lädepene. Weene umle lica cäme otni padare luci yene.

⁴ Yepä nesae cina piti nemi Sardi cewe je, lui cina teeme cäbletääpe bine jugi cäco ewetnenemisi. Teepi cane cama bulubulu cäbletääpe cama cire waatnipesi, ingle teepi miiji gemi peei täápume. ⁵ Laati te cire yuutrutepi, tabe apu bulubulu cäbletääpe cirege asigra. Cane lica cirege iisibrea teeme ngii ne pui peba cabu ca, iyeteta ireclota täápume luma ngii bine ituge oogära. Cäme Babe piyepu teeme mename seemo bime opo gaabe je cane cire yaainepene teebine cäme biname ca.

⁶ Weeme liba tablame piti nemi äteciyame, itecijinege, Aceji Seemo te ngena jejenenemige ätrunga maramara ingle bine.’”

Mene Piladelpiya Ätrunga Ingle bau me

⁷ “Yoogärepi Piladelpiya ätrunga ingle me mename seemo bau me egä,

‘Ai mene lui teeme bau ca gyene, Acejiyame täápume lui te mara me ituge äbita piyepu lui toraca gyene. Tabe te Daawida me kii ne joomlenige, siige liba jüitnuge, nuuja te äblicäco armi; liba yaarmuge, nuuja te äblicäco iitnana. Tabe apu jüicenige egä: ⁸ Cane umle gäne iyeta weeme poto cidi me. Cane umle gäne, egä weeme kokre matikäli gyene, yepä weene cäme abiberäja ne kokre joomleniye, cuta lica naineniye cebine. Cane weeme täápume gaabe ituge iitnana, nuuja te äblicäco gyene armi. ⁹ Itecijinege! Satani me biname peema piti nemi, lui cina lainininusi Israela biname ca, yepä teepi walya waatromininusi, teepi Israela biname lica. Cane pa jaawenemepene teepi weeme bau me otnime kokorare ca äpedname weeme ernge gome, siige teepi umle pa läbitipesi, egä cane singi pisi näne weeme täápume. ¹⁰ Ingle weene kokrerage imyemutinuge mäpu cabu, cane lipu itu jijipene weene wawename, peei name pi cane cuta piwärimtipene, lui mäpu te pa tädepi iyeta poto ta ai gawecewe biname bine apicetnärame. ¹¹ Cane mameta gäne acnenuta. Weene kokre

joomlepeye, weeme ngena pisi nyene, piba nuuja te lica cirege uutecra weeme daremu ne. ¹² Laati te cire yuutrutepi, cane cire jaawenepene mutre caage me căme Acejiyame me iiwăreja mete cabu je, siige tabe licarage abmala pui mete ne. Cane teerne cabu cire yoogărepene căme Acejiyame me ngii, cuta piyepu căme Acejiyame me cewe ngii, Kirece Yerusalema, lui te cire tăinepi cabu ca căme Acejiyame bau ca. Cane cuta căme kirece ngii ne teeme cabu cire yoogărepene.

¹³ Weeme liba tablame piti nemi ătecijame, itecijinege, Aceji Seemo te ngena jejenenemige ătrunga maramara ingle bine.’ ”

Mene Laodikea ătrunga Ingle bau me

¹⁴ “Yoogărepi Laodikea ătrunga ingle me mename seemo bau me egă,

‘Lui te Acejiyame me mene ne toraca me jewenenige, lui te toracarage jeitnăjenige teebine, piyepu lui sine agednayame iyeta gawecewe gwidape tăăpume, Acejiyame lui bine ituge wawenănăja, tabe apu jiicenige egă: ¹⁵ Cane umle găne iyeta weeme poto cidi me. Weene seemo ireclota cabu toraca budre lica gemi, weene cuta toraca ireclota lica gemi. Oo, cane lipu singi găne peei nuuja tăăpume. ¹⁶ Yepă ingle weene ejijejija gemi, peei name pi cane weebibine piyăripene, biname te lipu niyarage niye ne yaaclemutuge teeme tage cabu ca. ¹⁷ Weene jiiceniye egă, “Cime iyeta gwidape piti nemi, cine nuuja gwidape tăăpume singi lica gemi.” Yepă weene opo lica ewatneniye, egă weene lipu niyarage piyepu owecumete gemi. Weene dogwe biname lica gemi, yepă weene cuutacuta gemi, irecu măăsumăsu gemi. ¹⁸ Peei name pi cane jijenininine golrage aletname căme bau ca naace tăăpume weene piba toraca dogwe păpăname. Cuta bulubulu căbletăăpe bine jeletnemepeye căme bau ca weeme peei cuutacuta ajiri ne acwabame. Cuta ngăngye bine jeletnemepeye weeme irecu cabu acraname piba weene căngena păpăname. ¹⁹ Cane umle jewenenemine, eblwăjenenemine, cane lui biname bime tăăpume singi. Peei name pi weene miiji toraca ngenecu cama atatrongăripeye weeme niyaniya mule cabu ca. ²⁰ Itecijinege! Cane gaabe gome nămyemutenige, eyăjenine. Laati te nătecijuge căme tagepogogo, siige gaabe jiitnuge, cane labacitune, teta cama deedei yăărwăjimune, tabe cane cama. ²¹ Laati te cire yuutrutepi, cane cire yaacanepene căme gome adnatame tabe puma cita ca cane cama biname bine waadename epu pana, cane lipu yuutrutujine, siige adnatujine căme Babe gome ten cama biname bine waadename.

²² Weeme liba tablame piti nemi ătecijame, weene itecijinege, Aceji Seemo te ngena jejenenemige ătrunga maramara ingle bine.’ ”

4

Yoane Cabucewe ne Jepănige

¹ Ai ingwe gaabe ca cane cabucewe je grana ne jepănine iitneji ge. Niinăce tagepogogo cane lui itu nătecijumi, moolle ala pana ge, apu najige egă, “Tădi aima cabucewe me! Cane gwidape naawabetnărinine, ingwe gaabe ca lui cina cire lăpletnerăjipesi.” ² Piba taatu Aceji Seemo te cebine nacenanige. Cane cabucewe je babo adnata puupu ne jepănine, lui cabu yepă te adnatăneji enajige. ³ Teeme opo epu toplacmelăjige yaspere piyepu karneliya kula liiyepu. Pui babo adnata puupu gome cănibăniba te aclitige. Teeme kala epu ge emeraldî kula me liiyepu. ⁴ Poto twentifoo modamoda adnatera puupu cina babo adnata puupu ne jewaclomtisi. Twentifoo modamoda biname pui puupu cabu adnatăreji puga ge. Teepe bulubulu căbletăăpe asigrăreji ge, piyepu teeme mope cabu puga ge gol ca wawenăneji krauni. ⁵ Babo adnata puupu cabu ca paamlepamle cina toplacmelăjininisi, maadubi te ala sengenige piyepu babo ala puga ge. Teeme opo gaabe je seben ngale cina ayinisi. Pui lui Acejiyame me seben seemo gemi. ⁶ Teeme opo gaabe je cuta puga ge glaasi malu pana gwidape, lui păpăna taaturage ge.

Babo adnata puupu ne fooma ireclota gwidape cina jewaclomtisi iyeta poto ta. Teeme owe gaabe ca, kaake poto ca iyeta irecu taatu ge. ⁷ Niinăceyame me opo lui layani pana ge; pumacitacayame me opo lui buli pana ge; pumacitacayame me opo biname pana ge; cerăcerăgăăbuyame te epu pana ge warye, lui uujenige. ⁸ Teepe iyeta lui siks taame cama ge. Teeme iyeta poto ta irecu puga ge, ngalebora ca, kaake poto ca. Teepe iyeta padare, ciye bimu, apu jiicemusi egă,

“Epucăco, epucăco, epucăco gyene

Yageyame, kokrerage Acejiyame,

lui tage niinăce gaabe je, lui sine page,

lui te iyeteta pa yaanajepi!”

⁹ Iyeta padare fooma ireclota gwidape cina liba yaawepyerăjusi, opo gaabe me yaacitanusi, eso yăăcărani, lui te iyeteta gyene, babo adnata puupu cabu enajenige, ¹⁰ piba twentifoo

modamoda biname cina yaatrametnemalemuge teeme opo gaabe je. Teepe teeme krauni bine juuwemusi, yaacranimusi babo adnata puupu opo gaabe je, jicusi egä,
¹¹ “Cime Yageyame, cime Acejiyame,
 maane miiji gäte biname cina meebine awepyeräjame.
 Maane miiji gäte teepe meebine opo gaabe me acitame
 piyepu iicaname egä, ‘Maane kokrerage gäte,’
 ingle iyeta gwidape maane te ituge wawenetnäja.
 Määme singi ca teepe itu äbitininujisi,
 ireclota itu jepänujisi.”

5

Äclubäneji Peba piyepu Maamoi

¹ Cane äclubäneji peba ne jepänine teeme camu poto ime cabu, babo adnata puupu cabu lui te enajenige. Pui peba cabu neeneni potopoto oogäräneji ge, seben uli ngate ca klaje wawenäneji ge. ² Puma cita ca cane jepänine, Acejiyame me babo kokre mename seemo te baborage tagepogogo ca jicige egä, “Laati te miiji gyene ai ngate bine äyebengäjame peba ne iitnaname?” ³ Yepä nuuja ne lica jepänisi cabu je, gawe je, gawe ngalebora je, lui te miiji gyene peba ne iitnaname ngalebora ireme. ⁴ Cane ele nangenige, ingle nuuja ne lica jepänisi, lui te miiji gyene pui peba ne iitnaname coo ngalebora ireme. ⁵ Puma cita ca twentifoo modamoda biname bime yepä te najige egä, “Ele gone naangenenge! Ire, Layani pisi nyene Yuuda me ingle cabu ca, babo biname Daawida me kaakesaare, tabe te ituge uutruta teeme cubuyame bime cabu ca, peei name pi tabe miiji gyene seben ngate bine äyebengäjame peba ne iitnaname.”

⁶ Puma cita ca cane jepänine Maamoi ne aclajuteji babo adnata puupu gome, fooa ireclota gwidape piyepu twentifoo modamoda biname bime cole cabu. Tabe epu pana ge, egä teebine uja ituge agli. Teeme seben gaale piyepu seben irecu puga ge. Pui irecu lui Acejiyame me seben seemo gemi, lui cina ätyepäneji gemi gawewewe me iyeta poto ta. ⁷ Siige Maamoi te ädige, peba ne ecatige teeme camu poto ime cabu ca, babo adnata puupu cabu lui te enajenige. ⁸ Tabe liba pui peba ne ecatige, puma cita ca fooa ireclota gwidape cina piyepu twentifoo modamoda biname cina itrametnemalemuge teeme opo gaabe je. Teeme yepäyepä cina joomläjemisi ala-ala gwidape ngii haapi bine piyepu gol disi bine, lui bora miijimiji lengo gwidape ge uubudera täápume. Pui miiji lengo gwidape lui Acejiyame me binamewale bime irecu ätumuta mene gemi. ⁹ Teepe kirece uupera ne etangisi Maamoi täápume apu egä,

“Maane miiji gäte peba ne acatame
 teeme ngate bine äyebengäjame,
 ingle naace popi meebine budre me naaglujisi,
 siige määme uudi ca sewecnimujite Acejiyame bau me
 ingle maramara, mene maramara,
 gawe maramara, tääpe maramara biname bine.

¹⁰ Maane te jewenimujite teebibine
 biname bine waadena biname me
 piyepu iiwäreja biname me lenajame
 mime Acejiyame täápume kaakesea wawename.

Teepe te cirege gawewewe ne acana.”

¹¹ Puma cita ca cane jepänine Acejiyame me mename seemo tomi ne, lui baborage ge. Teepe epu bucurage ge, egä äblicäco acnema. Teepe babo adnata puupu ne jewaclomtisi, cuta fooa ireclota gwidape bine piyepu twentifoo modamoda biname bine jewaclomtemisi. Cane nätecijige, ¹² teepe öräre uupera ne etangisi egä,

“Maamoi lui ne eglujisi,
 miiji gyene cine meebine awepyeräjame,
 ingle määme conocäco pisi nyene
 iyeta gwidape bine waadename.
 Määme piti nemi dogwe, umle, kokre,
 maane baborage gäte,
 määme ngii caburage gyene,
 peei name pi cine meebine eso nääcärenisi.”

¹³ Cane cuta nätecijige iyeta gwidape cina cabu je, gawe cabu je, gawe ngalebora je, niije ngalebora je – iyeta lui cina ireclota cama gemi – teepe apu uupera ne etangisi egä,
 “Lui te enajenige babo adnata puupu cabu cuta piyepu Maamoi,
 teebibine laawepyeräjesi, ngii babo jaawenesi,

opo gaabe me laacitesi iyeteta.
Teeme kokre iyeteta yaanajege.”

¹⁴ Siige fooa ireclota gwidape cina teebibine mene jewecniste-misi, jicisi egä, “Peei lui toraca mene gyene!” Piba modamoda biname cina itrametnemalemige gawe cabu me Maamoi me opo gaabe je teebine awepeyeräjame.

6

Maamoi te Siks Uli Ngate bine Jewalimige

¹ Puma cita ca cane jepänine Maamoi te seben ngate cabu ca yepä ne äwälua piyepu nätecijige fooa ireclota gwidape bime yepä te iicana maadubi pana tagepogogo ca egä, “Tädi!” ² Cane ire acitine, jepänine, bulubulu cooso te puga ge. Cooso cabu lui te tädige, gagari cama ge, piyepu teebine krauni ecärisi. Siige tabe wälu cäco ädige cerämu cubuyame bine budre me aglecame.

³ Maamoi te liba neeneni manu me ngate ne jewälutige, cane nätecijige neeneni manu me ireclota gwidape te iicana egä, “Tädi!” ⁴ Piba nuuja cooso te tädige, lui ududi ge. Cooso cabu lui te tädige, teebine conocäco ecärisi cubu mule ne acaname gawecewe cabu me piba biname cina teemeteme budre me aglecame. Teebine baborage cubuturikä ecärisi.

⁵ Maamoi te liba nesae manu me ngate ne jewälutige, nesae manu me ireclota gwidape te jüicige egä, “Tädi!” Cane ire acitine, jepänine, cäsäcäsä cooso te puga ge. Cooso cabu lui te tädige, teeme ime cabu puga ge skeil. ⁶ Pui fooa ireclota gwidape bime cabu ca cane biname pana tagepogogo nätecijige, skeil cama biname ne jejige egä, “Yepä bimu me daremu ca aletna yepä liita wiiti plawa coo piyepu yepä bimu me daremu ca aletna trii liita baali plawa. Yepä maane olibi uli bine piyepu waina seeasea bine sabe gone jaawenimute.”

⁷ Maamoi te liba fooa manu me ngate ne jewälutige, cane nätecijige fooa manu me ireclota gwidape te iicana egä, “Tädi!” ⁸ Cane ire acitine, jepänine, mulimuli pana cooso te puga ge. Cooso cabu lui te tädige, teeme ngii Budre, piyepu Aadiri te teebine ingwe ca sicwige. Teebibine kokre ituge ceera gawe me cebocebo biname bime cabu ca nuuja cebo ne acatame, budre me aglecame cubu ca, pita ca, gane ca, drowä girigale gwidape ca.

⁹ Maamoi te liba faib manu me ngate ne jewälutige, cane piba jepänine iiwäreja dade ne. Teeme gawe me puga ge eei biname bime cable, lui bine ituge agleca, ingle teepi Acejiyame me Mene wälu cäco ituge iicema. ¹⁰ Teepi jüicisi baborage tagepogogo ca egä, “Oo babo kokrerage Yageyame, maane conocäco piyepu toraca gäte! Luma ngälu padare cine cirege lenaja, ngälu maane gawecewe biname bine cire jitraneempi, daremu cire ecäremepi cime agleca name pi?” ¹¹ Teeme yepäyepä bine lecaleca bulubulu cäbletääpe ecäranemisi, jejemisi teepi matikäli trämä cerämu lenajame, ngälu pui ngälu ne cire joomlepi lui ituge acita teeme pana Acejiyame me kaakesea bägrä bine budre me aglecame, teebibine lipu ituge agleca.

¹² Puma cita ca cane jepänine Maamoi te siks manu me ngate ne jewälutige. Babo ocneja puga ge. Bimu te cäsä me äbitige, siige apacyera lica ge; cuta piyepu mabye te uudi pana ududi me äbitige. ¹³ Wale cina itrametnemige gawe cabu me, epu pana uli kuu lipu saatrametnemuge, babo buuwe te liba uli ne jaakocnäjuge. ¹⁴ Dume te äclubicige, epu pana waaku ne lipu yäclubicusi, siige ämlitige. Iyeta podo piyepu curä cina äyebengäjininisi teeme puupu cabu ca. ¹⁵ Maramara gawe mope biname, teeme ingwe poto ca lui mope biname, cubu mutre biname, dogwe biname, modamoda ngii biname, iyeta aletnäneji biname piyepu iyeta poto biname, teepi ämletnininisi kula waja cabu je coo piyepu modamoda kula uuwa cabu je. ¹⁶ Teepi ala abayaninisi modamoda kula cabu me piyepu podo cabu me egä, “Weene nibaletnecineye, nimletnineye eei me irecu cabu ca, lui te babo adnata puupu cabu enajenige piyepu Maamoi me claabe cabu ca! ¹⁷ Teeme babo claabe bimu age sena, siige nuuja te äblicäco gyene ireclota lenaja.”

7

Yepä Hanred Footfoo Tausen Israela Biname

¹ Ai mule ingwe gaabe ca cane jepänimine fooa Acejiyame me mename seemo bine aclajuteji gawe me fooa mutre cabu ta. Teepi jüibemisi fooa buuwe bine piba nuuja te lica äpwäjame gawe cabu, malu cabu, glunubora je. ² Cane cuta nuuja mename seemo ne jepänine, bimu acita gome ca lui tädige. Teeme gwidape pisi nyene ireclota Acejiyame me cewecu ne acitame biname bime cabu je. Tabe baborage tagepogogo ca ala abayige pui fooa mename seemo bime bau me, lui bine kokre ituge ceera sabe wawename gawe ne piyepu malu ne. ³ Tabe jejemige egä, “Gone sabe wawena gawe ne, malu ne, uli bine, ngälu cine mime Acejiyame me cewecu ne pa yaacitanepesi teeme kaakesea bägrä bime mangace cabu!” ⁴ Puma cita ca cebine najisi, luma ngälu biname cina cirege pui cewecu ne acata.

Teepi lui yepä hanred footifoo tausen biname gemi Israela biname bime twelb inge cabu ca.

⁵⁻⁸ Teepi twelb tausen biname ge yepäyepä inge cabu ca:

Yuuda me inge cabu ca,
 Rubena me inge cabu ca,
 Gaada me inge cabu ca,
 Asera me inge cabu ca,
 Napatali me inge cabu ca,
 Maanasa me inge cabu ca,
 Simeona me inge cabu ca,
 Leebe me inge cabu ca,
 Isakari me inge cabu ca,
 Seblona me inge cabu ca,
 Yoosepa me inge cabu ca,
 Benjamina me inge cabu ca.

Baborage Biname Tomi Bulubulu Cäbletääpe cama

⁹ Ai mule ingwe gaabe ca cane jepänine baborage biname tomi ne, acnema äblicäco ge. Teepi lui gawe maramara, inge maramara, tääpe maramara, mene maramara biname ge. Teepi jeclajutäjemige babo adnata puupu opo gaabe je piyepu Maamoi me opo gaabe je. Teepi lecaleca bulubulu cäbletääpe asigräreji ge, uli laame ime cabu ge teeme gege ne awabudnitame. ¹⁰ Teepi baborage tagepogogo ca abayaninisi apu egä, “Mime Acejiyame, lui te enajenige teeme babo adnata puupu cabu piyepu Maamoi,

teepi te biname bine niya cabu ca birige äsecrera!”

¹¹ Iyeta mename seemo cina jeclajutäjimige, babo adnata puupu ne jewaclomtisi, cuta piyepu fooa ireclota gwidape bine piyepu twentifoo modamoda biname bine jewaclomtisi. Teepi itrametnemalemige babo adnata puupu opo gaabe je Acejiyame ne opo gaabe me acitame, siige jicisi egä,

¹² “Ai lui toraca mene gyene!

Mine miiji iyeta padare cabu mime Acejiyame ne awepyeräja, opo gaabe me acitena, eso ceerana!

Taba baborage gyene, umleyame gyene, kokreyame gyene!

Teeme ngii caburage gyene iyeteta iyeteta!

Ai mene toraca gyene!”

¹³ Puma cita ca twentifoo modamoda biname bime yepä te cebine nätemlige, “Maane nää umle gäte, laati bemi ai lecaleca bulubulu cäbletääpe asigräreji biname? Teepi luma cita ca gemi?” ¹⁴ Cane jejine egä, “Babo biname, cane umle lica gäne, yepä maane umle gäte.” Taba nawecnistige, najige egä, “Ai lui eei biname gemi, babo mäpu cabu ca lui cina ituge äsi. Teepi teeme cäbletääpe bine itu jicisäjemuji, bulu me itu jenenimuji Maamoi me uudi ca. ¹⁵ Peei name pi teepi jeclajutenenemige Acejiyame me adnata puupu opo gaabe je, teeme kaakesea ne jeneninisi teeme mete cabu iyeta padare cabu, ciye bimu. Lui te adnatäneji gyene babo adnata puupu cabu, tabe ten cama enajenige, teebibine jilyengenemige. ¹⁶ Teepi ingwe ca lica pagege loolomecewe coo niyemecewe; bimu te lica atara, coo nuuja nuunu te lica oomlana teebibine, ¹⁷ inge Maamoi lui te jeclajutenige babo adnata puupu opo gaabe je, tabe te teebibine pa ire jaatwemepi, pa yaawademepi ireclota niye gome me. Cuta Acejiyame te pagege teeme iyeta elemäcu äciseja.”

8

Ceräcerägääbuyame Uli Ngate

¹ Maamoi te liba seben manu me ngate ne jewälutige, cabucewe te bojäcu enajige cebocebo awa cama. ² Cane puma cita ca jepänimine seben Acejiyame me mename seemo bine aclajuteji Acejiyame me opo gaabe je. Teebibine ecäranemisi seben moole.

³ Cuta nuuja mename seemo te tädige, jeclajutige iiwäreja dade gome. Teeme ime cabu puga ge gol disi miijirage lengo gwidape acrana täapume, siige bucurage ecärisi tabe alenglecäjame Acejiyame me binamewale bime irecu ätumuta mene cama siige uubuderame gol ca wawenäneji iiwäreja dade cabu, lui babo adnata puupu gome puga ge. ⁴ Taba jeclajutige Acejiyame me opo gaabe je. Teeme ime cabu ca miijirage lengo kloka cina äsige cabu me Acejiyame me binamewale bime irecu ätumuta mene cama. ⁵ Siige tabe pui gol disi ne ecatige, cuta uliobo ne ecatige pui iiwäreja dade cabu ca, ecitige disi cabu me, ijarige gawe me. Piba taatu maadubi te ala sengenige, poto modamoda ala puga ge, paamlepamle cina toplacmeläjininisi, ocneja te cewe ne tedodyeräjige.

Seben Mename Seemo cina Moole bine Jecnäjemi

⁶ Pui seben mename seemo lui bine moole ecāranemisi, teepi amacetnājininisi ācnājame. ⁷ Niinācēyame te liba teemanu ne jecnājige, piba aisi ipecu cina, lui uliobo piyepu uudi cama alenglecājininisi, babo kokre cama gawe me itrametnemige. Uliobo te peema cita ca āpletmutige, siige yepā poto gawe te ayige, neeneni poto gawe cina abmalāsi. Yepā poto gawe me uli cina ayinisi, neeneni poto gawe me abmalinini. Baace cina ayinisi iyeta poto ta.

⁸ Neeneni manu me mename seemo te liba teemanu moole ne jecnājige, podo pana gwidape lui te uliobo cama ge, piba ajarige malu cabu me, siige yepā poto malu me niye te atepingtige uudi me, neeneni poto malu me niye cina abmalāsi. ⁹ Lui poto malu me niye te uudi me ābitige, iyeta ireclota gwidape bine budre me eglecimige, buto bine cuta sabe jebenimige.

¹⁰ Nesae manu me mename seemo te liba teemanu moole ne jecnājige, baborage wale te piba itramige gawe me. Epu ānige ngale pana, siige yepā poto gawe me baduge bora me piyepu waja bora me abacitanige. Neeneni poto gawe me baduge piyepu waja cina abmalinini. ¹¹ Pui wale me ngii lui Caapo. Pui yepā poto gawe me niye cina caapo me ābitinini. Bucurage biname cina budre ābitinini, teepi liba enisi pui niye ne.

¹² Foa manu me mename seemo te liba teemanu moole ne jecnājige, cabu je bimu me yepā poto te āplige, neeneni poto cina abmalāsi; maybe me cuta yepā poto te āplige, neeneni poto cina abmalāsi, cuta yepā poto me wale cina āplegicini, neeneni poto me wale cina abmalinisi, piba pui poto bimu, maybe, wale apaclyera lica ge. Pui name pi bimu me yepā padare krokeciye ge, neeneni padare apaclyāreji ge; cuta ciye me yepā padare krokeciye ge, neeneni padare apaclyāreji ge.

¹³ Puma cita ca cane jepānine yepā warye te tuujanenige cabu je. Tabe baborage tagepogogo ca tiicige egā, “Ogi nemi, ogi nemi, ogi nemi, lui cina inajininige gawe cabu. Weene baborage māpu ne pagege pāpāna, cerāmu nesae mename seemo cina liba pagege teeme moole bine ācnāja.”

9

¹ Faib manu me mename seemo te liba teemanu moole ne jecnājige, cane piba jepānine wale ne, lui ituge atrama gawe cabu me. Piyemrage cupicu puga ge, lui armeji ge. Pui wale ne kii ecārisi pui cupicu ne iitnaname, ² siige tabe jiihnige. Baborage kloka te tasatige, epu pana budni ne lipu juubudārusi, carbe bine icwabimige piyepu bimu ne cuta icwabige. ³ Pui kloka cabu ca sesi cina tāsige gawe cabu me. Teeme kokre puga ge biname bine pita ceerame, epu pana potetagetage te lipu biname ne yāgūtuge babo pita cama. ⁴ Teebibine jējemisi, “Gone sabe jaawenimuye baace bine, uli bine coo nuuja uutana gwidape bine, yepā pui biname bine taatu sabe jēwēnemepeye, lui bime mangace cabu lica gyene Acejiyame me cewecu.” ⁵ Teebibine jējemisi faib maybe ngalebora biname bine pita māpu ceerame, yepā lica budre me agleceme. Teeme peei pita te epu pana ge, potetagetage me āguta cabu ca lipu pita ne jāāpānusi. ⁶ Pui padare cabu biname cina naabe liga budre me cire lābitipesi, yepā teepi budre lica cirege. Teepi babo singi budre me, yepā teepi budre te lica cire joomle-mepi.

⁷ Pui sesi cooso pana ge, lui bine cubu tāāpume yaama-cetnājimusi. Teeme mope cabu puga ge gol ca wawenāneji krauni pana gwidape, opo lui biname pana ge, ⁸ edingāli lecaleca ge, giricu lui layani pana ge. ⁹ Teeme dare cabu puga ge epu pana ayana gwidape, cubu cabu lui ca biname cina dare bine jāālyengimusi. Teeme taame puuwāmu epu pana ge, bucurage cooso cina lipu kariyota bine yāāldnīmusi cubu cabu je. ¹⁰ Teeme kiira gaale cama ge potetagetage me liyepu. Teepi pui gaale ca biname bine sabe jaawenanemusi faib maybe ngalebora, siige teepi pita ne jāāpānusi. ¹¹ Teeme mope biname yepā mename seemo puga ge. Tabe te irejetwenige pui piyemrage cupicu ne. Heberu mene ca teeme ngii lui Abadoni, Griik mene ca lui Apolyoni. Teeme abolomta lui egā “Sabe Wawenayame”.

¹² Yoo siige, yepā māpu te peega bapirige, piyeme cerāmu neeneni māpu gegi otnime.

¹³ Puma cita ca siks manu me mename seemo te jecnājige teemanu moole ne. Lui gol ca wawenāneji iiwāreja dade puga ge Acejiyame me opo gaabe je, pui me foa mutre cabu ca cane nātecijige tagepogogo, ¹⁴ lui jejiige siks manu mename seemo ne egā, “Foa mename seemo bine jībiremepi, lui cina ātāyāneji gemi Euprates babo baduge gome.” ¹⁵ Siige teebibine jībirimisi puirage kāmāge, maybe, bimu, padare cabu teepi yepā cebo biname bine budre me agleceme, neeneni cebo bine abmalācemame. ¹⁶ Cane nātecijige luma ngālu cubu biname cooso cama puga ge. Pui lui neeneni hanred milyon ge. ¹⁷ Wama pana cane cooso bine jepānimine piyepu teeme papa cabu lui biname ge. Teepi ayana gwidape asigrāreji ge teeme dare bine ālyengame. Pui ālyenga gwidape lui uliobo pana ududi ge, sapiri kula pana sisi ge, cuta piyepu sulphur pana mulimuli ge. Cooso bime mope layani pana ge. Teeme tage cabu ca tāsige uliobo kloka cama piyepu niyarage lengo gwidape ngū sulphur.

¹⁸ Pui nesae gwidape cina: uliobo, kloka piyepu sulphur, cooso bime tage cabu ca lui täsige, seglecemisi yepä cebo biname bine, neeneni cebo cina abmalininisi. ¹⁹ Pui cooso bime kokre lui tage cabu ca ge piyepu kiira cabu ca ge. Teeme kiira lui cobyame mope pana ge, siige pui ca biname bine sabe jewenanemisi.

²⁰ Lui biname cina budre lica äbitaninisi ai mäpu cabu, teepi lica ätecitininisi ime ca wawenäneji gwidape bine awejename. Teepi camu ewejanemisi niyaniya cable bine, piyepu gol ca, silba ca, braasi ayana ca, kula ca, uli ca wawenäneji gwidape bine, lui cina äblicäco ge päpäna, ätecija, otnetneja. ²¹ Cuta teepi lica tatatrongärinini biname bine agleca mule cabu ca, mowä mule cabu ca, sargi mule cabu ca, gwidape ero cabu ca.

10

Acejiyame me Mename Seemo te Yoane ne Peba Ecärije

¹ Puma cita ca cane jepänine Acejiyame me nuuja kokre mename seemo te äina je cabucewe ca. Carbe te teebine icwabige cäbletääpe pana. Cänibäniba te aclitige teeme mope gome. Teeme opo epu apaclyäreji cama ge bimu liyepu, piyepu teeme ernge neeneni uliobo wädräji liyepu. ² Teeme ime cabu puga ge matikäli peba, lui te iitneji ge. Tabe teeme camu poto ernge ne malu cabu ecitige, säwäci poto ernge ne doro cabu ecitige, ³ siige baborage tagepogogo ca ala abayanige layani me tagepogogo liyepu. Seben maadubi cina teebine jewecnistisi. ⁴ Siige teepi liba ala sengenetne-mige, cane oogärame äbitine, yepä piba taatu cane tagepogogo nätecijige, cabucewe ca lui te najige egä, “Gone yoogärute, seben maadubi cina ngeno me bii jicisi. Peei lui ogä mene gyene.”

⁵ Puma cita ca pui mename seemo cane lui ne jepänine aclajuteji malu cabu piyepu doro cabu, tabe teeme camu poto ime uutige cabucewe me. ⁶ Acejiyame lui te iyeteta gyene, lui te jewenimuji cabucewe, gawecewe, malu piyepu teeme cabu lui iyeta gwidape, teeme ngii cabu pui mename seemo te jüicige egä, “Siige! Cerämu awagrija lica gyene. ⁷ Seben manu me mename seemo te liba teeme moole ne pa jääcnäjeji, Acejiyame piba pa yaapirepi teeme ogä ngene atwana ne, tabe lui ituge jaji teeme kaakesea bägrä bine, lui teeme mename biname gemi.” ⁸ Puma cita ca niinäce cane lui tagepogogo nätecijige cabucewe ca, cääri najige egä, “Äte, peba ne ecati lui iitneji gyene pui mename seemo me ime cabu, lui te jeclajutenige malu cabu piyepu doro cabu.” ⁹ Cane siige ädine, jejine matikäli peba ceerame. Tabe najige, “Ecati, erwi! Määme came cabu caapocapo enajenige, yepä maane liba erwenite, määme tage cabu mite taatu, uri liyepu.” ¹⁰ Cane peba ne ecatine teeme ime cabu ca, siige erwine. Cäme tage cabu epu mite enajige uri liyepu, yepä liba erwine, cäme camuge bora caapocapo ge. ¹¹ Puma cita ca cebine najisi egä, “Maane miiji cääri yepä gääbu jejananemepi, ngena cina cirege äbitena gawe maramara, mene maramara, tääpe maramara biname bime tääpume piyepu gawe mope biname bime tääpume.”

11

Neeneni Aitneja Biname

¹ Puma cita ca cebine suru näcärisi, atonera suru pana, najisi egä, “Äte, iiwäreja mete ne etoneräji, cuta puma lui iiwäreja dade ne etoneräji. Maane cuta ecnemi lija biname cina irecu ätmuteninini puma. ² Yepä pui mete caale kaake poto ca lui puupu, pui ne gone yaatoneräjute, ingle pui puupu lui ceereji ge nuuja biname bine, lica Israäli biname bine. Teeme ime cabu sine. Teepi te footitu mabye ngalebora sabe cire jaawenepesi Acejiyame tääpume lui babo cewe ne mara me ituge wawena. ³ Cane cäme neeneni aitneja biname bine cire jäätyepene. Teepi ragre pana cäbletääpe cama cirege. Teepi Acejiyame me Mene cire jaajanemepäsi yepä tausen neeneni hanred siksti bimu ngalebora je.”

⁴ Pui neeneni aitneja biname lui neeneni olibi uli gegi piyepu neeneni lampa atacwa dade gegi, lui cina jaaclajutenige ai gawe Yageyame me opo gaabe je. ⁵ Laati bem liba singi sabe wawena teebibine, uliobo te tasatuge teeme tage cabu ca, siige teeme cubuyame bine yaataclomemuge budre me. Yoo, laatibi liba läbitininusi teebibine sabe wawename, peei biname bine pepu birige budre me agleca. ⁶ Teeme conocäco pisi nyene ngupe iibaname, siige teepi lui padare cabu Miiji Mene cirege jajanena, pui padare cabu ngupe te lica acira. Teeme cuta conocäco pisi nyene waja niije bine uudi me wawename piyepu maramara mäpu bine ätyepejame gawecewe cabu me, teepi liba singi.

⁷ Siige, teepi liba teeme mene jajanena kaakesea ne cire yaapirepäsi, piba drowä gwidape, lui te piyemrage cupicu cabu ca cire tasatepi, ten cama cire larngepi. Tabe teebibine cire läätucärepi, siige budre me cire laaglepi. ⁸ Teeme budrekaake cina cirege gaabe cabu lenaja pui babo cewe cabu je, teeme Yageyame ne luma jibyecrujisi toto ca baarge uli cabu. Pui babo cewe ne ngene ca agli mene ca Sodoma ca piyepu Aikupito ca einenisi.

⁹Iyeta gawe maramara, mene maramara, ingle maramara, tääpe maramara biname cina cirege teeme budrekaake bine päpänenä nesae piyepu cebocebo bimu cama. Teepi singi lica cirege teebibine gape cabu me acitame. ¹⁰Gawecewe biname cina teeme budre name pi gege cirege. Siige peei name pi teepi cirege giiregire mule wawenetrnäja piyepu owecu gwidape cire läcäranipesi, ingle pui neenenä mename biname cina teebibine baborage mäpu me cirege wawena. ¹¹Nesae piyepu cebocebo bimu ingwe gaabe ca Acejiyame te tityepige ireclota buuwemope ne teeme cabu ca, siige tabe abacitanige pui neenenä biname bime trupa ngalebora me, piba teepi abujengtäsi. Iyeta lui cina jääpäniisi teebibine, mage wälu ge. ¹²Puma cita ca pui neenenä mename biname cina äätəcijige baborage tagepogogo cabucewe ca iicana egä, “Siclege aima!” Teepi puma cita ca teeme cubuyame bime irewale carbe cabu aacliche cabu me. ¹³Puirage padare cabu baborage ocneja puga ge, siige babo cewe yepä poto ne sabe jewenige, nain poto cina abmalininisi. Seben tausen biname bine budre me eglecimige. Lui cina abmalininisi, mage wälu ge, siige Acejiyame lui te enajenige cabucewe je, teebine ewepyeräjäsi.

¹⁴Yoo, neenenä me mäpu te peega bapirige. Cerämu pisi nyene yepä.

Seben Manu me Mename Seemo te Teeme Moole ne Jecnäjige

¹⁵Seben manu me mename seemo te liba teeme moole ne jecnäjige, cane piba nätecijige cabucewe ca tagepogogo cina oräre iicana egä, “Mime Yageyame piyepu Keriso, tabe lui ne tityepuji, teepi ituge gawecewe ne acata teeme ime cabu me, siige teepi te pa yaacanepäsi iyeteta.” ¹⁶Piba twentifoo modamoda biname, lui cina teeme adnatera puupu cabu icrajenige Acejiyame me opo gaabe je, teepi owe ca gawe me itrametnemalemige, Acejiyame ne opo gaabe me ecitisi, ¹⁷jiicisi egä, “Yageyame, babo kokre Acejiyame,

lui sine page, lui tage uja,

cine eso näcärenisi,

egä maane mäame babo kokre ca ai gawecewe ne ecanenite.

¹⁸Gawe maramara biname cina babo niya me bäbitininisi,

ingle mäame claabe padare te bii tatyaramtige.

Ai lui padare gyene budre biname bine atraname.

Padare te bii tatyaramtige mäame kaakeseyame,

Acejiyame me mename biname bine daremü ceeraname

piyepu iyeta mäame binamewale bine,

lui cina wälu ituge mäame täapume matimati cabu ca ngälu modamoda me.

Padare te bii tatyaramtige sabe wawenime pui bine, lui cina sabe jewenenisi ai gawecewe ne.”

¹⁹Puma cita ca cabucewe je iiwäreja mete te iitnige, siige lui uli boks ngalebora ten cotre bine ewetnenemisi, pui te pajecu me äbitige. Peei mule te liba äbitige, paamlepamle cina toplacme-läjininisi, ala puga ge, maadubi cina ala sengenetnemige, ocneja puga ge piyepu aisi ipecu cina sitrametnemige gawe cabu me.

12

Magebi piyepu Drowä Gwidape

¹Puma cita ca cane jepänine, mara opo gwidape te lui aboclom-tige dume cabu. Pui lui magebi ge. Tabe bimu ca asigräneji ge cäbletääpe täapume piyepu mabye te teeme ernge gawe mage. Teeme mope cabu lui twelb wale ca wawenäneji krauni puga ge. ²Tabe lui mäpumäpu ge, adnatame äbitige pita ala cama.

³Cuta nuuja mara opo gwidape te aboclomtige dume cabu. Pui lui baborage ududi siible seben mope cama piyepu ten gaale cama. Teeme pui seben mope iyeta krauni cama ge. ⁴Teeme kiira ca tabe yepä poto wale bine jewälidnemige, siige yiisabimige gawe cabu me. Neenenä poto me wale cina abmalininisi. Tabe jeclajutige pui magebi me opo gaabe, adnatame lui te äbitige, naace täapume bägrä te liba aplimla je tabe piba ärmitame. ⁵Siige tabe bägrä ne jirngige, lui te iyeta biname bine cire yaawademepi ayana suru ca. Yepä, bägrä jwuutecrisi, ewepläcitisi Acejiyame bau me teeme adnata puupu cabu me. ⁶Magebi te uucrige daapo taatu cewe cabu me. Acejiyame te puma puupu ne itu semacetrnäjumi teeme täapume. Teebine puga ire jotwisi yepä tausen neenenä hanred siksti bimu cama.

⁷Piba cubu puga ge cabucewe je. Acejiyame me babo mename seemo Maikol piyepu teta cama lui mename seemo, teepi arnginisi siible cama. Siible te teeme mename seemo cama liga naabe uutrutame äbitanige, ⁸yepä tabe äblicäco ge, peei name pi teepi äblicäco cabucewe je cerämu lenaja. ⁹Siige pui babo siible ne sijarisi gawe cabu me iyeta teeme mename seemo cama. Tabe pui sasa cobyame gyene, lui ne Diyabolo ca piyepu Satani ca einenisi, ai gawecewe ne lui te ituge angletneja.

¹⁰ Piba cane nätecijige baborage tagepogogo cabucewe je iicana egä,
 “Siige Acejiyame te page byuutrutige!

Tabe teeme kokre ne biiri seboclomtige, egä tabe te biname bine ewadenemige!
 Piiyepu teeme Keriso te page teeme conocäco ne beboclomtige gawecewe täápume,
 ingle Diyabolo te Acejiyame me opo gaabe je cerämu lica enajenige
 ätrunga biname bine iicetname ciye piiyepu bimu cabu je.

Teebine siige gawe me bijarisi.

¹¹ Cime ätrunga binamewale cina ituge uutruta
 teeme bau ca Maamoi me uudi ca
 piiyepu teeme aitneja mene cabu ca.

Teepi singi ge teeme ireclota bine äyemelame budre täápume.

¹² Peei name pi cabucewe piiyepu lui cina puma, weene miiji gege!
 Yepä ogi nemi, lui cina inajininige gawe cabu piiyepu malu cabu,
 ingle Diyabolo peeyeme ituge otni.

Tabe babo niiyarage gyene,

ingle tabe umle gyene, egä teeme täápume padare matikäli piiyeme.”

¹³ Siible te liba umle äbitige, egä teebine gawe cabu me bijarisi, tabe gije abacitige pui magebi ne äcwetnename, bāgrä ne lui te jirngige. ¹⁴ Magebi ne ocärisi babo warye me neeneni taame tabe uujaname teeme puupu cabu me daapo taatu cewe me. Teebine puma pa ire jwaatwepesi nesae piiyepu cebocebo kāmāge cama, piba teebine siible te äblicäco oomlana. ¹⁵ Puma cita ca siible te igi niye ne isatige teeme tage cabu ca magebi me ingwe poto ca teebine acatame. ¹⁶ Yepä, gawe te teebine utityärige, äpälutige, niye ne irmitige, siible me tage bora ca lui te tasatige. ¹⁷ Siible te babo niiyarage me äbitige magebi täápume, ädige teeme poto bāgrä bime cama cubu me. Teepi iyeta eei gemi, lui cina Acejiyame me Mene ne jäätrungusi piiyepu Miiji Mene jaajanemususi Yeesu poto cidi me. ¹⁸ Siige siible te abmalige malu cabu aclajutame.

13

Neeneni Drowä Gwidape

¹ Cane drowä gwidape ne jepänine malu cabu ca arpata. Tabe ten gaale cama piiyepu seben mope cama ge. Teeme gaale iyeta krauni cama ge piiyepu iyeta teeme mope cabu ngii puga ge Acejiyame me ngii ne sabe wawename. ² Tabe baborage glunubora pusi pana ge, ngii lepadi. Teeme ime, ernge lui bea pana ge, tage layani me tage pana ge. Siible te teeme kokre ecärige drowä gwidape ne, cuta ecärige teeme babo adnata puupu tabe puma cita ca biname bine waadename. ³ Drowä gwidape me yepä mope epu pana ge, egä uja ituge budre me agli, yepä pui budre dupe te läsumurepi. Iyeta biname cina mutäcäco äbitinisi, siige teeme singi cabu otneninisi. ⁴ Teepi iyeta siible ne opo gaabe ecitisi, ingle tabe kokre itu yääcärepä drowä gwidape ne. Teepi cuta drowä gwidape ne opo gaabe ecitisi, jicisi egä, “Nuuja te lica gyene drowä gwidape pana. Nuuja te äblicäco teta cama argi.”

⁵ Acejiyame te ire taatu jecitige drowä gwidape ne tabe mope babo äbitame piiyepu Acejiyame me ngii ne sabe wawename. Teeme pui drowä gwidape me cuta conocäco puga ge babo biname me lenajame footituu mabye ngalebora. ⁶ Siige tabe gije abacitige Acejiyame ne, teeme ngii ne piiyepu teeme lenaja puupu ne ängejame cuta eei bine, lui cina cabucewe je icrajinige. ⁷ Acejiyame ire taatu jecitige tabe teeme binamewale cama arngime, teebibine apremelame. Cuta teeme conocäco puga ge tabe babo biname me äbitame iyeta maramara ingle, maramara gawe, maramara tääpe piiyepu mene maramara biname bime täápume. ⁸ Iyeta biname cina gawecewe cabu teebine opo gaabe me cire yaacitepesi, yepä eei biname lica lui bime ngii ituge oogära ireclota peba cabu agedna me niinäce gaabe je. Pui peba lui Maamoi myene, lui ne eglujisi.

⁹ Weeme liba tablame piti nemi, itecijinege ai mene! ¹⁰ Lui gemi oomlemame, siige cire joomlemepesi. Lui gemi cubuturikä ca budre me aglecame, siige cubuturikä ca budre me cire yaa-glecemepesi. Ai mäpu mule cina singi Acejiyame me binamewale cina kokre piiyepu ätrunga cama aclajutame.

¹¹ Cuta cane piba nuuja drowä gwidape ne jepänine, gawe cabu ca lui te tasatige. Teeme neeneni gaale puga ge maamoi pana. Tabe siible pana mene jicemige. ¹² Niinäceyame drowä gwidape te teeme kokre ecärige pui nuuja ne. Siige tabe teeme irewale giri jicranimige ai gawecewe ne piiyepu teeme cabu lenajayame bine niinäce drowä gwidape ne opo gaabe me acitame, lui me niiyarage dupe äsumureji ge. ¹³ Tabe pui neeneni manu drowä gwidape te modamoda ciitaca mule bine jewenimige; tabe jewenige uliobo ne cabu ca äiname gawe me biname bime irewale. ¹⁴ Acejiyame te ire taatu jecitige tabe ciitaca mule bine wawenecame niinäce drowä gwidape me irewale. Ai ciitaca mule ca

tabe engletnäjemige iyeta biname bine ai gawecewe cabu. Tabe jejemige niinäce drowä gwidape pana gwidape ne wawename, lui ne niinäce yaaglepesi cubuturikä ca budre me, yepä siige ireclota ge. ¹⁵ Acejiyame te ire taatu jecitige neeneni manu drowä gwidape te ireclota buuwemope äpwäclutame pui niinäce drowä gwidape pana gwidape ne siige tabe mene iicemame piyepu budre me aglecame, laati bemi lica teebine opo gaabe me acita. ¹⁶ Pui neeneni manu drowä gwidape te giri jicranige iyeta biname bine, matimati biname modamoda biname, dogwe biname owecumete biname, aletnäneji biname coo poto biname, teepi cewecu ne acatame teeme camu poto ime cabu coo mangace cabu. ¹⁷ Nuuja te äblicäco gwidape bine aletna coo piyepu aletname waadena, teeme liba pui cewecu lica gyene. Pui cewecu lui niinäce drowä gwidape me ngii gyene coo teeme ngii namba gyene.

¹⁸ Maane miiji umle cama ai ne opo awatname. Laasi nyene umle biname, tabe te jäärngege, drowä gwidape me namba ngeno myene. Pui namba lui biname me ngii tääpu myene. Pui lui 666 gyene.

14

Maamoi piyepu Teeme Binamewale

¹ Puma cita ca cane ire acitine, jepänine Maamoi ne aclajuteji Siiyona podo cabu. Ten cama puga ge yepä hanred footifoo tausen biname, laati bime mangace cabu oogäräneji ge Maamoi me ngii piyepu teeme Babe me ngii. ² Cane cabucewe ca tagepogogo nätecijige epu pana niyye te lipu podo cabu ca babo ala cama täcwäjuge piyepu cuta babo maadubi me ala liyepu. Pui tagepogogo cuta epu pana ge, biname cina lipu haapi bine jäänäjimusi. ³ Pui yepä hanred footifoo tausen biname cina jeclajutemige babo adnata puupu piyepu fooa ireclota gwidape piyepu twentifoo modamoda biname bime opo gaabe je, siige kirece uupera ne etangisi puma. Nuuja te ibibi lica ge peei uupera ne abiberäjame, yepä pui yepä hanred footifoo tausen biname lui cina Keriso me uudi ca aletnäneji gemi gawecewe cabu ca. ⁴ Teepi lui eei biname gemi, lui cina cogacoga mule umle cäco, ingle teepi camu tääpe cama gemi. Teepi Maamoi ne ingwe icwenisi, tabe liiyeme läduge. Teebibine ituge aletna gawecewe biname bime cabu ca. Teepi lui Acejiyame me piyepu Maamoi me binamewale gemi. Teepi epu pana gemi ire acita cabu niinäceyame kuu lui yääcärusi Acejiyame ne. ⁵ Teeme tage cabu ca nuuja walya mene te lica ituge asata, coo nuuja niyya mule ne lica ituge päpäna teeme cabu.

Nesae Acejiyame me Mename Seemo cina Mene Jiicemisi

⁶ Puma cita ca cane jepänine yepä mename seemo te cabu je uujana. Miiji Mene lui iyeteta gyene, tabe pui ne ecanänge iyeta biname bime bau me gawecewe cabu, ingle maramara, mene maramara, tääpe maramara, gawe maramara biname bime bau me. ⁷ Tabe baborage tagepogogo ca jiicige egä, “Acejiyame tääpume miiji wälu, teebine miiji awepyeräja, ingle padare te bii tatyaramtige tabe biname bine atraname. Opo gaabe me eciteye, lui te jewenimuiji cabucewe ne, gawecewe ne, malu ne, waja bine.”

⁸ Teeme ingwe gaabe ca nuuja mename seemo te tädige, jiicige egä, “Siige, tabe bitramige! Babo cewe Babloniya te bitramige! Teeme sargi mule* cina sabe jaawenemepesi iyeta gawe maramara biname bine. Teeme pui sargi mule lui kokre waina niyye pana ge, siige tabe biname bine jaawenemepi pui nanime.”

⁹ Pui neeneni mename seemo bime ingwe gaabe ca nuuja te cuta tädige. Tabe jiicige baborage tagepogogo ca egä, “Laati te liba opo gaabe me yaacituge drowä gwidape ne coo teeme pana wawenäneji gwidape ne, coo liba ime cabu coo mangace cabu teeme cewecu ne yaacatuge, ¹⁰ tabe te miiji Acejiyame me claabe waina niyye ne nani. Ai lui wainarage niyye ge, Acejiyame me claabe ge, tabe lui ne epadurige kaapo cabu me. Apu biname bine cirege ädnäja uliobo wädräji cabu piyepu niyyarage lengo gwidape ngii sulpur wädräji cabu Acejiyame me mename seemo bime piyepu Maamoi me opo gaabe je. ¹¹ Pui uliobo lui ätuma cäco gyene. Teeme kloka cina iyeteta täsenininisi cabu me. Laatibi drowä gwidape ne coo teeme pana wawenäneji gwidape ne opo gaabe me yaacitusi, coo laatibi teeme ngii ne yaacatanusi mangace cabu coo piyepu ime cabu, teepi ciyye bimü diibe oocana lica cirege pui uliobo cabu ca. ¹² Acejiyame me binamewale cina, laatibi teeme mene yäätacijemuge piyepu laati bemi toraca Yeesu tääpume, teepi gone onya te agli pui drowä gwidape me gaabe cabu otnetnejame.”

¹³ Puma cita ca cane nätecijige cabucewe ca tagepogogo te iicana egä, “Maane apu yoogäri egä: Gege gemi pui biname cina ama cita ca ngälu Yageyame me kaakesea cabu lui cina

* **14:8:** sargi mule: Ai lui toraca sargi mule lica gyene. Biname cina uuje bine jäärnungemepesi, lica Acejiyame ne. Peei lui epu pana gyene, egä teepi sargi mule ne jaawenepesi.

budre ne cire jääpānanepesi.” Acejiyame me Seemo te jewecnistige teebine egā, “Toraca mene gyene! Teepi pagege ngena teeme mäpu kaakesea cabu ca, ingle mene te teeme kaakesea poto cidi me ten cama ädenige.”

Gawecewe me Ire Acita Padare

¹⁴ Puma cita ca cane ire acitine, bulubulu carbe ne jepānine. Pui carbe cabu puga ge adnatāneji biname pana gwidape. Teeme mope cabu puga ge gol ca wawenāneji krauni piyepu ime cabu girirage turikā calwacupi ne ārucname. ¹⁵ Iiwāreja mete cabu ca cuta nuuja mename seemo te tasatige, baborage tagepogogo ca ala abayige pui gwidape bau me, carbe cabu lui te enajige egā, “Maane gije abaciti määme turikā ca kuu bine alacname, ingle ārucna padare te hii tatyaramtige. Gawecewe te ngade bewangige ārucna täapume.” ¹⁶ Siige lui te adnatāneji enajige carbe cabu, teeme turikā ne sijarige gawe cabu me, siige iyeta ngade bine irucnimige.

¹⁷ Iiwāreja mete cabu ca tasatige nuuja mename seemo te. Tabe cuta girirage turikā cama ge. ¹⁸ Iiwāreja mete cabu iiwāreja dade gome ca cuta nuuja mename seemo te tasatige, lui te uliobo ne ire jaatwuge. Tabe oräre ala abayige pui mename seemo bau me, lui me ime cabu girirage turikā puga ge. Tabe apu jicige egā, “Määme turikā ca jelacnimi waina kuu bine, ingle ngade bewangetnemige gawecewe me calwacupi cabu.” ¹⁹ Siige pui mename seemo te teeme turikā ne sijarige gawe me, jelacnimige waina kuu bine, siige yiisabimige kula cupicu bora me ämungejame. Ai lui Acejiyame me daremu gyene niya mule biname bime täapume. ²⁰ Waina kuu bine jimungājemisi kula cupicu ngalebora je babo cewe kaakepoto cidi ca, siige uudi te tasatige pui ämungeja puupu cabu ca igi niye pana, lui niye yepā piyepu cebocebo miita ugle ge piyepu trii hanred kilomiita leca ge.

15

Seben Acejiyame me Mename Seemo cina Lui Mäpu bine Tityepemisi

¹ Piba cane jepānine mara opo gwidape ne cabucewe je, cālu te äti pana baborage gwidape. Pui lui seben mename seemo ge seben mäpu mule cama. Pui lui ceräcerägäabu mäpu mule gemi, ingle teepi Acejiyame me claabe ne pa yaapirepesi.

² Puma cita ca cane jepānine gwidape ne, lui glaasi malu pana ge, uliobo cama alengläcitāneji ge. Cane cuta jepānimine lui cina ituge uutruta drowā gwidape cabu ca, teeme pana wawenāneji gwidape cabu ca piyepu teeme ngii namba cabu ca. Teepi glaasi pana malu gome jecclajutemige, haapi bine joomlemisi, Acejiyame lui ecāranemige. ³ Siige teepi etangenisi Acejiyame me kaakesea biname Moose piyepu Maamoi, teeme uupera ne apu egā,

“Yageyame, kokrerage Acejiyame,

maane ngena jaawenute, baborage piyepu miijirage gyene!

Gawe maramara biname bime Mopeyame,

määme mule lipu conocāco piyepu toraca gemi!

⁴ Yageyame, iyeta biname cina wālu gemi määme täapume

piyepu määme ngii ne ewepyerājenisi,

ingle maane taatu gāte epucāco.

Iyeta gawe maramara biname cina cirege otni

meebine opo gaabe me acitame,

ingle teepi määme conocāco atrana ne ituge päpāna.”

⁵ Ai ingwe gaabe ca cane jepānine cabucewe je lui iiwāreja mete te iitneji ge. Pui mete cabu puga ge cābletäāpe ca wawenāneji mete, Acejiyame luma enajenige. ⁶ Iiwāreja mete cabu ca pui seben mename seemo cina täsige, lui bime mäpu mule puga ge. Teepi bulubulu cābletäāpe asigräreji ge, lui jugi cāco piyepu oplacmelāja cama. Teepi gol seea ca ätäyāneji ge dare cabu. ⁷ Fooa ireclota gwidape bime yepā te ecāranemige teeme yepäyepā bine gol disī. Acejiyame lui te iyeteta gyene, teeme claabe ca apanāneji ge pui disī cina. ⁸ Acejiyame me kokre piyepu apaclyera iiwāreja mete ne epu pana icwabige, kloka te lipu mete ne yaacwabuge. Nuuja te äblicāco ge piyeme abacita, ngālu pui seben mename seemo bime mäpu cina liba pa lapiripesi.

16

Seben Ceräcerägäabu Mäpu Mule

¹ Puma cita ca cane nätecijige baborage tagepogogo iiwāreja mete cabu ca, lui jejemige pui seben mename seemo bine egā, “Äte, ecebmälämeyge gawe cabu me Acejiyame me claabe cama lui seben disī gemi!” ² Piba niinäce manu mename seemo te ädige, ecebmälige teemanu disī ne gawe cabu me, siige lui cina drowā gwidape me cewecu ne itu yaacatepesi

cuta lui cina teeme pana wawenäneji gwidape ne itu opo gaabe me yaacitanepesi, teepi mage niyarage pita droobo bine jepänanemisi.

³ Puma cita ca neeneni manu mename seemo te teemanu disi ne ecebmalige malu cabu me. Niye te epu pana äbitige budre biname me uudi liyepu, siige iyeta ireclota gwidape cina budre äbitinini puma.

⁴ Cuta nesae manu mename seemo te teemanu disi ne ecebma-lige baduge bora me piyepu waja bora me, siige niye cina uudi me atep lengäjinini. ⁵ Cane näteciyige niye bine lui mename seemo te ire jetwemenige, jiicige egä,

“Oo, maane epucäco Acejiyame gäte,
maane lui tage uja piyepu lui säte page!

Määme atrana lui conocäco gyene.

⁶ Teepi yaaglecemepesi määme binamewale bine

piyepu määme menameyame bine,
siige maane becärimite uudi teepi nanime.

Teepi teeme niya mule daremu becatisi.”

⁷ Puma cita ca cane näteciyige iiwäreja dade gome ca tagepogogo egä, “Yageyame, kokragerage Acejiyame, määme atrana lui toraca gyene piyepu conocäco gyene.”

⁸ Puma cita ca fooa manu mename seemo te teeme disi ne ecebmalige bimu cabu me, siige bimu te baborage nuunu me äbitige, biname bine ebemige teeme nuunu te. ⁹ Biname bine niyaniya ebemige, yepä teepi Acejiyame me ngii ne sabe jewanani, lui me ime cabu sine ai mäpu bine ätpepejame. Teepi singi lica teeme niya mule cabu ca atatröngärame piyepu Acejiyame me ngii ne awepyeräjame.

¹⁰ Puma cita ca faib manu mename seemo te teeme disi ne ecebmalige drowä gwidape me babo adnata puupu cabu me. Krokeciye te icwabige tabe lui gawe ne ecanige. Biname cina wätä ägutani pita name pi. ¹¹ Siige teepi caburage Acejiyame me ngii ne sabe jewanani teeme droobo piyepu pita name pi, yepä teepi teeme niyaniya mule cabu ca lica atatröngärinini.

¹² Puma cita ca siks manu mename seemo te teeme disi ne ecebmalige Euprates baborage baduge cabu me. Baduge te yuuri-cnige, gaabe me äbitige naace täapume gawe mope biname cina otnime bimu acita gome ca. ¹³ Piba cane nesae niyarage cable bine jepänimine. Teepi poogä pana ge. Teeme yepä te siible me tage bora ca tasatige, nuuja te drowä gwidape me tage bora ca tasatige, nuuja te walya mename biname* me tage bora ca tasatige. ¹⁴ Teepi niyaniya seemo gämi, lui cina ciitaca mule bine jewenenemisi. Teepi cirege otnetneja gawecewe cabu ta maramara gawe mope biname bine abasecretname yepä gome me teepi cubu iicaname kokragerage Acejiyame me babo bimu cabu.

¹⁵ “Iteciyinege, cane eromaame pana ädenine! Gege gyene pui biname, lui te ireclota enajenige, teeme cäbletääpe bine cängenarage ire jetwemenige, piba tabe cuutacuta lica cire waatne-pi, siige biname bime sobe cabu tabe ajiri lica cirege.”

¹⁶ Puma cita ca pui seemo cina jebasecretnimisi gawe maramara mope biname bine puupu cabu me, Heberu mene ca lui puupu ne einenisi Armagedona ca.

¹⁷ Siige seben manu mename seemo te teeme disi ne ecebmalige buuwemope cabu me. Iiwäreja mete cabu babo adnata puupu cabu ca baborage tagepogogo te jiicige egä, “Siige, bapirige!” ¹⁸ Paamlepamle cina toplacmeläjinini, babo ala puga ge, maadubi cina ala sengenetnemige piyepu baborage ocneja puga ge. Niinäce pepu baborage ocneja ne lica ituge päpäna agedna cabu ca ngälu ai padare cabu. ¹⁹ Babo cewe te äplige nesae cebocebo me, piyepu cuta maramara gawe cabu ta modamoda cewe cina sabe äbitinini. Acejiyame te ngene lica jitrimalige babo cewe Babloniya poto cidi me, siige tabe jewenige waina niye nanime kaapo cabu ca. Pui waina niye lui teeme Acejiyame me claabe ge. ²⁰ Iyeta curä cina apeseräjinini, iyeta podo cina baa liiyeme äbitinini. ²¹ Modamoda aisi ipecu cina sitrametnemige cabu ca biname bime papa cabu me. Teeme yepäyepä bime mäpu lui footifaib kilo ge. Yepä biname cina Acejiyame me ngii ne sabe jewenisi ai mäpu miji pi, ingle mage niyarage ge.

17

Babo Sargi Magebi piyepu Drowä Gwidape

¹ Disi cama lui seben mename seemo, teeme yepä te tädige cäme bau me, najige egä, “Tädi, cane naawabenine, babo sargi magebi ne lipulipu cirege daremu ceera, pui babo cewe ne lui bucurage niye gome ituge raranga. ² Gawe maramara mope biname cina ten cama

* **16:13:** Fwalya mename biname: Ama cita ca ngälu neeneni me drowä gwidape lui te tasatapi gawe cabu ca, pui ne einenisi walya mename biname ca. Tabe niinäce drowä gwidape me ngii cabu mene jicemuge biname bine conocono gaabe cabu me waadename.

sargi mule ituge wawena, piiyepu biname cina sice buduma pana me ituge äbita teeme sargi mule waina niye nani cabu ca.”

³ Puma cita ca Aceji Seemo te nacenanige cebine, mename seemo te nacanige biname cäco cewe cabu me. Puma cane jopänine magebi ne adnatäneji ge ududi drowä gwidape papa cabu. Tabe lui seben mope cama ge piiyepu ten gaale cama ge. Teeme iyeta tääpe cabu niyarage ngii oogäräneji ge Acejiyame ne sabe wawename. ⁴ Magebi te ududi piiyepu ciriyäciriyä cäbletääpe asigräneji ge, acwabäneji ge gol ca wawenäneji abasogära gwidape ca, oplacmeläja kula ca piiyepu kusa ca. Teeme ime cabu gol kaapo puga ge, lui apanäneji ge teeme jugijugi mule ca piiyepu sargi mule ca. ⁵ Teeme mangace cabu oogäräneji ge ngii, lui me aboclomta ogä gyene. Apu oogäräneji gyene,
BABO CEWE BABLONIYA, LUI INGLE GYENE
IYETA JUGIJUGI PIIYEPU SARGI MULE TÄÄPUME
AI GAWECEWE CABU.

⁶ Cane jopänine, egä tabe sice buduma pana gwene Acejiyame me binamewale bime uudi nani cabu ca piiyepu eei bime uudi nani cabu ca, lui bine ituge budre me agleca Yeesu cabu ätrunga mijji pi.

Cane liba jopänine teebine, cane mage mutäcäco äbitine. ⁷ Pui mename seemo te cebine nätemlige egä, “Maane ngeno me mutäcäco bäbitite? Cane naajenine, ai magebi lui ngena tääpume mwene, piiyepu cane naajenine, pui seben mope cama ten gaale cama drowä gwidape lui ngeno myene, magebi lui me papa cabu onajenige. ⁸ Maane lui drowä gwidape ne niinäce jääpänepete, lui uja yaanajepi, siige page lica gyene, tabe mameta gyene cuta cääri asata piiyemrage cupicu cabu ca, yepä sabe cire läbitepi. Ai gawecewe cabu lenajayame lui bime ngii lica ituge oogära ireclota peba cabu, Acejiyame te luma ngii itu yoogärimuji agedna me niinäce gaabe ca, teepi cirege cälu te äti liba cire jääpänepesi ai drowä gwidape ne, ingle tabe uja yaanajepi, siige page lica gyene, yepä cuta cire tacnepi.

⁹ Umle biname lete nemi, teepi te ai mule ne ngene ca aglime. Drowä gwidape me seben mope lui seben podo gemi, magebi te lui papa cabu onajenige. Teepi cuta seben gawe mope biname gemi. ¹⁰ Faib cina itu itrametnemuji, yepä te pisi nyene, yepä te camu gyene otni. Tabe liba cire tädepi, tabe matikäli padare taatu cire yaanajepi. ¹¹ Cuta pui drowä gwidape lui te uja yaanajepi, siige page lica gyene, liba cire tacnenutepi, tabe eit manu babo biname me cire yaanajepi. Tabe cuta peese nyene pui seben mope biname bime yepä, siige tabe budre gome me cire lädepi.

¹² Maane lui ten gaale bine jepänimite, teepi lui ten gawe mope biname gemi, lui cina camu gemi mope biname me äbita. Teepi liba cire läbitipesi mope biname me, teepi pui drowä gwidape cama gigri matikäli taatu padare cabu biname bine cire yaawadepesi. ¹³ Teepi yepä ngene atwana cama cirege, siige drowä gwidape ne teeme kokre cire yääcärepsi. ¹⁴ Teepi cire larngipesi Maamoi cama, yepä Maamoi teeme binamewale cama pa yaapremalemepi teebibine, ingle tabe iyeta yageyame bime Yageyame gyene piiyepu iyeta mopeyame bime Mopeyame gyene. Teeme binamewale eei gemi, Acejiyame lui bine ala ituge asogleca piiyepu äjäcra. Teepi siige toraca gemi teeme tääpume.”

¹⁵ Mename seemo te cuta apu cebine najige egä, “Maane lui niye bine jepänimite, sargi magebi te lui gome onajenige, teepi lui gawe maramara, ingle maramara, tääpe maramara, mene maramara biname bime tääpu memi. ¹⁶ Maane lui ten gaale bine jepänimite piiyepu lui drowä gwidape ne jepänite, teepi pui sargi magebi ne cire jwäägyepesi. Teepi teeme iyeta gwidape bine cire yaawademepesi, cire jwiirecemepesi siige cuutacuta cire waabmalepesi. Teepi teeme mäju bine cire yäärngäjemepesi, siige uliobo cabu cire waaceratepsi. ¹⁷ Pui ten gawe mope biname cina cirege ai bine wawenetnäja, ingle Acejiyame te cire jaawenemepi teepi wawename, tabe ngena tääpume singi. Siige teepi yepä ngene atwana cama teeme kokre drowä gwidape ne cire yääcärepsi. Teepi drowä gwidape ne cire jäätecejepesi, ngälu Acejiyame me mene ibi cire läbitipesi. ¹⁸ Lui magebi ne jopänite tabe lui babo cewe tääpu mwene, luma cita ca ire jetwenenemisi iyeta gawe maramara mope biname bine.”

18

Babo Cewe Babloniya Itramige

¹ Ai mule ingwe gaabe ca cane piba jepänine nuuja mename seemo ne, lui te cabu ca täinige. Tabe babo kokre cama ge piiyepu teeme apacyera te gawecewe ne epacyäriige.

² Tabe babo tagepogogo ca ala abayanige egä,

“Siige tabe bitramige! Babo cewe Babloniya bitramige!

Tabe bäbitige jugijugi piiyepu niyaniya cable bime lenaja puupu me.

Cibu cäco niyarage ele cina puma teeme mete bine bii berangäjemisi.

³ Iyeta gawe maramara biname cina teeme waina niye ne senumesi,

teeme sargi mule me kokre waina niye ne.

Gawe maramara mope biname cina ten cama sargi mule yaacnepesi piyepu gawecewe me iyeta aletnaletna biname cina teeme bau ca bucurage rarekaake bine jääpānanemepesi, ingle tabe singi teeme bau ca gwidape aletname teeme lijaliya singi bine ngeneglime.”

⁴ Puma cita ca cane cuta nuuja tagepogogo cabucewe ca nätecijige, lui jiiicige egä, “Täsineye cāme binamewale, täsineye peei cewe cabu ca. Gone yääbācnuye teeme niya mule cabu me, piba weene ten cama yepä niya daremu ne lica cirege päpäna. ⁵ Teeme niya mule epu bucurage gemi, egä bii jegeletnemige cabucewe me, siige Acejiyame te ngeneglime bii jotwige teeme niyarage mule täapume. ⁶ Pepu jewenepeye teebine, tabe lipu weebibine itu jiwēnipi. Tabe ngena ituge wawena weeme täapume, weene cuta neeneni me daremu ewecnistepeye. Jengārepeye teeme kaapo ne neeneni gāābu kokre waina niye ca, tabe lui waina niye weebibine itu icāripi. ⁷ Puma ngālu māpu piyepu ele ecārepeye, tabe luma ngālu lawepyerājepi piyepu gwidape papa cabu yaanajepi. Tabe teemāmu apu jiiicanenige, ‘Cane age sāne babo mope magebi. Cane nuuja cuubla lica gāne; cane nuuja singi lica gāne ele me.’ ⁸ Peei name pi yepä bimū cabu māpu biijabija cina teebine cire jaabale-tnecepesi, naace pita, ngenecu māpu, gane. Teebine uliobo cabu cirege uubudera, ingle Yageyame, Acejiyame, lui te teebine cire jaatranepi, tabe babo kokreyame gyene.”

⁹ Siige gawe mope biname lui cina ten cama sargi mule yaacne-musi piyepu teeme singisingi cabu me yääbācnusi, teepi ele cire yāāwāyepesi liba cire jääpānepesi uliobo kloka ne, teebine lui te cire yaabenepi. ¹⁰ Teepi cudecewe je cire yāāmyemutemepi, ingle teepi mage wālu cirege teeme māpu name pi. Teepi cire jiiicesi egä, “Oo babo cewe Babloniya, babo kokreyame cewe, lipu niyarage gyene määme täapume! Maane watatarage atrana ne bii jepānite.”

¹¹ Ai gawe cabu gwidape bine aletname lui biname cina yaawadimusi, teepi cuta ele cire yāāwāyepesi teebine, ingle ingwe ca laati te teeme bau ca gwidape bine cire jaaletnemepi: ¹² teeme gol, silba, oplacmelāja kula piyepu kusa; miijimiji opo bulubulu cābletāāpe, silk cābletāāpe piyepu cābletāāpe lui ududi piyepu ciriyāciriyā kala cama; maramara uli miijimiji lengo cama, maramara gwidape lui bine wawenāneji gemi elepent me giricu ca, miijimiji uli ca, braasi ayana ca, ayana ca, bulubulu kula ca ngii maabolo; ¹³ piyepu maramara gwidape lui cina mite yāācārusi deedei ne, miijimiji lengo kloka cama lui gwidape, opo piyepu edingāli agana miijimiji lengo gwidape; waina niye, oil, bulu, wiiti kuu; kau, maamoi, cooso piyepu kariyuta, cooso cina lui bine yāāldānājemusi. Teepi cuta aletnāneji biname bine yaawadimusi aletname cuta piyepu biname bime ireclota bine. ¹⁴ Aletnaletna biname cina jējisi egä, “Maane lui miijimiji gwidape täapume babo singi naanananumi, siige lica gemi. Määme iyeta dogwe piyepu anglangla gwidape cina niya bābitinini, ingwe ca lica cirege päpäna.”

¹⁵ Yoo, lui biname cina pui babo cewe cabu me gwidape bine yaawadanemepesi aletname, puma cita ca rarekaake jääpānanemepesi, teepi cudecewe je cire yāāmyemutemepi, wālu cama ire cirege teeme māpu täapume. Teepi ele cire yāāwāyepesi, ¹⁶ cire jiiicesi egä, “Oo baborage cewe, lipu niyarage gyene teeme täapume! Tabe lasigrage miijirage opo bulubulu cābletāāpe ca, ududi piyepu ciriyāciriyā kala cama cābletāāpe ca; cuta labasogārige gol ca wawenāneji gwidape ca, oplacmelāja kula ca piyepu kusa ca. ¹⁷ Siige, watatarage teeme bucurage gwidape cina niya bābitinini.”

Siige iyeta buto waapo awadena biname, buto cabu kaakesea biname, buto cabu otnetneja biname piyepu malu cabu lijaliya kaakesea biname gemi, teepi iyeta cudecewe je cire yāāmyemutemepi. ¹⁸ Siige liba jepānisi teeme kloka ne cabu me agela, jiiicisi egä, “Oo, nuuja cewe lica gyene ai cewe pana!” ¹⁹ Teepi uubli ca aganinini, ele ewāyisi, jiiicisi egä, “Lipu niyarage gyene ai baborage cewe täapume! Teeme bau ca iyeta lijaliya buto yageyame cina teeme rarekaake bine jääpānanemusi. Siige watatarage iyeta teeme gwidape cina niya bābitinini.”

²⁰ Cabucewe, maane miiji gege, ingle pui babo cewe te lipu niya ne bii jepānige! Acejiyame me binamewale, weene miiji gege; Keriso me ätyepāneji biname piyepu Acejiyame me mename biname weene cuta miiji gege, ingle Acejiyame te niya daremu becārige teebine, naace name pi tabe lipu weebibine jiwēnipi.

²¹ Puma cita ca yepä kokre mename seemo te babo kula ne ecatige, ijarige malu cabu me, jiiicige egä, “Babo cewe Babloniya ne apu cirege gawe me ajara, siige ingwe ca lica cirege päpäna. ²² Ingwe ca lica cirege määme gaabe cabu ätecija haapi ala ne, nuuja uupera ne, gogogo ala ne, moole ala ne. Biname cina lui maramara kaakesea bine jaawenimusi, teebine ingwe ca lica cirege määme cabu päpäna. Deedei gādñāja guugla ingwe ca lica cirege ätecija määme cabu. ²³ piyepu lampa ngale ne ingwe ca lica cirege päpäna määme

cabu, cuta ciweloooloyame bime atejäclmuta gege ne ingwe ca lica cire jääpänepesi mäame cabu. Apu cirege äbita, ingle mäame aletnaletna biname, lui niinäce gaabe ge ai gawecewe cabu, piijepu mäame mowä piijepu piiseba mule biname cina gawe maramara biname bine itu yaangletnäjemepesi. ²⁴ Mäame gaabe cabu cuta ituge apira Acejiyame me mename biname bime uudi piijepu cuta teeme poto binamewale bime uudi, cuta iyeta biname bime uudi, lui bine ituge agleca ai gawecewe cabu.”

19

¹ Ai ingwe gaabe ca cane näteciijige bucurage biname cina iicana pana tagepogogo cabucewe ca, lui jiiicige egä,
“Acejiyame ne ewepyeräjeje!

Ireclota, iyeta miiji piijepu kokre mime Acejiyame memi,

² ingle teeme atrana lui conocäco piijepu toraca gyene.

Taba jutranige babo sargi magebi ne,

lui ai gawecewe ne ire jaarmetnanuge teeme sargi mule ca.

Acejiyame te mäpu daremu bii bocäriige;

ingle tabe teeme kaakesea bägrä bine budre me itu yaaglecanemepi.”

³ Teepi cuta cääri abayaninisi egä, “Acejiyame ne ewepyeräjeje! Babo cewe me kloka te iyeteta cire jaagelepi cabu me!” ⁴ Puma cita ca twentifoo modamoda biname piijepu fooa ireclota gwidape cina itrametnimalige gawe cabu me, Acejiyame ne opo gaabe me ecitisi, babo adnata puupu cabu lui te enajenige. Teepi jiiicisi egä, “Toraca, Acejiyame ne ewepyeräjeje!”

Maamoi me Atejäclmuta Soriyomu

⁵ Piba cane näteciijige tagepogogo te babo adnata puupu gome ca jiiicige egä, “Iyeta Acejiyame me kaakesea bägrä, lui cina wälu gemi teeme täapume matimati cabu ca ngälu modamoda, weene mime Acejiyame ne ewepyeräjeje!”

⁶ Siige puma cita ca cane näteciijige bucurage biname cina iicana pana tagepogogo, epu pana niye te lipu babo ala cama täcwäjiicige podo cabu ca, cuta maadubi ala pana ge. Teepi apu jiiicisi egä,

“Acejiyame ne ewepyeräjeje!

Yageyame, mime kokrerage Acejiyame,

tabe sine page Mopeyame!

⁷ Mine miiji ngenecu miiji piijepu gege ninajinege!

Mine teeme ngii ne yaawepyeräjesi,

ingle Maamoi me atejäclmuta padare te bii tatyaramtige.

Teeme ngulebägrä te amacetnäjäneji gwene teeme täapume.

⁸ Teebine ituge jugi cäco bulubulu cäbletääpe ceera
tabe asigrame.”

Ai bulubulu cäbletääpe lui Acejiyame me binamewale bime conocäco mule gemi.

⁹ Puma cita ca mename seemo te cebine najige egä, “Maane yoogäri egä: gege gemi, lui cina ala asogläcneji gemi Maamoi me atejäclmuta soriyomu täapume.” Cuta tabe jiiicige egä, “Ai lui Acejiyame me toraca mene gyene.”

¹⁰ Cane teeme ernge gawe me natramige teebine opo gaabe me acitame, yepä tabe najige egä, “Peei ne gone jaawenute! Cane cuta Acejiyame me kaakesea bägrä gäne maane liijepu cuta mäame poto ätrunga binamewale cina liijepu, iyeta lui cina joomlenisi toraca mene ne, Yeesu lui ne ituge awabudnita. Maane Acejiyame ne opo gaabe me eciti!”

Yeesu lui toraca mene ne ituge awabudnita, peese nyene lui te Acejiyame me mename biname bine ngenene atwana yäcäranemuge.

Biname Lui te Bulubulu Cooso cabu Tädige

¹¹ Puma cita ca cane jepänine cabucewe te iitneji ge, cuta bulubulu cooso ne jepänine puma. Cooso cabu lui te tädige, teeme ngii lui Toraca piijepu Conocäco. Teeme atrana piijepu cubu iicana lui conocäco gyene. ¹² Teeme irecu lui uliobo wädräji pana ge, piijepu teeme mope cabu puga ge bucurage krauni. Teeme cabu ngii puga ge, yepä nuuja te umle lica gyene, ngena ngii gyene. Tabe taatu gyene umle. ¹³ Tabe lui cäbletääpe ca asigräneji ge, uudi cabu ituge iiglenuta. Teeme ngii lui Acejiyame me Mene gyene. ¹⁴ Cabucewe caami cina teebine ingwe sicwisi, bulubulu cooso cabu seclige. Teepi jugi cäco bulubulu cäbletääpe cama ge. ¹⁵ Bulubulu cooso cabu lui te tädige, teeme tage cabu ca girirage cubuturikä te tasatige. Tabe pui turikä ca cire yaapremalemepi gawe maramara biname bine. Tabe teebibine ayana suru ca cire yaawecetnäremepi. Tabe kokrerage Acejiyame me claabe ne cire yaaboclomtepi. Biname te lipu jäämungäjemuge waina kuu bine miigi

apirame, tabe pepu cirege Acejiyame me cubuyame bine ämungeja. ¹⁶ Teeme cäbletäëpe cabu piyepu wawe cabu ngii oogäräneji gyene egä, IYETA MOPE BINAME BIME MOPE BINAME, IYETA YAGEYAME BIME YAGEYAME.

¹⁷ Puma cita ca cane mename seemo ne jepänine bimu cabu aclajuteji. Tabe baborage tagepogogo ca ala abayanige iyeta ele bime cabu me, lui cina cabu je uujaninini egä, “Naaclege, tabasecretnineye Acejiyame me babo soriyomu täápume! ¹⁸ Naaclege gawe maramara mope biname bime mäju cibi me, cubu mope biname bime mäju cibi me, caami biname bime mäju cibi me, cooso bime mäju cibi me, teeme waadenenayame bime mäju cibi me. Iyeta biname bime mäju cibi me naaclege, aletnäneji biname bime mäju cibi me piyepu poto biname bime mäju cibi me, iyeta biname bime mäju cibi me modamoda biname cabu ca ngälu matimati me.”

¹⁹ Puma cita ca cane jepänine drowä gwidape ne piyepu jepänimine gawe maramara mope biname bime piyepu teeme caami bine. Teepi abasecretnäneji gemi naace täápume cubu iicaname biname cama, lui te bulubulu cooso cabu tädige, piyepu teeme caami cama. ²⁰ Drowä gwidape piyepu walya mename biname, lui te ciitaca mule itu jaawenemepi teeme opo gaabe je, teebibine joomlisi. (Teeme pui ciitaca mule ca tabe ituge angletneja, lui cina drowä gwidape me cewecu ne itu yaacatanepesi, cuta teeme pana wawenäneji gwidape ne lui cina itu opo gaabe me yaacitanepesi.) Siige teebibine ireclota cama aajarisi uliobo puupu cabu me, luma niyyarage lengo gwidape ngii sulphur ayenige. ²¹ Teeme caami bine cubuturikä te eglecimige, lui turikä te tasatige pui me tage cabu ca, bulubulu cooso cabu lui te tädige. Iyeta ele cina teeme mäju bine erngäjimisi, ngälu camuge äbitinisi.

20

Satani te Cirege Ätäyäneji Lenaja Yepä Tausen Kämäge Ngalebora

¹ Cane puma cita ca jepänine, Acejiyame me mename seemo te cabucewe ca täinige kii cama piyemrage cupicu ne iitnaname, cuta teeme ayana seea puga ge. ² Tabe joomlige siible ne, pui sasarage cobyame ne, Diyabolo ca piyepu Satani ca lui ne einenisi. Tabe jetäyige teebine yepä tausen kämäge täápume, ³ ijarige piyemrage cupicu bora me, cupicu ne kii ca ermige, klaje jwenige tabe puma lenajame ngälu yepä tausen kämäge cina liba cire lapiripesi, siige tabe piba biname bine lica angletneja. Peei ingwe gaabe ca teebine cirege asata, iibira matikäli padare cabu lenajame ai gawe cabu.

⁴ Puma cita ca cane jepänimine mope biname bime adnatera puupu bine piyepu lui cina adnatäreji ge puma. Teebibine conocäco ituge ceera atrana täápume. Cane cuta eei biname bime cable bine jepänimine, lui bine ituge budre me agleca, ingle teepi Yeesu ne itu teitnejanumesi, piyepu Acejiyame me Mene ne itu tejanemumesi. Teepi lica ituge drowä gwidape ne awejena coo piyepu teeme pana wawenäneji gwidape ne. Teepi cuta teeme cewecu ne lica ituge acatena mangace cabu coo piyepu ime cabu. Teepi ireclota cabu me täcnärige, mope biname bime adnatera puupu cabu adnatärige, siige Keriso cama gigri ai gawecewe ne ecanisi yepä tausen kämäge ngalebora. ⁵ Poto budre biname cina ireclota me lica täcnärige, ngälu peei yepä tausen kämäge cina liba apirinini. Ai lui niinäce budre ca arpinera gyene. ⁶ Babo gege gemi, lui cina budre cabu ca niinäce cirege arpinera; teepi Acejiyame me binamewale gemi. Uliobo puupu lui neeneni me budre gyene, tabe teebibine lica cirege oomlema, yepä teepi iiwäreja biname täápume cire yaacrajemepi Acejiyame täápume piyepu Keriso täápume. Piyepu teepi Keriso cama gigri cire yaacanepesi ai gawecewe ne yepä tausen kämäge ngalebora.

Satani ne Epremalisi

⁷ Yepä tausen kämäge cina liba cire lapiripesi, Satani ne piba cirege asata cupicu cabu ca, siige iibira. ⁸ Tabe cire waatnepi iyeta poto ta gawe maramara biname bine angletnejame, naace Googi piyepu Maagogi biname bine. Tabe teebibine cire jaabasecretne-mepi cubu iicaname. Teepi epu bucurage gemi malu cabu koriyo liyepu. ⁹ Teepi ai gawecewe cabu eplidnärisi, Acejiyame me binamewale bime lenaja puupu ne jewaclomtisi, piyepu pui babo cewe ne tabe lui täápume singi. Yepä uliobo te täinige cabucewe ca, siige eglecimige teebibine. ¹⁰ Satani lui te teebibine ituge angletneja, teebine ijarisi uliobo piyepu niyyarage lengo gwidape ngii sulphur wädräji cabu me, niinäce liiyeme ituge ajara drowä gwidape naabine walya mename biname. Teeme puma peei mäpu cabu lenaja iyeteta gyene, ciye bimu.

Ceräcerägäbu Atrana

¹¹ Puma cita ca cane jepänine bulubulu babo adnata puupu ne, cuta lui te adnatäreji gyene puma. Cabucewe piyepu gawecewe cina uucrasi teeme opo gaabe ca, siige teebibine ingwe ca lica cirege päpäna. ¹² Piyepu cane jepänimine budre biname bine matimati

cabu ca ngälu modamoda me, teepi babo adnata puupu opo gaabe je jeclajutemige. Siige peba bine jepatnämisi. Cuta nuuja peba ne jepatnisi, naace ireclota peba ne, ngälu cäco ireclota päpäna täापume luma ngii oogäräneji gemi. Budre biname bine teeme mule ibi jitränimisi, peba cabu lipu oogäräneji gemi teeme poto cidi me. ¹³ Malu te teeme cable bine sewecnimige, budre piyepu aadiri cina cuta teeme cable bine sewecnemäsi, siige teebibine jitränimisi teeme mule ibi, teepi ngena ituge wawenetnäja. ¹⁴ Siige budre piyepu aadiri bine aajarisi uliobo puupu cabu me. Pui uliobo puupu lui neeneni me budre gyene. ¹⁵ Piyeme cuta iyeta eei biname bine yisabimisi, lui bime ngii lica ge ireclota peba cabu, luma ngii ituge acrana ngälu cäco ireclota päpäna täापume.

21

Kirece Cabucewe piyepu Gawecewe Cirege Lenaja

¹ Cane piba kirece cabucewe naabine kirece gawecewe jääpänine. Niinäce cabucewe piyepu gawecewe cina ituge apira, cuta malu te ituge apira. ² Cane cuta jepänine babo cewe, kirece Yerusalema ne, Acejiyame täापume lui ne ituge mara me wawena, tabe teeme bau ca täinige cabu ca. Tabe epu pana abasogäräneji ge, ngulebägrä ne lipu waabasogärsi tabe atejälmuta äbitame. ³ Cane näteciyige baborage tagepogogo te babo adnata puupu cabu ca iicana egä, “Ire, Acejiyame me lenaja puupu page biname bime cama gyene. Tabe teta cama cire yaanajepi, teepi teeme binamewale cirege. Tabe Acejiyamerage te ten cama lenaja, tabe teeme Acejiyame cirege. ⁴ Tabe cirege teeme irecu cabu ca ele mäcu äciseja. Puma ingwe ca piba budre lica cirege, nuuja ngenecu mäpu lica cirege, ele lica, pita lica, ingle sasa mule cina uja ituge apira.”

⁵ Siige puma cita ca babo adnata puupu cabu lui te enajenige, jicige egä, “Cane iyeta gwidape bine kirece me jewenenemine!” Tabe cuta cebine najige egä, “Ai mene ne yoogäri peba cabu, ingle toraca gyene piyepu miiji gemi ätrungame.” ⁶ Tabe cuta jicige, “Siige, iyeta gwidape cina wawenäneji gemi! Cane lui niinäcegaabeyame piyepu ceräcerägäabuyame, cane agedna piyepu apira gäne. Laati te niyemecewe, cane conocäco yäacärune tabe nanime ireclota niye waja cabu ca daremu cäco. ⁷ Laati te yuutrutuge, tabe cäme bau ca jääpänuge, egä cane teeme Acejiyame cirege, tabe cäme bägrä cirege. ⁸ Yepä lui cina wälu ajiri birige Yeesu ne aitnejame, cuta lui cina teeme ätrunga bine yaabmaläcemusi, lui cina jugijugi mule bine jaawenanemusi, lui cina biname bine budre me yaaglecimusi, lui cina ero mule jaawenusi coo sargiyame birige, cuta lui cina mowäyame, piyepu lui cina yiwäräjemusii uuje bine piyepu ime ca wawenäneji gwidape bine, iyeta lui cina walya waatrominunusi, teebibine cirege piyeme isaba, luma uliobo piyepu niyyarage lengo gwidape ngii sulphur cina ayenäsi. Ai lui neeneni me budre gyene.”

Kirece Yerusalema te Täinige Cabu ca

⁹ Pui seben Acejiyame me mename seemo lui bime seben disii puga ge ceräcerägäabu mäpu mule cama, teeme yepä te tädige cäme bau me, najige egä, “Tädi, cane naawabenine Ngulebägrä, Maamoi lui ne cire waacatepi, tabe teeme coga cire waanajepi.” ¹⁰ Siige Aceji Seemo te cebine nacenanige, mename seemo te nacanige baborage podo caburage me. Tabe puma cita ca nawabige Acejiyame me babo cewe Yerusalema ne, cabucewe ca lui täinige Acejiyame bau ca, ¹¹ teeme apaclyera cama toplacmeläjünige. Tabe epu pana toplacmeläjünige oplacmeläja kula liiyepu, epu yaspere kula liiyepu, päpäna taatu ge. ¹² Tabe caburage atreji cama ge, piyepu twelb grana cama ge, twelb mename seemo cina lui bine ire jaatwemusi. Grana yepäyepä cabu twelb Israela ingle bime yepäyepä ngii oogäräneji ge. ¹³ Bimu acita gome ca nesae grana ge, kämäge poto ca nesae grana ge, bimu äpula gome ca nesae grana ge, uule poto ca nesae grana ge. ¹⁴ Babo cewe me atreji ingle täापume twelb modamoda kula bine acranäneji ge. Teeme cabu Maamoi me twelb ätyepänegi biname bime ngii oogäräneji ge.

¹⁵ Lui mename seemo te cebine mene najanige, teeme gol ca wawenäneji suru puga ge pui cewe ne atoneräjame teeme atreji piyepu grana cama. ¹⁶ Pui cewe me daamle piyepu leca yepä ibi ge. Siige mename seemo te teeme suru ca etoneräjige cewe ne. Tabe neeneni tausen fooa hanred kilomiita leca ge, cuta daamle pepu ge, cuta cabu me galena pepu ge. ¹⁷ Mename seemo te cuta atreji ne etoneräjige. Teeme cabu me galena lui sebenti miita ge. Biname te lipu suru ca mete ne yaatoneräjuge, pui mename seemo te pepu cewe ne etoneräjige. ¹⁸ Atreji lui yaspere kula ca wawenäneji ge, piyepu cewe lui golrage ca wawenäneji ge, glaasi pana, päpäna taaturage. ¹⁹ Pui twelb kula lui ingle gemi atreji täापume, maramara oplacmeläja kula ca abasogäräneji ge. Niinäce manu ingle kula lui yaspere kula ge, neeneni manu lui sapiri kula ge, nesae manu lui agate kula ge, fooa manu lui emeraldi kula ge, ²⁰ faib manu lui sardenus kula ge, siks manu lui karneliya kula ge, seben manu lui krusoliti kula ge, eit manu lui beruli kula ge, nain manu lui topasi

kula ge, ten manu lui krusoprasi kula ge, lebin manu lui jakiniti kula ge, twelb manu lui ametisti kula ge. ²¹ Twelb grana lui miiri ca wawenāneji ge; yepāyepā grana lui yepāyepā modamoda miiri ca wawenāneji ge. Babo cewe me gaabe lui gol ca wawenāneji ge, iyeta pāpāna taaturage, glaasi pana.

²² Cane iiwāreja mete ne lica jepānine puma, ingle Yageyame, babo kokre Acejiyame piyepu Maamoi, teepi puma cirege iyeteta lenaja, peei name pi nuuja ingle lica gyene mete tääpume teebibine luma awejename. ²³ Babo cewe me nuuja ingle lica gyene bimu piyepu mabye teeme apacylera tääpume, ingle Acejiyame me apacylera te epacylärenige, piyepu Maamoi lui teeme lampa gyene. ²⁴ Gawē maramara biname cina pui apacylera cabu cire waatnipesi, piyepu gawecewe me mope biname cina cire yaawademepesi teeme dogwe bine piyeme. ²⁵ Teeme grana lica cirege armi, ingle ciye lica cirege. ²⁶ Gawē maramara biname bime ngena dogwe piyepu miijimiji gwidape piti nemi, teepi piyeme cire yaawademepesi. ²⁷ Yepā nuuja niyaniya mule biname cina piyeme lica cirege äbācna, piyepu lui te ajiri cama mule jaawenimuge, cuta piyepu lui te walya waatromuge. Eei taatu cina cire yäbācnepesi, lui bime ngii oogārāneji gemi Maamoi me peba cabu iyeteta ireclota tääpume.

22

¹ Pui mename seemo te cuta nawabige ireclota niye baduge. Niiye te pāpāna taaturage ge, glaasi pana. Teeme mopecu lui Acejiyame piyepu Maamoi teeme babo adnata puupu ge, ² siige puma cita ca sewelenige babo cewe gaabe cole cabu ta. Pui baduge me neeneneni poto ta yepāyepā ireclota uli puga ge, lui cina twelb gāābu kuu jāāpānanemāsi yepā kāmāge ngalebora, iyeta mabye gaabegabe yepā gāābu. Teeme laame lui maramara gawe biname bime pita miiji wawenename. ³ Nuuja gwidape te lica gyene pui cewe cabu, Acejiyame te lui ne ägyi. Acejiyame piyepu Maamoi, teeme babo adnata puupu puma cirege. Acejiyame me kaakesea biname cina teeme tääpume kaakesea puma cire jaawenepesi. ⁴ Teepi teeme opo ne cire jāāpānepesi, piyepu teeme mangace cabu Acejiyame me ngii oogārāneji cirege. ⁵ Puma ciye lica cirege. Teepi nuuja singi lica lampa coo bimu apacylera tääpume, ingle Yageyame, Acejiyame, tabe sine teeme apacylera. Teepi cirege mope biname me lenaja iyeteta, iyeteta.

Yeesu me Acnenuta

⁶ Puma cita ca pui mename seemo te cebine najige egā, “Ai peba cabu lui mene, toraca mene gemi, piyepu miiji gemi ätrungame. Yageyame, Acejiyame, lui te ngene atwana säācāranemuge teeme mename biname bine, tabe tityepige teeme mename seemo ne teeme kaakesea bāgrā bine umle wawenename, egā ngena cina pagege watatarage äpletnera.”

⁷ Yeesu apu jücenige egā, “Itēcijinege, cane mameta gāne otni. Gege gemi, laatibi jāātrungimusi ai peba cabu lui mene gemi ciige padare poto cidi me.”

⁸ Cane, Yoane te nätecijui ai mene piyepu jepānemujine iyeta ai gwidape bine. Lui mename seemo te nawabetnāruji iyeta ai gwidape, cane siige natramuji teeme ernge gawe me teebine opo gaabe me acitame. ⁹ Yepā tabe najuji egā, “Peei ne gone jaawenute! Cane yepā kaakesea bāgrā gāne Acejiyame tääpume maane liyepu, määme binamewale Acejiyame me mename biname cina liyepu, piyepu iyeta lui cina ai peba mene yāātecijemuge. Maane cebine gone opo gaabe me nacistu, yepā Acejiyame ne opo gaabe me eciti!”

¹⁰ Tabe cuta najuji egā, “Ai peba cabu ngena mene gemi ciige padare tääpume, gone yāāmlitumi biname bime bau ca, ingle padare mameta gyene ai gwidape cina äpletnerame.

¹¹ Yoo, laati bemi niya mule biname, teepi pepu lenajame; laati bemi jugijugi muleyame biname, teepi pepu lenajame; laati bemi miiji mule biname, teepi pepu lenajame; cuta laatibi Acejiyame tääpume mara me ituge äbita, teepi pepu lenajame.”

¹² Yeesu jücenige apu egā, “Itēcijinege, cane mameta gāne acnenuta. Cane cāme daremu bine cire yaawademepene biname bine ceerame teeme wawenetrāja ibi. ¹³ Cane ni-inäcegaabeyame piyepu cerācerāgāābuyame, cane agedna piyepu apira gāne.

¹⁴ Gege gemi pui biname, lui cina teeme cābletāpe bine jugi cāco jāācisājemusi, naace tääpume teeme piba conocāco pisi nyene kuu loolo me ireclota uli cabu ca piyepu grana cabu äbācname babo cewe cabu me. ¹⁵ Yepā, babo cewe me kaake poto cidi ca cirege lenaja jugijugi mule biname, mowā piyepu piiseba mule biname, sargi mule biname, budre me aglecayame biname piyepu lui cina yiwārājemusi uuje bine piyepu ime ca wawenāneji gwidape bine, cuta lui cina baborage singi walya mene me, siige iyeta padare cabu walya mene jücanimusi.

¹⁶ Cane Yeesu te cāme mename seemo ne ituge ätyepa ai gwidape poto cidi me weebibine jajanename ätrunga maramara ingle cabu. Cane lui Daawida me kaakesaare gāne, cane jamyacu apacylera Guji Wale gāne.”

¹⁷ Siige Aceji Seemo piiyepu Yeesu me binamewale cina jiičenisi egä, “Tädi!” Iyeta lui cina yäätəcijemuge ai peba mene, teepi cuta miiji iicana egä, “Tädi!” Iyeta lui cina niyemecewe gemi piiyepu singi nanime, naaclege daremu cäco ireclota niye nanime.

Ceräcerägääbu Umlə Mene Gyene

¹⁸ Cane Yoane, cane singi gäne umle mene jajime lui te yäätəcijuge, ai peba mene ne liba yaacnemusi ciige gwidape poto cidi me: maane liba nuuja mene alengläcita peei cabu, Acejiyame te cuta nuuja gwidape ne cire yaacitepi määme daremu cabu. Tabe peei mäpu cire nääcāranepi, ai peba te lui bine jeitnäjenenemige. ¹⁹ Cuta maane liba nuuja mene ne yääyebliŋtute ai peba cabu ca ciige gwidape poto cidi me, Acejiyame te cire yaawademepi määme bau ca, tabe ngena miiji tääpume jiičenige ai peba cabu. Tabe meebine cire niibepi ireclota uli kuu loolome piiyepu Acejiyame me babo cewe cabu me otnime. ²⁰ Lui te jeitnäjenige, egä ai peba mene toraca gyene, tabe jiičenige egä, “Toraca gyene, egä cane mameta gäne otni.” Yoo siige, tädepi Yageyame Yeesu!

²¹ Mime Yageyame Yeesu me miiji te lenajame iyeta Acejiyame me binamewale bime cabu! Mene ngälu peese.